







植学

圖書在版編目(CIP)數據

儒藏.精華編.三〇/北京大學《儒藏》編纂中心編.一北京:北京大學出版社, 2009.8

ISBN 978-7-301-11748-4

I. 儒··· II. 北··· III. 儒家 IV. B222

中國版本圖書館 CIP 數據核字(2009)第 120725 號

書 名: 儒藏(精華編三○)

著作責任者:北京大學《儒藏》編纂中心 編

責任編輯:魏奕元 肖瀟雨

標 準 書 號: ISBN 978-7-301-11748-4/B • 0434

出版發行:北京大學出版社

地 址:北京市海淀區成府路 205 號 100871

網 址: http://www.pup.cn

電子郵箱: dianjiwenhua@163.com

電 話: 郵購部 62752015 發行部 62750672 編輯部 62765691 出版部 62754962

印刷者:北京匯林印務有限公司

經 銷 者:新華書店

787 毫米×1092 毫米 16 開本 44.75 印張 417 千字 2009 年 8 月第 1 版 2009 年 8 月第 1 次印刷

定 價:500.00元

未經許可,不得以任何方式複製或抄襲本書之部分或全部内容。

版權所有,侵權必究 舉報電話: 010-62752024

電子郵箱: fd@pup. pku. edu. cn

教育部哲學社會科學研究重大課題攻關項目

北京 大學,一九八五工程,一重點項目國家,社會一科學,基金,重大,項目「十一五」國家重點圖書出版規劃項目,重大工程出版規劃



《儒藏》精華編第三〇册

首 席 總編纂 季羡林

項目首席專家 湯一介

纂 湯一介

總

編

龎 樸

孫欽善

安平秋 (按年齡排序)

董治安 鄭傑文 王承略

本

册

主

編

儒藏》精華編凡例

則的典籍的叢編。 爲儒家經典和反映儒家思想、體現儒家經世做人原 、中國傳統文化以儒家思想爲中心。《儒藏 收書時限自先秦至清代結束。

一、《儒藏》精華編爲《儒藏》的一部分,選收《儒

学中 的精要書籍

互見。 已收入入選的個人叢書或全集者,僅存目録,並 土文獻。 漢文寫作的儒學著作,編爲海外文獻部類 寫者一律收其釋文文本。 《中國古籍善本書目》,於個别處略作調整。 分類法分類,大類、小類基本參照《中國叢書綜録》和 三、《儒藏》精華編所收書籍,包括傳世文獻和出 出土文獻單列爲 傳世文獻按《四庫全書總目》經史子集四 韓國、日本、越南儒學者用 個部類,原件以古文字書 凡單書 注明 部

> 四 、所收書籍的 篇目卷次,一 仍底本原貌,不選

編,不改編,保持原書的完整性和 獨 立性

爲主,酌校異同。校記力求規範、精煉。 勘價值的版本爲校本。 確定内容完足、精確率高的版本爲底本,精選有 五、對入選書籍進 行簡要校勘。 出校堅持少而精,以校正 以對校爲主 誤 校

例,進行規範化標點。 六、根據現行標點符號用法,結合古籍標點通 專名號除書名號用角號(《》)

落。 外,其他一律省略 正文原已分段者,不作改動。 七、對較長的篇章,根據文字内容,適當劃

千字以内的

短文

分段

及其他有關情況。 及整理時所確定的底本、校本(舉全稱後括注簡稱) 出現順序前詳後略。 介紹作者生平、該書成書背景、主要内容及影響,以 般不分段。 八、各書卷端由整理者撰寫《校點說明》,簡要 重複出現的作者,其生平事 蹟 按

九、本書用繁體漢字豎排,小注 律排爲單行。

凡 例

《儒藏》精華編第三〇册

經

部

詩

類

1

鳴

謝

本焕法師

《儒藏》精華編惠蒙善助,共襄斯文, 謹列如左,用伸謝忱。

壹佰萬元

北京大學《儒藏》編纂中心

本册責任編委 沙志利本 册審稿 人陳新

式微 一五九	谷風 五	匏有苦葉 四四	雄雉 四二	凱風 一三七	擊鼓 一三三	終風 一二六	日月 一二五	燕燕	緑衣 二〇	柏舟 一一六	邶 一一六	邶鄘衛 ○	毛詩後箋卷三	騶虞 一〇五	何彼襛矣 〇〇	野有死麕	江有汜
相鼠		定之方中 二一二	鶉之奔奔 二一〇	桑中 二〇七	君子偕老 一九九	牆有茨 一九七	柏舟 一九四	鄘 一九四	毛詩後箋 卷四 一九四	二子乘舟	新臺 一八五	静女 一八〇	北風	北門 一七五	泉水 七	簡兮	旄邱 六

目録	君子于役	黍離 二七五	王	毛詩後箋卷六 二七二	木瓜 二六八	有狐 二六五	伯兮 二六一	河廣 二五八	芄蘭 二五五	竹竿 二五四 モ	氓 二四八	碩人 二四二	考槃二四〇	淇奥 []三三	衛	毛詩後箋卷五 []三三	載馳 二二七	干旄
Ξ	女曰雞鳴三二七	遵大路 三二五	羔裘	清人 三一六	大叔于田 三一一	叔于田 三一〇	將仲子 三〇七	緇衣 三〇五	鄭 三〇五	毛詩後箋卷七 三〇五	邱中有麻 三〇一	大車 二九九	采葛 二九七	葛藟 二九五	兔爱 二九二	中谷有蓷 二八九	揚之水 二八六	君子陽陽 二八三

著三七三	還三七〇	鷄鳴 三六七	齊 三六七	毛詩後箋卷八 三六七	溱洧 三六二	野有蔓草三六一	出其東門 三五七	揚之水 三五六	子衿 三五三	風雨 三五一	東門之墠 三四八	丰 三四六	褰裳 三四二	狡童 ⋯⋯⋯⋯⋯⋯⋯⋯ 三四○	賽兮 三三八	山有扶蘇三三五	有女同車 三三一
毛詩後箋卷十 四二三	碩鼠 四二○	伐檀 四一六	十畝之間 四一四	陟岵四一二	園有桃 四〇九	汾沮洳 四〇五	葛屨 四〇一	魏	毛詩後箋卷九 四〇一	猗嗟 三九六	載驅 三九二	敝笱 三八九	盧令 三八七	甫田 三八四	南山 三八〇	東方未明三七七	東方之日 三七六

小戎	駟驖 四六三	車鄰 四六一	秦 四六一	毛詩後箋卷十一 四六一	采苓 四五八	葛生 四五五	有杕之杜 四五三	無衣 四五〇	鴇羽 四四七	羔裘 四四五	杕杜 四四 一	綢繆 四三九	椒聊 四三四	揚之水 四三〇	山有樞 四二五	蟋蟀 四二三	唐 四二三
株林 五二四	月出 五二二	防有鵲巢 五一九	墓門 五一四	東門之楊 五一二	東門之池 五一一		東門之枌 五〇二	宛邱	陳如九九	毛詩後箋卷十二 四九九	權奥	渭陽 四九五	無衣 四九三	長風	黄鳥	終南	兼葭

東山 五八九	鴟鴞 五八三	七月 五六〇	豳 五六〇	毛詩後箋卷十五 五六〇	下泉 五五五	鸤鳩 五五二	候人 五四七	蜉蝣 五四三	曹 五四三	毛詩後箋卷十四 五四三	匪風 五三九	隰有萇楚 五三六	素冠 五三三	羔裘 五三一	檜 五三一	毛詩後箋卷十三 五三一	澤陂 五二七
	笙詩 六七〇				采薇	天保	伐木	常棣	皇皇者華 六二四	四牡 六二〇	鹿鳴 六一三	小雅鹿鳴之什 六一三	毛詩後箋卷十六 六一三	狼跋 六一〇	九罭 六〇七	伐柯	破斧 六〇一

Ξ
_
册

巧言	庭燎 七四三
小弁 八三六	鴻雁 七三九
小宛	小雅鴻雁之什 七三九
小閔	毛詩後箋卷十八 ·················· 七三九
雨無正	吉日 七三四
十月之交	車攻 七二七
正月	采芑 七〇九
節南山七八二	六月 六九九
小雅節南山之什	菁菁者莪 六九六
毛詩後箋卷十九	彤弓 六九一
無羊	湛露 六九〇
斯干	蓼蕭
我行其野	南山有臺 六八〇
黄鳥	南有嘉魚 六七七
白駒 七五五	小雅南有嘉魚之什 六七七
祈父	毛詩後箋卷十七 六七七
鶴鳴	
沔水	三一册

大田 九二七	甫田 九二二	小雅甫田之什 九二二	毛詩後箋卷二十一 九二二	信南山 九一四	楚茨	鼓鐘	小明 八九三	無將大車 八九一	北山 八八六	四月	大東 八六九	蓼莪	谷風	小雅谷風之什 八六一	毛詩後箋卷二十	巷伯 八五三	何人斯 八四八
	季苗 九九三	釆緑 九九一	都人士	黄柳 九八五	角弓 九七七	采菽 九七一	魚藻 九七〇	小雅魚藻之什 九七〇	毛詩後箋卷二十二 九七〇	賓之初筵	青蠅 九五九	車牽	頍弁	鴛鴦	桑扈	裳裳者華 九三八	瞻彼洛矣 九三三

九	目 録
雲漢 一一八八	文王有聲 一〇八九
桑柔 一一七七	下武 一〇八四
抑 一一六五	靈臺 一〇七九
荡 一一五八	皇矣 一〇六七
大雅蕩之什 一一五八	思齊 一〇六〇
毛詩後箋卷二十五 一一五八	早麓 一〇五三
板一一五〇	棫樸 一○四九
民勞 一一四五	縣一〇三三
卷阿 四〇	大明 O
泂酌 一三九	文王一〇一四
公劉 一一二九	大雅文王之什 一〇一四
假樂	毛詩後箋卷二十三 一〇一四
鳧鷺一二五	何草不黄 〇 二
既醉 一一二一	苕之華 〇 〇
行葦 一一一四	漸漸之石 一〇〇六
生民 一〇九五	瓠葉 〇〇三
大雅生民之什 一〇九五	緜蠻 一〇〇二
毛詩後箋卷二十四 · · · · · · · · · · · · · · · · 一〇九五	白華 九九六

執競	時邁 一二七二	我將 二六九	昊天有成命 一二六四	天作 一二六一	烈文一二五七	維清 二五三	維天之命 二五	清廟 一二四八	周頌清廟之什 一二四八	毛詩後箋卷二十六 一二四八	召閔 一二四一	瞻卬 二三七	常武	江漢 二 二四	韓奕	烝民 一二〇四	崧高 一一九五
載芟一三一一	小毖 一三〇七	敬之 一三〇四	莇落 三〇三	閔予小子 一三〇一	周頌閔予小子之什 一三〇一	毛詩後箋卷二十八 ·········· 一三〇一	武 二九七	雝 一二九二	┣ 潛 一二九〇	有瞽 一二八九	豐年 一二八五	振鷺 一二八四	噫嘻 二八	臣工 一二八〇	周頌臣工之什 一二八〇	毛詩後箋卷二十七 一二八〇	思文 一二七七

目 録	長發 一三七八	玄鳥 一三七五	烈祖 一三七三	那 一三六七	商頌 一三六七	毛詩後箋卷三十 一三六七	閟宫 一三四六	泮水 一三三九	有駜 三三七	駉 三三〇	魯頌 一三二九	毛詩後箋卷二十九 一三二九	般 三二六	賚 一三二四	桓 三二二	酌 三二〇	絲衣 一三一六	良耜 三 三
																		殷武

毛詩後箋

3

式微 一五九	谷風 一五一	匏有苦葉 一四四	雄雉	凱風一三七	擊鼓 三三	終風 二六	日月 一二五	燕燕	緑衣 0	柏舟 一一六	邶 一一六	邶鄘衛 ○	毛詩後箋卷三	騶虞 一○五	何彼襛矣 〇〇	野有死麕	江有汜
相鼠	蝃蝀	定之方中 二二二	鶉之奔奔	桑中 二〇七	君子偕老	牆有茨 九七	柏舟 一九四	鄘 一九四	毛詩後箋卷四 一九四	二子乘舟 一九〇	新臺 一八五	静女 一八〇	北風 一七七	北門 一七五	泉水 七	簡兮 一六五	旄邱 一六一

目録	君子于役	黍離 二七五	王二七二	毛詩後箋卷六 ······ 二七二	木瓜 二六八	有狐 二六五	伯兮 二六一	河廣 二五八	芄蘭 二五五	竹竿 二五四 王	氓 二四八	碩人 二四二	考槃二四〇	淇奥 二三三	衛 二三三	毛詩後箋卷五	載馳	干旄
Ξ	女曰雞鳴三二七	遵大路 三二五	羔裘	清人 三一六	大叔于田 三一一	叔于田 三一〇	將仲子 三〇七	緇衣 三〇五	鄭 三〇五	毛詩後箋卷七 三〇五	邱中有麻 三〇一	大車 二九九	采葛 二九七	葛藟 二九五	兔爰 二九二	中谷有蓷 二八九	揚之水 二八六	君子陽陽 二八三

著三七三	還三七〇	鷄鳴 三六七	齊 三六七	毛詩後箋卷八 三六七	溱洧 三六二	野有蔓草三六一	出其東門 三五七	揚之水 三五六	子衿 三五三	風雨 三五一	東門之墠 三四八	丰 三四六	褰裳 三四二	狡童 ⋯⋯⋯⋯⋯⋯⋯⋯ 三四○	賽兮 三三八	山有扶蘇三三五	有女同車 三三一
毛詩後箋卷十 四二三	碩鼠 四二○	伐檀 四一六	十畝之間 四一四	陟岵四一二	園有桃 四〇九	汾沮洳 四〇五	葛屨 四〇一	魏	毛詩後箋卷九 四〇一	猗嗟 三九六	載驅 三九二	敝笱 三八九	盧令 三八七	甫田 三八四	南山 三八〇	東方未明三七七	東方之日 三七六

小戎	駟驖 四六三	車鄰 四六一	秦 四六一	毛詩後箋卷十一 四六一	采苓 四五八	葛生 四五五	有杕之杜 四五三	無衣 四五〇	鴇羽 四四七	羔裘 四四五	杕杜 四四一	綢繆 四三九	椒聊 四三四	揚之水 四三〇	山有樞 四二五	蟋蟀 四二三	唐 四二三
株林 五二四	月出 五二二	防有鵲巢 五一九	墓門 五一四	東門之楊 五一二	東門之池 五一一		東門之枌 五〇二	宛邱 四九九	陳 四九九	毛詩後箋卷十二 四九九	權奧 四九六		無衣 四九三	長風	黄鳥 四八八	終南四八四	兼

東山 五八九	鴟鴞 五八三	七月 五六〇	豳 五六〇	毛詩後箋卷十五 五六〇	下泉 五五五	鸤鳩 五五二	候人 五四七	蜉蝣 五四三	曹 五四三	毛詩後箋卷十四 五四三	匪風 五三九	隰有萇楚 五三六	素冠 五三三	羔裘 五三一	檜 五三一	毛詩後箋卷十三 五三一	澤陂 五二七
	笙詩 六七〇				采薇	天保	伐木	常棣	皇皇者華 六二四	四牡 六二〇	鹿鳴 六一三	小雅鹿鳴之什 六一三	毛詩後箋卷十六 六一三	狼跋 六一〇	九罭 六〇七	伐柯	破斧 六〇一

Ξ
_
册

巧言	庭燎 七四三
小弁 八三六	鴻雁 七三九
小宛 八二九	小雅鴻雁之什 七三九
小閔	毛詩後箋卷十八 七三九
雨無正	吉日七三四
十月之交	車攻 七二七
正月 七九三	采芑 七〇九
節南山七八二	六月 六九九
小雅節南山之什 七八二	菁菁者莪 六九六
毛詩後箋卷十九 七八二	形弓 ······ 六九一
無羊 七七六	湛露 六九○
斯干 七六二	蓼蕭 六八五
我行其野七六〇	南山有臺 六八〇
黄鳥 七五八	南有嘉魚 六七七
白駒 七五五	小雅南有嘉魚之什 六七七
祈父 七五三	毛詩後箋卷十七 六七七
鶴鳴	- +
沔水 七四七	三一册

大田 九二七	甫田 九二二	小雅甫田之什 九二二	毛詩後箋卷二十一 九二二	信南山 九一四	楚茨	鼓鐘	小明 八九三	無將大車 八九一	北山 八八六	四月	大東 八六九	蓼莪	谷風	小雅谷風之什 八六一	毛詩後箋卷二十	巷伯 八五三	何人斯 八四八
	季苗 九九三	釆緑 九九一	都人士	黄柳 九八五	角弓 九七七	采菽 九七一	魚藻 九七〇	小雅魚藻之什 九七〇	毛詩後箋卷二十二 九七〇	賓之初筵	青蠅 九五九	車牽	頍弁	鴛鴦	桑扈	裳裳者華 九三八	瞻彼洛矣 九三三

九	目 録
雲漢 一一八八	文王有聲 一〇八九
桑柔 一一七七	下武 一〇八四
抑 一一六五	靈臺 一〇七九
荡 一一五八	皇矣 一〇六七
大雅蕩之什 一一五八	思齊 一〇六〇
毛詩後箋卷二十五 一一五八	早麓一〇五三
板一一五〇	棫樸 一○四九
民勞 一一四五	縣一〇三三
卷阿 四〇	大明 O
泂酌 一三九	文王一〇一四
公劉 一一二九	大雅文王之什 一〇一四
假樂 一一二七	毛詩後箋卷二十三 一〇一四
鳧鷺一二五	何草不黄 〇 二
既醉 一一二一	苕之華 一〇一〇
行葦 一一一四	漸漸之石 一〇〇六
生民 一〇九五	瓠葉 一〇〇三
大雅生民之什 一〇九五	緜蠻 一〇〇二
毛詩後箋卷二十四 一〇九五	白華 九九六

執競	時邁 一二七二	我將 二六九	昊天有成命 一二六四	天作 一二六一	烈文一二五七	維清 二五三	維天之命 二五	清廟 一二四八	周頌清廟之什 一二四八	毛詩後箋卷二十六 一二四八	召閔 一二四一	瞻卬 二三七	常武	江漢 二 二四	韓奕	烝民 一二〇四	崧高 一一九五
載芟一三一一	小毖 一三〇七	敬之 一三〇四	莇落 三〇三	閔予小子 一三〇一	周頌閔予小子之什 一三〇一	毛詩後箋卷二十八 ·········· 一三〇一	武 二九七	雝 一二九二	┣ 潛 一二九〇	有瞽 一二八九	豊年 一二八五	振鷺 一二八四	噫嘻 二八	臣工 一二八〇	周頌臣工之什 一二八〇	毛詩後箋卷二十七 一二八〇	思文 一二七七

目 録	長發 一三七八	玄鳥 一三七五	烈祖 一三七三	那 一三六七	商頌 一三六七	毛詩後箋卷三十 一三六七	閟宫 一三四六	泮水 一三三九	有駜 三三七	駉 三三〇	魯頌 一三二九	毛詩後箋卷二十九 一三二九	般 三二六	賽 一三二四	桓 :	酌 三二〇	絲衣 一三一六	良耜 三 三
																		殷武

校點説明

完成)。 實爲其經學代表著作。 雅古義》二卷、《儀禮古今文疏義》十七卷、《毛詩後 按察使衡。 箋》三十卷以及《公羊古義》、《禮記别義》(後兩種未 庶吉士,散館授編修。 涇縣人,字景孟 的成果。 毛詩後箋》三十卷,是胡承珙畢生注解《毛詩》 諸經之中,於《毛詩》用力最勤,《毛詩後箋》 胡承珙(一七七六 究心經學,著《小爾雅義證》十三卷、《爾 ,號墨莊。 累官至福建臺灣道兼學政 嘉慶十年進士,選翰林院 一八三二),清安徽 加

從,研 申毛而不得毛意者,有異毛而不如毛義者,以 詩》,專主發明毛傳,爲之既久,覺鄭箋之於毛傳有 經文不知傳文之妙,不細繹傳文不知箋說之多 胡氏宦於京師之時,即與同年友馬瑞辰朝夕過 討《毛詩》,心 有所 得 則 互 相 質問。 胡 爲不 氏 治

校

點

説

明

以殁。 《毛詩後箋》付梓。 者,則 爲之條録而補綴之,使成完璧。 默誦不倦,然《魯頌·泮水》以下竟不能卒業,抱志 著此書,撰稿屢易,手自寫定,病亟之時 引,採集甚富。 又不得然後泛稽周秦古書。 始則求之本篇,不得則求之本經,不得則證以他 通者乃捨之而求他證。 失傳旨。 毛詩後箋》從毛者十之八九,從鄭者十之一二。 捨 其子請陳奂補之, 奂乃以其《詩毛氏 傳而從箋,然 其於《詩》,墨守毛傳,惟揆之經文實 胡氏以臺灣觀察引疾歸里,鍵户而 如此者僅十之一二而已,故 如箋說有本而於經文尤順 於語言、文字、名物、 胡氏卒後第六年, 猶 自 傳 1沈吟, 疏》語 有 經 且 訓 博 難

清 書》影印清道光十七年求是堂刻本爲底本,校以《皇 後三種皆祖求是堂本。 方氏刻本、《皇清經解續編》本、《廣雅書局叢書》本、 經解 《毛詩後箋》的主要版本有求是堂本、蛟川渏園 續編》本 和《廣 雅 此次校點,以《續修四 書 局 叢 書》本。 對 書中引 庫全

○年影印本《十三經注疏》中書徑稱書名。 ○年影印本《皇清經解續編》簡稱「《續經解》本」,清 著書院刊本《皇清經解續編》簡稱「《續經解》本」,清 一年補刊本《皇清經解續編》簡稱「《續經解》本」,清 文,查核出處,酌出校記。校記中,清光緒十四年南

號,以明起訖,使眉目清晰,便於閱讀。中,引號采取寬式標點,一家之說一般祇加一個引雜湊一說,或牽合一人之不同著作剪接成說。校點就家某說,或節引意引,或牽合一書中幾處文字引其家某說,或節引意引,此書尤甚,大都援

校點者 莊大鈞 石静 續曉瓊

福建臺灣道兼學政加按察使銜胡君

别

傳

領溪胡培暈撰

煩約 知縣 選 選 聯 行。 尚 世 議,是爲君之高 拔 翰 冠 歲 衡 自 ,其年 束。 徽 能文章,十三人庠,十八食餼。 生君 林 其 順治壬辰進士,官至湖南 祖 姓 軍 州 院庶吉士 胡 稍 兆 婺 五. 即 源 歲就傅,即 殷,邑庠生。 氏,諱承珙,字景孟 嘉慶六年辛酉,君年二十六,膺 晚,奇愛之。 中式江 遷 祖。 散 涇之溪頭,都 館 南 曾祖之棅 授編修。 鄉試 穎悟, 父遠齡,多隱 然君自幼馴 誦 河南 乙丑成進士, 二十五 ,號墨莊。 庚午爲 布 讀 政 倍常 歲科 使 新 傳 謹 廣 德 安 司 試 兒。 不 東 參 先 縣 懿 至

後歸 貼,名目縱爲辦公,豈盡必不可省? 勒,逼令擔承。 肯甘心承受,自 以 曰 項 濫 條:「一 墊、衣服 而 州縣,内而慫恿本官,將不應借支之款 鄉 向有扣除二三成之弊,故藩司書吏外而授意 負 身居言路,當周知天下利弊,陳之於上,方不 而 其最 在 借。 興 議單、欠票虚 抑勒宜禁。 職 試 款 修 放者利于多扣,不復問其合宜。 副 無 Ī 此在領者便于急需,不敢望其 切 故 曰 考官,尋遷御 、器皿 期 程,多有署印 其 中時 冒 ,則雖 數 濫 等項,均不准充抵。 州縣交代,例限綦嚴, 病者, 年 宜 治 開實抵者。 中, 禁。 曰 應放而仍與浮冒無異。 伊 糜費宜省。 戚? 史,轉給事 陳 則有條 各省司 人 奏甚多,多見施 負 總由 輒 在新任之員,豈 陳 庫 行 虧空弊端各 中。 各省 上司多 支借, 支發錢糧 近日 攤 至于 足 聞 自 切 冒支 方 仍 離 數; 州 捐 以 行 抑 多 鋪 縣 任 津 動 爲

升及調 升調宜: 轉 即 承 累,不復 其欺朦。 之名,以 時,或詡擔 筦籥,前 此 項 閱 所 加 員,然每多 而 他省 厲。」 因 彌 不 費 抄 無 解 報 補 口 用 益 各 原任之有虧 慎。 其言深切著明。 補繁缺二者,其 之費 少, ,皆屬空名,不過 , 而 上司 ,每年通派 顧 任 可 巧合上意。 在 各省又有刻報 久 知 後 承之力,以自見己長, 亦 有虧,不敢輕易接受。 部選 題升者急於得缺 衙 歷 如 何 而 門 邸 仕 瞻 事 須 希圖 人員多係初任,或 飯 各屬竟及萬 前 途,習成狡 報 捐 食、 如 上司不 費如 挪 中 季規 在 此,他 事 剜 又如奏漕船積弊 彼 固 調 肉 此之多。 分。 州縣 不無結 等 以 加體 補 明知 補 事 掩此。 滑 金。 銀 者 瘡 多出 可 聞 於 遷 察,輒 甚 逐歲 或託 惟佐 知。 此 實 尚 安徽 竊 就 升 究之擔 Ħ. 地 可 能 己 思 增 之多 調 變本 靠 省 謹 貲 易受 彌 刻 雜 省 一日 時, 加 之 補 之 題 守 如 報 取 此

廉其能 授福 者熟 綏 清 闊 絶風 械 勞成疾,然自君去後 肅 以 緝 江 充等多名置 江 舵工 漕 等 鬭 捕 ,率屬清慎。 莊弭盗之法,鎮之以静,感之以仁,民 ,民多獷悍 輯之功不少矣。 病乞假回 幫最 清。 船 起 章 建分巡延建邵道。 也 水手,習教 釁,擾及全 程 滋 ,調署臺灣兵備道。 八條 事 在科 甚 己卯,充順天 籍調 重案。 、恐釀 於法,旋 ,素稱難治。 道任 ,通行各屬 事無鉅 理。 斂 成事 臺 足見君於天下利弊 内, 錢 踰 奉旨 臺地背山 至 **小端」。** 年 細 鄉試 巡 莅任編 糾 動 ,悉心綜理 [實授。 視 結 而彰 君在臺三 至即 匪 大兵勦 倉 同 黨 後 徒 考官 查保甲 厫 與。 化 面 數 斂 緝獲洋 東 淡 道光甲 海 年 跡。 用用 載,力行 城 幅 , 果 江 水 ·, 設立 是冬, ,皆弊 蘇 有 是 番 盗 上官 則 即 幀 申 積 以 安 君 潦 求 浙 浙

君自少工舉業、詞章,通籍後,究心經

是矣。 乃斷 《詩》,鄭仲師 門所記 書· 蓺文志》,與《爾雅》並入《孝經》家。 經援及。 子雲、張稚讓、劉彦和之倫,皆以《爾雅》爲孔 雅》者、《爾雅》之羽翼、六蓺之緒餘也。《漢 叢子》中,世多謂 力著作。 非,不爲 補撰數十條。 人,以牽於公事未就。 小爾雅》合者,特以 遇 以 人有投以 謂惠氏 有 ,以釋六蓺之文者。 漢 爲真,作《義證》。其言曰: 虚 講 然如《説文》所引《爾雅》之『琼』,則 君初精 儒 文酬 求 訓 棟《九經古義》未及《爾雅》,遂 《小爾雅》原本不傳,今存《孔 撰著者,必 實學者,必 馬季長注《禮》,亦往 討, 應。 爲僞 研小學,熟於《爾雅》、《説 多本《爾雅 不著書名,後人 解 書。 經多 至是歸里調 細 殷 君初亦疑其僞,後 然則《小 勤 心 加 考覈 得,不 造 **%** 訪 别 。 引 爾雅》猶 愈,遂專 毛 疑 往 ·苟 公 其 有 同 其 爲 未 傳 爾 與 揚 是 前 同 0 草 義 矣。 彰。

未必多所竄亂也。」又取 多刺取古籍,而所取之《小 引,核之今本,粲然具存。此可見《孔叢》本 經》,李氏之注《文選》,陸氏之音義,孔賈之 遂以《孔叢》之僞而并僞之。 無」、『邵美』,即用《雅》訓,是固足以名其學 固明明 ·公孫」之偁、『請命」之禮、『屬婦』之名,合符 詩》、《書》,深裨經誼。 疏,小司馬之注史,釋玄應之譯經,其所徵 唐以後,人取爲《孔叢子》第十 李軌作解,今雖不存,而所注《法言》『曼 在《小 爾雅》矣。 戴氏震所疑 其中如『金舄』之解 沿及魏晉,援 爾雅 而酈氏之注《水 : 》猶 係 四 一篇,世 完書, /據益

術

辨釋,具戴本書。

創《 嘉慶甲戌,培翬 儀禮 疏 影,昕 夕與君談論 在 都,館於 君 君見鄭氏注 邸。 時方

戴」,廣 雅本作「載」。

中引古今文異字 「吾當專爲書,以助子全疏之一矣。」其 賈 疏 多 略 不 及,笑 謂 培 置

書· 蓺文志》云古經出於魯淹中者也。 疏 後在閩、渡臺,以書笥累重難攜,獨攜《儀禮》 本,出於高堂生所傳,所謂古文者,則《前 經,每日公事畢,輒纂一二條,成《古今文 其言曰: 「鄭注所謂今文者,乃小 鄭君 戴 漢

文出 文繅,或作藻。』且有不言今古文,但云某或 然今文古文,各有一字兩作者。 植。』『繅』爲古文,『璪』爲今文,而又云:『古 文,『胾』爲古文,而又云:『今文膱,或作 注,從古文者,則古文在經,今文出注 如『膱』爲 今

作注,參用二本。從今文者,則今文在經,古

作某者。 字多通借。 影異 讀,凡皆審定聲義 殆當時行用,更有别本,典籍流 《周 禮 談故 書、《禮記》他本、《論 務存 折衷。 此 經之 傳,

注

一, 亦

同斯旨。

冣其略例,蓋有數端:

有必

别白而定所從、《鄉飲》、《鄉射》、《特牲》、《 異同考證 得其義,《士昏》從古文作『枋』、《少牢》從今 牢》諸篇是也;有互見而 久,而仍從『升』是也,有因彼以决此者, 兼以通今者,『升』當爲『登』,『升』則俗誤 字,『示』乃俗誤行之,而必從『視』是也,有 文作『柄』之類是也。」又嘗撰《春秋三傳文字 從『嗌』之類是也,有務以存古者,『視』爲 取其經典相承,從『辯』不從『徧』、從『膉』不 從『盥』不從『浣』之類是也,有即用借字者 用 正字者, 取 其當文易 曉 ,從「甒」不從 並存者,可參觀 「廡」、 小 則 IIII

於西漢以前古書中,反覆尋考,貫通《詩 精者,在能於毛傳本 所撰《毛詩後箋》 詩》之是者録之,似是而 然其畢生精 力所專注者,則 文前 書, 采 非者辨之。 後,會出指 集 甚 富 在《毛詩 歸,又能 後 而 其最 儒 説

方被訟

不從,

類,故箋

初讀

浥,溼意也。

之露太多,故不行耳。』案:此詩 奔』、《小雅》之『豈不懷歸 云: 『我豈不知當早夜成昏禮歟? 之似與《王風》之『豈不爾思,畏子不 《甚近,其語言、文字、名物、訓詁已有後 豈不夙夜,謂 ,有異毛而 治《毛詩》,君數與 語云云,正義 能盡通者,而况於唐人乎? 君尚有别擇 姑以一事言之:《召南》『厭 「承珙《後箋》專主發明毛傳。 行,道也。 而 知箋之於傳,有申 則君 開 不如毛義者。 口 行 所獨 乃云『豈不欲之』,作此 多 然亦從 即 書講 豈不,言有是也。」箋 露』,傳:『興 得者。 用 畏 以 此簡 論 述 毛者多。 蓋毛公秦人, 傳。 毛 同 首 奂 著 書」文法 而 時 章三語 但 謂 也 不得 長 書 嘗 此 道 况 浥 洲 毛 爲 相 行 於 女 中 厭 與 惟 陳 毛。 妙; 早夜而 簡質』四字了之而已。 性 學長於徵實,短於會 濡 傳正言之耳。 明其詞旨不同。『豈不,言有是』者,謂有是 也。 也。 申毛,而 婉 行,始犯多露,豈不早夜者而亦 衊之辭,衆不能 言有所畏而不敢,此則是『謂』非『畏』。 ·謂』字與下章『誰謂」之『謂』一律,皆訟 情者,以此。 己乎。以興本無犯禮,不畏彊暴之相誣 辭,不合語意。 至毛義 不細繹傳文,不知箋説之多失傳旨 故此云厭 毛於他詩『豈不』無傳,而 行者,乃可謂 以 爲 難明,不能旁通 易傳; 故不熟讀經文,不知傳文之 浥者道 唐人作疏,每欠分曉,或 察,而欲歸於召伯之聽之者 且

漢

人

所不

宋人乎?

去周

意者

之既

久,然後

中

之露,然

必 早

夜

而

謂

多

露之能

培翬書曰:

毛之從。

奂亦;

證

明

毛旨。

此

他

處言『豈不』者,下

皆

蓋

此

者

誣

拙著從毛者十之八

或

鄭

自

爲説,而

妄被之

箋

本

曲

鬯,輒以『傳文

虚

前

人謂

其

按

跡

而

語

鄭

獨

於此

言之,

道

中多露。

經反言之,

六

經文實· 泛稽周 陳 信』,而《左傳》、《國語》、《淮南》、《説苑》引此 躬 魏 通 往 九 手自寫定,至《魯頌 文尤順,故宜舍傳從箋。然似此者才十之一 詩,皆謂民不信上。 則求之本經,不得則證 録 而已。」此君《後箋》之大旨也。 弗 源 有 ,從鄭者十之一二。 奂補之。 親 書曰:「承珙於《詩》,墨守毛傳,惟揆之 前人從未道及者,不下數十百條 有難 秦古書。 本後,乃摘出别鈔,以便就正。」又與 庶 民弗信」,傳謂『庶 通者,乃舍之而求他證。 於語言、文字、名物、訓 • 泮水》而疾作,未卒業。 此箋説之所本,而 始則求之本篇,不 以 他經,又不得 民之言不 撰藁屢易, 如 於經 擬 詁 然 『弗 口 俟 往 後 得

講 液,棄其渣滓。 臶 序 君 詩 其集,謂「音節悉本唐賢,使典尤鎔 亦 積 生平精 體安以雅,辭麗以 力 以 爲者。 同 則,寄託 邑朱 其 侍

> 遥深。 之而未成者,又有《公羊古義》、《禮記 卷,卒後,子先翰、先類次第梓以行世。 其爲 卷、《奏摺》一卷、《文集》六卷、《駢體文》二 卷、《爾雅古義》二卷、《求是堂詩 證》十三卷,皆手自付梓。 所著《儀禮古今文疏義》十七卷,《 書。 詩之正聲,庶 幾 か弗と 《毛詩後箋》三十 墜」。 蓋 集》二十二 小爾 不 别義 誣 雅 也

之會。 日,卒於道光壬 多樂捐資助成。 極儉,然遇修邑城、興書院及族中平糶等事 出里門,不預外事,惟與二三故舊 君操行淳篤。 注經常至夜分,寒暑罔輟 辰 生於乾隆 歲 歸 閨 田 後,家 九月 丙申歲 十 居 . 四 九 間 三月十 平居自 日,年五 載 爲 詩 足 四 奉 酒 不

往拙於文詞。即或工文矣,而詩未必工,蓋論曰:世之沈潛經義、精於考訂者,往

七

毛 0

之申毛者爲易毛義。 毛也 失毛恉。 合。 則或取正字,或以 唐人作正義,每取 治 莊 過從,心有所得,輒互相質問,時幸有出門之 嘗與余同宦京師,余亦喜爲《毛詩》學,朝夕 韓 群 所著也。墨莊性沈静,寡嗜欲,獨躭著述。 詩 蓋《毛詩》詞義簡奧,非淺學所易推 經無不賅貫,而於《毛詩》尤專且精。 毛詩後箋》三十卷,余同年友胡觀察墨 》,兼通 正義泥于「傳無破字」之説,每誤 鄭君箋《詩》,宗毛爲主,毛義隱略, 齊魯之學,間有與毛不同者 旁訓 王子雍説,名爲申毛,而 又鄭君先從張恭祖授 疏通證明之,非 议 盡 測。 箋 往 實 易

> 《詩義巵言》、李氏《毛詩紬義》,徵引略備 則 謀而合也。 是所見同,所學同,所援引又同,宜其説之不 學》、阮氏《校勘記》、王氏《經義 子、史所引《詩》與近人説《詩》,若惠氏《詩 《説文》、《字林》、《玉 而墨莊自名其書爲《毛詩後箋》,名雖 説》、《詩古義》、陳氏《稽古編》、段氏《詩 爲傳義。 本三家詩,而 同。 余與墨莊同見及此。 故余所註,名《毛詩傳箋通釋》, 參以己意,正義又或誤以箋義 篇 》、《廣 韻》及經、傳、 述聞》、孔氏 凡所援據 異而 小 雷

注 于余,余受而讀之。其書主于申述毛義,自 疏而外,于唐、宋、元諸儒之説有與毛傳相 今墨莊已作古人,令嗣仲 池持其書請 序

毛詩後箋序

⁰ 標題 並於陳 原無「 序前增標題「毛詩後箋序二」。 一字,爲區别 馬序與陳序,今加一「一」字

至當。 發明 膺之篤,因並序而歸之。 者; 可懸國門者百數十條,將以補入余書,示服 大成,評異同而辨白黑。 墨莊不可得。 書成互相 存其説以待後人論定者。 毛與三家詩文有 而昭若發矇者; 有余蓄疑既 有與余説 無不 爲序。 廣徵博引 而墨莊是書,實能集《毛詩》之 亦有與余説互異,而不妨並 今余書粗已畢業,欲求序于 久,未能得其端緒,讀 異同, 大略 相同,而 類皆 ; 余既録其説之精核 而 墨莊曾與余約,俟 剖 于名物、訓 析 徴引博 精微 是 于 詁 折 書 衷 及

望

日

,年愚弟桐城馬瑞辰謹

序。

傳後,可稱立言不朽者已。

道光十四年正月

古今同轍。

墨莊

雖年未滿六十,而其書信今

稔,而後《毛詩後箋》得以

成

書。

研精覃思

詁》,墨莊以臺灣觀察引疾歸里,亦鍵户十餘

昔何劭公閉户十有七年,始成《公羊

解

26

毛詩後箋序二

是二年矣! 是二年矣! 是二年矣! 是二年矣! 是二年矣! 是二年矣! 是二年矣!

實則止坐鹵莽之過。」斯言可謂深切而箸明引曲證以相發明,而乃自出己意,求勝古人,流既真,義訓尤卓。後人不善讀之,不能旁古。數千年來,三家皆亡,而毛氏獨存。源先生有言曰:「諸經傳注,唯《毛詩》最

丁酉,冬十月,長洲陳奂謹記顛末云。觀,詎無續貂之誚。時道光十有七年,歲次《傳疏》語爲之條録而補綴之,俾有完璧之今與因令嗣之請,不辭譾陋,爰以拙箸

毛詩後箋卷

風

涇

胡承 珙

或

周南

召南

也。 教,故繫之召公。」箋云:「自,從也。 巢》、《騶虞》之德,諸侯之風也,先王之所以 王、王季。」正義曰:「文王之國在於岐周,東 南,謂其化從岐周被江漢之域也。 先王斥大 風,故繫之周公。南,言化自北而南也。《鵲 於紂都,西北 《序》云:「《關雎》、《麟趾》之化,王者之 漢廣序》云:『美化行乎江漢之域。』是 迫於戎狄,故其風化南行 從北 而

所得之詩,謂之『召南』。」范逸齋《詩補傳》 之地所得之詩,謂之『周南』,,召公所屬之地 文王之風化,不可繫之於文王。故周公所屬 分陝,在武王既得天下之後,周南、召南 最明者也。」李迂仲《毛詩集解》曰:「周召之 遠於文王,功業明箸,則詩作於下。 詩,而《周南》無周公之詩,周公在内,近於文 追謚 從岐周被江 曰:「自周公制禮作樂,即定『風」、『雅』、 王,雖有德而不見,故其詩不作,召公在外, 辟國百里。』言其治外也。 召公。《詩》曰:『昔先王受命,有如召公,日 其國者,屬之周公; 所以交於諸侯者,屬之 季。」蘇潁濱《詩傳》曰:「文王之風謂之『周 南」、『召南』,何也? ,上至大王而已,故知『先王』斥大王、王 漢之域也。 文王之治國也,所以 大王始有 《召南》有召公之 王 此理之 迹,周之 雖皆

之地 哉?」承珙案:周公、召公本以采邑得名,是 以 賢深淺者,未爲通論也。或以周召繫於所得 地名在先,爵名在後。《儀禮》,周公所作,已 訟明教之實,《邶》、《鄘》、《衛》皆衛詩, 名之也。 録之。彼區區欲分《周南》、《召南》,以 皆述后妃、夫人風化之效,本其所得之地 巢》』之語,豈非周公舊典歟? 周之樂章,詩人安得有是言。 以南』。此「以南」非《詩》二南,范氏説誤,辨見後。 雅」、「豳頌」之説,而幽王《小雅》亦曰『以 儀禮》有『乃合樂《周南・關雎》、《召南 周南》,以《鵲巢》爲《召南》,亦周之舊。 頌 邶鄘國風,然後信録《詩》者果以所得之地 爲 爲疑,及觀《召南》存召公之詩,且 樂章之名,故《周官》有『六詩』及『豳 二公采地不出岐周,豈 二《南》諸篇, 以《關 得而 雎 優 而繫 爲聖 有 鵲 劣 故 非 聽 而 雅

《武》,始而北出,再成 之樂,所 《南》之詩本於所得之地而係之耳,蓋歌 世取於樂章,用之爲 者之化自北而南,周召二公未嘗與其間。後 二《南》之聲。二《南》皆出於文王之化,言王 意,固各不相涉者也。《六經奧論》曰:「二 之法,以人分《周》、《召》者,乃序《詩》者之 皆由不知以地分《周》、《召》者,乃編《詩》者 公,與天子嫁女於諸侯,使諸侯爲主同義 謬,信《序》者則謂二公爲王行化,故繫之二 文王之化,於周召二公無與,且以《序》説爲 「繫之周公」、「繫之召公」者,乃作《序》者推 衍之意。後儒泥於此言,駁之者謂二《南》皆 所得之地爲名,必非别以二公之爵。《序》云 有《周南》、《召南》,則當時 以 彰文王 之 鄉樂、燕樂、射樂、房 德 而滅商,三成而南 美 編《詩》入樂,自以 也。 故 曰: 夫 則

《野有死麕》、《騶虞》、《序》皆言「文王之化」, 《召南》爲諸侯之風,亦是約略言之,猶《關 雎》、《麟趾》言化、《鵲巢》、《騶虞》言德,所以 者、諸侯又何容過爲區 王斥大王、王季、文王」,俗本删「文王」字, 互見其義故。 「先王之所以教」,箋本言「先 解最爲通達。 亦可見「先王」不專指大王、王季。 然則王 召公右、《周》《召南》之爲義 蜀石經》及《文選》注有之。 南」之爲義,蓋 至《序》以《周南》爲王者之風, 如是也。 一别乎? 五. 成 蓋 且《摽有梅》、 而 如是也。」此 分 ,周公左,

> 陜 陽、襄、鄧、承天、德安、光、黄、汝、潁是已。 屬可據。王氏夫之《詩稗疏》曰:「周公、召 廣》、《汝墳》、《召南》有《江沱》,則《序》説 《詩序》「自北而南」之説。然《周南》有《漢 珙案: 王氏以二《南》但采於周召之地,不信 深淺之别,后妃尊卑之差,皆强 同 安、鄖、夔、順慶、保甯是已。 可知已。 爲中線而 治之南國也。 公分陝而治,各以其詩登其國風。● 後,此官猶存。 南」者,周公所治之南國;『召南』者,召公所 制 西所統之南國爲召南,則今漢中、商雒、興 可謂 陝東所統之南國爲周南,則今南 南分之。《史記》謂雒 重矣 北界河雒,南踰楚塞,以陝 其宫亦有大室、宣榭, ! 此事甚明。 其國之風,或其 陽爲周南,從 而 爲 後 辭 也。」承 有 與宗 則同 聖賢 州 究 廟

 \equiv

❶ 「詩」、《續經解》本《詩經稗疏》作「治」。

縣。 或 别 名。 詩 水自龍安府石泉縣入江。 水人焉,又東别爲沱,人江過都安縣。 江,東别爲沱。』《水經》:江水歷氐道縣,湔 繫之《周南》。若《召南》之以地紀者,曰『江 節 或 有沱」,又曰『江有汜』。 墳》言江汝之間,則今之光州、新蔡也,而皆 廣》兼言江 王 非 爲 被之管絃,今雖 人 陵江 『古之周南,今之洛陽。』爲豫州,其南爲 沱江 沱 其 畿聖教賢化之殊乎?」顧古湫《虞東學 所 所 南。 即 《史記》『大史公留 汜也。 有 在今新繁縣。汜者,水决復入之總 南之地。 或 漢,江北漢南,今之潛 不言國者,文王未有 ,特風教遠被,以 非 其 言沱言汜,皆川 無考,而大要可知。 國 據此,則二陝分治之地, 人 所 《禹貢》: 都安,今成都府灌 作 滯 類附也。 而 周 以 北 天下,侯國 沔 南 其 『岷 西、漢水 也 三, 摯虞 俗之音 故《漢);《汝 今浦 何侯 Ш 獐 南」之説甚諦。 義

樂名。 信。 「南」。 説。 南之地 數千里,在在有之,不必專屬 疑雍州 著乎?」案:以上二説,發明《序》「自 『南澗之濱』、『南山之陽』、『南山之側』、『南 而得名。 山之下」,所指方名無有及於他者,不坦 之地,當以《通志》爲定論也。 氏》,雍 荆 禹貢》『岷 炳事白,餘若『南有樛木』、『陟彼南 州 至於爲『汜』爲『渚」,則自蜀至楚,江 愚謂樂之爲『南」,正 毛鄭皆云『自北而南』,諸儒 《類考》謂江沱之間即梁山之界,蓋 界畫然矣。 地狹,未免不均。 州實兼梁 漢 不獨《漢廣》、《汝墳》、《江沱》諸 山導江,東别爲沱」而 廣》 采之荆 考《括地志》云:今陝州 地,惟 若召南自陝 · 汝 自雍及梁,故 以 竊考《周官 墳 風化之被於 夏口。 至於『南』, 采 耐 言,其 之 西,朱子 故二 然 職 北 Ш 南 説 得 則 南 行 其 本 據 而 方 稱 方 可 周

有

辭。 《南》篇末冣數云:《周南》之國十一篇,《召 此《詩 或 氏 陝之所統,遂以周召繫之。 若僅南氏二臣之 漢以前師承古義。曰「之國」者,明非一國之 惟酈注又引《逸周書》云:「南,國名也。 經•江水注》引韓嬰叙《詩》,云其地在南 原 各爲編,故以其皆屬文王風化所及,而 南氏因分爲二南國也。」此則近於附會。 南陽之間 南》之國十四篇。 一去州 有 ,而冒之以周召,於義不可通矣。 所采之國既衆,而其詩之篇數或不能 二臣,力均勢敵,競進争權,君弗能 稗疏》以陝州爲中線之説所本 西 此亦謂自北而南,與毛《序》合。 南二十五 此等篇目,皆毛公之舊,必 里,分陝 以 此 也。 原 爲 爲分 《水 制, 郡、 界。 南 國

「以《雅》以《南》,以籥不僭。」季札觀樂,有(雅》、《頌》,無《國風》。《鼓鐘》之詩曰: 程泰之《考古編》曰:「《詩》有《南》、

《鼓鐘》,雖疑 皆指爲『南夷』、『南樂』以 惟《鉤命决》之《書叙》載『四夷之樂』,適有名 知其節奏爲何音何類,其贊頌爲何世何主。 之意」而已。夫諸儒既不敢主二《南》以 習之久,無敢正指以爲二《南》也。 之釋《左氏》,亦知《南籥》爲文樂矣,不勝傳 謂『胥鼓《南》』者,則《南》之爲樂古矣。杜預 《頌》,率參以《南》。 清》也。 也。」承珙案: 程説一往謬誤。 率皆因襲其説,凡六經之文有及於『南』者 『南』,而《詩》及《左氏》雖皆明 不敢自信,惟能微出疑見而曰『南,如「周南 籥也;《箾》,《雅》也;《象》舞,《頌》之《 『南』者,鄭氏因遂采取以足其數。 舞《象》、《箾》、《南籥》者」,《南 其在當時親見古樂者,凡舉《雅》、 『雅南』之『南』當爲二《南》,亦 其後《文王世子》又有 應塞古制,甚無理 載南樂,絕不 其 籥 謂 孔穎達輩 劉炫之釋 》,二南 爲 所

名也。 繆尤甚。大雅、小雅、《詩》六義之一也,非樂 舞之籥樂,傳義允矣。鄭以『雅』爲《萬舞》, 詩,或得 五國之『國』也,目其地而言也。 奏之,不僅二《雅》矣。至二南之『南』,猶十 自立説,謂『雅』是二《雅》,『南』是二《南》,舛 與『籥』分文武,異於毛,不可從。宋蘇氏 先王之雅樂;南者,四方之南樂;籥者,羽 編》曰:「『以《雅》以《南》,以籥不僭』,雅者, 傳》之《南籥》皆二《南》,則陳長發《毛詩稽古 以駮正之; 引《詩》「心之憂矣,於我歸説」,皆稱「國風」 及《表記》引《詩》「我躬不閱,遑恤我後」,又 據《樂記》「正直而静、廉 國」而言「南」耳。 風」名,古 樂以『雅』名,則《風》、《雅》、《頌》皆得 於南 其又謂《詩》之《雅》、《南》,《左 有 國,周召不 _____ 尚不得與二雅並列於六 南》 無 而謙者,宜歌《風》」, 足以 或 風 盡 \approx 一之,故 當時 毛 西 所采 不 河 復 既

也,以音言者,又入樂時編部之名也。 總之,「南」以 《采蘋》」,則又以爲出於臆説,真自相矛盾 乃謂有 傳》、程氏《詩論》之所本。 然高注《吕覽》,以 焉,以爲《周南》、《召南》。」此實爲蘇氏《詩 兮猗!』實始作爲南音。周公及召公取 而不言「風」。 南》謂取「南音以爲樂歌」,義本 候禹于塗山之陽。 女乃作歌,歌曰:『候 皆足破《考古編》之謬。今考《吕氏春秋 以爲文王之樂,俱不云二《南》也。」程大昌 初》篇:「禹巡省南土,塗山氏之女乃令其 見蘇氏釋《鼓鐘》篇,故生此説耳。 氏釋爲『南夷之樂』,《左氏》之『南籥』,杜 義 南音」爲「南方國風之音」,以《周 ,况樂名乎? 南無風,據《左傳》季札觀樂歌十 地言者,乃 而《左傳》明言「風有《采蘩》、 文王 世子》之『胥 采詩 時 ·可通。 編 以上 鼓 南 部 南 以《召 一諸説 Ħ. 程 · 音 或 氏 風 人 妾 氏 特 鄭

引 不 同 南 '; 而 夷之樂」以爲 亦 不 相 悖。 二《南》,則尤誤矣! 諸 儒 混爲 解,而 又 牽

周 南

關 雎

皆未明言「后妃」爲大姒,「君子」爲文王。 始,以爲太姒耳。 妃』、『夫人』爲何如人,後之訓詁家推跡其自 惠 事,播諸管絃,以代箴銘」。二説頗爲近之。 語尚沿箋疏之誤,辨見後。 中之樂,追稱后妃 王后妃者當如是。馮元成亦以爲「周公制房 子謂《序》言「后妃之德」,非指人而言,凡爲 研 谿《詩説》曰:「《小序》未嘗指言『后 序》云:「《關雎》,后妃之德也。」傳箋 作詩之意,或本于文王、大 思得淑女以共理内治。 所謂憂樂,皆設言其 程 此

《關雎》,《召南》首《鵲巢》,所以正内德、慎婚 事者。 于身。」據此,則不得定以爲文王之后妃,審矣。」朱子《詩 始至而作是詩。 集傳》謂文王求得大姒爲配,宫中之人於其 無『后妃』之目。惟《大戴禮·保傅》篇曰:「周后妃任成王 妃,則爲文爲武未可知也。《思齊》稱大姒,《雝》稱文母,並 氏怡《讀詩傳譌》曰:「案,君子,在上之通稱。《序》但言后 臣,歌之房中,歌之燕饗,俾聞其樂章,知君 姒,而周公隸之爲房中樂 元子《詩經世本古義》曰:「古者命士,父子 寐間事而形容之?」或又以爲王季宫人。何 「大姒未至,文王不應先畜妾媵,誰與探其 臣夫婦之正焉,非指一人一事爲之者也。」韓 姻之際。《關雎》之言夫婦,《鹿鳴》之言 「《南》、《豳》、《雅》、《頌》有專爲樂章,非 爲后妃、夫人者矣。」戴東原《詩經補 周家歷 世有賢妃之助,故《周 於是疑難蠭起。 則 又以 崔銑云 是告後之 注 南》 一 詠 首 寤 君 時

八

娶于 終。 年,其 鄒 能 此 娶莘生武王之事,其四章曰「文王 年,「既滅商 王即位之初年"「文王四十七即位,居喪三 據《大明》之詩自三章至六章皆言文王 故許白雲《詩集傳名物鈔》云:《通 據《竹書紀年》謂 成王,後此又生唐叔虞,人情事理所必不 之憂樂也。」金仁 異 周 忠胤 推 孕字,下又生子八人,則大姒之年少 · 幸。 之,知「文王六十三而生武王」,「女妻乃 王,前此 (娶蓋 武王 彼 據「纘女維莘」之文,疑大姒爲文王 淑 無逸》稱「文王受命惟中身,厥享國 錢 即位十三年滅商」,非上冒文王之 在五十之後。」文王九十七歲 女之得 飲光《田 七年而崩,在位共十九年」。 已生伯 武王五十四 山則謂諸 與 邑考; 否 間 詩學》用其説 亦 武 書言文 何 而 王 與 崩 八 於 初 爲 + 王 王 鑑前 載 可信 + 季 一有國 即 爾」。 而 且. 五 宫 ···, 又 編 以 繼 據 而 文 生 而 人

> 娶于莘而 血氣將衰,乃生子纍纍如 有子八人,不應前 武王時,大姒必將四十矣。 者男三十娶、女二十嫁之例準之,當文王生 王 位,克商後四 商,在侯位已十三年。 或 生武王明矣。 未生,至于今六十年。』是武王以六十 王克殷告叔 五 五 殁年考之,蓋以五十歲生武王 + 若是,則《關 年」、《 十年」,當以 得大姒,有 史記 旦日 年而崩,得年六十 若以大姒爲文王之始配 影載 四十七即 雎》爲文王宫人之作,亦足 : 此 『惟天命不享于殷 文 不 壯 王 年惟伯邑考一人,及 妒之德,故周 則武王以 年 許。 位。 九 生武王而後, + 意必文王「續 |《史記 四 七 , 而 四十 歲。 而 世 非 ,發之 以 云 歌 歲 以 十 即 五 克 又 古 文 享

不主貴,故自定之也。《昏禮》經曰:『親皆

人君及宗子無父母自定娶者

,卑不主尊,賤

據矣。」承珙案:

令白

虎

通

義

•

嫁娶》篇云:

張

歸

關

渭。』」此蓋三家詩説。 證《關雎》爲文王宫人之作,則可不 在即位之後,漢人已有此説矣。但必據是 没,己躬命之。』《詩》云: 『文定厥 然則以文王娶大 祥 必 · ', 親 耳。 姒 迎 以 爲 于

狀 鶚之 則陸 聞》以爲鳻鳩、《風土記》疑爲蒼鷃,馮元 以 氏 家詩名物疏》云:「江淮所有,當年恐未入詩 朱子從之,云「江 而 人之目。」夾漈之説,自未可從。 「本亦作摯。」而有別,故爲司馬,主法制。」其他 布 似 爲 有 白 幾以 穀,錢氏《詩 鴛鴦,方 類,已無 别。」毛訓本之《爾雅 `馬也」,杜注即用毛傳云:「鷙《釋文》: 鰯 弱 爲 雎鳩」,傳:「雎鳩 而白 如鴟,郭璞以 以智《通雅》定爲 義。 討 . 鷹亦復似鷹,是則雎鳩爲雕 一淮間 》以爲杜 自鄭夾漈有鳧類之説, 有此」。 爲雕 **%** 鵑,無稽之言,皆 王雎 《左傳》「 類、楊雄、許慎 則馮 屬 餘如《詩 玉 也。 , 郝 嗣宗《六 敏 雎 氏 鳥摰 鳩 以 謂 總

> 頡解詁》:「鶚,金喙鳥 鴞也。」案: 可 無 庸置 「鴞」當爲「鶚」之誤,《御 《史記 也。」 孔子 世 家》正義 覽》九百二十六引《蒼 日 三王

又《歸 傳意。 之德,無不 肫至,而又能有别,故傳以興「后妃説樂君 子》曰:「猛獸不群,鷙鳥不雙。」言「鷙」已 別」自是兩義。 注云「摰」、「臻」皆「至」,是也。 「勢,至也,讀若摯。」《爾雅》:「摯,臻也。」郭 之言至也,雌 别」意,不必又云「有别」矣。 衡《思 關 雕之有别焉」。 鴻 毛傳「鳥擊而 田 蓋 賦》云: 玄賦》云: 雁嚶嚶。 「摯」與「至」聲近義 . 和 諧,又不淫其 雄 若以爲猛鷙之「鷙」,則《淮 情 Ŧ. 楊雄《 群娭 意 有 「鳴 雎 至然, 别, 乎其 鼓 鶴 羽 翼, 交頸 鄭箋申之曰:「 色,慎 獵 而 中, 倉 惟其雌雄 同。 賦》云: 有 噍 庚 雎 「摯」與「 別。」此最得 固 噍 《説文》: 哀 鳩 幽 鳴。 昆 相 三王 情 和 鳴。」 雎 子 含 有 南 交 意 墊 説 謂 有别者也。 鳥、「未嘗見其乘居而匹處 衣賦》云:「感彼關雎,德不雙侣。」此即 作「乖」,誤。 而 也 頸 固矣。 君子美之,爲其雌雄之不 頡 「雌雄皆有情意,孰知雎鳩之情獨至」。 [《]淮 頏 南 關 《列女傳》魏曲沃 鬍 歐陽《本義》疑於「摯」爲猛鷙,且 泰 嚶 族 嚶。」 訓 *\frac{\times}{\times} 此 所 「《關 謂 也。 負 曰: ·乘居 雌 雄 雎》興於鳥, 也 張超《誚 夫雎鳩之 情 |。」今本「乘」 意 所謂 至 其 青 者

之「淑 静,夫然後 情欲之感無介乎容儀,宴私之意不形乎動 淑女,君子好仇。』言能致其貞淑,不貳其操, 集傳》釋《關 匡 逑,匹也。 《漢書》1 女」即 衡之言,實同 可 匡 爲后 以 雎》,舍毛鄭 衡 言后妃有關雎之德,是幽閒 配 上疏 至尊 妃。 毛 而爲宗廟主。」此 曰:「《詩》曰:『窈窕 **^** 《毛詩 氏。 而 取 毛 稽 傳 匡衡。」承珙 古編 물 「淑 曰 以 : 詩

書 以配 《漢書·杜欽 字即 立飛燕,成帝 漢書》應奉以田貴人微賤,不宜超登后位,上 夭壽治亂存亡之端也。] 其下云: 女,幾以 鳩在河洲之上,關關然雌雄和鳴,下言淑 雎》之作,本以雎鳩 旨。」《田間詩學》謂朱子宗毛氏,以「淑女」指 義援箋合傳,曲 所斥「淑女」者非后妃,則不然。 后妃者,得之。歐陽氏《詩本義》云:「《關 貞 ·逑」爲「仇」,謂「淑女」爲三夫人以下耳。 詩經遵義》曰:「毛傳文氣緊接 三 : 專 君子。」此解甚當。 之善女, 指后妃。 巨 配上,忠孝之篤,仁厚之作也。」《 聞 周 傳》欽説王 胤 宜 孔疏 納 嗣 爲附會,非果傳 爲 泯 翟 君 比 必强毛 女,襄王 絶。 子 后妃之德。 之 但 一鳳云: 宜 調 好 以 思《關 出 兀 毛鄭皆云《詩 同 「后妃之制 居 意 鄭,實失毛 而下,『是 鄭箋乃以 故上 于鄭; 黄 故 雎》之所 云 氏 然也。 言 元 正 漢 後 淑 女 雎 吉

求,遠五禁之所忌。」以上二條,皆與毛義合,

不獨匡衡也。

選有德之世,❶考卜窈窕之女」,《王莽傳》 之義被之毛傳,非也。《楚辭》「子慕予兮善 字,以「窈窕」爲「居處」。 形容語,本無庸字别爲義。 窕」,凡此皆不以「窈窕」爲「居處」。 仇」,張超《誚青衣賦》「但願周公,配以窈 華,更盛迭貴」、《邊讓傳》「爾乃攜窈窕,從好 窈窕」、《史記•李斯傳》「佳冶窈窕」、《漢 窕」指女之德容言之。鄭箋始增入「深宮」 曰:「窈窕,貞專貌。」正與毛同。 以「幽閒」訓「窈窕」,其下復以「貞專」足成其 有窈窕之容」、《後漢 《文選·秋胡詩》注引薛君《韓詩章句》 杜欽傳》「必鄉舉求窈窕」、《劉輔傳》「妙 窈窕淑女」,傳:「窈窕,幽閒也。」毛既 書・ 而正義遂并以深宫 班固傳》「窈窕繁 《方言》云:「善 是皆以「窈 至 疊 字

心爲窈,善容爲窕。」亦非是。

《琴賦》、嵇康《贈秀才從軍詩》注,皆引《毛 《後漢書·邊讓傳》注、《文選· 《説文》「逑」下云「怨匹 別有作「仇」之本。 爲「仇」之假借。如《左傳》「怨耦曰仇」,而 雅》。今《爾雅》作「仇,匹也」,郭注引《詩 承珙案:《後漢書 見《爾雅》古有兩本,「逑」、「仇」異字,以「逑」 所見本作「逑」。《衆經音義》引李巡注云: 詩》曰「君子好仇」,知《毛詩》之不作 「仇」之假借也。據《釋文》,毛傳作「逑」,又 「仇,讎怨之匹。」是李所見本又作「仇」。 「君子好仇」。 「君子好逑」,傳:「逑,匹也。」訓本《爾 孫炎注云「相求之匹」。 ·皇后紀》論「《詩》美好 臧玉林《經義雜記》曰: 曰逑」,亦以 景福殿賦》、 「逑」爲 :「逑」。 是孫 可

●「輔」,原作「酺」,據《漢書》改。

得定以作「仇」者爲毛氏舊文也。「君子好匹」。可見毛傳自有作「逑」之本,不逑」,章懷注引《詩》「君子好逑」,並引毛傳爲

謂 氏》『怨耦日 毛者不過十之三四,乃於開章第一義泥《左 陸聚緱《陸堂詩學》曰:「鄭氏箋《詩》,其異 爲「匹」,正與毛同,至箋《詩》時乃易其説耳。 君子乃不免有衆妾之怨者,此義豈可爲 盡失其解,真犯孟子『以文害辭』之譏。」承珙 仇,匹也。」此鄭所用蓋三家詩訓。 仇。」鄭注云:「正,當爲『匹』,字之誤 其正,小人毒其正。」」下引《詩》云:「君子好 ,孟子言大王之時内無怨女,而《周 《禮記 仇」語,遂至『左右』、『友』、『樂』 緇衣》:「子曰:『惟君子能好 其以「仇」 南》之 訓 也;

『后妃有關雎之德,乃能共荇菜、備庶物,以之,意竟似目『淑女』爲后妃矣。及觀次章傳陳氏《稽古編》曰:「此詩首章傳,初視

爲直賦 體 也。 誤 補傳》、嚴氏華谷《詩緝》皆以「荇菜」爲賦 擇之禮。 取,「芼」謂擇取。 菜之可流以興淑女之可求。下文「釆」謂 以雎鳩發興,後二章皆以荇菜發興。」此説 指此淑女而言。 宜配 之樂,故美后妃有關雎之德,爲窈窕之淑女, 案: 淑女助 不然,『流之』與『求之』文義不協矣。」承珙 事 矣。 宗廟 ,故次章略之,全《詩》例皆如此。 陳意蓋 后妃即「淑女」,有共荇菜之職,故因 君子。其下「求之」、「友之」、「樂之」即 其事 -, 而求之。其實不然。二《南》爲房中 以此託興,意味深長。 方 意義 以後二章爲 知 下 吕東萊《讀詩記》曰:「首章 文『淑 古者昏禮納采即謂 淺矣。 女 賦,言后妃供荇菜 毛於首章標 不 得 若以 指 范氏《詩 后 以共荇菜 納 妃 其 明 也 興 荇 采 采

「寤寐思服」,傳:「服,思之也。」《莊

文,不嫌複也。「要囚,服念五、六日,至于旬時。」「服念」連亦爲「思」,於義重複。承珙案:《康誥》曰:亦爲「思才,於義重複。承珙案:《康誥》曰:「服者,思存之謂也。」或疑「思服」相連,「服」子・田子方》篇「吾服女也甚忘」,郭注云:

爲興」、「『反側』、正義引《書傳》「帝猶反側、 展興」、「『反側』既爲一、則『輾轉』亦爲一、 《何人斯》箋之以「輾轉」釋「反側」。「『反側』 等子反、宣十二年。魯孟之側字反、哀十年。亦 字子反、宣十二年。魯孟之側字反,哀十年。亦 字子反,宣十二年。魯孟之側字反,哀十年。亦 字子反,宣十二年。魯孟之側字反,京十年。亦 。」 《何人斯》等之以「輾轉」釋「反側」。「『反側』 「輾轉」側」多字「反」、《左傳》 於公子側 「輾轉反側」,正義引《書傳》「帝猶反側,

孫毓述毛見正義。云:「思淑女之未得,以禮「鐘鼓樂之」,傳:「德盛者宜有鐘鼓之樂。」「琴瑟友之」,傳:「宜以琴瑟友樂之。」

「左右芼之」,傳:「芼,擇也。」《爾雅》:三德盛。設女德不盛,豈祭無樂乎? 又琴言德盛。設女德不盛,豈祭無樂乎? 又琴問所謂「友之」、「樂之」者,非即指后妃而則所謂「友之」、「樂之」者,非即指后妃而何? 毛義本自直截,孫毓述之,更爲明白。何? 毛表本自直截,孫毓述之,更爲殷殺力。

毛詩後箋

四

毛雖不 之」與「左右流之」同義,亦可 珙案: 若從毛傳訓 「芼」爲 「擇」,則 「左右芼 之」,於禮當 訓爲「無方」, 后妃」, 左 也 右」爲 釋「左右」字,然傳意本 則「左右」不必如鄭箋「佐助」之 「無 有 方 則於『芼』義 常 所 故《稽 ,安得云『無方』乎?」 古 編 難 訓 通。 尝云 ·以「淑 爲「無方」。 「 左 ・ 熟 女 而 右 即 薦 承

有房 彼 也 無 誳 用 之鐘磬。』注云:『燕樂,房中之樂,所謂 樂」,注云:「絃歌《周 鐘 據 鐘 誦 整也。 中 教房中樂,待祭祀而用之,故有鐘 以 磬之節 燕禮》記「若與四方之賓燕,有房中之 樂皆教其鐘磬。』房中樂得 之奏樂,今直云有房中之樂,明 事其君 若然、《磬師》云:『教縵樂、 也。 子。」疏云:「若用鐘磬,當 謂之房中者、后、夫人之所 南》《召南》之詩,而 有鐘 一磬也。 一磬者, 燕樂 彼 聲 云 本 不

禮、 何 以 焉,用之邦國焉」。 肅、 書 后弦歌 樂,益其鐘磬。奏議曰:『房内樂者,主爲 謂祭祀有鐘磬,燕無 教尚柔。 乃言不可。 萇、侯苞、孫毓 用鐘磬,又言教以磬師 磬師,則房中之樂非不用鐘磬也 雎》之詩曰『鐘鼓 「毛氏以《詩》『招我由房』爲房中之樂。 房 以取 感人,須存雅正 ·音樂志》:「牛宏修皇后房内之樂,據 中 統以 鄉 及 飲 正於婦道也。 誳 燕, 取 酒 柔以静爲體,不宜用鐘磬。」宏等採 誦 禮 正焉。 則 又陳統云: 『婦 而 亦 無 故事 事 取 鐘 樂之』,而《 君子,故 大業中,柳顧言又增房 文王之風由 而用 磬 皆有鐘 既不設鐘鼓,義無四 《磬師 鐘 也 0 磬,此不可考。」《隋 也,故云「用之鄉 是自惑也。 以 陳 職》云: 人無 一磬,而 周禮》教燕樂 房室爲 氏 近及遠,鄉 ^ 外 禮 鄭氏 王 事,而 「燕樂之 書 名。 肅 賈公彦 **>** 之 言 日 . 懸 ^ 關 燕 皇 内 陰 意 毛 以 不

42

祭祀 諸 房 待 使 樂,别於祭祀饗食,則是用之房中及燕矣。 注 歌,必有鐘磬也。』」承珙案:房中樂用鐘 鐘 夫人所作也」,其原出於周房中樂。 韓二家詩説。 亦可爲房中樂有鐘鼓之證 一磬。」 辨 無 云 儒 鐘磬, 衹 歌》首章即 又《漢書 而明者也。 饗食,●共其鐘笙之樂,燕樂亦如之。」 「鐘笙,與 據《磬師 鄭 玄曰 何爲「共其鐘笙之樂」乎? 矣。」以 牛宏不用,而取陳統之説,誤 : 禮樂志》「房中樂,高祖 云:「高 》,不知《周禮 鐘 《隋志》稱侯苞、孫毓 此 燕樂,房 聲相應之笙。」夫此言燕 而 論, 張 四 房内之樂 内 縣 樂 ,樂充宫庭。」 笙師 也 而《安世 所 非 ***** 蓋 此 謂 唐 獨 凡 磬, 毛 不 Ш 絃 陰

弱 者 雎 ,大史公曰: 》作。」楊子 關雎》爲風之始,而後人云三家以 雲 周 日 道 : 一周 缺,詩人本之衽 康之時、《 開 爲 席 雎 刺

> 詳其説。 明帝詔 刺 《後漢書 婦 爲始」云云。此蓋《齊詩》之説,正與毛傳「夫 後品物遂而天命全。 之際,生民之始,萬福之原。」婚姻之禮 於后蒼。 引薛君《韓詩章句》云「大人内傾于色,故 見幾而作」,注家皆以 傷始亂。」此 美《關 漢書 關雎》説淑女正容儀以刺時」,惟《齊詩》未 時者,必皆係傳《詩》者之説。 有别則父子親」云云合。 雎》之識 「應門失守、《關雎》刺世」、《馮 杜欽 • 《漢書 《衡傳》上疏 楊賜 於三家之説,不 傳》「佩 傳》「康 微兮,愍王道之將崩」,注 儒林 玉晏 孔子論《詩》以《關 云「聞之師曰: 爲《魯詩 主 鳴 至魯韓二家以 朝晏起,《 匡 知 嗣 *****; 衡受《齊詩 何屬 《陸堂詩學》 雎》歎之」, 《後 關 妃 漢 衍 正,然 他 雎 傳 書 雎 皆 几 如

❶「食」,阮校本《周禮注疏·笙師》作「射」。

傳義。 之」,正如《常棣》作於周公,而《左傳》僖二十四 門失守,故歌《關 雎》預見。」鄭康成 經傳受之後,或不免所聞 氏,林艾軒云:「毛公趙人,未必不出於《韓詩》。」特 此 漢書》注引《春秋説題辭》曰:「人主不正 其詩者,吕元鈞謂 滅傷其愛。」總之,刺 傳合。然則三家詩於開章大義無不同於毛 民之屬,王道之原,不外是矣!」所言亦與毛 又云:「《關雎》之事大矣哉 雎》之道也 曰 魯詩》、《列女傳》亦云:「康王晏出朝、《關 哀而不傷」云:「哀世夫婦不得此人,不爲 語可謂 <史》 後之爲《魯詩》説者,恐非申公之舊。」 破的。 ! 漢》 萬物之所繫,群生之所命也。」 儒 《韓詩外傳》云:「大哉、《關 雎 陳古以諷,二説近之。 林 先通《韓詩》,故注《論語 》以感之。」夫曰「歌以 時 傳 之説 皆 云 異 ! 天地之間,生 申 ,薛士龍 一辭耳。 公 有 詁 劉 謂 訓 是賦 向 《後 一,應 感 習 數 無

> 年。 周 進賢才以 毛《序》。而范蔚宗《皇后紀序》先言『后夫人 范蘅洲《三家詩拾遺》曰:「光武《廢郭后詔》 云『既無《關雎》之德,而有衛霍之風』,似用 關 ·康王晚朝,《關雎》作諷』,可知 而 雕》以 載 作」、杜預注云周公作之、召公歌之耳。 富 辰 諷 輔 之言 諫。 君,哀窈窕而 與薛、吕之説正 日 召 穆公「糾 不淫其色」,後又云 合宗 同。」 康王時 族 人歌 於成

葛 草

所陳是· 益之。 改。 不 謂后妃「在父母 而 所以 知所謂 《序》云:「《葛覃》,后妃之本也。」孔 《吕記 殊不知是詩皆述既爲后妃之事,貴 也。 成德者,必有本。 ,乃爲在父母家志在女功之説以附 講師 》則曰: 家本有 徒見《序》稱『后妃之本』,而 「《關 此性,出嫁 曷 雎》,后妃之德 謂 本? 《葛覃 修 而不 也 而 疏

衣,如 敬師 葛。 遺罹」也 夫,乃可以安其父母,即《小雅》所謂「無父母 織紅,組紃,學女事以共衣服者, 末章言尊 於女工之事,即《内則》所謂執麻枲,治絲繭, 勤 意此詩首章、次章自是追溯后妃在父母家勤 爲后妃之事,則《禮》有后、夫人親桑,不 異,不當又別爲「后妃之本」。 珙案:諸儒之説,皆有難通。 之時,言后妃歸甯,志猶在於女功之事」。 耳,不必詠歌也。」嚴《緝 本爲本性貞專,則與《關雎序》所云 祖楊龜 儉,乃 妃之本務,而要皆推本於在父母家服 傳,教以適人之道,躬習勤儉,服澣濯之 至於既嫁歸甯,更不當有采葛之事。 此,則「于歸」之後,和於室人而當於 山、張横渠之説,以「在父母家爲歸 爲 蓋 可 勤 稱,若 儉自 在室而 是后妃之本性,女功 心略同。 服 孔疏以后妃之 若謂詩皆述既 李氏《集解》又 女功,固其 「德」者無 聞采 習 亦 竊 承 常 甯

并傳箋皆一以貫之矣。安父母之心。如此,則作詩之旨與序詩之説煩辱,婉娩聽從,乃能嫁而正夫婦之道,歸而

義自當 蔓」專釋「施」字,非牽用傳文「覃,延也」。 義本相成,然詩以「覃」與「施」相承言之,文 同,「敭」與「易」同。 猶易也,延也。」《爾雅》:「弛,易也。」郭注: 延易之義。《大雅》「施于孫子」,箋云: 翼》云:葛蔓「牽其首以至根,可二十步」。 雅・釋言》。正義失引。《釋詁》又云:「延,長 者,當從延長之義,謂葛引蔓延 也。」《方言》同。《生民》「實覃實訐」,傳云: 相延易。」《廣雅 ·延」。下「施于中谷」,傳云:「施,移也。」乃 『覃,長也。」此「葛覃」之「覃」毛又訓爲「延」 「葛之覃兮」,傳: 有别。 箋云:「葛延蔓於谷中」,「延 ***** 「施、敭也。」「施」與 雖引蔓之長至於延易 「覃,延也。」此本《爾 長,羅願《爾 非「延易」之 (「弛」 施

也。 傳: 黄 蠻,小鳥貌」。承珙案:二條皆傳文,非箋語。 鳥」,則當別爲 黄。」此皆謂今之黄鸎。 黄,倉庚也。 굸 策》云:『俛噣白粒,仰棲 倉庚。」又:「鄭箋稱『黄鳥宜食粟』,又云『緜 倉庚,「倉庚」下亦不 倉庚,蓋今之黄雀也,似雀 丁黄 。」則誤合爲 鳥。」郭 鳥』也。」承珙案: 「倉庚、黧黄也。」《説文》「離」下云:「離 「倉庚,商庚。」又云:「鵹黄,楚雀。」又 从隹,黎聲。 『黄鳥,搏搏音博,非徒端反。 黄 自 鳥 關 璞乃云:「俗呼黄離 于 而東謂之倉庚,自關 飛 鳴則蠶 0 一鳥。 段 然其誤實始於《方言》謂 曰楚雀也。其色黎黑而 · 云即 懋 生。」「雞」下云:「雞黄 舍人注但 段 堂 **爾** 黄 説 茂 《説 而 雅 是 鳥,然則黄 樹。」《詩》所謂 色純黄。 黍也。』不 文 也。 又有「皇,黄 留, 云:「皇,名 而 注 西謂之驪 **>** 亦名 曰 爾 《戦 : 顯 烏 云 雅 搏 國 非 非 即 毛

但 已有此説,謂黄鳥有二種,名同 階」音同 不得因《小雅》有「倉庚喈喈」與此詩 則多集於喬木,亦與止 往來得所。今之黄雀,愛集叢木。若黄鸎, 為,不得爲甚小也。 雀之小。 也。 「止于楚」,皆灌木也,傳謂「止于棘」爲黄鳥 「集于桑」、「集于栩」,及《秦風》之「止于棘」、 似黄雀而小」,桃蟲微小于黄雀。 粱」、「啄黍」,似當主謂黄雀,《古樂府》所 貌。」鳥之黄而小者惟黄雀。 黄 「野田有黄雀」者是。若黄鸎,不聞其食黍粟 |以《葛覃》、《凱風》之「黄鳥」爲黄鸎,《秦 或謂之黄 《秦風》「交交黄鳥」,傳亦云:「交交,小 今案:《 而 若黄鸎, 合爲一也。又案:孫奕《示兒編》 小雅 鳥 或 則《格物 謂之楚 且《小雅》云「集于穀」、 黄鳥》云「啄 棘、 雀 總 集灌之義不合。 陸《疏》云「鴟鴞 論》云大 陸 而 皆足見黄 粟」、「二 璣《疏 「其鳴喈 大殊。 勝 鴝 謂 大

《大雅 貌」。 選 案 : 當,不得謂其緣辭生訓也 文有「是刈是濩」,故以「莫莫」爲「成就之 上文「萋萋」已訓茂盛,義可類推,而此章下 是「莫莫」本爲茂盛之貌,與「萋萋」同。 木,故但言「施貌」而茂盛可知。 云:「莫莫,施 《廣 蜀都賦》「稉稻莫莫」,劉注亦云「茂也」。 正義云「葛既成就、已可采用」是也。 維葉莫莫」,傳:「莫莫,成就之貌。」 •旱麓》「莫莫葛藟,施于條枚」,傳 釋訓》云:「莫莫,茂也。」《文 貌。」草之茂盛者,乃能 傳義各有攸 延蔓于 傳以

服之無射」,「斁」作「射」。郭璞注《爾雅》,「服之無斁」、《禮記・緇衣》引《葛覃》曰

足也。 家,即當豫習女功煩辱之事。 謂 「王后織玄紞,至庶士以下,各衣其夫」者,亦 此「服之」不得云服其君子耳。 葛以爲絺綌。 此箋則用《爾雅》,訓「服」爲「整」,謂整治 己願采葛以爲君子之衣,令君子服之無厭。」 字,射,同部假借。」承珙案:鄭《緇衣》注云:「言 王逸注《楚辭》,引皆作「射」。 婦人無貴賤,皆有衣其夫之責,故在 蓋以「言歸」之文尚在下章,則 段懋堂曰:「斁,本 傳箋義蓋 傳引《國語 父母 相 此

曰:「以晏父母。」」今《毛詩》無此,蓋『歸甯文·女部》:『晏,安也。从女,从日。《詩》也。』毛意同《草蟲》箋所云『甯父母』。《説也。』毛意同《草蟲》箋所云『甯父母』。《説也。『毛意同《草蟲》、八時。 毛云:『甯,安則有時歸甯耳。」惠氏《詩説》謂古無歸甯之明,傳:「甯,安也。父母在,

妹女子子已嫁而反」,尤有明文。《詩》之《泉 歸甯之禮,正義歷引《左傳》、《喪服》傳等,證 母在,而亦不當歸、 水》、《載馳》、《竹竿》雖皆思歸不得,然使父 據明白,固不得謂爲非禮。《曲禮》云「姑姊 此亦第以「歸甯」爲「無父母 之志一許不改,蓋所以長真潔而甯父兄也。」 論・斷訟》篇云:「不枉行以遺憂,故美歸 母心。二箋義互相足也。」承珙案:《潛夫 自潔清以事君子。』正謂能事君子,則能甯父 然。』《葛覃》『害澣害否』二句,箋云:『言常 《草蟲》『未見君子,憂心忡忡』,箋云:『在塗 而憂,憂不當君子,無以甯父母,故心衝衝 字作『以』字爲善,謂 父母』之異 泉水序》及箋皆據《左傳》説。 歸」謂嫁也。 文 方嫁不當遽圖歸甯,則此『歸』 也 0 甯,則其思爲非禮矣。 尋 詩 可用以安父母之心。 上文『言告言 遺罹」之意。至 「父母在則歸 歸一, 故 甯

> 《序》云「可以歸安父母」,則似謂既嫁 以「歸安」連文,則《毛詩》字仍當作「歸甯」, 文》「晏」下所引或三家詩。 傳文。箋云「言常自潔清以事君子」,釋「害 增,不如陳碩甫云此九字是鄭箋語竄入毛公 孝。」但「父母在」以下九字,段以爲 未必作「以晏」也。 甯父母」句。《泉水》箋云:「國君夫人,父母 澣害否」句;「父母在則有 安父母之心,故箋云:「言嫁而得意,猶 甯,没則使大夫甯於兄弟」,此古 在則歸甯。」兩箋義正同耳。 時 此《序》及箋既皆 承珙又案:《説 `歸甯耳」,釋「歸 禮 也 後 而 不 可 惟 所 忘 以 此

卷耳

相成之道。此詩言后妃警戒人君,使求賢審父《七經小傳》曰:「后妃於君子有夙夜警戒《序》云:「《卷耳》,后妃之志也。」劉原

周行 從《序》,見《吕記》。 與乎此,而體群臣之志則不可不同。 謂從容警戒於君耳,非 賢審官也 不來矣。 國當求賢耳,而賢不至者,亦以心不專,故賢 越酒食,不及爵賞,借中饋以効箴,故謂之志 然則《雞鳴》之解佩,十亂之邑姜,非乎? 者乎?」郝仲輿曰: 釜之聲,則門 好善之志則 耳者,欲求盈筐,心不在,故無獲 官之意耳,不謂 而已。」承珙案:三説皆得詩旨。 文王之詩。 (吕記》曰:「求師 無所寘,則失其所治。 如是,頃筐無所獲,則失其所願 則懿筐非后 不可不同, 崇德報功,婦人固 其餘又陳當知臣下勤勞之事,亦 無嘉客,况后妃心志之所形 后妃己自 取 後作《集傳》乃以 「或者謂婦人勿與外事, 友,婦人固 以 妃所執,大路非 求賢審官 后妃己所行也。」 此爲后妃警戒求 無 也。 朱子 與乎此,而 爲大 也。 室有 以言爲 启 姒 初解 采卷 懷 不 見 轑 ; 無 妃

> 倫。近儒辨之當矣。 所遵,至於登山極目,縱酒遣懷,尤爲儗不於

宋。 也。 《采薇》、《杕杜》,遣勞使臣,王者所 其勤苦者,安知后妃不與 掌大賓客之饗食。 從出也。」承珙案:成九年《左傳》: 莪》則孝子悲。」所謂喜者,即《鹿鳴序》云「忠 命將遣戍之際,燕饗慰勞,作爲 王禮賓之法。 如宋致命,公享之。 於外廷也。《卷耳》則后 而還,其君猶有享燕之禮。《周禮 讀書賦》曰: (漿人))有共后、夫人致飲于賓客之禮 《卷耳》之志,是《采薇》、《杕杜》之治 歸,復命,公享之。」是春秋時臣下出 郝氏曰:「《小雅》之《 然則《周南》盛時恩明誼 「讀《卷耳》則 疏謂賓客饗食,王后 襄二十年:「季 妃 有 所以相王 四 助邪? 忠 牡 臣喜,讀《 詩篇以 **>**∕ 以 • 酒 正 季文子 武 皇 晉束 於 享諸 世世 美,於 詠 子 中 華 有 如 饋 歌 婦 使 哲 助 所 臣

臣嘉賓得盡其心」者也。

所。 詩者,如《關雎》作諷之類是也 耳》之詩而思慕古之賢人,寘之列位,各得其 謂亂世之臣,險阻 置彼周行。』以言慕遠世也。」承珙案: 《詩》云:『采采卷耳,不 上,罔罟張而在下,雖欲翱翔,其勞焉得。 卷耳》爲康王時詩,亦必當時有慕古而賦 義正與《序》相應。 淮 南子 俶真訓》云: 憂危 而不見體 · 盈頃 晁説之謂《魯詩》以 「今矰繳機 筐。 恤 嗟我懷 ,故因《卷 此 而 其 蓋 故 在

心枝 也。」《荀子 之易盈而不盈者,志在 耳 卷耳,易得也,然而不可以 也 「采易得之物,實易滿之器,以懷人 則 采采卷耳,不盈頃 頃筐,畚屬,易盈之器也。」箋云:「器 無知,頃則 解蔽篇》云:「頃筐,易滿 不精,貳 輔佐君子,憂思 筐」, 傳: 則 貳周行。 疑 惑 「卷耳 心。」楊 故 真周 日 : 也; 倞 · 苓 深 注

> 興 必 賢,而不在於采卷耳」。 言「后妃欲君子求賢置之列位,故憂思至深, 滿,况於求賢之難,而可不思所以寘之乎? 能 義》謂「不盈 易得,頃筐易盈,而采之者苟有貳心,尚不能 二句,全同傳義。 而忘其手有所采」。 如是乃得爲因物託 毛公。蓋傳以采卷耳爲憂者之興,是謂卷耳 我思古君子官賢人,置之列位。」此釋「懷人」 不滿易盈之器,以言君子爲國執心不精,不 注《淮南 行之心貳之,則不 矣。 以成其 謂憂在 八道也。 進賢而忘其采菜,則 俶真訓》云: 頃 筐」,「以其心之憂思在 『嗟我懷人,寘彼周行』,言 能 其釋上二句,意當亦本之 喻,諷其君子。 此誤以鄭義爲毛義。夫 滿。 又謂毛鄭之説首章 「言采采易得之菜 此用 箋 義 是賦 也 歐陽《本 而 一於求 高

爾雅》:「卷耳,苓耳也。」郭注引《廣

耳、蓋 洗剥 况療風,童兒且時摘。」又云:「放筐亭午際, 身試目驗者,知夾漈之説非矣。 本草》亦云蒼耳嫩苗及子皆可食。 耳詩》云:「蓬莠獨不焦,野蔬暗泉石。 未知何據也。」承珙案:杜子美《驅豎子摘 之,何謂但 之曰:「陶隱居云蒼耳名常思菜,館人皆 蒼耳,但堪人藥,不可食。」馮氏《名物疏》駁 者,以其可茹也。 爲蒼耳。 耳。」後之説《詩》及注《本草》者,無不以卷耳 枲。』《爾 雅》云:「枲 瓜 薤 相蒙密。 唐時猶 間,依 雅釋文》引《廣雅》又云:「苓耳,蒼 惟鄭夾漈云:「《詩》言『采采卷耳』 堪入藥乎? 耳 以充蔬食者。 稀 登牀半生熟,下箸還小益。加 也。 橘 即今卷菜如連錢者。 奴 亦云胡枲,江東呼爲 跡。」是亦以卷耳爲 其以卷菜爲卷耳,又 明周憲王《救荒 此皆得諸 卷耳 是若 蒼 蒼 食 常

《詩正義》引陸《疏》云:卷耳,「葉青白

誤矣。 如鼠 色,似 其非蒼耳明甚。 郭注「叢生如盤」,以爲菌屬生朽潤木根者, 是别一物,故徐鍇《説文繫傳》於「苓」字下引 叢生者爲尤得之。承珙案: 經》謂陸郭所言皆與今蒼 雅》:「或曰苓耳 耳, 胡荽,白 叢生如盤」,則合郭氏二説爲 華 朱《傳》云「卷耳,枲耳。 如鼠 細 莖, 耳,叢 蔓 耳 生如 生。 相 郭所引「或説 類 一个,而 盤。」宋《 郭 以郭言 注 **^** 葉 圖 爾

罝》、《芣苡》之序皆然,不必定以出自后妃之 文王之事,孰非后妃之輔治于内而志在 後異解矣。朱長孺《詩經通義》曰:「《序》云 來而喜。 以「君子」斥南仲,謂近西戎之諸侯聞南仲之 我戍役也。」五章「既見君子,我心則降」,箋 章「天子命我,城彼朔方」,箋云:「此『我』, 言「我」者,一篇之中不妨並見。 《詩》中「我」字,有其人自「我」者,有代他 矣。下三章「我」字,則以鄭箋所分爲是。 之列位」,則毛意以首章之「我」爲我君子明 ·后妃之志」,最有味。 ·我』,我殷王也,下『我』,將率自謂也。」三 我」字各有所指,可無疑於《卷耳》之「我」前 勞還率之詩」,首章「我出我車」,箋云: 我 此 是此 出 我 賦詩者言外歸美之意。 其 「我」,又我諸 君。 傳云「思君子官賢 夫求賢才、勞行役雖 侯。 如《出 詩之中, 觀《兔 相 車 一 上 凡 成 ÷, 人 真

> 妃者。 隤,行者勞疲,役夫憔悴,踰時不歸。」蓋從來 文害辭。《焦氏易林•師之臨》云:「玄黄 説《詩》者,未有以「我馬」、「我僕」屬之后 諸「我」字皆爲后妃自我,故致乘馬 口 而 後爲 其 (志。」 此 説 是 也。 朱《傳 攜 惟 僕,以 泥 虺 於

然訓 概 路」。《鹿鳴》「周行」,毛訓「至道」。此詩則 《大東》『行彼周行』,又爲發幣於列位 尤迂。」承珙案: 毛於《大東》之「周行」無傳, 鳴》『示我周行』,破『示』爲『寘』,自不安矣, 之列位。嚴《緝》云:此唯《卷耳》可通。 本之《左傳》,其義自古。言各有當,不必 三:《卷耳》、《鹿鳴》、《大東》。 思君子官賢人,置周之列位。」《詩》「周行」有 也 「佻佻」爲「獨行」,則當以「周行」爲「道 真彼周行」,傳:「寅,置。 鄭皆以 行,列 一,其義 爲 《鹿 周

四四

謂石而戴之以土。 也。』《西都賦 雅》作『砠』。」承珙案:段説是也。 崔嵬,土在 則毛之立文爲善矣。 者,增益也。 寫誤也。」《説文》:「岨,石戴土也。」段 爲砠』,孫炎云『土山上有石者』。 嵬』,孫炎曰『石山上有土者』, 又云『土 者。」正 『嵬』下同毛,此 云:「《爾雅》、毛傳二文互異而 云『石山戴土曰砠』,與《爾雅》正反者,或 覆」義,《 而戴之以石,《釋山》謂用土戴於石上,毛 覆 陟 義曰:「《釋山》云『石 也。」又云:「燾,戴 彼 小 崔 上則雨水沮 《釋山》謂用石戴於土上,毛 爾雅》:「戴、蓋、燾、蒙、冒,覆 嵬」,傳: 『 型 下 「上反宇以蓋戴。」《方言》: 以《絲衣》、《戴弁》例之, 石在上則高不平,故曰 亦同 「崔嵬, 洳,故曰 毛也。 也。」此則傳文 戴土謂 土 義則一。 此及下 岨。 Ш 《詩》、《爾 「戴」亦 之 許於 之崔 戴 戴 戴 謂 注 · 傳 有 傳 石 石

得謂傳寫之誤也。訓用毛,「砠」訓用《雅》。當以義可兩存,不同毛説。惟《玉篇》「岨」「砠」二字並載,「岨」《雅》義,本自可通。若《説文》、《釋名》,則皆

假借字。 略」,如「香」爲「臭」,「亂」爲「治」之類。 之辭。「夃」義本訓「多得」,反之則爲「少 珙案:此説非 俎飢」,『毋』『俎」者,『好」『阻」之假借字。」承 作『姑』者,後人以今字易之。 及者,『姑』之 罍。』」段氏注曰:「今《毛詩》作『姑酌』,傳 从久。 久, 益至也。《詩》曰:『我 及酌彼金 文・久部》:「冽,秦人市買多得爲冽。 曰: 『姑,且也。』許所據者、《毛詩》古本,今 ·姑且」字,正當作「冽」。 姑」、作「嫴」、《廣雅》:「嫴,且也。」皆假 「我姑酌彼金罍」,傳:「姑,且也。」《説 如《尚書》古文『無有作政』、『黎民 也。 姑者,「及」之假借字。 蓋「姑且」者,少 借字。 从为、 或作

(説文》所引,疑三家詩有作「乃」者。

毛

詩

本多假借,未必後易以「姑」字也

部》: 者之風」,當言「天子之事」,以《毛詩》説「人 罍,大夫器也。天子以玉,諸侯、大夫皆以 金飾 君」謂「天子」與韓不同,其説非是。 「人君黄金罍」自合。 文,其云「諸侯、大夫皆以金」,與《毛詩》説 金,士以梓。」許君雖云「天子以玉」,經無 窮也。」此正用《毛詩》説。 《五經異義》引《毛詩》説:「金罍,酒器, 龜目,蓋刻爲雲雷之象。」《說文·木 「櫑,龜目酒尊,刻木作雲雷象,象施 孔疏必謂「《周南》,王 至《韓詩》説:「金 明 不

之旅士用兕觥,變於祭。」亦謂至旅酬時設罰耳》、《桑扈》皆云「罰爵」、《絲衣》箋云:「繹《卷耳》、《七月》、《桑扈》、《絲衣》。鄭於《卷箋云:「觥,罰爵也。」《詩》言「兕觥」有四:「我姑酌彼兕觥」,傳:「兕觥,角爵也。」

釋之,非矣。 爵。 爵」,故傳衹言「角爵也」。 箋一概以「罰」義 若《卷耳》「罍」「觥」並陳,自不必指言「罰 飲酒而正齒位,故云「誓衆」,亦可兼有罰 傳云:「觥,所以誓衆也。」此因「饗」爲鄉人 救酒之失。 於《詩》,而獨言「觥」者四。毛於《桑扈》、《絲 「柔」言之。 衣》無傳,但彼文皆以兕觥之「觓」對旨酒之 觚,曰觶,曰 承珙 案: 故説《詩》者皆謂以剛制柔,所以 則以爲罰爵,義自可 角,日散。 **^** 韓 詩》説酒 五者自爵外,多不 器 有 Ŧi. 通。《七月》 曰 爵, 見 曰

《卷耳》及《都人士》文。是《卷耳》之「吁」,亦憂也。」郭注引《詩》「云何盱矣」,邢疏以爲承珙案:段説是也。《爾雅·釋詁》:「盱,不學》曰:此謂「吁」即「忬」之假借。《説文》「云何吁矣」,傳:「吁,憂也。」段氏《詩

「憂」,故不復釋歟?「病」,而毛於彼二詩無傳,殆皆蒙此傳訓字。鄭箋於《何人斯》、《都人士》「盱」皆訓字。鄭箋於《何人斯》、《爾雅》作「盱」者,借「杅」爲正字,《毛詩》、《爾雅》作「盱」者,借本作「盱」。《爾雅釋文》:「盱,本作단。」是

樛木

者。 《爾雅》「下曲」之訓,於逮下義爲尤切。 文》云:「馬融、《韓詩》本並作『朻』、《説文》 妃至貴,而衆妾得以 詩意,蓋謂朻木雖高,而葛藟得以蔓延,猶后 以『朻』爲『木高』。」承珙案:馬融,習《魯詩》 樛」,疏矣。 疑《魯詩》本作「朻」,與韓同也。 下旬日 木部》: 「南有樛木」,傳:「木下曲曰樛。」《釋 樛。」陸德明但引「朻」而不及 「朻,高木也。」又有「樛」字, 上附耳。 然不 如 詳二家 毛用 《説

《古義》曰:「《易》、《詩》、《左傳》皆以『葛藟 草》無「藟」,惟入於《釋木》者,陳氏《稽古編 葛藟」,是以《詩》之「藟」爲艸。 謂 有「蘽」,而獨於《艸部》之「藟」引《詩》「莫莫 屬也。」若「藟」,則但云「艸也」,不與「葛」 似葛矣。《説文》:「葛,絺綌艸也。」「蔓,葛 亦連蔓生,葉艾白色,其子赤,可食」,則並不 似葛,故經傳多以「葛藟」連言。《詩》凡七言 云:「今江東呼蘽爲藤,似葛而粗大。」惟其 藤生,與葛相類。 連言,知藟即是葛。」承珙案:《詩》正義云: 「藟與葛異,亦葛之類。」此語甚諦。蓋藟本 「蔓」相廁,其非葛屬明甚。 一物。若陸《疏》云「藟,一名巨苽,似燕薁 葛藟」。 藤生之物,草木俱可通者,得之。 「葛藟纍之」,朱《傳》以藟爲葛屬。 鄭此箋云「葛也、藟也」,則是分爲 郭注《爾雅》「諸慮,山 至《説文・木部》 而《爾 惟是草 雅 何氏

而後人凡草木蔓延者皆謂之「蔓」矣。如藟者爲藤。」猶「蔓」本「葛屬」,專爲草名,名,後人混之。《玉篇》云:「今總呼草蔓延木藤生者甚多,在當時必有一種藤專得「藟」

基。」杜 樂美之德」, 菽》云:「樂旨君子,殿天子之邦。」二十四 「只」又與「旨」通。 菽》「樂只君子」,鄭箋亦訓「只」爲「是」。 文》: 『只,語已詞。 『只』亦爲『是』。」嚴《緝》云:「只,語助辭,如 據《南山有臺》箋,云:「『只』之言『是』,則此 曰『樂哉君子』也。」陳氏《稽古編》云:「《 『仲氏任只』、『母也天只』。此『樂只君子』蓋 傳》引《南山 「哉」字代之,亦可通。」承珙案:《小雅・采 樂只君子」,傳箋於「只」字無訓。 注皆訓「旨」爲「美」,一則云「諸 一則云「君子樂美其道」。 有臺》云:「樂旨君子,邦家 襄十一年《左傳》引《采 从口,象氣下引。]則 此蓋 侯 正義 之 以 説 有 年

> 非也。 訓。 字作「旨」者,乃「只」之假借。《隸釋》載《衡方碑 也」,亦衹以「樂旨」爲「樂」,不兼「美」義。 家之基」,其下文云「子産,君子之求樂者 只」皆應作「樂旨」,樂其有美德,不爲 久」,是二《傳》引《詩》皆取「樂」義,並無 十四年《傳》上文云「夫有德 見《傳》文作「旨」,緣辭 「樂旨君子」,亦作「旨」。 年《傳》上文云「願君安其樂而 又昭十三年《傳》引《詩》「樂旨君子,邦 王氏《詩稗疏》云凡「樂 生訓耳。 則樂,樂則 思其終」,二 今案: 襄 美 其 能 +

《易•履》上九云:「禍福之祥,生乎所 然則「履」訓「福」又訓「禄」者,即以爲動履之 福 謂之福履」。 嚴《緝》以爲「視履考祥」之「履」,「動罔不吉 也。」《釋言》又云:「履,禄 福履綏之」,傳:「履,禄。 承珙案:《爾雅 • 釋詁》: 也。」王 綏,安也。」 履。」 履, 弼 注

善能 當用《釋言》訓「履」爲「禄」耳 書」所謂 文》並云:「禄,福也。」故「履」亦可訓「福」。 此「六 也」引《詩》「福履將之」,蓋是取 履」既訓「禄」,而「禄」又訓「福」、《釋詁》、《説 致 福 福 「轉注」也。 禄,義自 也」又引《詩》「福 司 通。 但此詩 郭注《爾雅》「履,禄 福 履 綏之」,則 履」連文,自 證毛傳。 以 而

也。 文》:「荒,一日 之義。《喪大記》「振容黼荒」注云:「荒,蒙也。」《説 雅》「蒙」「荒」同訓「奄」,是「荒」亦有「蒙 不可爲先後之序。」今案之詩義,亦自有淺深 詩》「葛藟蘗之」,蓋亦用毛傳爲訓。 「縈,旋也。」《説文》作「藥」,云「草旋兒」,引 掩」與「奄」同。 「《詩》辭重複,亦有先後之序,若此 將,大也。」皆用《爾雅》。 葛藟荒之」,「福履將之」,傳: 草 三章「葛藟縈之」傳 掩今本作「淹」,誤。 承珙案: 元荒, 地 李迂 也。」 詩 云: **爾** 密」 奄 則 仲

> 《卷耳》三章箋亦云:「此章爲意 也。 甚多,何獨於此見殷勤之意。誤矣。 此,故解之。」歐陽《本義》乃謂 故有意不盡,重章以申殷勤。 勤也。」正義曰:「詩本畜志發憤,情寄於辭 也。鄭箋於次章云:「此章申殷勤之意。」而 成就,此「綏之」、「將之」、「成之」相次之序 盤結,此「纍之」、「荒之」、「縈之」 次第:葛藟始生延蔓,漸長蒙密,愈 君子之福禄,始而安吉,繼而 《詩》之初始有 凡《詩》如此 不盡 盛大,終而 相 次 久 , 申 之序 則 殷 更

螽斯

也。」朱克升、蔣仁叔皆從之。許氏《名物鈔》據《序》,宜言不妒忌,則子孫衆多如螽斯義》云:「螽斯微蟲,詩人安能知其不妒忌?言若螽斯不妒忌,則子孫衆多也。」歐陽《本《序》云:「《螽斯》,后妃子孫衆多也。

妒忌 群處 妒忌也。 」諸儒 曰:「凡物之群 螽斯喻子孫之衆多,因而推衍其意,以 義》、朱氏《通義》皆從之。 承珙案:《序》首 以「不妒忌」歸之后妃,屬下 載金仁 句云:「《螽斯》,后妃子孫衆多也。」是 女史箴》曰:「比心螽斯,則繁爾類。」 和集 耳。 山 即以不妒忌歸之螽斯,亦不過因其 説, 而 卵 以「言若螽 改 處 育蕃多之故。 讀《序》文,皆可不必。 而 不相殘者,則知 斯」絶 文。 范氏《補 句,屬上文; 何氏《古 其能 爲 但 張華 傳》 不 不 以

詵 爾 文以 未 爾 則經文上二句言螽斯,下二句言后妃,爾者 螽 后 見子孫衆多之義,何得下文便指后妃之子 而 斯 妃 此爲興,朱《傳》則以爲比。 衆多,以興后妃之不妒忌而 此 矣。 也。 詩傳箋皆不言「興」,正義 以爲: 或謂詩上二句但言螽斯之羽詵 比,則四句皆指 螽斯 引《鄭 若以 妾媵 爾者 志》之 和 爲 耳, 興,

> 《序》又以「不妒忌」申之。 説非· 『之子無裳』之『子』指狐;『樂子之無家」, 衆多,而歸其所自於后妃,但曰 岷 以『爾』指螽斯 妃」者,其義諦矣。 詩亦曰:「賢母使子賢也。」傳箋 使人自思其所以宜者何故,而 指人。《後漢書》荀爽對策曰:「配陽施,祈 『子』指萇楚,『匪女之爲美』,『女』指荑,此 螽斯。」謂祈如螽斯之多子耳。 斯和集,衆多之意已盡,下二句自當從毛 螽斯,故詩借以興子孫」,非以 孫衆多乎? ·朱子於草木鳥獸之屬多以『爾』『汝』稱之, 隱 也。 亦如此説。 何氏《古義》謂 當從《集傳》作 皆不 今玩經文,每上二句形容 嚴實成《讀詩質疑》曰 可 訓 「蕃育之最多者莫 《韓詩 比。 比 未 「宜爾子孫」, 詩人因子 后妃 一以爲 承 嘗 外傳》引 珙案: 明言,故 也。 爾 孫 此 傳 螽 戴 此 如

「螽斯羽」,傳:「螽斯,蚣蝑也。」《説

注《吕覽》、《淮

南》並

螣,蝗之屬。

别釋之。」今謂蝗子爲螽,一名蠶螽,「兖州 文類聚》引《洪範五行傳》云「春秋爲螽,今謂 蝗子,異方之語。」蓋「螽」「蝗」,古今語。 之大名,故《月令》云:「百螣時 螽」、「土螽」五名,皆螽類也。 左傳疏》引李廵注《爾雅》五螽 醜奮」,而有「阜螽」、「草螽」、「蜤螽」、「蟿 總之,經傳渾言「螽」及言「百騰」者,皆 案"「螣」與「蟘」通,「螣」又「蝗」 區别之,則各有主名。 《爾雅》又有「食苗心、螟; 言百者,明衆類並爲害。」高 食根,蟊」。《詩正義》 「螽」與「蝗」皆蟲之大名, 云「兖州 也。」《 也。 蚰 人謂蝗爲 螽又名蝗,故 部 實不同 云:「皆分别 起。」鄭注: *****: 爾爾 「螽 , 騰」是 故故 雅 誘 引 食 藝 分 蝗 《考工記》云「蜙蝑, 説。 蝗之通 案: 若《七月》之「斯螽」,乃《爾雅》之「蜤螽」、「蜙 蝑」,别是 義不可易矣。 文》、正義皆以「螽斯」即《七月》之「斯螽」,其 雅》之「蜙蝑」以釋之。《方言》、《説文》皆 也,即阜螽,「斯」爲語助,猶「鹿斯」、「譽斯 疏》並同。《太平御覽》引《毛詩提綱》亦同,此亦唐以 於此「螽斯」及《豳風》之「斯螽」,又兩引《 南》之「草蟲」、「阜螽」,毛傳並依《 有主名。 鍾」。 螽 | 蜙蝑」爲「春黍」,舍人《爾雅注》、陸璣《詩 此説 陸《疏》又以「春黍」爲「股鳴者」,與 與「春」、「斯」 山 稱。 海經》「鍾 《爾 非 若析言之者,則 也。 物。 雅》五螽,其三見於《詩》。 嚴《緝》始爲異説,謂 山」、《穆天子傳》作 以 與「蝑」,亦雙聲。 蜙蝑」、「春黍」皆雙聲, 毛傳 動 股 屬」同。 合 雖 春 爲誤。 亦 Ш 蝗類 爾雅》, 故

葉,蟘;食節,賊;

舍人曰:「此

四

種

蟲皆蝗

謂之螣」。

之蝗」是已。

文 ·

虫

部

蝗,

螽

必

召

而

其類繁多

也。」二字相

轉

注。

詩》「民胥

「螽」音

近

《詩

釋

鄭

注

前

以

爾

斯

則《七月》不煩再傳矣。 斯」、「斯螽」互異,故兩引「蜙蝑」以釋之。若皆作「螽斯」, 兩處皆當作「螽斯」,非文有顛倒。 或據《太平御覽・螽斯部》引《七月》「螽斯動股」,因謂《詩》 文》「蛄斯,墨也」,豈亦以「斯」爲語 標《類苑 可以概論。 中固多以「斯」爲語助者,《小弁》正義謂 蜢」,郭注。今北方人又謂之「蛨蚱」耳。 方俗互名之。 傚矣」、《潛 夫論 鳥部》立「鸒斯」之目誠誤,而 《爾雅·釋蟲》有「蠌,蛅蟴」、《説 》作 如「蟅蟒」《方言》、《廣雅》。 民 斯傚 如《草蟲》既有傳,則於《出車 矣」。 其 此又不然。 又名 斯 毛惟以 助 **参**曲 _ 即 《詩》 邪? 亦不 劉孝 》無傳 「虴 者 「冬蛙

 是也

《御覽》引《七月》亦作「螽斯」,殆誤倒,不足爲

據

《説苑 矣。 《詩》曰:『甡甡其鹿。』」毛傳以「衆多」釋「甡 性」,是爲本義。 《皇皇者華》「駪駪征夫」云:「駪駪,衆多之 耳。 下不引《詩》,《焱部》「桑」下云「讀若《詩》曰 也。」《説文》:「甡,衆生並立之皃,从二生。 皃。」於《桑柔》「甡甡其鹿」云:「甡 據三家本,不必定是《毛詩》作「鋅」。 以「詵詵」爲「衆多」者,謂「詵」爲「鋅」之假借 詩》於「詵」字下增入。不知《毛詩》多借字, 云:「鋅,多也。」蓋亦用三家詩耳。 兮。』」或 、駪」 本从「馬」,引申爲凡物衆多。 幸幸征夫」、《國語 若「駪」字、《説文》云:「馬衆多兒。」 陸所見《説文》自有「辞」字,其引《詩》或 奉使》篇皆引作「莘莘征夫」,李善注 疑《多部》脱「鋅」字,後 孔疏謂 晉語》、《韓詩外傳》、 「甡」即「詵」字,誤 人據 《説文》「駪 甡,衆多 《毛 今本《毛 《廣雅 毛傳於

篇 》: 也。 揖」者,螽斯斂羽 也。」《史記》「揖五瑞」,假「揖」爲「輯」。「揖 鳴》「蟲飛薨薨」,疑亦「翃」「縈」字之通借 之「詵」與「駪」、「莘」、「甡」、「兟」、「侁」、 莘,衆多也」,王逸《招 夫」,皆以同 《文選 爾雅 · 侁」、「桑」、「 辞」、「 辨」 等字聲義相 揖」者,「輯」之假借。 至「薨」與「翃」「縈」二字音 「翍,胡萌切。」「縈,呼横切。」《廣 ・東都 釋訓》以 訓 聲 賦 通 》、《魏 飛」。 群集之兒 「薨薨」爲「衆」。 借。 魂》注 都 戴氏《補 因飛 《説文》:「輯,車和 賦》 而 兩 又引作「侁侁 見 引 注 《齊風 其 毛 衆多 近。 傳曰 邇 一,故 **^** 雅》 斯 也。 雞 玉 是 輯 征 莘

也。」《 也 。』《大雅 《下武》「繩其 宜 雅 爾 子 抑》「子孫繩繩」,箋亦訓 孫 兢 繩 兢、繩 繩 祖武」,傳 兮」, 傳: 繩,戒也。」是單言、 繩 굸: 繩 「繩,戒 戒 爲「戒 慎

> 之。 티 : 劉 以「子孫繩繩」爲不絶,其義淺矣。 敬謹更正意也。」應説 疊言皆有「戒慎」之義。 昭 《漢書 注引《詩》「慎其祖 繩繩,衆多也。」又引 禮樂志》「繩繩 較勝。 武 《續 口,即 應 [《]吕記 意變」注 漢 劭 書 以 日 訓 祭祀 引孟 詁 嚴《 繩 字代 康

理。 也。』物伏藏則安静,故《爾雅》又訓爲『静』。 也。」何氏《古義》曰:「蟄、《説文》云: 本作「和静也」。 曰『蟄蟄』者,安静而各得其所也。」承珙案: 詩》傳 集傳》指「螽斯」。 虞東學詩》 爾雅》「蟄,静也」郭 何 宜 無此 氏 爾子 以「安静 謂 訓,竊疑 孫 據「蟄蟄」言, 蟄 蓋争則擾, 泥矣。 蟄兮」,傳:「蟄 解 此傳「和集 注云:「見《詩》傳。」今 「<u>蟄</u>」 和則静,必然之 字 則 ', 不 也」,郭 爾」字應 蟄, 爲 無 所見 和 如 集

桃天

《南》爲房中之樂,而其體則風 可 意自歸美文王,此則朝廷之雅,體製各殊,未 王之化。 遺朝廷。 之道,莫盛於后妃。后妃之德,莫盛於不 主美文王。 盛由家及國之事,而 后妃,原不必定指大姒,亦無嫌於美宫 辨説》謂「自此以下諸詩、皆言文王風 《小序》之言,亦未爲失。」承珙案: 概 序》云"「桃夭、后妃之所致 而 况《漢廣》以下、《序》亦未嘗不言文 若《大明》、《思齊》諸詩,雖言大姒, 論 蔣氏悌生曰:「文王之化,正 序者失之」。 也,故可專 故《集傳》 也。」朱子 化之 闔 美 妒 家 而

正婚姻之時」,則無以解於次章之「實」與三與《何彼襛矣》同意。《集傳》謂「桃之有華,與《何彼襛矣》同意。《集傳》謂「桃之有華,善此詩三言「桃夭」,傳以爲喻女容德,蓋

《序》美『婚姻以時』,蓋謂盛壯之時, 蕡其實」,此豈在仲春之月乎?」承珙案: 當用桃夭之月。 此議足以正《集傳》之誤。 月之時。 章之「葉」。 故 『灼灼其華』喻以盛壯,非爲嫁娶 通 其次章云『其葉蓁蓁』,『有 典》 載 束 哲 云 \sim 桃 而非 夭》 日

信荀卿,以《周禮》指言『仲春之月,令會男 焉,冰泮而 泮殺止。』荀在焚書之前,必當有所憑據。 氏或見其事 『冬合男女,春頒爵位。』《家語》出自孔家,毛 女、窮天數也。 公親事荀卿,故亦以秋冬。 爲昏,經無正文。 生閉藏爲陰,而爲化育之始,故聖人以合男 云:「男女失時,不逮秋冬。」正義曰:「秋冬 嫁娶時月,毛鄭異説。《東門之楊》 , 故 農業起,昏 依 霜降 荀卿書云:『霜降逆女,冰 用焉。 而婦功 禮殺於此。]又云: 鄭 《家語 不見《家 成,嫁娶者行 》云:『群 **添語》,不** 毛 傳

與陰

俱近,與陽

俱遠

故古之人,霜降

而迎女,冰泮

而

殺

而

董

仲

舒書

之後,即《荀子》之「冰泮殺止」也。

案:《管子》所謂

卯」,據惠氏《禮説

丣,「十二始丣,合男女」。

其源亦出

自

荀

卿。

《管子

優矣。」承珙案:毛義原本荀卿,王

天地之道,向秋冬而陰氣來,向春夏

《荀子》之「霜降逆女」也。「春始戼」,在清 蔚之謂:「王鄭皆有證據,以人情言之,王爲 詩》傳亦曰:「古者霜降逆女,冰泮殺止。」是 曰:「聖人以男女當天地之陰陽。 》改正。「十二始戼,合男女」。 「秋始丣」,在白露之後,即 也。」《太玄》亦云:「納 幼官》篇:春三 秋三班,今本亦作 《通典》引 肅引《韓 陰氣 咔 明 庾 儒 爲 賈疏所引微異。 飾。 矣。 今考《周官·媒氏》云:「掌萬民之判。 鄭氏一家之説耳。 五"「帝乙歸妹」,「爻辰在丣」。 説皆孔優於馬。 禖。」晁則以爲此求男之象,非嫁娶之候。 樗」,喻行遇 過時,故思;『春日遲遲』,蠶桑始起,女心 諸詩,則孔晁答云:「『有女懷春』,謂女 代大儒,皆與毛傳後先脗合,其義 女自成名以上,皆書年月日名焉。 令男三十 月』。」蓋 婦始秋分。』《管》《荀》皆先秦古書,董楊 王肅云:「自馬氏以來,乃因《周官》而 綏多士女」,恐亦期盡蕃育之法。 皆非仲春嫁娶之候。」此據《通典》,與《周 『嘒彼小星』,喻妾侍從夫人,『蔽芾 鄭説本於馬融。 惡人,『熠燿 昭又引《禮》:「玄鳥至,祀 若張融所據《夏小正》二月, 其實鄭正據定在《周官》。 至馬昭申鄭 其 羽 二,喻 「爻辰」者 不可易矣 《泰卦》六 嫁 援 有二二 凡男 娶盛 無 又漢 其 禮 高 其 悲 禮

媒氏

》賈

疏

歷

引

王

肅、馬昭、張

融、孔

晁

諸

官

,詩内諸言昏月,皆各從其家。

女」,故以

仲

春

爲昏月。

毛鄭

别

自

憑

據

以

之説,賈意則以鄭用仲春爲密。《通典》載

失也 汲而 鄭游昄將如晉,未出境,遭逆妻者,奪之。」則春秋民間嫁娶 雖奔 自中· 所謂 亦在秋冬也。」 IE. 令會男女。 不禁。若無故而不用令者,罰之。」詳玩經文 베 以禮昏。 先下此不禁奔之令乎? 若中春 不禁。所謂「不待禮聘」,因媒請嫁 中春之月,令會男女。 春以後、農桑事起、婚姻過時、故於是月 「判妻入子皆書之」者,自是霜降之候, 惠氏《禮説 女二十 其或先因札喪凶荒六禮未備者 其下云云,乃期盡蕃育之法。 非 而 爲 》云:「《左傳》襄二十二年:『十二月, 嫁。 期盡 凡 ,則正昏之月,何 娶, 於是時也,奔者 判妻入子者 此誤會經文之 用 皆 蓋 汲 而 書

傳:『墳,大也。』《靈臺》傳:『賁,大鼓也。』地大也。』《説文》:『頒,大頭也。』《苕之華》經小學》曰:「蕡,實之大也。《方言》:『墳,經小學》曰:「蕡,實之大也。《方言》:『墳,經,學、「有費其實」,傳:「蕡,實貌。」段氏《詩

借以爲木實錯雜之貌。」是也。 「樹實繁茂菴藹。」此即「有蕡」之「蕡」。 「樹實繁茂菴藹。」此即「有蕡」之「蕡」。 「樹實繁茂菴藹。」此即「有蕡」之「蕡」。 「樹實繁茂菴藹。」此即「有蕡」之「蕡」。

傳。 時之美,不宜横爲 「人」即婦。正義云:「易傳者,據其年盛得 鄭箋云:「家人,猶室家。」是仍謂「家」即夫 家中尊卑長幼之人,與《大學》引《詩》義合。 耳。末章云「一家之人,盡以爲宜」,則統言 家」當「夫婦」,謂其年時 室,猶室家也」。此正如《左傳》所言,以「室 章云「宜以有室家、無踰時者」,次章云「家 家。』」自是以「室家」指夫婦而言。 至首章「宜其室家」,次章「宜其家室」, 《左傳》:「申繻 一家之人。」然箋説 曰:『男有室,女 俱得,故夫婦和 毛傳於首 究 有

亦鑿。「先女而後男」,次章「先男而後女」。其説「先女而後男」,次章「先男而後女」。其説不過變文以叶句。李《解》引王安石,謂首章

兔町

歐陽《 皆得 《兔罝》之詩辭意最爲脗合。 而得 言,墨子之説似若可信。 之中,授之政,西土服。」 金仁山曰:「此 子•尚賢》篇云:「文王舉閎夭、泰顛於罝罔 雎》之化行,則莫不好德,賢人衆多也。」《墨 曰:「漢賈山云:『文王之時,芻蕘采薪之人 于山 而作。」何氏《古義》曰:「詩專以武 解, 《序》云:「《兔罝》,后妃之化也。 盡其力。』 芻蕘采薪,非兔罝之流乎?」 本義》謂《序》云「賢才衆多」,爲詩説者 ,與獵者争路被執 則俚鄙 無稽甚矣。」陳氏《稽古編 若胡毋輔之謂閎夭 線以 計此詩必 兔網,文王救 戸爲 夫 事 《關 爲 於 此

> 足見《兔罝》之言「多賢」與《文王》篇之言「多 《吕氏春秋•報更》篇云:「宣孟德一士,猶 此本二詩、《吕覽》連引之,以明德萬人之效 武夫,公侯干城。』『濟濟多士,文王以甯。』」 活其身,而况德萬人乎? 承珙案:《序》云「莫不好德,賢人衆多」者 復君子、小人之别」。 泥於《序》文,因「謂周 士」正同。《序》説未可非也。 亦不過極言其盛耳,原非謂 李氏樗譏其以辭害意 南之人,舉 故《詩》曰 「舉國皆賢」也 國皆賢,無 型赳

耳。 于周 爲 小人非公侯腹心、干城也。」此言當時之臣 至今未息,萬里設備。此《兔罝》之所 奴處沙漠之中,生不食之地,如中國之麋 刺詩。 (南之賢人,不能折衝禦難 好事之臣求其義,責之禮,使中國干戈 臧氏玉林曰、《鹽鐵論・備胡》以《兔罝 承珙案:《鹽鐵論》:「賢良 爲國干城 刺。 曰: 故 異 匈 鹿

詩也。 不免爲《兔罝》詩人之所刺,非以《兔罝》爲刺

城,而 義。 之臣,使之慮無。」岳本作「無」。 郤 公侯之腹心」,與《左傳》正合。 毛傳於首章云「干,扞也」,三章云「可 合德公侯,外爲扞城,内制其腹心」者,得之。 故歐陽氏疑所引别自有詩 詩 心」云:「此置兔之人於行攻伐,可用爲策謀 云「舉《詩》之正,以駮亂義,言治世則武夫能 至 ,似以「公侯干城」爲美,「公侯腹心」爲 不不 其 謂 日 矢相加遺」之言,故極 制其腹心。」此則《兔罝》之本義。 左傳》成十二年。 下云: 諸 「赳赳武夫,公侯腹心」者,此斷 相侵犯之意。《左傳正 侯 貪冒, 「天下有道,則公侯能 略武 郤至答楚子 夫 陳 以 亦同此語。 亭燕 案: 爲 箋於「公侯 義》云:「以 腹 郤至 所 反 心, 爲 以制斷 以 兩 因子 章 結 杜注 民 不知 而 引 刺 干 取 好 腹 引 此

> 伐,非自相矛盾乎? 或 説,則正 己 人 腹 有來侵伐者,可使和好之。」而此又用 心 心,自 本 貪 與郤 縱 守折 之 至 意 難 則 害物 相 而 背。 已,不害人 故知毛義爲優 美公 况次章箋云: 侯 (也。」若 能 以 武 以 如 夫 攻 敵 制

《焦氏易林 故君子敬孤 而輟。 丝 也,存乎幽 其恭。」《中論· 「『肅肅兔罝,椓之丁丁」,言不怠于道 之,况文王之取 《本義》謂: 以爲不然:「賢者不以 日季之取冀缺,郭泰之取茅容,皆以 微者,顯 肅 其處 肅 之原 微; 兔罝」,傳:「肅 獨 「布置椓杙,何用施敬?」李氏 幽顯,皆如 坤之困》云:「兔罝之容,不 而慎 也 人情之所忽 人乎?」承珙案: 法象》篇云:「人性之所 幽 孤獨 微, 有 一致。」金仁 雖在 人而 者,見之端也。 肅,敬也。」 也,存乎孤 作,不 隱蔽,鬼神不 劉 向 山 以 是觀 也。」 無人 歐 日 日 是 失 樗 陽

件,陳平之宰肉,識者已知其可大用矣。」以 中,陳平之宰肉,識者已知其可大用矣。」以 其細,占其大。」蘇潁濱曰:「丁 方其隱,以其細,占其大。」蘇潁濱曰:「丁 下人所聞,中達,人所見,中林,聞見所不 丁,人所聞,中達,人所見,中林,聞見所不 可以知其才。正如日磾之馭馬,甯戚之飯 中,陳平之宰肉,識者已知其可大用矣。」以 上諸説,皆足以破歐陽之癥結。

侯之所以扞城其民也」,亦是以「扞」釋《詩》「干」「城」爲異。此謂毛讀「干」爲「扞」,類爲以「干」爲「盾」,故云異。其實毛云「干,其義爲以「干」爲「盾」,故云異。其實毛云「干,其義爲「干也,城也,皆以禦難也。」正義曰:鄭惟「不也,城也,皆以禦難也。」正義曰:鄭惟「公侯干城」,傳:「干,扞也。」箋云:

芣 苡

傷其君子有惡疾,人道不通,求己不得,發憤苡》,傷夫有惡疾也。」《薛君章句》以爲「詩人耕歌其《芣苡》」李善注引《韓詩序》曰:「《芣則婦人樂有子矣。」《文選》劉峻《辨命論》「冉則婦人樂有子矣。」《文選》到峻《辨命論》「冉

而 作

列

女傳

> 云:

且夫「采采芣苡」之草 蔡人之妻,宋 女曰:『夫之 人之 海 蕮」。 澤瀉 經》及《周 也。」則 皆與《雅》義違 書 是 • 因 王會》皆云: 『芣苡,木也 馬 異。 舄 《釋文》又云: 之 名, 而 混 于

Ш

慎並同此。王肅亦同。王基已有駮 實似李,食之宜子。 出於西戎。』衛氏傳及許 難 也。

IE. 皆四夷遠國各賫土地異物以爲貢贄,非周 義 引王基駮云:「《王 會》所記雜 物 奇獸 南

《芣苡》之詩。」范氏家相曰:「夫有惡疾,妻

益親,况於夫婦之道乎?』終不聽其母,乃作

雖其臭惡,猶始于采捋之,終于懷襭之,浸以

不幸,妾之不幸也。

女,夫有惡疾,其母將改嫁之。

婦人所宜采。」承珙案: 苡」之文,《周書·王會》篇「康民以桴苡」, 今 Ш 海 經》無「芣

亦易識認。 亦未嘗明言其爲木。今車前草,所在多有 郭注《爾雅》所謂「大葉,長穗,江

此也。

宋女而

蔡妻,何名爲《周南》哉?」承

珙案: 此詩三家傳聞異辭,總不如毛義之正

此毛學所以

獨盛

與?

芣苡」,毛傳用《爾雅》「芣苡,馬舄。

馬

《芣苡》之義以自况,遂賦其詩,不必始作於

乎?

羅氏

願曰:「詳蔡人之妻,或因説母引

發憤而作』,則夫子何

取

而

人之《三百

篇》

若『求己不得,

不肯去、《列女傳》猶爲近理。

東呼爲蝦蟆衣」,及蘇頌《本草圖經》所云「春 初生苗,布 地 如 匙 面,累年長 及尺餘 如

尾」者,形狀最悉。 實似李」而誤。《説文・艸部》「苢」下:「芣 諸家以爲木者,皆因

目聲。《周書》所説。」段注云:「《説文》凡言 苡,一名馬舄,其實如李,令人宜子。 从艸,

直日

車前,瞿曰芣苡。」則誤分芣苡、車前爲

《文選》注引《薛君章句》曰:「芣苡,

車前」。

一物三名。

《釋文》引《韓詩

二,不必致疑於許偁《周書》也。」獻,不必知中國所無而後獻之。然則芣苢無所引『李』作『麥』,似近之。竊謂古者殊方貢『芣苢,馬舄也』,可證。『其實如李』,《韻會》『一名』者,皆後人所改竄。《爾雅音義》引作

引《 衆多非一,故鄭云『義則同』也」。 采苓者,言采苓之人衆多非一也。」與此傳 意甚明。 此謂一人之身,念采非一,彼《芣苡》謂采人 之事、《芣苡》亦然。 婦人樂有子,明其采者衆,故云非一辭」。又 采菜,尚不盈筐,故云事采之」,《芣苡》「以 正義謂傳訓「采采」不同者,《卷耳》言「勤事 (卷耳》傳云:「采采,事采之也。」據《卷耳》 采采非 鄭志》答張逸云:『事,謂事事一一 采采芣苡」,傳"「采采,非一 一」意同 《唐風》「采苓采苓」,箋云:「采苓 雖説異,義則同。」然則 此疏釋 辭 用 也。 傳 意

> 多。 則仍是一人之所爲。其説非 采」爲一人之事。 與「采」之義複,亦可不必。 之」義非其次,據《廣雅》訓「有」爲「取」,則又 人而爲此六事」,而又以首章爲「總其終始」, 下章「掇之」、「捋之」諸事,總以形容采者衆 始往而采取之者,或有已采而聚藏之者,合 地,既爲己有,然後掇之、捋之。」是猶以「采 案:藏,猶聚也。 者,已藏之稱,總其終始也。」諸家多疑 『采之』、『有之』,『采』者,始往之詞;『有』 之」,傳:「有,藏之也。」正義云:「首章言 不宜遽言「藏」,故皆以「有之」爲始得。 正義既云「掇捋事殊,袺襭用别,明非 薄言采之」,傳:「采,取也。」「 傳明云采者非一,則或有 嚴《緝》云:「采而聚之於 也。 或謂「藏 薄言有 承珙 初采

讀,非訓「捋」爲「取」,猶言「捋,捋取之也」,「薄言捋之」,傳:「捋取也。」此三字連

四二

爲車前。」 傳 捋其子之未落者。 手持其穗,一手捋取之。」承珙案: 傳 也。」戴氏《補 爲「拾」,蓋「掇」是拾其子之既落者,「捋」是 〈陸堂詩學》曰:「即『捋之』一語,可 文 簡 渻 耳 注》曰: ^ 詩 陸燧、沈守正皆如此説。 詁 「掇,穗折之也。 捋, 以 指 證末苡 訓 捋,一 歷 掇 取

尺,燕尾一尺五 有二寸」鄭注:「衽,所以 屬衣,其實衣、裳皆有之。 襭衽,是婦人之服未嘗無衽也。」承珙案: 釋《喪服》傳曰:『婦人不殊裳,其服 襭之」,傳:「扱衽曰襭。」陳氏《禮書》云:「鄭 而無衽。』《詩》言婦人之采芣苡,或袺衽,或 説文》:「衽,衣絵也。」「碒,交衽也。」衽 衣裳」者,用布三尺五寸,裁爲兩衽,上廣 薄言袺之」,傳:「袺,執衽 寸,凡用布三尺 掩裳際也。 《喪服》傳「衽二尺 五寸。」此 也。一 上正一 如深 薄 謂 衣 言 雖

> 際。 或持其衽,或扱其衽於帶耳。 則裳之旁幅亦當如深衣有衽,以合前後之交 也。 衽」之説,自未可據。 縫之以合前後」者也。 藻》云「衽當旁」,注所謂「或殺而上,屬裳,則 斜裁爲四幅,上狹下廣,綴於裳之兩旁。《玉 正 下 藻》注所謂「或殺而下,屬衣,則垂而放之」者 處亦用布四幅,正裁爲八幅,又以布二幅 狹,綴於 此詩「袺之」、「襭之」,蓋謂 深衣之服不殊裳,衣用 衣之兩 旁,鄉 婦人之衣既如深衣 下 垂之, 正幅;裳之前後 《儀禮注》「無 以裳貯物,而 掩裳際、《 玉

漢 廣

神也。言漢神時見,不可得而求之。」范氏也。」《琴賦》注引《薛君章句》曰:「游女,漢選・七啟》注引《韓詩序》曰:「《漢廣》,悦人選。」、「《漢廣》,德廣所及也。」《文

之可悦耳。以漢女爲漢神者,或以比貞静之 總之,《韓序》云「悦人」者,不過謂女子守禮 矣。」承珙案:《文選•江賦》注引《韓詩内 女鬾服。」然則「漢神」之説,不獨出於薛君。 文・鬼部》又引《韓詩》傳曰:「鄭交甫逢二 傳》有鄭交甫漢皋遇二女妖服佩珠之説,《説 女可望而 而思欲求之耳。 〈拾遺》曰:「韓云『悦人』,蓋悦游女之貞潔 洛神》也。 不可即,非果如陳思感甄后 古籍不完,難以 薛君乃以游女爲漢神,悖 遽生訾議 而 賦

謂非禮則不可求耳。故下章箋云:「願致禮化男子」? 不知鄭氏「犯禮」之言衹是設辭,生,女將不至」之説,而歐陽《本義》駮之,謂男之守禮無犯亦可知矣。自鄭箋有「犯禮而男之守禮無犯亦可知矣。自鄭箋有「犯禮而「漢上游女,無求思者。」是不獨女志貞潔,而首章四「不可」字,語意直截。傳云:

殊,亦非是。 餼,示有意焉。」歐陽譏其一篇之中前後意

《章句》具存,陸孔所見本較多,何反無 《詩》之大體,韻在辭上。疑『休』『求』字爲 皆爾。 嘉魚》「烝然來思」、「嘉賓式燕又思」,「來」讀 孔意見不同,孔説較勝於陸。《小雅·南 改之」。承珙案:「息」當爲「思」之譌字,陸 『思』者? 今《外傳》作『思』,恐是後人以 陳氏《稽古編》疑「唐初《韓詩内》《外傳》及 改耳。」朱《傳》始據《韓詩外傳》改作「思」。 韻,二字俱作『思』,但未見如此之本,不敢輒 云:「經『求思』之文在『游女』之下,傳解 上』,疑經『休息』之字作『休思』也。 何則? 『喬木』之下,先言『思,辭』,然後始言『漢 釐」、「又」讀「怡」爲韻。 「不可休息」,陸德明云:「息如字,古本 本或作『休思』,此以意改爾。] 孔穎 《大雅 抑》「神之 作

《民勞》,傳皆曰『息,止也』。此若作『息』,則 以箋有「止息」之語,故不敢輒改耳。 息也。」此「止息」專釋「休」字,非關經作「休息」。 然諸儒自 當有傳。」箋云:「木以高其枝葉之故,故人不得就而止 上,與此文法正同。 格思」、 示 可 度 思」、 段懋堂曰:「《葛 矧 可 射 思」,皆 韻 生》、

作「永」,三家作「羕」,師傳不同,非是「羕」古牌賦》「川既漾而濟深」,李注引《韓詩》「江之豫矣」,薛君曰:「漾,長也。」惠氏《古義》引為"人,神君曰:「洪之永矣。」」、紫,以是。《詩》曰:「江之永矣。」」「羕,水長也。象水至理之長。《詩》曰:「江之永矣。」」「羕,水長也。从永,羊口。「江之永矣。」」「羕,水長也。从永,羊口。「江之永矣。」「羕,水長也。从永,美心。。 作「永」,三家作「羕」,即傳不同,非是「羕」、 作「永」,三家作「羕」,師傳不同,非是「羕」、 作「永」,三家作「羕」,師傳不同,非是「羕」、 (語》)

然諸儒自
女之尤高潔者,下「秣馬」、「秣駒」,「謙不敢得就而止
後二章,鄭箋以「刈楚」、「刈蔞」喻欲取思」,則
齊》《魯詩》作「羕」,亦未必然。
鼠在辭
於「永」。《文選》引《韓詩》作「漾」者,「漾」乃韻在辭

决不可求,以明必以禮往之意。 禮干之乎?」又疊《漢 敢斥其適己」。何氏《古義》曰:「秣馬,謂親迎 人若欲娶此女,必待秣馬以行親迎之禮,庶可耳,豈可以 所謂壻「御婦車」、「御輪三周」是也。 馬」、「秣駒」,乃欲以親迎之禮行之、《昏禮 此言「錯薪」、「刈楚」,已從婚姻起興,「秣 餼」,語意本自貫串。《詩》中言娶妻者,每 及《綢繆》之「東薪」、《豳風》之「伐柯」皆是。 斥其適己,於是子之嫁,我願秣其馬 析薪」起興,如《齊・南山》、《小雅・車舝 御車」而曰「秣馬」,微婉其辭,故箋云「謙不 廣》 四 語者,是申 歐陽《本義 以致禮 也。 不敢 取 言 非

殷勤 嚴華谷 謂 貞潔 想矣。」承珙案:《本義》方駁箋説以 執鞭忻慕」。 秣 相牴牾矣。 而 馬 則佻達之辭豈非犯禮之漸乎。 男獨 云: 猶古人言「雖 如如 有犯禮之心,乃謂 若非· 此則 自欲擇偶 敢請子佩,已 爲 執 鞭,所 而 秣馬、秣 但 忻 有 從旁效其 慕 歐陽説 狎暱之 不 焉」。 應女 駒 爲

自

以 即 《左傳》齊高固及子叔姬「來反 庶人亦有送女之馬。 子至大夫,始有留車 謂「士妻始嫁,乘夫家之車」。 東山》云:「之子于歸,皇駁其馬。」則似士、 秣 秣馬者。 用 馬之芻禾,猶《聘禮 誤會箋意。 召南》正義 性上 惠氏《詩 正義泥於牲腥 引鄭《箴膏肓》據《士昏禮》 説》 此箋云「致禮餼」者,餼 反馬之禮 》餼賓 文謂 日 餼, 「納徴無用 有芻禾,亦所 馬」,謂「自天 _ 又據宣 謂《 承珙案: 昏禮 Ŧi. 馬 年

> 者異。 與 類也。」承珙案:《埤雅》亦引《管子》此文,然 則蔞爲萑葦之屬,翹然高 翹然于錯薪之中,亦與楚爲黄荆、莖幹 言《爾雅》之「商蔞」,似非詩人所 聞有高丈餘者,亦不可刈以爲薪。 近。 陸《疏》云葉長數寸,高丈餘。 正 脆美,其葉又可烝 「吴酸蒿蔞」者,今人尚以爲菜,猶名蔞蒿,未 稗疏》曰:「蔞蒿,水草。 義引《爾雅》「購,商蔞」,郭注以 商蔞」混 然郭云「江東用羹魚」,陸《疏》亦云生食 「言秣 「言刈其蔞」,傳: 《管子》曰:『葦下于雚,雚 其駒」,傳:「五尺以上曰 而爲 一,不如此説於詩義較合。 爲茹。 蔞, 出 是即《大招》所 生于州 草 而 似於「翹翹」爲 中之翹 可薪者,蓋 爲「蔞蒿 下于 渚。 刈 郭、 駒。」《説 翹 ず。」 既 王 然。」 可 陸 蘆 氏 所 不

文 馬部》云: 詩 『我馬 馬高 維 六尺爲 騎。」 段 注 云: 从 馬, \sim 漢

爲 歲曰 與『駒』義迥 作『驕』也。 作驕。』據《陳風》、《小雅》,則知《周南》本亦 駒 在二部,於四部爲合韻乎? 多改作『駒』者,以『駒』與『葉』、『株』、『濡』、 同。』《小雅 云:『或作駒,後人改之。《皇皇者華》篇 此 廣 由 曰 「諏」爲韻、「驕」則 南 駒」本義。 不 駒」,乃用『駒』字本 駒。」此『駒』字、《釋文》作『驕』,引沈 》傳 『駒』字、《釋 |傳曰:『大夫乘駒。』箋云:『馬六尺 有喬木》、《株 知古義 駒。』《詩》『駒』字四見、《小雅》『老馬 云: 六 》『我馬維駒』、《釋文》云:『本 别。 陸氏於三詩無定説 蓋六尺以下五尺以上謂之『驕」, 也。」承珙案:段説是也。 尺 文》不爲音。 以 三詩義皆當作『驕』,而俗人 林》、《皇皇者 非韻,抑知『驕』其本字,音 上 爲 · 義。 馬 駒未 **^** Ŧi. 《説文》:『馬二 陳 尺 彼此 風》『乘 華》斷 以 可駕車,故 上 爲 互異, 何休 非 以 我 駒 亦 内 用 反 重 下 乘

譌。 驕」者,殆昏禮攝盛,抑託辭故不嫌歟? 游之事。」然則 乘驕」,舉中以該上下。此「漢有游女」正 尺以上,諸侯曰馬,高六尺以上, 云:「庶人之女執筐行饁,不得 日駒,高五尺以 注《公羊隱 蓋乘驕者,通卿、大夫、士。 元 年。 以庶人之女而言「秣馬」、「 上。」此「駒」字亦必「驕」字之 傳 学云 天子 馬 在 毛云「大夫 室 日 卿大 一, 故 夫 有 高 秣 出 義

汝 墳

《北門》之大夫,《北門》大夫之妻,不及《汝 陳 明於君親之大義,勤而 誰 在言外。 瘁事國、無遺父母憂者,從可 ? 「閔其君子,勉之以正」意,而 《序》云:「《汝墳》,道化行也。」此 原其本、蓋 李迂仲曰:《北 由道化既行 不怨,則其君 山》之大夫,不及 " 雖 知矣。 道化之行, 婦人 詩 女子 子之 中 盡 亦 自 但 是

Щ

墳》之婦人。以此見王化之衰,日甚一日,可

勝歎哉」

於厓岸大防之上,不應在濆汝之間。」「『墳, 然者,以彼『濆』從水,此『墳』從土,且伐薪宜 郭意以此「汝墳」爲濆汝所分之處。 如墳墓,名大防也。」此即 亦借字。《詩》疏引李巡云:「墳,謂厓岸狀 武》之「淮濆」當作「濆」,此「汝墳」當作「坋」。 承珙案:《説文》:「墳,墓也。」「濆,水 大防』、《釋邱》文。」「《大司徒》注云:『水厓 有濆」,郭璞曰:「《詩》云:『遵彼汝濆。」」則 防也。」正義云: 可 也。」「坋,麤也,一曰大防也。」據此,是《常 曰墳。』則此『墳』爲汝水之側厓岸大防也。」 通 「墳」者,假借字。《爾雅・釋邱》作「墳」, 遵彼汝墳」,傳:「汝,水名也。 楚 解 哀郢 《釋水》「汝爲濆」,又云「汝 「登大墳以 就借字釋之,義亦 遠 望。」亦作「墳」。 「傳箋不 墳,大 厓

> 《考工記》注: 本字,「墳」「濆」皆假借字也。 作「濆」。是不知毛訓「大防」者,宜以「坋」爲 廣川乃謂「汝墳」字當作「濆」,晉世《詩》本猶 厓也」,而《釋文》、正義引俱作「墳」是已。 鄉、《詩》所謂汝墳。」案:《考工》作「妫」者 墳。」《續漢志》注引《晉地 亦「坋」字之借。郭璞引《詩》作「汝濆」者,以 濆」與「墳」通用。 漢志》: 「汝南郡 「 妢 汝 胡 如《大雅 陰縣,故 胡 子之國 道記》:「有 胡 常武》傳「濆、 國, 在 莽 楚 陶 曰 旁。」 董 邱 汝

文》:「惄,飢餓 箋以爲「思」,義相接成也。」承珙案:《説 耳,但飢之思食,意又惄然,故傳言『飢意』, 也。』《釋言》:『惄,飢也。』惄之爲訓 「惄,思也。」正義曰:「《釋詁》云: 詩》日 怒如調飢」,傳:「怒,飢意 : 「惄如輖 也。 飢 。』」段云:「輖,各本作朝,今依 从心,叔聲。 也。」箋云: 日息也。 『惄,思 本爲 思

同。 《方言》,「慐」與「思」義相近,是許意略與鄭 下不引者,所謂偁《詩》毛氏皆古文也 爲後來孳生之字。許於「惄」下引《詩》,「愵」 引《詩》在「一曰惡也」下,「惄」之訓「惡」,本 愵,古文惄恝二形」。 愵, 息兒, 讀與怒同。」《一切經音義》十六。 甫 《釋文》引《韓詩》作「愵」者,《説文》: 本 訂。 據 此 是 飢 爲 蓋「惄」爲古文,「愵」 松」字本 訓 但 許

> 未可從。 林》云「俩如旦 章 句 ***** 日 : 朝 一飢」,亦用毛義。 飢 最 難 忍。」 是韓 與 重飢之説,殆 毛 同 《易

氏曰: 説。 《集解》引《養生經》曰:「魚勞則尾 文》:『魴、赤尾魚。』《字林》同。 之赬也。」此則通二説爲一,然在《詩》當衹取 能運其尾,加之以衡流,則其勞甚矣,宜其尾 勞則尾易赤。 多,則血流注尾,故尾赤。」此皆用「魚勞」之 則髮白。」嚴《緝》引張子曰:「水淺,魚揺 勞。《左傳》疏以賈逵云「魚勞」,是賈、服説同。 衆,見《左傳》疏。 引《左傳》「如魚赬尾,衡流而方羊」,鄭 魚勞」之意,但如傳義足矣。嚴《緝》又引吕 惟《 魴魚赬 無 爾雅翼》云: 尾赤,鲂 尾」,傳:「魚 云「魚肥則尾赤」,服氏 以魴言之,其體博大而肥,不 尾白。」李迂 「魚肥」 勞則尾赤。」正 則 不 仲曰: . 耐 《晉安海 勞,不 赤,人勞 亦 氏此 |《説 李氏 爲 尾 魚 義

籀文从 骨更隆,上有赤鬣 綱目》云:「一種火燒 或从扁,作鯿。」「魴,赤尾魚也。 記 是此魚。 經》,皆云「魴即鯾魚」。 尾 而尾頰俱赤者,俗尚名爲鰟魾魚,許所指 而 説文· 赬 海物記》所 詩》有「赬尾」之文而遂妄爲附會哉。 赤目魚也」文同,必皆得諸目驗,豈果 》 曰 盡 籀文作「鰟」,今有一種小魚,形微似鯿 橘。』此徒見有 不言是 尾」者無涉 赤,而不知 旁,作鰟。」據郭注《爾 魚部》: 「魴」下云「赤尾魚也」,與「鱒」下 橘 一魚,是許意「魴」非 鬣 云「橘鬣魚」 魚 也 魚勞然後尾 ,猶今之魴魚,其尾赤 「鯾,鯾魚也。 「魴 連尾,黑質赤章。」此 魚赬尾」之文,遂以 鯿,頭尾 《説文》則二篆相次, 者,要於《詩》之言 赤也。」承珙案: 俱似 即 雅》 从魚,方聲。 从魚,便聲。 今之鯿 及《山 魴,而 ~本 其 蓋 爲 魚, 魚 草 因 似 脊 即 云 海 魚 鬣

辭 娶。 火 帶就孝廉之舉。」注引《韓詩》曰:「《汝墳》, 誦《詩》至《汝墳》之卒章,慨然而歎,乃解韋 漢 邇。』蓋不得已也。」此又與《韓詩》説合。 「魴 義,然而仕者,爲父母在故也。 怒,遺父母憂。」此誼 時不來。其妻恐其懈於王事,蓋與其鄰人陳 貧親老,不擇官 素所與大夫言國家多難,惟勉强之,無 劉向《列女傳》曰:「周南大夫平治水土,過 近,當念之以 箋云:「辟此 也。 家 書 魚赬 生於亂世不得道理,而迫于暴虐不得. 也。」《薛君章句》曰: • 周磐傳》:「居貧養母 父母 孔,甚 尾,王室如毁。 孔 也。 勤勞之處,或時得 免於害,不能 邇」,傳: 而仕,親 邇 近也。 與箋説同。 「孔,甚。 雖 操井 「赬,赤也。 爲 則 ,儉薄不充。 言魴 疏 如 臼,不擇 乃作詩 遠者計 罪。 毁,父母 邇, 又云:「家 魚 、勞則 父 近 燬,烈 妻 母甚 有 日 也。 《後 也 孔 行 譴

子 外苦! 則 顔 色變。 以 王 一室政 教

可謂 矣,猶 紂 爲此禄仕。」此雖與傳箋小異,大旨則同。 赤, 長樂王氏以「父母」爲指文王,而《吕記 傳》因之。 而 親文王。 邇。 **阿爾** 若婦人之言以文王爲父母,則是怨 而仕者,以父母甚迫近飢寒之憂, 范氏《補傳》曰:「岐周去汝墳不 此文王之所甚懼也,何謂勉之 如 》、朱 烈 自 火

趾

正哉?」

世」者,自如《易 時」對上「衰世」言之,即指 衰世之公子皆有信厚如《麟趾》之時耳。 厚如《麟趾》」六字微逗,謂《關雎》之化行,雖 公子,皆信厚如《麟趾》之時也。」末句「皆信 關雎》之化行,則天下無犯非禮。 《序》云:「《麟之趾》,《關雎》之應 •繫》所言「殷之末世」。 化 行之時。 雖衰世之 之 「衰 也

> 讀《序》文者。 配君子』,指作詩者言之。」此亦費解,皆非 以「之時」二字爲贅。 致麟,文王不致麟,斤斤較量 之化,有似麟應之時。正義遂以黄帝、堯、舜 奥如此者甚多。 字屬上「信厚」,非連下「之時」,古人文法拙 此 公子,皆有信厚如《麟趾》之時。 ·如《麟趾》之時』,亦如《關雎》『樂得淑女,以 見《周 南》之化, 箋説乃以爲後世存《關雎》 有移 李迂仲又云:「所謂 風 易俗之應, ,拙矣。 「如麟 程朱皆 雖 趾三 衰 世

子爲『鳳兮』也。」承珙案: 此説 也,『于嗟麟兮』指公子言,猶楚狂接輿稱孔 姓公族。」嚴《緝》云:「『麟之趾』指『麟』言 説不同,恐微有礙。 嗟麟兮」則指公子。 朱《傳》以首句「麟」字興文 麟之趾」,傳:「麟信而應禮 不如兩『麟』字皆指爲子 許白雲曰:「兩『麟』字 尤與傳箋合。 王后 ,以足至者 **远**,一于 Ŧī.

應,有 德則 注云: 蓋本之。 以見志。 義》云:『玄之聞也、《洪範》五事,一曰 方來應、《禮運》疏以此 傳》云『水官不修則龍 仁。則鳳皇來儀。』《騶虞》傳云:『有至信之 言從乂《校勘記》云「乂當作義」是也。 同,以爲修母致子也。 禮運》及《左傳》疏引《異義》,以此爲奉德侯陳欽説,康成 一行屬 · 恭禮仁《禮運》疏引作「性仁」,《校勘記》據閩本作「體 。」正義云: ,聽聰知 人臣 應之。』是 似於麟。』申 『視明禮修 金。 是其義 則修母 其言可 Œ 孔子 而 「言信 也。 與《左 名 時 致子應,以 從,故天應以金獸之瑞。」據 而 Ш 述傳文,亦以『鱗』爲『信 周 箋: 爲熊氏申鄭義。 麟 出龍、禮運 而 傳》 不至」故也,人君則當 至,思睿信立白 哀十四年《左傳》服虔 道 應禮,則與《左氏》説 『公子信厚, 衰,於是作《春秋 説 昭 同 二十九年《 也。 》疏引作「名川」。 成則神 是以《駮 説者 與禮 言,於 虎 龜 擾 異 左 在 相 又 終篇, 角軒 黙し。 説 : 麟

물

獸。』賈逵、服虔、穎容皆以爲然。」《初學記 云:『鱗生於火而游於土,中央軒轅大角之 毛同,足明先儒相承,歷有此義,其來古矣。 其母致其子,五行之精也。」 據此,諸説皆與 引蔡邕《月令章句》曰:「天宫五獸,中有 西方也; 麟、鳳、龜、龍 説。」承珙案:《禮運》 也。」哀十四年《左傳》疏云:「説《左氏》 轅麒麟之信。 《駮 中央 鳳,南方也; 異 義》以 軒 ,謂之四 轅 大 麟生于火,游于土,故 爲「 角 疏 靈。 龜,北方 西 之獸。 引《異義》:「《左氏 方毛 龍, 蟲」, 也,麟,中央 東方也,虎, 許慎 謹 更爲别 案: 大 修

貌

沼

也

所》云:「此詩言公子公孫,宜在 歎,在作詩者固 嗟麟兮」、《騶虞》云「于嗟 瑞應之説 則 編詩者更非 後 |必有 儒 無 取 固 爾。 意 所 不信。 可 乎騶虞」,反復 而二《南》適以 知 《樛木》、《螽 然此云「于 李安溪《詩 詠 此

作者道其實,序者大其事也。」不在他,自其一家之中,而麟之全體具矣。之瑞焉。爲此詩者因其應,推其本,以爲麟斯》之次,而序以終篇,故先儒以爲必有郊藪

毛詩後箋卷一終

五.

毛詩後箋卷二

涇 胡承

珙

鵲

巢

召

南

已。」黄氏佐《詩經通解》曰:「《周南 主於所指之人,故序者特云『夫人之德』而 取以爲法,明夫人之德皆當如是,則其義 人,詠歌而美之,當必爲一人而 亦始於家人,故其夫人之德如是。 趾》之化行於内,諸侯蒙化以成其德,而 詩緝》引朱氏曰:「文王之時、《關 《序》云:「《鵲巢》,夫人之德也。」嚴氏 作。 雎》、《麟 然周公 當時之 關 其 雎》 不 道

夫人。《考工記》「夫人以勞諸侯」,「夫人」謂 姒,夫人爲大任、周姜。况古者,王后亦可 婦之吉者。」若諸侯,止有一夫人,安得有三 王后之服。其下云:「遂布於三宫夫人、世 人副褘受之」,此「夫人」亦謂王后,蓋副 王后也。《祭義》「世婦卒蠶,獻繭于夫人,夫 妃、夫人者,必皆有是德耳。 如 案:二《南》在周爲房中之樂,蓋 乃有此説,恐亦當俱以泛言爲是也。」承珙 專指大姒,而於《鵲巢》則不言所美之人,故 宫夫人? 其末云:「君服 人,則周初三母皆足當之,不必泥 大任、周姜,而必以大姒當之? 至於《鵲巢》 有此論。要之,『后妃之德』,安知其不兼指 所美之人,《鵲巢》如之。 虞》爲之終。 與《召南・鵲巢》正 《關雎序》謂『后妃之德』,不言 相爲始,而《麟 朱《傳》既以《關雎》 以祀先王、先公。」 必 言凡 后 欲 趾 妃 實 *\ \!\ 爲 禕是 爲 指 稱 大 其 后 騶

之禮 諸 夫人也。 侯 豈有: 故 此「夫人」亦王后 先王 邪 ? 此 章 通 本 稱,不專指諸侯 通言天子、 諸 侯

静均 蓋詩 姓之好,族類名物之相稱。」此説得之。 鵲巢,受百兩之厚禮,爲夫人者自思苟 故夫人象義。」《東萊文集》有云:「居已成之 與箋傳誤爾。」承珙案:鳲鳩均壹之德,毛於 因謂鳲鳩『有均壹之德』。 配 鳩 於詩義自無大悖。 (曹風 來 也 人取興,止於鳩居鵲巢,其均壹之德 外所該。 居 歐 一之德,其何以堪之?」是則以德言鳩 關 陽《本 《序》言『德如鳲 爾,初 鸤鳩》傳及之,而《鵲巢》並未嘗言。 鵲 鳩 義》云:「詩人直謂 無 令文 鄒忠胤 配 心 義。 况《序》言「可配」,本指夫 雕 云: 鳩, 况鵲鳩異類,不能作 龍》云:「鳲鳩貞一, 詩人不繆,但《序》 一鵲 乃可 鳩 以配」,鄭氏 殊種 鵲有成 「喻二 無純 即 巢 固 如

> 害辭? 趙 國,趙孟 昭 元 孟 曰 : 年《左傳》, 治之。」此可見詩無達詁,何庸 「武不堪 鄭 伯享 也。」杜 趙孟 注 ·穆 云: 叔 賦 喻 晉 鵲 I 君 有 以文 巢

相 戴勝、《左傳》疏引孫炎注《爾雅》同、《禽經》亦 穀」亦「布穀」之轉聲也。 北人云撥穀。」「郭公」亦「秸鞠」之轉聲,「撥 皆一聲之轉,「布穀」、「穫穀」、「搏穀」,聲亦 擊穀。」《月令》鄭注云:「鳩,搏穀也。」案: 文》:「鷄,秸鷄,尸鳩也。」《詩釋文》引《草木 關而東,梁楚之間謂之結誥,周魏之間謂之 疏》云:「一名擊穀。」《方言》云: 云"「今之布穀也。 秸鞠」、「鴶鵴」、「秸鷄」、「擊穀」、「結誥」, 爾雅》作「鵠鵴」、《詩 近。 「維鳩居之」,傳:「鳩, 《本草拾遺》云:「布穀,江東呼郭公, 江 疏》引 東 《方言》既 呼 《埤 鳲鳩, 爲 蒼》字 穫 「布穀,自 秸鞠 以 穀。」《 同。 鳲 鳩 郭注 也。 説 穎

義合。

至《

. 鵲巢》之「鳩」,傳以爲「秸鞠」者

飛入雲中」,亦與《詩》「宛彼鳴鳩,翰飛戾天」

説文》作「舫」,云:「澤虞也。」郭《方言》注以爲别 小宛》之「鳴鳩」,傳云:「鳴鳩 鶻鳩冬始去,今秋見之,以爲喻,故知 有之。《氓》詩之「鳩」,傳云:「鳩,鶻 或謂《詩》單言「鳩」,毛何以定知爲鳲 食桑葚過,則醉而傷其性。」此蓋毛公 生穴中,不巢生,而《方言》云「鸤鳩, 承珙案:《爾雅》無單言「鳩」者 疏云:「《爾雅》鳩類非一,知此 澤、太平 御 ,鶻鵰 孫 炎亦 非 餘 同。 也 是鶻 鳩 戴勝」, 一鳥。 一鶻 也。 案: 鳩 據 ! 謂别 蓋諸 巢,是先將鳩説壞矣,何以爲夫人興乎!」 爲巢,居鵲之成巢。」亦必目驗知之。 鸇,鸇之爲布穀」。 春秋 布穀,且得獨專「鳩」名。 正月,「鷹則爲鳩」,《淮南 鳩」爲「布穀」,《列子・ 有一拙 書單言「鳩」者,多係布穀。 徐氏文靖《管城碩記》曰:「後儒謂鳩 仲 春紀》「鷹化爲 鳥名鳩者, 是則鷹鸇所化之鳩

《詩》則

鳩、秸鞠?

鳩

也。

誤矣。

達云:

戴勝自

也。

又以

爲

鶭

• 時

則訓

》、《吕氏

如《夏小正

鳩」,高誘

注

皆以

天瑞》篇「鷂

之爲

確

是

嚮也。 説 而 尋則呼其耦併居焉」。 翼》以「方」爲「併」,謂「始則一鳩居之而已, 主送之而言,故曰『方之』,言嚮其巢之所在 將 解 往 頤》曰:「方,所也,以爲安居之所。」戴 維鳩方之」,傳:「方,有之也。」《爾 居之也。」《虞東學詩》説同。 上章主迎之而言,故曰『居之』;此章 何氏《古義》曰:「方, 季氏本《詩

《月令章句》、《左傳》疏引孫炎,皆以「鳴

鵰、《爾雅》謂之「鶌鳩」。

《太平御覽》引蔡邕

似

山鵲

而

小,短尾,青黑色,多聲」,高誘

注

「鶻鳩」,與毛傳合。

郭注《爾雅》云「鶻

鵃

鳩

淮

時

則訓》云「鳴鳩

奮

迅其羽,直

刺

上

者,以

目

驗

而

知者。

性

拙,不能

爲

肊

説 無

徴,曾

何

足

歐

陽

氏

傳云:

一鳥

鳩

不

自

成巢而居有之」,然則傳文「之」字蓋涉此諸 言甫有之也,非訓『方』爲『有』。」然經文但言 文而衍。段懋堂云:「方,猶甫也。方有之, 人起家而居有之」,箋於首章亦云「鳲鳩因鵲 也」,即本毛傳。無庸改訓。《釋文》云: 東」,傳云:「荒,有也。」蓋「幠」「荒」聲之轉, 引《詩》「遂幠大東」,今《毛詩》作「遂荒大 宜訓「有」耳,不知《爾雅》「幠、厖,有也」郭 方之」,若如段説,則是「維鳩甫之」,經文爲 方,有之也。 荒」與「方」聲有輕重耳。 ·居之』也。」承珙案: 諸家蓋皆疑於「方」不 ·既方既阜」,箋云:『方,房也。」『方之」,猶 注》曰:「古字『房』通用『方』。《小 一本無『之』字。」玩《序》云「夫 《廣雅》云「方,有 雅 注

滿者,言衆媵姪娣之多。」何氏《古義》謂:「維鳩盈之」,傳:「盈,滿也。」箋云:

采 蘩

傳云:「神饗德與信,不求備焉。沼沚谿澗門:「蘩之供祭,一見於《左傳》,再見於《夏曰:「蘩之供祭,一見於《左傳》,再見於《夏曰:「蘩之供祭,一見於《左傳》,再見於《夏為節,樂不失職也。』詩皆與之合,可以爲定為矣。」陳氏《稽古編》曰:「《左傳》『薲蘩薀為矣。」陳氏《稽古編》曰:「《左傳》『薲蘩薀之。」陳氏《稽古編》曰:「《左傳》『竇蘩薀之。」陳氏《稽古編》曰:「《左傳》『竇蘩薀篇、可薦鬼神』正指《采蘩》、关人不失職也。夫

《皇矣》與《左傳》合也。又文三年《左傳》: 謂之非祭事乎? 猶蘩菜。」此雖斷章取義,其大旨則皆以 之,其何實非命。」注云:「穆叔言小國 賦《采蘩》,曰:「小國爲蘩,大國省 物薄,而用可重之意。 不遺小善。」昭元年《傳》,鄭伯燕趙孟 沚之蘩至薄,猶可用之以供公侯,以喻秦 也。《詩》曰:『于以采蘩,于沼 知秦穆公之爲君也,舉人之周也,與人之壹 用之,公侯之事。』秦穆有焉。」杜注:「言沼 「秦伯伐晉,遂伯西戎,用孟明也。君子是以 葉石林所云毛釋《碩人》、《清人》、《黄鳥》、 之草,猶可以薦。」此正用《左傳》文,不止如 然則公侯之事,尚得 于沚。 穡 于以 繁爲 穆叔 微 而 穆 薄 用

「於」二字,其本義皆爲氣舒之詞。《説文・丂「于沼于沚」,傳云:「于,於。」承珙案:「于」「于以采蘩」,箋云:「于以,猶往以也。」

釋古字,則是「于」爲古義,「於」爲今義矣。 釋,皆爲語辭。 終,象古文烏省。」據此,是「于」爲氣之舒,古 于也」,「爰、粤、于、那、都、繇,於也」,輾轉訓 古字,用「於」爲今字。《爾雅》:「粤、于、爰 今「於」字从此。字之本義,如此而已。其孳生 烏呼之字,小篆作烏,古文作紹,或省作於。 取其助气,故以爲烏呼。稱,古文烏,象形。 子曰:『鳥,于呼也。』于,各本作「盱」,从段注訂正。 曰也。」「曰」與「聿」同爲發語辭。 多用爲語辭。其用爲語辭者,則又用「于」爲 之義,則以「于」「於」二字皆以 文作丂,小篆作亏,「烏」象鳥烏之形,借爲 也。」又《烏部》云:「烏,孝鳥也。象形。孔 象气之舒。亏从万,从一。一者,其气平 古文以爲『亏』字。」《亏部》云:「亏,於也。 「万,气欲舒 耐 以「於」釋「于」,乃以今字 出,与上礙於 助氣,故經典 又「爰、粤, 也。 万,

風》「 「『越,於』,《釋詁》文。」此謂「越」即《爾雅》之 經文云「往何器盛之」、「往何器亨煑之」,皆不成語。《陳 《詩》、《書》用「于」字,《論語》用「於」字,又凡 「往」,「盛之」、「湘之」似不必言「往」。 正義 則云:「于以,猶言往以也。」案:《采蘋》又 爲「於」,則用「在」義,「于沼」猶在沼也。 也。《詩》中「于」字有當爲語辭者,有當爲 鄭箋以「於」釋「于」者,皆所以通古今之字 經多用「于」字,傳注多用「於」字。 「于」不釋,蓋以爲語辭;而訓「于沼」之「于」 於《桃夭》「于歸」訓「于,往也」,此「于以」之 「于」者爲古文,用「於」者爲今文。故凡 「往」者,有當爲「在」者,傳箋義多錯出。 其又訓爲「往」、訓 云「于以盛之」、「于以湘之」,夫「采之」可言 而引申之,氣出必有所往,既往則有所在。 越以鬷 邁」,箋云:「越,於。」正 爲「在」者,皆由 而毛傳、 氣 亦 出 曰: 以 之義 毛 用

毛詩後箋卷二

「往」,誤矣。語辭,則此「于以」亦當爲語辭,而箋乃訓爲「粤」,「越以」猶「于以」也。鄭既謂「越以」爲

有「蘩,河 傳作「由胡」。 戴禮 可烝。 蒿,生澤田 故謂「于沼于沚」爲「于其旁」,「于澗之中」爲 論 傳皆以「蘩」爲豆實,故知 蒿」與「由胡」爲一物,蓋因毛戴《詩》《禮》二 有 蒿,今白蒿。 正 于曲内」,義殊牽强。 矣。 「蘩,由胡」,則郭云「未詳」。 義》隱三年。 于以采蘩」,傳:「蘩,皤蒿也。」《左傳 孔疏疑 夏小正》傳曰: 皤蒿」,郭注本孫炎以爲「白蒿」。 一名游胡,北海人謂之旁勃。 遊胡,旁勃也。」承珙案:《爾 沮 洳之處,莪即古之蘩,而皤蒿 春始生,及秋,香美可生食,又 引陸《疏》云:「凡艾,白色爲 「皤蒿陸草,不當采於水中」, 《爾雅翼》又謂「莪,蘿 蘩,遊胡;今本《夏小正 爲一 物。 陸《疏》以 此可爲定 故《大 雅》 幡 又 爲 皤

> 蒿也。 言而破矣。 異。 豈得爲公侯之宫。 雅》云:「蘩之醜,秋爲蒿也。」《七月》傳云 川澤。」然則皤蒿水陸皆有,通可名蘩,故《爾 生蠶之説,不知蠶事豈可謂公侯之事,蠶 蒿」,唐本注云:「此蒿葉麤于青蒿,從 陸草,非夫人之所采」。 至枯,白于衆蒿,所在有之。」此言陸産之白 蘩,白蒿也,所以生蠶。」 采蘩雖同 《集傳》既從毛以 《圖經》又云:「白蒿,蓬也。 試誦經文,而其説可不煩 采蘩爲奉祭祀 今案:《本 前 生中 草 而 学白 又 用 初 室 則 Ш 牛

從王祭先王,服禕衣,祭先公,服褕翟,祭未然也。《周禮》王后之六服,三翟皆祭服。又合『被』與『髲鬄』爲一。『被』之爲『次』,恐又合『被』與『髲鬄』爲一,其箋是詩,注《禮》,合『次』與『髲鬄』爲一,其箋是詩,

禮

群

以

服

由以 助其髮也。」此「髲」可通「被」之義也。 承珙案: 美,使髡之,以爲吕姜髢。」《莊子》曰:「秃而 文》又云:「鬄,髲也。 義引《説文》云:「髲,益髮也。」與今本《説 後加首服,『翟衣』之首服『副笄六珈』是矣。」 謂『髢』,不在副、編、次之數。 既用『被』,然 也。』『鬄,髲也。』二字轉注。『鬄』又作『髢』, 益髮」,並不以爲禮服之首飾。 斂髮毋髢。」《左 ·髲』『被』古字通用。然則是詩之『被』,乃所 燕居。 見 『編』,禒衣之首服『次』。 小 「被」與「髲髢」爲 王及賓客之服; 祀 《釋名》:「髲,被也。 服 戴説是 三翟之首服『副』,鞠衣。 闕 翟 ; 傳》: 也。 鞠 衣, 《鄘 褖衣,御於王之服 一也。 字亦作髢。」此鄭箋所 衛 告桑之服 風 莊 《説文》:『髲,鬄 然《説文》但 公見己 髮少者得以 君子偕老》正 《禮記》 ; 展衣之首 展 氏之髪 衣 É: 《説 , 亦 云 被 以 被 數 施 髢

若如毛傳但 時,故與《周禮》異。 夙,皆非正祭;嚴《緝》引曹氏 解,而又以夫人祭祀當服 鄭讀「被錫」爲「髲鬄」者,蓋因《士昏禮》「女 屑耳。 義以「夙夜」爲視濯於夜、視饎爨於將 衣,首當服次,故遂以被爲次。 次純衣」、「純衣」即緣衣、《少牢》大夫妻服 當云「不屑」也。《少牢》「主婦被錫衣侈 屑」之言毋乃虚設。 屑髢也」,足見服 次章,上言「其之翟也」,下言 服及平居時 故 ,副、編、次三者皆可 雖 若髲髢即次,則次 據 釋祭 此 云「被,首飾 皆可 諸 服 文, 而 翟 用 似髢 歸,其 時 不知 以 且次係禮服 亦 爲 用被。 可 爲 也」,則不必曲引祭 飾。 被 被 副,不當服次,故 婦 非翟 用髢,但 不 古 人 又以 《君子偕 「鬒髮如雲,不 在 依 益 詩 諸家泥 衣之配,「不 副 然 正 髮 人但 爲此 、編、次之 | 鬒髮者不 祁 飾,亦不 所 老》之 祁 需 祭之 於 袂, 在 商 īF. 此 褖

草蟲

守禮 蕨以 之,故謂「陟彼南 事。] 傳箋之説,固 隨 故其辭如此。 也。」 序》意不合,而 自防以待其君子之歸。朱《傳》用其説, 防者,以禮檢束之意。 喻 嫁 序》云:「《草蟲》,大夫妻能 求合於禮 則 憂不 正義云:「經言在室則夫唱乃 以 當其 山」爲適於夫家,「言采 此詩爲大夫行役,其 與《序》意不背。 惟歐陽《本義》謂 禮,皆是 惟恐不 以 禮 以 當於夫, 程 自 禮 毛 妻能 子 自防 防 鄭 從 之 其 與

> 皆非 者以 作。 相 之甚也如此。」此雖 言方嫁時在塗之情,而序詩者乃據其已嫁之 《吕記》、嚴《緝》皆同。 憂,則爲待禮; 見止,亦既覯止,我心則説。』《詩》之好 數語全與《出車》五章同,故知皆 曰:「《詩》云: 『未見君子,憂心 何説邪? 經文明云「季女」,而《序》亦曰「大夫 後,追而敘之,故云「大夫妻」爾。 通也 爲未嫁之女,失其旨矣。」承珙 也。 黄實夫又云:「《序》 夫作詩在前,序詩在後,作詩 《説苑 既見而説 ·君道》篇載孔 似 斷 李氏《集解》又謂 則 章 曰『大夫 取 爲好善,其義 義,然未 惙惙。 如《采蘋 子對 妻」, 爲 案 行 妻」,又 見 者是 善 哀 數 亦 而 役 首 道 亦 面 既 説 説 而 章

也。 也。」《爾 草 喓喓 蟲,常 雅 草 影一草 羊 蟲, 也。 螽, 趯 趯 負 趯 阜 鐢 趯, 螽 郭 躍 傳: 注 也 云 阜 喓 「常 喓,

非也。 也。」 違 蟲 《詩》所有,未可概謂緣《詩》辭 蚯 口 雅》因《詩》辭而 應,其天性然也。」此蓋相傳古義。 戴氏《詩 其原出于六書。 蟲謂之負蠜。」承珙案:此如鷣能捉雀,遂名 鐇、草螽、蜤螽三者見《詩》,其 蟿 補注》以「草蟲」爲 螽,今謂之 蜳 嵷。 負雀」。 古人名命百物,多有象形、會意者, 證實。 蚓 爲 ,尤未可信 草蟲鳴,阜螽躍而從之,故阜螽 《爾雅》又曰: 此本 與 蚯 若《爾 蚱 蚂 · 蜢判 -毛傳。 與 今案:《爾雅》「螽」有五種,惟 阜 雅 然異類,與 螽交,《本草》陳藏 翼》用 别其名類以 鄭《小雅》箋云:「鳴躍之相 可 凡 見歷 亦跳亦飛,飛不能遠 「阜螽,蠜。」陸佃 小蟲草生者之通稱 張 漢至晉,稱名尚 衡、郭 「鄭箋「同類」之義相 傅合之,未必 器亦有此説。 璞 生 之説 一螽、土 訓 日 曰 : 則 **一

整**草 戴 螽 未 青 「阜 草 説 阜 夫 非 盡 爾 改

端 若大夫妻,則當深宫固門,閽寺守之,何至無 《行露》、《野有死 禮 虎,豈必專是一物? 承珙案:二《南》所言貞女,如《南 侯,鳩喻夫人,詩人之取興,不如是之泥 以爲戒,「比男女之不當合而合」。 謂草蟲、阜螽形色不同 以禮相求呼」之説,申明毛傳「卿大夫之妻待 蟲鳴,阜螽躍 音,青色,好在茅草中」是已。《詩正 解》駁之,曰:「以類相從者,如雲從龍,風 云:「今人謂蝗子爲螽子。」是則鄭箋云「草 蝗 巡《爾雅注》以「阜螽」爲「蝗子」,又引陸《疏 而 而 類,故陸《 有 行,隨從君子」,其義當矣。 草蟲、《爾雅》本作「草螽」,與 彊暴之侵陵,其惴惴戒心若此哉? 疏》謂草 而從之,異種同類,猶男女嘉 鏖》,大抵皆指民間之女。 蟲 《鵲巢》之詩,鵲 ,種類亦異,故詩人引 「大小 長 歐陽《本義 短 有 李氏《 阜螽皆 如 義》引李 喬 蝗,奇 也。一 木》、 喻 從 集 時 爲

能 而 可,而又以 之義。」如「七出」之類,淫僻第其 防 淫 總 解》 者 洪 能 以 由 之事 禮 既 以 甚 歐公誤認《序》文「以 自 多。 禮自防,未足爲賢,惟大夫不在家 謂 守,所 歐 其 而不知禮之所 故傳云: 餘説 公草蟲、阜螽 以 爲 可尚。」此尤足發一笑。 可從,且云:「大夫 婦 包 禮 人 非 雖 甚 自 匹 適 廣 防 類之説 一端耳。 失 人,有 衹 禮 爲 之宜 在 歸 爲 防 李 家 宗 閑 不 而

見。二 應一事 精』語 之時 傳 序 顔 観」白 旧 廣 色之和, 義》曰 訓 承珙案:鄭以「覯」爲「昏媾」,究不 陳氏《稽古編》曰: 以「覯 證之,後儒多笑其鑿。 分深 而 「覯」爲「遇」之善。 重 「覯」 淺,不 「此詩 止」爲 複言之,鄭分爲 謂 遇君子 必 初 辭 如 與《殷其靁》、《汝墳》同 昏之夕,因引《易》『觀 鄭 「箋以『見止』爲同 所 接待之禮,「見」與 蓋「見」謂 云也。 然古詩簡貴,不 兩義,亦 姜氏 見君 非 如 《詩 子 牢 毛 無

> 豈有 即 調 『亦既覯 小 序》、傳之精矣。 用此『觀』字之義。」 雅 而《序》及傳不主君子行役者, 行 ・車舝》亦云『覯 役 止 既 歸 語 而 也。 如『覯』即 望 覯者 其 爾 禮 新 遇以 遇 作『見』,是贅矣。 昏,以慰我心」, 者 禮 哉? 以 也。 篇 則 天 中 下 · 有 知

之證 於《南 子耳。 婦 鳴。」此正秋時。 鄭以大夫之妻待禮 故也。」承珙案: 「毛以秋冬爲 己今之行者欲得禮,以 箋云:「在塗而 車有 ,但取以興大夫之妻待禮 毛於首章云「興也」,下二章 山》、《采薇》之歌。 馬 裧,安得在 昭 中鄭 Œ 見采鼈菜者得其 昏 乃 然傳意並 張 塗而 _, 不 而 謂 衡云:「大 嫁,明及仲春采蕨之時 得 三代 見采鼈 自喻 有 見《通典》。 不以 在 嫁娶 也。 塗 而 爲 火 采 以 行,隨 所 木 不 秋 鼈之 IE. 束 流 欲 仲 明 冬正 義 知昏禮 得, 所 草蟲 從 \(\frac{1}{2}\) 事 曰: 謂 符 君 昏 猶 ;

或稱 之時。」凡詩 迨 所見,不必皆可以定時候也 冰 未 泮」,正 人之興,取 月 以 前 義繁廣。 ; 草 蟲 喓喓」, 或舉 末 秋

歲蕨 如 如此類,蕨與藄當爲 萁。』『基』豈『萁』之轉邪?」承珙案:「蕨」 披,人誌之,謂之蕨基。 蕨也。」「茈」與「紫」同。 爾」,郭注云:「即紫藄也,似蕨,可食。」郭 初生無 鼈」疊韻、「蕨」「藄」雙聲、鳥獸草木之名多 蕨、鼈」,郭注謂 而 小兒拳,紫色而肥。 菜繁生。 與「綦」爲二 言采其薇」,傳: 言采其蕨」,傳:「蕨,鼈也。」《 斥《廣雅》「茈藄」爲「蕨」之非,誤矣。 葉,可 食。 其舊生蕨之處,蕨葉老硬 "「《廣雅》云『紫藄』,非 物。 江 一物。 西 「薇,菜也。」《爾雅》: 而《廣雅》云:「茈藄 野人今歲焚山 《爾雅翼》云:「蕨 《廣雅》云:『蕨,紫 謂之鼈。」又「綦,月 郭以「紫蓁」爲似 爾 則 也 雅 紛 生 來 以

説正 皆如 文 》: 白幕 薇也。 也。」 薇非可食之菜,陸《疏》則云薇「可作羹,亦 之。若白薇、《本草》一名春草、《别録》 Ш 次,似非無義。 曰:「垂水生水旁,不生水中。 珙案:《爾雅》以「薇,垂水」與「蘪從水生」相 豆苗,蜀 曰:「垂水」乃俗名,不必以生水旁釋之。 原川谷似柳葉者,白薇也; 故 薇, 間水, 薇生其旁, 不害爲 日 同。 ,蘇頌曰: 小豆,蔓生,其味 故邢昺《爾雅疏》謂《本草》有二薇,生平 垂 「薇,菜也,似藿。」《詩 垂水。」陸 《詩》「采薇」似山菜,非垂水。 水。」《 人謂之巢菜。」説與許陸 嚴《緝》引項氏云:「薇即今之野 釋 「莖葉俱青,頗類 八璣《詩 段説恐非。 文》 引 亦如 顧 疏》則云: 野 小豆藿。」許 義 Ė 生水旁似萍者 不如陳氏 Ш 疏 云 澗 菜 柳葉。」然白 *\frac{\times}{\times} 合,似 谿潢 也。」《 薇, 水 段懋堂 濱 ú 文名 長 莖 潦 爲 陸 説 承 豌 葉 皆 發 菜 近

生食」。 必審。 櫻芽,更不知何所據矣。 間 云「有芒而味苦」。 以爲味甘,胡云「食之甘美」。 有草名 復非 馮 「迷蕨」者當之,《 嗣 似柳之白 宗日 又各不同。 1薇。」胡 親 見官園 集傳》用其説, 至鄭漁仲以爲 明 以爲味苦,朱 介中又 所種,其言 以 荆 金 楚 而

和 《采蘩》言奉祭祀不失職也。《采蘋》言循法 廟、循法 先《采 蘋》 蘋》舊在《草蟲》之前。 歌《召南》三篇,越《草 事、《昏禮》所謂主人揖婦以入御衽席于奥之 度以承先供祭 《鵲巢》言夫人有均壹之德,佐君以造邦也 歌之,宜也。 理而後家可長久也。 木 學紀聞》云:「《詩正義》曰:《儀禮》 度、佐君子,故 而後《草蟲》。」惠氏《詩説》曰: 若《草 也。 婦德之大,莫大于事 - 蟲》, 蟲》而取《采蘋》,蓋《采 曹氏《詩説》謂《齊詩》 公婦順 《鄉飲》、《燕射》取三 則言始見君子之 備 ൬ 内和 理, 宗 内

《召南》之詩。」是則二《南》諸篇皆可 情、《采蘋》陳未嫁時教成之祭,其先後之序, 燕禮》「有房中之樂」注云:「弦 第之言近褻,故不取《草蟲》,則二《南》本以 古 即以《毛詩》論之、《草蟲》述方嫁時在塗之 珙案: 曹氏雖不見《齊詩》,其言必有所本。 歌之君臣賓客之前乎? 時 年《左傳》鄭伯享趙 射、燕飲,何獨 房中之樂用 蟲》,漢以後,學者亂其篇第耳。 蘋》後,此徒以篇什先後言,且未可考也。」承 夷,其言近于褻矣。 有父子,有父子然後有君 輾轉反側」,獨 自判然。 也。 始 日 於鄉 疑《毛詩》亦本先《采蘋》而後《草 我 舍《草蟲》而 心降, 孟,子展賦《草蟲》,即 非牀第之言乎? 人、邦國、所謂 牀第之言不踰閾 再 曰 臣也。 舊 我心説,又曰 不 謂 取 《草蟲》在《采 用 乎? 有夫婦然後 若惠氏謂牀 八歌《周 彼《關雎》之 於 况《儀 燕享之明證 用 襄二十七 况 於鄉 南 我 禮 口 心

六六

自防」之意。」故立必磬折,坐必抱鼓,周旋中規,折旋中矩。」亦是「以禮故立必磬折,坐必抱鼓,周旋中規,折旋中矩。」亦是「以禮喪年,子展以《草蟲》昌族。 感凶德之如彼,見吉德之如此,徐氏《管城碩記》云:「案:徐幹《中論》曰:「良霄以《鶉奔》

采 蘋

《稽古編》曰:「《采薲》篇,毛鄭皆以爲教 説,以爲「大夫妻主夫氏之祭」,正義駁 原其始,《序》要其終。少而能敬,以被文王 之宗室』之文同,二也,不偁『婦』而 之祭,其合於經文者有三焉: 薲藻二菜,與 能 后妃之化也。」承珙案: 毛鄭而後,惟王 曰:「《詩》稱『季女』、《序》稱『大夫妻』、《詩 女』,三也。」胡允嘉説亦略同。姜氏《廣義 《禮記・昏義》同,一也,『宗室牖下』,與『教 循法度,則可以承先祖,共祭祀矣。]陳氏 鄒氏忠胤乃謂詩不言婦而言「季女」,此 《序》云:「《采蘋》,大夫妻能循法度也 稱『季 之當 肅 異 成

筐」,又皆以嫁而稱『女』,復何疑於『季女』之 服虔注云:「季文子如宋致女,謂成昏。」此 月而 書『逆婦姜』、『來逆婦』,皆未昏時已正其名 則非「禰廟」可知。 謂「廟見」者,乃禰 則婦人三月之内,或可稱「女」。然《儀禮》所 舅姑在否,皆三月廟見之後,乃始成昏 又案:《禮記正義》引《左傳》隱八年鄭公子 並無「季婦」之文。鄒氏直改經以就己矣。 没,婦人三月,奠菜,祝亦稱 義也。」當其未廟見則猶稱女,女而尸祭,其 而《易· 忽「先配而後祖」,賈服之義,大夫以 爲廟見之初祭可 而廟見,稱季婦也,擇日而祭于禰,成婦之 内子必初嫁者。 廟見,稱來婦也。」《士昏禮》: 舅姑 漸》之『女歸吉』、《歸妹》之『女承 知。 (禮記 《虞東學詩》曰:「《春秋》 廟爾; 今案:《曾子問》:「三 經文明曰「宗室」, 曾子問》云:「三月 曰「某氏來婦」。 上 「。 故 一無問 既

據。故『牖下』之義明,而此章之説定矣。」皆外設。注曰『爲神布席』,其爲牖下明白可奚於筵前,無奠於牖下之文。惟《昏禮》自納葉於筵前,無奠於牖下之文。惟《昏禮》自納縣一、少字》事主于室,主婦薦豆,皆自房中爲大夫妻乎? 所當辨者,『牖下』耳。考《特爲大夫妻乎? 所當辨者,『牖下』耳。考《特爲大夫妻乎?

雅》: 陳氏《稽古編》辨之審矣。 連引《爾雅》兩語,而誤以郭注釋「蓱」者爲釋 曰:『于以采蘋。』」此本不誤。 自《詩正義 之薸。」又:「其大者蘋。」郭注云:「《詩》 小大既殊,浮沈亦異。《詩釋文》引《韓 云:「沈者曰蘋,浮者曰薸。」今本《釋文》作 「蘋」,朱《傳》因之,嚴《緝》並 「薸」,音「瓢」,當據以改正。今案:《爾雅 「苹,蓱。」郭注云:「水中浮蓱,江東謂 ·于以采蘋」,傳:「蘋,大蓱也。」《爾 藻」,盧氏文弨 謂王應麟《詩考》作 承珙案: 蓱與 譏郭注之誤。 詩 蘋 **>**

曰藻」,遂謂藻亦出水上,謬矣。言尤爲明證。而《埤雅》引《韓詩》仍作「浮者云:「『薸』之字似『薻』,説者遂以相紊。」此翼》亦引《韓詩》説「沈者曰蘋,浮者曰薸」,且

珍曰:「臞仙謂白花者爲蘋,黄花者爲莕, 並 如棠梨。 葉徑一二寸,有一缺 四葉菜爲莕,陶弘景謂楚王所得者爲蘋,皆 蘇恭謂大者爲蘋,中者爲莕,楊慎《卮言》謂 謂蘋也。 景、蘇頌即以「大蘋」釋之。 也,莖紫色,大如箸,柔滑。夏月開黄花,結實青紫色,大 未深加體審。時珍一一采視,頗得其真。其 一莖一葉,根入水底,五月開白花。」此乃 云:「水萍,一名水廉,生池澤水上,葉圓小 根連水底,葉浮水上,夏月俱開黄花,亦有白 又案:《神農本草經》但有「水萍」,陶弘 葉似 此後諸家説蘋者,言人人殊。 蓴 而 稍尖長者, 莕也; 而形 圓 惟吴普《本草 如馬 蹄者, 與蓴相似 花者,結實 李時 所

大如

中

有

細

子。

葉

徑

四

<u>Ŧ</u>i.

寸,

如

黄花,結實如

小

角

陳藏器云:

萍蓬草,即今水粟也。

實長二寸許,內有細子一包,如罌粟,澤農取作粥飯食之。 昔楚王渡江得萍實大如斗, 黍者,萍蓬草也; 四葉合成一葉,如田 六七月開黄花,結 小 荷 見《本草 葉 蓋此 而 類 拾 陸《疏 者,乃莖 藻」,郭注云: 此則似陸所謂「葉如雞蘇」之藻矣。《左傳》 如蓬蒿,謂之 大如箸,長 》,云藻有二種,「其 如 釵 四五尺,其一種 聚藻」。 股之藻。 「似藻,葉大,江 據此,傳 若《爾 莖 種 東呼爲馬藻。 雅》之「莙,牛 大 葉 所云「聚 如 如 釵 雞 股 蘇

藻

· 葉

莖

也。

若水萍,安得有實邪?

其根作藕香

味,如栗。

作「洐」、《説文》「洐,溝行水也」,則藴、藻 《顔氏家訓》引郭注《三倉》云「藴,藻之類 谿、沼、沚」等凡四者,皆實字,行潦之「行」當 藴 也,故言藻,聚藻」是已。或謂《左傳》「 也」,李時珍謂聚 ,然則藴與藻非二物,《詩正義》曰「藴,聚 藻即水蕴 也,俗又名牛尾 澗 不

者,水生而

似萍者也;宋玉所云『起于青蘋

種

一,引項

氏

云:「柳

惲所云『汀

洲采

白

蘋

之末』者,陸生而似莎者也。」姚氏炳《詩識名

夏秋開小白花

故稱白蘋。

嚴《緝》又謂

蘋有水陸

紫,有細文,頗似馬蹄、决明之葉。

四葉合成,中拆

十字。

蘋蘩蕰藻之菜」、《説文》「蕰」下不言草名

字形者,蘋也。」其莖細於蓴蒂,其葉大如指頂,面青背

板對。 潦 不更見文章參差變化之妙乎? 當爲一物。 對: 且若以二句 蕰 承珙案: 古人文字,似 藻, 聚 藻 之「薀 也; 藻」 行潦,流 與 四 不必如 句 潦 也 此

于以采藻」,傳: 藻、聚藻 也。」正義引

蘋。」然則「白」因

花名,要之,即

是青蘋耳

其字作『苹』,不作『蘋』,兩者判然不容

蘋

不

陸

生,

所

謂

似

莎

者

, 乃

藾

蕭

也。」羅端良云:「蘋五月有花,白色,故稱

白

混

也。」此 《韓詩》曰:于以鬺之。』案:『湘』訓『亨』無 飪。 雅 帝鬼神者,猶云聖人亨,以亨上帝也。《史記 獻、烹熟、元亨,字同作『盲』。 義》曰:「《漢書·郊祀志》『皆嘗鬺亨上帝 如『饗』。 考,當從《韓詩》作『鬺』。」段懋堂曰:「古享 神」,顏注:『鬺、亨,一也。 亨蘋藻者,於魚溍之中,是鉶羹之芼。」若如王肅以此 亨,飪之也。」蓋此蘋藻爲鉶羹之芼,故當亨 '湘』字當爲『鬺』之假借。」承珙案: 鬺亨上 '鬺亨上帝鬼神」者,謂煑而獻之也。 『亨』讀 解》引徐廣亦曰「鬺,讀。 正義引《昏義》:「牲用魚,芼之以蘋藻。」故此箋云: 釋言》:「鬺,飪也。」《説文》:「飪,大孰 于以 傳云:「 《史記》作『亨鬺』,文倒,當從《漢 湘之」,傳: 湘,亨也。」《楚茨》傳云: 「湘,亨也。」惠氏《古 鬺亨, 煑而 亨煑也」。《廣 《郊祀志》云 《毛詩》 祀也。 鬼

> 「芼以蘋藻」之言背乎? 又云「粗熟而醃之以爲菹」,不顯與《昏義》 矣。朱《傳》於《關雎》云「芼,熟而薦之」,此 矣。朱《傳》於《關雎》云「芼,熟而薦之」,此 類」,則菹本以生菜鬱釀而成,無所用其亨飪

宗,而與大宗絶服者,其女當於何教乎? 宗之家,悉得教之。與大宗近者於大宗,與 宗者,小宗卑故也。』《昏義》孔疏:『大宗、小 爲君者之廟也。宗室,大宗之家。」盛氏世佐 廟已毀,則教于宗室。」注云:「祖廟,女高 禮》記云:「祖廟未毀,教于公宫三月, 大宗絕服者,教於小宗之家,設有繼高祖 正。若謂與國君絕服者,教於大宗之家,與 大宗遠者於小宗。」二説不同,當以賈疏 曰:「案:注云『大宗之家』,疏云:『不於小 大夫、士祭於宗廟,奠於牖下。』《儀禮 「宗室牖下」,傳:「宗室,大宗之 士昏 ()廟也 教 祖

於大宗 之廟也。」蓋教在大宗之家,祭在大宗之廟, 及此疏,亦皆以「宗室」爲大宗之家,惟《昏 知賈疏不可易矣。 大宗、小宗故耳。 義》疏因鄭彼注衹云「宗室,宗子之家」,不言 説所不 通 則已遠 也。」承珙案: 孔於《周南 ,教於己室是無 今考毛傳云:「宗室,大宗 統矣。 此則 葛覃》 FL

《白虎通義·嫁娶》曰:「《昏經》曰,教于公 之,使教宗室五屬之女。大夫、士皆有宗族, 取大夫之妾、士之妻老無子而明於婦道 教於宗廟、「廟」疑「子」字之誤。宗婦之室。 麻之親者,教于公宫三月,與君無親者,各 宫三月,婦人學,一時足以成矣。 爲『蘋』,字之誤耳。」承珙案: 事,《采蘋》云『于以奠之,宗室牖下』,『蘩』當 『背宗族而《采蘩》怨。』案:《采蘩》不言宗族 氏玉林曰:「《潛夫論·班禄》云: 臧説 與君有 近是。 國君 緦

> 宗族而怨生,當有賦《采蘋》以刺者耳 收族之道,雖女子之微而教不遺焉。 自於宗子之家學事 也。」此 可 見古 所以 者 敬

「齊齊乎其敬也」,則「齊」即如字讀 側皆反。」今案:《玉藻》「宗廟齊齊」、《祭義 也。」毛義與此合,其來古矣。《釋文》:「齊, 「敬」。 阿,行潦之蘋藻,寘諸宗室,季蘭尸之,敬 也。」與「材」義近。 材也」。此蓋出三家詩。《廣雅》云:「齌,好 女部》引《詩》「有齌季女」,并引《説文》「齌 有齊季女」,傳:「齊,敬也。」《玉 襄二十八年《左傳》穆叔曰:「濟澤之 然皆不如毛之訓「齊」爲 亦可。 篇

此大非 教成將嫁,因爲辭廟之祭,非女主之而誰 季者佩蘭,主而奉之,故傳以 曰: 「陸農師謂大夫妻祭共蘋藻,則使女之 傳:「少女,微主也。」姚氏 也。 主祭之季女,自即 季女爲微主。 大夫妻,於時 《識 名

禮女。 難毛之辭也。 之,無祭事 箋補正。 牲用魚,芼之以蘋藻。」箋云:「主設羹者季 今經陳季女設 女,則非禮女也。各本「禮」下無「女」字,據正義所引 傳:「古之將嫁女者,必先禮之於宗室, 傳以 女將行,父禮之而俟迎者,蓋 ·也。」正義曰:「自『無祭事』以 教成之祭與禮女爲一,是毛氏之 言父禮女無祭事,不得有羹。 羹,正得爲教成之祭,不得爲 母 上 薦

> 義。 之以蘋藻」,與經『采蘋』『采藻』文協,皆是 之宗室』,與『大夫、士祭於宗室』文同,『芼 之祭與醴女爲一者乎? 房中,並不於宗室,豈有毛氏不知而合教成 使之爲主,即所以禮之也。 成之祭,其云「禮之於宗室」者,謂祭於宗室 篇之義,所引「牲用魚」云云,本係《昏義》教 誤,故非之也。」承珙案: 毛實以此篇所陳爲教成之祭。」此則善申傳 室,大宗之廟。大夫、士祭於宗室」,此傳『禮 義既從鄭駮毛,而疏 而前 後自相違戾,何也? 末又云:「上傳云『宗 鄭箋誤會傳意。 此傳於篇末 若昏禮 醴 女自 總 發 正 在

甘棠

上有「不」字,《蜀石經》無。止舍小棠之下而聽斷云:「召伯聽男女之訟,重煩勞百姓,今本「重」《序》云:「《甘棠》,美召伯也。」首章箋

《白虎通義·巡守》篇所説皆同。 文,非 焉。 元城 傳》云「召伯在朝,有司請營洛以 樹 年暴露,《外傳》特從而附會之耳。 公當日必實有其事。 欲勞百姓,出 世家》、《漢 四。」據一 以 或 箋語,則是毛 爲 人 此 義引定本及崔靈恩《集注 被 書 墨 其 而就烝庶于隴畝阡 子之道,不 德 王吉傳》、《説苑・貴德》篇、 義矣。 説 然亦偶爾爲之,未必 其 化; · 知 坐 與《史記 思 棠 陌之間 居,召 其 聽 惟《韓詩 家此 人, 政,在 燕 敬 伯 乃 召 外 公 傳 終 召 劉 其 不

自明 張逸俱問云:「《甘棠》若在文王之時,不 相 化在文王之時, 紂之後,爲伯時事。 召公何得爲伯?」答曰:「《甘棠》之詩,召伯 妨 詩譜》及《序》正義兩引《鄭志》載 誰云文王與紂之時乎?」然則召公布 正 義 乃云召伯巡民决訟,皆是武 而 作詩 何氏《古義》因謂周 自在分陝之後,本不 趙 召分 王 商 伐 審

> 《左傳》晉士鞅對秦伯 耳。 曰 : 不得謂詩於殁後始作也 召公焉,愛其甘棠,况其子 蓋以《甘棠》之令人興思 愛其木,况宗其道 書·韋玄成傳》載劉 前必不許民一思之邪? 忘耳,非必此詩定作於公殁之後。 年薨,此詩當在召公殁後始作。 宗廟之敬」、《竹書紀年》召公以 召公」、《孔叢子》載孔子曰「吾於《甘棠》,見 在 陝 書言後世歌 康王之時。 在 「吾於《甘 **豈得以此爲召公既殁之證乎**? 武 王 得 天下 詠者,不過謂 並據《説苑》諸書皆言「後 棠》,見宗 **三** 之後 而毁 乎?」此 「樂武子之德在 飲《廟 而《甘 其 喻 廟 《説 召公之德 亦謂 廟乎」二語同 宗廟之令人起 議》云「思其人尚 之敬。」 棠》 既殁 苑》 康王二十四 民,如 承珙案: 諸 頌 而 亦載 豈 歷 此 召 民思之,然 襄十四 周 召 久 伯 與 人之思 孔 伯 世 而 又 \wedge 意 漢 一當 敬 子 生 不 思 年

一 蔽 芾 甘 棠 」,傳:「甘 棠,杜 也。」 戴 氏

釋《召南

》之「甘棠」,不宜改讀。

爲此説耳。

爾雅

》主釋《詩》、《書

疏》『白棠即甘棠,子美;

牡説異,爲許所不取。

戴先

甘棠爲杜,失《爾雅》之讀也。」《説文》:「棠, 其木色之異異其名,與『杜,甘棠』説異,即 「《召南》毛傳云:『甘棠,杜 非許意,亦非《爾雅》意也。」承珙 棠甘,而名可 「杜,甘棠也。」段氏 牡棠、牝杜,析言之 不合。棠不實;杜 》,「杜,甘棠」即 赤棠即 《釋木》又曰 赤棠。 山,樆」、『榆 用之。 生蓋依 「杜 《毛詩》以 杜 轉注。 也。』《釋 赤棠 · 子 白 此以 陸 澀 者, 是 璣 與 : 杜 甘棠。 雅》「赤白」之説爲許所不取 泥於子有赤白, 理,此「赤棠」、「白棠」恐亦不指實言。 者,栜」文同。 案:《爾雅》「杜,赤棠」二語 雅》,過矣。 必謂甘棠不當名「杜」,而譏毛公不善讀《爾 爲「澀」,果實中亦有生時味澀、熟即甘美者 雅》、毛公時未必 戴説泥於陸《疏》「澀如杜」之言,疑杜不得爲 爲甘棠,爲赤棠。」此 引舍人注《爾雅》云:「白者爲棠,赤者爲杜 其色則赤者曰赤棠、白者曰 白者,棠」,以杜 杜、蹻澀也。」「蹻」又是何物邪? 澀」義,亦未必定指果實之杜。《方言》云: 不知所謂 又陸《疏》謂子有赤、白、美、惡。 彼「赤楝」、「白 與牡棠、牝杜 爲大名,言其 澀 即 如杜」者,乃 有 與毛傳、《雅》義皆合。 此 方言。 1 棠耳。 與「桋、赤楝。 、味則 不 棟」謂木之文 非 俗語 合,遂謂 也。 且「杜」有 [《]六 日 即以「杜 甘 耳。 書故 棠 段氏 爾

實而

可

食,則謂之甘棠。

木》曰:『杜,甘棠。』本無

也;

杜得偁甘棠,互言之也。

「杜,赤棠。

白者,棠。』《唐風》傳

注

曰 :

牡

曰棠,牝曰杜。」又云:

甘曰棠,黎山生曰樆,榆白曰

枌。

白,枌』立文同。

杜澀

曰:『杜

甘,棠。』

與『棃

詩

考正

日

爾 雅

*****:

寸杜

:

根,因 假借作「茇」耳,非有異也。若《周官》「茇 爲是。 《釋文》引《説文》:「庋,草舍也。」有「草」字 草舍也。 注《説文》云:「許書『废』但訓『舍』,與毛鄭 説異,以其字从艸、从广别之耳。 其引《詩》 夫跋涉」,傳云:「草行曰跋。」蓋「茇」本草 召伯 「沛」。 仲 废」而訓爲「草舍」,『召伯所废』謂召伯之所 · 茇』訓 『草舍』 異。」 承珙案:《詩》字本當作 · 芨」字當爲「废」之假借。《説文》:「废,舍 ·止」訓「舍」。「茇」是草名,非「舍」義,此詩 夏 从广,发聲。《詩》曰:『召伯所废。』」 而草行謂之「跋」,草舍謂之「废」。段 召伯 (教茇舍」注云:「茇,讀如『萊沛』之 所废」,蓋用三家詩 《艸部》云:「茇,草根也。」《載馳》「大 茇舍,草止之也。」蓋「草」訓「茇」, 三家今文,多正字;《毛詩》古文, 所茇」,傳: 「菱,草舍也 作『废』,與毛作 」。」《周 禮

《韓詩》作「剗」、《漢書・韋玄成傳》作「鬋」。 案: 「拜」爲「低屈」之説,本於唐施士丐《詩説》云 拜」,皆對「翦」言之,其事必重於翦。 若但以 斷也,皆删除枝葉之意。 者,殘其枝葉。拜者,攀援而屈曲之。」承珙 從此説。《詩所》云:「伐者,取其條幹。 傳》僖十五年。 也。」次章,「勿敗,則非特勿伐而已」。 朱《傳》云:「翦,翦其枝葉也。伐,伐其條幹 文,則又「茇」之借字,而非「皮」之借字矣。 不兼「舍」,若連「舍」,則當作「茇」也。《左 舍」,只當作「茇」,不作「废」,以 ·敗」爲殘壞其枝葉,則「勿翦」已足該之。 翦」爲「去」,蓋但謂去其枝葉而已。《釋文》引 ·勿拜,則非特勿敗而已」。 此説非 「勿翦勿伐」,傳:「翦,去。伐,擊也。」 也。 「反首拔舍」,以「拔」與「舍」連 詩三章皆言「勿翦」,毛訓 下「勿伐」、「勿敗」、「勿 嚴粲、程大昌皆 言 剗,削 废 也; 鬋 則 至 敗 可

扒。 也。 後 字異義同耳。 也。 拜」也。 篇云:「凡草木根鞁傷,則枝葉必偏枯。」注 云"「「敗」當字誤爲「鞁」。」「鞁」即「敗」。 傳於首章云「伐,擊也」,三章云「拜,猶 『拜,猶伐』,非也」。 「拜」爲「拔」之借,故鄭箋申之云「拜之言拔 言『勿拜』,明召伯漸遠,人思不忘也。 毀」,謂 伐」爲非,則可據以證今本毛傳之有脱。 拜 兩章義可互見。 謂 ,言人之拜,小 此特望文生義耳。 疑三家詩有作「扒」而訓「拔」者,與毛 擊者,謂擊斷其樹。 《廣韻》「扒,拔 傷其本根,「勿敗」亦猶「勿伐」、「勿 毁之則甚於擊,拔之則又甚於毁,三 陳氏《稽古編》據《説文》訓「敗」爲 傳於次章「勿敗」無訓 低 今案:《大戴禮 見《韓昌黎集注》及《吕氏讀 屈 也」,引《詩》「勿翦 也。 然其謂毛注「拜」 拜猶伐者,毛殆以 上言「勿翦」,終 則 然 少 毛注 則 以 閒》 前 蓋 伐 猶 敗 勿

章文義殆由輕而重。此説亦可不必

行 露

之事 案 : 行。 之男。」蓋 魯韓説,以閨門之處子,求全責備,至於構訟 不往。而作詩曰:『雖速我獄,室家 之始也,不可不正,夫家輕禮 傳》曰:「申人之女既許嫁於酆 不顧,豈 同,皆與《毛詩》篇義相 王伯厚以此爲《魯詩》。《韓詩外傳》語亦略 而往迎之。女與其人言,以爲夫婦者,人倫 禮不備,何至誓死不行? 毛傳云:「不從,終不棄禮 夫家訟之於理,女終以 《序》云:「《行露》,召伯聽訟也。」《列 觀 無父母之命、媒妁之言乎?」承 在 經文「亦不汝從」,詞旨 當時,必有女氏未許 近。 但 范蘅 既 禮 違制,不可 , 夫家禮 而隨 而 决 不 洲云:「如 男子 絶, -備,持 許嫁矣, 不足。」 此 强 强 不備 必 求 珙 暴 以 女

《集傳》云:「家,謂媒聘,不足,謂求爲室家 突然興訟,何必召公之賢,方能决斯獄哉。」 之禮初未嘗備。」陳長發曰:「夫不行媒聘, 和 許 ,六禮之來,强委之。」此説最 嫁 可 知 箋 云 室 家 不 足, 爲 謂 近 媒 理。 妁

《後漢 當 王雪山 於理。 殊邈,未遭良匹。」《行露》之女蓋其流亞。 嫁,偃蹇數夫」。 非 所 下二章『鼠牙』、『雀角』之疑,終明其誣、《序》 肆行 以 時 有 喬木》章。 乃有如子皙之强委禽焉者,故不從而 歸美聽訟 孔 書 虞東學詩》曰:「首章述其自 疑於暴男侵貞女,豈王化及女而不及 無禮。 此 疏 梁鴻傳》云:鴻妻孟光「擇對 類陰訟,雖聖明之世,亦未 乃 此皆泥於《序》文之過 云「禁嚴於女,法緩於男」。 古者男女昏姻,各有配類。 也。」承珙案:此所謂「彊暴」, 《袁隗妻傳》云:「妾姊 也。 守之辭, 必 高 無。 不 致 而 如 見 行

《左傳》僖二十年:「隨以 露。 鬭 犯禮,不畏彊暴之侵陵 豈不早夜,而謂多露之能濡己乎,以 者,道中之露也,然必早夜而行,始犯 是也」,謂有是早夜而行者, 能察,而歸之聽訟之明者也。 謂」之「謂」一律。「誰謂」者,誣善之辭,衆不 不合語意。 被訟不從,而乃先云「豈不欲之」,作此婉辭 太多,故不行耳。」正義即 「我豈不知當早夜成昏禮歟? 有是也。」承珙案:此詩首三句,初 豈不爾思,畏子不奔」文意相類,故箋云 興 |穀於菟帥師伐隨,取 也。 經反言之,傳正言之,可谓善會經旨矣。 厭 浥 厭浥,溼意也。 行 玩首章「謂」字,當與下二章「 露 豈 不 夙 也。 成 行,道 夜, 漢東 用此 而還。 傳云「豈不,言有 謂 則可謂 諸侯 述傳。 行 也。 謂道 故此云厭 多 君子 叛楚。楚 讀之似與 豈不,言 道 然女方 興本無 中之露 中多 티 : 傳 浥

截。 道 折 娶正時」,「多露」則三月四月已過昏時,故 矣。 王雪山 早夜,可無犯露 疾,將立之。 又襄七年:「晉韓獻子告老。 夜而行,懼多露之濡己。」此箋義,非傳義也。 行多露。』」此亦謂自量不才,故辭位 量力之喻,言豈有量力而動 不夙夜,謂行多露。」」此正以夙夜犯露 厭 隨 多 不如 浥」爲多露濡溼之意,三句一 之見伐,不 由 箋則 湛 善敗由己,而由人乎哉?』《詩》曰: 謂首章必有闕佚,不然,「文勢未能入「雀」「鼠」之 不知首章「謂」字與下「誰謂」緊相呼應也。 毛 以「行露」爲「始有 義 而 瀸 辭 爲允。 彊來」。 衣 量 曰:《詩》曰:『豈不夙夜,謂 耳。 濡 力 襦 《易林》云: 也。 杜注皆云:「豈不欲早 於經文三句中 重不可步。」亦 量 力 露」,是「二月嫁 ,猶至見伐 公族穆子有 而 「厭浥晨 貫,語 動 如如 多一轉 其 即 傳 爲不 本 人不 乎? 過 豊 夜, 直 以 以 廢 鮮

·厭浥」爲「多露」,無二月、四月之别也。

《説文》:「牙,牡齒也。 者。 『無牙』。 牙較大於齒,非 之則前當脣者稱『齒』,後在 齒之大者也。 樣》不誤。《士部》曰:『壯,大也。』 壯齒者 牆之穿,推其類, 『牡』,今本《篇》、《韻》皆譌。 段注云:「『牡齒』當作『壯齒』,『壯』誤作 鼠無牡齒。 類,雀之穿屋,似有角者。」角,即謂 何氏《古義》引「或説」云:「角,嘴之鋭 善之辭,以無爲有,故可謂雀之穿屋似 「角」名,此肊説也。「誰謂 凡鷙鳥皆有之。」案: 誰謂 東方朔説『騶牙』曰: 雀 陸農師 無 統言之皆稱『齒』稱『牙』,析言 有牝 角」,傳: 可謂鼠 曰 : 牡 也。 象上下相 鼠鼠 有牙。」楊龜 示不 鼠無牙」,傳:「 鳥有鉤 輔 鼠 惟 有 ·思物變 齿 『其齒前 車者稱『牙』。 石刻《九經字 協 不大 錯之形。」 獣角 而 喙, 並 山 而 無 ()故謂 有角。 以 而 推 牙。」 爲 誣 視 無 鉤 其

壯。 不成語矣。 所見《説文》本作「壯齒」,故云 「比於齒 于齒爲牡也。」此「牡」字亦當作「壯」,蓋楚金 大齒謂之爲牙。」《説文繫傳》:「臣鍇 齊等無牙。』 段説是也。 若本作「牡齒」,而云「比於齒爲牡 此 隱五年《左傳 爲 齿 小 牙大之明 疏》云:「頷上 證 曰 承 一,則 一爲 比 珙

羔 羊

形諸 觀 夫曰:「大其始於閨門,而後及於在位。」蘇 虞序》云「《鵲巢》之應」,可見序《詩》者與 而 序》云《鵲巢》,必推 詩》者之意絕不 此《序》及《麟 歌 其 序》云:「《羔羊》,《 詠,故意盡於篇中, 推 求,故 趾序》云「《關雎》之應」、《 事 ·相蒙。 徴於篇 本於齊家之義。 作《詩》者即 鵲 外。 序《詩》者合 巢》之功 然諸 家 致 如 見 黄 衆 事 也 作 作 騶 實 此 而

> 引朱氏 必泥 也」,亦與《序》説脗合。「鵲巢」之語, 叢子》引孔子曰「吾於《羔羊》,見善政 行累功,以 可作推原,解《詩》殊爲附會。 正身齊家以及其國之效。」以上諸説,解《序》 和 潁 其室家 濱 曰 曰:「在 ,雖欲 致此羔羊之化」,其義已足。 君 子 位節 委蛇 能 治 儉正直 其 ,而不可 外 而 本 得 内 鄭箋但云「積 於國 也 無 良 嚴《緝 君夫人 妻 可 有 妾 ^②孔 不 應 以

乎? 是説。 德。 義生禮者,於卿 羊也。」孔疏歷 相見禮》注及何休《公羊傳》注以釋「羔羊」之 諸侯視朝之服」,傳注所 孔 《序》又云:「在位皆節 嚴《緝》引吕氏曰:「德如羔羊,如《羔 但其下又引鄭注《論 意特以衣服 引《周官 大夫 甚 則 多,詩獨言羔裘,故 可,若諸 稱羔群而不黨及 宗伯 語》以「羔裘」爲 儉正直, 、《儀 侯 何 禮 德 所 如 取 死 有 羔

之人」。」二説釋《序》「如」字是也。 其人。召南大夫德稱其服,故曰『如《羔羊》 裘之人也。德不可爲大夫,雖服羔裘,而非 裘之人也。德不可爲大夫,雖服羔裘,而非 孝之詩也。」陳氏《稽古編》曰:「箋云『卿大

有常, 緇 即 迹 曲 總之數皆五,此所謂「衣服不貳」者也。 「委 此 蛇委蛇」,傳云:「行 容不改,出言有章。 詩 列則 爲《羔羊》之箋傳可也。」承珙案:《禮 衣》云:「子曰:長民者,衣服不貳,從容 毛鄭義合,皆所謂 自得之貌。」《吕記》曰:「惟其出入皆可從 注脚。 王平仲曰:「『彼都人士,狐裘黄黄。 仰 以齊其民,則民 不愧 蓋三章皆言羔羊素絲,而紽 俯 不怍,而從容自得。」據此, 「從容有常」者也 行歸于周,萬民所望。』 可從迹也。」箋云: 德壹。」此數語尤足爲 緎、 記 「委 其 •

諸家説紽、緎、總、多無確據。李氏《集

裘敝 爲 「佗」。 之。 解》 小得其制。」是紽、緎、總皆關定制。 以英裘,不失其制。」三章云:「言縫 總。」戚氏學標《毛詩證讀》曰:「『紽』『袉』疑 戴氏《詩補 謂之紽,有界限謂之緎,合二爲一謂之總。」 之皮,蓋倣古制。] 胡氏 裘,循其合處以素絲爲英飾。 其節儉。」范氏《補傳》曰:「合五羊之皮 既爲縫,則五紽、五 垂者。」承珙案:毛傳於首章云:「古者素絲 云:「紽之施於縫 一字、《古論語》:『朝服袉紳。』五紽,蓋絲之 飾 曰 ,尤爲肊度之辭。 而 以羔裘之或綻 : 佗,加也。 縫 \sim 紉以示儉,於義隘矣。 爾 注 ₩ E 雅 * "「紽,讀爲『予之佗矣』之 ,其下端餘 其英飾五,故曰五佗。」又 『緎,羔裘之縫 或弊,五次缝之, 總亦爲縫、蓋 惟 一桂曰: 戴氏溪《續讀詩記 絲垂爲飾者 百里奚衣 至裘 「縫之突兀 謂 也。」 殺之大 若 有 可 Ŧi. 徒 五羊 五. 次 垂絲 爲 以 見 縫 日 緎

紽爲 《晏子春秋 風 五. 百絲,五總四 IE. 者二十絲,總者八十絲也。 引鄒長倩語同。 食。』《説文》作『稷』,云『布之八十縷爲稷』, 紀》『令徒隸衣七緵布』正義與孟 王莽傳》曰:『緵,八十縷也。』《史記 求之,緎寡於總,紽蓋寡於緎也。」馮氏《名物疏 少之多,自微至著也。 緎,倍緎爲紀,倍紀爲緵,倍緵爲襚。』此 京雜記》云: 疑 紽 總 與『倍紀爲緵』之數相合。 紽 ,本又作佗。』《春秋傳》: 緎,四 也。 九罭》釋文云:『緵,字又作總。』然則 緎 紽 總 緎 皆絲 之數,今失 『五絲爲攝,倍攝 一百絲。 爲總。 雜 王氏伯申《經義 篇》曰: 次之量 故先言五紽,次言五緎 五紽二十五絲,五緎 紽,今無所考據,以 數。 其傳。 『十總之布,一 孟康注《漢書 蓋五絲爲蛇,四 埤 述 陳公子佗字五 爲升,倍 雅 《釋文》曰 聞》曰: 康 日 · 孝景 : 注 豆之 乃自 升 同。 : 緎 翢 類 爲 西 •

『繙』矣。」 父。則知『五絲爲紽』即《西京雜記》之

《中庸》作『奏假』。 之總。」此「數」亦量名。 絲之量名。 所具反,並不作入聲。 毛傳但 有 句》曰: 未分明。 素絲以英裘,『五總』謂素絲英飾 『九罭,緵罟,小魚之網也。』《烈祖》『鬷 者,數也,如『數罟』之『數』。《九罭》傳 假無言』傳曰:『鬷,總。 鬷邁」傳曰:『鬷,數。 言,無争也。」毛意: 也。」『數』皆入聲,音促。 五 也。」承珙案: 段懋堂曰:「毛傳: 「紽,數名。」此 《後漢 《説文》引《漢律 書 對文則絲數爲絩,布數爲總。 『奏』亦讀如『蔟」。 此説非是。 鬷者,『總』之假借 循 邁,行也。《烈祖 語尤 **ĕ** 吏傳 『紽,數也。 《東門之枌》『越 假,大也。 绮 晰。 ジ注 云 絲數謂之絩 《釋文》「數」 數數然其數 引《韓 數 「數也」,尚 總大 總, 古者 上》『鬷 即 假」, 曰 毛 總 無 以 數

言總數 總亦爲絲數,蓋 數 謂 紽 散文得通也。 總之數有五」,非訓「紽」「總」爲 孔 疏 云「上言紽數,下

促

~;明

是。 縫即 素絲 因 五. 易合,故織白絲 縫,五紽、五總亦爲縫。 視之見其五,故皆云 義曰:「《釋訓》云:『緎,羔裘之縫也。』 孫炎 於縫中之騐。」此疏以「素絲」爲 云: 埤雅》云: 以爲飾。」此以 焉。」何氏《古義》引錢氏曰:「兩皮之縫不 「紃 『緎之爲界緎。』然則縫合羔羊皮爲裘, 皮之界緎,因名裘縫云緎。 爲組紃 而組紃所 正 而 義曰:「古者素絲所以得英裘者 施諸 又 敝, 「革者,言敝 縫,若今之絛。』是有組 以英飾裘之縫 施之處,則諸家説多未安。 則 爲紃,施之縫中,連屬兩皮, 素絲爲 補 緝 以縫之。」《古義》又 施於皮革之上者 而 因 中。 故以改造。 「組紃」,甚 《雜 五緎既爲 紃 記 而 也。 縫 正 施 注 織

> 乎 ? 若謂 革敝 謂素絲施於皮革者,革既 也。」顏注:「反衣者,以其 在身,而列士不譽,是有 薪,裹盡 裹。 表之明證。 志》注載 曰 而負芻,問之。 毛之上者也。 云:「次章言革,毛去 :『若不知其裏盡 《新序》云:「魏文侯出游,見路 施於裘毛之上,則毛毳蒙茸 而縫見也。」此則又 古制茫昧,此殆難以 毛 明帝《破諸葛亮露布》云:「反裘 殫。」夫以革爲裏,此古人裘 故《漢書》楊興薦 承 珙案: 對曰:『臣 而 而 毛無 古人 革 狐白 似 肊 在 存 毛 以 所恃邪?』《 愛其毛。」文侯 服裘,毛 解。 一之裘 也; 裹,何由 在 匡衡云:「富 素絲 内 ,又何由 三章 也。」然則 爲 而反衣之 人 表 施 [得見。 -言縫 反 於裘 毛 而 魏 見 負 裘 在 革

也。 自 得之貌。」蓋惟其委曲自得,不改其容,故 委蛇,行可從迹也。」箋云:「委蛇,委曲 退食自公,委蛇委蛇」,傳:「公,公門

之貌。 言。 云: 其 行 相 殊爲穿鑿。《釋文》引《韓詩》作「逶迤」,云 陸佃、范處義、王質皆以「委蛇」爲蛇行之狀, 而委蛇,必折」。 佗佗」傳云:「行可委曲縱迹。」是傳箋意 「公正貌」。 而委蛇,必折。」此因孫子無 成 『退食自公,委蛇委蛇。』謂從者 也。 蓋孫子過而 然爲臣而君,則逆於理矣。 動 襄七年《左傳》叔孫穆子曰:「《詩》 是毛韓 作 案: 行 皆 如 義亦相 有 然則「委蛇」之義 不悛,外示從 可從 從 迹可 近 迹,則異於詭隨,故 尋。 辭,亦 容,有似 **^** 鄘 無悛容 故 風》「委委 可識矣。 也。 日「衡 委蛇 而 實 衡

書·樂志》載諸樂府辭皆如是。若《秋胡行》 文獵員斿」,即書作『君子員=獵=員斿」。《宋 多各字下疊小『二』。《石鼓文》『君子員獵,員 碑讀作『委委蛇蛇』。案:古書遇重讀者,每於 在

《莊子・田子方》篇「遺蛇其步」、《釋文》:「遺」 節」、《唐扶頌》「在朝逶隨」、《衡方碑》「禕 文,異於《鄘風》之疊二字者矣。 多用《召南》之義。 碑》「卷舒委隨」,凡此皆「委蛇」二字之别,且 在公」、《童 其中」,及《隸釋》所載《費鳳碑》「有逶蛇之 施」、《儒林傳》字「服 注 本作「逶」。《漢書・東方朔傳》「遺蛇其迹」,顔 尉鄧彪「仁厚委隨」,任光等傳贊「委佗 蛇」,亦作「委委蛇蛇」,此必亦據古本有 經・左傳》初刻襄公七年引《詩》曰「委蛇 『委!蛇!』,故沈重誤讀耳。」承珙案:《唐 遊一。」乃重讀此二語 云: 委 | 蛇三」者故耳。 「遺蛇,猶逶迱也」。 願=登= 子逢盛 泰二 《後漢 華 碑》「當遂 足 然諸書言「委蛇」者,如 方領,習矩步者,委它 也。 見此詩定以「委蛇 山川,神川人川共川遨 書 此詩 寶憲傳 潙 舊本似 地」,《劉 》以 前 亦作 還 能 隋 石 太 作 委

殷其靁

《補 歸。」 懼,居者篤思念之情。 之思婦 以 不比《北山》之『從事獨賢』也,及期 爲輕用民力者戒。若二南之世,因材而使, 此,非知義者不能。」姜氏《廣義》曰:「盛世 哉」,謂君子既能奮然自立,勇於從役,當竭 義之意。案《吕記》云:「再言『歸哉』,正勸 見王化之行也。」朱子《辨説》謂此詩無勸以 靡及,而爲室家者睠念征人,勸之以義,於以 比《于役》之『不日不月』也。 力以俟卒事,不可徒歸也。 義 傳》曰:「三章申言『振振君子,歸 《序》云:「《殷其靁 也。 引 ,與衰世不同。 朱 遠行從役,不辱君命 氏 曰:「閔之深而 衰亂則行者有死 君子閔而録之,因以 》,勸以 相勸之辭諄復 簡書自奉,每懷 無怨辭,所謂 ,然後可 義也。」范 而代,不 哉 亡之 以 歸 氏 如

更

子也。 此』一語,故作斯解。 以毛之『斯此』在『違去』之前,鄭又多『適居 經中『違斯』之『此』也。」《稽古編》曰:「孔特 君子』,乃訓『斯』爲『此』。箋『何乎此君子』, 乃然。 『此』 非經中之 『斯』,故傳先言 『何此 於王所命之方,無 子』皆經中之『斯』。 亦謂傳中『何此君子』亦非經中之『斯』。言 而 『斯』字,鄭之『適居』、『復去』,合釋『違』義 傳言『何此君子』解『何』字,何爲我此君子 何乎此君子,適居此,復去此,轉行遠 適居此」,經中『何斯』之『此』, 『去此』者, 「兩『此』字衹當經『違斯』之一『斯』字。 何斯違斯,莫敢或遑」,傳: 斯,此。 違,去。 敢或閒暇 毛之『斯,此』,總釋兩 愚則以爲毛鄭『何此 遑,暇也。」箋云: 時。」正 何, 2從事 此君 日 如

承珙 指「君子」。 不過探下文以釋「何」字,非以「何斯」之「斯」 此 石《經義》,見李氏《集解》。 斯」爲「君子」,下「斯」爲「其地」,蓋本王安 此」字正釋經文兩「斯」字。 則 案 經文 經文「君子」在末,毛傳「何此君子」 明 順 鄭箋「適居此」、「復去此」,兩 Ħ. 合傳箋 不如正義之解爲是。 矣。 《集傳》以 集 傳》得之。」 上

得。 爲反興之始,非也。 傳於二章云「亦在其陰與左右」,於三章云 地,正以靁之無定在興君子之不遑甯居 承珙案:細繹經文,三章皆言「在」而屢易其 之下』皆是一意」,更韻協聲,不必求其異義。 君子愈遠。」黄實夫則謂「『南山之側」、『南 召南》之大夫遠行從政,其妻思見之而不可 或在其下」,是此詩爲正興。 吕氏枏曰:「陽而側,側而下,靁愈 蘇 氏以靁在南山之陽,不可得而見,猶 顧夢麟以此 近, 詩 故 Ш

摽 有 梅

恐其失時 之國,被文王之化,既無三者之患,可以及 習亂思治,故戒《經義雜記》云「當作嘉」。文王能 容擇配,或以役之無節 以時之凶荒,無 而 使男女得及其時。」東萊説 紂暴亂,娶「娶」上當脱「嫁」字。 官・媒氏》疏引張融云:「《摽有梅》之詩,殷 失之,豈習亂而喜始治者邪。」承珙案:《周 之意。」《吕記》云:「是詩也,其辭 言盛時之難久』,此似非 實夫曰:「李迂仲謂『詩人之意 補傳》曰:「男女婚姻失時, 婚 姻矣。 《序》云:「《摽有梅 也。」 故詩三章皆幸其可以講禮 以 爲禮 ,不遑甯處。 詩 》,男女及時 或以 蓋本於此。 人形容文王 失其盛時之年, 古 俗之强暴,不 以以 有多端。 汲汲 梅爲 也。」 今召南 一,又惟 范氏 風 如 八時 或 化 黄 將

夫使仲· 時。 箋有 禁」邪? 娶,則《周官》何必於仲春之月即言「奔者 爲 落盡,不出 不 説,據《周官·媒氏》之文,以仲春爲昏 意而· 章 者,梅實尚 以梅實紀時早晚。」此説是也 可復昏,待至明年仲春,不以禮會而行之。 仲夏,此 傳云:「盛極 故正義述之,以此詩首章爲孟夏,次章 申之,並 摽 明年仲春不待禮會」之語: 春 有 歐陽《本義》云:「梅實有七,至於 爲正昏之月,而孟 兩 餘 梅 月之間。 月尚 不以 当自 七未 則隋落者,梅也。」箋云:「興 是 梅落爲昏時早晚。 可 落,喻始衰 以 行嫁,三章爲季夏,則 梅 故前世學者多云詩 落 i 喻 男 夏 也 仲 ,則仍自 。 此 女年衰。 夏 猶 惟 本 可 姻 用 末 就 嫁 人 不 正 其 首 章 傳

云: 「三十之男、二十之女,禮 而 男女昏嫁 行之者,所以 年 歲,毛鄭 蕃育人民也。」正 亦各 未備,則 不 同 義 謂 不 此 待 毛 傳

也。 肅諸 禮 從毛傳。 《禮記》皆言男三十而娶,女二十而嫁,故 夫爲婦之長殤,長殤十九至十六,知夫年十 十,應大衍之數。 之憂。」正義謂鄭依《周禮》、《書》傳、《穀 或以方類,豈但年數而已。 賢有言,丈夫二十不敢不有室,女子十 「《大戴》説『男三十、女二十有昏娶,合爲 矣。」箋云:「女年二十 是則速,後是則晚矣。凡人嫁娶,或以賢淑 敢不事人』。譙周亦云,是故男自二十以 九,皆爲盛年,皆可昏嫁」。 三十,女自十五以至二十,皆得以嫁娶。 意 男自二十 也 説。 古《春秋左氏》説: 二十而嫁,三十而娶,庶人禮 《周禮》賈疏又引王肅申毛、馬 《禮記 以至二十九, 自天子達於庶人, 昏義》疏 前 「國君 無 女自 「王肅述毛曰『前 ※嫁端 此皆取説於毛氏 引《異》 十五五 十 , 則 五 義》云: 也。」禮 而 有 以 生子, 同 昭難 梁》、 勤 Ŧi. 至 Ŧi. 不 及 不 +

重繼嗣 昏嗣 甯注則引譙周説:「三十而娶,二十而嫁,説 傳》雖云「大夫三十而娶,女子二十而嫁」,范 以爲昔者聖王之法如是。《穀梁文十二年。 於此可見、非謂禮有其文也」。 必是「婦爲夫之姊之長殤」也。」又「「見《士昏禮》」,亦無可 禮》「緦麻三月」條,有婦爲「夫之姑、姊、妹之長殤」,此所引 所云「前賢有言」者,今見《墨子・節用》篇 十、二十爲 五六之後,皆可嫁娶。 而嫁娶者,衆庶之禮,卿、士、大夫之子,十 不娶謂之鰥,文王十五 之長殤」,此句誤。女子笄則不爲殤,况已適人乎? 陳氏壽祺曰:此言士之子年十四、十五而得行昏禮, 十五 也。」陳氏壽祺曰:「《摽有梅》正義引末句作「所以 也」,當从之。」《通典》因之,謂三十、二十 知人君早昏娶,不可以年三十, ,見《士昏禮》也。 期 盡 蕃育之法,其誼 承珙案:毛傳以三 而生武王 許君謹案:舜三十 莊氏葆琛云: 自古。 ,尚有兄 「夫爲婦 王肅 非 《儀 重 伯

説也。 十七不嫁,丈夫二十不娶,父母有罪」,以爲 子已老,傳宗事與子,則宜有主婦。」晉袁準 子問》曰『宗子雖七十,無無主婦』。 此言宗 成,不在此限。 束皙並云二十、三十,禮之大斷,若形智夙 事與子,雖年幼未滿三十,自得少娶。 十而娶,何緣當服得夫之姊殤服。]慈答曰: 畏厭溺而殤之」,盧氏以爲「衰世之禮」,皆曲 夫姊之長殤」一語,尤爲明據。 矣。」范氏此解最爲通達。所引《喪服經》「爲 此,男不必三十而娶,女不必二十而嫁, 『爲夫之姊妹 「三十而娶,禮之常制也。古者七十而傳宗 未有嫁,仲春之月,奔者不禁。』」「甯謂《禮》 室、《書》稱日 嫁娶之限,蓋不得復過 《通典》:吴徐整問射慈曰:「古者三 鰥。 服 賈孔 長殤」,年十九至十六。 《周禮》云:『女子年二十 疏義皆引《越語》「女子 此 爾。 故舜年三十無 馬昭以爲「關 故《曾 明

而嫁之法也 陳,則立爲定限,過此者有罪,故酌於十五 自十五至二十,皆所不禁也。 不知女十五而嫁,謂十五 嫁,越王欲速爲婚,何由乃下十七之期 越王欲速報吴,故下此令。 二十之間,而以十七爲中制,非必古無十五 前則可 若女年皆十五 以嫁 若《越語》所 耳。 其 乎? 實 而

付也。 近。」段懋堂曰:「《説文》:『受,物落上下相 乃 [抛] 之重文,其訓 [棄] 與此詩訓 [落] 義 尤,从力。或从手,票聲。 莩』趙注引《詩・莩有梅》云:『莩,零落也。』 詩》『摽』字,正『孚』之假借。 曰:「《説文》『抛』字注云:『棄也,从手,从 丁公著云:『莩有梅』、《韓詩》也。 野有餓 受」,鄭氏注:『 受,音 「 蔈有梅」之 摽有梅」, 从爪、又。讀若《詩》「摽有梅」。」《毛 傳:「摽,落也。」《稽古 匹交切。」是『摽』 《孟子》『野有 《食貨志 編 餓

> 同部 《白帖》引「摽有梅」作「標有梅」,李説 《説文》「摽」本訓「擊」,謂此爲「擊而落之」, 《説文》新附字,陳氏引之殊誤。嚴《緝》據 汲汲乎? 女子方自傷離,而乃云「求我庶士」,如 據,然於義太迂曲,且與下二句神理 近,傷離父母之家,如梅之離其本根。」今考 有「妥」無「荽」。 「『摽』與『標』同,木末 統》云:「合作 荳。」此「荳」亦即「受」字、説文 作『芆』,又『叉』之俗字也。」承珙案:「抛」乃 字,《孟子》作『莩』者,『芆』字之誤,《漢志 蔈。』總之、《韓詩》當本作『受』,是正字,《 於文義多一轉折。 詩》作『摽』者,是借字,鄭德作『蔈』,亦借 假借,其説得之。 故段氏以《毛詩》「摽」爲「受」之 《廣韻》「摽,落也」引《字 也。 李氏《詩 女子自言歸 所》 不 雖 期將 此 · 貫 : 謂: 似 其 有 毛

「求我庶士」,箋云:「我,我當嫁者。」疏

多室閡 言求我衆士乎? 子自言,不獨其辭汲汲非女子所宜出,且於 何以訓「願」,則不可考耳。 家」,似《韓詩》亦以此爲父母之辭。 引《韓詩章句》曰:迨,願也。 心也」。《黄氏日鈔》冣取之。 詩記》之先。戴氏曰,此「擇壻之辭,父母之 詩人設爲女家之辭。 衰落,乃求庶士以相昏姻。 則謂召南之人顧其女方盛年,懼其過時 當嫁者,非女自我。」此説最當。歐陽《本義》 其夫令及時取己。言『我』者,詩人我此 云 丈夫生而願爲之有室,女子生而願爲之有 庶士二二字尤有 女被文王之化,貞信之教興,必不 難通: 輔廣、朱善雖曲爲周旋,終 此二説已開戴氏《續讀 女子從 若朱《傳》以爲女 范氏《補傳》亦云 今案:《釋文》 合之《孟子》云 一而終,豈可 但「迨」 女之 ·自呼 而 至

「傾筐塈之」,傳:「塈,取也。」案:「塈」

耳。 《詩》曰:『傾筐摡之。』本又作塈。」此所引必 即 於地而霑溼」,殊爲牽强 也。」蓋亦用三家詩義。 三家詩有作「摡」者,故《廣雅》云:「摡,取 摡」字之借。 嚴《緝》以「塈」訓「仰塗」,遂解爲「取之 ^ 玉 篇 《毛詩》假日 ***** 摡, 「塈」爲之 許 氣 切

端,則有勤望之憂。」今案:「謂,勤」雖本《爾 是用三家詩義。至箋《詩・隰桑》,則訓 桑》「遐不謂矣」,鄭注:「謂,猶告也。」此當 告言,人所易曉,故不復傳。《表記》引《隰 之」,不當云「不待禮會」矣。是毛意未必 爲「勤」。 如《隰桑》之「遐不謂矣」亦無傳,殆以「謂」爲 而行之」,若「謂」即「會」字,則經文正 「會」也。承珙案:傳云「禮未備則不待禮 謂」爲「會」。 「迨其謂之」,段懋堂曰: 而 於此又云:「女年二十而 考毛於《詩》中「謂」字皆無 毛意 「謂」即 言「謂 無嫁 會

若云「迨其勤之」,則不辭矣。雅》,正義不言《爾雅》文,蓋偶遺之。然合之經文,

小 星

學》曰:「《小星》一詩有三益焉; 使后 臣勤勞之詩,何乃爲此巾幗語?」承珙案: 足恃,義命所當安,而昭 周幽、晉獻之禍,使女御聞之,亦知才色不 使天子諸侯聞之,則知嬖寵不可並 聞之,則知恩宜下逮,可免專房、方輦之羞, 之云爲勤于王事,則《采蘩》之詩亦當屬之使 之是也。 王雪山 (自縊之愚,可以積漸消融矣。 章俊卿謂使 序》云:「《小星》,惠及下也。」《陸堂詩 、程泰之、洪容齋説皆與章同,陸氏駮 何氏《古義》曰:「如泥『夙夜在公』 儀殺女之毒,與侯 嫡,而 夫人 夫 無

此詩兩章,首二句詞氣直下,三、五、參、

乎 ? 豈可 以喻夫人。若夫人,不得云「更見」、云「列 小星喻賤妾,三心五噣則 星,衆無名者。 星體離合,天官家各有師授,古今多寡不同, 噣以正月見於東,詩人言一時所見,則「五」 昴即指小星,亦即 三星俱大,昴七星其一最大,謂之小星,可 云:「三五,經不言何星,謂之小星猶可; 非噣明矣。 志•星經》以柳爲八星,又心以三月見於東 文,多一轉折。 心噣在天,猶諸妾隨夫人進御於君,按之經 星」爲衆無名之星,以「三五」爲心噣,小星隨 寔命不同」云「命不得同於列位」,傳意蓋 一而已,不應以「三五」爲比。 執 且詩是託興,不必一時並見之星。 一而論。」承珙案: 嚴《緝》深取其説。 三心 故范氏《補傳》駮之,謂夫人 以 五噣,四時更見」,其釋 喻衆妾。 似喻貴妾,初未嘗 細繹傳文云「小 自傳箋以「小 《稽古編》則 且據《天文 以 又

九〇

經耳。 御焉。 位」矣。 是,亦必以「小星」與「三五」、「參昴」爲二,於 首二句文義究有不順,則信傳固不如信 無名者,亦使之夙夜抱 夫人之不妒忌,不獨惠及娣姪也 列位 如所 是則傳義實異於箋。 更見」 云「後宫之號 如 所 云 衾,如娣 娣 十有 姪 然即 兩 四四 姪 兩 一,即賤 位」者。 傳義 之更 當 夕 果 妾之 進 者 然 如 迭

珙 大 字,『隨』字乃鄭箋所加。 解 意以『三五』比 朝陽之光,喻己淺薄也。』按:毛傳本 小之星,各隨三心五噣 案 鄭有『隨』字,遂加『各隨』二字於『三五』句 序》『譬嘒星之繼朝陽』注:『言衆 翁覃溪《詩 實毛傳初未嘗以『三五』比夫人也 此説甚是。 夫人耳。 經附記》曰:「 其又云:「次章『維參與 出在 裴《序》注引毛傳 孔申毛義,乃同 東方,●亦 裴駰《史記 無 無 」。」承 能 名 隨 鄭 微 亦 繼 集

明,月者地之理。』陰契制 字,豈得謂「筍」「蒲」非即指「蔌」而言乎? 雅》「其蔌維 『在』字緊接『小星』,何疑?」此則 昴」,句首加『維』字, 在天,若首章『三五在 何 ? 維筍及蒲」,句首亦有「維 或可 東」,句首無他字, 云無名之星隨 ,故月上 未確。 屬於天; 伐 令大 留 則

也 象,夫人東酌罍尊。」《昏義》云:「故 借其餘光以自耀 婦 與后,猶日之與月,陰之與陽,相 于西,此 案:《禮·郊特牲》云:「大明生于東,月生 東」、『維參與昴』,正其所指之小星也。」承 一。」是則月者,后夫人之象,自不得以 從夫,故月紀。 何氏《古義》云:「孔子曰:『日者天之 陰陽之分,夫婦之位也。 故 月爲后、夫人之象。 取興 於星。 須 三 五 君 而 天 西 後 子之 妾特 星 成 酌 者 珙 在 犧

^{■「}心」,原作「星」,據《續經解》本改。

外,經雖不言月,經本亦未嘗斥夫人也。下」,詩但陳其下之安命,而夫人之惠自在言比。或以經不言月爲疑,不知《序》言「惠

「喽」,傳:「微貌。」《廣韻》作「暳」,注云《口部》「嘒,小聲也」,引《詩》「嘒彼小星」。 是《毛詩》本只作「嘒」。蓋「嘒」字从口、《説是《毛詩》本只作「嘒」。蓋「嘒」字从口、《説是《毛詩》本只作「嘒」。蓋「嘒」字从口、《説為小貌。正義曰:「此言小星,故爲微貌。《雲漢》傳曰『嘒,星貌』者,以宣王仰視不止《雲漢》傳曰『嘒,星貌』者,以宣王仰視不止。為貌不甚大明,比於日月爲小,故大星小星,皆得爲小貌。」《廣韻》作「暳」,注云皆得爲小貌。」

珙案:《行露》「豈不夙夜」、《釋文》出「夜莫」諸妾肅肅然夜行,或早或夜,在於君所。」承貌。宵,夜。征,行。」箋云:「夙,早也。謂貌。庸肅宵征,夙夜在公」,傳:「肅肅,疾

《小星》箋「夙,早」下有「夜,莫也」之文。 也。 星 是「夙夜」猶今人言「早晩」耳。 早莫。《東方未明》傳云:「夙,早。莫,晚。」 釋爲「莫」,以「宵征」統言一夜,而夜中亦有 因傳訓「宵」爲「夜」,故箋於「夙夜」之「夜」轉 足利本爲然。又《陟屺》、《烝民》兩箋皆 反。《小星》詩同。」盧召弓曰:「今注疏本鄭 曰:「衆妾進御於君,初昏見星而往,將旦見 必以昏昕」,正承上文「早莫」言之,知盧校是 經・行露》箋亦云:「夙夜,早暮也。」是不 『夜,暮也』三字,與《釋文》正合。」今考《蜀 又作暮』。足利古本於箋『夙,早也』下有 箋無『夜莫』之文,毛本因妄改《釋文》爲 『露 二字,云:「本又作暮,同。忙故反,又亡 夙,早。夜,莫」之文、《行露》箋又云「行 而還,往來皆在暗中,故總言之曰『宵 《釋文》又云「《小星》詩同」,是陸所 何氏《古義 見 有 博 獨 事

征』也。」

詩 則 律歷志》:「留孰于酉。」傳既以「昴」爲「留 留,言物 音卯,不當讀 以漢人語釋古語也。」顧氏《詩本音》亦云,昴 之留,故《天官書》言昴,《律書》直言留 文『酉』字。二字同部而不同紐 从丣,象閉門,今《説文》作「昴」,乃俗本傳寫 .昴.]爲一紐。此.[昴.]字,古謂之昴,漢人謂 就」、訓「留」、《説文》:「酉、就 昴,留也。」正 劉」、「留」、「聊」、「柳」等爲一紐,戼聲之 昴,白虎宿星。 似 云「昴又音柳」,於《爾雅》「大梁,昴也」云 「昴」字本當從丣作 維參與昴」,傳: 段懋堂曰:「戼,古音讀如某。 成 就繫留。」考古訓「丣」字多 力 義引《元命包》云:「昴之爲言 求反。 从日, 戼聲。」或謂「昴」字當 「昴,留 承珙案:毛傳云: 也。」《説文》: 《釋文》於此 也。」《漢 ,是以丣聲之 那**,**古 書 訓 毛

> 《陸堂詩學》云:「星名古皆象形,參象旗,畢 『留』不言『昴」,是詩人本用『留』而漢人書爲 豈「參」亦即「伐」字乎? 豈亦漢人所改邪? 『昴』。]案:此則不然。《書》之「日短 象魚叉, 昴象罶。 八尤》:「昴,星名。 韻,但核以訓「留」之義,當从丣耳。《集韻·+ 大梁,而後人又改稱昴。《史記·律書》言 又似「昴」本从戼,亦未始不可與「稠」「猶」叶 「昴」一名「留」則可,若謂「昴」即「留」字, 昴, 本又作昴」, 《詩》:「維參與 初無定見。 罶以承梁之空,故昴一名 况傳以「留」訓「昴」, **昴。」」字作「昴。」至** 若徐 貌 音「茆」, 星 一昴」, 謂 則

「禂」字、《衣部》「祗」下云「祗,禂短衣也」,蓋以「禂」爲「幬」之假借耳。然《説文》自有「幬,禪帳也。」義本《爾雅》,字不作「禂」。鄭也。」箋云:「裯,牀帳也。」《説文・巾部》:「抱衾與裯」,傳:「衾,被也。裯,禪被

王詩》「何必同衾幬」,李注引《毛詩》作「禍」,但云「幬」與 也。 見「衾」爲「複被」,則其爲「大被」可知,不必 如正義所疑「衾」既爲「被」,不宜復云「襌被 被」,不加「大」字。 義簡古,以「衾」是「被」之大名,故但云「衾, 樓」,皆未嘗以爲「帳」,亦不同毛傳 被」。 禍」古字同耳。 「帳也」。」此 「衾,厂也。 其下廣大,如厂受人也。」毛傳文 禍」下云「衣袂祗禍」,「禮」下云「禍謂 范氏《補傳》云:「《齊詩》作『幬』,注 《説文》又云:「衾,大被。」《釋名》: 語 不 知所 且下云「裯爲禪被」,正以 據。《文選》曹子建《贈白馬 以 之襤 爲 云

江 有 汜

「水枝本作「歧」,从《校勘記》改正。 成渚」,三章云過也。」傳於首章云「决復入爲汜」,次章云《序》云:「美媵也。」●勤而無怨,嫡能悔

然。 以爲待年之女。 備數,則有勤望之憂。」即用此詩《序》義。 妹·彖傳》正義云: 俱,故有勤望之憂,而 承珙案:「媵娣」之名,見於《易》、《詩》、《儀 爲待年之故而不與嫡偕行,豈得怨嫡乎?」 承事,還待年父母之國。』《白虎通義》亦云: 八歲備數,十五從嫡,二十承事君子。 行,於禮有之。《公羊傳》注云:『諸侯之媵 云:「嫡與己異心,使己 『還待年父母之國,未任答君子也。』若此媵 姪娣年十五以上與 「沱、江之别者」,皆以 此詩所美之媵,必是年在行限 「妹既係姊爲媵,不得别適。 何氏《古義》曰:「待年不 嫡 無怨憾之意。 俱 興 獨 行 嫡 許慎 留 媵 不行。」 本 朱子《集傳 宜 气何 偕 而 《周易· 若其不以 蓋古者 嫡 休 行。 未任 皆 不與 云 箋 歸

・児序》改。
・「美」、原作「姜」、據廣雅本及阮校本《毛詩正義・江

有

之媵。 禮》、 繼嗣 者,而嫁者違之,故在家之女有 大夫、士之妻。 然其嫡不與媵俱行,後始悔 昏禮》云「雖無娣,媵先」,皆所以 必有媵。故《喪大記》云「大夫撫姪娣」,《士 女,故《碩人》有「庶姜」之稱,秦穆 公,王姬宜爲媵」,此最爲謬説。 國」,皆嫡也。 仲女,曰嬪周室,《春秋》紀「季姜歸京師」,「魯叔姬歸於侯 媵,或以君之庶女,君之嫡女雖多,亦不爲媵。 同姓之國爲媵,故有「娣姪」之稱。 ∭ 在 國媵之」,毛氏著於《韓奕》。 迎之,則篇中 母家必有久相諳者,適夫家必有願 也。 《左傳》、《公羊》甚明。 違者不欲以其家昵厚者俱行,望者不意 大夫以下或不必備,或以他人,然亦 此《序》衹言嫡媵,不明其爲諸侯、 《何彼禮矣》疏引皇甫謐云武 ·情事 類然。 或 王 諸侯一 以同姓大夫之 雪 鉠 蓋 Щ 息陰訟 望不 王「元女妻胡 其本國之 惟諸 有「懷嬴」 曰 : 一娶九, 悦之 相 而 侯 「婦 摯任 女, 從 廣 以

家詩 聲。 故不 「洍,水 矣。 興。」承珙案:《説文·水部》兩引,一曰: 夫人 洍。」」一曰:「汜,水别復入水也。 此毛解汜之狀。其興與鄭同。 其 入興媵亦 有汜興嫡之有媵,則三章同意。 成贅旒矣。《吕記》、嚴《緝》皆用之,非 御之數而 以爲待年之女,固非。 「顧」。 疎 八初過 《詩》曰:『江有汜。』」此作「洍」者,蓋三 解。」沈青厓《毛詩明辨録》曰:「以江之 ,但以爲水名。 江有汜,而之子不與 情相棄也。」此説 正義云:「『决復人爲汜』、《釋水》文也 也。 如此則是歸後之事,經中「之子歸」句 復歸 而後 侍君,且以「不我過」之「過」爲 从水, 臣 ,其義僅通於首章 悔者,以後悔之文下章自見 《毛詩》則作「汜」,以「决 微婉 聲。 程氏則謂 ,最爲得之。 《 詩 我偕行, 若以水决復 知毛不以興 不以媵備妾 丁, 且 曰 : 从水,已 亦是 近 江 也。 朱子 於比 有 反

所以 至此 高 嫡 復 成渚」之詁 流 於彼,猶俗所謂 水小,然而 汜」、三章之「沱」,其義 韓詩》云「一溢一 媵 能 而 人」爲 而分流 宜 遮水,使從旁迴 渚留」,亦取 勝于三家也 俱行。 」孔 興。 爲愜 諸本「而 亦以 鄭 箋 東坍西漲 此意。 疏 」作「得」,從《校勘記 喻 否曰渚」,謂水溢於此則 《釋名》云:「渚, 云: 次章「江有渚」、《釋文》引 申之而 嫡 也。」蓋水 媵 然皆不如毛傳 興 宜 者。 也 傳義 者,喻 **俱**行 中有 鄭箋謂 愈 江 明,此毛 與首章之 遮 水大 並 也 流 小水 則 江 似 水 乏 體 枝 涸 水 汜

嫡 不 岷 而 序》首句。 即 俟其 知《序》 始創 所 其後 自 以 美媵。 朔言 爲 悔 也悔」,傳 此 「冀幸將 蓋當 「勤 或謂 **^** 虞東學詩》曰:「《小星》下 而 時 必 無 來」之辭,謂 實 謂 如 怨,嫡 有 嫡能 此方與 其 事。 能 自 悔 蘇潁 悔一, 過」, 媵 美媵」合。 不 濱 義 則美 敢 恕 戴 本

> 流之量比 自託,以日月之光比夫人, 江汜自况 能安,而《序》曰『惠 以汜自比,以江 序》曰『美媵』,互見其 正嫡,知分守命,所以 比 嫡,賢女恭順之辭。 下]; 義 紅 也。 · 沱 爲賢女也 郝 Ě 仲 能 輿 悔 小 日 洪 而

野有死庸

禮,而 陵,則 以 自 既惡無禮,則 之」爲挑戲,以致目爲淫奔之詩。 鹿」爲「廣物」,以「如玉」比女德,皆正言 茅」爲「取潔清」,以「誘」爲「道」,、次章以 云: 防 末章爲貞女拒暴之詞, 「凶荒」 者,未必 惡無 狗吠」,乃所 序》云: 禮 則 果有 之意 殺 必將 禮, 野 以 無 自 有死 之 猶 禮劫 爲惡 見。 以 有 **屬**》,惡 禮,故 無禮 脅之事 以 而 至末章 後儒 將之。」又以 也。 毛傳於首 無 也。 ·云「非 遂并以「誘 然箋 其實 禮 也。 自 疏 以 禮 禮 有 章 夫 相

之,則 嫁,因 其物 或 成 詞 以 能 以 『白茅純束』, 謂女之德如玉之潔白,不可犯以 林 爲詩人我此女子者,亦於詞氣不合。 此 玉」不可以爲女子自言。 補傳》云:「此言强暴之人被化感悟。 違 講 爲 詩 玉」之意 成禮矣。 野得自 禮 禮 可 所 春則 可 慮 既 今日 謂 陳 强 以 有微物可 蓋 微 死之鹿,及以樸樕之小木爲薪芻, 向 爲 暴之習 興懷。 成室家之道矣。 同 『有女懷春』者,謂女子年及 以 自知羞惡,取微物 矣,取潔白 也未悟,陵暴成 女 亦以 也。 禮自防,惟恐以無禮而害其 之 所 未除,遂戒其徐徐圖 比 以行禮,室家之好指 凡我吉士 末章 欲 德,與『生芻一束,其人 之茅以 設爲女家 如 或又以 是 有 一,苟能 俗、雖微禮 則 以 包束之, 非 女 「無感我 爲用, 懷 謂男子之 如 以禮 禮 春 玉』者, 惟范氏 之, 日 再言 誘道 亦 猶 謂於 則 而 帨 成 無 當 不 而 可 可 如

> 禮,女子亦幸其 化及於女子而 矣。」案:此説善體毛意,且足破 許之,亦不欲其 物雖微薄,猶賢乎已,但不可不約以禮,故 也。 當 此 亂 世, 不 遽 有禮 被 及男子之疑 迫 文王之化, 也。 ,固不當責 如 此 男子 則 其 後儒二南之 男 備 既 女 物 知 兩 惡 善 雖 蓋 無

謂矣。 節 禮 可 茅又純潔之物,可 從,故曰『白茅純 鹿之不成皮,猶樸樕之不成林,女惡之 則不中禮之皮而又苟簡將之矣。 今曰『死麕』,乃不中禮之皮,曰『白茅 感帨」、『尨吠』,則躁急欲 次從容。 ,儷皮,執皮者必攝之,故以包束爲言。 解,白者不可玷也。」《虞東學詩 惠氏《詩説》曰:「昏禮,東帛 故兩言「無」以 舒 而脱脱」,無急遽、無苟 束,有女如 以藉禮。 戒之。」承 速 此正 玉。 非 小珙案: 從 禮 次章言 言束 ₩ ⊟ 容誘 以 儀 周 略 鹿 道之 東」, 者 而 備 皮。 也 昏 死 而 不

説以

章乃

制。

壺》

純

毛傳「 其束之也 白茅純 茅」,亦明「殺禮」以白茅爲藉。 「野有死鹿, 之屬也。」凶荒殺禮,或不能具鹿皮,故以 皮爲贄,故从鹿省。」又:「麇,麞也。」「麞, 文》:「慶,行賀人。 从心,从夂。 吉禮 相與」, 則 言 鹿 傳箋謂 禮 章 爲 一算爲奇」,「二算爲純」, N N 昏 「白茅 麢 皮 東」,亦謂 同 不 荒 禮 矣。 不 白茅,皮之藉也。 言「白 明嫁娶過時之義。 中 如 殺 用 以 具 禮 純 純 鹿 白 禮」之説 故 而 帛而 東」,謂儷 皮,究無 茅」,不 茅裹鷹 死 知 用 以 鹿之皮也。 毛傳不可 麢 結 爲 皮 爲當。 以 禮 肉 應 用鷹 ,則當首章言鹿,次 皮 白茅,即是儷皮之 之備 , 非 先後 《易 也 改易 皮者。 也。 初六「藉用 或又謂:《 《射禮》及《投 是「耦」謂之 異義; • 大過》「過 兩 然 也 **案**: 皮 如 皆 爲 惠 如 以 不 如 儷 説 白 如 説 此 麞 鹿 鹿 顧 敷 ? 詁也。 乎 云: ?

以

皮爲

説

則

兩

以

遲遲,女心傷 之詩,遂覺「懷春」非美名。 爲「匪人」,亦復誤認「懷春」,并以「如 記》駮歐陽甚正。後儒 『吉士』者乎?」承珙案:《衡門序》「誘 女爲蕩婦。 有「誘賢」之文、《論語》有「善誘」之語、《 也」,正義謂「在前 詩方惡無禮 『彼女懷春,吉士誘 先有『誘射』,皆謂以 春女悲、秋士悲、感其物化也。」然則「春 毛鄭以『誘』爲『道』、《儀禮 吉 惟 且諸家 歐陽氏誤 其發乎情,止 士 誘 大抵 党宣有 不獨 之, 悲」,豈 以 泥於六朝、唐人春閨、春怨 誤 道之」,况《戴禮 爲 傳: 而 爲『挑誘』之『誘』, 禮道之。 解「誘」字,致 鰯 乎禮 挑 汙以 或 誘 反 誘, 非禮」。 義 之 之女皆欲 有從歐 不知《七月》傳: 7,所以 古人固有 汙行 道 也 一》、《射 殊不 爲王 以「吉士 而 》《立言篇 陽者 **^** 淫 尚 玉」之 吕 化之 僖 奔 名 ·知是 遂 此 者 吕 之 日 何 謂 訓 亦

名勝 匏瓜 節 效 厲 之性 欲,故 。」此雖文人之詞,然最於詩意有合也 陸 士 衡 偶影之操矜; 幺 演 居之女,非 連 珠 **>** 云 無懷春之情。 窮 愈達 遁 世 之士 ,故陵雲之 是以 非 受

也。」: 文。 李迂 中 樸 死 可 用 白 有 木 白 樕 樸 免 以 茅 鹿 及 也 室云: 茅純 於 爲 仲 裹束以 以 野 ,野有死鹿」,其文相對,不當言『樸樕之 鄭氏以爲『樸樕之中及野 林有樸樕,野有死 爲 有 陵 薪。 日 野 用 死 踐。 東以爲禮」。 有 「樸樕之中及野有死 鹿」也 「歐陽氏以林有樸樕之木, 爲禮。 猶 王氏則以爲林之有樸樕,雖小 死 夫『白! 鹿 知以 廣可 廣 白 惟 茅純束」,皆是連 物 蘇 茅純 然觀詩 用之物 也。 鹿」,傳:「樸樕,小 氏 連『野 云: 束 純 又以 有 而 非 『將 東,猶 鹿,皆 有 死 取之,况於 獨鏖 謂 死 取 鹿 屬一之 樸樕 林 於 。 皆 包之 猶 可 也。 林林 有 而 口 以 口

松明 記》去: 供 《漢廣》有「刈薪」之言,《南山》有「析薪」 楊敬仲論詩 云 以 離 者於昏禮或本有薪芻之饋。 之「覯爾」以「析柞」爲辭。 句,《豳風》之「伐柯」與「娶妻」同 今考《詩》言昏姻之事,往往及於薪木。 死鹿之所在,正義衍 也」,似本分 珙案:毛 時白茅之束樸 有 供炬。 炬 同爲 「使徒 女 事 之類 如 異、娶妻者聯異爲 「以樸樕 或然歟? 玉 《士昏禮》「從 傳 可 役持 解》云: 爲二意。 以 而 樸 照 可 炬火 爲禮,意其若致薪 樕, 者 不 ^ 皆謂 何 以 漢 居前炤道。」樓攻媿《答 古者,「如麻、骨、樺皮、 小木也」,「死 浦 之,尤多 禮 鄭箋始以 車二乘,執 廣》箋有 ? 成 同 之燭」。 之哉 此雖似以 姑且 起 蓋 奉强。 興,然 一
芻
以 了致禮 樸樕及野 從蘇氏。」 喻《 燭 是 芻 然 鹿 林馬 前 析薪 竊 之饋 則 不 小雅 惟 **餼** 之 馬 薪 意 廣 知 之 以 注 古 者 薪 吕 物 如 爲 承 當

言,芻以秣馬亦屬禮餼,特古書殘闕,無文以

ヴ之耳。

無端 孟 若係刺詩,子皮非伯有一流,於享宴之際,而 侯,無以非 無使我失節而使狗驚吠。 使無吠。』」注云:「《詩》義取君子徐以禮來, 伯享趙孟,「子皮賦《野有死鷵》之卒章。 言實開歐陽《本義》之先。《左傳》昭元年。 犯法,男女失冠昏之節、《野鷹》之刺興。」此 賦《常棣》,且曰:『吾兄弟比以安,尨也 賦此 劉昫《唐書 以刺,何爲哉? 禮 相 加 •志》曰:「平王東遷,諸侯 陵。」杜《解》全用《序》義。 喻趙孟以義撫諸 趙 鄭 可

女子生而願爲之有家者,道其情之常也。然詩皆當作如是觀。則首章之『懷春』,即所謂言之,所謂極其形容也。』愚謂非特末章,全言之,所謂極其形容也。』愚謂非特末章,全『末章非必出於女子之口,詩人特探其意而汪氏梧鳳《詩學女爲》曰:「朱公遷云:

子自 子亦 吠矣。 動 我,謂當以禮舒遲 不必然也。 詩者又多以末章「我」字爲詩人我女子,其 箋乃有「貞女欲吉士以禮來」之語。後之説 鄭、孔皆以爲女子自作,則傳文並無此 之化也。」承珙案:此説亦頗圓 真有强暴之污而女拒之云云也。 言其容之莊 以 必『吉士』而後 吉士而或無媒妁之導者,帨不可感,尨且 矣。次章極言其心之堅且潔。三章首句 其佩巾,致令尨 成禮而後可,其不可干以非禮之意已凜 左 動 其 蓋旁觀者見貞女而刻意摹寫之詞,非 佩紛帨,故謂動女子之帨,不如謂男 帨 也 即以爲詩人我吉士,或吉 且 可,必『吉士』而 和 ,於是申言之,若曰: 吠,義皆可 而來,不可奔走失節 通。《内則》 又有媒妁導之 通 故曰文王 惟謂 意,鄭 土 彼 而 毛 白自 男 欲 然 自 非 極

何彼禮矣

義以 鄭以「平王」爲文王,在當時必有所受之,正 已加 桓王 兒,則誤認桓公爲襄公之子。《山堂考索》載 與雍岐舊民 爲東周,采詩之地爲召南。 案:二南皆文王之詩,而經言「王姬」,當是 林氏説,以「王姬」爲桓王女、平王孫,又誤認 引「或説」以「平王」爲宜臼,「齊侯」即襄公諸 離》既作,召南故地已非周有。 孫,適齊侯之子」。 《六經奧論》以作詩之時 有天下以後之稱,故毛傳以爲「武王女、文王 "「后稷始基靖民,十五王而文始平之。」 辨正,近陳氏《稽古編》更劇論之。 爲平王子。 《序》云:「《 稱「甯王」爲 事,顧安得采於其地?」朱《傳》 《日知録 何彼 襛 證。 》取此説,殊誤。 矣》,美王姬 鄒忠胤曰: [《黍 《國 天朝歸妹,何 語》大子晉 許 蓋 白 也。」 毛 雲

同。 義難 女,文王孫,適齊侯之子」,定論也 於他國公子而 得預爲東遷之平王避;若太公已封齊,安得 之。」此則未必然。《儀禮疏》引鄭《箴膏肓》 之。」據鄭答張逸,以此爲《魯詩 國之侯,故訓「齊」爲「一」。 稱「神宗」,而後又有神宗,即其比例。李氏 不應後世又有平王。 《詩》中每多此 曰:「齊侯嫁女,以其 又言「平王」既非東遷之王,則「齊侯」亦非齊 文王之稱「 惟有平德,故人化之,惟有齊德,故 康侯」爲證。 武王」,又如「皇后烝哉」、「告于文人」之類 通,然其以「齊侯」爲 姜氏《廣義》曰:文王之稱「平王」,固 平 王」,猶契之稱 彭汝礪《奏疏》亦引此詩,云: 稱 云「齊侯之子」乎? 謂。 或疑文王既稱「平王」, 李迂仲曰:宋太宗亦 母 王 齊國之侯,則 姬 黄實夫以《易》 「玄 王 影説。 始嫁 」,湯之稱 傳 時 此 車送 人畏 與毛 雖 於

齊侯則太公,而

以

武

王之女適其子,是甥

舅

作,故

補人之。」

顧

繫之《召南

則當

時

意王姬

下

之太師,意或後之采詩者以此篇爲 古者天子嫁女於諸侯,必使諸 王之風。《甘棠》之詩亦作於武王之世,而爲 王、大姒之化,故以其 南之國,能執婦道,成其肅雝之德,皆本 官,得之於召南之地,以 一二南决無東遷以後之詩,當是成康時所作。 召公輔成王、康王,以康王二十四 同姓,齒、德、位之尊者,莫如 《譜》謂二南之詩,武王 嫁於齊,召公主之,故 本言之。」《田 氏《日知録》云:「成 非 是 王之詩當 風 詩列於《召南》而 雅 體。 之類。 爲武王之女下 又詩中 間詩學》曰 爲雅 侯 當時 同 姓者 召 一録 采 專 以 而 ·嫁召 年 於文 詩 言 王 公 以 其 爲 不 主 而 時 屬 詩 召 始 : 文 之 女 當 異,忽玷以淫穢之諸兒,自知不類,又更以創 之穆也,與成 霸之小白,是亦一 子,則二也。」此説 陳胡公,其一也,《何彼襛矣》王姬嫁 五男二女,五男者,《左傳》邘、晉、應、韓,武 鑑《詩傳遺説》載朱子曰:「《詩》疏謂武王 胡公,則安知不有幼女配吕伋之子乎?」朱 王莫年而得唐叔,蓋甚幼矣,以元女大姬 震大叔」,杜氏 齊侯矣。戴岷隱云:「《左傳》『武王邑姜,方 未笄之女。」 爲 命》云「齊侯吕伋」,則吕伋在成王時早已 丁公始見於經,而 廣義》曰:「以聖人手定之二南, 婚。 周之盛 承珙 王 時, 云: 『武王后,太公之女。』武 不可 則 案: 可 去武 必 Ŧi. 以 補 無 矣,二女者,大姬 此説 已乎?」 傳箋之所未備。 王三十餘 此 事。 亦

文王之風,皆推

爲

然此三章只

嚴《

緝

尝云

武

德,正與二南

同

科

未

必

年,又必

無

逮

成

王

顧

命

唐 棣之華」,傳"「唐棣,移也。」《小

而諸

儒

姜氏

齊侯之

下

嫁

有

雅 常 棣 傳 云 常常 棣 棣 也。」此皆與今本

爾 雅》同。 正義引舍人注「唐棣、一名移」,

常棣,一名棣」,又皆與郭注同。 後之學者,

印定心目,遂據以爲唐棣、常棣之分牢不可

破,而所言華實形色及别名又多溷淆。 王氏

經義述聞》曰:「『常棣,棣』,本或作『常棣

語・子罕》篇注『唐棣,棣也』,今本作「唐棣,核 《秦風 • 晨風》傳『棣,唐棣 也」,《論

也」,此後人據郭本《爾雅 》改之。 皇侃疏 元一唐 棣, 棣 樹

也」、《釋文》不出「移」字之音,則舊本作「唐棣、棣也」可知。

則與郭本殊。

蓋所見《爾雅》舊本作『常棣

栘。 唐棣,棣 也」。 今案:《小雅》『常棣之

華』、《藝文類聚 · 木部》下引三家詩作『夫栘

之華」,唐時《韓詩》尚存,所引 '核」者乃常棣,而 非 唐 棣甚 蓋 《韓詩》也。 明。《常棣》傳 則 名

也」。

何彼襛矣》傳『唐棣、移也』及箋内之『移』 常棣,棣 也」, 當依 或 本 作『常 棣 移

> 『常棣,移。 以三家詩及毛傳、陸《疏》、《本草》考之,似作 字,俱當作『棣』,後人據郭 唐棣、棣』者爲長。《玉篇》「唐」作 本《爾 雅》改之也

『常』『唐』聲相近,遂致相亂耳。」承珙案: 王 ·糖」,云「棣也」,與《晨風》毛傳、《論語》何注合。 蓋 因

説是也。 《説文》:「核,棠棣 也。」「棣,白棣

《漢書・杜鄴傳》引《小雅・常棣》作「棠棣」, 也。」棠棣即常棣,「常」「棠」形聲皆相近

顏師古注亦同。 《文選》曹子建《求 通 親親

表》「中詠《棠棣》,匪他之誠」,李注引毛《序

云:「《棠棣》,燕兄弟也。」又謝宣遠《於安城

答靈運詩》注引《毛詩》曰:「棠棣之華,萼不

「常棣」。 《毛詩》「常棣」據《選》注 有作「棠 韡韡。」蓋許氏以「栘」爲「棠棣」,即《小雅》之

棣」者, 殆即許氏所本歟? 白棣」者,意當 時 惟白 棣 得專「棣」名,故以 其又以「棣」爲

色别之。此即《召南》及《論語》之「唐棣」。

瞭然矣。 當作「常棣、移」。 棣,移」當作「唐棣,棣」、《小雅》之「常棣,棣. 又可單 衹言「棣」, 蓋「唐棣」 而毛傳曰 稱 可 「常,常棣也」。 「常」,故《小 而 單 毛傳 ·稱「棣」,故《秦風》「山 由于後人互易致誤,其故 曰「棣,唐棣 雅》但言「維常之華」, 然則《召南》之「唐 也。 有 「常棣 | 苞棣|

尺,實大如李,正赤色,食之甜。 名雀李」、《太平御覽》《果部》十。 六月中熟,大如李,子可食。」《齊民要術》引 車下李,一名棣」者皆合。 奥、郁,字之通; 亦名奥李。』」二疏正與《神農本草》「郁李,一 『一名雀李,又名車下李,又名郁李,亦名棣, 豳風》義疏: 唐棣,奥李也, 車下 論語 李,所在 子罕》篇疏 亦即陸璣《詩疏》。「鬱樹高五 山皆有之。 一名雀梅,「梅」疑當作「李」。 引 此詩陸《疏》云: 其華或白或赤, 「郁李,一名 《廣雅》曰 六 亦

疏引。 陸佃、羅願,遂皆以「唐棣」爲「白楊」, 雅》以「唐棣」爲「白栘」,謂 蓋唐棣子名郁李,其大如李,常棣子如郁 樹,亦似白棣。葉如刺榆葉而微圓,子正赤 櫻桃正白,今官園種之。」此則微誤。 今姑無論其子之大小。 棣」之别有「郁李」、「車下李」諸名, 而 多有之。」此所言白棣、赤棣,以其子色别之。 如郁李而 以「常棣」爲「白棣」也。 以「棣」爲「白棣」,而訓「栘」爲「棠棣」,未嘗 甚爲明晰,惟於「常棣之華」疏云: 鬱、奥、聲之轉。 詩》所言「唐棣」、「常棣」、皆取其華爲形容 常棣」當之。 小,其實皆棣樹而種微異耳。 「常棣,許慎曰 小,五月始熟。 名實糾紛,不可 總之皆唐棣 白棣 陸又云:「又有赤棣 而陸《疏》所云唐棣 樹 自關西,天水、隴西 「似白楊」,後人如 也,如 董理。 也。 自郭注《 李 陸氏 見《爾雅》邢 而 《説文》 則又以 殊不知 而 小 此 「唐 爾 李 如 疏

0 74

萼邪 摇。」 多悲風 楊亦曰栘柳,亦曰 以棣名,而詩人皆取其華之美盛。 華之濃盛阿那,更可想見。 桃李之華也。 再 名「栘」,亦與栘楊無涉。 子如郁李,其華當亦如郁李之華,故二者皆 華 不言其華,然《齊民要術》引《詩義疏》云: 承華者萼,其實似櫻桃。」 藥李蓋 則 有 此所言與白楊同 曰「華如 赤 實非 有 馮 夫白楊安得有偏反之華、韓 嗣宗曰:「唐棣自是楊類 棣。」亦惑之甚者矣。 故《 桃李」,正謂其華 至逸《詩》之「偏其反而」,則其 召 蒲移、圓葉弱蒂、微 南 類,故《古詩》曰「白 \forall 《古今注》云: 則 陸氏於「常棣」雖 \Box ·或赤或白,如 何 常棣 即常棣 彼 雖得棣 襛 不獨 韡之 風 矣」, 核 善 楊

之車」,不敢 往乘車」之泥。 吕記》曰: 指切 『平王之孫,齊侯之子』,其詞匹 「肅雝者,王姬。 之也。 此語足破鄭箋訓「之車」爲 而曰 王 姬

正義 平王之孫;末章主説齊侯之子以善道 也。 妻』,而後云『蹶父之子』者異矣。」承珙案: 與《春秋》之法同也。 所適也。 此詩先言『王姬之車』,是將有行矣,然未知 侯,則反是。於其逆夫人也,以『女』名之, 王之孫,正夫婦之序也。 曰『釣緍』者是也。至 於其來逆也,即言所來逆者,是尊卑之體也 將有行也。歸而後,著其所適之國。配若諸 分定也。 子逆后不曰『逆女』,先正其爲王后,命出 他義也。」李氏《詩所》曰:「《春秋》書法,天 自應先稱 敵 則 亦言上章主美王姬適齊侯之子,故 不言『來逆』者,先曰 不 歸而後,本其所生之女稱其『下嫁 驕 次乃指言平王之孫下於齊侯之子, 王姬。至末章則反覆歌詠之,非有 亢可 知 也 逆女之事則歸之卒章 此乃言齊侯之子尚平 此 築王姬之館,見其 詩 與 爲 先日 美 Ŧ. 「韓侯娶 姬 而 求王 先言 Mi

姬之歸,與此詩相表裏,實萬世之法也。 之禮也。 過 姬 天不祥,違人不義。」由是觀之、《春秋》書王 主之制,非古也。『釐降二女』,陶唐之典, ·歸妹元吉』,帝乙之訓,『王姬 泥 ,故先言齊侯之子。 亦非 以陰乘陽違天,以婦陵夫違人,違 無所本。 説詩者於此 荀悦《申鑒》云:「尚 歸 齊」,宗周 類固 不必

騶 虞

也。 自少見多怪耳。李氏《詩所》云:「周 筆,則知瑞 儒每不信瑞應之説,故多以《序》爲 禽』、《雅》所謂『大庖不盈』者,皆文王之流 行,恩及禽獸。《易》所謂『王用三驅 (論語》歎鳳鳥之不至、《春秋》因獲麟 是以 《序》云:「《騶虞》,《鵲巢》之應也。」宋 四 應之故,聖人未嘗不留意焉,後 靈感之而至,而賢者識其應非 非 失 道 而 之 前 絶 然 由 風 儒 韓

《陸堂詩學》曰:「士君子終身隱約,苟能孝 《鵲巢》,未必一人作也。 外。 之《騶虞》之應,得乎?」 最爲平正。然而徵應之理,實有不可誣者 許孜之猛獸擾庭,董召南之犬乳雞 公藝之九世同 友仁義,推行不倦,如氾毓之『兒無常父』,張 其實,作者本意不在於應也。」承珙案:"此説 其意,因言『《關雎》之應』、『《鵲巢》之應』耳 可法,垂憲後昆。 言其志。《麟 義歟?」黄氏元吉曰:「孔氏謂詩人之作,各 順」,此則『順之實也』。 之卵胎皆可俯 孔子云:『鳳 趾》之與《關 居, 加 皇麒麟,皆在 窺也。』先王『能體信 大師比之於末,序者申 即 謂《麟趾》之應可也 其《麟趾》、《騶虞》之 但君子之道,作 雎》、《騶虞》之與 郊藪」、『鳥 哺,不 以 明 事 達 淵

#魯説:『騶虞,天子掌鳥獸官。』古《毛詩》《周禮・鍾師》疏云:「《異義》:今《詩》

説

有「一 同。 得賢者衆多,歎思至仁之人以充其官。』此 之田也。』《東 宜生之於陵氏,『取怪獸,尾倍其身,名曰 囿之司獸者也。』《儀禮 引《魯詩》傳曰:『古有梁騶。 經》、《鄒子書》云『騶虞,獸』,説與《毛 之,是麟與騶 南》終《麟趾 《禮記 新書・禮篇》:『騶者,天子之囿也;虞者, 韓 食生物。 魯説合。 陳氏壽 李善注 《文選》張 發五豝」、「五豵」、「于嗟騶虞」之言,樂 騶 虞 射義》: 人君 祺曰: 義 》,《召南》終《騶虞》,俱稱嗟歎 引 都 《太平御覽》引《尚書大傳》散 虞俱獸名。 潤 劉 平子《東京賦》『圉林氏 賦》李善注引『翳』作『鄒』。 『《騶虞》,樂官備也。』賈誼 有至信之德則應之。』《 芳《詩義 「《文選 白 虎 • 鄉射禮》注:『其詩 黑 · 魏都 文, 謹案:古《 疏》: 梁翳者,天子 食 賦》張 『虞,或作 自 死 之 之騶 Ш 載 詩》 肉 騶 皆 周 海 注 則以 云: 合。

獸」不同。 虞。」」此亦全用毛説,惟「仁獸」與毛傳「義 騶虞也。 説。」承珙案:此《異義》,許氏從毛,鄭無駮 賢也。』鄭注《禮》則用韓魯説,答《志》則用毛 《鄭志》:張逸問:『傳曰「白虎黑文」,又《禮 死之肉。 故知毛説 周史《王會》云「備者,取其一發五豝」,言多 記》曰「樂官備」,何謂?』答曰:『白虎黑文, 此采《書大傳》及《毛詩》爲説。《詩正義》引 於軀,不食生物,不履生草,應信而至者也。』 『虞』、『吾』、『牙』近,通。 其不 陸璣《義疏》云:『騶虞,白虎黑文,尾 騶虞,聖獸也。」此皆因瑞 漢 書 从虎,吴聲。《詩》曰:『于 白虎黑文,尾長於身,仁獸也,食自 食生 不可易也。 毛用古《左氏》修母致子之説,許 東 物耳。 方 朔 傳 《説文・虍 鄭 謂 司 此皆與《毛詩》 之 農 應 注 騶 牙」。 而 部》:「虞 周 爲美稱 嗟 禮 乎 古 》又 騶 長 説

無 自以獸非常有,偶遺其名,不得因此遂謂古 伏生《大傳》皆在毛前,而毛與之合。《爾雅 鳥獸爲義。 虞》、《鵲巢》之應」,又與《麟趾》相配,皆繫之 以名之,因而田 蓋因古者先有此仁獸之名,故掌鳥獸之官取 但云「名曰虞」,而 八虞,或皆緣此 總之,「虞」字本義 是物。 而以之詁《詩》,則皆不如毛説之精切也。 三家以爲官名、囿名,皆緣後起之 而且《六韜》、《周書》、《山 獵之囿亦以爲名,以及七騶 而 專取「騶虞」,故《書大傳》 起。 鄭注 毛公以《序》云《翳 即 云「虞,翳虞 海 經》、 也」。

皃」,箋亦云「記蘆 豝齊見。」承珙案:《説文》以「茁」爲「艸初 深葭之中,一豝負矢,其群皆奔,故壹發 Ŧī. 豝 葭」之説 ,以待公之發。」姜氏《廣義》曰:「豝隱 壹發五豝」,傳:「豕 顯 與 經 始出者,著春田之早晚」, 悖。 范 牝日 氏家 豝。 相《詩 虞人翼 而 出 Ŧī.

> 蕪可見矣。」此説較有分曉。 發也。一豝中而五豝齊見於葭蓬,庶物之蕃云:「古者一發四矢,蓋先後發之,非四矢並

驅五 《集傳》誤云『牡豕』,陳潛室已辨之。」黄元吉 實與毛同。 案: 賈誼《書》説 騶虞雖 侯不掩群義未洽。惟獸多而 於國君仁心及物之義,且與天子不合圍、諸 必疊雙」,欲言中多以見禽獸之蕃殖 **豕」,傳寫之誤耳。至《集傳》用《西都賦》『中** 而 人歎之,以爲即不食生物 曰:「朱子於《吉日》曰 『牝豕』,而此 「虞人翼五豝,以待一發,所以復 不忍盡 豝以待射者,奉上之敬也, 君公衹壹發 朱氏《通義》曰:「豕牝曰 殺者,愛物之仁也 此漢初經師 相 與毛異,然其 之翳 承之義。 不忍盡殺,故詩 豝,本《爾 虞 中也。」其説 耳。」 ,然有 蓋虞 云『牡 承珙 云: 雅 害

毛傳於「五豝」云「豕牝曰豝」,於「五豵」

有孕道。 云 爲蒐,謂 蒐索擇取其不孕者,若云「豕牝 不知豝爲牝豕之小者,《吉日》云: 」,則 獵

牝豕」,又云一曰豝,「二歲能相杷拏者也」, 發彼小豝」,其明證矣。《説文》既以「豝」爲

引《詩》曰「一發五豝」。 先鄭注《大司馬》及

豕」,而 廣 雅 釋獸》並云「二歲日 以其 小者不孕,故無害於蒐義。 ? 是豝雖 牝 至

五豵」傳「一歲爲豵」之説,正義以《七月》

説 言私其豵」爲證,又與先鄭注《大司馬》及 文》、《廣雅》皆合。 《太平御覽》引《纂文》

云: 母 豬 齊徐以 豲 與豵 小豬爲骤。」《玉篇》云:骤,小 同。 故《説文》云:「一歲 曰

豵 ,尚叢聚也。」然則豵亦牝豕,而更小於豝。

互耳。 毛傳於「豝」言其牝,而於「豵」言其小,義相 所以 專 取 **豝**豵 者, 説者謂豝豵 獨 喜 害

郊特性》:

迎虎爲其食田

豕,所以除春

約 何由 獨不取其「豕生三曰豵」者,蓋以田 爲仁也。」承珙案:毛傳訓「豝」用《爾雅》,而 之小豝。 農之害 必待其成。《淮南子》『魚不長尺不得取,彘 不朞年不得食』。 豕之名,故别異之。 見於《釋畜》,惟豕見於《釋獸》,以豕者 。略,其一歲二歲,不甚相懸耳 知其生子之多少。 也 豵亦豕子也。 爾 雅 今皆一歲、二歲之豕,所 翼 豝, 牝豕之小者, 故又謂 **学**云: 惟大小之形,則可見 言雖取害稼之物 凡 六 畜之屬 豕在野 通 亦 以 皆 \blacksquare

《騶 禮 • 《禮》,於《大司樂》、《鍾師》、《射人》及《儀 《騶虞》之詩,文武之世已人樂章。 子• 貍首》,右射《騶虞》,而貫革之射息」。 虞》。」可見《騶虞》爲文王時詩,周公、成 三辯 鄉射禮》皆有「奏《騶虞》」之文。《墨 禮記 》篇云: 樂記》: 周 武 成王因先王之樂,命曰 王 一散 軍郊 故周 射,「左射 公制 是則

化」,語必 則更無可考矣。 選》注引《琴操》曰「《騶虞》,邵國之女所作」, 虞》作於康王之世,當亦是用爲射節。 王 用 爲 射 有 節 所 耳。 《序》云「天下 晁説之言《 純 魯詩》謂《 被 文王之 至《文 騶

如此。 掌御之官矣。 七 訓 乎?』」谷際岐曰:「賈誼之説見《新書》。 者,文王之囿,虞,虞官也。當誼之時,其説 也。』《漢書· 樂官備也。』吕大臨 也。』《禮記 見碧山。 也。 騶 騶爲囿,未知何據。 咸駕」,及《左傳》『使訓 宋韓淲《澗泉日記》云:「王建時 然則以之爲獸者,其出于近世之説 《詩》曰:「吁嗟乎騶虞。」賈誼以 文忠論之云:『騶虞,吾不知 序傳》云:『滕公廄騶。』是騶乃 射義》云: 『天子以騶虞爲 戴埴《鼠璞》引《月令》『命僕及 曰:『所以 考《説文》:『翳,廄御 群 騶 歸功于二官 知禮 兰,謂 騶 其 謂 節 顧 何 虞 騶

> 《賦序》一一與毛傳合,可知漢儒 公之博物者。」 年,滁州獲二騶虞獸獻之朝。 是引歐公語,不然注與正文不應自相矛盾。 書》:「囿騶虞之珍群。」則騶虞必獸也。」是 説,又安得謂出 谷氏駮之殊誤。《陸堂詩學》曰:「明宣 則淲意仍以騶虞爲獸,其「出於近世之説」尚 白虎黑文,毛傳已明言之。是漢時 怪,得騶虞、雞斯之乘」,則亦指 爲 承珙案:《澗泉日 拘文王于羑里,散宜生乃以千金求天下之珍 贊序》,較訓『囿』者爲長。 相如《封禪書》爲然、《淮南 騶 御 ,虞爲虞 于近世。淲此 人。 記 其説 以此條 蓋本之白 至謂之獸者,不特 原 道 論 注 今觀 中 殊爲 應訓》云『商 爲獸矣。 云: 未 已不一其 居易《 夏原 **《封** 失考。」 有如 德 禅 書 几

毛詩後箋卷二終

毛詩後箋卷三

鄘衛

邶

涇 胡承珙

武庚 父。 《志》爲説。 云: 蔡叔 可以 蔡叔尹之,以監殷民,謂之三監。』則三監者, 紂子武庚爲殷後。 不自監也。 殺紂,立武庚繼公子禄父,使管叔、蔡叔監禄 『邶,以封紂子武庚,鄘,管叔尹之,衛, 爲其 建諸 禄父及三監叛。』言使管蔡監 、霍叔尹而教之。」正義曰:「《地理志》 鄭《譜》云:「周武王伐紂,以其京師封 侯,乃三分其地,置三監 一,無霍 言禄父及三監叛,則禄父已外, 鄭不然者,以《書傳》 庶殷頑 口叔矣。 民被紂化日久,未 王 肅、 禄父、禄父 服 曰:『武 ,使管 虔皆 叔、 依 王

説 勢難 也。 《史記正義》引《帝王世紀》,以爲管 無 商、奄,皆不及霍。 四 也。」「故《周書・多士》止數管、蔡、商、奄爲 之事,武庚主之,霍叔與之同居,意雖 厥後周公誅三監,霍叔罪獨輕者,良以謀叛 父。』言『相』,則必立於其朝,其監 志》異,而言霍之監邶,足補《漢志》之未及 蔡叔監鄘,霍叔監邶。 日 不言可知,又與武 監當有霍 更有三人爲監 可 必 國,《破斧》詩『四國』,毛亦 :「《漢志》既言管蔡監鄘 《周書· 疑者。 有 立異,非若二叔在 是矣。」承珙案:《逸周 叔 而管蔡所 作雒解》孔晁注云:『霍叔相 , 禄 鄭 義 父非 則霍叔與武庚同在邶,固 庚 爲 監 同國,故 此言管蔡所監,與《漢 長。 《漢書》 外, 監 矣。 衛 陳 可 略 [》與《世 氏《 以 以爲 則霍 孫 而 書 進退 稽 毓 邶 l 叔 監 弗著 管、蔡、 叔監邶 信矣。 古編 亦 一紀》二 不欲 作 惟 云三 衛 耳。 雒 我 禄

居,而 赦之也。」當 武庚同謀,故諸 爲武 言「伐管叔、蔡叔」,鄭云:「不言霍叔者,蓋 者,據《漢志》管叔尹 都,於《詩》國 則三監之有霍叔,自無疑義。 建管叔於東,建蔡叔、霍叔於殷,俾監殷 酒 理 其謀,後乃 語》「明大命于妹 庚 罪 武王 所 反 封、邶、鄘、衛 輕 克殷,乃 由霍叔本非與武庚同處,或先不 屬 爲所 於 鄘。 書多指管叔爲戎首。《書序》 在 外者。 **廖**曳耳。 鄘,則: 立王子禄父,俾守 若謂三監 邦」鄭注 皆 其叛也,必管叔 在 陳氏之言, 未有 則 紂 此《譜》以 有 以 城之外。 與 與 武 妹 叛 邦爲 庚 商 殊非 紂 臣 同 祀 同 與 紂 都 或 而

之長。 此 日 國建諸侯,以 譜》云:「成王既 後 世 地 子 理 孫 志》云: 稍并 殷餘民分康叔 彼二國 黜 武武 殷命,殺 王崩,三監 混 而 於衛,使爲 武 名之。」正 庚, 一叛,周 更於

公誅 宋 在 紂 觀兵於孟津,又大會諸侯於此,然後北 數之,如 歌 邦畿千里乎? 又三亳皆商之故都 弱,又重以紂之暴,土荒民散,境壤 中鄭駁服,似矣。 非子孫矣。 未嘗以畀之也 如黎爲畿内國,周得戡之,至紂滅時 之大國不過 邶鄘之民於雒邑,故 反過周公,非 同風。』如《志》之言,則 地也、武王 ,則偃師已非 稍遠,商未亡時,所謂邦 監域内。 之,盡 東西周 服虔依以爲説 以 五 五 一克殷 其制 其 况殷之畿内 百里,王畿千里,康 商有。 通 西亳偃師 地 初 畿之制。 然殷自帝甲以 也。」《稽古編 封 が、「本 弟 下車 南亳穀熟及北亳蒙 康叔 康 . 諸 卽 在孟津之南,武 畿千里者,定應 叔 衛三 武王立三盥 初 鄭 以 侯 號 即 非 封 不 曰 國之詩相 後,國 大無 ·然者 兼 微子,亦不 曰 : 叔 益 孟 (彼二國 與 贵 而 侯。 削 孔 道者 之同 一,以周 行 猶 去 即 伐 即 Ŧ. 古 并 朝 是 疏 與 遷

境。 則 考,桓十二年「與鄭伯盟於武父」,乃鄭地,非 邱與 甫 鄭《譜》謂 漸 過 不 叔 在 土之異。 兩 頑 有之,安得方千里乎? 民 田 豫 河 至 或 近 應 介漕二 『自武父以 之北,當與鄘 殷 己 盡 郊、 有 則 州之澤藪 南者,故 可見康 概 以 庶。 成 徙 從 遠 鮀之言合之《鄭 地皆見《鄘 國之明證乎?」❷承珙案: 曠 紂 理 下都; 誅 郊,及邦 城 或 叔 采風之時,仍各存舊 土 滅 鄘 也, 北 當 時,民得留者多在 南及圃 地 改 爲邶 厥後 然。 封伯禽,又以 後爲 也。 接壤,而 建 甸 風》,在河 他 生齒 以内 未必 祝鮀論 田之北境。」武父 南爲 鄭 侯 成王作洛之後、殷之 譜 有。 康 地耳。 日繁,「邶 以 鄘 則 叔 鄘 武王之封 此寓 鄭 南,足徵衛 殷 初封 東爲 風》,不 名,以 衛地 在 監 民 此。 康 褒 衛 所 六 **^** 以 衛 鄘 叔 (左傳) 貶 邶 西 統 族 ·又康 此 不 記 甫 康 舊 兼 南 也。 爲 可 地 楚 風 賜 田 叔 壤 鄘 而 不

> 水,府 文 》: 見邶 過也。 千 衛 南 之,王城之外,盡鄉遂之地。 記》作「庸職」,是「有閻」即 職。」「閻」與「鄘」 祝 面 邶鄘之證。 血 衛 里之地乎 相去本不甚遠,何疑於兼得 分之,江艮庭《尚書集注》云: 相距爲方四 鮀 輝 「邶,故 鄘 又言 城西又有 府 周 不 初 府 以 封 東 至鄭《譜 商 封 康 百里。 侯,方四 北 故 邑,自 康 聲相 叔 有 鄘 叔 取 故邶城 城 乎?」承 邶、鄘、衛之大,當不是 河 以 近、《左傳》「閻 於 有 百 内 邶 有 里。 庸 鄘,亦足爲康 朝 閻 鄘 面有二百里, 滑 水 歌 邶 之 珙 康 出 縣 衛 以 鄘 以 土 叔 又案:《 宜 東 北。 就 即 職」,《 侯爵,安 蘇 南 盡 周 以 紂 Ш 今河 制 有 共 商 城 叔 説 邶 考 兼 史 Ŧ. 畿 與 四

[「]此」下、《經解》本《毛詩稽古編》有「武父」二字。

二」、《經解》本《毛詩稽古編》作「三」。

辭

爲

衛發,故

使其

詩

歸 衛 穆夫人之詩得在

鄘

地

人所親作」,而

得

嗟》刺魯,各從所作之風,不入所述之國。 傳》曰『許穆夫人賦《載馳》』、《列女傳》稱『夫 唯《載馳》一篇,《序》云『許穆夫人作也』,《左 夫聘問往來,見其思歸之狀,而爲之作歌也。 竿》俱述思歸之女,而分在異國,明是二國之 之人所作,非夫人衛女自作矣。《泉水》、《竹 事,而得分屬三國者,如此《譜》說,定是三國 舟》、《河廣》、《泉水》、《竹竿》,述夫人衛女之 「《緑衣》、《日月》、《終風》、《燕燕》、《柏 ,故使其詩屬《鄘》也。 女在他國,衛人得爲作詩者,蓋大 異之爲邶、鄘、衛之詩焉。」正 人《鄘風》者,蓋以 衛國者,以夫人身是衛 也。 至頃侯,當周 故作者各有所傷, 《木瓜》美齊,《猗 宋襄之母,則 於時國 夷王 在 義 衛地 也。 音 ? 漕 焉。 則當通日 其一爲邶音、一爲鄘音邪? 音,則莊姜、共姜諸詩,通作自衛宫者,安見 毛西河《詩札》曰:「或謂邶 得之地,安成劉氏本此説。 故《序》亦每篇言晉也。」承珙案:衛詩分繫 邶鄘,諸家之説紛紛不 「衛」名,故分之也。 以鄭在西都,十邑之中無『鄭』名,又皆國小, 故《序》每篇言衛,明是衛詩。 土風不異,不似邶鄘之地大 身已歸衛 并邶鄘分爲三國,鄭并十邑不分之者 爲《衛》,則漕邑鄘 假云作之邶鄘地者爲《邶》、《鄘》,作之 泉水衛地 陳音好巫,豈仍曰大皞之音? 衛音。 非 復宋婦,其詩 ',而《邶》曰 『毖彼泉水』,又何 齊音敖辟,豈 雖分從邶鄘,其實衛也, 地,而《邶》曰『土國城 一。程氏以爲從其所 朱子以爲其聲之異 不 與衛同,又先有 必 且邶鄘 鄘之音異於衛 猶 親 仍 唐實是晉 作 F

人作矣。

時,

衛國

政衰,變風始作。

康

叔

七世

··, 故

在 衛

從其國本而

既

爽

鳩之

此易知

?

又 謂 繫 其 國 名 是太 史 書 法, 猶《

也 秋》楚既 或 滅 陳,復書『陳災』,穀梁子所 謂 春

則齊秦所并不一,將奚書之? 且太 了存

史采詩,其職 不過輯民風、審善敗耳,詎 事 書

法 ? 即 有 書 法 一, 亦 偶 一見之, 詎必《 魏》、

《唐》、《鄭》、《檜》畢情

如

(是?

竊臆「邶」「鄘」

諸名即樂部名也。 周初列國不一,采詩者各

判其國詩,授之樂官。 則樂官必預班國名,

考按樂部,然後以列國詩分入之。 雖列國代

有興絶,其樂部班名若故也。 後比 遇 詩 名

,浸假於本部過繁,仍得入之其國 此但因之作標識耳,故無深旨也 所 兼 如 之

《樂記》曰:『《商》者,五帝之遺聲也,商 人識

之,故謂之《商》;《齊》者,三代之遺聲也 人識之,故謂之《齊》。』其曰『識』,正以 當 時 齊

故有商齊遺 聲,而其後之爲《商》、《齊》 者取

識

識者、記也、謂記其名也。

觀

此

則

即

取舊部之名,更無此理。 立説者,仍不外乎以音爲本。 邶》、《鄘 * 可 曉 矣。」 毛 氏 且謂 所 駮 若非 邶 甚 鄘 辨 本 以 周 音 而 初 而 其 自 列 仴

或 「舊有詩而亡之,則 康 叔 已兼 邶 鄘 周 初

聞此國,無據之言,尤不足信矣。 顧氏《日 知

録》 據《左傳》季 札觀 周樂,爲之歌 邶

《鄘》、《衛》,曰:「吾聞衛康叔、武公之德 是,是其《衛風》乎。 北宫文子引《衛詩》 如 H

『威儀棣棣,不可選也』。 此詩今爲《邶》之首

篇,乃不曰《邶》 侕 日《 衛》,知累言之則

猶之言

『商』而曰『殷商』,言『楚』而 曰『荆楚』云爾。

某篇爲《鄘》分自漢儒,非 陸陸堂、陳見復皆同其説,直以某篇爲《邶 復孔門舊次。 不 知

《漢志》云《邶》、《鄘》、《衛》同風,故編 詩 以 類

謂。 相次,而 如《左傳》「爲之歌《周南》、《召南》」, 入樂亦 以 部 相 從 必 非累言、單言之

74

之故

一,而

於衛詩

説

亦迂

闊

無味。

區

一别觀之,則當

美詩居多

),所謂

知

時

政。

凡

有

所

氏遠

曰 :

古

各從

得

至其

所

得

之

地

史家

依

其所

》,所謂《

風》十篇,則中興

要而

論之,究當以

其

地

名錯

出者

則

正

義云:「三國境

相

連

接

0

酈注《水經》,於《邶》、《鄘》亦稱《衛詩》,便文 地言者,而《詩》中所指之地 一美詩,疑是著其召禍之本。 ::「以聲言者,古音既不可考。 分爲三者,漢儒之譌 未分《邶》、《鄘》之前乎? 如《序》於每篇皆言「衛 文子以《邶》爲《衛》,則 時 康叔、武公之德,於斯可 之繫《邶》、《 之詩在焉。 且是《邶》、《鄘 按: 不 鄭箋從其 分第之義,或有取 ·分某篇 《邶 風》十 《衛風》十篇 國本之説 互見錯陳,難 爲 鄘》 | 周 》、《衛》分次 仍 九篇 則漢 》,某篇 無 爾 當 爲 心此 歷 耳 儒 曲三 《虞 え。 見。 當。 也 則 鄘 志 以 以 又 爲 詩之地 者陳詩 城也。 作,采詩、典樂者不敢增損。 稱 與夫命地之名,本諸詩 擬作,非必自爲。 者,亦有事在 氏《廣義》曰:「《詩》有作於 地,●作爲自歌其土也。」此疏足爲 故《邶》曰 水瀰瀰」,宣公築臺之處也。 在鄘也。 『淇』也。 上矣」,《衛》曰『瞻彼淇奥』,是以三國 無敢 而 『思須與漕』,衛女所 以 稍易。 二亦流 繫之。』其説 觀 戴公東徙 而《邶》曰『土國 民 鄘 其所 風,審樂 地 於淇」,《 劉 而 渡河 謂 邶 氏瑾云:『太師 是 《邶》、《鄘 人之言, 人詠之者,况《詩》多 以 也。」張 鄘 野野 城漕」,國人所築之

衛

而

鄘

人傳之

通

論

經之邑也。

河河

此詩

人本述其

處漕邑,

則

漕

地

淫亂

無

區界。

若謂

何故誤分之也?

東學詩》曰

言之,豈尚在

《召》乎?

北

宫

亦合言之,豈

可

謂

》曰『送

~我

乎

淇

之

皆

國皆係衛

詩,正

阮校本《毛詩正 義》作「事」。

者,係之王城。夫子不容改竄於其間也。」此 鄘、衛者,係之《邶》、《鄘 國爲漢,西羌 者,不過 二説足以補箋疏之所未備 從民言之便熟者記之。 稱 中 或 爲 唐之義耳。 》、《衛》,得之王城 若單于 得之邶、 稱 中

邶

柏舟

此 此 耿 林 衛宣姜自誓所作」。 詩 》,王氏《詩 寤 用《序》義也。 「我心匪石」四句,胡 屯之乾》云:「汎汎柏舟,流行不休。 寐,公懷大憂。 《序》云:「《柏舟》,言仁而不遇也。」《易 考》又引 《列 仁不 女傳 今李氏《集解》無此語。 李迂 · 逢 仲説 氏 衛 時 一桂 宣夫人 退隱 以 以 韓 窮居。」 八傳》引 爲 詩 考衛 《魯 尝云 耿

子《詩傳序》成於淳熙四年、《孟子集注序》作 案"朱子作《孟子集注 爲證,然不全用其説 信乎?』《稽古編》曰:「朱子雖引《列 心知其非,特欲借之以助己排《序》耳。」承 也、《列女傳》之説 群,亦足愠也。』正合毛《序》之意。 夫一劉 庸 『憂心悄悄,愠于群小』,而繼之曰: 『小人成 出 時爲鑿空附 爲婦人不得於夫而作,又極詆《序》語頃公之 舟》,見匹夫執志之不可易。」定以 子》所載孔子讀《柏舟》語,《孔叢》云:「吾於《柏 門君死之事,更無可 之宣姜,乃《鶉 朱氏《通義》曰:「朱子取《列女傳》,以此詩 劉 非鑿空附會乎?」馬貴與云:「《列女傳 向 ,向上封事 會。 奔》 然宣公夫人事,經史未見, 論弘、顯傾陷正 可信,而封事之説獨 所 考。 而 刺 》仍用《序》説。 疑 此 故 爲 外 爲 嚴華 莊 别 非 姜詩。 無宣 婦人之詩 谷據《孔 人,引是詩 姜。 女傳 考朱 蓋 不 珙 向 亦 口 城

中,似 訟篇》云:「貞女不貳心以數變,故有『匪石』之詩。」此 見勝於張學龍、朱善輩多矣。王符《潛夫論・斷 且合從毛氏古説,以仁人不遇爲主。」此其所 於淳熙十六年,則是晚 (黄氏 列女傳》説耳。 與 日 鈔》 經文合,初不 Ĕ 非别有所據,以爲婦人之詩 舟》之詩 見所謂『堅守』之意。 年定論 ,説汎然流 仍從古《序 也 亦用 水

之作。 篇。 見此 化。 事?」黄元吉曰:「胡 巢》反對,而 人之詩,乃與《關 在進賢,故《卷耳》、《兔罝》諸詩皆求賢得 (古義》曰:「章首言飲 所以首 詩 朱氏公遷曰: 《邶》不 爲 至《騶虞》而官備矣,故二《南》以 婦 |變風 尊賢,變風 處變以常,不愧於后妃、夫人之 人之作耳。 而 雎 「《柏舟》與《關雎 繼二《南》也。」此 一》、《鵲 桂 始作,何必定以 酒遨遊,此豈婦 承珙案: 據『不能 巢》 對 乎? 《關 奮飛」句 欲 **∀**, 雎》 爲婦 之終 人之 何氏 大 人 憂 以 鵲

> 之誤。 邪?」以 從 衛往訴。 以爲莊姜詩,則莊姜係 哉。」秦氏震宇《詩測》曰: 句,必同姓之臣所作,《序》説恐不可易。 心』,莊姜之温厚 知爲婦人詩。 而終,豈可自飛。 上三説,皆足正《集傳》以 且. 婦人三從,即往訴之,意欲 今正 和平 以 如此 此 而『我思古人,實獲 齊東宫之妹,安能 句 「玩『亦有兄弟』二 知非 焉 得生欲飛之念 莊 姜詩,婦 爲 婦 何 爲 自 我 人

辭 林 訓 **儆儆,不安也」,則兼** 寐貌也。」正用毛義。《 逸注《楚辭·遠游》篇 ··· 説 》 注 明」者、《説文》: 耿耿不寐」,傳: 耿、光也。」故此詩「耿耿不寐」、《楚 叭, 作炯。」 經傳義並 「耿,從 日 耿 廣 雅 「耿 耿, 耳,炯省聲。 釋訓 釋之。 耿 猶 儆 猶做 儆 》「耿 「耿」又 也 微,不 。 王 耿、

「我心匪鑒,不可以茹」,傳:「鑒,所以

察形,但 我 形 心 也 匪 石 茹 四句 度 文義 也 0 正 承 同。 珙 案 鄭箋云:「鑒之 此 句 與 下

明,可 至往 謗,信 而 人度而 貫,殊費周 云: 轉、席可 美惡皆在其心,不見其色也。 不能容物,與下文「亦有 此二語。故嚴《緝》最取歐説。 兼容善惡。 是則謂 如是鑒。 納」,謂 「莫能以己之皭 由表以度其裏,我心不能披露於人,使 知之。 而逢其怒。 見疑 卷意義 知方圓白黑,不能度其真僞,我心非 鑒納影在 我於衆人之善惡外内,心度知之。」 不可度而 折。 此 雖 所謂人藏其心,不可測度 於文例 兩 惟訓「茹」爲「度」,言鑒之分 有兄弟,而 岐。 内,不擇妍醜,我心不能 即《離騷》所云「女嬃之嬋 皭 心可度矣,與下傳石 歐陽《本義》訓 似合。 ,容人之混污。」 兄弟」四 示 此所 韓 可 然第自言其 句 以 由 詩 語 據 忠 外 「茹」爲 意 即 上,且 也; 而 傳》 引 獲 不 可

> 多 兮,孰云察予之中情」也。 媛 · 玁狁匪茹」、「來咨來茹」,作「度」字解者 公兮, ,從毛爲是。 申 申 其 晋子」, 而 繼 之日 《詩》中「茹」 衆 不 可 」字,如 户 甚 説

《吕記》引范氏曰:「此公侯之臣也,僚類皆 其兄弟耳。」 弟」爲君,「彼」即「彼其君」,於義 弟。]其不以「兄弟」爲君可知。 孔疏乃指「兄 弟」爲君。至「逢彼之怒」傳云:「彼,彼兄 兄弟之道,謂同 亦有兄弟,不可以據」,箋云:「責之以 姓臣 也。」鄭 並未嘗明指「兄 不順。

『宜』,不知者改『宜』字作『威儀』。 儼然可畏,禮容 『威』也,『禮容俯仰,各 云: 儀 「此言『君子望之儼然 也。」《校勘 威儀棣棣,不可選也」,傳:「君子 俯 記 仰, **>** 云: 各有 有 正 宜 可 威 義 耳, 畏, 儀 本 耳。 於是 傳 解 解 經 此 文 經 正 望之 作 之 之 傳 義

一愬

其説非是。 其説非是。 其説非是。 其就非是。 其就非是。 其就非是。 其识『崔』之文,不當改爲「各有宜」。 文子「皆有威儀」之文,不當改爲「各有宜」。 文子「皆有威儀」之文,不當改爲「各有宜」。 文子「皆有威儀」之文,不當改爲「各有宜」。 文子「皆有威儀」之文,不當改爲「各有宜」。 文子「皆有威儀」之文,不當改爲「各有宜」。 文子「皆有威儀」之文,不當改爲「各有宜」。 文子「皆有威儀」之文,不當改爲「各有宜」。

義合。 選也。」王氏《詩異字考》作「不可算也」,云出 傳》注載《絶交論》略引詩:「威儀棣棣,不可 《左傳》昭元年。「弗去懼選」可證,不 爲「算」之假借。 經》曰:「棣棣,富也。不可選,衆也。」與毛 不可數也。」《釋文》:「數,色主反。」賈誼《容 朱穆傳》注,蓋所見本異耳。 選」爲「算」也。 毛傳:「棣棣,富而閑習也。 段氏據《漢書》引《詩》作「算」,謂「選」 又案:今本《後漢 不知「選」亦可訓「數」,如 物有其容, 書 ·必改 朱 穆

憂心悄悄,愠于群小」,傳:「愠,怒

云: 『愠,恚。』正義云: 『《説文》:愠,怨也。 人聚而非議賢者也。」據此,趙亦訓 云:「憂心悄悄 怨也」,亦其一證。」承珙案:趙岐注《孟子》 恚,怒也。 也」,正義本『怒』字當是『怨』字。《縣》傳 也。」《校勘記》云:「《釋文》本 仁人憂心悄悄然,而怨此群小人在 也。」《釋文》「愠」下云「怒也」。 怨」,知正義本是也。 有怨必怒之。」所引《説文》作「愠 ,憂在心也。 愠于群 正 此 義 於君 傳 小,怨小 「愠」爲 云:「言 作 側

誅潘· 子者,皆異世同心,不可不誅也。《詩》曰: 小」。《荀子・宥坐篇》歷 是以「愠」屬「仁人」,故孔 於上章云:「言己德備 愠仁人、《吕記》、嚴《緝》皆從其説。 止、周公誅管蔡云云,而終之曰:「此七 又案:「愠于群小」,歐陽《本義》謂 而 一敘湯 疏 不 遇 謂仁人「怨此群 一,所以 誅尹 諧、文王 考鄭箋 愠 也。 小人

當作見愠 也。」本此。 矣。」劉 悄 向 于群小也 上封 此皆以「愠」爲「愠此小人」,自不 愠 于 事 群 云: 小。一小 「小人 人 成群,亦 成 群 斯 足 足 愠 憂

象也。 我之憂思。」此 常而微,言日月至明,胡常有 作「臷」云:「臷,常也。」范氏《詩瀋》云:「胡 食,與此别。」承珙案:《釋文》引《韓詩》「迭」 虧傷也。 常明如日, 傷者、《十月之交》『彼月而微,此日 人,大臣專恣,則日如月然。」 疏云:「微謂 云·『微,謂不明也。』以爲日月之食。 微」字與《十月之交》「微」字異義,非 微』非食者,以經責日云何迭 日居月諸,胡迭而微」,箋云: 月,臣象也。 彼《十月之交》陳食事,故『微』謂 而 解頗直 月有虧盈。 微, 截 謂 疏 今君失道 虧 曲 時而微,不照見 傷 而微,故知 爲 也。 附 而微」箋 而任 也。 日 君道 知此 以 君 謂 此 虧 小

恩云:「女,毛如字。」承

珙案:毛意

謂絲爲

緑衣

得服,安見緣衣以喻妾,而黄又以喻嫡乎? 下,衆妾以次服之,是「黄」與「黑」皆媵妾所 可 ? 爲確當。疏曲 下,詩「宜因其所 毛傳:「緑,間色。 誤爲「褖」者不同。鄭學深於三禮,往往以 篇名《緑衣》,從毛爲是。此與《内司服》「緑」 此或見《齊》《魯詩》,今不可考矣。 「緑衣」以爲 禮》箋《詩》,所謂 **褖』,轉作『緑』,字之誤也。」惠氏《古義》曰,** 如必 緑兮絲兮,女所治兮」,《釋文》引 緑 衣」,箋云:「緑,當爲 謂宜舉所有之物, 喻」。 .附箋義,以「禒衣」爲「六服」之 有之服而言,不宜舉實無之 「按跡 夫詩人託興之辭,何所不 黄,正色。」以喻嫡妾,甚 而議性情」者,以 則箋云鞠 『褖』。 承珙案: 衣以 故作 崔 此

用正 《集傳》「女」指君子,且云:「言緑方爲絲,而 於人 也。 上二 黄 子,故知毛義爲長 者。」專以「上僭」責「妾」,似非探本之論。 手之所治,喻以妾而開上僭之端,亦當 也。」蓋謂 女又治之,以比妾方少艾,而女又嬖之。] 此 女子之所 則 、君之所致,所 黄。 句同是興體,此 義述毛之語,殊失毛意。 鄭讀「女」爲「汝」,云:「女,女妾上僭 今以 素絲 治耳。 絲 由 而 於所染,染之蒼則蒼 傳云:「緑,末也。 以 爲間 章 思古人 色之緑,將歸 第二句不應直斥君 而欲 况此詩四 俾其 過 絲,本 染之 無 於 歸 章 , 過 過 女

如自 其難 好《怨歌 日 :「絺綌乃來風之物,袗絺 矣。 脩」也。 絺兮綌兮, 行》所謂 故古語 或 以 『常恐秋節 云『禦寒莫 凄其 此 章 喻 以 風」,何 己之過 至,凉飈 如 綌 重 以 時,猶 裘,止 禦風 氏 冷古 奪炎熱」 吾 班 謗 義 婕 知

其於義末矣。」
者,雖摹情近似,然斤斤以色之盛衰爲較量

疾其 則 章。」古人雖有斷 母欲室文伯,享其 年。「季文子如宋致女,復命。 無 己 姜賦《緑衣》之卒章。 承珙案:《詩序》三言「莊姜傷己」,但 而 不怒。 此詩其必無忿疾怨恨之意可知矣。 怨於人,最得詩人忠厚之意。 無德以致之。」陳氏櫟云:「不得於夫 (妾,惟思古以自修其身。 《吕記》引程 孔子謂『詩可以怨』,其此類也 章 氏 家 取 曰 《魯語》:「公父文伯之 老,而 義者,然歌《詩》必類 : 「《 緑 賦 衣》,衛 憂而 《緑衣》之三 公享之」,穆 《左傳》成 不傷,怨 傷 莊 夫。」 姜 己 而 而 傷 九

燕燕

姜氏《廣義》曰:「説者謂陳方與州吁伐鄭,《序》云:「《燕燕》,衛莊姜送歸妾也。」

難以 嫠婦 哭,况桓公在位十六年,未聞失德。 心。 討 己憤,盡己情。』國當大變,莊姜自有深心,固 送迎不出門,於野,則越禮遠送。 送助之,無關詩之作與不作也。 擊其身弑母 送之 賊 中 角有同 尋常迎送律之。」 穆姜 郊門 後,乃 變執之,此 啼 訣 追 歸, 心,不待作詩也。 而 别,未嘗不足以 述之詞。 晉靈不廢,出姜過 則州 詩 動之也。 吁之未能 若戴 按: 嬀 動 然當時榮 與 和其民 舊 又《禮》婦 此詩作 莊 箋云:『舒 而 臣 姜 國人 故 魯 人皆 老之 或 其 於既 目 此 於 人

之思,以勖寡人」,「勖」作「畜」。 詞 爲「孝」,言「獻公當思先君定公,以孝於寡 珙案:是時定公尚 無 子, 亦不類送婦之作。 此 畢三年之喪而歸,定姜送之而作。 詩、《列女傳》以 在 《禮記 ,不得稱「先君」, 爲衛定姜子死,其 ・坊記》引「 鄭注以「畜」 「先君 且 其 承 婦

> 信 歸園。 適合。 漢書 詔 焉。」此 典分歸外園 學,故多用三家詩耳。 據此,是鄭爲《記注》時,並非不見《毛詩》,但其 宜。 人。 送于南」爲陳在衛南之證,且與《左傳》情 惟《毛詩序》「莊姜送歸妾」之言,有經文「遠 衣》引《都人士》首章鄭注云:「此詩毛氏有之,三家則 君,先師亦然。 定姜歸其娣、送之而作」。 也 策 然《記注》已行,不復改之。」案:《禮記 已 《鄭志》答炅模云: 太后 和熹鄧皇后紀》: 左證明白 用 時三家盛 其 ,慘結增歎、《燕燕》之詩,曷能 賜周、馮貴人策曰:『今當以 義。 後乃得毛公傳 如此,豈尚不可 李迂 蓋 行,《毛詩》並未立學官,然 其 仲又引《韓詩》,以 授受有 和 「爲《記注》時 帝 其説更不足信 ,既古書 葬後,宫人並 自, 信邪? 故 時 足 未爲毛 就 義 《後 無。 取 舊 喻 又 盧

燕燕于飛」,傳:「燕燕, 鳦也。」《爾

見,而

語

適合,

此

詩

漢

書》『燕燕尾

涎

涎』是

也。

蛩』、『猩猩』、『狒狒』之類。

其雙飛往來,遂以雙聲名之,若『周周』、『蛩 以「燕燕」爲「鳦」,仍與毛傳同。 讀《説文》,以「巂周」爲「子巂」。 人聞子傷鳴,皆起曰:是望帝 「鳦鳥本名『燕燕』,不名『燕』,以 《爾雅》不言「子傷」,郭 燕之髀。」此燕名巂周之證。」 及《釋鳥》『燕燕、鳦』 》「燕髀腥脣」,李云:《吕氏 住, 中象其冠 名燕 慙亡去, 餘書省其文,多 最古之書凡三 「巂周」 「鳦」合。 、燕,句。 句。」 姚氏《詩 雖誤,其 爲子 孫 與「子 也, 又名 景純 也。 炎 巂 識 與 説 冏 日 春 之,覆以玉筐。 可據。 單言之。不知單言『燕』者乃鳥名。 下」者,皆狀一 送者爲二人。 飛。』實始作爲北音。」此文既云「令燕往 北飛,遂不反。二女作歌,一 令燕往視之,鳴若『謚隘』。 有二佚女,爲之九成之臺,飲食必以鼓。 異方語也。」《吕氏春秋·音初》篇:「有娀 傳正義》云:「或單 之説者、皆非也。」承珙案:此説 《漢書 云『燕,白脰烏』,《小爾雅》謂之『燕烏』,鑿 燕 燕遺二卵」,皆單言「燕」,而歌又曰「燕燕」。 王孫死,燕啄矢」,足見其可名「燕」,亦 燕」矣。 五行志》童謡「燕燕尾涎涎」,下又云 則舊 或謂 以 不 燕之言。 『燕燕』爲『兩燕』,及曲爲 少選,發而 知傳所 「燕燕」爲 呼『燕』,或重名『 鄭箋於「差池」、「 謂「飛而 兩 視之,燕遺 終曰:『燕 鳥 二女愛 以 亦泥。 上」、「飛 喻行 而 《釋 燕

鳥。

故蜀

曰 :

蜀王望帝

媱

其

相妻,

 $\stackrel{>}{\exists}$

「肉之美者、傷

段注:

「《文選

七命

「巂周,

燕

也。

从

雅

「巂

周

句。

燕

燕,句。

鳦。

鳦。 」 此正

與

傳

訓「燕

燕

爲

别三名」,舍人

曰:「雟周

誤

解》曰

巂」,異物同

名。

許云「一曰」者,乃别

一義。

可名

者

與

而

二卵

視し、

燕往

争

搏

帝

氏

燕

重

然

鳥

《 左

雉》亦言「下上其音」,又豈得爲兩雉邪?頑」、「下上」皆言「興戴嬀」者是也。試觀《雄

傳云:「飛而上曰上音,飛而 善曰:『頡胻,猶頡頏 楊雄《甘泉賦》『柴虒參差,魚頡 飛而上曰頏。』轉寫互譌久矣。『頡』與『頁』 鳥戾天,亦可證頡下、頏上矣。」承珙案:段 之引申爲高也,故曰『頏之』,古本當作『亢 同音,頁古文『鮨』,飛而下如鮨首然,故 上下也。』皆以《毛詩》『頡頏』爲訓。 曰頏。」《説文》段注云:「當作『飛而 二章「下上其音」,即承此下頡、上頏言之。 人云:「亢,鳥 『頡之』,古本當作『頁之』。 也。 於音尋義,斷 頡之頏之」,傳:「飛而上曰頡,飛而下 爾 雅 高飛 》:「亢,鳥嚨。」《釋文》引 也。」此可爲段説之一證。 無『飛 也。」師古曰:『頡 而下曰 頏即『亢』字, 亢 下曰下音。」此 而鳥胻』,李 頏』者。 魚潛 下 日 淵 胻, 頡 E

蓋小謂下、大謂上,皆依經釋義,不宜倒亂。《校勘記》以《雄雉》箋亦作「小大」爲證是也。今本誤作「大小」,惟小字本、相臺本不誤。上其音,興戴嬀將歸,言語感激,聲有小大。」亦轉寫譌倒,傳當依經釋之。如箋云:「下亦轉寫譌倒,傳當依經釋之。如箋云:「下

『將行之送。』是『將』亦行之義,故爲行也。」頌》正義云:「《釋言》『將,送也』,孫炎云:毛傳多訓「將」爲「行」,蓋於疊韻取義。《周之」爲言,此以戴嬀有行,故以「行」訓「將」。《周第、百兩將之」,傳:「將,送也。」 後對「御樂」「遠于將之」,傳:「將,行也。」案:《鵲

「塞」之爲「實」,訓義易明,定本作「瘞」者,蓋正義亦引毛傳訓「塞」爲「實」。 承珙案:溼,俗本作實。」其衍傳文云:「其心誠實而瘞,俗本作實。」其衍傳文云:「其心誠實而經,崔《集注》本作實。」正義云:「定本作

滿。 充實 者,狀其心之静深。 《方言》:「厭塞,安也。」《廣雅》:「厭恶,安 也。」王褒《洞 也。」是「塞」與「寒」通。 義亦當如是。 以「塞」爲「悉」之假借,「瘞」乃「瘱」之假借。 厭悉」義同,故「悉」亦可訓「瘱」。 此與毛異義,不必定以俗本爲長。 也。」於《常武》「王猷 簫賦》: 鄭箋於《定之方中》云: 《鄘風》「秉心塞淵 「清静厭瘱。」「厭瘱 《説 允塞」云:「自 文》: 「瘱 蓋 塞, 塞 」,傳 實 淵 與 静

日 月

因前《燕燕》是莊公殁後之詩,故於此 姜傷己也」。 詩及《緑衣》、《終風》,《序》首句皆止云「衛 「不見答於先君」之語,後儒遂有以「乃如 人」爲指州吁者。 序》云:「《 《詩》經秦火後,倒亂失次,經 日 月》,衛莊姜傷 毛傳於「逝不相好」云 己也。」此 增 之 莊 師 人

「乃如之人兮,德音無良」,傳:「音,聲。而不得報」,則斷非莊公殁後追述既往之辭。而不得報」,則斷非莊公殁後追述既往之辭。

爲聲 德有 詞; 《詩》,或指名譽,或指號令,或指語言。」嚴華 過 《邶·谷風》『德音莫違』,皆婦人言其夫待己 曰:「德音也 以「瑕」爲「過」。此詩「德音」而曰「無良」,所 之意耳,故爲聲音言語。」承珙案: 德音 谷曰:「德音,言語也。 有德之音,如《豳風》「德音」而曰「不瑕」,鄭箋 良,善也。」《稽古編》曰:「『德音』 屢見於 工其聲者也。」此雖指號令聲名,然但以 無良,醜其實。」殊屬强解。《鶡 ,與毛傳但以「音」爲聲,不更詁「德」字 凶有 吉也。 者,所謂 《集傳》云: 聲 也。 此詩『德音無 未 「德音,美其 有 音出 冠子》 良」及 徳音 非 而 謂 心

二六

者合。

「俾也可忘」、《毛詩明辨録》云:「言何無良」。若《陸堂詩學》謂「也」疑「我」字之無良解。諸家解以爲莊公忘莊姜,莊姜忘莊 其亡」之意。箋云:「亡之言忘也。」不必云「忘其無良解。諸家解以爲莊公忘莊姜,莊姜忘莊 無良」。若《陸堂詩學》謂「也」疑「我」字之 無良了。若《陸堂詩學》謂「也」疑「我」字之 調,則又可不必。

義》「術省」,鄭氏云:「術當爲述,聲之誤也。」翁氏《詩、歌、古文,醉夫子訓爲『法』,非也。《士喪禮》我不術」,薛君曰:『術,法也。』案:術,古文、述,亦作術。《文選》注引《韓詩》曰『報文》:述,亦作術。《文選》注引《韓詩》曰『報表不述」,傳:「述,循也。」箋云:「報我不述」,傳:「述,循也。」箋云:「報我不述」,傳:「述,循也。」箋云:

相合。 以 禮,「禮」即所謂「古處」也。 與?」承珙案:首章云不以古道相處,次章 用。 『不可稱述』爲訓,則是『術』可通 『述』,而 箋以「循禮」爲「述」字訓義,正與薛君訓 [法] 『述』不可通『術』矣。 云盡婦道而不得報,此則云雖報我 追厥功』及《隸釋》諸碑,『術』與『述』古字通 附記》曰:「高郵宋綿初亦引賈山《至言》『術 傳箋爲是。 案『術』『述』二字古既通用,則毛傳、鄭 而《吕記》、嚴《緝》乃引朱子初説,以 惠氏駁薛君注,毋乃 文意相承 而 自 不 循 當 渦

終風

作於州吁之時,或者以爲作於莊公之時,且衛莊姜傷己,不言爲何時詩也。《後序》以爲《緝》云:「國史題《日月》、《終風》二詩,止云《序》云:「《終風》,衛莊姜傷己也。」嚴

正。

然非

:婦

(所能

己者,傷己之不能

IE.

州

吁耳。

正之維

何

聲其

弑

逆之罪,告於國人而誅之,

則

所指,曰:《序》不云乎?

『莊姜傷己也

願」,鄭云:「願,思也。」皆非指州吁也。

然則

自致其卷卷乎?

莊姜安得以子道畜之。

浪笑敖』,侮慢其

嫡母,彼不以母道

事莊

嘗以之爲君,莊姜安得以之爲子。

之,甚至憂而不寐,望其思我母子之情,卷卷 故凡經文言『悼』言『思』言 及已,故受其侮笑不敢怒 母子之情絶久矣,何 此言非是。州吁 况其『謔 己,己 。』傷 人未 姜, 甚 ? 何 謂 詩 思 然 姜,何 猶在 《序》,作思念州吁者,於理未安。長發此解 百計 篡奪之心 多禍而已。安得反結歡於篡弒之人,欲與敘 二母保護之功耳。 合。」姜氏《廣義》曰:「州吁,嬖人之子,素有 善申《序》旨,且於《左傳》『莊姜惡之』語 朱氏《通義》曰:「作思 母子之情哉? 莊姜所憤者,亂賊之横行,所悲者,宗社之 寐,且念不得伸,如行而躓;心之痛 國家之禍至此,豈能已於思乎? 而 章之意也。 也,悼之已耳。 傷。毛訓「懷」爲「傷」。 祕 扶植之嗣子, 絶脰 以爲情。 不發喪,棄之如孤 ,而桓得以不廢者,外有石碏,内有 下章又言其憂悼之情,至 諸 果爾,則夫子不録其 至『莫往莫來』,若可幸矣, 儒 乃一旦以平日從憂 説 皆承上章言也。 於仇 此篇 念莊 雞腐鼠 則 人之手,况 公者,既 日 此 州 切,如 首章、次 賢 詩 吁 不合 危 然 不 如 帷 矣。」 雖 甚 莊 無 堂 中 則 能 割

弑君

篡國,阻

兵安忍,是衛之賊也。

衛

不已,所以爲温柔敦厚也。

莊姜不忘州

吁,見侮慢則悼之,莫往來

則

矣。」陳氏《稽古編》曰:「説《終風》詩者,

亦不得以

母

道

往

加之。」是毛公以

爲州吁

「莫往莫來」傳云: 『人無子道以

來事

後序》有毛公所不及見者,固

不

可

盡

據。

一二八

爲戴 故 禮 珙案: 此説與陳意略同,而語較 則《序》言「傷己」者,傷己之不能 傳箋俱指州吁之時,不得移置莊公之世。」然 之也。」「顧聖人手定編次,何 ൬ ,莊姜 自 認 賊 嚏。 嬀 冷齒 作子,保若嬰兒,作詩招之使來,其不 猶 嗟 思之也。 乎! 幾何矣? 是莊 又曰 此朱子所以深惡 姜忘 ,我思於此 不 遽知爲錯 ·共戴 痛 討 快 賊也。 天之讎 ,彼或無 而 簡 承 削

安在 禮 聞 之來 展 疾之發於行事者,既 觀之,其説似矣。但『謔浪笑敖』,即狂 婦之情,無母子之意。 衣 坐 如 致 其不忍斥言乎? 朝 莊 而 許氏伯 其 君之來也。 朝 姜, 母則可; 進御當夕則適君寢,鳴玉告去,未 肯以 政《詩深》曰:「朱子辨 爲 若夫人之於君,以 分誼 如謂宫車 擬諸形容,又敷陳其事 僅就『莫往莫來』二語 且『惠然肯來』,謂子 應 爾 亦 而 有 日 時 此 **臨幸**,守 禮 詩 惠 蕩 見 有 然 暴 則 夫

> 《詩深》又曰:「漢廷臣詣奏昌邑之罪於太后 乎? 薨子弑,國靡有定,『悠悠我思,不遑假寐』, 愁苦之深情見乎詞矣。」 所以詰昌邑者亦相仿也。 亂如是邪?』此云『謔 昭宫人蒙等淫亂。 前,斥其引納騶宰官奴居禁闥内 憂,感念存殁,心焉 后 州吁之狂暴,而 公之世,則此 批 」承 桓 温 珙案: 廢 立 詩直 詔 以「莫往莫來」等語 思念憂傷皆關宗社。 曰:「未亡人不幸 不過《長門 太后曰:『爲人臣子 如 浪笑敖」,大略 割。」與此詩意 莊姜值此,念及君 賦 敖戲 耳 遂 與 罹 晉褚 指 與異孝 正 當 太后 此 惟 爲 同 百 太 莊 因

《燕燕》 非 風』、《韓詩》『終風,西風 氏《經義述聞》曰:「《毛詩》『終 經文本義。 終風 曰『終温 且暴」,傳:「終 終, 且 猶既 惠」、《北門》 也, 也」,此皆緣辭 日 言既 風 風 爲 日 風 終風。」王 『終窶且 爲『終日 且 生訓 暴 也

釋耳。 殊不相涉。 皆失之。」承珙案:《王風 疑本作「泰風」,故韓依《爾雅》釋爲「西風」。 無考,然謂其「緣辭生訓」,則「終」之與「西」 日」言之。「終日風」本非風名,故《爾雅 不日者,謂不旋日而又曀也。鄭箋以「不日」爲 風」者,自由師説相承。 且三章「不日有曀」, 不知「終」有「既」訓。 弟」傳云:「兄弟之道已相遠矣。」是毛公非 爲『終』,猶『既盡』之『既』轉爲『終』耳。 曰:「既和且平。」《甫田》曰『終善且有』,《正月》 貧』、《小雅·伐木》曰『終和且平』,《商頌·那》 「不見日」,非是。説見下。 曰『終其永懷,又窘陰雨』,『終』字皆當訓 『既』。『既』『終』,語之轉。『既已』之『既』轉 説 文》:「兵,古文終。」又:「冬,古文作 至《韓詩》以「終風」爲「西風」,雖 竊嘗以意説之、《韓詩》「終風」, 此「終日」亦對下「不 而於「終風」必云「終日 • 葛藟》「終遠兄 解者 於古 · 》 無 爲

無足怪也。 無足怪也。

朝重華宫。 也。」承珙案:毛傳於「惠然肯來」云:「言時 自 有順心也。」《虞東學詩》謂如宋光宗間歲一 來,正欲其不來也。 此説當矣。 『肯,可也。 知爲臣民所不容,故有時亦欲託君母以自 「惠然肯來」,《稽古 此尚非其比類。 州吁安得有順心 有順心則可來,不欲見其戲謔。. 距之之詞 編》 州吁 時乎? 曰 「 ,非望之之詞 | 弑君 笺云: 篡國 言 口

●「篆作泰」、《列子釋文》作「音泰」。

以母 則嚴矣。 子道 道往加之。」此皆决絶之語,詞雖婉 事己」,故繼之曰「莫往莫來,悠悠 然即 傳云:「人無子道以來事己,己亦不 其 時 有 順 心 떼 來,亦不 得謂 其 而 . 得 我 以 意

者,言不旋日而又曀 「不日」。 日」。既曰「且曀」,是已不見日矣,何必 異,義實通也。 與毛字異。然天陰塵起,有風可 《詩》曰:『壇壇其陰。』」許從《韓詩》作「壇」, 曀。」全用《爾雅》文。 土部》:「遠,天陰塵《玉篇》「塵」下有「起」字。 《韓詩》:『壇壇其陰。』天陰塵也。」《説文・ 終風 不如《吕記》引王氏曰「不日有曀 且曀,不日 鄭箋以「不日」爲「曀 也。」 有曀」,傳:「陰 《詩考》引董氏 知。 訓 而 又云 不 雖 云: 風 也。 · 見 小 曰

又作疐,舊竹利反,又丁四反,又豬吏反,或「願言則嚔」、《釋文》:「疌,本又作啑,

《釋文》所據《毛詩》經文當作「願言則疌」,其 「疌」字。 當作「疐」,謂鄭以「嚏」解經之「疐」也。 字亂之。 「又作啑,《一切經音義》十五、十六引《詩》作「啑」。 鄭云:「言『我則嚔』,解經『言則 路與劫音義同也。定本《集注》並同。J又述 道往加,則嚔此「嚔」字亦當作「疐」。 作疐」者,所以存别本。「疌」即「疐」之或體 往加之,我則嚔正義「嚔」字當作「疐」,後人以箋「嚏」 伸,志倦則故。 『欠欠叔故』是也,不作『劫』字。 毓同。崔云:毛訓『疌』爲『��』,今俗人云 也,居業反。 竹 『鈌,欠張口也。』」正義述毛云:「願以母 狼跋》釋文云:「疐,本又作啑。」非《説文 季反, 路而不行。」又引王肅云:「『願 「啑」又「疌」之變體,六朝别字往往 劫 也 本又作路,音同。 鄭 作 嚏, 音都 也。」承珙案: 麗 又渠業反,孫 劫 嚏 』此「嚏」亦 反, 人體 《玉篇》: 而 止部》之 又云 不 倦 行。」 以 又 道 劫 母 則

也。 也; 所云《集注》作「赼」者又異,殊不可解。 王肅説「跲」乃作「劫」,故云「跲與劫音義 字,傳作「疐,跲也」,與《狼跋》傳同。其所引 傳則作「疌,汝也」,與王肅作「劫」、孫毓作 業反,孫毓同」,可見孫本作「跲」。臧玉林謂孫同王肅作 作「跲」,孫毓本亦作「跲」。觀《釋文》云「跲,又渠 經文爲「嚔」,不知始自何時。 曰:鄭云「疐」讀爲「嚔」,是箋《詩》時本尚作「疐」,其徑改 作「疐」。蘇林《漢書》注云:「疐讀欬嚏之嚏。」陳氏啟源 有之。其云「鄭作嚔」者,乃指箋讀「疐」爲 劫」,非也。至崔靈恩《集注》,經文亦作「疌」, 「嚔」言之。鄭雖以嚏咳義釋經,而經文自猶 路」者皆不同矣。正義所據經文本作「疐」 但其下云「定本、《集注》並同」,則與陸 則是同王肅本作「劫」。其别本「劫」又 陸所見傳文作「疌,劫 同

〈詩》曰:『願言則嚏。』」又云:「辵,即「欠」字。《説文》:「嚏,悟解气也。 从口,疐聲。

《素問》説『五氣所病腎爲欠、爲嚏』,亦分二 字。倘『嚏』即是『欠』,則《内則》、《素問》皆 不可通矣。至若《詩》『願言則疐』傳『跲也 『不敢嚏』,又云『不敢欠』,其爲二事憭然。 其字從口不從鼻故耳。殊不思《内則》既云 「噴」下一曰「鼓鼻」,而釋「嚏」爲「欠」,直以 『嚔』爲『悟解气』,蓋用毛説也。」又於「嚏」下 俗人「欠欠汰汰」是也。」●許説多宗毛,許釋 則疐」,崔《集注》云:『毛訓「疐」爲「坎」,今 俗文》曰:『張口運气謂之欠故。』《詩》『願言 張口气悟也。象气从人上出之形。〕段注《説 或作『劫』者,古字通假。 欠伸」,正義云:『志疲則欠,體疲則伸。』《通 文》於「欠」下云:「悟,覺也。 《曲禮》 『君子 云"「許説『嚔』義非是,不必曲徇。《説文》 崔《集注》乃改『劫

「人」,廣雅本作「云」。

《詩》作「疐」,傳訓「跲」,即不應以許釋「嚏, 改《毛詩》從鄭箋在陸孔之後。 陸孔,經皆不作『嚏』。 加者,臧玉林云「考王肅、孫毓、崔靈恩以至 解毛之『疐』也。 悟解气」者爲宗毛矣。其云許不當以「嚏」同 毛。」承珙案:段氏二注微相矛盾。 無『��』説、《唐石經》作『嚔』者,乃從鄭,非從 許在鄭前,安得從鄭易毛? 以附合許之『嚏』解,而不知許自 「欠」,則是。 人妄增者,是也。 〈詩》『願言則嚔』,汪氏龍《毛詩異義》以爲後 人鼻也。 人增入,非顧氏之舊。 風》、《開成石經》作『願言則嚏』,是 訓 《詩》曰:『願言則嚔。』疑引《詩》亦 以 而所云引《詩》作「嚏」爲後 俗 人「體 改『疐』爲『嚏』,自鄭君始。 學者可以知毛許於《詩》本 倦 而《五經文字》云『嚏』 則 然則《説文》此條, 伸 各本《説文》引 志 《玉篇》:嚏, 倦則故」, 解『嚏』,非 既以 人妄 蓋

殆爲唐人李陽冰輩竄改」者,是也。

與《序》不合。 **豈復有望其思己之意?** 猶止也。」 此謂不能 也。 鄭訓「願」爲「思」,「言」爲「我」,訓「懷」爲 耳。又崔《集注》『欠故』之説,余謂人多思之 言思及此則傷心也。 云「遭州吁之暴,見侮慢不能正」,鄭云:「正 末章云「女思我心,如是我則安也」。 極,輒至困倦。 州吁思我。鄭以俗人『道我』釋之,穿鑿之見 徒思之,不能行之。 與《狼跋》『疐尾』同是礙而不行之義。 「安」,於三章云「女思我心,如是我則嚏也」, 「懷」爲「傷」,正與《序》首句「莊姜傷己」合。 下章『願言則懷』,毛云:『懷,傷也。』蓋 陳氏《稽古編》曰: 崔義亦優。」承珙 止其 誅除亂 二語皆自道其思,非 「傳訓『疐』爲『跲』, 侮慢,自傷則有之, 箋兩言「思我」,亦 賊,原非婦 案 考《序》 傳訓 此言 人事

還; 謂。 持 宋之 諸 州 怨 不 鄭,推宋爲主。 漕』,考《春秋》閔二年戴公渡 用 馬 係 家皆以爲疑。 年文公又城楚邱,使漕既 久,如《詩》 其 吁 兵 必不 乎有 死 暴亂 事 勇 兩 以 序 敗鄭徒兵,取 次 諸 而 生 先 城 雖 無禮 <u>云</u>: 其 侯之兵伐鄭,以告於宋,無 契 使公孫 無 計 伐 俱 闊 所 城 也。」范氏《詩瀋》曰: 往 鄭 未曠 「平陳與宋」者,連合 之悲。 擊 姜氏 也。」先城 云 返之速。 有 文仲 鼓》, 也。 _, 其禾而 日持 炳 居 將 璋 且《詩 怨 韋 無 漕復 久,方其 而 曰: 如 州 還。 城,不城楚邱矣。 其 宫室即 平 河 是 吁 州 東門, 城楚邱 陳 而 一
一
一
一
十 亦未 也。 所 與 廬 吁 以 謂 宋, 「《左傳 于 踊 陳 嘗 平 衛 有 連 五. 之廬 漕 或 爲 躍 居 宋 陳 陳 或 曠 州 H 僖 遷 之 伐 處 用 城 與 日 而 人 吁

矣。 非 也。 敗 **珙案**: 邱,因利築城,度土 毛西 親 君所居,亦猶『越在草莽』云爾。 公復城楚邱,此云「城漕」,則非怨州吁詩, 吁阻兵而安忍。 前 邑』、《載馳序》曰『露于漕 心,死亡訣 都 漕,衛之下邑。 遷岐、遷豐、遷 鲄 創 離 州 計 難以 爲 且 爲 吁 曰『野』曰『露』者,正以下邑荒陋 河 也 此詩 疑。 是 州 之説。 死 何 邑,故鄭箋曰 吁 别 濟矣者,正 則漕之增修 是 至謂漕· 疑 之城 惟 在 爲 汪 出 州 《定之方中序》曰 聞 漕 阻 鎬 氏 軍之時,人 吁 未 愁歎之聲,即 建邦,猶之商 也 耳。 兵 梧 之詩?」 亦亦 城 不 無衆,安忍 與否 修 鳳 必 故 故 遂 猶 理 邑。 以 詩 云 戴公曰「廬」,文 浚 ,皆未可 漕 再舉伐 學 無 漕 以 洙 城」。 文公之築楚 衆 鬭 上 女 無 邑, 人五 無親 城 仲 志 『野 詩 城 爲 郎 定。 况未 則 鄭 所 瀋 之類 而 焉 遷、 處 非 未 衆 有 日 謂 有 非 幾 周 漕 嘗 或 城 不 叛 州 恕 承

詩

後箋卷

漕非州吁事也。」得據後『廬於漕』之文,而遂謂漕無城,謂城

待其 憂之。」此於詩旨最合。 宋」,則是初 家。」承珙案:詩詞「不我以歸」緊接「平陳 聞》亦云:「夏還而秋再舉,當是征夫不 夏而秋,僅隔 而 平陳與宋,之後即往伐鄭。 南 命,未得班師,故曰『不我以歸』也。」王氏《總 還矣,未幾魯暈 行,不與我歸期。」何氏《古義 (再舉。 「不我以歸」,箋云:「以,猶與也。 出 箋云:「兵,凶事 一時耳。 師 時已有死亡無日之憂,不必 帥 師 必師歸在途,又聞 來會,復往伐鄭。 既圍其東門五 ,懼不得歸,豫 **※** 日: 一先 得 與我 還 後 自 是 日 與

詩『爰居爰處』可通,至《斯干》『爰居爰處』,馬乎?」嚴《緝》曰:「此説,文意亦通。然此也。今於何居乎? 於何處乎? 於何喪其一「爰居爰處,爰喪其馬」,箋云:「爰,於

之意,嚴説是也。 之意,嚴説是也。 之意,嚴說是也。 「美麗語詞,並無「於何」之意,惟 大定之辭也。「爰」止訓『於」,今以爲皆發語 大定之辭也。「爰」止訓『於」,今以爲皆發語 之詞。」承珙案:傳云:「有不還者,有亡其 之意,嚴説是過歸」言何所適歸。蓋『其』者, 也意,嚴説是也。 之意,嚴說是也。

蓋契闊者,以雙聲爲義。《後漢書》傅毅《迪 雅》「九河有絜」,《禹貢》正義引李巡云: 曰:「削肌刻骨,挈挈勤思。」「挈」又作「絜」。 注》引作「挈挈寤歎」。《文選注》引《孝經 志詩》曰:「契闊 寤歎」,傳云:「契契,憂苦也。」王逸《楚 文》:「契,本亦作挈。」《小雅 「絜,言河水多山石,治之苦絜。 贈劉琨詩》: 「死生契闊」,傳:「契闊,勤苦也。」《 「契闊 夙夜,庶 百罹。」《 不 懈 風 大東》「契 忒。」盧子 俗通》:「妻 絜,苦也。」 鉤 命 **爾** 决 釋 契

釋文》引《韓

詩

契闊

,約束也。

盧

召

者,既 寒,契闊偕老。」此猶用毛義 言勤苦於兵旅。 **洽華野,綢繆顧託** 曰: 闊」爲「隔遠」,嚴《緝》并引《漢書》「間 十年,流離萬里」之類。 云:「長年之嫂,遇孩童之叔 人始有以「契闊」爲「間别」之意,如杜 中允聲名久,如今契闊深」,李商隱文「契闊 垂 證,誤矣。 戎旃,從容讌 行軍,契闊戎旃。」是六朝猶用此 阔 勔 隋 統 齊于己, 思 爲「勤 懷亮粹,體業淹明,宏勳 | | | | | 重,其 苦也。 通典》魏徵等《嫂叔服 以 故 語。」「契闊」與「從容」對,亦 隋煬帝《遺史祥書》:「於時 篤 養 ,契闊屯夷。』《齊書 含素 勤 舅 以 劬 至 姑 《宋書 「契闊」爲 場場 《集傳》因之,以「契 勞鞠養,情若所生,分飢 矣。」此正用 契闊 圃,奉筆兔 • 「勤 中 議 劉 苦」也 . 饋 》貞觀 義。 勔 樹 毛 經 謝 傳 何 園 績 + 甫 至 傳 理 四 $\stackrel{\cdot}{>}$ 闊 年。 唐 詩 契 朓 譽 詔 以 蠶 共 日: 棄也。 義。 《糸部》又曰:「絜,束也。」是絜括爲約束之 弓 曰:「臣與寶夤,周游契闊,言得 帝 書·蕭琛傳》梁高 契闊,繞腕雙跳脱。』《齊書• 云:「至於契闊杯酒 也。」「括,絜也。」麻一耑者,猶言一束也,故 詩》「闊」既作「括」,「契」疑當作「絜」,「絜」、 詩》作『闊』,《韓詩》作『括』。」承珙案:《 引薛君《韓詩章句》曰: 『括,約束也。』是《毛 「括」亦雙聲取義。 日 。雖云早契闊,乃自非同志。」《魏書·蘇湛傳》: 「死生絜括」,言死生相與約結,不 : 「聞卿答蕭寶夤,甚 其義 「李善注《文選》劉越

闊

同

織

契

閥談讌,心念舊恩。」梁昭明太子詩:「綢繆似河 漳 之罪也。」」又魏武帝《短歌行》:「越陌度阡,枉 濱。」江 淹 詩: 契 闊 承 華 内, 綢 繆 踰 歲 年。」 用相 此 曲 皆以 契闊等 存。 「契 契

致

·相

亦通。

後漢繁欽《定情篇》云:「何以

張敬兒傳》太祖《報沈攸之書

《説文》:「絜,麻一耑

石《答盧

諶

詩

韓

祖

在西邸與琛狎,琛奉陳昔恩。

上答

有美詞,

爲

我

説

也。」湛

頓

首

謝

「魏莊

盡心,而不能令其不反,臣

,殷勤携袖

,薦女成姻

,志相然諾。』《梁

闊」爲「周旋」之意,正與「約結」義相近。

成 傳》「數之,以其不用僖負覊」是也,一爲「數 與成男女之數,相扶持俱老。」此似述毛,非 志,欲相與從生至死,契闊勤苦而不相離,相 數 説」之「數」、《禮記 訓,自以《釋文》音「色主反」爲正。 毛旨也。」正義述毛,雖與 生也,共處契闊勤苦之中,當與子危難相救, 矣。正義云:「從軍之士,與其伍約:『死 爲「色主反」,則毛於「成説」之「説」如字讀 色主反」有二義,一爲「責數」之「數」、《左 左傳》「數典而忘其祖」是也。 其 也 「數目」字,則同。 陸音悦者,是專爲鄭箋作音。 軍伍之數。』王肅云:『言國人室家之 與子成説」、《釋文》:「説,音悦。 相愛悦也。 影「遽 「説」爲「數目」,古無 數之不能終其物」、 數,色主反。」 王肅異 此傳「説,數 ,而讀「數」 其 以 蓋「數」讀 承珙 毛: 數 也 此

> 此一人一事,故傳以「説」爲「數」歟? 也。毛不訓「説」爲「數」。此爲從軍之士與 方說者非一人亦爲「數」。此爲從軍之士與 一人亦爲「數」。此爲從軍之士與 也。毛不訓「説」爲「言」,而訓「數」者,「説」 也」,當爲「數説」之「數」,「成説」者,成言

之絜」,李巡以「苦」釋之,是單言「契」亦 或疑「契闊」雙聲字,似不宜單言「闊」。 共之,今乃不得相依以生也。」此語最 毛以「密直」訓之,「密」亦 釋詁》云: 苦。 雙聲取義者,單言之,訓亦可通。 疏以「闊兮」爲「乖闊」,與「契闊」 活也。」毛於此「闊」字不别爲訓 契闊」之義。《吕記》云:「言始欲死 「于嗟闊兮,不我活兮」,傳:「不 且如「綢繆」即「纏綿」之轉聲、《廣雅 「綢繆、纏也。」而《 都 「纏綿」之意,是「綢 人士》「綢 異義,非 蓋 即 直 如「九河 即 與 諦。 如 生勤苦 不 可訓 我生 承 孔 知

繆」可單言「綢」,猶「契闊」可單言「闊」也

承珙 間」注引《蒼頡篇》云:「眴,視不 目不正也。」是 光殿賦》「目矎矎而喪精」 錢曉徵曰:「古讀敻如絢,敻與 云: 高 复 洵」爲「夐」之假借 二,與 誘注《吕氏春秋 「《韓詩》作复,复亦遠 案 于 此 嗟洵兮」,毛傳云: 《文選 同 例。 順 • 矎 思玄賦》「儵 毛 耳 • 訓 即 盡數》篇, 「眴 張 洵 也。」盧召弓曰: 「洵,遠。」《釋文》 載注云:「矎矎, 眴 爲「遠」,蓋以 洵 眴 引 明也。」《靈 眴 音 「洵」之爲 正 兮反 相 作 近。 复。 常

凱風

曰 : 以 而 爲 實美、似 「詩人美刺,多代爲其人之辭,故 此詩乃孝子自責之辭。 序》云:「《 美 而 實刺者。 凱 風》,美孝子也。」《集傳 不 獨《三百篇》也。 陳氏《稽古編 有 似刺

毛詩後箋卷三

去志 流播 《詩深》曰:「此詩敘七子自責,而略不及其 爲七子所自作也 己,非七子真不能慰其母心耳。 心」,子之辭也。」此謂爲人子者,義當歸 戴 以 令其母感而不嫁。故詩人代敘其自責之辭 矣。」承珙案: 後世 積誠幾諫 母之過,所以深 涕泣引咎,豈暇弄文墨、誇詞藻邪?」許 揚其親之過,何得云孝? 美其能慰 ·曾子立孝》篇曰:「『有子七人,莫慰 騒 ,而能痛自刻責,思過引咎以悟親心,卒 人口,則 賦 ,必惟恐 及樂府 母 有借 此詩 心, 體 猶然。 其 母立名之心,不足以 人之或聞,而又自作此 而孝已莫大於是矣。 自是七子遭家不造,母有 心。若七子幹母之蠱 若謂 况人子自責,惟 七子自 要非以 作 是 爲 此 過 《大 於 13: 老 詩 氏

道《詩序》之論曰: 閻 氏《四書釋 地 孟 又 子: 續 **学**云: \sim 凱 宋 風 晁説 親 之過 之以

焉 ? 師説 則真於先君無妻道,於七子無母道。 倫 感詩者亦能安母於千載之下。 以慰母心焉。 孔 美其事,遂不爲聖人所删,《序》曷可非也。 肱感《凱風》之孝,兄弟同被而寢,不入房室, 姜肱性篤孝,事繼母恪勤,母既年少又嚴厲, 守節之志,非 孝道,以慰其母心,而成其志爾。』成志,成 則序《詩》非也。』黄太沖亟取其説,載《孟子 者,於先君無妻道,於七子無母 小 雖有七子之母 疏 如 七子之母 此 亦言『母遂不嫁』,爲之快絶。復憶東漢 也 《孟子》之言妄與? ,當日采風者親覩其事,序《詩》者申 余按:《序》又曰『故美七子能 而 徒 序 如鄭箋指『孝子自責』言。 歎作詩者能安母於千載之上, ,猶不能安其室。」是七子之母 有 詩 欲 * 嫁之志云爾,若果嫁矣, 者 曰 : 《孟子》之言不妄, 衛 之淫 詩之有益人 道,過孰大 風 是之謂 流 因檢 盡 行 母 其

惡,豈僅僅『過」而已哉。」

《詩深》曰:「從一而終者,婦人之大節 差,過而未遂,譬諸蛇之方虺,火之未然,斯 即「愈疏」、「不可磯」之義求之,蓋曰 子以此爲『親之過小」,豈小其失節哉? 待己者,以爲其過之大小,尤爲無理 何以舍子而 安其母,則罪 不憫己,親之過大也。」承珙案: 人子苟 也,《小弁》言『行有死 爲《凱風》言以慰母心,母心不悦,親之過 情者也。 也;《小弁》之過,不能救其子之顛危 「《凱風》之過,不能從其子之善意,必寡 嫁也,故孟子以 安其母之心,故作此詩以自責。」非謂其 季氏《詩説 此孟子所謂大小之别也。 過其母哉? 在其子,其母並無過可言,孟 解 爲過 頤》曰:「衛有七子,不 小。 人,尚或墐之」,而 至斤斤較量於親 王氏《總聞 趙 前 許 不 氏 識 母 日 孟 氏 能 曾 能 小 以 寡 者

其就 故 自責,不及其他,遂疑其未能悟母以成厥志 信讒,廢嫡屏子,悍然見諸行事而 爲 不亦惑乎?」 火勢燎原,莫可撲滅。 奚以悟親之心 諭,可以挽回。 不可磯」亦不孝也。 小矣。 曰『愈疏』不孝 死而 心弗動,豈但秦越人之相視肥瘠。 人子 ? 當此 若遽 也。 或反至激怒 惟 呼天怨懟 若夫《小弁》之親,昏惑 説詩者但見敘七子之 於是而不怨,是目擊 有 負 罪 ,則己心未盡 引慝,積 而 弗顧,則如 成之,故 誠 日 婉

茨,及《青蠅》以棘爲樊,非 爲何物,今按:《釋草》云:『茦,刺也。』郭璞 棘心』、『園 皆不指爲何木,惟『園 云:『草刺 棗」,陸農師以爲『酸 嚴《緝》云:「《凱 鍼也。 有 棘」,酸 《方言》:『凡草木刺人,北 秦』。 棗 風》『棘心』,傳箋及 也,《楚茨》以 有棘」,毛氏 酸棗也。 經有二棘,「吹 舊不 棘 以 · 指 彼 爲 配 疏

對文則 實之食」傳云:「棘,棗也。」以其言實故也。 《毛詩》釋「棘」衹二處。 枝。 風》「集 其他如此詩之「棘心」、《秦風》「止于棘」、《唐 其爲匕故也。 者,必非小木,而 棘」注云:「取其赤心而外刺。」此與槐配植 此語最明晰。 知。」承珙案: 者棗,相並横生者棘。 之間謂之棘。』沈括云: 從『朿』,朿音刺,木芒刺 燕、朝鮮之間 小雅》「有捄 楚茨》「言抽其棘」之類,皆無 棘列生,卑而成 别,散文則通。《周禮》外朝「三槐九 于苞棘」,《 棘匕」傳云:「棘,赤心 謂之萊,自 《説文》:「棘,小棗叢 此皆因文見義,故訓各不同 蓋棘之大者爲棗,小者爲棘 亦謂之棘,蓋散文可通耳。 小雅 林。 《魏風》「園 關 「棗獨 也。 不識二物,觀文可 以此 青蠅 而 西 朿 傳。 爲 生,高 謂 》「止于棘」, 而 别。 之刺 相 蓋 有棘,其 生 戴 其 以 也。」以 而 江 皆係 一者。」 文皆 立 少 生 湘

非是 爲棗木可知矣。 棘 荆 薪 棘 不 則是此棘之長,衹 煩 故 訓 自 嚴氏 明 耳 以爲與「園有棘」同, 可 此 爲 詩 薪 次 ",其不 章言 當指 吹 彼

之難 而 堅,故以 棘。』《特牲饋 風 風之長養者,其心之生更難於幹。」承珙案: 生物,亦已勞矣。」《埤雅》云: 造實。」蓋吹彼棘心者,將以趣其造實。 易》「寘于叢棘」虞翻注云:「坎多心,故叢 ()《爾 至于盛大,其久可 生者棘,而造實又欲其應候。 通 爲匕。 雅翼》云: 桂 · 騐》云:「南 食》記:「棘心匕刻。」蓋 凡木 「《白』 知,故以爲「母氏劬 心堅者最難 虎 風 通 日景 *****: 「棘性堅强 『景風 風,一 長,自 南風 至 棘 萬 日 萌 雖 勞 費 芽 物 棘 心 能 凱

集傳》分首章爲 稽古編 **>** 曰 比,次章爲興,太鑿矣。 凱 風 首二章 皆 興 也。 劉

> 興兩 與棘 矣。 凱 珙案: 與子,《集傳》亦以爲興。 章雖未言子,而已有「母氏」,不必定以 瑾 風 以 人也。 「有 可知詩 ,而下文以母與子應,故屬興。 、棘心,而下 劉氏「有應」、「無應」之説,謂上章 應」、 即如末章止説黄鳥,而 人取興,原不應如此 無 句無應,故屬比, 應 釋 之, 是又以 豈 詩 本 過 一物 下 泥 次章言風 乎 興兩 ·乃言 不知 也 兩 X 母 物 H 承

是。 高平 注 》: 地 即《詩》所謂『爰有寒泉,在浚之下』。 西。 浚」,毛傳俱以 城 在濮水北也。」若浚儀故城在今祥符 東 濮陽,今直隸開州是。 渠,非 「濮水枝津,東逕浚城南, 南 北去濮陽三十五 爰有寒泉,在浚之下」、《水經 有 浚城,又有寒泉。 也。」 爲 承 衛 珙案: 邑,當以濮陽之浚城爲 里。 《方輿紀要》云: 此 城 其後 及《干 側 而戴校「而」作 有 日 • 寒 濮陽,以 瓠子 世謂之 旄》之 泉岡 |西北 河

所奪,故汴水經大梁北,亦兼浚水之名 因浚水之名而附會之。 此。沈小宛曰:陳留 甫 廣記》謂寒泉在祥符縣西十里,蓋皆係後人 水,象而儀之曰『浚儀』。」然則在春秋時 者,《晉地道記》以爲衛之儀邑。 云: 「浚」名。《寰宇記》:開封府浚儀縣鴻池,衛獻公射鴻於 田之水。」《陳留 「梁惠王三十一年,爲大溝于北 縣之浚儀,春秋時爲宋地。 風俗傳》云"「縣北 趙氏一清曰:浚水爲汴水 《竹書紀年》 郛,以行 輿 本無 有 浚 地

泉興 賴母 子能奉母,其義甚正。 下」,於理不順。 有」字正 以 七子,浚民 傳箋及正義皆以寒泉在下有益於浚,喻 有 相呼應,若以寒泉比母,而乃云「在 生,猶浚民賴寒泉以爲養。舊以寒 八興母, 故知何説非 難 何氏《古義》乃謂「子 通」。 也 不知 此 章 兩

出目也。」《一切經音義》引作「目出兒」。「睅,大目「睍睆黄鳥,載好其音」、《説文》:「睍,

所補。 子‧天瑞》篇「老韭之爲莞也」、《釋文》云: 察,分爲二字耳。」承珙案: 作「莧」,引《爾雅》注云:「華版反,本今作莞。」後人不 其字。 總之,箋以「睍睆」興顔色,「好音」訓 爲大目,則二義迥别,不當連文,其誤 訓出目,案:今《廣雅》「皖」訓「大目」。 正與《説文》 於《凱風》,若《博雅》、《玉篇》、《廣韻》『睆』並 實一字。考『睆』字屢見於經典,而『睍』衹見 覽》引《韓詩》作『簡簡黄鳥』。 『見』形近易譌、論語》「夫子莞爾而笑」、《釋文》「莞· 『睍』訓合。 也。」大徐本又云:「睅,或从完作睆 注謂《説文》無「睆」字,「睅」下之「睆」爲 「莞,一作莧。」若《廣韻》以「睍」爲小目,「睆」 「睅」下。鈕氏樹玉 或者「睆」即「睍」之重文,後人誤移於 不知《艸部》「蔇」从皖聲,似不得謂 然則『睍』即『睆』矣。蓋『完』 曰:「『睍睆黄鳥」、《御 鈕説 疑『睍』、『睆 近是。 可知。 段 徐氏 氏 無

義爲備。《集傳》專指其音,偏矣。

鳥」,何得謂獨取《大東》乎? 「睆」訓 本義,而不知《玉篇・目部》「睍」訓「目出」, 以爲《玉篇》獨取《大東》爲《詩》中「睆」字之 三字偏旁各異。 字、《玉篇・日部》「晥」下云:「明星也。」是 牛」,傳云:「明星也。」各隨文釋之。 其實惟 睆其實」,傳云:「實貌。」《大東》「睆彼 睆」、《黄鳥》傳云:「睍睆,好貌。」《杕杜》「有 釋文》云「字從白,或作目邊」,《大東》「睆」 凱風》「睆」字從目,若《杕杜》「睆」字,據 案:《詩》「睆」字凡三見。《凱 「出目」,又於「睍」下引《詩》「睍睆 《稽古編》但據從「日」之字, 風》「睍 黄 牽

雄雉

不恤國事,軍旅數起,大夫久役,男女怨曠,《序》云:「《雄雉》,刺衛宣公也。淫亂

之辭,因以刺宣公也。 《春秋》隱四年,宣即 非婦人自作矣。」 以兵爲戲,故詩人託爲大夫久役、室家 蔡從王伐鄭。 宋人鄭伐戴。 桓求好,待於桃邱,弗遇,卒來戰於郎。 或 人患之 而 作 既爲鄭敗,又與齊鄭伐魯。 瓦屋之盟,及鄭平矣,又與 是 詩 位。 姜 曰『百爾君子』,可 明年,衛 氏 廣 義 人郕,又與 **>** 日 前 思 念 後 陳 知 魯 考

諸詩,悉非無因。 説,必皆實有所本。 分配其説邪。」翁氏《附記》曰:「凡《序》之 婦思其苦,即是男女怨曠。 國事,軍旅數起」者,乃推久役之由。 章爲女怨,而雄 所以只解字義。 鄭箋以上二章爲男曠,下二 序》,殊覺支離。 朱氏《通義》曰:「《序》語本顯白,毛公 雉 不思《序》所云『淫 至謂《雄雉》『刺衛宣公』, 乃喻宣公淫 如 所 謂 豈必章各異詞 衛 頃公、衛宣公 亂。 久役 亂 牽 經 不 而 恤 西己

之由。 已,初 兵無 然。」是毛意已有奮訊形貌、志在婦人之意, 曠,後二章爲女怨,繆矣。」承珙案: 毛於首 亦奚不可。 國人患之者,即 朱子 事,而終之以「不忮不求」,所以 但未明言耳,固非止解詁字義而已。 婦人義 之詩也。 二句傳云:「雄雉見雌雉飛,而鼓其翼數數 言志在淫亂,乃所以「不恤 怨曠」,只渾舉之詞。 奮其衣服,志在婦人』之語。至於《序》言 雖不信之,然亦未有 已,由於忿疾 序》又言「國人患之而作是詩」,自 無 盡 故於首章起興,以下皆敘從役怨曠之 宣 駁朱《傳》,殊不思毛傳止詁字義 蓋《序》説特述此詩所由 公媚悦婦人之説也。 陳氏啟源乃以毛鄭喻宣公媚説 使國 貪惏所致。 人陳詩爲怨曠者言之, 鄭乃以前二章爲男 以斷 國 事,軍 其必 其言微 隱刺宣 起,而 鄭箋始 非 旅數起」 惟《序》 衛 一公構 所謂 不 而 宣 - 當 有 婉 而 公

擬以唐人閨怨之作也。

也。 當作「緊」。感」、《小明》云『自詒伊感』,爲 氏《左傳補注》: 及《詩》疏引傳亦作「伊」,皆寫者誤 觀此足知傳本作「繄」,今《左傳》仍作「伊」, 者,以『伊感』之文與傳正同,爲『繄』可知。」 山》、《白駒》各以『伊』爲『繄』。《小明》不易 同,明『伊』有義爲緊者。 **詒緊感」、《詩正義》云:「《左傳》『自詒伊** 憂」是也。又案:《左傳》引《詩》當本作「自 爲「安」。杜注亦云「言人多所懷戀,則自遺 趙宣子以「亡不越境,反不討賊」,太史書其 遺以是患難。」承珙案:箋義正與《左傳》合。 安其朝而不去,今從軍旅,久役不得歸,此自 弑君」,而引此詩以自咎,其意自當以 伊,當作緊,緊猶是也。 「我之懷矣,自詒伊阻」,箋云:「懷,安 「王肅以《左傳》「自詒伊感」爲《邶風 故此及《蒹葭》、《東 君之行如是,我 改耳。 義 伊伊 既 惠

四

DЦ

句又異。 雉 且之言藉 自詒伊感,「感」即「阻」之異文,非《逸詩》也。 》之詩。 亦 通 王子雍或見三家之詩,據以爲衛詩。」馬元伯曰 也 《國語》『甯戚』、《亢倉子・賢道 今詩 感 作 阻 惟 小 明 詩 》作「雷 作 阻从且聲 「感」, 辞』。」 而 上

厭軍 起 雉 忠 古 用 其夫 知何者爲德行,苟無忮害貪求之心,則 詩 非 亦 而 厚 而 人託 旅 争 前三章道思婦之情,末乃指 不及 諸大夫之所欲。不敢斥其君,乃詩 非 也 姑徇兒女所見。 ,舉凡從役之大夫而言。 范氏《詩 ,因貪求而召怨亂,動輒得咎,以 善,似指數興 而言德行,譎諫之義也。」《詩籓》云: 爲婦之念夫,以刺衛君之構兵 人其雌 此詩多有含蓄不盡之意,❶ 補 ,蓋爲怨女而言,不欲其 傳》曰 軍旅 : 數興 三百 爲忮害貪求。 (軍旅,由于國君, 爾君子』不 謂爾諸 其因忮 如言雄 大 致机 人之 褻; 害 而 此 何 夫 獨 所 而 勞 國 不 指

> 爲勝。 隍而 《集傳》以爲「憂其遠行之犯患,冀其善處而 之澤猶在 報復私怨,所謂忮也; 嚴《緝》引朱氏曰:「戰國之時,諸侯無義 間,克濟者其惟仁恕」之意。 二者之行,婦人女子知其不 固宜如此。 里之外,以身爲本」,及辛憲英所云「軍旅之 得全」。此即《王風》「苟無飢渴」、《漢書》「萬 求,君不當使之在外,不得來歸。 君子』。」承珙案:末章箋説以爲君子不忮不 不安也。 也。」此蓋朱子舊説,似較《集傳 若係國人所作,意當不止於此 不 敢 斥言 貪人土地,所謂求也 君 蓋 可,足以 故 以 在婦人言之, 責 解固迂曲 之『百 見先王 戦 爾

匏 有 苦 葉

序》云: \sim 匏 有苦葉 刺 衛 宣

⁰ 含」,原作「舍」,據《續經解》本及廣雅本改

有之,亦必閟

不令宣,乃

顯屬諸右公子, 猖

閟深宫,宣公爲公子,又出

齋已有之,不始於顧。

即如顧云先君之妾嚴

居於邢,無由

得

近,然則公子頑何以通于宣姜?

又云:「即

《毛詩》與《左傳》合,不應舍此而 公前妻,與《史記》略同,蓋皆三家詩説 時,無庸屬其子也。 子者,當是宣公即位後之事。 無忌如此。」不 知《左傳》所 劉向《新序》以夷姜爲宣 謂 屬 若當 急子於右公 信彼也 爲 公子 獨

章傳云:「衛夫人有淫泆之志,授人以色,假

夫人並爲淫亂。」毛公雖不注《序》,然次

人以辭,不顧禮義之難,至使宣公有淫昏之

傳未

明言,箋始以

爲夷姜。

正義

曰

知

非

此篇

較詳,其必有所受之矣。

惟夫人爲誰

行。」此言并與《序》相應。且傳語多簡,而於

固 非 軌」,則又以「濟」爲渡水矣。正 皆實字也。 章以「濟」與「匏」對,次章以「濟」與「雉」對, 橋于靈昌津,采石爲中濟。」此皆以「濟」爲渡名。 注》云:「名其津爲「君子濟」。」《晉書·石虎載記》: 謂之濟。《説文》:「津、水渡也。」「渡、濟 當作津渡解。渡水謂之濟,因而所從渡處亦 也。」《方言》: 濟此盈滿之水」。 也 以「濟」爲津濟。 濟有深涉」,傳:「濟,渡也。」案: 箋訓 「過渡謂之涉 次章云「渡深水者必濡其 有深涉」爲「渡處深」,此 兩「濟」字 濟。」《水經・河 虚實 義因之,言 此 異義 一起

《虞東學詩》所載顧宛溪説力詆《左傳》之誣,

之後,自不得云「公與夫人並

爲淫亂」。

若

並爲淫亂。」承珙案:宣姜淫亂在宣公既卒

牡』,非宣姜之所爲,明是夷姜求宣公,故云

宣姜者,以宣姜本適伋子,但爲公所要,故有

·魚網」、『離鴻』之刺,此責夫人云『雉鳴求其

以《史記》謂夷姜宣公夫人者爲是,此説

洪容

水

河

四六

膝以 厲』者,以揭衣、褰衣止由膝以下,明膝 鄭注《論語》及服注《左傳》皆云『由膝以 雅》成文而 文有三等,故曰『由膝以上爲涉』。 涉爲厲也。見水不没人,可以衣渡。 釋之,明過此不可厲 無限,故引《詩》以『由帶以上』、『由膝以下』 山 以 非深淺之限。此深涉不可渡,則深於厲矣。 由 ·厲』言深者,對『揭』之淺耳。 由 帶以 .膝以下爲揭』者,略耳。 帶 揭,褰衣』,今定本如此。 下,若以上,則褰衣不得渡,當須以 爲涉」、後傳『以衣涉水爲厲 以以 以 Ė 則 上 厲 言之耳,非 衣涉水爲厲。」謂衣褌 總 其實以『由 名『厲』也。」毛西 淺 則 揭 也。 -, 解 膝以 揭者,褰衣,止得由 此經之『深涉』 正 涉者,渡水之名, 義 《爾雅》 傳不引《爾雅 上。亦爲 曰 河 謂 曰 : 入水耳。 傳因《爾 傳 》以深淺 由 厲 故言 以上 上爲 帶帶 由 也。 因 衣 以 膝

言凡涉水者有此 爲厲」三科。《雅》意蓋 以褰衣不褰衣爲别耳。 也? 則引「由膝以上爲涉」訓詩「涉」字,又引「以 涉水爲厲。」此二語專釋此詩。 涉」三句,而釋之曰: 也。」承珙案:《爾雅》此篇首引《詩》「濟有深 若衣褌入水,介自帶上,亦稱厲,『深則厲』是 帶以上若故,故曰『繇帶以上』。 有「繇膝以下爲揭、繇膝以 似厲以帶爲節,故有時帶亦稱厲,《方言》: 膝以下」。 假水深及帶, 又云 亦稱厲,《衛詩》『有狐綏綏,在彼淇厲』是也 『厲謂之帶』、《小 都人士》『垂帶而厲』是也,有時 蓋言水淺及 「繇 膝 以 下 三限 爾雅》『帶之垂者謂之厲』、 膝 爲 可可 揭 「揭者,褰衣也。 似 以膝爲準而分上下, 下乃 則需衣褌入水矣,然 揭 繇 不 上 衣 帶 專釋此 |爲涉,由帶以上 廣釋涉水之名 以 以 其深淺之限 涉 + 以此推之, 水 ,是爲『繇 爲 碕 厲。 及帶 毛傳 衣 何

衣涉 膝以上爲涉」特因《爾雅》成文,非是。 存之。定本出於小顔 作:「以衣涉水爲厲,由帶以上爲厲。」《爾雅》有二説,而 厲,淺於此而褰其衣則爲揭耳。 由膝以上爲涉之正限,深於此而上於帶則爲 以下爲揭」。 善解《爾 揭者,褰衣」,義訓已明,故不必更引「由 水 爲 雅》,恐學者疑 厲 總之,毛公用《雅》證《詩》,蓋以 而 曰 ,恐屬肊改。」案:此説亦未必然 謂 由 「厲」有二法耳。 帶 以上 段懋堂云: 也。 正義謂傳 此 至引 毛公 「傳當 引由 膝 並

厲」。 涉乎? 然以 不可 國沙州記》: 作『濿』,省用『厲』。 『砅,履石渡水也。』引《詩》『深則砅』。 是説《詩》,既『以衣涉水』矣,則 救之意 毛鄭 此 似 可 證 與詩 詩 未 吐谷 橋 考正》曰:「毛傳義 協。 有厲之名。 人託言不度淺深,將至 渾 《水經 於河 許 叔 重《 上作 詩之意以淺水 河水》篇 説 橋,謂之『河 文解 本《 何 爾 云《段 字》: 字又 一於溺 雅 不 可 口

借。 《説文》解『涉』字云:『徒行厲水也。』是許 寒衣 子・説符》篇: 『懸水三十仞,圜 徑云『石梁』,不當 「砅」爲「厲」,故許稱之歟。 音,故《詩》容有 注》云:「履石渡水乃水之至淺,尚無待於揭 未嘗不以『厲』爲以衣涉水矣。」段氏《説 有一丈夫方將厲之。』是厲 厲』之文,當從《 稱,厲固梁之屬 『水深至心曰砅』。蓋《韓詩》作『深則砅』,假 衣者,與『深則厲』截然二事。 義之大防不可犯。 風》言『淇厲』,無妨橋有『厲』名, 古字假借,義相貫通,不得專主 《釋文》引《韓詩》『至心曰厲』,《玉篇》作 而過,若水深 作『砅』者。 也。」邵氏《爾 雅》 則 |云 『履石渡水』矣。 | 承 衛詩》『淇梁』、『淇 必 訓,不可 依 橋 爲 若如 梁 許稱之以 以 雅 乃 「厲」「砅」 易 流 衣 戴説,許當 至於『深則 正 可 也。 涉 九 解。 義 過 十里, 响 水 厲 明 日 也 列 假 珙 同 文 衛 並 氏 禮

74

八

是。 案 : 戴 以 謂 衣 涉 水對 衣 涉 寒 水 衣 則 而 何 言 不 蓋淺 可 涉 則寒 衣 此 言 可 使 非

無濡 淺之宜。若有 ,深則濡 衣 橋梁 至帶 可 而 依 猶 無 미 渡,故 所 庸 度。 須 度 且 其 即 深 水

《釋文》引《韓詩》「至心曰厲」,即《爾雅》「由淺亦何妨從橋,不必云「深則」、「淺則」矣。

デスもある。『お話での『お話』である。 帯以上」之義。《論語集解》引包注:「以衣

包咸本習《魯詩》。此所解用《爾雅》,亦與毛涉水爲厲。揭,揭衣。」《後漢書•儒林傳》:

同,故知毛傳未可非也。

高下言軌也 不濡軓」。 爲軌」, 之名,毛傳本 下」誤作『以 禮記 濟 盈 少儀》正 此 《釋文》『軌 不 以 上,故 作『由 濡 車 高誘注《 軌 義、《 之 」,段懋 輈 以 廣 開 以 車 狹 舊 淮 成 軾 言 下爲軌」, 龜美反」,是晉宋 南子》云『兩 堂 石 前之朝 軌 日 經》竟作『濟 也。 : 解之。 軌 此 毛 輪之間 以 非 傳 車 轍 「以 而 之 洂

> 庸》『車 謂車 矣。」 空虚 之處 然兩 則輿 與 儀》之『祭左右軌范』是也 日 頭,所謂 云: 本 軓, 帜 皆 『軌』字自 於事 物 轊 王 下 作『軌』 之處,而 未至於地, 車 軌, 矣。 頭 懷 軾 同 之朝, 軌 軌 同 也。 祖 ,軌]是 車 前 也。 ,今本「事」調作 徹 曰 : 也 也。 少 至 依傳 有 也。 儀》注 皆軌 於 也; 也 相 \sim 從 又 軸 義。 亂, 意,宜音犯。 釋 車,凡 曰 從 其 輈 也。 文 *: 云: : 車, 而 故 訓 下 車 其 至 ·之軸 毛言『 濡 具論之。」李 聲。」 爲 訓 「祭 軌、 九 斬 於輈 據孔 軌 車 爲 聲。」 者,水 兩 范 音 舊 轊 疏改 車 由 軌 案:《説 軹 並言 犯。 頭 轍 則 輈 龜 也 龜 Œ. 祭 者,《 者 必 濡 以 ; 美 美 軓 成 則 車 輪 虚 下 反。 文》 反, 顯 少 中 裕 輿 軌 間 空 轊

^{● 「}淮南子」,段氏《説文解字注》、《毛詩故訓傳定本

足

正

唐

以

後傳注

相沿之誤。

以

下

軌」,車

軸

在

朝之下,其兩端出

此處訓詁當用鄭

轊

頭之説

爲

確。

 \Rightarrow

集傳》

軌」爲「九」音,是也。

:車上之物,則不可以言『濡』矣。 成裕此

密,若『軌』字作『軓』,則出

韻矣,無是理

且以古音言之,軌居酉反,牡莫九反。

瀰」、「鷺」、「盈」、「鳴」、「軌」、「牡」用

韻

合《周禮》、《禮記》觀之, 但訓『軌』爲『轍」,轍 蓋傳文本作『由 必作『朝』也。 軌]是,與 此章 其車 帆之 轂外 也。」 也。 説 讀 甚 軌 軹 云 農云: 軌。 者謂 車轍不宜同名,不知車中之物固有異 上耳。 『軹,轂末也。』又『去三以 名者。《考工記》『軹崇三尺有三寸』注 經》因之,改『軌』爲『軓』,誤矣。 『軹』,其説與《禮記正義》自相矛盾。 之軹,不謂之軌、《少 『上』,故陸云『依傳意宜 人所見本並 也。」蓋徐邈、阮侃、王 膝以上爲涉」,『由帶以 『軌』爲『軓』之譌,且以 頭」之訓。 也。《釋文》曰:『軌,舊龜美反,謂 之轊頭,又謂之軌 『上』『下』字形相近,又因上章傳 軹,小穿也。]又『去 鄭君不言其誤,則所見本 陸 作『由輈以下爲軌』,故有『車 德明、 儀》『軌 孔 肅、江惇、干寶、李 上爲厲」之文,遂誤 穎 爲軌是車轍,轊 故 爲朝』注曰: 音犯」; 達 日 范』之『軌』當 所 以 山田 見 或謂 爲 本 而 輈 軹 始 孔 · 尚 車 事 以 轊 『鄭司 倉唐 韋 有『由 未誤 誤 遂 軌 轊 曰 頭 下 而 頭 注 石 謂 以 與 爲 作 轊 諸 口 頭

是

車

頭謂

之軹,又謂之軌。

轊頭

在

下,車之濟盈必濡

其轊頭,不

此

字

同

而

事

異也。

徹亦

謂之軌,則《考工記》『經涂

九

又云:轂末之軌,此經『左右軌』是也。

祭左右軌范」,兩文正同。

則左右:

軌

與

兩

事,故云:『軌與軹於

事

同,

謂轉頭

頭

也

軓

與范聲

同

謂

軾

前

也。」

IE.

義

云:

;

轂

末。

周禮

·大馭

》「祭兩軹祭朝」,此

又《 謂之軹,轊頭亦謂之軹, 也。』然則輢之植者、衡者謂之軹 曰 : 少儀》注云: 轊 頭謂 歌末 之軌,車 小 轍 穿

頭爲 篇》曰: 軌也。」承珙案:馮氏《名物疏》曰: 『景公爲西曲潢,其深滅軌。』亦 高下皆定於 謂 羅 轊

亦謂之軌,皆異

事而同名也。《晏子春秋

•

諫

禮 則 学、驅 轍 迹 亦 塵不出 同 軌」,以高下言,《中庸》「車同 後人因謂車轍 亦 日 軌 曲

中

行

云:『車

輪

廣

狹

軌

軌

同,

鳴無

求牡之理」二句,語

意

反

正

不同。

笔

中,若濡: 軌 以 廣 軌則水深三尺三寸。 狹 言。 蓋車輪崇六尺六寸,軌 此謂轂末之軌 居輪

轂末二處,皆水可濡。 也。」予謂『軌』『軓』二字,書者易 孔仲達不 知 混;式前 軹亦名

韻 軌,乃謂《少儀》字誤。 不知軌 之爲軹,遂以 朱子但取「軌」「牡」叶 車 轍釋之。 轍 跡,

特

車行之見於地者,豈可濡乎?

當從羅氏

傳云: 求而 言其犯禮不顧矣。 鳴而求其牡矣。」此謂水深必 所難也。」其下云:「違禮義,不由其 句,更進一層:上衹言男女宜有禮 至爲非,今濟既盈而 爲 長 不知其非 「瀰,深水也。 據 此 是羅 偶矣。 馮 但「濟盈 之説皆與 不知其 此承: 盈 滿 上章「深則 有 濡軌,猶之牡 至濡軌 也。 李 濡 成 深水,人之 軌之道 裕 義,此 (道,猶 犯禮 同 属二 雉 雉 直 是 必

《集傳》謂以 求非 云:「渡深水者必濡其軌,言『不濡』者,喻 淫亂之人,非也 人犯禮而不自知。 所求。」此以 濟盈興 濡 雉鳴,然後以雉求其牡 雉鳴反求其牡 軌、求牡皆喻夫人爲是 ,喻夫人所 比 夫

又許 反。」今本《説文》作「讀若勖」。 袁反。 「旭日始旦」、《釋文》:「旭 説 文》讀 若 好。 許 盧 字 召弓曰: 玉 林 反。徐 呼老

干,不从于。《説文》、《玉篇》皆無「旴」字。 與姚氏同也。 反」正其音。 取光明之義。「旰」从干,讀與 澔旰」、《景福殿賦》「皓皓旰旰,丹采煌煌」,皆 也。」《玉篇》:「暤,明也,旰也。」是「旰」有明 旰,《説文》雖訓「晚」,然《日部》又云:「暤,旰 云:「旰,日光出也。」《文選 日始旦』。」今考姚所引《詩》「旴」當作「旰」,从 許元切,是徐所見本不作「旭」。《易》「盱豫」, 又音許袁反」者、《集韻》、《類篇》亦引徐邈讀 雅・巷伯》云:「驕人好好。」』」承珙案:「徐 呼老反。」邢疏 訓》:『旭旭、蹻 〈釋文》:「盱,姚作旴,云日始出,引《詩》『旴 勖,從力, 冒聲。 故《爾雅·釋天》注言「氣晧旰。」《釋文》 是徐所見本亦必作「旰日始旦」, 段注《説文》謂《集韻》、《類篇 蹻 曰:「郭讀 知亦讀若好也。 ,驕也。』《釋文》:『旭旭 旭 ・上林賦》「釆色 旭爲好好。 「軒」同、「許袁 《爾雅 佘小 • 郭 釋

谷 風

《集傳》乃以爲未見化其上之意。朱氏《通義》 《谷風》之詩作。 詩,將以觀政。苟無關政化,焉取于風。」 者,如此。」此朱子初説也,其論甚正。 辭也。宣姜有寵而夷姜縊,是以其民化之,而 曰:「民風善惡,何一不由上致之。 俗傷敗焉。」《吕記》引朱氏曰:「皆述逐婦之 化其上,淫於新昏而棄其舊室,夫婦離 《序》云:「《谷風》,刺夫婦失道也。 所謂『一國之事繫一人之本』 王者陳 至作 絶 衛 國 X

葑 采 菲 無 以 下 體 傳 葑 須

者,蔓菁與葍之類也,皆上下可食。 菲 芴 也。 下體,根 莖也。」箋云:「此 然而 也 菜 其

有美時有惡時,采之者不可以根惡 時 并 棄

喻 夫 婦 以禮義合,顏色相 親 亦 不 可

以 葑爲須,《爾雅》則云:「須,葑從。」《説文》又 顔色衰 棄 其 相 與之禮。」承珙案:此 傳 以

云: 語異耳。 「葑,須從。」其實乃一物三名,古今方俗 「須」「從」爲雙聲,「葑」「從」爲 疊

韻。 《説文》絫呼之曰須從,毛傳單呼之則 日

從。 須,猶《爾雅》絫呼之曰葑從,單呼之亦 禮記正 義》引陸《疏》云「葑 亦謂之從」 可 日

是也 呼爲蕪菁,或爲菘。」「菘」「須」聲相近。 齊民要術》引《爾雅》舊注云:「江東 今考

菘」,本當作「松」,「松」即「從」之同聲假借。

松。」是其證。 禮記 學記》「待其從容」注云:「從,或爲 郭注《 爾雅》「須,葑從」云:

> 蕪」。 漏,乃以毛傳訓「葑」爲「須」者屬 所見係未脱之本。邢作疏 文「蘢,天蘥」注「未詳」二字移并於下。 所引疑即景純《爾雅注》,傳寫脱去,誤以 今菘菜也。 未 詳 殊不知《詩》本言「葑」,毛故以「葑從 ______ 毛 詩 案江南有菘,江北有蔓菁。」 音 義 》「采葑」下 時,蓋郭 . 引 之「須, 蘋 郭 注 璞 己脱 陸 云 氏 上 此

邢知有傳,而 之「須」釋之。若「須,薞蕪」,並無「葑」名 不知有經,亦惑矣。 《釋文》

云: 葑、「《字書》作蘴」。《玉篇》:「葑,蕪菁

也。」「蘴,蕪菁苗也。」《齊民要術》引《字林

耳。 亦云:「蘴,蕪菁苗。」其實一物,亦方俗語 《方言》云:「蕪菁,紫華者謂之蘆 菔。

菔 王氏《廣雅疏證》謂《名醫别録》以 同條,蘆菔之白華者古亦名蕪菁,《方言 蕪 菁與:

不可以釋《詩》之「葑」。 别 録》皆不誤。 不知蘆 菔 何也? 雖或名蕪菁,而 采葑 無

美在 惟秋冬可食,故箋云「有美時有惡時」矣。 汾、河、朔 秋食莖,冬食根。」陳 啚 下 體, 經》云:「蔓菁 根,與「無以 葑之美自 間 燒食其根 四 1在葉。 下體」語不 時 藏 俱 呼 器云:「蕪菁,今并、 有,春食苗 蘆菔即今之羅 爲蕪根。」蔓菁根莖 一合也。 蘇頌《本草 ,夏食心, 匐 其

也。 可 芴 菜,今河内 美,可作羹。 菜異 也 , 芴也, 蒠菜 食。」《詩 注:「菲草 其狀 菲者、《爾雅・釋草》凡兩見。一云「菲, 停而 釋,郭 郭注:「即 某氏 似 正 人謂之宿菜。』《爾雅》『菲,芴』與 長,有毛。 蒿 生下 幽 注 義》曰: 也,土 注 而 州人謂之芴、《爾雅》謂之蒠 似 非 溼 土瓜也。」一云「菲, 莨菜」, 爾 是 葍 瓜 2别草。 地 雅 「陸璣 也,宿菜 三月中, 》二處 ,似蕪菁,華紫赤色, 故 云 云:『菲 如 引 陸璣之言,又 也,五者 類 烝鬻爲茹 此 也。」承珙 詩。 似 「萬,莖 即 一物 滑 菲

我願 郭注 之意 正白 《疏》,蒠葉 菲芴 《詩》所謂 《月令》之「王瓜」、《爾雅》之「鉤 案: 之交當如采 臼 備於一人。 也。」《坊記》鄭注云:「此詩故 時耳,故詩 箋以菲爲葍類,而 「芴」,不及蒠 二菲爲 .季對晉文公,引此詩 級與汝同 孫炎注《爾雅 則 以 ,可著熱灰中温噉之。 即菲、蒠 一,而 同 菲芴爲土瓜,本之《廣雅》。 「菲」也。 烝 人與葑 能 葑采 死 自 不云名土瓜。 鬻爲 矣。」 菜,正以 菜 程 如 菲,取一 大昌云"「古人用牲,以上 此 無疑。 》以菲爲 並 陸《疏》云葍一 茹 據某氏、孫 此 則 舉。 滑 雖不 德 而 其爲一 美,是其美亦 毛傳 善而 美之 -指夫 《左傳》僖三十三年。 曰:「君取 葍 郭所云「土瓜」乃 則其根或亦有 類,本之鄭 炎、 音 但 親今疏,言人 婦婦 已,君子不求 物耳。 名营,其 ,睽姑」,非 不離 訓「菲」爲 ,其爲節 陸璣之説 陸《疏》合 節 令名 在葉。 據陸 焉 取 美 根 口

凡菜皆然,詩人何獨言葑菲乎? 以爲下體莖葉近地,多黄腐,嚴《緝》同。 之,言二物根爲美,詩人謂采葑采菲,得無以 體 下體之故乎? 以注《禮》而不 子不盡利於人,無以其根美則并取之」,然可 采葑者不 爲 貴 棄下體。」此雖亦本《坊記》鄭注 蕪 菁 可 則 此解殊與詩意不合。至錢氏 葉 以釋《詩》。 可 食而 不 如其根之美 何氏《古義》因 此則), 故 君

别 同。 然,喻君子於己不能如也。」毛、韓、鄭三 聽從也。 也。」蓋謂有違者爲有離別之意。 行於道路之人至將離別,尚舒行,其心 韓詩》云: 很」,即「行難」之義。 ,不能遠,維近耳。 至「薄 行 道 送我畿」,箋云:「言君子 遲遲,中 「違,很也。」《説文》云:「很,不 曰行難 也。」《韓詩》以「違」爲 心 送我裁於門内,無恩之 箋云:「違,徘徊也。 有違」,傳: 《釋文》引 違, 與 一説 徘 己 離 决 略 徊

> 《白虎通義》引此詩爲送出婦之禮,以見其夫 《詩》云:「薄送我畿。」」正謂此也。」承珙 之。 甚。」 于宫中遊翔,●至于蹷機,故曰 曰:『招,至也。 以輦,務以自佚,命之曰招蹷之機。」高 之不以禮送,此必本三家詩,似較箋義 肄」,其夫之相 文云「比予于毒」,又云「有洸有潰,既詒 案:何説於「不遠伊邇」之言更覺微婉 接以賓客之禮。 一顧也。 遠,獨不可近相送而一至於畿乎。 言我既行矣,汝與我决 何氏《古義》曰 惠定宇曰:「《吕覽》:『出 《白虎通》云:『出婦之義,必送之, 遇如此,豈 蹷機. 君子絶,愈于小人之交。 : ,門内之位 此 非 復 别 真 循送 1務以 即 則 謂 也 以車,入則 其 奈何其不 不 婦 自 夫 敢望 之禮 佚 爲勝 之 也 至 我 其 送

^{) 「}至」、《四部叢刊》本《吕氏春秋·本生》無。

苑 之謂。』『畿』與『機』古字通。」承 妃匹之際。」蔡邕《司徒袁公夫人馬氏 云:「不 詩》 政理》篇: 日 出 「不遠 其機,化導宣暢。」此皆以「 伊邇 「修近理内,正 薄 送我 畿。」此 橛 珙 機之禮 案: 不 機」爲 靈 過 《説 壹 表》 蹷

也; 之清,以 以 **湜**提,持正 渭 渭 比己之持 而 而 涇 善惡 故 清 清 己之持正 喻舊室,渭 喻 」,鄭則讀「止」爲 濁異。」 見謂今本「見謂」作「見渭」,從正 涇以渭濁,湜湜其沚」,傳:「涇渭 新香,取 别。」箋云:「小 比 正守 新 貌 正 昏 守 初,則「其 義 之美; 比 相 初 喻 曰 沚。 新昏,但傳意 人而清濁 如如 君子 一、此 沚 箋謂 程 渚 得 沚」指涇言之。 然 以 氏 曰 新 不 **湜** 異,似 謂 涇濁 沚 動 昏 涇 以 摇。」 故 義 濁 喻 爲持正 **湜** 涇 引改。 新 舊 而 謂 水 毛 舊 渭 室 鄭 己 相 爲 以 相 經本 以 清 惡 渭 皆 有 並 以 人

> 又有説 自相 以」也。」此又以渭清比新昏,與《詩記》之説 **提然清潔可喜,此** 猶可見也。」此皆與 記》云"「涇,新昏也。 今涇反 合,則清濁易惑。 矛盾。 云"「既看得涇 以 渭 然後説於傳箋有合,亦於經文 爲濁。 所以 於洲渚淺處視之,渭 傳箋 嚴《緝 水濁, 渭, 舊 『宴爾新昏,不 相反。 即 愈見得 室也 用 《東萊遺 其 説 渭 涇 我 水 之清 渭 ^ 較 湜 屑 吕 既

王肅 所見 養」」,以孫毓引傳 肅: 毛: 正 興」,可知古本必不作「養」矣。 × 日 本即 養也。」據此,是今本傳云「慉,養也」乃 興也。 「不我能慉」、《 所 改。 「《説文》「慉,起也」, 與孫同。 鄭 : 正 義 驕 云「慉 云 也。 且孫朋于王者,尚 釋文》云:「慉,許六 一編 《説文》: ,興者」爲非,不 檢 諸 引 本皆云『慉, 此詩。《小 《毛鄭詩 起也。 引 知 傳 反。 考 陸 爲 王

爲融

貫

也

字也。 哺養; 《詩》云:「不以 道,即下文所謂「既 雅 德」二字雖或有誤,然固可 慉」,似當作「不以 當作『慉』,省文假借 家,反讎視之。《蓼莪》篇上言『鞠我』,既爲 盡 亡, 黽勉求之。 起 . 拊我』下。 不」下有「以」字。 興」,即謂興起家道。 起,扶持也。」『不我能慉』蓋承上章『何 心力如此,而其夫乃不 如《晉 蓼莪 下言『育我』,又爲覆育。 語》『世 篇 拊,撫摩也;畜,扶持也,『畜』亦 凡 拊 我爲德,反 我 民 我 相 《後 畜 能 阻 耳。」承珙案:「慉」訓 有 起 言不以我爲能興 喪,匍 漢書 我」,箋亦 慉 我 也」之起 以 德 」也。 「不 ·以爲 證「不」下有「以」 我 《蜀 匐 寶融 爲 能 救之』, 而『畜我』承 訓 石經》殘 讎。」此「爲 相扶持 傳》注引 爲『起』。 注 我 、起家 自言 有 云 刻 能 爲 起 何

《説文》:「慉,起也。」引《詩》「能不我

《説文》訓「慉」爲「起」者,與 《説文》同,自是所據本異。 「興」,乃喜悦之意,《詩》言「而不我悦,反以 悦 棲」注亦引《説文》「興,悦也。」是古本《説文》 也, 歆也。」孔疏引《爾雅》作:「歆、喜, 文義不順。 善注引《爾雅》:「熙,興 也。」《文選》潘安仁《關 興也」之「興」。 同,則經文「能不我慉」當解作「而 曰,孫毓、王肅詩並作「能不我慉」。 野》篇「爾 承珙案:《説文》所引詩,或以爲是《我 知」、『能 慉 興」下尚有「悦也」一訓。 也。」顔 段 注云: 不我甲』句 延 不我畜」之異文。 或者傳「興」字如《爾 年《 鄭注《樂記》云:「興之言喜 和 許 謝 法 所 監 同 據 中詩》「如熙春陽」李 靈 也。」《説文》: 如 運 然《吕記》引董 或毛傳訓「慉」爲 但 傳 能 此, 詩》「興玩 如段 慉 ご讀 雅》「廞、熙 與 不我 ,興也」義 爲 所言,以 能 此 一而 「興, 起」, 究 正 不 行 興 我 與 氏 其

我爲讎」,於義亦通。

老。 釋詁》「育,長也」郭注:「育,養,亦爲長。」此正以「長」爲長 事。 之予,賚、畀、卜爲賜予之予。 養,與孟耆艾爲長老、正伯爲官長者別,如台、朕、陽爲予我 辟。」傳云「育,長」者,「長」訓長養,謂昔時 長,二「育」字同義,故於「既育」無訓 長養之道恐至窮匱,故我與爾顛覆盡 今十行本、相臺本、毛本皆作「衆」,誤。 昔幼稚之時,恐至長老窮匱,故與女顛覆盡 盡力於家事」,即用箋語。 力,於衆案:「衆」當作「家」。 鞠,窮也。」箋云:「昔育,育稚也。 及,與也。 ·昔育」之「育」 爲幼稚 恐」下無「育」字。 正義曰:「以『育』得兩 下文「既生既 育恐育鞠,及爾顛 育」,謂既 承珙案:傅云:「育,長。 上箋兩云「君子之家事」,可證。 ,「既育」之「育」爲長 《爾雅 正義釋經云 遂其 訓,故《釋言》爲 一多每 覆」、《蜀石經》 有 事 生,既是 此例。 難 「我與汝顛覆 易 《爾雅 力於家 箋以 得 無 所 於 所

> 經》所據當不誤 傳箋本皆當作「昔育恐鞠」四字爲句、《蜀 箋當云「昔育,幼稚也。恐育,長老也」,然後 之。」今《爾雅・釋言》:「幼、 者,乃探下文「既育」言之,非因「恐」下有 育」爲「長」,與毛異,其於「昔育」句亦必無一 於「既生既育,比予于毒」乃云「生謂財業也」 云「昔幼稚之時,恐至長老窮匱」矣。 「育」字。所云「昔幼稚之時,恐至長老窮匱 育謂長老也」。鄭雖以「昔育」爲「稚」,「既 承珙又案:箋云「昔育」者,對「既育」言之, 「育」字而訓以長老也。若經文作「恐育」,則 『稚』、《釋詁》爲『長』; 也。 鞠,稱也。」「鞠」與「育」同 以經有二『育』,故辨 此可見

也。愚謂此章後四句自爲韻,不必與首句相於第一句『慉』字轉音許求反。此作繭自縛『覆』、『育』、『毒』皆轉通『讎』『售』爲韻,蓋泥獨氏《詩附記》曰:「顧氏炎武以『鞠』、

惟達者能知其通。」 判然,豈知古音口齒遠近,間有自然相就者, 曷畜?』音讀與此 叶。 讀寶。若『覆』字,則今本兩讀。《封禪頌》: 正》『鞠則見』,解者謂即『噣』,讀如呪。《書》 也,不善,則讎也」,讀『畜』如『齅』。 標《毛詩證讀》曰:「《逸周書》『民善之,則畜 「自我天覆,雲之油 古文『教育子』,『育』今作『胄』。 屋、職通 「令民知所避就,一日而遇七十毒」,『毒』亦 滋液滲漉,何生不育。 而『慉』『徳』二句却未嘗不自爲 用也。」承珙案:翁説非是。 相倣。 油 甘 自韻書與四聲界限 嘉穀六穗,我穡 露時雨,厥 《淮南子》 韻, 戚 《夏小 壤 氏 此 可 學 即

某氏曰 塈」,正 「「壓」即「呬」之假借。 義 余來塈」,傳: 『《詩》云「民之攸塈」。』此當作「呬」。 引《爾 雅 釋詁》云: 「塈,息 《大雅》『民 「呬,息 也。」段懋 之攸 也。 堂

《詩》多據《爾雅》。《説文》無『憩』字,則《釋 字,而後人亦有以 也。 「伊余來塈」對「既詒我肄」,而言今遺我以勞 氏雖據《玉篇》以「展」爲古「憩」字,然《玉篇 某氏注《爾雅》引《詩》「民之攸呬」,是《詩》本 有作「呬」者,則「塈」爲「呬」之假借無疑。 古字假借,以『塈』爲『展』。」承珙案:孔疏 余來壓」及《大雅》『民之攸塈』皆從土、既,或 詁》『憩』字當依《玉篇》作『展』。《谷風》『伊 云:『憩、休、呬,息也。』《玉篇》云: 蓋三 『塈』 與 『呬」 爲古今字,未知何據。 義》云:「塈,仰涂也。 「愍,息也。」此「愍」字,《説文》以爲古文「愛」 「属」下本不引《詩》,未可即以「属」字爲《詩 壓」字之假借。 今爲憩。」『属』與『塈』,字相似,毛公傳 家詩作『呬』、《毛詩》作『塈』。」惠氏《古 如《 爲《詩》「壓」字者,皆誤。 玉篇 非休息之謂。 心部》又云: 正義 「展,息 釋詁 惠 引 以

三月 待 苦之事,不念昔 亦足以發 而 廟 安息我也。 見,然後執婦功」,故婦初來曰 明經義 1者我初· 黄氏 來之時,猶 正引《葛屨 能 美 以 息 傳 禮 此 婦 相

式微

縣於此 國。 東北 亭。 寓 以 在 志》「上黨郡 今黎亭是。」《通典 壺 在 歸 潞 關 西伯 衛東。」考黎侯本國自在漢 州 也。」《旄邱》箋云:「黎國 説文・邑部》: 序》云: 縣,古黎國 。』《括地 商 城 戡 縣東北十八里。」據此,是唐宋時 黎,即此。 壺關 **《**式 志》云:「故黎城、黎侯國 地,有羊 縣 * 西 微》,黎侯 伯戡智。』」《漢 「睝,殷諸侯國,在 潞 應劭 漢爲壺 · 膓 坂 州 曰 : E 寓 關 在 黨縣,古黎侯 于 「黎侯國 上黨郡之黎 後 縣。]又云: 衛 衛 魏 西, • 移 其 | 壺關 地 上 今所 臣 也 也 黨 理 勸

縣故城 所謂 黎陽 其故 今直 寓 據酈 也。 縣 縣 氏,黎侯國。 潞 州 潞 于衛是也。」又《瓠子河》注:「 陽,本屬衛地。 黎」之「黎」,亦即《詩》之黎國。 衛 氏 州 也。」世謂黎侯城,昔黎 南」注:「黎侯國 黎 之地。 隸大名府開州 也。』薛瓚言:『按黎陽在 侯 墟 注,蓋誤以 ,數之以 之上黨、黎 土地汙下,城居 『胡爲乎泥 南, 則 亭 實 在 王莽改曰黎治矣。 在 黎侯嶺 漢 上黨壺 奪黎氏 黎亭。 《水經》「河水又東北 城、壺 黎陽 書 中」,毛 地 也。 上。 地 小 爲 關縣有黎亭。」此即「戡 地之罪。 關 故 理 黎 阜,魏濮 云 《 詩 泥 王 \equiv **^** 志》黎縣 泥 侯 侯國,黎縣 左傳》: 一縣皆古 中 存《 中 陽 在 瓠河又 邑 式微》黎 寓 魏 孟 九域志》云 杜 開 若魏 陽郡 郡,非 名,疑 于 屬 康 州 注云: 晉 南 東 衛、詩 國 曰:『今 郡 治 東 滅 爲 過 郡 地 也。」 此黎 逕黎 黎侯 之 此 侯 旄 黎 赤 陽 邱 城 黎 黎 狄 潞 寓 但

六〇

皆以 城 縣 縣 别是一黎,非黎侯所寓之地也 爲 衛居之得 在 縣 其 西 西 開 (寓居。 黎侯 今屬曹州府,爲漢東郡壽 四 州 + 名,是也 濬 西 五 寓 縣 至《元和 之西 此 黎 里,黎侯 陽 得 不 即 名。《寰宇記》謂黎陽縣以黎 屬 得 開 魏 郡縣志》: 寓 以 州之東。 郡 于 黎陽爲其本國 在 衛 今 为 因 良縣 河 「黎邱在 二者皆 以 南 地 爲名。」鄆 衛 輝 衛 此當 黎 鄆 府 侯 地 縣 城 濬 寓

見其必 也。」 歸之辭,黎之宗社疑未滅也。 其穆公之詩乎。」劉氏瑾曰:「黎侯 時 國,至衛穆公時 爲宣公之詩。然宣公之後百餘年,衛穆公時, 世 滅 多闕 劉氏 赤狄潞氏,數之以奪黎氏之地 朱子《詩序辨説》引陳氏曰: 作於衛 韶 但此篇既次宣公詩《新臺》、《乘舟》 江《詩 宣之時,亦未必 方爲赤狄所滅歟? 益》曰: \sim 衛 豈其 作 凱 一説 於衛 此詩 後 臣 風》 然則 黎 子 者 以 穆 再 有 雖 以 時 未 勸 此 復 此

之前 穆公時,則齊晉迭主夏盟,不當復以 文未興,故黎臣 衛宣公之世已百餘 晉滅赤狄在魯宣公十 風終于陳靈。 詩中人名地名,毛公必有所受。 ,云穆公時詩 陳靈被 以救災恤鄰望之於衛。 者, 年 矣。 Ħ. 弑 固 年。 非 在 惟 義 春 在 也。 當衛穆公時,去 秋魯宣公十 衛宣 承珙案: 責 公時,桓 衛 若在

乎? 理。 則 拘 水》之『禰」、《韓 齊景爲昭公取鄆圍 恤之耳,豈必令其分身而處之乎? 爲鄭氏,而又譏其 「中露」、「泥中」爲衛之二邑,李迂 廣韻 墟 中露,當相 之見也。 不知處之以二邑者,謂以二邑之所 《黄氏日鈔》又云: 》: 坭,地 《水經注 去不遠。 名。」承珙案: 詩》作『坭』,當 無 成,非二邑乎? 據。 》以泥 段氏 恐無 古地 中在 鄭注《士虞禮 懋堂云: 即 名豈皆 身處二 泥 濮 仲既 中 陽,郡治 此 且 · 之 地 「《 泉 等皆 春 邑之 傳以 誤 出 有 秋 據 贍 以

名,而以爲邑名者也。 名,而以爲邑名者也。 名,而以爲邑名者也。

旌 邱

誤矣。朱氏《通義》曰:「武王封康叔于衛,説》謂其見詩有「伯兮」二字,遂以爲責衛伯,《序》云:「《旄邱》,責衛伯也。」《詩序辨

此。 《詩》稱「叔伯」則指衛之諸臣,所謂不斥其君 黜,頃侯故賂夷王而復之。此説本不足信 侯。 意,不必定《詩》詞 也。至《序》云「責 兮」,遂以爲衛伯? 是方伯之伯。 責衛伯也。不應詆其誤。」承珙案:《史記 難來告,正望其修先世連率之職,故《序》云 叔」指衛之諸臣,而並不及其君。《序》與 司馬貞索隱駮之極明。《詩序》之「衛伯」,自 衛自康叔至貞伯 公以前七世皆名伯。 之長也,非伯 而責其臣,婉辭也。 本牧伯,故《康誥》稱『孟』 毛傳專釋《詩》詞,故兩言大夫,但以「伯 孔氏《詩正義》因謂康叔之後爲時王所 而 惟《序》云「衛伯」是責其君 何? 不稱侯,頃侯賂夷王,始爲 所有。《三百篇》往往 衛伯」者,是推本詩人之 作《序》者不應牽合如此 《史記· 豈得謂見《詩》有「伯 此可證矣。 侯」。 衛 孟 世家》自 侯者,五 黎侯以狄 有 頃 侯

各明其義,仍兩不相悖耳。

月以 蔓而 也。 患相 也。 案:《詩》言葛者,多取延蔓之義。 則節愈闊,已有爲時甚久之意,故下傳云「日 也?』傳釋『誕』爲『闊』,於義無據。」承珙 之伯叔同處 姚氏《識名解》云:「誕與覃通,猶葛覃之覃。 誕」爲「闊」,即「延」字引申之義。 書》『誕敷』亦作『覃敷』,是其明 ,喻此時衛伯不恤 逝,而 屬 《詩》蓋 至鄭箋云:「 長,雖前高後下之邱,猶遠相及。 及,如葛之蔓延相連及 前高後下曰旄邱。諸侯以國相連屬 旄邱之葛兮,何誕之節兮」,傳: 興諸侯憂患相及,取義自 不我憂」。 一地,乃多日 曰:『旄邱之上有葛,其節何 土 其職,故 氣 姚説謂訓「闊」 緩 而不相恤,是 則 也。 蔓 其臣於君 生 證。 誕,闊 此傳以 確。 闊 蔓愈長, 無據,非 節 覃,延 其訓 而我 事 何 也。 憂 亦 興 葛 延 心 興

> 延蔓則。 緣詩説物,於物情未必有當 疏 廢 也 愈長。 姚 氏 此自然之理,非 日 : 「葛白・ 有 也 節 關 初 土氣。 生節 鄭氏

覽 《廣雅》:「以,與也。」《江有汜》、《擊鼓》、《桑 阜,三年不動,不飛不鳴」云云,其下引《詩 與「必有以 柔》箋並云:「以,猶與也。」然則「必有與也」 來。 故傳此『言與仁義』,不云『必』,由『與』自彼 德。」正義云:「言『與』言『以』者,互文。 『必』也。」案:此 者,自己於彼之辭,與者,從彼於我之辭。 也。」「何其久也,必有以也」,傳: 以二字本通。 以,由也。」此「必有以」者,言「必有由」 下云『必以有功德』,是自己情,故云 成公賈諫 何其 也」義當略同。 處也,必有與也」,傳: 荆 疏 《漢 莊 析義甚精。其實,「與」 王曰 書 「有鳥 • 《吕氏 劉 向 止于 春秋 傳》注 「必以 「言與仁 南 審應 有 曰 : 以 義 功

必似 之。 有與 相 牲 所據必三家詩有讀「以」爲「似」者,故此讀從 也。」注:「以,讀如『何其久也,必有以也』之 仁義、功德也。讀者宜善會之。《儀禮・特 即詩意而推言之,非截然「與」「以」二字分屬 久之必有所爲 曰 以」。」《釋文》云:「以,依注音似。」案:鄭 饋 恤 必有似 二何 有 食禮》:「主人 (也。]其莊王之謂邪?」此亦大概言其遲 可 知矣。 相 其 恤之意故 也者,謂所以久於衛者,其君 久 耳。 也,必 毛公所謂仁義功德者,殆 也。 西面再拜,祝曰: 籑有 有以 然曰「似」,則非 也 何 其 處 也 真能 臣 以 必

亂 裘。 古人「匪」「彼」通 傳所謂「大夫」者,明指衛之大夫。 蒙戎喻 ,與《左傳》士蔿所言同。 蒙戎,以言亂也。 狐 裘蒙戎,匪 用 車 《桑扈》「彼交匪敖」,襄 不東」,傳:「大夫 不東,言不來東 匪 車,猶言彼車。 也。」 狐 蒼

> 特甚。」 《左傳》引《詩》「如匪 《荀子·勸學篇》引作「匪交匪舒」; 云"「衛之諸臣行如是,不與諸伯之臣 雖婉而義近迂。下文「靡所與同」,箋説亦不 有戎車乎? 車不來東耳,鄭箋始以「匪」爲「非」,言「女非 也。」《廣雅》亦云:「匪,彼也。」毛公直 如傳之直截。「靡所與同」傳云: 五行志》引亦作 二十七年《左 傳》引 何不來東迎我君而復之」。 「匪」,《采菽》「彼交匪 作 行邁謀」,杜注:「匪,彼 匪 一交匪 「無救患恤 敖」,《 同。 言 襄八年 同也。」箋 漢 其 非 一彼 詞 之

《稽古編》云:「衛不救黎,而狄患終及于衛。以微弱,正謂衛臣不知救患恤同,苟且偷安,則「之子」自指衛之諸臣。所謂始而愉樂,終則「之子」自指衛之諸臣。所謂始而愉樂,終

黎臣 詩 ,示戒深矣。」 見 微 知 著 故 以 流 離 喻 之。 夫子 録 其

梟。 猶留 其冤 甚。 鹠 雅 離」,且 通 論 雄 名解》云: 云二足而 詩 鹠 鳥 鷅 名 》上下文義,以 不可别者 鷅耳。 其解 二流 獸情狀。 陸璣《詩 離、《詩》所謂 也。」承 後人因 自來説「流離」者,皆以爲梟,惟姚氏《識 而 引 離此 仍用宋人「流離漂散」之説,殊不 張奂 羽 以《爾雅》文義按之,「上云鳥之雌 甚諦 况上既 黄 珙 謂 ,以翼右掩左雄,左掩右雌,下 1疏》則 案 鳥 故謂凡鳥之少美長醜者,俱呼 例,且飾爲食母則醜之説 之禽,四足而毛謂 云 有 鶹鶇爲 惟 高 留 郭 釋梟鴟,此不當復贅,明 『栗留』、『離留』之通 云「白關 不信《毛詩》之「流 熟食母 離之子」,並 注《爾雅 凡鳥 而 少美長醜者之 西謂 但 姚 之默 未嘗指 云「鶹 氏 梟) 皆統 據 離 爲 何 ·强 鷅, 知 即 爾 流 爲

> 離 《詩》作「流」者,乃後人所改。 《詩》字本作 「流」,則宋人自王介甫後,俱以 雅釋文》云「留離」、《詩》字如 流音留」者,亦後人所改耳。 」者,真所謂郢 留 書燕説矣。 離 觀 郭 注 《詩》字既不作 此者可見。 引 《詩釋文》云 「漂散」解「流 《詩》及 今 爾

《漢 長。 學。」顔注 服」,乃顔師 爲盛飾。」承珙 賢良》云『子大夫褎然爲舉首』,服虔注云: 袂之名,从衣,从采,引申之爲盛飾, 者,康成之妄説耳。 「褎然,盛服貌。」正 | 石「枝葉長」是也 書・敘傳》又云:「樂安褎褎,古之文 《生民》「實種實褎」,傳云「褎,長也」,箋 褎如充耳」、《稽古編》曰: 亦云:「褎褎,盛貌。」蓋「褎」本 古,非 案:《漢 服 祖 充耳 虔。 此 書》 詩義。 即瑱,施于冕服,故 陳 注 氏 訓 偶 其云『多笑』 「漢武帝《策 「褎」爲「盛 不檢察耳 亦 訓

仲 非 時君之不用,非賢者自作也。 謂賢者有輕世肆志之心,若自譽而實自嘲, 矣,無自譽而曰『碩人』者。」何氏《古義》曰: 辭,絕非自作之語。」朱氏《通義》曰:「朱子 『有力如 廣 也。 連、東方朔之流、春秋時恐無此等人物。」 義》曰:「賢者仕于泠官,詩 《序》云:「《簡兮》,刺不用賢也。」姜氏 既 稱賢者,豈以輕世肆志爲心乎。 虎』、『赫 如 渥赭」,皆旁觀 詩言『碩 人作此 費 人」多 、歎之 以 魯 刺

《初學記》云:大舞也。所以名『萬』者,何休 以 萬用入學』,《竹書》『帝舜十七年春二月入 然《商頌》曰『萬舞有奕』,《夏小正》曰『丁亥, 爲象武王以 「萬 方將 舞,干舞也。」何氏《古義》曰:「萬, 萬舞」,傳:「以干羽爲 萬人定天下,民樂之,故名之。 萬舞。」箋

萬舞止 宫側 焉 學,初用萬』,則『萬』之稱,其來已久,或但 是舞也,習戎備也。」」蓋謂萬舞之中 八年:『楚令尹子元欲蠱文夫人,爲館 則萬舞爲二舞之總名,明矣。』又《左》莊二十 將萬焉。」婦人之廟,亦不應獨用武舞也。然 舞而不及文舞邪? 萬舞爲武舞,與籥舞對言之,失經意矣。若 舞之中去其有聲者,故去籥焉。《公羊》乃以 舞,蓋《公羊》釋經之誤也。《春秋》書「萬入 吕祖謙云:『鄭康成據《公羊傳》以 案: 武舞名干舞,言干,則有戚矣。 萬 去籥」,言文武二舞俱入,以仲遂之喪,於二 羽舞,言羽,則有籥矣。 ·物得所之義耳。毛傳:『以干羽爲 非 而 專以萬舞爲武舞也。」承珙案: 爲武舞,則此詩與《商頌》何爲獨言萬 振萬焉。 夫人聞之,泣曰:「先 《左傳》:「考仲子之宫 或又以文舞爲籥舞 萬舞爲 -有武 孔穎 萬舞。」 文舞爲 於其 君 取 以 干

言之。 文舞,羽籥; 又疑萬兼文武二舞,而詩何以止言「執籥_ 盈數,義取衆多。 羽」,尤自相牴牾。總之,舞有文舞有武 所引《異義》、《公羊》説,亦云「樂萬舞以 羊》萬是干舞之義。」《詩》疏則從《公羊》説 籥皆備可知,次章「籥翟」,單就祭末錫 曰:「萬,大舞也。」故知毛説不 以萬爲干舞,籥爲羽 云:「尋杜注意,直云『萬,舞名』,不取《公 萬、羽之異,自是《公羊》之説。」宣八年 秉翟」? 洋洋,衆多 萬」以夷狄大鳥羽,則是萬亦兼羽舞 Ŧi. 書》言舞干羽,則 年《 凡舞,皆先武 不知上言「公庭萬舞」,則干戚羽 左 也。」《初學記》引《韓詩章 武舞,干戚,統名曰 傳》 《魯頌》「萬舞洋洋」傳云: 疏 舞。 云: 而 後文。 先干 而所 萬 是 而後 引《韓詩》説, 可易矣。 「萬舞。 陳氏《禮 舞之大名 羽;《樂 矣。 萬爲 爵時 句》 舞, 或 又 疏 鴻

爵」也。

「秉翟」,而繼之以「公言錫故見其「執籥」、「秉翟」,而繼之以「公言錫先七德而後人功。」然則祭末正當文舞之時,武》而後《大夏》,漢樂先武德而後文始,唐樂旄"、《郊特牲》、《明堂位》、《祭統》皆先《大記》言及干戚羽旄謂之樂,則先干戚而後羽

翟之輩 至以畀翟之禮施之,賤斯甚矣。 翟」,而《禮》所言韗、胞、翟、閽、寺者 爲舞有三,然四方及教國子弟非一 庭祭末之事,傳引《祭統》文者,以經 在宗廟公庭者爲正。下文「公言錫爵」乃公 但言其平時職業有此,而當日詩人所見則以 四方一舞。 公庭,宗廟之舞也。 方,四方之舞也,日 《稽古編》云:「如毛説,則爲舞者三: 故 云「樂吏之賤者 説小異而俱通。」承珙案: 鄭 中,教國子弟之舞也 以『方將』爲方且 也。 賢者失 胡氏 時之事 一、翟即 有「秉 傳雖 紹曾 一,缺

曰: 明辨》曰:「萬 燕禮恐無萬舞之事,終以從毛鄭爲 。」朱子不拘祭祀,故引「獻工」。 錫 爵之禮 舞 ,舊以公庭 文武 俱備,惟 爲宗 廟 於大祭 故 云祭末 妥。」 毛 祀 詩 用

於彼 也,可 義同。 其如此乎」,故《詩》曰『執轡如組』,《易》曰 育如 案:《淮 子曰:「非謂其 大毛公與吕氏同時,蓋皆有所受之也。」承 文章,言能 ·含章可貞」。 古義》曰:「《吕 神。 也。」聖人組修其身而成文於天下 以爲天下。」子貢 執轡如組」,傳:「組,織組也。 曰:「執轡 南 鄘 大上曰『我其性與』,其次曰『微彼 · 繆 治衆。 風 動於近,成文於遠。」此亦與 躁也,謂其爲之於此 稱訓》亦云:「聖人 干 如組。」孔子曰:「審 氏春 動於近,成於遠 旄》傳云:「紕 秋 曰:「何其躁 先己》篇 所以 也。」 在 御衆有 而 也 上,化 織 心孔 矣。」 此 惠氏 成文 日 毛 珙 言 : 組

> 文。 法御 也。 毛公傳義多本七十子之遺言,其來古矣。 不引《鄭風》。 轡如組」,『兩驂如舞』。案:四字宜衍。 旄》之忠告至矣哉!』」觀此諸書所引,足知 行於遠。 夫爲組者總紕於此,成文於彼,言其動於近, 總紕 今家語 四 馬 執此 也。」正 於此 孔子曰: 『爲此詩者, 其知政乎 好生》篇云: 法以 ,成文於彼,願 義以「總紕」二語 御民,豈不化乎! 「《邶詩》云『執 以 素 爲《家語 絲 引《邶詩》 紕 組之 ______

[三孔龠]者,謂 者,爲淺人所亂。 謂之籟,小者謂之箹。]段注 部》云:「籟,三孔龠也。 「龠,樂之竹管,三孔,以和衆聲也。」又《竹 曰『龠六孔』,許『龠』下當從毛,今作『三孔 大者蓋六孔矣。 「左手執籥」,傳:「籥六孔。」《説文》: 龠之三孔者,則名籟也 鄭注《笙師》、《少儀》、《明 然於此 大者謂之笙 可 云:「《毛詩》 以 正彼。 一, 其 此云 其 傳 中

龠爲六孔,而籟別爲三孔龠耳 孔」,此則以龠有「笛」名,故單舉笛孔言之。 蓋皆舉其 雅》、應氏《風俗通》皆同鄭注,以籥爲三孔 珙案:段 説文》:「笛,七孔筩也。 説是也。 中者言之。 「籥 如 笛 = 趙注《孟子》、郭注《爾 若《廣雅》又云「龠七 孔 羌笛三孔。」亦猶 鄭 專爲: 籟 耳。 承

也。 之『榛』與『栗』並言;《曹》之『榛』上有『梅』、 雅》『榛楛濟濟』,凡五見。 栗』、《曹》『其子在榛』、《小雅》『止于榛』,《大 無復辨矣。案,此詩『山有榛』,《鄘》『樹之榛 也。』皆以榛、業爲兩植。今經傳概作『榛』, 小栗。』《廣雅》云:『木叢生曰榛。』『亲,栗 从木,辛聲。』《鳲鳩》釋文云:『榛,木叢 「榛,木也。 《字林》榛木之字從辛、木,云似梓,實 「山有榛」、《稽古編》曰:「《説文》: 从木,秦聲。』『亲,果實如 以文義觀之、《鄘 小栗。 生 如

味,遼、代、上黨皆饒者,此即李時珍《本草

「業」。 要術》皆引《詩義疏》,云榛有兩種。其一種 乎 子如杼子、味似栗者,既明指 別,經傳則「榛」「枽」多溷 矣。」承珙案:陳説是也。「亲」「榛」二字本 之『榛」,先儒皆以爲栗實也,字當作『亲 韋昭注云:『榛似栗而小。』則《邶》與《大雅 皆味如栗。《周語》引《旱麓》詩『榛楛濟濟』, 據,然陸《疏》謂『山有 栗也,其叢生之榛乎! 故此棘是茦音册。 『榛所以爲藩也』,孔云棘榛皆『爲藩之物』, 「榛」,大抵多係「枽」字。 下 樹之榛栗」,此即《説文》「實如 有『棘』, 其 『止于榛」,前二章爲『樊』與『棘』,毛云 棘者 種 形 小棗 如 刺,非小棗,則『榛』亦非 木 蓼 ,皆果實,二『榛』其 榛』與『樹之榛栗』,子 ',生高丈餘 《太平御覽》、《齊民 餘二『榛』,經無 爲一。 爲「山 《詩》有 小栗」之 作胡 有榛」及 明 小

所謂 果實者四,惟《小雅》之『榛』爲叢木。」可爲 《青蠅》之「榛」、《説文》「榛」下「一曰叢木 間,未必産遼果。」是也。《大雅》之「榛」與 堅,仁白而 也」,今本作「一曰菆也」,誤,惟《一切經音 郭注亦云「榛子似栗而小」,與韋昭同。至 所有。 《鸤鳩》之 「榛」,陳氏云: 「曹在兖豫 行食之當糧者,今人尚名榛子。此非《詩》中 義》所引不誤。陳氏云:「《詩》五言『榛』,爲 「栝」並言、《山 詁 「實如 圓,大如杏仁,亦有皮尖」,遼東軍 櫟,上壯下锐,生青熟褐,殼 海 經 西山 經》「下多榛楛 厚 而

文》『苷』字解云甘草矣,倘甘草又名大苦又『苓』作『蘦』,孫炎注云:『今甘草也。』按《説「見《邶風》、《唐風》毛傳。《爾雅·釋草》《説文》「苦」下云:「大苦,苓也。」段注云:「隰有苓」,傳:「下溼曰隰。 苓,大苦。」

耳』字。 《釋草》作『蘦』,不若《毛詩》爲善。 《爾雅》妄增,而此『大苦,苓也』固 爲名者,不可删其一字以同於他物。 當云: 『苓耳,卷耳也。』今本必淺人删其『苓 於『苦』下襲《毛詩》、於『盡』下襲《爾雅》,劃 凡『令』聲皆在十二部,今之真臻先也,凡 即畫一之,又何以不類列也? 考周時音韻 云『大苦也』,此『苓」必改爲『்盡』而後畫一。 雅》皆云:卷耳,苓耳。《説文》『苓』篆下必 則『大苦』即卷耳歟? 分兩處,前後不相 韻,倘改作『蘦』,則爲合音而非本韻。 兮》『苓』與『榛』『人』韻,《采苓》『苓』與『顛』 『霝』聲皆在十一部,今之庚耕清青也。 云『大苦,苓也』,中隔百數十字又出『蘦』篆 名苓,則何以不 卷耳 自名苓耳,非名苓。 類列而 顧也。『蘦』篆 曰:非也。 割分異 處 乎? 凡合二字 必淺 許君斷非 不誤。 毛傳《 如單云 人據 然則 且此 《簡 爾

零、《禮記・王制》《月令》「草木零落」、《釋 與《本草》黄藥相似。若甘草,則沈括又云, 苦」所云「葉似荷,青黄,莖赤有節,節有枝 證 苦』斷非苓耳 蘭 文》既有「大苦,苓」,即不必復有「蘦,大苦」, 書・敘傳》亦作「苓」,而《爾雅・釋詁》又作 文》俱云「零,本又作苓」,《管子・宙合》、《漢 枝如槐,高五六尺,與孫説形狀不類。故知 當」者,據《詩正義》,乃本之孫炎,其形狀正 赤。」此乃黄藥也。其味極苦,謂之大苦。郭 云甘艸,非也。」承珙案:郭注《爾雅》「蘦,大 云:《爾雅》『蘦,大苦』注云:『葉似荷,莖青 《毛詩》作「苓」,《爾雅》作「蘦」。 大苦」非甘草。 也。 ,落也。」惟單言苓者,自非 芄 然則『大苦』何物? 蘭 ,而『苦』篆『苓』篆不類廁,又其 單 云 但「苓」與「盡」字本可通,故 葵, 非 鳧 曰:沈括《筆談》 葵 是 卷耳,而《説 也。 如零落之 此 一大 相

此皆當以段説爲是。

者」。 爲碩人。蓋周既東遷,詩有思西周之時有如 世之人。江左諸人喜言中朝名臣,亦此 指周室賢者,「彼美人兮」指碩人,或疑首言 也。」説亦通。」承珙案:鄭箋以「西方美人」 人兮」,指碩人也,歎美其真西周之人而 於西周之賢士大夫也。「彼美人兮,西方之 「云誰之思,西方美人」,見碩人而慨然 有榛,隰則有苓,惟 事之邪。 于西周之盛王。『西方美人』即《序》所謂『王 藝堪爲王臣,見衛之不用爲可刺,而 之人兮」,朱氏《通義》曰:「此詩極 |句傳云「乃宜在王室」,則亦以「彼美人兮」 碩人」,末言「美人」,文義乖異。 蓋言如此 云誰之思,西方美人。彼美人兮,西 東萊曰:『詩歎碩人之賢,謂 碩人,安得遇西周盛 西周然後有此 然毛於末 稱 人物也 王 因 碩 非 有懷 有 人才 而 今 思 方 則 承

中,人同而稱異也。」 思,後曰『美人』,言其才。 固無嫌于一篇之物。 范氏《補義》曰:「前曰『碩人』,言其此人物,而因歎美衛之賢者可爲西周之人

泉水

不誤,今本《釋文》乃後人妄改耳。云:「毖,《説文》作泌。」是呂所見《釋文》本

是也。至云「古之來媵 也。《日知録》曰「諸姬」猶《碩人》之「庶姜」, 此言諸女之中,使其自擇,亦非以姑姊爲媵 庶其,非以爲媵。昭二年,晏嬰請繼室于晉 姑姊爲媵者。襄二十一年《左傳》:「邾庶其 娣,又謂姑姊即諸姬。考之諸書,從未有以 姓之國,其年之長幼、序之昭穆則不可知 曰:「猶有先君之適,及遺姑姊妹若而人。」 來奔,季武子以公姑姊妻之。」此謂姑姊同嫁 未嫁之女謀之乎?《集傳》既以「諸姬」爲 夫欲謀婦人之禮,當就傅母而問之,何爲與 爲未嫁之女,謂「我且欲與之謀婦人之禮」。 嫁女,同姓媵之」者,是也。 正指姪娣而言。《左傳》成八年。 「孌彼諸姬」,傳:「諸姬,同姓之女。」此 而 爲姪 鄭箋乃以「諸姬 娣者,必皆同 所謂「諸侯 姪

有

姑 「媵者何? 伯姊之稱 0 諸侯娶 承 珙 案 一國,則二國往 公羊》云 與「

此正用箋義。 媵之,以姪娣從。」既曰「姪娣」,而其中乃有 云:「衛女思歸 嫁或在室者,斷非首章之「諸姬」。箋云: 姑姊,古人正 甯則又問姑及姊,親其類也。」杜注《左傳》 名不應如此。 范氏《補義》曰:「不言兄弟而 而不得 故 願致問於姑姊。」 此「姑姊」蓋 其别

若偶然諮諏而謂必以其序,禮豈如是之譾譾拘拘者哉!」 在其父母國 盧召弓曰:「「問」之爲言「問訊」也。問,遺也。諸姑、伯姊 言姑姊,遠嫌 者也。 也。」此亦足補鄭義之所未備。 故「君子曰: 禮,謂其姊親 而先姑 也。」

文》:「僇,一 正字,聊,借字。 聊,且略之辭。」正義云鄭以「聊」爲「且」,與 聊 承珙案:「聊」之本字爲「僇」。 與之謀 曰 且也。」「聊,耳鳴 」,傳: 經傳皆假借爲「聊」。 聊, 願 也。」箋云: 也。」是僇, 「願」 《説

也。 能用,吾憖寘之于耳。」言吾且寘之于耳也 轉。《小雅・十月之交》「不憖遺一老」、《釋 「且」,其例正同。 爲「且」,亦爲「願」,故「聊」爲「願」,亦爲 注《漢書•五行志》曰: 注:「憖,且也。」王肅注《家語・終紀》篇同。 義略同。哀十六年《左傳》「不憖遺一老」,杜 文》引《小爾雅》:「憖,願也,强也,且也。」三 訓「聊」爲「且」耳。又「願」與「憖」亦一聲之 者,多係且略之意。 也,甯儉」之類。凡上言「與其」,下言「甯」 之爲「願」,亦聊且之意,如《左傳》引《夏書》 爲一聲之轉。 「盍亟索士,憖庇州犂焉?」蓋言且 曰「與其殺不辜,甯失不經」,《論語》「與其奢 且」,古義 《楚語》靈王謂白公子張曰:「不穀 有相 《説文》:「甯,所願 《晉語》伯宗妻謂伯宗曰 近者。 故訓「聊」爲「願」,猶之 「憖,且辭也。」「憖 古人讀 「願」與「甯 也。」「甯 庇州犂 應劭

且留 得相樂者,言如雲之女非所思存,甯自樂其室家,猶云我甯 樂我員」,傳云:「願室家得相樂也。」亦以「聊」爲「願」。 與子同歸兮」,傳云:「願見有禮之人,與之同歸。」 爲我耳。 而 聊」爲「願」,故云「願室家得相樂」,箋訓「聊」爲「且 願 聊」爲「且」,正所謂表明毛意者也。 韋 可 與「且」同意。 ,已不能通 昭 以樂我。 箋云「且留樂我員」,亦非與毛異義。 注皆云:「憖, 亦誤認傳箋文義有異。 此 故訓矣。《鄭風・出其東門》「聊 此傳以 願 也。」韋蓋猶知 「聊」爲「願」,箋以 《檜風・ 疏謂 唐人作 素冠》「聊 亡,故言 古訓 傳以 願

禰 適國郊也。」正義云:「或兼云「干言,所適國郊」者,言: 所經。」「出宿于干,飲餞于言」,傳:「干,所 衍字耳。 泲」「禰」但言地 地名。」箋云:「沸禰者,所嫁國適衛之道 出宿于游,飲餞于禰」,傳:「济,地 定本、《集注》皆云:干,所適國郊。」箋云:「干 禰、未聞 或 . 郊 一,似 遠 名,不著何 近同 傳意本不以 異。」承珙 國,獨 **沸禰** 案 於三章云 爲 傳于 所 名。 滴

《紀》「柏人縣有干山、言山」,蓋柏人與内邱 《水經注》「泜水又東南逕干言山」、《隋 國之地,特鄭箋爲此説耳。 縣東南 爲父母之國地名,「干」「言」爲 文「女子有行」文義緊相承接,雖不言衛地 「言」之下有「遄臻于衛」之語,自非衛地,亦 臨邑之泲廟、冤句之大禰溝當之。 地,於毛義爲近。 自可知邪? 連界。今直隸順德府 不得以東郡之發干、衛國之竿城當之。 延袤數十里,西連 漕」明言衛邑,而「沸」「禰」不言者,豈以下 邢州内邱縣有干言 思須與漕」、《水經注》: 衛詩》云『思 漕 《吕記》、嚴《緝》皆以 須與 亦作 游禰既近衛都,則不得以 漕』也。」案: 内邱縣界者,是也。 「曹」,即白 唐山 山」、《御覽》引李公緒 「濮渠東逕須城北 縣西北有干言山 但傳於末章「須 馬縣 須 適衛所經之 城城在 「沸」「禰 若「干」

滑 邢州之干言,其爲所適國之地 縣 東。 箋 云須 漕 自 衛 而 來 敷? 所 經 邑 則

車,以 子以至大夫皆有留車反馬之禮。」故此箋讀 嫁時乘來,今思乘以歸。」《鵲巢》正義引鄭 捷」,與下「遄臻」義 以還我行者,謂以便捷我行也。 之還兮」之「還」,彼傳云:「還,便捷之貌。」 還 還 箴膏肓》云:「禮雖散亡,以《詩》義論之,天 車」爲還反之還,似較傳義爲勝。 迴其車」,似 「還我行也。」案:傳意蓋讀「還」爲「子 載 脂 載 牽 ,還車言邁」,傳:「脂舝其 非。 複。 傳意但釋「還」爲「便 箋云:「言還車者, Œ 義解爲

『過」二義俱可通,而文義亦明順。《集傳》訓差也,張氏釋之,以爲不大有害。則『遠』述之,以爲不遠禮義,稍迂。鄭訓『過』,言非有過字,毛訓『遠』,言至衛亦非遠而有害也;王肅「不瑕有害」,陳氏《稽古編》曰:「『瑕』

《國風》之「不瑕」異義,亦言各有當而已。 遠害。至《大雅・下武》「不遐有佐」傳云「遠 於正道不遠有罪過乎? 毛雖無傳,亦當謂遠有愆也。 也」、「不盈,盈也」之例。 夷來佐也」,此則謂不遐,遐也,猶「不顯,顯 爲 不至遠而有害,《二子乘舟》則言二子之不 承珙案:此及《二子乘舟》,傳雖皆以「瑕」爲 ·遐」之假借,而義各不同。 『何」, 則當 云 不 何 有 害 言其近也。」此又與 《抑》「不遐有愆」, 經 此言遄臻于衛 文 故箋云:「是 爲 不 辭 矣。」

之説。 者乎? 之肥 泉水有二 北 出 非。」承珙案: 義,而毛鄭諸家之解當有師授,不可盡以爲 其援據似不謬矣。 義 流,左右翼 有不同,河 合,又東南注於淇水爲肥泉,是異出同歸也。 左水東流 邶風》之舊也。 成 良餘山,俗謂之連 流 分爲 泉實異 虚 唐文粹》載 肥水。 設 然其注肥水云: 酈所據 南屈,合爲 源,皆出朝歌城北,右水南流 二水。」則 濟經流 佩 出 不 數 肥水 酈 同歸,疑舍人 源 者,元魏時之肥泉耳,未必 盧 注 舍人之説既不合《爾雅》文 尚非 , 異 然源 陰 出 潘《合肥 又 加山 馬 而 Ш 用 溝 出 酈 禹 溝水,又 「吕忱《字林》曰 謂 桑縣西北澤藪,東 同 出 水云"「濄水 ,亦或以爲獨 道元《水 績之故道,况其小 111 歸 同歸異 辨》曰 之言爲是,云: 谷流 心此 東與 變,古今多 經 亦 爲「肥」之 注 「肥水出 美溝水 用 又東 東 Ш 肥水 舍人 以 屈 也, 南 衛

《爾 而已。 也。 雞 違 合于一源,分而爲肥,合亦同也 流二百里出壽 南 此文足爲《爾雅》、毛傳之證 肥之言飛 也,故 流逕合肥縣 鳴 雅 是山 Ш 》「歸異、出 其源實同 北 以言自同 也,高不過百尋,所出 也、非 流二十 南、又東南 春 同流 也。 而 西,投於淮。二水皆 而 里 所 所 飛 ,肥」,言所 流 必 實異 分 入漅 兩 而 張 也,故 爲二。 湖 故 其翼; 段懋 惟 出 其 同 日 皆 水 其 堂日: 合肥。」 而 曰肥 曰 分流 西北 歸 肥。 東 異

北門

貧謂. 者,困於財。」正義曰: 二事, 無財可 「寠,無禮居也。」徐 正義 終 寠 且. 分釋之,用對 以 貧 自給。」 Ē, 傳: 承 宴謂 珙案 寠 鍇 文 者 曰 則 無 别之例。 傳 財 無 阼 以 可 階升降, **寠、貧爲** 以 也 備 《説 貧

之意。 所以行 禮,故《曲禮》「主人辭以宴」即無財 字从宀故耳。 自當從毛分二義也 貧則更甚於寠,經文言「終」言「且」, 禮 貧 其實衹是貧者不能以 無 禮 ,故先見於屋室。」此 不能 貨 備禮 財 以其 爲

《楚辭》八見,並同此詩。末三句兩「哉」字既 之。李氏因篤曰:當以「爲」「何」爲韻。」承 相爲韻,「爲」「何」又自爲韻 珙案:爲,古音譌、(詩》凡七見、《易》一見, 「『哉」『之」以語助爲韻、《詩》中亦或有 天實爲之,謂之何哉」,顧氏《詩本音》

《日知》 伐之事謂之王事,其國之事謂之政事。」承珙 子事,直以戰伐行役皆王家之事,猶《鴇羽》 有王命役使之事。」正義曰:「『王事』不必天 云『王事靡 王事適我,政事一埤益我」,箋云:「國 録》曰:「凡交於大國、朝聘、會 鹽」。 於時甚亂,非王命之事也。」 盟、征

> 伐鄭;桓五年。春秋之末,復爲敬王城成周 案 : 王命之事乎? 定元年。 事」爲天子之事。 詩「王事」與「 又從劉文公伐楚,定四年。 况春秋之初,衛人從桓 政事」分説 則 明 安得云無 明 以「王 王

七六

實與 《韓詩》云:「敦,迫。」承珙案:「敦」與「督」 與 傳》「靡號師 傳》「以禮敦 南 逼也。」傳言「敦,厚」猶云「敦,篤」。 「使虞敦匠」亦言篤匠也。毛訓 有「厚」義而亦可訓爲促迫。 「篤」通。「篤」有「厚」義而通於督促,故「敦 聲之轉。 「投」對,敦亦投也。 兵略訓》:「敦六博,投高 韓 「王事敦我」,傳:「敦,厚。」《釋文》引 同意。 《廣雅》:「督,促也。」「督」又與 矢敦奮撝之容」注云:「敦猶 勸」注云:「敦,猶逼也。」《班 箋云:「敦猶投 敦六博者,言投瓊也。 《後漢書·韋彪 壺 雖似迂回 。」此以「敦」 擲 也。」《淮 《孟子》 泊 古

204

此可爲箋義之證。

手爲椎而椎之。」非是。 部》云:「摴,手椎也。 許本作「催」,與毛異字。承珙案:許於《手 取沮 撞擣挺挏之」。 亦相近,「搑」下云「推擣也」,是其證。 段注「手椎」云:「以 从人,崔聲。《詩》曰:『室人交徧催 文》:「摧,或作催。」《説文》:「催,相擣 也。」《漢書》有挏馬官、《顏氏家訓》曰「此謂 也、怨也。 ·訧」字之誤。古「尤」「訧」字通。 誰」,音千隹、子隹二反,云「就也」。 摧」義本相近。毛本作「摧」,而訓爲「沮」, 推」下云:「擠也。 沮壞義亦相因。 壞之意。 室人交徧摧我」,傳:「摧,沮也。」《釋 此 毛、許所據字雖異,而實則 與 蓋《人部》之「催」與《手部》之 鄭 箋 从手,崔聲。 《釋文》又引《韓詩》作 椎、疑當作「推」。 以推 爲刺譏之言者 就者,過 我。」是 推與擣義 就,疑 曰 也。 挏 擣

相近。

北風

《爾雅》及《毛詩》乃假「凉」爲之耳。傳於《凱 謂之凉風。」《釋文》云:「本或作古「飇」字, 凉省聲。」蓋《説文》所據《爾雅》本如是。今 同,力張反。」《説文》:「北風謂之諷。 子傳》注引作「雨雪其霧」。《廣韻・十遇》引同。 凉之風」者,以經已明言北風也。 風》、《谷風》皆全用《爾雅》文,而此但云「寒 雨雪有溥徧之意,故傳云「雱,盛貌」。《穆天 正義曰:「《釋訓》云:『其虚其徐,威儀容止 「旁」字。《説文》:「旁,溥也。 爾雅》作徐。 邪,讀如徐。」《釋文》:「邪音餘,又音徐 「北風其凉,雨雪其雱」,《爾雅》:「北風 其 虚其邪」,傳:「虚 『虚虚也』,一本作『虚徐也』。」 虚 籒文作雱。 也。」箋云: 雱者, 籒文 从風,

七八

^念北 徐者 也。」 也。」臧玉 者」也。 傳辨「作」爲「詛」,故言「作,祝詛也。」』是以 法乎毛鄭 徐』。」「孫叔然以『虚徐』訓『其虚其徐』者,取 邪」者,謂 合之。 『虚徐也』 三字當一氣讀,言 『其虚其 「一本」同。標起止云「傳虛虛」,或合并經注正義時所改本 古「詛」字。「詛」與「祝」别,故各自言「侯」, 詛』字説經『祝』字,兩『侯』字皆助句之辭,猶 言『虚邪』,中加『其』字以助句,毛作傳 ·作祝詛也」,毛以「作」字説經「作」字,以「祝 ·徐』。」《校勘記》云:「正義本當是「虚徐也」,與《釋文》 祝詛也』三字爲『作』字訓。 風》兩「其」字也。 孫 ,謙虚閑徐之義,故箋云『威儀 炎日 但傳質,詁訓疊經文耳,非訓『虚』爲 立林曰: 也。 虚 徐也。 因思《大雅》『侯作侯祝』,傳 虚 「案:作『虚 徐 故箋申之以「邪讀 威儀,謙退也。」然則 孔氏不察,乃云:『作, 徐 不知此四字連 也」是。 虚 徐 蓋經 以 寬 如 連 虚

《易》『蒙者,蒙也』,謂此『蒙』,草名之字,其 例。 也。 之要,乃衣裳之要也,正與此『虚,虚 破字之例,鄭恐人疑經「邪」字與傳「徐」字 「虚徐」二字爲疊韻形容之語,人所易知,故 義則訓蒙覆也。」承珙案:臧説是,段説非 也」,經傳不可枚舉。或疑毛傳內無此,因 也」、『蒙者、蒙也』、《説文》亦云『巳者、巳 者,謂此邱虚字即空虚字也。 邪』如《管子》之『志無虚邪』耳。『虚,虚也 讀, 毛謂經言「其虚其邪」者 『要之襋之』傳曰:『要,楆。』 毛公時安得 一例。 「楆』字? 楆,本作『要』,謂此『要』非人要領 「經文作『邪』,鄭始易『邪』爲『徐』。 猶《北風》傳三字連讀 古者『虚』本訓邱虚,其義則空虚也。 經作「虚邪」,傳總釋爲 如《易大傳》『比者,比也』,『剥者,剥 猜 也。 虚 「虚徐」。 古之訓詁 徐 段 也 懋堂 毛意『虚 蓋當 但毛無 也 有此 曰 : 有 舉 時

耳。 明,故毛但以「徐」訓「邪」,不復釋「虚」也。 字作訓? 若如段説,毛但云「虚,虚也」,何以不爲「邪」 雅》釋之,則更明白曉鬯矣。 異,故爲 工記》引《弟子職》作「志無空邪」,可見「虚」與「空」同義*易* 容止者爲正。「虚徐」對下「既亟」言之,歐陽 注以「虚徐」爲「狐疑」、《管子・弟子職》注 虚其徐」,固學《魯詩》者亦以「虚邪」爲「虚 本義》言「無暇寬徐,當亟去」,似得傳意。 承靈訓其虚徐兮」,曹大家注引《詩》作「其 虚邪」爲「僞」,此皆從疊韻之字,因聲託 釋《詩》則應從《爾雅》,以「虛徐」爲威 可知 比 傳文雖簡,恐無此法。鄭司農注《考 經 方其音 師 相承,音讀有自來矣。 曰「邪讀 如 班 徐」,并 固《幽 用《爾 通 至曹 賦》 儀 義 以

「仲氏任只」、「母也天只」,「且」如「乃見狂案"「只」與「且」,單言之亦爲語助,「只」如「既亟只且」,正義云"「只且,語助也。」

《載芟》「匪且有且」,傳乃云:「且,此 《經傳釋詞》曰:「只,詞之『耳』也。 辭。」非歸其尸盟也。』《晉語》曰:『文公學書 此也。」於「其樂只且」云:「君子遭亂,道不 於此箋云:「言今在位之人,其故 以「只」爲「耳」。「咫」與「只」同。 矣。』言吾但不能行耳,所聞則已多矣。」此 於臼季三日,曰:吾不能 寬仁者,今皆以爲急刻之行矣。 所以當去以 辭。《文選・西京賦》「其樂只且」李善注:「且,辭也。」惟 狂也且」及此「只且」等,皆無傳,蓋皆以 且」之類,連言之則爲「只且」,此詩 「狂童之人日爲狂行,故使我言此也。」鄭意 行,其自樂此而已。」於「狂童之狂也且」云: 「乃見狂且」傳云:「且,辭也。」他如「狂童之 七年《左傳》曰:『諸侯歸晉之德只,杜注:「只: 且」及《君子陽陽》「其樂只且」之類。 行咫,句。 且者,毛 威 「既 聞 襄二十 王伯 儀 也。」鄭 爲 則 虚 亟 語 皆 多 只

「此」,於語不順,故不如以爲語辭。只且者,似皆訓「且」爲「此」。但「只且」連文而訓爲

猶語助之「耳矣」也

湝 飛 辭》注云「瀏,風疾貌」是也。 不如以「喈」通作「湝」。 傳云:「强壯貌。」强壯與捷疾義 文》云:强也。」承珙案:《北山》「偕偕士子」 霏,甚貌。」何氏《古義》曰:「喈,通作偕,《説 「《説文》無『霏』字,古當作『非』。 非, 可 也。」 借爲風之狀,如瀏 湝也。」《鼓鐘》傳云:「湝湝,猶湯湯。」《漢 溝洫 北 風其階,雨雪其霏」,傳:「階,疾 志》集注云:「湯湯,疾貌。」水之狀 本流清 《説文》:「湝,水 霏者,段氏云: 貌,而王逸《楚 亦 相 成,然 貌 猶 流

黑 也 猶 莫赤 今君臣 别 匪 也 相 狐 承,爲 グ,莫黑 箋云:「赤 悪 匪 如 烏」,傳:「狐 則 狐 案: 也, 黑 傳 箋本 則 赤 烏 烏

> 外 不祥。 其爲政 匪泉」二句例之,則文義並同,不必於傳箋之 狐、烏爲不祥之物。 自 程 子以 求别解矣。 平易,歐陽《本義》以 而 爲狐 惟嚴《緝》以《小弁》「莫高匪山,莫浚 知暴虐之禍將及於人, 朱子則 赤烏黑,以 夫烏稱孝鳥,未可 爲 其 喻民之各呼其 色而 知其物, 謂 故 類 之 以 觀

静女

《序》反言夫人無德,所言者作詩之意,非 大半焉。 「《序》以『刺時』書者十有三篇,言男女者 祖歐陽《本義》,指爲淫奔期會之詩。 之詞也。横渠、東萊皆從《序》説、《 夫人無德。」《稽古編》曰:「詩 而以『静』名之,可乎哉?」《虞東學詩》曰 《序》云:「《静女》,刺 衍者謂衛君無道,夫人無德,而 時也。 極 稱 衛 集 君無道 女 夫淫女 德 傳》 詩 獨 而

《著》、《園 也。二 鄭皆 敢 諸 尼 造 師 作,故序《詩》者但 裘》、《鴇羽》、《東門之池》、《東門之楊》、《澤 人其 不 於彤管之明白可 陂》十三篇但言「刺時」者,蓋 知此管爲何物」,則不免於遁矣。 可謂 毛 憑 授受相承 里巷歌謡,已不 虚撰 事 鄭合也。 承珙案:《三百篇序》凡有 杜 定 以 女德 獨於《静女》、《氓》、《伯兮》、《有狐 以實之者,當時必有依據,斷 九 淫,彤管不可比芍藥,則古説不可 注 、造、蓋: 有桃》、《十畝之間》、《杕杜》、《羔 年《傳》:『《静女》之三章,取彤 必必 貞静爲説,引古女史彤管之法。 雖悦女美,義在彤管。』是古 歐陽氏直例諸《溱洧》之類,而 有 其 據者乃謂『樂器亦有管,不 慎 所自,故《序》者得以 以「刺 能 也。 確指其 時」一 然《詩》中大義 在采詩時,第得 爲何人何 語括之,亦 美刺 總之,静女 非鑿 而 推 事 則 指 經 不 之 × 空 管 演 廢 説 其

> 姬」也。 賦》、《高唐賦》。 也。」天下有奔女而可目之爲貞者乎? 猶《東門之池》亦 其説耳。 傳云:「 此詩 注 思静女, 並引《韓詩章句》曰: 静, 日 「刺 貞 而《序》以 静 時 也。」《 一而 詩 文 有 爲 選》《思玄 「彼美淑 刺 時者

爲 故 也。 之女,既有美色又能待我以禮者,而 高之處。 傳意蓋言其以禮待聘,自處甚高 侯伯之城高三雉,隅高 雉,隅高 以文害辭,以 重《五經異義》:「古《周禮》説 而 衛君内無賢 假 動 實,故疑「俟於城隅」非 城隅 ,自防如城隅。』《周禮 城隅,以言高 静女其姝,俟我於城隅」,傳:「俟, 九雉,公之城高 爲 喻 辭 妃之助,故衛之君子思得 害志者矣。 箋説 而不可踰。」箋云:「待 申 五雉。」是城隅者,最 之愈明。 静女之事,真 五雉,隅高 《潁 匠 濱詩 人》疏 天子城 後 七 引許 儒 進之於 静 雉 高 所 誤 日 以 禮 待 ; 叔

氏炳 言高 君 見』也。」其説亦 也,即『于歸秣馬』之意也。 曰:「城隅 而 思 不 而 可 不 踰 可 也。」此 得, 通 加 曰『俟』者,從其人想望之 是 以 説最 踟 躕 得傳箋之意 故下曰『愛而 而 求 之。 城 隅 姚 不

媵俟 動 管、美其荑,設言以欣慕其 乎説舍近郊也。荑,亦以爲潔白之喻。 管者,女史書宫中之法度。 者,然後人。 而, 刺,思賢媵懷女史之法者也。」承珙案:《韓 而 臺謂之城隅。 外傳》 親迎,惟適夫人耳。 ,觸情縱欲,反施亂「亂」字從《說苑》補 迎之禮。 以待親迎之禮。 黄實夫曰「俟我於城隅」 Ĕ 『愛而不見』,迎之未至 「不肖者 諸侯娶一國,二國往 『静女其姝,俟我於城隅』,此 戴氏《詩考正》曰:「城 ī 精 化 **媵則至乎城** 人耳。 始 『自牧歸荑』,言 如「俟我於堂乎 具, 而 《静女》之 下以 一勝之。 生氣 也 化,是 美其 俟 彤 迎 冕

> 高爲當。 隅。 淫奔期會之作,决可知矣。 城隅以表入門之所,亦屬牽强,不如 隅,詩遂失傳。 者,已有婚姻之義。 道端,乃陳 以 其姝,俟我乎城隅。 不然,精氣填 人兮,懷婚姻也,大無信也,不知命 侯我」者,不爲無本。 (説苑 年 必謂門臺謂之宮隅,城臺謂之城隅, 壽 辨物》篇略 亟夭 至《外傳》以是詩爲歌道義,則其 情 而 欲 溢 性 不知媵 以 而後傷,時 不 歌 同。 長 愛而不見,搔首踟 道 黄氏以 也。 戴氏以爲學者罕聞 至城 義。 據此,知漢 《詩》 不可過 《詩 下,何必定 爲如《著》之言 日 Ĕ: : 儒説 也,不 也。」賢者 『乃如之 毛 「静 鄭 是 此 城 非 喻 城 見 女

「僾然必有見乎其位」,正義:「僾,髣髴見董氏曰:「《石經》亦作僾。」《禮記・祭義》人,愛聲。《詩》曰:「僾而不見。」」《吕記》引人,愛聲。《詩》曰:「僾而不見。」,《説文》:「僾,仿佛也。 从

假借。 傳云: 異義。 石經》及相臺本作「止」。「志往」謂愛之,「行止 止 踟 雅•釋言》「薆,隱也」同訓 見。』《離騷》:『衆薆然而蔽之。』薆而,猶薆 然也。」今《詩》作「愛」,非古也。 也。」《釋文》:「僾,微 而不見。』《禮記・祭義》疏引《詩》:『僾而 ·揜、翳,薆也」,郭注謂隱蔽 烝民》「愛莫助之」傳云:「愛,隱也。」與《爾 』謂愛之而不往見。」於傳意似未盡 躕 「《説文》又有『愛,蔽不 而不往見。 「言志往而行止。」諸本皆作「行正」,惟《蜀 蓋所據本不同,不得謂作「愛」非古。 而此不言者,毛自作愛悦之愛,與許 箋云:「『志往』謂踟躕 見。」段 ,謂「愛」即「薆」之 · 見 也、《詩》曰: 也」。《方 氏《詩 承珙 協 小 案: 『薆 行行 言》 學》 二謂 不

凡七引此詩,如《琴賦》、《洞簫賦》、《思玄章句》曰:「躊躇,猶躑躅也。」案:《文選》注「搔首踟躕」、《文選・琴賦》注引《韓詩

作「踟 詩 韻 箸」,則與《韓詩》「躊躇」音相近。 作「歭踞」、《足部》云:「踞者,峙踞不 賦》、《思舊賦》、何劭《贈張華詩》、左思《招 此與《毛詩》「踟躕」字聲相近。 曰「蹢躅」,即《章句》之「躑躅」也。 》等注皆作 而義略同) 」,此後人據《毛詩》誤改耳。 「躊躇」,惟《鸚鵡 《心部》曰「篙 賦》注 又《足部》 皆雙聲疊 ·前也。」 《説文》 引同毛 隱

筆名, 載 銘》云『豪毛茂茂』,此皆三代文典也,已著有 圖,衆史舓筆和墨」,《太公陰謀》載武王《 此皆謬説。 始於秦,古以刀爲筆,不用豪毛,安得有管? 以爲女史記事所執,而宋儒疑之。 有管,樂器亦有管。 「筆」、《莊子・田子方》篇云『宋元君將 可謂古無筆乎? 貽我彤管」、《稽古編》曰:「彤管,毛 夫筆之由來古矣。 《解頤》、《新語》亦謂 可謂古筆用刀而 《曲禮》云『史 李氏 筆 傳 不 書 筆 筬

八四

造即 用豪 秦筆 毛 乎 耳。 董 又問: 仲 史官載事,故以彤管,用赤 舒《 答牛 『彤管何也?』答 - 亨問 ***** 日 蒙 曰 恬 所 前

心記 墨筆執 摻筆」、《説苑 是令百官有司削 筆事君」皆是,他若《管子・覇形》篇「桓 于曰「方臣之少也,進秉筆」、士茁曰「臣 足爲確證乎?」承珙案:三代典記言筆者, 中候》云『龜負圖,周公援筆寫之』。 書之」、《韓 行,而仲舒之論『彤管』與《詁訓傳》相 古未遠,所聞必有據。 「彤者、赤漆耳。 博物記》、崔豹《古今注》皆載其語。 有《國 事 案仲舒《答牛亨問》,漢短書名也。 、贖,從君之後」、《新序· 也。」夫有筆之理 語》魯里革曰「臣 詩 外 • 傳》周 指武》篇曰 方墨筆」、《晏子春秋》「擁札 舍日 又武帝時、《毛詩》未 與 以死奮筆」、晉董安 臣 王滿生曰「藉 書俱 雜事 以 生,具《尚 爲 一》同。 諤 其來 仲 合,不 之臣 公於 一以秉 舒 張 筆 秦以 牘 去 華 尚 書

尚

管。 《學齋佔畢》亦力辨其非。 惟《潁濱詩 能循彤管之法度以事其君,即不啻貽我以 引豐南嵎云:「『子張書諸紳」,必不以 謂之不 有煒,是以悦懌于女美也。 名『静女』?」此亦以 亦爲確證。 已駁之。 徐安道注 遂誤筆始於秦耳。至王介甫以彤管爲樂管 乙 「能遺我以古人之法」,蓋謂 言筆者 故下文即承此 樂其 律 馮鑑《事 多矣。 則謂是笙簫之屬,姚 ,燕謂之弗」,「秦謂之筆」,或 有 傳》最 歐陽《本義》云:「彤管自媒,何 法 而 ^ 得毛意。 後悦其美也。」蓋傳於首章 説 始》謂 而 文害辭 文》云 言之曰: 筆始蒙恬,史繩 其説 張氏次仲《詩記 宋儒 人君得 之過。 楚 寬《西溪叢語 謂 我思彤管之 形 説 之 管 此 此静女 傳明 筆 詩者 有 , 0 因 刀。 煒 此 彤 祖

⁰ 筆」,依《説文》,當作「聿」。

能 末章傳云: 謂彤管,「 云「女德貞静 遺我法則。」文義自相承一 可 説謂 非 而 有 爲 法 説 其 爆,乃 度,乃可説也」,「法度」 、徒説美色而已,美其人 探下文豫言之。 貫耳。

新臺

故言 復 詩也。」姜氏《廣義》曰:「宣公納子之妻,無 瀋 達 此 不至於從公之欲也。《序》云『要之』者,以前 成,齊女未至,猶意爲 何足以感悟 妻,作新臺于河上而要之,國人惡之而作 其 w 日 未嘗言自娶,於是作新臺使齊女登之,道 人理。所貴乎刺者,欲其君之感悟也。 意。 燕婉之求,而忽得此 序》云:「《 衛,弱 然則齊女之來,何嘗 而 刺之? 或 新臺》刺衛宣公也。 也 伋妻者,守從一之義, 齊 蓋此詩之作,新臺既 能 醜 殺哀姜之淫,何 惡之人也。」《詩 知 爲 宣 納 一婦哉。 伋 此 ... 之

> 想當然,固自 及《序》,然後情事畢露。姜氏、范氏之説,雖 不父,《左傳》雖具其 之,故曰『要之』而作是詩耳。」承珙案: 往娶之。 未必即是齊君女,故齊人以之許其父,而 六禮未行,公聞其美,乃自求爲夫人。宣姜 公娶之。』以理推之,當是先爲伋求娶於齊, 姜,生伋子,屬諸右公子。爲之娶於齊而 之而自揚其醜乎? 之,又何必 宣 甘心受恥 一何敢明 于衛? 新臺之作,所以 目 作臺 張 有 胆 一於河 理 且 要姜于中 事,而曲折 國君之嫁女,送必 上,使兩國之人 考《傳》:『宣公烝 説宣姜,而國 -路 ? 未明,得此詩 且既 耳 以卿 然於夷 宣 欲 人 而 惡 奪 目

爲》曰 新臺。』《輿地 通典》: 新臺 鄄 魏州 有 城在今濮州,觀城縣 廣記》: 泚」、《水經注》:「鄄 黄縣 有新臺。 開德 府 觀 汪 城 屬 氏《詩學女 縣 城 濮州 有新臺。 北 岸有 黄

八六

誤耳。 時之 名。 縣 縣 跡今不可考。」承珙案: 觀之間 里,而《水經注》云『鄄城北岸』,則 説 南 非 在 黄溝 冠 但 也 今東昌 觀城爲漢之畔 氏, 明 濮 得名; 冠縣 乃晉 爲 Ē 府 衛 統 冠 地 縣 地。 時 ,觀城 春秋 郵 觀本 \sim 有黄城,亦以黄溝 觀 城 通 在 城縣 時 爲 典》自 衛 濮 晉 河 地; 州 有臨 所 邑、《通典》之 西 圮 以 冠 地當 北 黄城 新 地 則 八 相 + 春 臺 在 近 秋 爲 以 故 鄄 餘

認爲「洋」,故謂《邶 作「泮泮」,即此一 也,盛也。 承珙案:《玉 河 ·文引《衛詩》「河水洋洋」,則此「洋洋」爲「津津」之譌 ,或作泮。」《類篇》亦 水洋洋」,師古曰:「今《邶詩》無此 河河 水瀰瀰」、《漢書 泮, 亡爾切, 亦 篇 「河水 「瀰,莫爾 詩》無此 瀰 瀰」之異也。 同。 瀰 地理志》引《邶 句耳。 《漢 字。」《集 奴奴 禮 書》所引當 王懷祖曰: 二切,深 小顔誤 韻 句。」 風》 明

> 泚、瀰 章『新 黄 記》、王氏《詩考》所引《釋文》皆同今本,不知 寫者誤屬二章,非陸氏之誤。 浘。」此所據《釋文》,正如段説。 章下云:「泚、《釋 章,誤也。」承珙案:黄氏佐《詩經通解》於首 盛貌。』《韓詩》:『浘浘,盛貌。』陸氏 明貌。』《韓詩》:『漼,鮮貌。』毛傳:『瀰 浘浘,音尾,云盛 洒,「《韓詩》作 矣。」次章「新臺· 泰泉何以得此 臺 同部,與洒、浼不同部。 有 泚, 有洒 河 漼 水 一一一云鮮 貌。 文》作 河 瀰 瀰』之異文。 水浼浼」、《釋文》云: 段懋堂 貌 漼 浼 毛傳: 瀰,《釋 然《吕氏讀 浼、《韓詩》作 曰 : 是今本係 漼、浘 山此 屬之二 『泚,鮮 文》 必 瀰 詩 作 與

據作 曰:「毛傳云:『燕,安 从 目,晏聲。 『曝』。 燕婉之求」、《 豈毛謂『晦』爲『晏』之假借,後人 《詩》 曰:『曝 説 文》: 也。 婉, 婉之求。こ 順 目 也。」許 相 戲 段 也 氏 所

字也」。 轉 同 因 詩》作「嬿婉」者,劉越石《答盧諶詩》、蘇子卿詩。 皆不引《詩》,《日部》所引當是《齊》、魯詩》。 字通,宴娓亦即 與?」承 《毛詩》自作「燕婉」,其訓「燕」爲「安」,蓋謂 韓詩》「嬿婉之求」、《説文》「嬿」下則云「女 燕」爲「宴」之假借。 寫 也 本文作「嬿婉」 改爲『燕』與? 又「嬔」下云「宴嬔也。」古「宛」「冤」 , 洪案:《文選· 燕婉。 而 就其 抑 《文選》注又兩引《毛 然《説文》於《女部》字 三家詩有作『暥』者 西京賦》李善注 字,未必毛 與 韓 自 引

肅 鮮者自西門』注:『不以壽終爲 正》云:「鮮,讀 不殄」意同。 鮮」。」《詩序 云:「少也。」鄭箋改訓「善」。 籧篨不鮮」,鮮,毛傳無訓、《釋文》引王 廣義》云:「昭 不鮮、不殄,猶言須臾無死,尸 如《史記》『數見不鮮』之 Ŧi. 年《左傳》『葬 鮮。」與次 戴氏《詩 考 章

《列子》注亦云:「人不以壽 雖名述毛,每不能得毛意,此以「鮮」爲「少」, 殄,猶言病 之爲盡人所共知,不煩故訓 自有燕婉之求,若籧篨之人,世不鮮少也,世 固 氏《古義》云: 佞媚之行不少者之宣公。] 殊不成文義 不知作何 殄]皆言胡不遄死 云:「殄者,死之比也。」《潁 「殄」爲「絶」,而「鮮」不言者,意在當時「鮮 云:「鮮,盡也。」是「鮮」與「殄」同 辭》傳「故君子之道鮮矣」,《釋文》引 傳又云:「殄,盡也。」《説文》訓同。 殄」傳云:「殄,絶也。」《爾雅》訓 居餘氣耳。」承珙案: 不乏籧篨者哉」。 解。 而 不死 一説「方將 而正義衍之,云:「得行籧篨 也,蓋深惡之之辭。 者也。」其實「不鮮」、「不 許氏《詩深》曰:「齊女 姜説 燕婉是求,豈意世 是也。 濱詩傳》云: 死 歟 日鮮。」 同。 ? 義。 次 《易 《論 《瞻卬 章「不 毛 王肅 師 張 示不 衡 訓 湛 説 何

不殄絶也。」此並用王肅義耳。

耳。」承 狀。 之不能 擁 亦以其輪囷 云「菰 與《方言》同。 可使 媚也。以言媚人者,常仰觀顔色,病若籧篨 之,故名。 爲囷 之籧笛,其麤者謂之籧篨。』蓋粗竹席之用 蘧蔬似 腫 俯者 者。 輪 可 九」者, 九 戴 根 珙 (氏《詩 禾 知 俯,故又爲口柔之名。」段氏云:「不 大菌」。 土菌、生菰草中。」《類篇》作「蘧蒢」, 《晉語》: 則 籧 案: 一, 此 《爾雅》:『籧篨,口 擁腫 際、戚 考正 也 《説文》:「籧篨,粗 調捲籧篨 **爾** 即 蓋蘧蒢與竹簟之籧篨音同 名之。 菌光, 施 『籧篨 $\stackrel{>}{\exists}$ 雅》「出隧、蘧蔬」郭注: 雖 分别不 《説文》「圥鼀」云「其 亦取 《方言 而豎之,不可使俯 不 可 其 使俯。」其 能 柔也。』柔者, 樸 俯 地 竹 『簟,或 仰,其 椎 席 也。 鈍 疾 爲 之 似 以 謂

「新臺有洒」,傳:「洒,高峻也。」段氏

以 毛傳高峻義核之,則李孫是 承珙案:《王風・葛藟》疏引李巡、孫炎,俱 陖之假借字。 文》:『峻,陗 其頂平不高出也,洒下亦謂身斗 謂其 乙 洒 \sim 争峭 下爲陗下,惟郭注 爾 雅》『望厓 直。 也。」『陗,峻 凡言陖陗,皆謂斗直不可 又『夷 洒 上洒 而 爾爾 高岸」,高 也。」 下 雅 也 不屑」, 訓訓 峻 洒 同 峭 謂 陖, 夷 也。 其 上 頂 Ė 洒 《説 洒 即

按: 乃「潤潤」之假借。 又"「浼, 汙也。 『詵」,亹讀如『門』,殄讀 詩》:『亹亹,水流進貌。』不言何篇之注。 水浼浼。』」蓋浼本訓汙,《毛詩》作「浼浼」者 云: 説 文》:「潤,水 必此章『浼浼』之異文也。 「《吴都 河 水 浼浼」,傳:「浼 賦》『清 从 流 水,免聲。 許 浼 流亹亹」李善 从毛,故於「浼」下引 浼 如『珍』。」承 皃。 浼,平 从水, 《詩》曰 古音洒 地 注引《 閔 洪 也 ° 聲。 案: 讀 河河 如 韓 段

水極 而 詩 潤潤」之異文也。 波 流盛。」非 盛 《文選》注 則 與 地 也。 平矣。 引《韓詩》作「亹 傳云「浼浼,平地」者 正義云: 「河在平 亹」者, 地, 謂 又

離, 鼀 爲 《説 反。 黽, 也。 諸,其皮鼁鼁,其行圥圥。 **鼁鱦,鼋,力竹切。** 一得 **圥」當作「鼀** 也。』『其皮鼀 此鱦 文》「黿」下云: 爾聲。」戴 字,並讀七宿切。 鱦, 爾雅》轉寫作 得 詩》曰:『得此 或从首。」又「壟」下云:「鱦 音秋。」並 此 戚 電」。 氏《考正》曰:「《説文》引《詩》 施」, **竜」當作「鱦鱦」。** 「鼁」。 **電**鱦 非 《説文》誤并『鼁』與『鱦』 傳:「戚 **繩** 麗。」言其行 麗 麗。 也。」承珙案:《説文》 『竜』下當云『竜鱦,詹 之症、《説文》但 《釋文》:『鼁,起據 从黽、圥, 圥亦聲。 詹諸 施 不 也。 能 了其 配, 詹諸 其 名 詹 仰 行 又名 者。」 用 从 圥 圥

麗矣。 狀。 亦誤。 辟兵,壽盡五月之望」、《淮南 君章句》曰:「戚施 **鱦** 配,曰詹諸,無所謂 既誤「鼁」爲「鼁」,又以「鼁鱦 詩》亦作「戚施」,即以詩言「戚 其行圥圥者,圥本土菌,取其樸地輪囷之狀 寫致譌。 「電」下即承之曰「鱦 「醧」下云「其行醞醞」者,取其 **電从穴**, **電省聲**。 | 戚」乃「鼀」之借字。 「圥鼁、詹諸」,猶《虫部》之「掬鼁,詹諸也」。 「鱦」爲「鼀」之别體,「鼁」「鱦」同字。 鼓造辟兵」。 「鼀」「醧」二篆相連、「鼀」或 總之,一物四名,日 「圥鼀」之圥,音力竹反,鼀音七宿反 戴氏謂《説文》「圥鼀」當作 「造」亦與「戚」聲 或不省,作竈。 蟾蠩 配, 詹諸也。」 繩 《文子 電 離 也。 周 蝌 喻 上德》篇「蟾蜍 禮 鼀, 施」者爲 醜 一連文,自 相 《御覽》引《薛 故書以 施 説林訓》 惡。」是《韓 作 日 近 施 圥 配,猶 、《説文》: 「鱦 電 難進之 館爲造。」 鼀 爾 是轉 雅 作 故 爺 H

或 捕 施 謂若作 蚤」,高誘注: 則「醴」之借 「戚施」,不當訓 蟾 字。 蠩 **^** 淮 蟾蠩 南 。」。」字 脩 非 務 又作 也 訓》 蟾蠩

邪 ? 又 籧 匍 簟,麤惡堅强 比類之耳。 柔」、『面柔』、『體柔』之解,乃因三語 之名,故詩 뻬 身不能 篠 推 匐 口 籧篨、戚 此 柔 傳》從毛説,謂此二者,天下惡疾,詩 而 而言之,所謂言各有當也。 翁氏《詩 若《國語》云『不可使俯』、『不可 病 不能 詩 者 僂 似 以 兼二事疑之,不亦迂 人 者 刺 高 病 豈其 施,物名是其本義。 附 以 而 仰。 偃 宣 有 難 記》曰: 面 指衛宣 公, 刺衛宣者必 似 因 於屈曲, 戚施之蟲 自 柔 於 而 是取 者似 戚 人之病偃者,有似 也。 施 籧篨、戚 故 病 惡 至《 疾 僂,故又 肖貌 以 歐陽子 乎? 爲 蓋籧 爾 目 施 喻。 之。 雅 使 而 皆 口 蹒 篨 以 承 乃 訓 爲 惡 仰 《潁 之 珙 以 於 目 因 П 跚 辭 而 疾

> 下; 人。 於詩意不 王介甫又謂 求燕婉之樂,國 雉 箋用《爾雅》,訓 之言所以 而惡之,或俯 》以「鼓翼 其説亦 戚施不能 切 深 籧篨 通。 泄泄」喻宣公振衣奮迅,志在 惡 面 仰,以 宣公。 爲 人過其下者皆仰 不欲視之。此成何文理邪。 歐陽《本義》乃謂 不 口 能 刺宣公之無見於上。 柔、面 俯,以 李 迂 柔 仲 刺宣公之無見於 之狀 極 取 面 宣公作臺 ェ 正 其 視之,既 説 如 亦 婦 雄 鄭

二子乘舟

年之間. 爲越境,非十歲以下兒所 之,又生壽、朔。 位十九年而卒,姑以 年即生伋子,勢須十 虞東學詩》曰: 如何消 破,陸儼 朔又能 五 即 「《容齋 年然後娶。 Щ 位之初便 同母 能 「當舉 辦 潛兄 五筆》謂宣 也。 以 問 成烝 ,壽又能 既娶 然則· 穆伯潛 派亂,次 公在 十九 而 代 奪

生惠公,新

臺之作當在

即位之初年,烝

注云:「蓋年十五六。」正

義謂宣公即位三四

《左傳》云:「惠公之即位

也,少。」杜預

記 以 伯 其弟晉于邢而立之,是爲宣公。 宣公嗣爲諸 侯,去父亡十有六年矣。 其生伋子,豈得謂 爲 潛 以 其 衛莊公卒後十六年,而後桓公被弒,迎 爲宣公上烝 父 一尚 在,不 應 當 在 認 未即 爲 己子。 位之前。 按: 儼 **©**史 山

> 夷姜而 所不必疑者 傳》於此 生 事原委分明 伋 也 子自當 ()無不 在 其兄 可信,諸儒皆疑 桓公之世。 左 其

《郡國志》「陽平侯國有莘亭」劉昭注云:「杜 《左傳》『西至於河』一語 案: 毛西河謂莘爲衛 何不 渡河邪。况詩又未明言渡河。 衛殺子伋之地。 平有莘亭。 作。」又云:「莘、新聲近。 莘,未嘗渡河,無乘舟事。 其云《漢志》、《水經注》皆言莘即 自衛都達莘,未嘗不取 鳳曰:「衛宣時,猶都商之朝歌,即今濬縣 預注《傳》曰,衛作新臺在縣北,衛殺公子伋 可舟者,奚以明其 毛西河曰:「莘在 杜預、酈道元 蓋『莘』即『新』也。」汪氏 東地而在 河西,齊在 道于河,豈必入齊乃 渡之必 無不曰 證之,盗殺二子於 《漢志》: 疑是詩 河邪?」承珙 若肥、若淇 河西,是也 新臺,則誤 衛之新 非 河 東郡 -爲二子 東。 以 梧 即 陽

也。

後公子頑之事,亦當惠公在位時。

可以

而

身受之: 闇弱如此,安能防閑

其庶

母

及弟

禍

端

位

後

尚容之十六年,聽其與叔段爲伍,釀成

見州吁之驕縱,久思爲紾臂之舉,乃即

而

居

然以爲己子邪。

愚謂.

桓公爲世子時

親

未爲君,其兄桓公固在,肯任其烝庶母生兒,

父在時邪。惜伯潛不能舉此折之。

或謂宣

破疑

矣。」承珙案:

衛宣之立在魯隱公四年,

其卒在魯桓公十二年。 公子朔立,是爲惠

『憬,遠行貌。』下章言『汎汎其逝』,正與此同

 \sim

魯頌

泮水》篇

「憬彼

淮夷」,

毛傳

之地 説 璠曰: 作是詩,安知 舟,舟人不能殺伋,方乘舟時,其傅母 非舟中,又後先繼往亦非同舟而濟邪? 是借喻之語。 臺」者,不過因其事而及之,非謂新臺即峷。 要,自衛適齊之道 北」語,此劉昭誤 西河據此二文以 子於宿齡,詩人乘舟,誠可悲也。」此所云「新 注但云「陽平縣西北有莘亭」,無「新臺 新序》謂壽母謀沈伋於河,壽知之而與之同 國人傷其涉危遂往,如乘 漯水又北絶幸道城之西北 邪? 故 陽平縣北十里有故莘亭,道阨 曰『待諸莘』。」考桓十六年《左傳 毛公豈不知二子皆死於陸 其 不 也。 爲證 也。 即 《水經 因 ,誤矣。 望新臺於河上,感二 是 八舟而 詩 漯水注》云: 有莘亭。 而 且《傳》云: 無所薄。」明 附 會 関 爲 之而 限 京相 在 · 並 此 若 險 縣 杜 皆誤。 礙者,止也,並不以爲景響之景。 然迅疾而不礙也。」毛以迅疾不礙釋「景」字, 是『憬』『景』古字通。」承珙案:傳云:「汎汎 意。《士昏禮》『姆加景』,今文『景』作『憬』, 憬。 而不礙」,是直以景爲影,礙爲挂礙之義 云「景,或音影」。

「景,讀如 今人語 念也。」 『寧,願喜也。』《用部》曰: 言》曰:『願,欲思也。』《邶 賈誼賦『品庶每生』之每。《毛詩》『願』字首 見於《終風》『願言則疐』而 曰:「此『每』如《春秋 願言思子」,傳:「願,每也。」段 皆 同耳。 與 今語 《釋詁》 合。 外傳》『懷 曰 : 説 『甯,所願 風》鄭 無傳,則毛意 文 願,思 私 箋 亏 爲 曰: 部 也 也。」《心 每 。』《方 『願 謂 懋 懷 堂 與

汎

汎其景」、《經義述聞》曰:

220

正義則云「見其影之去,往

《釋文》乃

明。孔疏但以「每有所言」解之,淺矣。『常」『愁」三字語聲之轉。自《詩》所用已如此『願」亦爲每。」「甘心首疾」傳云:「甘,厭云:「毛於《二子乘舟》語意尤深,故傳别言之,非也。」正義曰:「謂思之不已,至厭足於心。」則此『願」亦爲每。」「甘心首疾」傳云:「甘,厭也。」正義曰:「謂思之不已,至厭足於心。」則。孔疏但以「每有所言」解之,淺矣。

「《泉水》明知於義不可往,而聊與之謀,非真意別。《泉水》是害於義,此詩是害其身。過爲疑辭者,不忍斥言其死也。」《陸堂詩學》曰:「毛傳於《泉水》但訓『瑕』爲『遠』,而此爲疑辭者,不忍斥言其死也。」《陸堂詩學》為一、此則曰不以遠而有害其死也。」《陸堂詩學》為一、此則曰不以遠而有害」,傳:「言二子之不遠害。」

借,故訓「遠」,、箋則用「瑕」字本義訓「過」。 字。其實經字衹當作「瑕」,傳意「瑕」爲「遐」 詩意。《唐石經》初刻作「遐」,因傳義 言,非直爲君諱 欲歸甯也; 此明知 也。」承珙案:三説皆 其身已被 禍 而 有 微 而 婉 不 改 · 忍 經 得

毛詩後箋卷三終

《泉水》與此並同。

毛詩後箋卷四

涇 胡承珙

柏舟

鄘

以 説 和 而 子共伯早死,其妻守義,父母欲奪而嫁之,誓 王 詩者、《吕記》、嚴《緝》及李氏《集解》皆從其 詩考之,曰『髧彼兩髦』,知共伯之卒,在釐 能 殺共伯而自立、《索隱》力辨其誣。 弗許,故作是詩以絶之。」《史記》謂 討 《序》云:「《柏舟》,共姜自誓 姜氏《廣 魯伯御,豈容武公之弑君篡國。 義》曰:「此正當宣王之世,宣 也。 後之説 衞 今即 武公 衞 世

奪 也。 《喪大記》云『小斂脱髦』是也。 以嗣爲大子。 母,拂髦冠纓」是也。 艾也,父母何尚欲奪而嫁之。 釐公已葬,何得仍以『兩髦』稱之。 不去,唯拂 眉,被於兩旁,幼小之飾。若父母見在,雖 失。《序》不獨有功於經,抑且有補於史。」范 其妻共姜守義云云、《索隱》據之以正子長之 也。 近五十,何云『蚤死』。 共姜年必 氏《詩瀋》曰:「共伯長於武公,其死時必 「《序》言共姜自誓,而下稱衛世子共伯蚤死, 侯未薨之前 其志。 《史》遷之説 竊意共伯立爲世子,早已身死,武公是 故指共伯之兩髦以自矢。 而 扱之冠纓。 共姜無倚,大歸於齊。 \sim 序》 誣 曰共世子, 矣。」《虞東學詩 至父母死,乃脱其髦。 《内則》云『子事父 當共伯之死 髦者,垂髮至 知 相仿, 未 其母欲 是時 此皆誤 立 ₩ El 非 爲 年 釐 君 長 少

總聚其 父喪脱 미 日: 但《内則》於子事父母及男女未冠笄者,皆云 不言總角,意即所謂 子之飾,即『總角丱兮』是也。 矣。」何氏《古義》亦云:「郝鄒皆以兩髦爲 眉,冠不得掩乎。 姜爲室女也。 伯未冠。 冠則冠加髦上,安得見髦。 笄、總、拂髦、冠、緌、纓」,謂既髦乃加冠。 以『髧彼兩髦』一語也。 公尚在,故曰『髧彼兩 公云『髮至眉』,安知非加冠 以 言 傳云:「總角,聚兩髦也。」正 郝氏、鄒氏、張氏皆以共姜爲室女、蓋 既 髦 左,母喪脱 禮,冠 以 冠乎。」承珙案:《甫田》「總角 爲兩 然兩髦之制,康成未詳,而 而後娶。 角。」郝鄒之説,固自可 右,古有明文,誰謂兩髦不 以是决其未冠,所不 拂髦而韜之冠内者。况 髦」也。」姜氏《廣義》又 疏據《内則》『櫛、纚、 知共伯之未娶,而 而 詩舉兩髦,知 兩髻之末垂於 然詩言兩髦, 義云:「言 通 童 敢 毛 共 夫 丱

斷,則《史記》之説自不可信耳。分已冠未冠。惟據《序》「世子蚤死」一語爲「拂髦」,則兩髦之有無衹分親在親没,實不

聞。 鄭注三禮已云「其制未聞」,可見毛公時 云: 故此傳云:「子事父母之飾。」鄭注《既夕禮 塵,著之。」曰「脱」曰「著」,自是假他髮爲之。 斂,主人脱髦。」《内 康成已有不能 珙案: 傳言髦, 髮至眉, 是實知其形象。 禮》、《内則》鄭注皆止云髦象幼時鬌,其制未 如今小兒用一帶連雙髻,横繫額上是也。」承 者,髪至眉,子事父母之飾。」正義引《既夕 云"「既殯,主人脱髦」,《喪大記》云"「小 「長大猶爲之飾。」是也。 項安世云:「以髮作僞髻,垂兩眉之上, 毙彼兩髦」,傳:「髮,兩髦之貌。 盡見者矣。 則》注云:「拂 惟據《既夕禮 髦,振去 書, IIII

《説文》:「鬆,髮至眉也。从髟,敄聲。

後 箋

九六

文》已同今本矣。 文》所引當是《韓詩》,今本誤作《説文》。 據《詩》本,並不作「髳」。《吕記》引《釋文》 髳長。是許以「鬆」「髳」字同而義異。 《詩》云云。其下乃言省畫之髳,而證以 珙案:《説文》「髮至眉」之訓正用毛傳,即引 髳長。」《詩釋文》云:「髦,《説文》作髳。」承 王氏《詩考》輯《韓詩》不及此字,則所見《釋 云:「髦、《韓詩》作髳。」蓋韓以髳爲鬏、《釋 詩》 日 「紞彼 兩 「「影」。 髳, 鬏或省。 漢 其 所 令有 漢之 然

義》曰 馮身以儀之」,亦謂 『鳳皇來儀』,注以爲相乘匹。《國語》『丹朱 實維我儀」,傳: 實維我特」,傳:「特,匹也。」《稽古編》 :「毛傳、《爾雅》皆訓儀爲 馮 依其 「儀,匹也。」何氏《古 身而匹偶之。」 匹。 《書》

曰 : 而 [得爲匹者,古人多反語。 「毛以特 爲匹。朱子謂特爲 故《小雅》『新特』 孤 獨之義,

豵二師一特。」是凡畜之牡者皆可謂之特。 《三倉》云:「羝,特羊也。」《爾雅》:「豕生三 《生民》傳云:「羝,牡羊也。」《衆經音義》引 《小雅》『新特』例矣。」惠氏 作『直』。」承珙案:「特」本牛父之稱,通言之 之意,男女皆可通,故《小雅》「求爾新特」,傳 則羊豕及馬皆有「特」名。《周禮・校人》「凡 也。《繁陽令楊君碑》以特爲犆。 作『直』乎? 不然,則師授如此也。 案:我特、《韓詩》作『我直』,云:『相當值 夫之特」傳云「乃特百夫之德」是也。 至因其獨立之意,則爲雄俊之稱,《黄鳥》「百 反言之,則孤特者必有偶,故又爲匹 馬特居四之一」,鄭衆注云:「三牝一牡也。 也。』兩家字異而義同。 婚,鄭申之爲特來無倂之女,與匹義反矣。 亦 用此詩毛義釋之。 然毛傳 意毛傳《詩》時,字 棟 以『新 曰:「特,猶 故《韓詩 一偶之稱。 不得 特」爲外 又單獨 犆 爲

申者如此,但其施之各有當耳。 箋以爲外婚無倂之女也。凡一義之反覆引

牆有茨

防非 蒺 制 興 謂 非 祇取於合好掩惡之意。 國之惡耳。 埽之,則恐傷於牆之堅 助 此於取興之意本無 上有蒺藜,則人益不可履 常。 藜。」此 (中冓宜於肅清,而乃有不可道之言。 爾」,此豈詩之本意哉? 「牆以 國。 常」,宜於堅密,而乃生不可埽之茨,以 牆 茨,蒺藜也。 防 有茨,不可 説 今其宫内有淫昏之行者,猶牆之生 非常者,爲有内外之限爾。 興意深隱。 稍 泥 不合,歐陽《本義》譏之, 埽也」,傳: 孔 欲埽去之,反傷牆 疏衍之,云:「蒺藜不 一,猶欲道之,則恐揚其 以下有中冓言醜,故 箋云:「國君以 丽 不知傳言 踰,是於牆 牆 所 牆 今欲 若牆 反 禮 也。 以 有 防 防 以

> 意哉。 人、以 但以「不可埽」對「不可道」言之,未必以 頑罪當誅戮,恐傷惠公子母之道。]案: 於牆,理當埽除,然欲埽則恐傷牆,以比 來歐陽之譏也。 昏之行正宜滅除,何得云違禮害國。 而 制 可埽,婦之則傷牆 除之,欲滅而除之,反違禮 國之非法。 埽除喻去其人。 今宫中有淫昏之行,不 而歐自爲説,乃云:「茨生 而毀家,以 歐説亦豈詩之本 興 而 國 害國。」夫 君 此所 以 茨 公子 可 禮 喻 以 淫 滅 防

對交之形。 昏之語。」案:《説文》:「冓,交 云:「内冓之言,謂宫中所冓成 淮 構」義 構、蓋也。 南 中冓之言」,傳:「中冓, 略同。 氾論訓》云:「築土冓木。」是「冓」與 从木, 冓聲。 凡冓之屬皆從冓。」又《木部》: 書・大誥》:「若考作室,既 杜林 以 内 積 頑 爲椽桷字。」 韝 材 與 夫 也 也。 人淫 箋

非是。 非 是指 聽聞 **冓,中夜。謂淫僻之言也。」夫中冓爲嚮** 亦用《韓詩》説。 之言」,則箋説所本。 息之地,故以爲夜,義本相近。《韓》云「淫 曰:「冓,夜也。」《釋文》引《韓詩》云: 亦取交覆深屋之義。 其以中寗爲中夜,則用 冓」,猶言内室。 《漢書·文三王傳》: 谷永 底法 上書曰:「是故帝王之意,不窺人閨門之私, 積材以爲蓋 ·争中冓之事以觸法者」,即引此詩爲證,蓋 魯》《韓詩》説。晉灼《漢書》注引《魯詩》 由宫中所冓之語,故不如傳第以中冓爲閨 謂 内室而言。應邵云: ●「中冓、材冓在堂之中。」 中冓之言。」以「中冓」與「閨門」對舉,亦 《玉篇·宀部》引《詩》作「窘」,从宀者, 蓋屋。 子乃 屋。 弗肯堂 古者,堂半以後爲室,室必交 但頑與夫人實爲淫昏之行 中冓者,謂室中,傳云「内 一,矧肯 鄭注《媒氏》「陰訟」謂 構 。」「堂」謂 築 晦 一中 基 僻 宴

「中垢」與此「中冓」聲義略同。也。馬元伯曰:《桑柔》「征以中垢」,傳云:「言闇冥也。」中隱奥之處,其言亦第當爲閨門曖昧之言

案:箋云:「抽,猶出也。」此如服虔《左傳 籀,漢之古今字。 也。毛公及《方言》皆用『抽』爲『籀』。 籀之義訓抽、《説文》敘云『諷 傳》『西襄大宛』,徐廣曰:『襄,一作攘。』」承 曰:「抽,當作籀。 襄」,此其本義,除者,其引申義也。 「襄,本作攘。」《説文》引《漢令》「解衣耕謂之 珙案:《出車》「玁狁于襄」、《釋文》亦云: 小學》曰:「古『襄』『攘』通。《史記 「不可讀也」,傳:「讀,抽也。」段懋 「不可襄也」,傳:「襄,除也。」段氏《詩 或假『䌷』爲『籀』。」承珙 《説文》:『籀,讀 籀書九千文』是 • 龜 也。」 抽 堂 策

「邵」,廣雅本、《續經解》本並作「劭」。

0

覆言之乎? 詩》「詳」作「揚」。揚,猶道也。 者約言之,詳者多言之,讀者反覆言之。詩 注 意蓋謂約言之尚不可,况多言之乎? 况反 同,於義皆爲抽 云「繇 抽 也 三章自有次第。《釋文》引《韓 繹 抽出 而出之,此古訓也。 吉凶 也。 不如毛訓「詳 「繇」與「籀」 蓋 道

君子偕老

若今假紒。次者,次第髮長短爲之,若今髮飾,編髮爲之。笄,衡笄也。珈,笄飾之最盛錯,所以别尊卑。」箋云:「珈之言加也。副聞。」案:鄭注《周禮》,分别《追師》「副」、既笄而加飾,如今步摇上飾,古之制所有,未既,加過,如今步摇上飾,古之制所有,未既,其遺象若今之步摇。 编者,编列髮爲之,简,其遺象若今之步摇。 调者,后夫人之首

羆、天鹿、辟邪、南 貫白珠爲桂枝相繆。 髮爲之」耳。《續漢書・輿服志》云:「皇后 副。 鬒。」 髻與副 謁廟,假結步 之,則六珈皆爲副飾,毛析言之,故曰「副,編 衆物成其飾也。」「衆物」即六珈之類。 必本以髮爲之可知。《廣雅》云:「假結 加飾,如今步摇上飾」,亦謂副上加 笄六珈之飾,所以爲盛。 髢。」此以假 女,垂珠步摇。」則步 『副笄六珈』者。」鄭氏疑古制未必然,故云 編髮爲之。」蓋副 所有,未聞」。然宋玉《風賦》云:「主人之 副,覆也,以覆首也。 同。 紒專屬之編。 揺簪珥。 與編皆假髮所爲,但 《釋名》云:「王后 山 揺制 豐大特六獸、《詩》所謂 步摇以黄金爲 一爵九華、熊、虎、赤 亦古矣。 此箋云「副 亦言副貳也,兼 而 此 傳云: 飾 首 既 副 山題, 統言 謂 則副 飾 有衡 副 用 之 曰 而

《稽古編》曰:「『衡笄』本《周禮・天

物也

官

追

師

矣。」承珙案: 二物爲一也。 不知毛公連引衡笄,所以見笄之爲玉,非合 仍其誤,而嚴《緝》尤失之,曰:『笄者,婦人 文,是以釋衡者釋笄矣。《吕記》、朱《傳》皆 服有衡』下增一『笄』字,而不引『笄,卷髮』之 者。』是衡與笄本二物也。孔疏引之,於『祭 『王后之衡笄,皆以玉爲之。惟祭服有 而箋《詩》副笄仍不易傳,亦知毛意與己不異 於副之兩旁當耳,其下以紞縣瑱。 **衡爲笄名。又曰:『毛以衡笄爲** 疏之誤,在引釋衡文而不引釋笄文耳 《追師》以 毛意,而 衡垂於當耳,笄横於頭上。 惟后夫人之副,其笄謂之衡笄。」是 文 傳 傳 鄭注《追師》既以衡笄爲二物, 爲二物,疏 謂 意似以 引 與 其 鄭 成 異説 衡笄爲一 語 溷 耳 , 其 毛鄭爲 非 誤更甚於孔 一合衡 物,非 彼注 笄,卷髮 笄 一物, 衡 説」。 關 云 爲 便 垂 既以 名同 既 則 非· 誤。 師 笄爲二物。 曰:「《周禮 固冠 而 實異。 ,亦以 縣

鄭注

竟以

之首飾。

也。

誤 認

之所服,故毛以 者。]案:先鄭釋衡不釋笄,始以衡笄爲一物; 飾,而副笄有六珈,其飾更盛,或獨爲后夫人 非並無簪以鬈髮也。 欲笄之,其可乎?』」然則古之爲妾者不笄 妾爲内子,訪之左史倚相曰: 『吾有妾,而 十冠而字,女子許嫁笄 與鄭注《周禮》 文言之。 衡,維持冠者。」與先鄭同。 有笄,不宜又有衡。 》言「玉瑱玉笄」、《左傳》言「衡紞」,衡之即笄,甚明。 止固髮之用。 竊意此所謂「衡笄」者 左氏桓二年《傳》云『衡、紞、 • 追師》「衡笄」,鄭 衡 笄 瑱。 禮,男子冠 即 相 副 謂 瑱 苟衡與笄並設,不亦過於繁複乎? 同。 《楚語》:「司馬子期欲 笄之笄爲 之制,縣之以紞 笄之横 是衡笄即固冠之笄也。 蓋笄爲婦人禮服之首 嚴《緝》從毛,未 而字。 河農注 而婦· 於頭 ,與尋常固髮之笄 衡笄耳。 云: 紘、綖」,杜 夫笄以配冠 人笄,男子二 ,上係于笄。 上者,不 衡, 後 金誠 維 注 鄭 可 必 以 持 此 云: 《 弁 愿 以 謂 蓋 笄 冠 衡

也。 副 姚姬傳《九經説》云:「毛鄭皆以笄與珈同爲 云: 謂 簪,又可知矣。 揖蓋以珈即爲笄。然《詩》言六珈,未聞六笄 六,與鄭義珈爲副飾者不同。 「上九,男子折笄,婦人易哿。」注范望曰: 珈, 笄飾之最盛者」, 自是以珈飾笄, 其數有 廣雅》云:「笳,蠶也。」笳即珈 一号」與「珈」同,哿之以飾,言加之以 哿,笄飾 上之物,非謂 以六物加於副 「言珈者,以 惟 周禮》賈疏云:「《詩》有『副笄六珈』, 一笄而 也。 有六珈之飾,則非徒固髮之 男子有笄,婦人哿之以 以 玉加於笄爲飾。」案: 傳云 上,未知用何物。」《詩正義 珈 爲笄 飾。」其説 《太玄·瞢》: う 蠶即 簪,張 飾也。 非 飾。」 是。

迹 也 委委佗佗」,傳:「委委者,行 佗 佗 者, 德 平 易 也。」 IE. 義 可委曲 引 \sim 爾 從

詩後箋卷四

《爾雅釋文》云:委,先儒並作「禕」。 傳以「佗佗」爲德平易者,《太玄・玄攡》: 諭宣姜之身,則或與孫郭同」。 承珙案:《一 以爲容儀行步之美,與毛言其德者異。 雅 美,亦同毛義,自不當專指容儀、行步言之。 它。」」此所據字異,必三家詩。 同。是《韓詩》以「委佗」爲德,與毛義 誤合《召南》傳、箋之文耳。 故《太玄・玄吉》又云「地隤 也。」此「他然」如《易·繋辭》所言「隤然」者, 曰:「禕禕者,心之美。《詩》云:『禕禕 切經音義》卷九引《詩》「逶逶佗佗」傳云: 云:「委佗,德之美貌也。」與此篇《釋文》正 「委佗者,行可委曲迹也,亦自得之貌。」此或 「夫地他然,示人明矣。」注云:「他,猶泰 隤然」蓋皆安泰之意,傳云「佗佗,平易」,義 • 釋訓》「委委佗佗」,「李巡、孫炎、郭 而静」。 卷三引《韓 其以爲心之 「他然」、 璞 鄭以

__

可以此推之。

疾。」師· 揥, 飾, 直, 義,與傳 所以 雙。』《漢 飾。」 从衣,象聲。』《急就篇》曰:『襐 「襐,未笄冠者之首飾 玉篇》云: 佩 則 爲 即「襐」之假借,襐爲盛 惠氏《古義》曰: 象服 曰首飾,在耳後 猶 飾。 古曰: 斷非專指象揥 不 服 · 合。 是 也。」 「襐,首飾 范甯注《穀梁》,以象服爲吉笄。 宜」,傳: 外戚傳》 常線 謂 惠氏《禮 飾, 著 於首。 也。」顏注《漢書》:「襐 ,刻鏤而 一物耳。 「《説文》:『襐,飾 盛 也。」《廣韻》又曰: 曰:『襐飾 象 説 飾 服,尊者所 飾,故毛云「尊者 也。」 》:「象服,即 然《詩》云「是 爲之。」此皆别 飾 將醫 承 刻 珙 畫 往 無 以 案: 也。 問 等 爲 象

貌。 羽 飾 衣 翟 玼 输 也。」《稽古編》曰: 兮玼兮,其之翟也」,傳: 翟 闕 翟 翟 上下兩「翟」字,依段説 象服翟衣,毛 玼 鮮 補。 傳 盛

乃孔 篇: 《説文》,其語良是。」承珙案:《周禮 乎 ? 飾 皆足爲傳「翟羽飾衣」之證。至「象骨飾 羽飾 是褘衣畫雉,而褕翟、闕翟皆用羽飾。 「罕,舞者衣 皇舞」,注:「故 師謂《周禮》二翟曰翟,而禕 文》釋禕爲『畫衣』,褕爲『翟 復陶,翠被」,杜注謂『秦所遺羽衣』,及『以 見於經傳者多矣。 非 爲 謂 象骨 可 服 以 ,惟尊者爲然。 疏妄推 羽 象 被」,不聞其 襄成君始封之日,衣翠 至以羽飾衣,春秋時尚有之。楚王『秦 飾 飾 骨 蓋 服, 及 毛意,以 羽 飾 右鄭 經傳 爲 翡 書皇 衣 翠之羽。」《説 礙於卷舒 也。 無文,又衣裳隨 安知象飾之服,毛非 服 言服 此實書傳之所未聞 之 作型。」鄭 然古 飾 則 非 衣,帶 也。 羽 衣變翟 籍散亡, 而 -揥,明 飾 孔 苑 衣」。 又案:《 司 疏 玉 日 身卷舒 不 農 常樂 一劒。」此 制度不 以 善 衣,當 從 象骨 以 衣」, 陸 有 云: 毛 説 師 證 翠 據

公並無此説。而陳氏以爲必有所據,不亦

逊乎?

髮」。 《詩釋文》:『揥,勑帝反。摘,他狄反。本又 音『摘』爲 之也。」此即「摘」字。 作「擿」爲是,擿正音他狄反也。 象揥矣。姚氏《識名解》曰:「嚴華谷云,若 文》云:「揥,取也。 書無『揥』字。」承珙案:《説文》但有「摬」字, 韻•十二霽》曰:『揥者,揥枝,整髮釵。』 許 首,因以爲 作擿,非,擿音直戟反。』按:以許説繩之,則 云:「拓果樹實也。 · 掃」字而今脱之。 説 文》:「擿,搔也。」段云:「此義音剔。 「象之揥也」,傳:「揥,所以摘 即後世玉導、玉搔 摘 飾,名之曰『揥』,故云『所以 取 之義,則今之鑷子,搔首之 但訓「取」,則又非《詩》之 他狄切。」似《説文》本有 从手, 啻聲。 李善《文選》注引《説 頭之類也。 以象 一曰指近 髮也。」 骨 《廣 擿 搔

顔」句,不連「清揚」之「揚」爲釋也。 傳云「揚,廣揚而顔角豐滿」,乃釋 又「猗嗟名兮」,「名」與「明」通,亦 者曰陽。」《猗嗟》「美目揚兮」,「揚」即 兮」。《説文》:「陽,高明也。」《禮記》注:「明 揚,視清明也」,「明」即「揚」字之訓。「清揚 字當有二義。「揚且」之「揚」,與次 揚,廣揚而顔角豐滿。」承珙案:末章兩「揚 亦作「清陽」。《説苑・尊賢》篇引「野有蔓草,清陽婉 之清揚,揚且之顔」,傳:「清, 「清揚」之「揚」,必非亦謂眉上,傳文當作 美目揚兮」、「美目清兮」,皆專指目 「揚且之晳也」,傳:「揚,眉上廣。」「子 視清明 謂 「揚且之 而言,文 《猗嗟 章 目 明 也。 同

〇四

者,《説文》:「盱,張目也。」張載注《魏都賦》 其明證。 合。 之間爲顏」,本有專名,非清揚之謂。此「清 也。 李善引《漢書音義》曰:「盱衡,謂舉眉 燕、代、朝鮮、洌水之間曰盱,或謂之揚。」是 衹言目之精光,「目上」、「目下」皆於清義不 爲揚,目上目下皆爲清。 清明之貌。毛傳一云「眉目之間婉然好 此「揚」又指眉 義 盱 清揚婉兮」,當與《鄘風》「子之清揚」皆爲視 云「婉,好眉目也」,正義遂謂眉上眉 以 明 衡」曰**:**「眉 「揚」雖 揚 上文「抑若揚兮」已云「眉廣揚」矣,不應 白 目亦曰揚者、《方言》云:「黸瞳之子, 眉 毛傳每於「清揚」之「揚」兼眉言之 傳 見目之美,要其美仍在目不在 於 有二,而廣顙之揚究不得爲美目 美 上也。 上 目 曰 衡。 揚 《野有蔓草》、《猗嗟》 兮」云「好目 不知《説文》「眉目 盱,舉眉 大視 揚眉 揚目 也。 下皆 也, 者 .眉

232

誤也。 清明也。自孫炎、郭璞誤讀《爾雅》「目上」爲 在上之上,孔氏正義因並謂目之下爲清,皆 目之上視、下視。 「目上爲名。」《猗嗟》傳:「目下爲清。」此 顔」, 既言「抑若揚兮」,又言「美目揚兮」,同 然,經文既言「子之清揚」,又言「揚且之 美,故統言「眉目之間」與「好眉目」耳。 不 之美,故經以美目爲揚。 也 一眉上廣揚,何必複沓若是乎?]。 」 此 别有辨,見《齊風》。 即 毛 傳 好 目 「名」與「明」通,即 揚眉 之義。 傳欲見揚爲舉目之 因 《爾雅》: 揚 所謂 眉 見 謂 視 Ħ

『襄,丹縠衣也』,本毛傳,而字作『襄』,从衣 作襢。通帛爲旜。 其説有據。」段氏《周禮 衣宜白。」惠氏《禮説》云:「陸農師 者,以丹穀爲衣。]箋云:「后妃六服之次,展 「瑳兮瑳兮,其之展也」,傳:「禮 **旜**,絳色也,與 漢 讀考》曰:「《説文》 襢 謂 有展 同 展,一 義 衣

已有 則鞠 丑 張 若素沙爲衣,則是七服而非六服,其説 揣之如是。」承珙案:以素沙當白衣,何氏 矣。 於 顯。」夫 可 黄,绿衣绿,不改字。 之,不與鄭同也。今《毛詩》作「揄」「展」,此又鄭箋之 師 衣,白衣,而 本,不與許同。 IXI 如 顯 通 傳不一,是以毛公作褕狄襄 沙者,沙縠。言『衣』言『沙』者,互見。 王 丹 此 衣,黄穀爲之,緑衣,緑穀爲之。 融皆云:展,丹縠衣。 (穀之制,故當以毛義爲勝。 展 四 説,且引《雜記》「復 但鄭注:「素沙者,以白爲裏,使之張 今《詩》、《禮》皆無 故 衣既 時 展 《釋文》「揄」字又作 之色俱備耳。 鄭君從之。 衣 爲白衣,則 赤 素沙白, 亦 未 蓋舊 此字。 以 必然。 孫毓推 有素沙」爲證 「褕」與許本合。 白裹、「白」何能 則展衣爲丹色 説《周禮》鞠 鄭仲師始 衣, 蓋 之,以 **宝** 蓋后 而 漢 許 時 篇 以 自 云展 爲疑 君 服 禮 毛、 意 不 不 然 楷 衣 從 家

> 展衣 襄,丹 非六服之展 穀 衣。 又 王 衣, 殆以毛 后 衣 也 鄭異義,故疑不 則 似 以 丹 縠 之

能定歟?

當云「蒙以縐絺」,不得云「蒙彼縐絺」矣。 紗之類,不獨葛也。」承珙案: 綃蒙于外。 加于衣上者,尚絅之意。 蒙之,即素沙也。 義》云:「所謂『蒙彼縐絺』,乃展衣上加縐 此以禮見於君及賓客之盛 「縐絺,絺之蹙蹙者。 絺之靡者爲縐,是當暑袢延之服也。」箋云: 蒙彼縐絲,是紲 凡 繒薄細者,皆稱 郝敬云,素沙即白紗,所 袢也」,傳:「蒙,覆也。 展衣,夏則裏衣縐 古婦人 服也。」何氏《古 如 絺 此,則《詩 盛服,以 即 今方目 絲 薄 以

用。以意推之,『紲』當是『渫』除去也,私列切。袢延蒸熱之氣也。』紲袢,音薛煩,二字皆借孔氏申之,以爲『展衣而以絺爲裹,所以紲去《稽古編》曰:「毛云『當暑袢延之服」,

絆。 散也。」畔援,亦作「叛换」。《魏都賦》「雲徹 《詩》曰:『是紲 之服縐絺,近於縱弛分散,然係私褻之服。 叛换」,劉淵林注:「叛换,猶恣睢 奂,自縱弛之意。 涣」同,以疊韻爲義。 當與《大雅》之「畔援」「泮奂」、《周頌》之「判 色,故知『一曰』爲衍文矣。」承珙案:「袢延」 展衣,中用縐絺爲衣,可以揩摩汗澤,故曰 言》之『襎裷』。 也。」又:「袢,衣無色也。从衣,半聲。 傳云『當暑袢延之服』,『當暑』二字釋『褻』 褻袢也。』」段注云:「今《詩》『褻』作『紲』,毛 之借 『褻』篆下作褻。 云:「褻,私 褻絆專謂縐絺也。暑天近汗之衣必 "[袢」當是『煩」之借耳。」《説文 服。 漢時有此語,揩摩之意。 毛傳『袢』『延』疊韻,如《方 从衣, 埶聲。 袢也。』」段云:「紲,當同 《訪落》傳:「判,分,涣, 畔援,猶跋扈 《詩》曰:『是 也。」當暑 • 也。 衣 — 曰 部》 外 無 褻

> 毛義,尤非詩義。」 袢延即叛衍。 衍。」司馬彪注:「叛衍,猶漫衍也。」毛言「當暑袢延之服」, 之服故也。《説文》「褻」下引《詩》是證 疊跡,叛衍相傾」,李善引《莊子》曰:「何貴何賤,是謂 袢延之服亦必無色,故引《詩》以備一義,「一 字,「袢」下則以無色之衣通名「袢」,而當暑 日」二字恐非衍文也。 若以禮見 展衣」。 而「蒙彼縐絺」,以縐絺是私褻袢延 王 袢延之服,蓋謂服之寬闊者。 及賓客 則 焦里堂曰:「《蜀都賦》「累穀 必有 展 衣蒙之,故 正義所言,非 一褻 日 叛

「舞之媛也」,傳:「美女爲媛。」箋云:「媛者,所依倚以爲援諸本皆作「媛」,惟相臺本作「媛」爲是。助。」《釋文》引《韓詩》「媛」作「援」,「媛者,所依倚以爲援諸本皆作「媛」,惟相臺本作「媛」,」之媛也」,傳:「美女爲媛。」箋云:叔然注《爾雅》,蓋皆本韓義。

以 則 詩 乎禮義矣。 而 邱、鄭之溱洧爲男女聚會之所,故奔者三人, 而 詩 會 敬曰:「淫者犯禮法,方秘其事,惟恐人知。 爲淫者自作,與東萊 期於幽遠,政散民流 淫 詩緝》曰:「若謂 于牆 非 其 惟爲刺奔而作,故所舉貴族皆明列其人, 人爲表暴其事、《韓詩》所云『匹夫匹婦 亂,男女相 期、要、送皆在 「桑中」、「上宫」,又歷著其地,蓋如陳之宛 人其地也。 僻之事 《序》云:「《桑中》,刺奔也。衞之公室 陰,明日有傳之者』矣。」承珙案: 當從國史所題,以爲刺也。」郝氏 ,雖至不肖者,亦未必肯直告人 奔,至于世族在位 且若以爲一人所作,則一人 一處耳。 奔者所自作,則非所 而 争論,卒不能合。 不可 若以爲淫者自作, 止。」朱子以 ,相竊妻妾, 嚴 謂 此詩 此 相 止 氏

> 審矣。」 邪,是樹曲表而求直影,何聖人之拙於計邪? 而賦淫詩,豈可供人吟誦乎? 然出于惡惡之公,其思固 有之,則廉恥道喪,惡莫甚焉,聖人肯録之以 必無三人群聚一處 又皆相 而 示後世乎? 亂三 貴族之女,而其 同,固無是理。 張氏敘《詩貫》云:「作詩刺淫,雖傷忠厚 無邪 而 賦 也。 若以爲三人所作,亦 輩行與期 乃以是垂教,而又禁人之無 此狹邪之詩者。 若淫奔自述,則以 會迎送之地 其必不然 淫 即 思

《桑中》乃《衞詩》之一篇,言鄭衞 音怨以怒」,而係之《鄭》、《衞》,『亡國之音 中矣,何煩並言之邪? 桑間 桑間、濮上,明係兩事。 詩即『桑間』。 而不可止』語,偶與《樂記》同,非謂『桑中』 也。 《稽古編》曰:「《小序》所云『政散 朱子因此語,遂全用《樂記》文證 殊不知《樂記》既言鄭衞,又言 若桑濮即『桑中』,則 《樂記》又言『亂 而桑濮 世 在 民 之 即 其 此 流

詩後箋卷四

二〇八

曰: 《桑中》之詩。考《史記•樂書》:衞靈公朝 學》皆引《史記》以《桑間》、《濮上》爲紂樂,非 《桑》、《濮》爲紂樂,則《桑》、濮》之非衞詩,歷 聲,亡國之聲,若《桑間》、《濮上》。』疏亦 記》乃云「濮水之上 晉,晉平公使師涓鼓琴,未終,師曠止之,曰 紂所作。 之倫節, 哀以 有明證矣。」承珙案:何氏《古義》、《田間 凶聲、慢聲』,注云:『淫聲若《鄭》、《衞》。 又:「《樂記》注謂桑間即濮上地名,其音乃 桑 此亡國之聲也」,聞此者「必於濮水之上」云 中在 是《史記》並 郡國志》東郡濮陽縣 思,而 冢在 其中。」考東郡濮陽爲今開州,在滑 《周禮·大司樂》『禁其淫聲、過聲、 與作此二音之時世迥不相 |城門: 係之《桑間 外 廣陽 無「桑間」之名。 地 里中。」《博物記》曰: **>**′< 有桑間」耳。 有顓帝冢。《皇覽》 濮 上》。 此 鄭注《樂 侔 則 《續漢 也。 凶 詩 解 音

《序》者已盡襲《左氏》。 案:毛公傳《詩》時、《左傳》尚未行,安得作 事,可見《序》説有所自來。 《樂記》文,則固不始於朱子。但必以《桑中 書更無有可 作《序》在左氏之後,其説皆附合左氏爲之。 竊妻以逃者也。」其意正以「桑中」爲苟合之 「夫子有三軍之懼,而又有『桑中』之喜,宜 夏姬于鄭,「盡室以行」。 之詩即《桑間》,則非耳。《左傳》申公巫臣 縣 爲鄭衞之音,而孔氏 故俗稱『鄭衞之音』。」是班固已以《桑》、《濮 音」無涉。 桑間、濮上之阻,男女亦亟聚會,聲色生焉 今衞輝府淇縣,濮陽即有桑中,要與「桑濮之 東 詩》之桑中 然《漢書·地理志》云:「衞地有 信者矣。 與 於《詩序》正義亦全用 沫 必如所疑,則天下之 相 申叔跪遇之,曰 王氏《總聞》乃謂 近 當 在 朝 歌 將 聘

·爰采唐矣」,傳:「唐蒙,菜名。」姚氏

《爾雅》、毛傳或因當 邪?」承珙案:正義引孫注:「唐蒙,女蘿。 此。 未爲不可。 言、古今稱謂往 蒙,連言之亦可 唐别有蒙菜之名,非《釋草》所謂『唐蒙』者 唐蒙者,不然則當多下一『蒙』字矣。然《詩》 惟以『芣苡、馬舄』之文律之,又似以女蘿釋 藥者,古人或以爲菜,如蒼 王女」云:「蒙,唐也。」則是單言之可曰 女蘿,菟絲。 亦單言『唐』,不連『蒙』,《爾雅》所釋固當指 『唐』爲『蒙』,自傳始,其讀爾雅,必有所 讀,故云三名。 〉詩 釋草》文爲訓,而於『蒙』下增一『菜』字,豈 識 但今菟絲子僅供合藥,非食菜。 名解》曰"「孫炎以《釋草》『唐蒙』連 至謂菟絲僅供合藥,則今人以入 别三名。」而其下又引孫注「蒙, 郭璞分之爲 往 İ 不同。 [唐蒙。 時 稱 草木之名,方俗語 《詩》雖單言唐,而 謂以「唐蒙」釋之, 耳入藥而唐人尚 四名。 愚案: 傳遵 唐日 據。 釋

有食之者,是也。

姓,而後世以爲衆妾之稱耳。 人姓,故字從女,而以爲婦官之稱,猶「姬」亦 也。」詩「弋」字或即「샟」之省。 蓋「샟」本婦 弋」、《廣韻》作「鉤샟」。 《春秋》「定姒」、《公》、《穀》作「定弋」,「蓋杞 「以」。「弋」與「以」一聲之轉。又《漢書》「鉤 生,賜姓姒氏。 本作「以」。《白虎通義》:夏祖昌意以薏 女,夏后氏之後,亦貴族也」。 美孟弋矣」,傳"「弋,姓也。」朱子曰 《説文》無「姒」字,蓋 承珙案: 即 作 以

曹、滕則皆姬姓,未嘗以姓爲國名也。」錢竹 名其國者。 國,古或作『庸』,不知何所據。 生,是其後 傳》曰,鄘本庸姓之國,漢有 「美孟 也。 庸矣」,傳:「庸,姓也。」范氏《補 荷、曹、滕皆古姓,而 《稽古編》曰: 庸光 《通 古未有 春秋時 及膠 典》謂 東 以 姓

足據 用國見《毛 閻之土以共王職。」是閻本衞地。 即『閻』。」承珙案:定四年《左傳》:「取於有 若火,始焰焰」,《漢書》作『庸庸』,故知『庸』 汀 亦有因其地 言『姜女』云爾。 永對策引《小雅》『豔妻』作『閻妻』,鄭箋以 (史記 監妻」爲厲王后、蓋其女之族姓。 日 嬀,是也。 ·齊世家》作『庸職』是也。 詩》,在高唐。 而 「庸」與 稱之者,如舜居嬀汭而其後氏 《路史・國名紀》引《風 『庸』『閻』聲相近。 乃用 『閻』通、《左傳》『閻 地,故有用姓。」此説 俗通》云:「古 古之姓氏 《漢書》谷 『閻妻』猶 《書》『毋 職 亦不

鶉之奔奔

宣姜,即弑君書趙盾之義也。盾,兄也,上卿許氏《詩深》曰:「詩以頑爲首,而《序》專斥《序》云:「《鶉之奔奔》,刺衞宣姜也。」

《詩》中如『念我無禄』、『念我土字』及『我是 《序》則聖人之所取義。『《詩》亡然後《春秋 編》乃謂《序》云刺宣姜,不云刺頑,毛以「兄. 者,女君也,妾刺宣姜之詞。」此泥於「兄」與 雅》云:「兄者,女兄也,娣刺宣姜之詞。君 則以文害辭矣。」承珙案"許説是也。《埤 用急」之類,皆通指君國,必解爲詩人自指 氏傳》曰『仲子歸于我』,何以爲之解乎? 「君」字而爲之辭。 體,於兹可見。使此詩必爲惠公之言,則《左 秋》曰『齊師伐我』。 而臣民之分誼休戚 | 作」,此之謂矣。 待讞而 人之罪狀既著,若穿若頑,俾服上刑而已,不 『我」言之、如微子曰『我用沈酗于酒」、《 也,君母也,從子瀆倫而不恥,實爲亂階。 也,有弟弑 定 也。 君而 是故《詩》如史之文與 不討,是謂 古人以事關君國者,多 李氏樗不然其説。 盗 主。 宣姜 (事,而 以 嫡 兩

旨。 也。 言 彊 以爲君」,言無良之人,其臣 我以爲君。」注云:「姜姜、賁賁,争鬬惡 如大鳥姜姜于上,小鳥賁賁于下。」據《表記 頑 命」,其下引《詩》云云,意蓋重「人之無良,我 詩》: ●「鵲之姜姜,鶉之賁賁。 彊 證 非 君命順則臣 「君命逆則臣有逆命」耳。 ,言居有常匹、飛則相隨之貌,刺宣姜與 良,善也。 至「姜姜」、「賁賁」之解,似與詩 兀 鶉之奔 耦。」 承 奔,鵲之彊彊」,箋云:「奔 言我以惡人爲君,亦使我惡, 珙 有順 案: 命,君 **^** 禮 至 記 命逆則 不 鄭 人之無良, 願 表 注非詩本 以 臣 記 言 爲君 有 奔、 引 奔 逆 貌

> 《莊子》云『烏鵲孺』,以傳枝少 鬭 亦云: 不亂 飛則相隨」者,與《禮》注「争鬭」義固相 **彊彊,剛也,言鵲能** 日 奔」、「彊彊」者不同。 能不淫也。」據此,則《詩箋》所云「居有常匹 前 也。 : 有常匹。 『聖人鶉居而鷇食。』奔奔 其匹。 「鶉所以 鵲 所以 《尸子》 鵲傳 彊 奔奔然善鬭者,惡其 彊然難偶者,傳 枝受卵,故 不淫其匹。」范氏《補 曰:『堯鶉 然陸 一佃云: 欲,故曰 ,鬭也,言鶉 居。』《 曰乾 「鶉 枝受卵 亂 無常 鵲。 莊 孺 成耳 匹 故故 傳 子 也 能 而 而 居

屬賈君焉。」《易・歸妹》六五「其君之袂」,虞出乎是也。」承珙案:《左傳》又云:「秦穆姬亦得曰君。襄九年《左傳》筮穆姜曰『君』,其曰:「夫人對君,稱小君。以夫妻一體言之,「我以爲君」,傳:「君,國小君。」正義

「引」上原有「注」字、據《禮記・表記》删。

0

翻注亦以「君」爲小君。

定之方中

西。 堂,景山 云: 氏 攘 衞 戎州己氏邑在今拱州楚邱縣,天王使凡伯聘 也。」趙氏 即《詩》所謂 遷之,故《春 文公東徙 營宫室,得其時制,百姓説之,國家殷富焉。」 水經注》:「菏水 縣故城西,又北 夷 爲 楚邱 《郡國志》曰:『城武縣有楚邱亭。』杜 狄 《序》云:「《定之方中》,美衞文公也。 狄所滅,東徙渡河,野處漕邑。 加 與京」。 在 渡 封之,文公徙居楚 清曰: 城武 河,野處漕邑。 『升彼墟矣, 「秋》稱『 縣 故鄭玄言觀 逕景 分濟於定 西 「程公説《 邢 南。 遷 Ш 以 如 東,又北 衛懿公爲狄 望 齊 歸 陶 邱,始建 春 楚矣。 其旁邑及 桓公城楚邱以 東 秋 衞國忘亡」。 北,北 分記 逕楚邱 齊桓 望 城 所滅 》云, 楚 逕 Ш 市 與 預 公公 111 城 己 而

也; 云。 爲衞 所由 馬,衞 伐之。 踰 預誤以 公爲狄所 野處曹邑,文公徙居楚邱。 開德之衞南、蓋隋大業初改從此名,謂 爲衞文公徙居於此。 使之楚邱矣。 有楚邱,故以别之。 釋云『衞邑』。 釋云『在 魯 河 由 而言 促世。 北 所 顧氏《日 雅邑 南爲近。二邑不出邦域之中,斯文公 楚邱 道 此 城之邑,而 濟陰 衞, 滅 衞 爲即僖二年 道 南 又衞南之楚邱在河北,凡伯安得 在 楚邱 非 城武縣」,於僖二年『城 知 渡 《水經》亦以戎 是以『城楚邱』爲前 河 而 也。 録》曰:『濟 河 南 使于魯邪。 拱州之楚邱 至仙 而 , 宜 衞爲 衞 東, 按: 衛所城之邑,於隱 爲 源 或 周 立 狄所滅,東徙 本 濟陰 逮 曹邑在今滑之白 戴 魯往來之地 陰 在 故衞 其歸 伐凡 則 公以 之城 汲 城 戎 郡 武 伯 南之楚 州 日 戎乃 廬 武 楚邱』 朝 I戏伐 縣 于 己 于 渡河 歌 梁郡 楚 氏 即 七 要 邱 今 邱 地 邑 則 杜 而

升

爲

開

德

府。

 \sim

太平

寰宇記》『澶

州

衞

南

獻

通

考

<u>*</u>

崇甯四

年

建

州

爲

北

輔

Ŧi.

城

武

縣

者

也

衛

南屬

滑

州

後

改屬

澶

州

漢置己氏

、縣,屬

梁國,是即

杜氏

所云

在

濟

公十年:

『宋享晉

侯于

楚邱

一。」蓋

在

《左氏》隱公七年:『戎伐凡伯于楚邱。』又襄 有楚邱城,春秋時戎州己氏之邑。」 衞文公所徙,誤矣。』 《水經注》乃 曹宋間 (文文 縣 年 陰 東 宋 濟 河 楚 與 而 所城 下云: 之南 承 邱 濮 在 間」者也。 即亭林所謂『不詳其地,必在滑縣、 縣 『山陽郡城武 注於隱七年『戎伐凡伯之邑』釋曰:『 北四里、《詩》云:「定之方中, 漢爲濮陽縣地。 衛邑」,本自不錯,惟於『戎伐』下多『衞 城冢記》云「齊桓築楚邱之城」,即此 一字爲不合耳。 後以 陽縣』下云:『 濟陰城武縣 珙案:程氏以 顓 垂 ,遷衞文公于此,子成公徙濮陽。』『東 頊 「衞 一故以 墟 曹 兩 文公 州 酈 地 名 縣』下云: 有 西南』,於僖二年『所城』則 懸殊 蓋 白自曹 縣。]又云: 濟陰城武 楚 然酈 隋開 衞 二萬信班 邱 成公自 何乃 縣,改 邑 皇 氏之説亦本《 遷 『有楚邱 十六年 古 縣 混 楚 八爲 楚 「 楚 而 即 而 邱 衞 不暇詳審 邱 開 爲 作于 邱 於此 南 徙 即 亭, 德之衛 城 此 乎 此 《漢志 開州 齊 也。」是 楚 在 置 此 , 故 ? 衞 城 官。」 爾。 楚 桓 縣 在 南 地 也 之 郡 公 H 杜 西 邱 衞

時

爲

曹

州

地

《方輿

紀

要》云:『

曹州曹縣

城

武

縣

即

開

德之衞

南,誤也。

濟陰郡,

清案:

亭林

之見

與

克

齋合。

但克

齊謂

南

四

十里

東

,故唐人

有魏滑分河之録矣。

曰

楚邱在城武西南

即 即

不詳

其

地

,然必

在

滑縣

、開州之間。

滑

在

二,而

非

戎伐凡伯之楚邱

也。

但云衞

邑

杜

氏

日

漕,

衛

下

邑。

詩

 \forall

所

謂

思

須

杜

氏

日

楚邱,

衛

邑。」《詩》所謂「作

于

而

非

曹

國之曹

也。

僖公二年「城

楚

邱

之楚邱 之楚邱,則真誤矣。 馬,而於《濟水》注乃以城武之楚邱混于衞南 知宋 徙渡河,都之。」 固 州己氏」,故以此 古 云:「白馬濟,津之東南有白馬城,衞文公東 伯之楚邱 詩》之楚邱也。 衞莊公登城以望見戎州」,又云「公入于戎 誤 時 而 當 衞 謂 南 在 爲 衞 河 縣之楚邱 衞 南 · 南也。 地 之楚 |楚邱爲衞地,要未嘗以爲是 者,蓋 酈注《水經》,於《河水》篇 明 邱 知 杜 在 文公所 因 河北 在 氏 河 哀 以 北, 而 十七年《左 隱七年戎伐凡 都在滑之白 尤誤 不 知春 秋 蓋 傳》 時 但

方。 定昏中而正,謂 視定,北視極 于楚室」,傳:「定,營室也。 Щ 正 揆,度也。 於於 「定之方中,作于楚宫, 是 「,●以 可 以 小雪時。」毛鄭皆以「定」爲營 度日出 誉 正 制 南 日人,以 宫室,故謂 北。」箋云:「定昏 方中,昏正 揆之以日,作 知東 之營室。 西。 南 四

> 不複。 **秋** 通。 矣,故以此詩首句爲記時,於義更順,於文亦 定南北之方。 位,既以此時爲營作之候,亦即 戴極星」之語,是古人本有視星以正方位者。 『定』爲記時,異於傳也。」承珙案: 「《考工 人君居必南面,小雪之時,定昏 記・匠人》有「夜考之極星」之語、《晏子春 鄭以定星昏中,小 室, 義云:「經傳未有以定星正南北者,故箋 惟毛以視定星 惟建宫室而定四方,既 雜篇》亦有「古之立國者,南望南斗,北 此則箋勝於傳也 故辨方記 雪之時 而 Œ 南 時,義 可 北, 有 遂以 以營宫室。 「揆之以 未 可 中當正 始 指 營宫室 不 此 苗南之 可 星 日 正 相 以 以

「作于楚宫」,傳:「楚宫,楚邱之宫也。

^{▶ 「}定」下,阮校本《毛詩正義》有「星」字。 ▶ 「視」、《續經解》本、阮校本《毛詩正義》皆作「準」。

是也。」《三家詩拾遺》云:「陶潛《群輔 仲梁子曰 非子》曰:『有 ·仲梁傳樂爲道』語,蓋先申公、浮邱伯 檀弓》亦引『仲梁子』,鄭氏以 詩》者。」 初 立 仲梁氏之儒」,即仲梁 楚宫也。」惠定宇云: 爲 六 國 録》有 子也。 時 「《韓 而説

也。 在漢 漢爲白馬縣,今滑縣南猶有白馬廢城。 濮二州連界也。」王伯厚《詩地理考》引之。 氏 東六十里,與漕 由 田間詩學》云:「此地去楚邱遠,不宜望見, 衞成公遷帝邱」,杜 誤認濮州爲濮陽耳。 寅曰:「堂,楚旁邑。 考開 有 爲 望楚與堂」,傳:「楚邱有堂邑者。」傅 顓 濮 州 頊 陽,隋改 秦屬 墓。」今滑縣東北七十里有帝邱 相 東郡,漢晉以來皆爲濮陽。 衞 去不遠,故登漕虚 南 預 今開 即今博州堂邑,以博 案: 戴公廬漕 注: 『帝邱,今濮 州 也。 可 在 漕在 楚邱 以 滑 陽 縣 望

> 所轄之廣,遂專指 總名爲濮陽,總屬東郡。 成公由楚邱遷帝邱,只在開滑之間 城,俗名土 之濮州爲 二,其首曰濮陽,爲郡治。 濮陽,以 山村是也。 爲 山 左東昌 顓 《漢 頊 後人不辨東郡 墓 而白 《書》: 在 爲東郡,以 焉,成公所遷 馬正 東郡 而 所屬也。 縣 東昌 當 疆 三 十

以望 之。 而得 總之,毛傳但云「大山」、「高邱」,本 南三里。」今《寰宇記》「衞 考》又引《寰宇記》:「景 非衞之所遷,縣有景 邱也。」承珙案:《輿地廣記》云,今拱 景」爲山名。 《九域志》云,開 名,商之故都也。 ,知地勢之勝」。 景山 與京」,傳:「景 范氏《詩 德 《集傳》因之,曰: 山京岡,乃後 補傳》云: 衞在 府有景山。 Щ 南 在 Ш 商畿内,故升 縣 一大山 澶 下 州 景 人附 衞 無 未 詩 南 Ш 州 京, 此 嘗以 景山 會名 楚 以 縣 地 東 理 邱 高

之帝邱謂

即其地

,謬矣。」

名見《 『景』與『亳』連文,定是地名,非山名也 景山」爲山 商 頌 名,徒據《左傳》『景亳』之語 《稽古》 編 **>** 日 : 「以《商 頌 **>** 然 之

然然允臧也』,皆可證。」 「終焉允臧」,假氏《詩本音》曰:「漢光和六年《白石神君碑》其銘曰『卜云其吉,終然允臧』,張衡《東京賦》『卜征考祥,終然允知。明此文法。」《稽古編》曰,今本「然」誤作「焉」,此俗人據朱《傳》而妄改。《校勘記》曰:「《唐石經》、相臺本皆作『然』、《考文》古中。案:正義云『終然信善』,又云『何害然允臧也』,皆可證。」

則前驅。」注:「燕出入,若今游於諸觀苑。」 王之小命,詔 大命。王出 案:《説文》:「倌,小臣也。」《周禮》:小臣 大僕之佐。「大僕掌 命彼倌人」,傳:「倌人,主駕者。」承 入,則自 相 王 之 小 左 正 馭 法 王之服 儀。 而 前 驅。」「小 位,出入 王之燕出 王之 臣 爲 珙

> 禮 僕」、「齊僕」等,皆掌馭車,《左傳》諸侯有僕 亦未可知 大僕之屬兼之,或文公時草創,官無備 無考。其《周禮》大馭以下等官,或諸侯即以 謂之「戎右」; 乘車 春秋諸國祇有戎車之御,謂之「御戎」,其右 人,又别有戎御等官,其職各不相 者之名」、《周禮》又别有「大馭中大夫」與「戎 事。」或謂《周禮・太僕》注云「僕,侍 制, 之事,故毛傳以「倌人」爲主駕者。 故命小臣。 此 ・燕禮》賈疏云:「諸侯 云「説于桑田」,亦是游觀 大僕 也 主 蓋小臣既爲前驅,亦可 輿 馬,殆沿 則惟晉有「乘馬 周 制 小臣當大僕之 而 歟 寓 ? 勤 御」,餘 通 兼主駕説 民之事 秦漢 又《儀 御於尊 今考 官

『星』。若星辰字,自作『曐』。」「《詩釋文》引姬傳曰:「古『晴』字本作『甠』。 甠,亦作「星言夙駕」,箋云:「星,雨止星見。」姚

而畫 得爲 以 若經文之「星」爲「甠」, 同。」或據宋本《釋文》引《韓詩》作「星,晴也」, 晴以 此非以「星見」釋詩「星」字。 曐見也。] 與箋説同。 見星 從夕,故云夜除星見。 「星」即「晴」字,甫晴 久以『星』字當曐辰字,此詩偶 星」爲 天精 胜」。 韩 姓」字。 晴 詩》曰: 明, 釋 姓也。」「啓」字從日,故屬之畫,「姓」字 而行,乃罪 也。」承珙案:《説文》:「姓,雨 而 見《索隱》。《一 「精」義同。 甠 預戒倌人,令其早駕耳。 見景星。」精謂 「雨止星見」之「星」,字當作「曐」。 「星 不 精 知 人與 漢 也。」精, 切經音義》云:「古文姓、甠二形 ^ 奔喪者之事,衞 即 初 漢書》直作「姓」,亦作 《日部》又云:「啓, 鄭意亦以詩之「星」即 則 已 駕 精明,與《韓詩》釋 與「晴」同字,不當 ,足以爲 多 明晴之謂 用 蓋四字總言夜 存古字 「晴」,少 《史記》: 勤 文固 而 矣 耳。 也 夜 用 除 若 其 雨 不 世

> 十日,夜星。」此亦古「晴」字之僅 下》曰: 晴」字,非訓 胜」,故《韓詩》以今字明古字, 荊 伐陳,吴救之。 「星」爲「晴」。 軍間 《韓 非 存者。 謂 子 星 里 説 即 林

淵 《傳》曰:非獨人之操心誠實 重 而論 子》「非直爲觀美也」義同。 庸君者,言 權。」承珙案:傳以「匪直」爲「非徒」,與《孟 夫尋常之君,故范氏《補傳》云「非 直』二字帶言之,而專侈言多馬,恐失 馬已至三千之衆。 人也。故下文又美其德,而 編》曰:「言文公務農愛民如此 答劉坪書》云:「言非特人化其 深,故能致國 本,蕃育其 吾君」也。 匪直也人」,傳"「非 人,非直 富强。」後 嚴《緝》則云:「文公能 則是君德之美衹 人也。 儒多取其 徒 而 因 文公操 庸君。」《 淵 非直 及馬 德 深也 可 説 而 /輕重 耳。 心 以 有 庸 以 其 非 務 庸 常 朱子 朱 之 匪 畜 之

則不如前説尚少語病耳。華谷説小異而大同。至《集傳》又别爲一説,之美,至於物被其功亦至衆多之盛。」此與嚴

蝃 蝀

之也。 同。 所謂 心,以 以道 自 教勸學 刺奔女也。」夫曰 傳 當以毛《序》爲正 禮止於未然者爾。 楊賜傳》注引《韓詩序》亦云:「《蝃蝀》, 觀「乃如之人」云云,是引其人以爲戒 《序》云:「《蝃蝀》,止奔也。衞文公能 化其民,淫 以 禮自守,與《桑中》諸篇之刺 以禮化民,斯民值喪亂之餘,革面 曰「止奔」,則時未有奔者而止之也 爲 刺 淫 奔之恥, 「刺奔」,則時有淫奔者 奔 之詩。 文公當中興之際,敬 國人不齒 承珙案: 淫 育者不 也。」朱 \Rightarrow 後 而 刺刺 洗 漢

「女子有行,遠父母兄弟」,《吕記》云:

留,但宜守正待聘,何至于奔邪。」 之。猶言女生外向,本非父母兄弟之所能 此言不可犯義而 氏佐曰:「《泉水》、《竹竿》言不可犯義 之側,不可得也。 「『女子有行』二句,似是當時陳語,故多引用 思家,言女子分當適人,雖欲常在父母兄弟 者,何爲而犯禮也?《泉水》、《竹竿》蓋 國人惡淫奔者,言女子終當適人,非久在 一則欲亟去家而 此 與《泉水 》、《竹 不能得,其善惡可見矣。」黄 行也。」《田 一則欲常居家而不可得, 竿》 詞 同 而 間詩學》曰: 意 異 此 而歸 衛女 詩 家 蓋

《曹風》傳不同 朝隮」傳云「隮,升雲也」,以此「朝隮于西」亦 范氏《補傳》、嚴氏《詩緝》並據《曹風》「南 爲升雲。 升」,自是承 朝隮于西,崇朝其雨」,傳 然此 上章而言,謂蝃 傳但言「升」,不言「雲」,恐與 至《周禮》「十煇」之「隮」,先 蝀朝升于 但 訓 「隮」爲 西 Ш

誤。

承珙案:

上章既

元皆云

俗

諺

東鱟

晴

則爲

在

東者

1、截雨:

者也

;

《名物疏

》:「據《玉

雨

虹見,則終朝

而

雨

而

有適人之道,亦性

蝀

「見於西方

日

義各有當,不得

傳意,似

以崇

傳云:

陽感陰

則

庸

復贅。

《詩

Ē

四

方」,不言虹

者,

氣

所爲,故

號

虹

爲

鄭

以爲

升

氣

後

鄭

以

西

爲

證。

者則大雨,莫見於東而色黄者則雨 箋云:「終其朝則雨,氣應自然,以言婦人生 子》云『若大旱之望雲霓』,以 莫敢指,次章不應又以爲陰陽 (雨,暮見於東則雨 而後鄭箋《詩》但云「朝 升,朝日始升而出見也」。 義》合二鄭説爲 「隮」。 亦以 歷 隮 止。」二説正 以 自然。」朱《傳》云: 西 爲 西 通 咔 蝃蝀 鱟 承 虹 政 者,行雨 劉熙《釋名》亦云蝃 上「蝃蝀」言之, 雨 旦見於一 引 經》: 爲天之淫氣 此。」楊旭、顧 二,以 此 一,以虹由 相反。 『旦見於 詩 者 朱《傳》 西而 和 止。」然則 有 也。 而 升 朝 馮氏 有 純 氣 隮 方方 ^ · 至 起 孟 爲 西 赤 雨 至 升 無 於 于 能 所謂 陽唱而 之徵。 朝爲 氣,應爲 天之忌也」、《後漢書 婚姻失序,即 彼爲證。 「妻乘夫則蜺見」、《月令章句》云「陰陽不 郵》云「虹霓出,惑衆 古書如《逸周書》云「虹不收藏,婦 和。」此義仍與上章一貫,且於毛意 旦及食時爲終朝」。 終 河 喻近。」其義可見。 也 致 圖 雨 雨 『蝃蝀』者也」,從 陰從,此理之順,故崇朝其 稽 者 程子曰:「在西者,陽方之氣來交於陰, 從旦至食時 朱《傳》云:「淫慝之氣有害於陰陽 不 耀 虹 久。 鉤》云「虹 蜺 生此氣」、《淮南子》云「虹霓者 ,皆妖 **^** 此則言久於其事。 衞 風》「曾不崇朝」,箋云 爲終朝。」玩 邪 《小雅》「終朝采緑」,傳亦云「自 蜺主· 弃 未有 所生,不正之象,詩 楊秉傳》云「今殿前 和」,京房《易 内淫」、《春 雨。」且 以

虹爲陰陽

和

而

之

不

· 専 一

秋

考異

傳》云

和

亦合。

况

之

相鼠

正; 益》 細 爾止,不愆于儀』之訓,所以 義各有當也。」 『無儀』、『無止』、『無禮』刺之。」許氏《詩深 民 曰:「此 「詩言『無儀』、『無 也。 序》云 此篇 蓋前 整 詩 綱 所 篇 相 維 謂 懲 鼠 而 蓋 污 》,刺 勵 居位 俗 止 臣 而 」,即《抑》詩 無 以 約 責 有名望者,故 禮 恥 民 士大夫,非 也。 以 故書『刺』, 法, 劉 『淑慎 氏 故 《詩 日 繩 以

《疏》『河東大鼠 鼠 爲 陽」之類,皆訓 彼鳥矣』、『相彼投兔』、『相彼泉水』、『相其 又牽合韓愈詩 相 《詩》以鼠 州 稽古編》曰: 之鼠 有 爲視。 謂 『禮鼠拱 禮 能 相 體 「《詩》多用『相』字,如 人立」之説、《魏 州 孫奕《示兒編》據陸 喻人之不如斯。 與 立」之句,欲解 河 東相 鄰 當 碩 相 鼠 亦鑿 有 鼠 疏 璣 陰 此 相

> 引《關 州耳。 爲 詩作 矣。 鼠。」《吕記》亦引韓 則交其前兩足 之哉?」承珙案:《埤 非 臆説 復 衞 於 相 尹子》師拱 文公時 王氏《總聞 有。 州 與 詩人目其地 河 而 衞 東 拱,謂之禮鼠 中 》謂 鼠制禮」,但不以「相」爲相 已 隔 愈《聯句》、《爾雅翼》, 徙 雅 「相」即「拱」字之變,尤 晉 河 産以 地 ,「有 南 不不 爲 亦 可 興端,何 種 謂 相 或謂之拱 鼠,見 在 鄰 河 得及 况 又 此

人則 喻無 誤 如 人之儀,喻鼠之皮,非也。 亦如鼠,非以皮喻儀也。 「舊説 此 解,惟嚴《緝》得之。」承珙案:嚴《緝》云 不 禮義之人。言鼠則僅有皮,人而 《稽古編》曰:「鼠 ,語意方瑩然。」《**潁** 鼠 可 尚 以 有皮,人而 無 儀,人 而 無 乃貪惡之物,故 無 濱 儀則 箋疏甚明。 此言鼠則只有 儀 詩 則 鼠 傳》云: 何 之不若。 異於 後 無 視 儒 鼠 傳 儀 以 鼠 則 以

之所 亦 而 疏 以 無 其禮 以 禮 ,不始于嚴華谷也 爲鼠 耳 也 者,豈以其無皮故邪? 人之所以爲 苟無禮 則 亦鼠矣。」此解 人者, 豈 以 亦有皮 其 面 Œ 本 ?

篇。 鄭訓 禮義與威儀 鼠 位 作「義」,故毛訓 恥,亦與人無威儀者同。」或謂詩「儀」字當 地之中以生,是以有動作禮義威儀之則。」是 而 威儀」之「儀」。 義」也。 無禮儀者」,乃合首章「無儀」、末章「無禮 有皮,雖處 ,猶爲闇昧之行。]箋云: 以 傳 爲「威儀」,以 人 四 文簡古,往 而 字 且鄭云「威儀」者,亦非容儀之謂 無 有别。 該之,「雖 高顯之處,偷食苟得, 儀」,傳:「無 《左傳》劉康公曰:「民 爲「禮義」之「義」。 但古「儀」字皆作「義」,故 往有此,未 别於傳。 居 尊位」二語 「儀,威儀 禮儀 承珙案: 必 者, 以「儀」爲 鄭讀 統 不 雖 也 傳云 括 受天 知 居 全 爲 本 視 廉 尊

> 嘗異于傳耳。 觀其云「偷食苟得」,與「闇昧」義同,箋固

未

皆相近 詩》訓「止」爲「節」,與傳「止息」、箋「容止 雖居尊」四字作「《韓詩》: 字,相臺本、《考文》古本無 觀」下尚有「無止,則雖居尊,無禮節 謂傳勝於箋。 止」以下十字,本《釋文》混入於注者。 「容止」猶言動静,「所止」義亦在其中,不得 爲,故可刺也。 人所止息自有定則,無 云:「止,容止。」《稽古編》 「人而無止」,傳: 也。 今本鄭箋 豈僅在 止 容止間哉。」承珙案: 「止,所 「《孝經》日 則淫僻之行無所不 Ĕ: 此十字,一 止,節」。 「毛訓 止 息 容止 也 本 也十 是《 蓋 」。」箋 無 則 可

曰 : 已,其義甚 「《韓詩 人而 精。《禮運》亦引末章 無 外傳》三引 禮 , 胡 不 此 遄 詩 死 以以 姜 明禮 - , 然不 氏 之不 廣 可 謂 可

涉佗。 乎 ? 以爲處高位之戒。《左傳》載列 哉!」」又《晏子春秋》亦兩引此二句。 臆説 即 之事,多以死决之,即此 十年:「晉人討衞之叛故曰『繇涉佗』,遂殺 之汰也,一爲禮於晉,猶何其禄,况以禮終始 云:「所謂不死何爲者,不忍其夫之無禮 爲天,即曰諫之,何至欲其速死? 曰:「人而 此 已 也。」承珙案: 《詩》曰:『人而無禮,胡不遄死。』」定 君子曰:『此之謂弃禮必不鈞。 盡 詩意。 無禮 労胡不 《白虎通》云此妻諫夫之詞 昭公三年《左傳》:「伯石 遄死。」 涉 意 也。 若婦. 國君臣 佗亦 馮氏 人 《詩》 遄矣 以 不敬 此皆 時 甘 可 夫

干旌

死而不去。」其説

亦鑿。

名。首章『干旄』,蓋即謂旟旌干首之旄也。劉氏《詩益》曰:「《周禮》九旗無『旄』

偏執也。 《詩》義存其説 旟。 云『祝』,皆謂組 謂之旌,蓋 備善説。 以旌,或亦當建 非一官,又《禮》文不具,未可詳考。學者當會通其義,不可 里宰皆士官,恐此篇所云非大夫所建。然據《周禮》說建旗 矣。 旄』、末章『干旌』,皆謂 官、卿大夫、士,大閱治兵、會同賓客,並 兵又云『百官載旟』。 長,中大夫。里宰,下士。《大司馬》仲秋 但 會同賓客如之。 今按《周 此 孔氏穎達泥《周禮》「州里建旗」之説,疑諸侯之州 則諸侯之大夫見賓客時,或亦當 衞大夫乘車見賢,旗旌並 鄭注《禮記》亦云:「旌,總名。」則凡旗設旌者,皆 《孟子》曰:『招大夫以旌。』大夫既 亦旗之通名。 禮 司常》云: ,以備一端。 也,篇中文義一例,皆互文 旌矣。 注云:州里,鄉遂之官。 第三句首章云『紕』、 以此推之,凡天子之百 旟 《禮》文殘闕,姑依 或 也; 大 或又謂首 閲 建,義未有考。 **旟上有旌** 州 里 旄,朱氏 章『干 建 末 載 得 旗 州 載 治 童 招 長 旗

常》「鳥隼爲旟」,則或如正義所述《大司馬

章則用《周禮・司常職》云「析羽爲旌」,又以 耳,此大夫見賢時,但建旗 者之通名。《説文》:「旌,析羽注旄首也。」孫炎注《爾 干旄言其旄,干旌言其羽,是旌本九旗析 見注旄首者亦有析羽。凡九旗皆有旄有羽, 傳於首章既用《爾雅》「注旄首」之文,而於三 旄,則二章之「干旟」亦有旄矣。 建物,首皆注旄焉。」正義謂九旗之干皆有 干首,大夫之旃也。」箋云:「孤卿建旃,大夫 ·注旄首曰旌。」則三章之「干旌」,即干旄矣。 首章傳云:「孑孑,干 ,宜並存之。」承珙案: 旄之貌。 此詩三章本 而 不建旌。 《爾雅》: 注 多 説 旄 羽 於 亦 互. 爲允。」 有礙矣。❶ 物則大夫也。 其文耳。 浚」,是專論一人之事。 《稽古編》曰:「次章『干旟』與首章『干旄』、 多好善,故廣言之歟? 然以『在浚』之文 『州長之屬』。 國之郊,而下邑曰都城,即都之城,一地而異 職》「百官載旟」,卿大夫亦 士以下兼之。 末章『干旌』,乃一人所建也。 鄭解『干旄』,兼言旃物。 夫專美一人,即可概其餘,毛説 所指非一人,豈以《序》言臣子 侯國之州長,士也。 又以干旟爲州里所建,而 蓋衛臣食邑於浚,當 有 三章皆云『在 建旟之時耳。

旃

刻卿

云

文。

可

通

織 組之法御 組也。 「素絲紕之,良馬四之」,傳: 總紕 四 馬也。」正義曰:「以二章言組 於此,成文於彼,願以素絲紕 「紕、所以

旌,似

謂

旌

爲一旗之專名,殊誤。

惟傳

於首

》亦云:「析五采羽注旄上。」劉

氏

疑大夫亦

當

建

章云「大夫之旃」,則首章之注旄、三章之析

羽,當皆指大夫,而於次章「干旟」但引《司

以」、《經解》本《毛詩稽古編》作「於」。

)則

其屬,則

夫也。 之勤 過謂 法而 容有 應中隔「在 無 有 之以素絲 以 義。 旗之旒縿」,則 方來禮賢,末句始爲賢者慮其何以畀之,豈 于田》「執轡如組」云「如組織之爲」,與毛 紕於此,成文於彼」,蓋本古語,而毛引之,故 簡兮》「執轡如組」傳語亦略同。 先 此 素絲紕組之法御四馬」者,古人文字闊略, 治民 告以 不關 意 ,如所謂 馬良御善, 獨此箋與傳異。 也 孔疏釋毛乃云:「此好善者,我願告 織 治民之法。) 紕組之法而御善馬四轡之數, 也。」夫御馬固 意義者,並未嘗明言以此御法告大 浚 故 至 於 「初見漢官威儀」也。 鄭箋謂素絲 經文「紕之」、「四之」相 此 以形容大夫車服之盛 語,而屬之於「干旄」。 總解之。」此 此正 案:毛意素絲御馬,不 可喻治民,然此大夫 義衍説之誤,毛本 爲縷、「以 説 鄭箋《大叔 是也。 其云「願 縫紕 承 · 禮 蓋紕 以 不不 意 旌 此 同 總

> 者 乃合絲縷 「東帛組之」更爲不 及蘇《傳》皆以素絲爲束帛,則「東帛紕之」、 5,皆以 繁維 而 未 良馬而 成者, 一辭矣。 爲御者所用 組 乃 合紕之數 也 若程子 股 而 成

攜也。 爲注。 借,故傳以「姝」爲「順貌」。 貌。」宋本「孫」上無「不」字者,非是。 《東方之日》「彼姝者子」傳云:「姝者,初昏 氾論訓》洞洞屬 記》「水屬不理孫,謂之不行」注云: 屬聲。讀若人不孫爲不孎。」《玉篇》: 借。《説文》:「嫜,孎也。」「孎,謹也。 之貌。」此傳云「順」者,蓋以「姝」爲「孎」之假 也。」案:「静女其姝」傳云:「姝,美色也。」 屬」同義,不孫謂 此 彼姝者子」,傳: 孫,順也。」《説文》之「孎」與《考工》之 亦與 (説 屬」注云: 文》「孎」字義 不孎,則孎 「屬屬,婉順貌也。」屬讀犂攜之 「 姝, 同 爲孫 孎」可假作「姝 順 貌。 爲 順 「孎,女謹 「屬,讀 《淮 《考工 从女, 南 子

者,猶 賢 者,毛傳「順貌」亦當指告之者。 與之」,則以「彼姝」指大夫。 大夫言之,恐非毛意。 承,「彼姝」似當指賢者。定九年《左傳》云: 《竿旄》『何以告之』,取其忠也。] 忠指告之 者既 未 明言 説 蹢 遍」轉 此卿大夫有忠順之德,又欲以 「彼姝者子」爲何人,鄭箋乃云「時 爲「路 跳」也。 玩經文二 見《廣雅》。 箋以忠 順指 語 善 至 毛 道 相

耳。 賵 馬 納 而 其不别云「兩馬四轡」者,以此章例之自明 馬」乃總言御馬之法,非以 之 矣。 成 則 於觖,唯執其外轡耳。 以 組也。 正義 兩 素絲組之,良馬五之」,傳:「總以 轡俱 驂 馬,是也;大夫以上駕四。 馬 **驂馬五轡。」據此** 執之,所謂六轡在手也。 五轡者,御 「凡馬,士駕二,《既夕禮》云公 馬之法,●驂馬 驂馬,馬執 解「良馬四之」也 則知上傳「御 四 馬 此 一轡,服 經 素 内 則 四 絲 轡 八

> 也。」此、 説從内 轡如 也; 孟 賻之。」《左傳》:「陽處父釋 也。」此則不然。古車未嘗 度也,亦非謂此大夫有乘兩 也;下章 『四之』、『五之』、『六之』,以 爲服,旁以一 多益難御,故先少而後多。 云:「馬 禮記》:「孔子之衛,遇 明。」《史記》:「晏子解左驂贖 此章 紅組,其 疏 而 以 頗 又 出外。 加一驂焉,❷益一轡,故言『五之』 引 (轡可 加 得傳意。 重,左右當均。 馬驂之,則 一驂,更益 以四、可以 上章『四之』,謂服 蓋此但言御馬之法,執 舊館 偏 五耳,不必以爲 傳稱 一轡,故『六之』 不 馬三馬者。 而 御馬 左驂,以 人之喪,説 可駕 不調,非 轅 越石父。」此 漸多之由 喻治民, 車 馬之四 兩 公命 以 駕三。 疏又 驂 人 兩 贈 情 制 爲 而 馬 馬

[「]馬」,阮校本《毛詩正義》作「車」。

^{→ 「}焉」,阮校本《毛詩正義》作「馬」。

至大夫 麗。 駕三也。 四 乘 頌》曰「約軧錯 法,此似述傳,非毛旨也。 則三馬之名。 謂之駟,本從 制 可 京、《春秋》公羊説天子駕六,《毛詩》説天子 疏 引王 案 也 見 所 駒。]傳曰: 武 殷益 乘 時 禮 大夫 王 同 且 有 所 殷 以一 亦 駕 又《異義 几 三馬 云: 王 皆 乘 之制,亦駕 可 牡 四 『大夫乘 騑,謂之驂。 一度記 衡,八鸞鏘鏘」,是則殷駕 以 又孔晁云: 騑 驂而來,亦謂之驂。 古者 五 士駕 「龍 駕 轅 騑 馬者、未見其 ₩ El 周 車。 旂 天子駕數》: 即 、駒。」 承 轅之車駕 道 以 四、故王 夏后 祀,六轡耳 天子駕六,諸侯與 倭 《詩》云「 《株林》曰:『乘 作者歷言三王之 今車言之, 則毛以 周人 遲」,大夫所 氏 偏 駕 又益 基云: 三馬 而 大 《易》 兩 經言驂, 不 四 耳」,魯 夫 雖 調 一騑 騵 謂 亦 則 四 異 乘 也 孟 商 之 彭 駕 我 古 不 五.

記》: 良夫 之制 數 ? 也。二 記》日 法,則饋 二之證。 成子屬孤子,三日朝。 師 几 卿 周天子駕六,校 掌王馬之政,凡頒良馬 與《易》、《春秋》同。 皆布乘黄朱」。 尚書大傳》: 監之也。 幸 同 也。二承 孔 駕 「乘衷佃兩牡」。 「驂,駕三馬 《顧命》諸 大夫駕三,經傳 四 四 人馬者,自當備駕 駕三 子適周,魯君 馬 大夫駕三, 《尚 爲 珙案: 「命民得乘飾車 雖 乘 侯 人 書 言獻 於經傳 也。」哀十七年《左傳》: 何 則 • 玄之聞 此 《説文》:「駢,駕二 又二十七年《傳》: 以 士駕 無所 何 顧 四 而養乘之。 與之 設乘 無文,然古 不 不 黄 命》: 圉者 獻 以 言,是自古. 車 馬 也、《周 一乘 六 馬 ·駢馬 朱 車 養 庶人 諸 馬? 乘 與 鬣 兩 侯 車 圉 之數 心此 [無單 乘馬 禮 駕 也 馬。」《 人應 馬 以 兩 学校 無 ^ · 而 六 既 皆 王 馬 門 史 陳 渾 馬 實 師 度 爲 如 人 説

殺以 兵篇》云「六馬不和,則造父不能以致遠」; 身篇》云「昔者伯牙鼓琴而六馬仰秣」, 轡不亂,而二十四 産,以馬四匹。見子太叔,以馬二匹。」雖降 又《左傳》:楚公子弃疾過鄭,見鄭伯,「以其 也」,《白虎通義》曰「天子駕六者,示有事天 六驥之上,則致千里」,《列子・湯問》云「六 馬乘六」,《莊子》逸篇云「金鐵蒙以大緤,載 天子駕六,則《逸周書・王會解》「天子車立 爲二車之用,二匹者亦可爲一車之用耳。 乘馬八匹私面」。「見子皮,以馬六匹。 孔篇》亦有「士乘二馬,大夫乘三馬」之語。 駕三之制,故賜 (史記 梁惠王以 左傳》「王 兩,亦當由駕三駕二皆可御 李 賜 安車駕三送淳于髡。」《論 斯列 虢公、晉侯馬三匹」,疑必古有 以三馬。 傳》「是猶騁六驥,過 蹄 所投無差」,《荀子·脩 《宋書·禮 車,故 衡 志》: 决 見子 六 · 問 《議 隙 至 匹

> 其實不始於秦漢也。 志》引《史記》:「秦始皇以水數制乘六馬。」以《王度記》爲漢法。劉昭注《續漢書‧輿服地四方也」,是古制由來已久。鄭《駮異義》

載馳

遠。」」此《韓詩》之説,與毛師承各異。 衞 志則怠。夫道二,常之謂經,變之謂 也。』孟子曰:『有衛女之志則可,無 娶者非己所自親也,衛女何以得編于《詩 案:《韓詩外傳》:「高子問于孟子曰:『夫嫁 詩》三十九篇,惟許夫人之《載馳》乃其自作 於時衞戴公 正義曰、《載馳》是許夫人作,得人《鄘風》者 『既不我嘉,不能 女行中孝,慮中聖,權如之何?』《詩》曰 序》云:「《載馳》,許穆夫人作 國 於 旋 鄘地, 反。 故 視我不臧,我思不 使 其 詩 屬 也 權 衞 鄘 〕。」《衞 女之 劉 也 向

故知毛傳爲信而有徵也。《外傳》合。但其以許夫人爲衞懿公女,又以《外傳》合。但其以許夫人爲衞懿公女,又以多用《韓詩》,故《列女傳》載許穆夫人事與

有乎? 前。」承 月也。 漕。 穆夫人所爲賦《載馳》以弔失國歟? 年,諸侯乃城楚邱 十二月,此蓋魯僖公元年之十二月。至僖二 方中》,文公營室詩也,在夏之十月,爲周之 夫人之思歸當在此時矣。 周之十二月,夏十 夏之間,戴公已卒,文公雖 入衞 次滅衛. 是年戴公卒,立甫一月耳。文公繼立。 范氏《詩瀋》曰:「《春秋》閔公二年:狄 詩『芃芃其麥,言采其蝱』,豈十月所 珙案: 冬十二月,宋桓公隨立 在二年冬,亦非麥蝱之候。考《定之 蓋唁衞或在次年,或戴公未立之 戴公未立以前 而封衞焉。則當僖元年春 立 而 ,不容有唁,况 尚無 戴公以廬 甯居,許 揆之情 于

而漫爲託興也。「麥」、「野」雖皆係設詞,亦不宜取非時之物事,「衞侯」似指文公爲近。「蝱」、「邱」、

「區」古矛反,「豆區」之「區」鳥矛反,乃因 珙案:翁説是也。 『悠悠』以下别爲韻,斯亦固滯之甚者矣。」承 改叶,故於《載馳》之『侯』必上叶『驅』,而謂 雅・行葦》之『句』『鍭』同韻者,轉欲以『句』 必欲以「驅」轉「續」,遂執定此説。 以「侯」當音「胡」。 必與『屬』叶者也。顧炎武因《秦・小戎》詩 望舒使先驅兮,後飛廉使奔屬」,此『驅』字不 流」,此『驅』字必應與『流』叶者,《離騷》『前 當以『驅』叶『侯』,不當以「侯」協『驅』也。 陸士龍《九愍》『肅榜人以曾驅,命湘 曰:「侯,古音固,有音胡者。 載馳載驅,歸唁衞 顧氏《唐韻正》博引古書 又謂今人讀「 侯」,翁氏《詩附 至若此詩 品 甚至《大 娥而 萌」之 自 安

則此 謂 韻 引宋《讀 如影追軀。」從區得聲者,與「憂」「求」叶韻 同 侯」而 心兮煎熬,惟是乎用憂。」楊方《合歡詩》: 始于晉宋 逸《九思 聲好相 且 詩「驅」與「侯」自可通「悠」「憂」等爲一 王逸漢 誤 曲 ,晉宋之間 應,同 歌》以「驅」與「由」韻爲證。 也 「將 人,已讀「區」爲古矛反,不得 氣好相 喪 始讀 兮玉 求。 斗, 「驅」字爲古矛反, 我情與子親,譬 遺 失兮紐 今考 樞。

戰,國人皆曰「使鶴」矣,世族在位諒 何以 告」是也。 君子,無我有尤」。 注 秦而復楚如包胥其 云 衞大夫來告難於許時。」承珙案: 「經不書滅者,衞之君臣皆盡,無復文 知首章之「大夫」獨爲衞之大夫乎? 朱 大夫跋涉, 且下文云「許人尤之」,又云「大夫 我 此「大夫」既爲許之大夫, 人者。 心 則 憂」,箋云:「跋 閔 二年《左傳》 熒澤 無 有 杜 之 涉 號

其事。 會檉者 則 封衞。 助。 足以 《傳》謂夫人馳驅 麥,正如《泉水》、《竹竿》皆設想之詞 衞,夫人以將欲親 也。《潁濱詩傳》謂:「許大夫 廬漕,宋桓公與有力焉,而 夫,倉卒潛走,舉朝莫知,迨去路已遥,始覺 小君之尊,遠適異國,豈有不告於君、不命大 而追之者乎? 必將以不可歸之義來告,故 至,而許大夫有奔走跋涉 馳 亦未必使大夫唁于 驅」,曰「跋 解憂。」然宋與許皆衞婚姻之國,戴公之 至齊桓公使公子無虧戍漕,又城楚邱而 《吕記》引朱氏曰:「夫人父母不在 城楚邱之諸侯,即會于檉之諸侯也 ,齊、魯、宋、鄭、曹、邾,而 涉」,以 且夫人單身赴難,亦復 而 唁其兄,雖 歸,將唁衞 及 衞 陟 而 也。 許 來者。 邱 心以爲憂。 大 不 采 總之,此 侯 跋 夫 聞 蝱,行 許不與焉, 於漕邑, 涉 之 有一旅之 夫人知 往 往 野 詩 唁 夫 而 何 見 益 於 其 未

害意 易前 當使 子舊解,最爲 弟,而託言不欲勞其大夫之跋涉 説 大夫 ,舉詩中所言皆指爲實事,轉致 甯 其 圓 兄 通 弟 無閡。不知《集傳》何 許 夫 人 欲 也。」此 自 歸 唁 其 以 以 蓋 朱 改 辭 兄

我思 傳釋「旋反」、「旋濟」,皆主所思而言,謂 遠衞也。」「既不我嘉,不能旋濟。 我 也, 視爾之不善, 而我 善,言視爾之不善, 但語意與上「既不我嘉」相複,似宜從鄭箋以 家多據之以釋《毛詩》,謂視爾不以 ·不臧」指許人之不善。 視爾不臧」、《韓詩外傳》作「視我不臧」,諸 思 往不能回 也。」「視爾不臧,我思不遠」,傳:「不能 不閟」,傳:「濟,止 既 不 我嘉,不能 反,我思既動,不能 而 旋反」,傳: 思 我 蓋善猶親 也 則不能閟 思 則 閟,閉也。」案: 不 止 示 視爾不臧 能 仁善鄰之 息 而 我爲善。 遠 耳。 能 止 而 旋 我 也。 至 忘 思 反

> 皆非是。 雅 則關 旋濟」。 見,嚴《緝》以爲我之所思其説非閟 閉也。」「我思不閟」,言我之思不可遏抑,猶 云發於不容已爾。 「閟」爲「閉」者、《魯頌・閟宮》傳亦云:「閟 如雨止。」是「濟」「霽」古通,故訓爲「止」。 「濟」、《史記正義》引鄭注:「濟者,兆之光明 雨止爲霽。」《洪範》曰「霽」,《宋世家》「霽」作 不遠」承上「不 • 釋天》「濟謂之霽」,郭注:「今南陽 而 止矣。 苟可反之,則遠而忘矣,苟可濟之, 傳訓「濟」爲「止」者,《爾 能 旋反」,「不閟」 《吕記》以不閟爲曉然易 承上「不能 而 呼

也。」傳 有 至偏高之邱,采其 乙 行」,傳:「偏高 「升邱采貝母,猶 陟彼阿邱,言采其蝱。 雖 不 言興 日 蝱 而 阿邱。 婦人之適異國,欲得 者,將以 興 意 自 蝱,貝母 女子善懷,亦各 明。 療疾。 故 箋 也。 行,道 中之 升 力

乎 ? 興爲 之思: 狂, 則以 然今之所以 舒憂想之情,或采蝱以療鬱結之疾」,則誤 達傳箋之意。 之行,而不知夫人之於兄弟篤厚。 難者觀之,爲甚急。 蝱若 之多思者有道,猶升邱采蝱也。」《東萊文集》 助安宗 女子善懷,亦是人各有所見而行之。」此説 説曰:「蝱,治病之物。 緩 切,彼方且 衛,自 爲 賦 非真指許人以爲穉狂,蓋言我憂患 可緩,自病者觀之,采蝱爲甚急。 其狂 矣。 女子情性之常而尤之也。『衆穉 國 至 也。 惑乎? 無家難者觀之,若可緩,自有 《吕記》又云:「女子雖多懷思 迫切者,亦各有道。 一於是 朱《傳》言「其在塗,或升高 尤我之歸,意者衆人其 善,猶 也。」此 今許人徒知以義止夫人 不 多 然,何其不相 也。 自不病者觀之,采 説 懷, 亦 得 思也。 他人不 詩 體悉 如此,雖 人微 幼 夫人 如 女子 不不 知 婉 穉 且 家 此 以 以 善

之旨。

爲 卷九。 赴義相近,韓訓「控」爲「赴」,似較「引」義 馬注:「控,投也。」控告,猶言投告也。 逍遥遊》「時則不至,而控于地」、《釋文》引司 襄八年《左傳》「無所控告」,是也。 文》:「控,引也。 於大國之諸侯。」殊覺費詞。《一切經音義 毛義也。箋云:「今衞侯之欲求援引之力助 勝。 引《韓詩》云:「控,赴也。」赴謂 控于大邦」,傳訓「控」爲「引」。 《詩》曰:『控于大邦。』」用 《莊子 赴告。 投與 <u></u> 説

云:「在志爲思。」《釋名》云:「詩,之也,志也。「之」爲「思」者,《素問》《陰陽應象大論》。思不遠」、「我思不閟」相應。雖思至篤厚,而思不遠」、「我思不閟」相應。雖思至篤厚,而厚也。」毛意蓋以「所之」即爲所思,與上「我原也。」不如我所之」,傳:「不如我所思之篤

「至」矣。 之所之也。」蓋「思」之爲「之」,猶「懷」之爲

詩雖 也。 弟。 分,當是古本如此。 同,章六句者用一韻,章八句者用兩韻 次章章八句,三章與首章 章,則服意自以此詩 珙案: 疏所引服説,既以「許人尤之」爲三 聽,遂賦四章,言我遂往,無我有尤也。」」承 驅 屬《鄘風》。 邦』乃在卒章。此實五章,言『賦四章』者,杜 馳》之四章,義取『控引大國」。今『控于大 預云並賦四章以下。服虔云:『《載馳》五章 而唁之。在禮,婦人父母既没,不得甯兄 於是許人不嘉,故賦二章以喻思 許人尤之,遂賦三章。以卒章非許人不 不必拘, 正義云:「《左傳》叔孫豹、鄭子家賦《載 許夫人閔衞滅、戴公失國,欲馳 而 此篇固 今《毛詩》章句,後人或 通爲四章,首章章六句, 相配整齊。 同,四章與次章 服 氏 不遠 所 古

> 賦《載馳》者,皆止取「控于大邦」之意,無 四章以下,亦非也。 並賦「許人尤之」之章。 外,以下别數爲四章,非也。 分爲四章,不爲無據。 有改易。 「五」字恐係「四」字傳寫之譌。 服 載 馳 孔正義謂服置首章於 \Rightarrow Ŧi. 杜注《左傳》謂並 章 子家、穆叔所以 屬 《潁濱詩 鄘 風》者, 庸 賦

毛詩後箋卷四終

十,猶夙夜不怠,思聞訓道。

命其群臣

曰 :

無 謂

我

老耄而

舍我,必

朝

夕交戒。』又作

徐幹《中論

·虚道》篇云:「昔衛武公年過九

衛

涇 胡 承 珙

淇 奥

年,國人誦美之詩耳。

其時之王,或幽或平,未可知也。」承珙案: 爲公,亦爲卿士矣。 此云『入相于周』,不斥 戎,甚有功,平王命爲公。 已爲卿士。 周,美而作是詩也。」正義曰:「《賓之初筵》 章,又能 云『武公既入而作是詩也』,則武公當幽王時 《序》云:「《洪 聽 其 又《世家》云: 武公將兵佐 規 諫,以禮自防,故能入相于 奥》,美武公也。❶ 則平王之初,未命 有文 周 平

《抑》詩以自儆也。 爲有據。 奥》屬之平王,較嚴《緝 澳》。」何氏《古義》據此謂歐陽《補圖》以《淇 今觀詩言「終不可諼」,自是武公耄 衛 影幽 人誦 王 其德,爲賦《淇

時詩」之説

轉

借字。 《魯詩》《釋文》引《石經》,是漢一字石經,乃《魯詩》。 雅》、《説文》皆作「菉」。 竹也。」《毛詩》字多假借。緑、禮記》、《爾 儒並無異説。 説文》皆作「薄」,惟《爾雅》作「竹」與毛同爲 「緑竹猗猗」,傳: 而「緑」之爲王芻,「竹」之爲萹蓄,漢 惟兩《漢志》並言「淇園之竹」。 「緑,王芻也。 竹,《 釋文》引《韓》 竹,萹

0 公」下,阮校本《毛詩正義》有「之德」二字。

毛詩後箋卷

竹材。 邪? 旁有 淇 然 菉 至 院看詳。 河渠書》有云「淇園之竹」,安度未爲不識題義」,乞下學士 不依注作王芻、萹竹,謂之失旨,放罷。 戴 唐,菉竹漪漪」,而譏其 李匡乂《資 「緑」爲 竹 陸 園 凱 酈注《水經》云:「今通望淇川,無復此 王芻、萹竹不異毛興。」此得諸 證 璣 之《 緑竹草。 之竹惟 况揚貢篠簜 《易》言蒼筤、禮》言竹箭,皆不 物 緑 以 稱 于是賜安度出身。此宋人以 箭。 竹 與竹别草,以駮其非。 一草名,蓋本《博物志》謂 則「緑 暇 譜 名。 盛 容齋三筆》載: 集》 \Rightarrow 見《後漢書》注。 於 云 見《詩正義》。 竹」之名自非 漢時, 引謝 ,荆貢箘簵,而 根 乖 瞻《竹贊》云「瞻 至後 深 吴安度試 謬。 耐 李巡《爾 孔 寒, 魏 富弼疏稱《史記 宋儒乃專指緑 緑竹爲竹箭之始。 經 疏 豫州 而 考《采緑》之 茂 目 「緑竹青青」詩 典 引「終朝 I驗者。 無 彼 雅》注 所有矣。 復 未 淇 聞 遺 彼 苑 物, 豈 兼 謂 采 淇 貢 種 中

艸 从 草,又有「菉,王芻」,亦似非 句。 鄭。 故生於淇旁耳。 莎。」鄭氏樵以爲即藎草。 以「緑」狀其色,似 **蕪對言,並是一物,殆即所謂** 揖注以緑爲王芻。 沼」對句。 則緑竹純茂」,言緑與竹同茂,故以「冬夏異 兮」,即引「終朝采緑」,字作「菉」,而 芻」釋之。 爾 菉蘋齊葉」,以「菉」與「蘋」連言,自是水 緑 艸 ,扁聲。」「茿,萹茿。 雅》「菉,王芻」郭 段氏《詩 毛 水,毒聲。 但《上林賦》所謂緑蕙 無 傳 其又引《上林賦》「揜以緑 王 小學》引《魏都賦》「南瞻 以 逸注《離 已 讀若督。」「萹,萹茿 《説文》:「藩,水萹茿 見《淇 非「緑,王芻」之「緑」也 今按,《爾雅翼》已引此 注 从艸,筑省聲。』《經 騷》「薋菉 奥》, 云: 但《説文》既 與 ... 物。 故 「樹蕙百畝」者 一今呼 江 鄭 離、留夷、 箋仍 《招魂》云 葹 爲 凉蕙」,張 義 也。 以 淇 鴟 盈 有 同 也 澳 脚 毛 室 王

尚未必然也 然則諸家《本草》僅以王芻、萹竹爲草類者, 兮」,王逸注云:「萹,萹蓄也。」是萹蓄乃可 好生道旁,可食。」《九章》云「解萹薄與 與「茿」疊韻通用。 既假借「竹」字,安知必爲「茿」字之借而 雜記 藩」字之借乎? ,《毛詩》作「竹」,以爲岸萹茿。 》據之謂《魯》《韓詩》作「薄」, 鄭《采緑》箋亦以王芻爲易得之菜。 《爾雅》作「萹蓄」者,「蓄」 郭注:「似小藜、赤莖節 以 然《毛詩 爲 雑菜 水萹 非

同,孔 其規 象曰 「也」字。 文》有「瑳」無「磋」。 諫 磋,玉 《磋」爲 如切如磋、《唐石經》初刻作「瑳」,是也。 疏 以自修,如 傳義本之《釋訓》。《禮記・大學》亦 謂記 曰琢,石曰 「道其學而成」者,「道學」猶 者引《爾雅》 如琢 玉石之見琢 如磨」,傳:「治骨 磨。 而釋之,是也。 道其 學 磨也。」岳 而 成 也 日 本無 切, 聽 《説

> 學」。 義。 也。 《禮記》孔 「道」爲「言」矣。 中「道盛德至善」之「道」,蓋亦不以「道學」之 其學而成 蓋切磋者 「如金如錫,如圭如璧」,箋云:「四者,亦道 《大學》正義以鄭注「道,猶言也」專謂 鄭注《大學》則云:「道,猶言也。」末 《中庸》「道問學」注云: 朋 也。」似亦以「道」爲「言」,與 疏云:「道學也者,論道 友講習之事,故 云道: 「道 猶 其 其 學 學 由 傳 矣。 而 也 異 章 經 成

語與? 篇 門引《詩》,皆作「如 考也。」承珙案:《禮記 家 合,可見《毛詩》源流 如磨」,宋氏綿初云:「束皙《補亡詩・ 也。 曰 : 《太平御覽》九百六十四。 『粲粲門子,如磨 李善注引《毛 琢 詩 七十子,所以 如磨」,而《毛詩》與之 影如 如錯。」其《韓 大學》、《論語》皆孔 引《韓詩》「如錯 琢 如磨」,未之 勝于三 詩》之 白華》

者俄 詩》歟? 貌。」亦不 雅猶言嫺雅,容志審道亦寬大嫺雅之意, 作『撊』,服虔、楊雄、張揖皆訓『僩』爲『猛』」。 應,故易之。僩、《左傳》、《方言》、《廣雅》皆 如嚴峻之峻。 皆云『瑟兮僩兮者,恂慄也』。 段注云:「許與毛異者,以《爾雅》及《大學》 也。」《説文》「僩,武貌」,引《詩》「瑟兮僩兮」。 「反僩爲野」與荀子「陋」「僩」反對相 而荀卿子『塞者俄且 道術》篇「容志審道謂之僩,反僩爲野」,僩 《毛義近。《釋文》引《韓詩》云:「僩,美 《賈子·傅職》篇 且 蓋大毛公固受《詩》於孫卿子者。」承 瑟 知也」,則以 分僩 以 又「赫兮咺兮」,傳云:「咺,威儀容 爲武。 兮, 言其容貌嚴峻,與寬大不 赫 《説 分呵 哂 通也,陋者俄且僩 「明僩雅 陿 文》所據,其《齊》《 一兮」, 與寬 恂,或作峻,讀 以道」之文,又 傳: 大反對 「僩; 同,是亦 與與 也,愚 寬大 相 珙 毛

> 《周禮》則如字。《説文》作『膾』。」段氏《周 作『膾』,三家詩有作『會』者。 『膾,所以會髮』,爲許叔 與《周禮》故書合。今本毛傳疑有錯誤,當云 者」,引《詩》『膾弁如星』,是《詩》本作 漢讀考》云:「《説文》『膾,骨擿之可 髮。」《釋文》云:「會,古外反。 著」釋之。《説文》引《詩》作「愃」,云「寬閒 也。 腹貌」,與毛韓義異,當亦出《齊》《魯詩》耳 止 宣著也。」《釋文》引《韓詩》作「宣」。 毛作「咺」者,蓋「宣」之借字,故以「宣 「會弁如星」,傳:「弁,皮弁。所 重 所 鄭君注《禮》時 本。 注同。 蓋《毛詩 宣 會 以 鄭 注 禮 心

注『收者,所以收髮』,證傳『會者,所以會髮

今本佚去。」《詩小學》又云:「正義引《儀

及《韓詩》爲説改字。

而『膾讀爲會』之文,蓋

蓋皆《韓詩》,至箋《毛詩》時則又合《周禮》注

未治《毛詩》,其所云『會弁如星,其弁伊綦』,

髮也。 《士喪禮》之「檜」今本作「鬠」。用組爲之,經有 明文,知《周禮》之「會五采」亦是以五采組束 經,可爲確詁。 以《儀禮》之「檜」釋《周禮》之「膾」,用經證 著笄,謂之檜,沛國人謂反紒爲檜。」此先鄭 與「膾」同,書之異耳。 鄭司農云:讀如『馬會』之『會』,謂以五采束 倒置其文耳。」承珙案: 段氏兩説微異。其 會髮。弁,皮弁。』淺人删去『會者』二字,并 之文,孔氏 「王之皮弁會五采」注:「故書『會』作『鱠』。 云「會者,所以會髮」,是也。 **贈」當爲「會」,殆未必然也。《周禮・弁師》** · 體」,則《釋文》、正義皆未言及,鄭箋又不云 會」爲「膾」之假借。 且「五采」二字屬上「會」字讀句,與後鄭 《士喪禮》曰『檜用組,乃笄』。『檜』讀 所見傳未誤 所引《儀禮》説,乃先師舊訓 傳當云:「會者,所以 説曰:以組束髮,乃 也。 此蓋毛公謂 云《毛詩》作 經

《左傳》所據《詩》作「繪」,亦五采之義 《説文》以膾爲骨擿,引《詩》作「膾弁」,此三 又出於《説文》諸書所引之外者矣 誘注《吕覽・上農》篇引《詩》「冠弁如星」,則 説,但讀「會」義不同,初未嘗與毛異字。 高 家義,不必同毛。 傳》注引《詩》以爲「繪弁」,見昭二十八年《左傳 陳氏《稽古編》辨之極晰。 處,狀似星也」,亦衹言其布置疏落之狀,非取象於星光 指玉之光。 注。今本仍作「會弁」。《釋文》「會,本又作璯」。 以五采束髮 會髮」,當亦謂以 連下「玉」字讀者不同。 即如鄭箋「會」謂「弁之縫中,飾之以玉 而 加 組束髮。 弁,文駁如星也。「如星」不必 鄭箋則仍用其《周禮》注之 《五經文字》云:《春 毛傳 經言「如星」者,謂 以「會」爲「所以 是杜 也 秋 也 注 而

今本譌作「銅」。《文選・西京賦》《七啟》注引皆作「鉤」。較、《説文》作「較」、云:「車輢上曲鉤也。」鉤、「猗重較兮」、傳:「重較、卿士之車。」

記 賦 飾,則崔 鉤,言句 至漢乃圜之如半月然,故許云車上曲 軾,高處正 氏云:「較之制,蓋 以式低較高,望之若兩重然,故曰重較。 低,較在後而高,故鄭云「兩輢上出式者 於兩輢之上,下與軹之植者相貫。 其前三之一,式也,後三之二,輢也。 自 式,高三尺三寸。較,兩輢上出式者。兵車 崇,以其隧之半爲之較崇。」注云:「兵車之 又云 前,二在後,以揉其式。 輢,車 較而下,凡五尺五寸。」蓋車深四尺四寸, 云: 禮 書》「彌龍以養威」,「彌」,許書作 旁也。」《考工記》: 顿 中 , 豹云文官青耳, 武官赤耳。 戴翠 鉤 方有隅,故謂之較,較之言角也。 車 也。 耳 幔,倚 反 圜之,則 漢與周異。 出 也 金較。」荀 以 「三分其隧 亦謂之車 其廣之半爲之式 輒 周時較高 車 卿 式在 兩 較分冒 《 西 耳。 及 鉤。 輢 一,一在 也 前 也 其 史 京 曲 於 段 而 龍

緯》: 也。」據此疏,則傳謂「卿士之車」,蓋以武公 尺五寸,斷三尺得至較者,蓋天子與其 斷 重較之車,諸侯之車 以靈姑銔率,請斷三尺而用之。服注 故爲五尺五寸。 式已崇三尺三寸,更增此隧之半二尺二寸, 劉熙曰:『較在箱上,爲辜較 而飾 無「重較」、「單較」之文,然《考工記》疏 重,卿所乘也。」毛公謂『重較,卿士之車』,必 侯安車倚鹿。』然則較辨尊卑,自周已然。 有所受之矣。」承珙案:《詩正義》謂《周 摩」, 鄭云兵車自較而下五尺五寸者,以其前文 ,爲輿倚較。」是其 三尺 以 諸侯旗齊軫,大夫旗 解 金。 云 使至於較。 司馬氏《 乘 輿 昭十年《左傳》: 公使王黑 金 輿服 義也。 不重較,故有 大夫 耳 也 志》: 『乘輿 引。」皆 齊較。 旗 下文云: 『公、 也。 至較。』按 謂 重較,其較 軫至: 三尺之較 較 金薄 爲 臣 云 龍 (《禮 乘 五 列 故 繆 形

非

也

與

義。《荀子・ 豹《古今注》曰:重較,重耳也,在車轓 善,至于車 是藩蔽,與斬爲車耳 車」,定九年 車皆名「軒」。 軒,曲 一之輈 此傳 亦言 如牛角。 不知「藩」「幡」字本通。《太玄・積》:「次四 「重較。」《候 ,故謂之較,重出式上,故名重 車耳反出必邪地向 卿 義相 曲 一 朝藩 士,故 與 耳。 者,即 轓 測 曰: 非 備。 然車之重較者名軒,正 皆曲 車。」藩,當本作「轓」,段注謂此「藩」 相篇》:「軒較之下而以楚覇。」楊 曰:「犀軒,卿 有 杜 人》傳云:「大夫以 所謂 不同,用顏師古注《景帝紀》駁應劭之 重 戴氏震謂傳因《詩》辭傅會 至于蕃也。」此 者爲軒。 注《左傳》,於軒皆曰「大夫 較 敷? 輢上曲 外,故云曲 又考凡 曲 鉤, 「蕃」亦當謂轓。 車。」《説文》: , 朝,即 與車耳 上乘 菆 卿 轓。 梁 大夫之 較 軒 輈 1君子積 軒。 其 反 舉之 E 注引 也。 重 崔 曲 出 謂 較,「 旁。 服志》: 立 臧

車

爲

周

如角

起

《詩》作『猗』、《群經音辨·犬部》引《詩》亦作 虎伏鹿,公、列侯倚鹿伏熊。」此「倚」皆謂 要其字爲「猗」,其義則「倚」。 無説者,以當時「猗」「倚」假借,人所共知耳。 多引作人旁,要未若從犬者尤信而有徵也。」 爲「倚」之假借字。 承珙案:謂「猗」爲「倚」之假借,是 『倚』。然《釋文》作『猗」,云於綺切,依也 式』,正義、《荀子》楊注、《文選》 『猗』字,傳箋 『猗』,則自六朝至宋初皆作『猗』字。 正義釋經,云『倚此重較之車兮』,似本從人 稍後,一 而下引經仍 伏」皆謂伏式。 氏 「乘輿倚龍伏虎,皇太子、諸 手 經 可以 無 義 作 説。 雜 憑較; 《説文繫傳》『較』字下引 『猗』,則陸孔皆從犬旁, 記 較在兩旁,可倚 <u>₹</u> 禮 俛 記 躬 《後漢 向 猗 曲 前 禮 李注皆 重 也。 唐人雖 侯 較 兩 傳箋 兮」, 王 手 必 直 作 倚 輿 倚 口

敬。 仍用 式 以憑 較,則横於當面, 下 軾。」軨爲車闌 軨,猶言倚 九辨》: 輢上,所以蔽塵,亦便於左右憑依。 出於式者,以輪在輢外,車驅疾則塵上,較 於較者,以便車 之。其實非也。 一木,謂之爲較。 了,首且 霑軾 《釋文》「於綺反」之音,亦誤。 式 較 也。 在車兩旁三分深之二,稍後於式 「倚結軨兮長大息,涕潺湲兮下霑 爲 較 較。 曲 若如《曲禮》疏式 所 禮 ,所以固輢,亦交錯 較 觸 前 式在車前三分深之一,而 疏 射御 《讀詩記》引吕和叔説 矣。 高 射御執兵,亦因之伏 謂 於軾, 於 皆 朱《傳 車 有 故 式上二尺二寸 》既以 示 上又 倚 便, 軡 「猗」爲歎辭 横 即 於較。倚 而 《 楚 俛 其 木爲 辭 而 而 涕 以 即 而 伏 在 卑 横 致 得 高 本 •

考槃

《序》云:「《考槃》,刺莊公也。不能繼

説者 也。 美在 外。」其説最爲圓通 無語病。 槃》、《王》之《邱中有麻》、《小雅》之《白駒》皆 下之説,以詩詞之「弗忘」即爲刺君,故不能 詠賢人之肥遯,以刺其君者。 猶《簡兮》亦止美碩人,而《序》云「刺不用賢 「《序》謂刺君上之失賢,朱謂美隱居之得所。 推本作詩者言外之意,詩詞 先公之業,使賢者退而 此, 概 蓋天地 以 則 若毛傳,則就詩釋詩,有美無刺 毛 刺 鄭 閉 在彼矣。 同畿,過 而 後賢人隱。 窮處。」案: 矣。 美在言中,刺在 則止 陳 鄭箋泥于《序 氏 專美碩 衛》之《考 見 此《序》是 復日:

雅》。 本鄭樵「木偃蓋爲槃」之説。 考槃」二説。 正所云「槃者 毛傳「考,成,槃,樂」,二 孔疏不言者,以 前説謂成其隱處之室,即黄氏 ,架木爲屋 人所 共 有槃結」之義,皆 然結室而 知 訓 耳。 皆 本 集傳 在 ~爾

會。 成 斯 而孔子作之。 也。」然則《考槃》即《槃琴》歟? 鄒,作《槃琴》以 晉,及河,聞趙殺寳犨鳴犢及舜華,臨河而歎,遂還。 所爲,賢者當 歌,如鼓盆拊缶之爲。」然此乃貧無聊賴者之 傅良云: 在 其隱也。 (弗成矣,無可隱斯弗樂矣。 阿、在 顧虞東曰:「世固有隱而 陸,分爲三處,恐無 「考,擊也。 曰「考」曰「作」,皆鼓之義。」案:此説亦近附 反復詩言,毛義深矣。」 哀之。 **不如** 王 此。 一肅注 槃,樂器 惠半農曰:「孔子自 考,猶鼓也。 云:「槃,操。《琴》, 此 弗成者,無真樂 成其樂乃所以 也 理。 蓋古有是名, 後説 扣 之以 衛將 引 曲 息于 節 陳 名 人

通。 氏《古義》云:「『澗』當作『間』,古字『干』 文》引《韓詩》作「干」,云「墝埆之處也」。 間』作『干』」。 間」通。」引《聘禮》記 《小雅》「秩 考槃在澗」,傳:「山夾水曰 秩 承珙案: 斯干」傳云:「干,澗也。」 「皮馬相間」注云「古文 作「澗 」,亦與「干」 澗。」《 釋 惠

> 誤。 《漸》卦云:「干者,大水之傍。」故停水處 《韓詩》:「地下 阿」,《一切經音義》引作「曲京」。案:「景」乃「京」之誤 記》引董氏説,謂次章「在阿」,《韓詩》亦 故》、《韓説》與《薛君章句》之不同。 其義也。 荀王注並云:「干,山間澗水也。」虞注云: 字,其實一 此皆謂干即澗耳。 此二字通 「小水從山流下稱干。」翟注云:「干,厓 「在干」,謬矣。《文選・西都賦》注引《韓詩》「曲景 潢汙者,停水之處。《小雅》正義引 至《韓詩》「干」有兩訓 借之證。 也。 ·而黄 《易》「鴻漸于干」,《釋文》引 劉淵林《吴都賦》注 《毛詩》正字,《 曰干。」黄,疑「潢」 則 韓 或 若《吕 詩 由 字之 鄭 也。」 又引 || 韓 作 即 日

不過極言賢者山林之樂,以見其時之不可正,但與上文槃樂、寬大之意不類。故此詩『弗告』皆爲賢者献畝不忘君之意,其義亦儼《緝》云:「舊説以『弗諼』、『弗過』、

能用 爲 弗過者,弗與人 之樂。若『蕙帳空而山人去』者,皆忘之也。 也。」戴岷 圃 隱云:「弗諼者,誓不忘山中 、相過。 弗告者,弗與人議論

也。 閉門絶交,口不言世事,此隱遁者之常

諼、弗過,毛皆無傳。 「諼」之訓忘,已見《淇 也。」《黄氏日鈔》以此説爲當。 承珙案: 弗

述毛以「弗諼」爲不忘先王之道,則不如以 奥》傳,以近在前篇,可不復出。 但疏引王肅 不

告」傳云「無所告語也」推之,則「弗過」當是 忘此樂者爲近。至次章「弗過」,以末章「弗 無所過從之意。 疏 引 王 肅 云: 歌 所 以 詠

碩

志,長以道自誓,不敢過差。」其言亦未必得

《序》云:「《碩人》,閔莊姜也。」案:此

詩 其必有所受之矣。 者」,自有《左傳》可證。 若無此《序》首句,則將以爲美莊姜矣。 七篇,如《君子陽陽》之「閔周」,《揚之水》之 姜之賢,固當不止於此 儀,及齊國之富,而無一語及其可閔之處 「閔無臣」,詩中皆不見其意,而《序》能言之, 但極言夫人族 戚之貴、容貌之美、來嫁之 也。 且《序》以「閔」言者 《序》云「閔莊 然莊 姜

者,多矣。 之。 矣。』《校勘記》云:「考經文 **顾然長也」,知唐初孔** 案:下章箋云:『敖敖,猶頎 篇・頁部》:『 頎,渠衣切。 碩」,傳:「具長貌。」』又:『頎 『頎』字本重文。六朝時猶未誤 然據下正義曰『以 「碩人其頎」,臧氏《經義雜記》曰:「《玉 如『明星有爛』,箋云『明星尚爛爛 所見 類宜重言,故箋云頎 《詩》云「碩 一字,傳箋疊字 本已作「其頎 故顧 頎 頎 也。」 然佳 野 王據 知 也。 人原 詩

作「頎頎」,即「洸洸潰潰」之例耳。一「頎」字,與今本不同。蓋《經》作「頎」,傳《玉篇》引傳云「頎頎,具長貌」,則傳文自重時經有作『碩人頎頎』之本也。」承珙案:時經有作『碩人頎頎』之本也。」承珙案:

盛 鄭箋《衛風》:「褧,禪也。」此用《禮記》「禪爲 者,三家詩也。 **檾衣。』」又《衣部》:「褧,檾也。《詩》曰** 絅」文, 穀者,細絹,是以 婦人 製」,則許《衣部》引者,《毛詩》;《林部》引 衣錦褧衣。』示反古。」案:今《毛詩》作 榮,枲屬。 褧,襌也。 而 尊,嫁則錦衣加 衣錦褧衣」,傳:「錦,文衣也。 而不言禪 尚 輕 从林,熒省聲。《詩》曰:『衣錦 蓋以 細 要其於緝枲爲衣,則無異義。 且 絲 禪穀爲之。」其説與許異。 用 欲 而 何物。 露 非 以 錦文,必不用厚繒 (枲矣。 《鄭風》箋云: 孔疏云: 夫人德

> 如許。 襜已有禪義,故孔疏云「襜,亦禪,而在上」。 蓋禪衣不殊裳,如今之直裰,故謂之襜。 詩》家舊説 當是以「褧」爲禪衣。 毛既「褧襜」連文,則「褧」必不同鄭訓「襌」, 申之、凡衣或曰襜褕、或曰 襜襜宏裕也。」《爾雅》:「衣蔽前謂之襜。」引 名》:「荆州謂禪衣曰布灟,亦 言襜褕。 著,而乃云欲露錦文,是矛盾矣。 故以單穀爲之。」夫衣 毛云「褧襜」者,謂以褧爲襜。 《説文》:「直裾謂之襜 也 許云「反古」,疑亦《毛 錦 尚 襜襦,皆取蔽 絅 方 曰 襜 謂 鄭 褕。」《 褕,言其 義 惡 襜,猶 似 其

《説文》:「頸,好兒。 傳不 頸首。」段注《説文》云:「頸首,即螓首。 顆』,鄭作『螓」。」承珙案:鄭不言 言螓 螓首蛾 爲 何物,鄭箋乃言蜻蜻 眉」,傳: 从頁,争聲。 「螓首,顙 《詩》所謂 廣 기; 知 「頸」當爲 而 毛 方。」 作 毛

師 三百八十引《詩》「秦首蛾眉」,亦不作「螓」,皆「頱」聲之借。 非其義也。又云一作「秦」,「秦」謂螓首。」承珙案:《御覽 螓,自非 作「螓」。 無言「所謂」者,此獨變文,故知引《詩》仍當 篆作「頸」,皆所以 古文作「疋」,此則謂《詩》「螓首」之「螓」,小 以爲《詩》『大雅』字」,謂《詩・大雅》之「雅」, 云:某字,古文以爲某字。 「疋」下云「古文 「《詩》所謂頱首」者,此「頱」亦當作「螓」,謂 詩小學》云: 詩》「螓首」字即 螓 作「奏」,又作「秦」。」《索隱》曰:「徐氏云,奉一作「奏」, 鵲倉公列傳》「其尺索刺麤而毛美奉髮」,徐廣曰:「奉、 古注《漢書》始有『形若蠶蛾』之説。《離 「螓」爲「頱」之假借,不以爲蜻蜻耳。 取 自 象蟲 是 不得因 與 名 「王逸注《騷》云『蛾眉 毛 也。 同 此 此「頸」字之借也。 至「蛾 明假借也。 字。 謂 毛亦作「頸」也。《史記 毛本 眉」,傳箋皆 亦 許凡引《詩》, 作 螓」, 一**,**好 猶 無 貌。 他 許 但 説。 處 云 毛

> 眉。」字亦作「娥」不作「蛾」也 珙案:《漢書·外戚傳》武帝《悼李夫人賦 『蛾」,又用『翠羽』,稍知文義者不爲矣。」 眉象翠翰」,倘從今本作『蛾』,則一句 賦》『嫮眼娥眉』,陸士衡詩『美目揚 云「連流視而娥揚」,師古曰:「娥揚,揚其娥 曼只。』枚乘《七發》『皓齒娥眉』,張衡《思 晉之間,好而輕者謂之娥。』《大招》:『娥 者,美好輕揚之意。《方言》:『娥,好也。 本倒易之。 騷》及《招魂 『娥』作『蛾』者,字之假借。 注 並 云: **域** 作「 蛾」。』今俗 玉澤, 中 用 娥 玄 眉 娥

又引申爲長貌,亦如「頎」本頭佳貌,而引申義,引申爲頭長,故《廣韻》云:「頗,頭長。」雅》亦云:「頗,高也。」贅爲頭高,此字之本雅》亦云:「頗,高也。」繁爲頭高,此字之本本。」有人敖敖」,傳:「敖敖,長貌。」箋云:「碩人敖敖」,傳:「敖敖,長貌。」箋云:

齊北 之路 是 章是也; 且言嫁女,則 齊衛之間 語 齊 董 通海 且. 通 或 北 適 ,經齊者少。 經 也 氏 也 頗 古 流」,則自 明 有 也。 皆 衛 日 矣。」承珙案: 通 ,與此章有何 河 言北 分曉。 河界 《序》云「 海之水以 可 水洋洋」, 若齊言『北 言娶婦 漸 齊 以 河言。 地 齊來 其 盛 流」,則 趨 衛西 其河 (中,故 西至於河 稱 閔 而 爲 則 關 衛,又豈不可 其 北。 莊 翁氏《附記》云: 「齊東, 翁説 齊境 要 流」,則是通 流 盛 衛 所 係, 姜」,全詩 曰 與 以 稱 適 言河 自衛適齊之路,可 北 非 之廣 而 衛 其 之國 以河爲界。 河 衛 也。 衛人 都 道 所 北 流 居 近,與齊都 論 出 《韓奕》之五 河之 活活」。」此 言「北流 《讀 皆爲莊 作詩必 斯 海 流』者,適 之邦, 之, 亦 也。 詩 西,則 經 齊 河 可 記 此 謂 鋪敘 衛 姜 河之 衛 邪。 流 \forall 遠。 言 而 於 數 自 引 弗 齊 者

疑

也。

境 指 之,知不據衛之河。」翁云:「庶姜、庶 係,然使以 者 産之廣饒,皆 有何涉也? 詠 地 齊來媵從,與章首言河者無涉。」不知首敘 ,所以可 ,首章極言其族 次及物 関。 衛 孔 以 産,次及士女,敘述分明 人 疏 翁謂 而 見其 言衛 云: 類之貴盛,末 河之通海 宜見答於 「以『庶姜』、『庶 河之洋洋, 與此 莊 章 與莊 公 極言 章 有 而 士; 士 無 姜 何 不 其 類 自 ∇ 關 然 或 口

《釋 引作 罛 網 流 云: 网部》「罟」下、《目部》「眓」下 目 則 0 文》 「薇薇」、《大部》引作「奯奯」,皆非是。 凝 大豁 於 施眾 此 水似 流 句 「濊,呼 也。」 豁 本 濊 礙 也。 承「北流活活」,言活活之流 濊 案 : _, 傳: 此 活 韓詩》云: 語 凝 反。 最 流,今《説 俱作「濊 案:《説 善 濊 形 濊, 流貌。《説文》 容。 濊」,不誤;《水 文》 施 馬云: 文》 四引此 蓋與傳 水 作 大魚 中。 詩, 「礙 部 施 所 惟

Ti.

毛

詩後箋卷五

74

謂 乃欲以易「礙流」之訓,亦不善於體物矣。 以證「空大」,《詩》當本作「施罟奯奯」,後人 空大也。 指眾,皆於詩語不合。 水中,網在水中,不見所謂空大之狀。 改爲「濊濊」,又加「讀若」二字,而《水部》 濊」。'」此似近馬説。 詩》云「流貌」,則專指水,馬云「網目」,又專 「奯」字之音耳。 滅」下引《詩》亦後 「施之水中」者、皆兼罛與水言之。 从大,歲聲。 桂氏馥遂謂《説文》引《詩》 人所加。 然許意但引《詩》比方 《説文・大部》:「奯, 讀若 夫施罟者,必 《詩》『施 若《韓 桂氏 罟濊 於

《周頌》:『有鱣有鮪,鰷鱨鰋鯉。』鱣鯉並言,雅》古説如此,自陸璣、郭璞,乃分鯉鱣爲二。語,不待注也。舍人云:『鯉,一名鱣。』《爾云『鯉」,於『鯉』不云『鱣』者,鯉者俗通行之三鯉,鱣也。」「鱣,鯉也。」《説文》:「鱣鮪發發」,傳:「鱣,鯉也。」《説文》:

之歟。 之書,正名辨物,無庸並 訓「鰋」,皆本《爾雅》。 書無此文例。故毛傳以「鯉」訓 釋「鯉」,郭氏乃分爲六物。夫《爾雅》,故訓 鯇。」舍人、孫炎皆以爲釋二名,則是以 **鱣與鯉、鮥與鮪不必同形,而要各爲類** 爲大鯉。 至《周頌》「鱣」「鯉」並言,則當如鄭箋以 承 曰 似 珙 非 鯉, 大鯉 案:《 物, 《詩》以多魚爲言,故連類 曰鱣,猶小鮪曰鮥,大鮪 爾 而箋云:『鱣,大鯉也。』然則 雅 》: 「鯉 《説文》又本之毛傳 列六魚不加訓釋, 鱣 鰋,鮎。 「鱣」,以「鮎 曰 而 鮪 並 뼬 凡 「鱣 也。 鱧 鯉

《篇》《韻》皆無『鮁』字,其可疑如此。」承珙段云:「作『鮁』者,非毛非韓,又不言其義,鰟。」《説文》:「鮁,鱣鮪鮁鮁。从魚,友聲。」「發發」,傳:「盛貌。」《釋文》:「發,補

許而一之。

許而一之。

許而一之。

於「態」就不見《説文》「態」字又爲「戀」字,本之《韓詩》,今《説文》「鮁」字又爲「戀」字,本之《韓詩》,今《説文》「鲅」字又爲「戀」字,本之《韓詩》,今《説文》,或許書原有「戀」字,本之《韓詩》,今《説文》,或許書原有「戀」字,本之《韓詩》,今《説文》,或許書原有「戀」字,本之《韓詩》,今《説文》,或許書原有「戀」

謂之薍,又謂之薕,又謂之騅,其分析皆本於 傳於《碩人》云:「葭,蘆。 菼,薍 葭」,或言「萑葦」,皆並舉二物。 風》云:「蒹,薕。 云:「葭華、蒹薕、葭蘆,菼薍。」此皆以二字 言》既云「菼,騅也。 一薍爲萑, 葭爲葦。」是則《詩》之 葭與葦同 草,又謂之蘆; 菼與萑 物,葭蘆即葭華也。 葭菼揭揭」、《詩》或言「葭菼」,或言 葭,蘆也。」於《七月》云: 菼,薍也」、《釋草》又 菼薍即蒹薕也。 與兼同爲 《爾雅 也。」於《秦 一草,又 兼 爲 毛 釋

其形 郭注:「萑葦之類,其初生者皆名蘿。」非 《碩人》疏所引李巡以蘆薍爲一草,自不如 初生。 菼合爲一草,不知毛意於《詩》中葭菼對 甚相懸,析言之則别,統言之或亦可以 草,初生者爲菼,長大爲薍,成則名爲萑; 如《爾雅》列葭華等草,而總之曰「其 炎、郭璞以爲二草之諦。 生爲葭,長大爲蘆,成則名爲葦。」分别甚明 葦。」各本脱「萑葭爲」三字,此從段本增。 「萑,薍也。」「薍,刻也。 秀爲蘆。」故《豳風 並同。《夏小正》傳云: 大葭也。」「蒹,萑之未秀者。」「薕,蒹 雕」當作 爾雅 類 **%** 「騅」。 相近 一曰薍,一曰騅。」此與《爾雅》、毛 《説 故乎? 也,蘆之初生者也。」此 文》:「葭,葦之未 ·七月》孔疏 《大車》傳云:「菼,鵻 「在 八月薍爲萑 然此二草形類 未 秀爲菼,葦未 秀者。」「葦 云:「此一 「菿,在 (萌蘿 似 ·, 葭 通稱 以 文者 本不 也。 以 之 傳 孫 初

單 言 · 菼 了, 故 不 嫌 於 通 稱 耳 《夢溪 或

甜,作蔬尤美。 分大小之名耳。 則散文言之,霜降之時亦得謂之葭,不必初生。 葭」,謂之初生可 中烏蘆草乃荻屬也,則薍爲荻明矣。然《召南》「彼茁 當是荻耳。 筆談》云:「詳諸家所釋葭、蘆、葦,皆蘆也,則 既 謂《大車》傳「蘆」乃「萑」字之誤,亦通。 分釋之,此 此堪作障席、筐筥、 馬鞭節。 類小者可爲曲 《詩釋文》云: 莖直。 花嫩時紫,脆則白,如散絲。 荻,芽似竹筍,味甘脆可食。 也。 《秦風》曰:『蒹葭蒼蒼, 花穗生 、織壁、覆屋、絞繩雜用 薄,其餘惟堪供爨耳。 『薍,江東人呼之爲烏蓲。』今吴 如狐尾,褐色。 葉色重狹長 莖脆,可曲 葉闊大而 以其柔韌 白露爲 菼、薍、 萑自 若對文,須 蘆,芽味稍 霜。」 且 色 而 如 者

氓

也。

古書名字雖多,今世俗只有蘆與荻兩名。」

錢幣之幣。 幣者,所以貿買物也。」承珙案:此「幣」即 緍,錢爲緍者、(詩》云『氓之蚩蚩,抱布 抱 布 貿 《漢書》「賈人緍錢」,如淳引 絲」,傳: 「布,幣也。」箋云: 胡公

> 此。 《鹽鐵論》文學曰:「古者市朝無 其所有易無,抱布貿絲而已。」疏説蓋本 之通稱。 其説正與毛同。 也。」案,先鄭又云言布參印書者,舊時説也 幣,貿易物。《詩》云『抱布貿絲』,抱此布 物,即謂之布。 貿 以貿易,不必定用錢刀。 里布者,布參印書,廣二寸,長二尺,以爲 絲」,故 然如此,則傳不必更訓以「幣」矣。 孔疏乃云此布幣爲絲麻布帛之布 謂之緍 先鄭注《周禮 然則詩所謂「布」,必非布帛 也 蓋 古 然亦非 人 即 以 僅以布粟易 載 刀幣,各以 幣 師》云: 爲錢, 於 口

頓邱』是何地。」承珙案:《水經注》:「淇水 『頓』聲轉,亦近淇。 觀」,在淇上宿胥口 置五軍於邱旁故也,在淇水南。 其一名『五 記》曰:「衛有頓邱三。其一名『五軍』,謂 「送子涉淇,至于頓邱。」毛氏《毛詩寫 凡此三頓邱,未審『至于 。其一名『帝邱』,『帝 魏 官

陽下

歷

敘所經

至

石

濟津云:

頓

邱」系於「五

軍」者。

河

水入

又東

逕遮

害亭南

之殷。

皆

非

也

蓋

因

邱

而

爲

矣。」據此

酈

注

雖三言頓

邱,

《皇覽》曰:

爲觀

地矣,蓋

太康

弟

五

君之號

淇

水又北

逕頓邱

也

《竹書紀年》:

濮陽

之頓邱臺,非

也。《

故

其

名

亦

魏

徙

九

原、

西

河、土

邱

西

詩

》所

謂

『送子涉淇

西

北

開

胥

故

水

北

頓

邱

北

故

闘

駰

云頓邱

在淇

水南

自

元

甫

城東南

逕

朝

歌

縣

北、又

東

宿胥故瀆」下又云:「東北逕帝嚳冢西,世 頓邱城南臺陰野中」者也。」其下又云 曰『五軍』也。」其後歷敘至「淇 頓邱者,城門名,頓邱道,世 晉定公三十一年城 縣故城西、《古文尚書》 皇覽》曰『帝嚳冢 軍諸胡、置五 ,至于頓 水》篇 「河水又東,淇 而獨 名,故 (溝洫 曰『五觀』者 屈 軍於邱 以《詩》之 於 「邱」者 又屈 而 志 氾 日 在 西 ≥ ⊟ 領邱。 水 水合 頓 東 逕 轉 側 也 一謂 祭 邱 謂 以 郡 頓 逕 會淇 以 而絶 矣。 頓邱 自是 乃魏 白 瀆。 經》之「頓 東,去舊淇 頓邱當在其西。 溝 水入河當在黎陽以 决宿胥之口 入處 在 爲澶 洪水口 以 溝,因宿胥故瀆 不 一,是其 淇 武 故酈氏於「淇水合宿胥口」下雖言頓 通 水處立石堰 也。」《淇水》篇云:「淇水右 **瀆受河於頓** 漕 州清豐縣,亦誤 及《詩》。 水 帝 尚 運者-於水 邱」,漫無區 東十八里,又有 口 地相 魏無 未 稍 也 口 À 遠,其非《詩》之「頓邱 去不遠。 若東郡之頓邱,則在黎陽以 下大枋 遏水,令更東北 邱 河之處。 王氏《詩 虚頓 而 闞 西。 縣遮害亭東 加其 駰 别 邱 認 其黎陽 티 : 木 宿胥 東郡之頓 也。」考春秋時,淇 功也,故蘇 黎 又 地 成 《詩》言涉 頓 陽, 引《 理 堰 邱在 以 П, 考 注。 黎 漢魏 輿 東之淇 合 舊 而東 邱 兩 地 洪水 山 宿 淇 代曰 魏武 河 廣記 引《水 郡

而

不

南

入白

水,

而

至

地

明

知其非春秋時淇水所經之地也。

唱 無 傳》:「西王母爲天子謡曰:『將子無死,尚 能復來。」」此 正義謂「面 飲、欦、將、闓,欲也。」 「頗」即 「願」字之借 廣韻》「願」「頗」皆魚怨切。 欲」,故毛訓「將」爲「願」。 酬之詞,不必面言即宜爲請 死」,不可云「請其無死」也。 ,請也。」《廣雅 將 子 無 與之言,宜爲請 「將」亦當爲「願」,蓋可 怒」, 釋詁》:「飲、羨、願、貪、 傳: 是「 「將,願也。」箋云: ___ 願」與「將」皆爲 鄭易訓爲「請 也 案 : 且此 《穆天子 云原 亦 相 其 對

降 此 秋 承珙案: 詩。 「卜筮」,則 以 迎女,冰泮殺止。」舉此詩云:「將子無怒, 爲期。」《 秋以 馬 此 昭 爲 婦 則 媒氏》疏 期」、《通典》引董仲舒 必猶託於婚姻之正禮以行者。 雖 以 此 係 爲淫 被 誘 引王 ,然其言曰「良媒」、 奔之詩,不足爲據。 一肅《聖 證 論》亦舉 云: 「霜

> 義 秋 秋冬爲昏, 以 爲 期, 自 正可據此爲本經之 是 嫁娶之時 故以 此 相訂 證,馬 昭 毛

之説非也。

之也。 考宋臨 復關隄 之淇水 子所 澶 下入清豐縣 州 近。」箋亦不言其地之所在。 • 乘彼垝垣, 臨 頓 河縣故城,今在開州西,其云 在 河縣》: 南三百步,自黎陽下 邱 界」爲復關 尚遠,似未 以 復關 望 復 隄 城在 可 關一,傳: , 則 以 南黄河北阜也 乘 其去 入清豐縣 垝 《寰宇記 黎 垣 復關, 二自 陽 而 望 「黎陽 以 界。 見 西 君

文理。 也。 初無男子之語,忽以 其皆吉,又誘定之。」歐 女,宜爲室家矣。 復關既見此 爾卜爾筮 據詩所述,是女被棄逐,怨悔而 ,體無咎言」,箋云: 兆卦之繇,無凶 婦人,告之曰:我 此 兩 陽《本義》謂「上下文 句 爲男告女,豈 咎之辭,言 ト女筮 爾, 追 敘 成 女

詩》。 與男相 幸也。」鄭則訓「履」爲「禮」,又不盡用 也。」承 之箋説,更爲忠厚。 以此婦人但自怨自艾,而不深責其男子。 陸德明《詩音義》云: 惡在己,彼過淺。」鄭注《禮》時用《韓詩》。 己,則怨益亡。《詩》云:「爾卜爾筮,履無 與箋《詩》亦異。 卜筮,然後與我爲禮,則無咎惡之言矣。 言。」』」鄭注:「爾,女也。 人,過則稱己,則民不争,善則稱人,過則 爾」字,自以爾男子爲是 爾。 其云卜筮而後爲禮,本無咎惡之言,似 推 珙案:《坊記》云:「子云:『善則 得之初,我乃决以 :其文理,『爾卜爾筮』者,爾其 觀下句「以爾車來」,則上兩 且以「爾」爲爾其男子, 「體、《韓詩》作履。 履,禮也。 卜筮,於是我 言女鄉 分男子 從子 《韓 然 言 咎 稱 稱

桑葚」,傳:「桑,女工之所起。沃若,猶沃沃「桑之未落,其葉沃若。于嗟鳩兮,無食

然。 葚」,興女子非禮行嫁,義殊迂曲 是仲秋,其時安得有葚? 乃云「鳩以 之桑爲興。 性。」毛意蓋以 是孟夏時事,桑葚是孟 「未落」爲仲秋,「黄隕」爲季秋。 盛衰之况耳。 鳩,鶻 鳩 即「沃若」、「黄隕」,亦不過 也。 此爲婦人之詩,故因 鄭箋泥於「秋期」之説,遂分 食 桑 夏 葚 時物,若謂 過 則 殊不知貿絲 醉 女工 「沃若 而 非 時食 顔 傷 所 色 起 其

矣」。 者,謂三歲之後,久 貧」謂「往之女家,女家乏穀食,已三歲貧 鞠,及爾顛覆」也。「言既 以室家之事爲勞,猶《邶·谷風》之「昔育恐 家,食貧力作,盡心於家事。 章「三歲爲婦,靡室勞矣」相應。 "既生既育,比予于毒」也。 「自我徂爾,三歲食貧」,此二句正 夫其時,婦尚未往,又安知其家食貧必 而見酷暴,猶《谷風》之 遂矣,至于暴矣」 鄭箋以「三歲食 靡室勞矣,言不 蓋初至其 一與下

中間多一轉折,亦於文義不合。色衰以來,三歲食貧。」此於上句「自我徂爾」非是。王肅述毛,又云:「往之女家,從華落之勞,言不以婦事見困苦。」兩「三歲」異義,三歲乎。於「三歲爲婦」二句又云:「無居室

「猶」也。《曹風・候人》箋同。訓「終」、訓「竟」,皆有久意,比方爲訓,故曰「遂」非即訓「久」,而義近於「久」。蓋「遂」本「言既遂矣」,箋云:「遂,猶久也。」案:

也。 戾必有甚者,愈使我怨也。」《虞東學詩》以此 我怨也。」此直謂本期偕老,不意其老而見 老,今未老而 三歲見棄,不應便老。 總角之宴」,則此 箋詞氣抑揚。 我欲與女俱至於老,老乎,女反薄我,使 及爾偕老,老使我怨」,箋云:「及,與 已見棄; 婦人始笄便爲 嚴《緝》遂謂:「此詩言 若從爾至老,其 蓋言始也將與汝偕 此氓之婦 被 棄

> 對。 者。 風》,故毛於此無訓 日之不能安于室耳。 而不知其不可信也。「總角」正 不更事,爲人所誘,言笑盟誓以 離。承珙案:「總角之宴」以下,衹自悔其少 所爲恨也。《田間詩學》又疑是改適之婦見 棄後夫,轉追念其故夫結髮之情。 角之宴」一語,則似幼 歲之後,久乃見棄,非必三歲便棄也。 王氏志長 涉淇遠送又非穉男弱女之所爲,此爲 初爲夫婦時耳,其下文「言既遂矣」自在 説 爲 宴,安也。 所謂「士貳其行」者,捐故憐新,婦 長。 不知二三 以「總角」別有 謂其 歲食貧」、「三 初本相安無 即爲婚,而 「宴」訓已見《邶・谷 所指,蓋謂 歲 爲可託終身, 與上「老」字 事,非同今 抱布 爲 解愈支 婦」皆謂 氓 惟「總 可疑。 來謀、 所 人之 私

云: 『旦旦、《説文》作「悬悬」。』《説文・心「信誓旦旦」、《校勘記》云: 「考《釋文》

《考文》古本作『信誓旦旦然猶怛怛 懇之貌 不 《詩》曰: 云 言》:「怛,痛也。」或疑此於「信誓」義不協, 案:《説文》: 作『旦旦猶怛怛然』,皆采正義而誤。」承珙 實與許未嘗不合也。 作『悬』也。 『言其懇 懽 '旦」,傳同。 無告也。」 知傷痛者至誠迫切之意,故可通爲形容誠 ,喜欺也。」又引《爾雅》曰 『怛』下重文云: 『悬,或从心在 張酺 旦旦猶 惻 惻 惻 「信誓悬悬。」』是許本《毛詩》經字 傳》云:「誾誾 如《説文》「惻」亦訓 欺誠 懽本 懇 怛 鄭箋之本,字與 而『旦』即『悬』之假借,故箋云 「怛,憯也。」「憯,痛 切 怛。』是定本改『悬』用『怛』。 訓 也。」 字爲『旦』,義仍爲『悬』, 喜 款, 正義 又 惻惻,出於誠心。」注 如 而 引定本云: 憂者之欺 説 「痛」,而《後漢 許異,經 「懽懽、熎熎, 文》「懽」: 也」,一本 也。」《方 款,亦 旦下。 字作 『定

與喜樂之欺欺同其誠切,是其例矣。

語。 其反。 怨。 前言。 戴氏《續詩記》:「反, 覆,言我不思其反覆以 即「言可復也」之「復」。 即疊上「不思其反」,變文以叶下「哉」字耳。 言之事,則我亦已焉哉,無可奈何。」據正 及其身。 則經中兩「反」字異義,非是。 復其前言,而棄薄我。 辭。」正義曰: 云:「反,復也。今老而 《國風》曰:『言笑晏晏,信誓旦旦,不思 此與《表記》引《詩》證 表記》:「子曰: 不思其反。 反是不思,亦已焉哉。」,觀此 已焉哉,謂此 是故君子與其有諾責 「今老 反是不思,亦已焉哉」, 而 不可奈何,死生自 謂 我反復是君子不思前 П 至此 使我怨,是曾不 《集傳》以「反」爲反 使我怨,曾不念復 П 惠 「諾責」之意不合。 思前 而 ,爲婦人自悔之 實不至,怨菑 反是不思者 日之事。」 也,甯 知 反 · 思 决之 有 惠 念 其 箋

四

半農云: 文「信誓」義不相 婦 人謂 嫁 「反,謂 日 歸, 反 應,故知箋説爲 爲 夫家 日 來 歸 所遣。」引《穀 」爲 證 此 皆 梁 與 傳 主

竹竿

未 之道。」則全詩 ൬ 成爲室家。」於三章傳云:「舟楫相 之禮,並無 由 或 露不答、思歸之意,故傳云: 人不覺。 毛於首章 句但言「衛女思歸」,下乃推 見不答之意,嚴《緝》辨之曰: 行,男女相配,得禮 于「不見答」耳。 而 《序》云:「《 不見答,思而能以禮者也。」案:《序》首 至章 傳云:「釣 不見答意,亦並未露思歸之情,故 情 末「駕言出 事 竹竿》,衛 詩前三章第言夫婦相 瞭 以 然矣。 得 而 游,以 魚,如 備。」比興深微 女思 原 出 《集傳》 其 婦 寫我憂」,始 歸 游,思鄉 所以 此 人待禮 也。 配,得 雖 以 思歸 不言 此 適 使 詩 衛 水 接 以 異

歸」相應,何嘗誤認爲謂「嫁」曰「歸」乎?不思末章傳云「思嚮衛之道」,正與《序》「思「夫婦」,似誤認《序》中「歸」字作「嫁」字。獨其情不言可知矣。」或又疑傳箋屢言「室家」、其夫家之不見答,而觀其思歸之切如此,則

《泉水》曰「泉源」、《水經》云:「水有二源 衛之西· 夫衛 元甫 在 承珙案:《水經注》「左爲菀水,右則淇 之西北,而 『左右』蓋 以北爲左,南爲右。」《集傳》云:「泉源 水出相州 水之源。 衛之西 都 城 「泉源在左,淇水在右」,傳:「泉源,小 朝 南 東 淇水,大水也。」吕氏 而東 林 北,其下 主 歌,淇水 南 東 慮縣東流,泉水由 山 逕 南流入淇,故曰「在左」,淇 流, 朝 而言之。 歌 自其 與泉源合,故曰 流乃在 城 北 城 相,衛之 又又 北 西 屈 南 東 西 大臨 而 耳 北 屈 Ш 西 こ在 轉, 東 來注 而 曰 : 經文於 (水,自 右。」 西 面 在 之。 ·; 故 「淇 在 亦 衛

本耳。 韻。 弟」,何氏 爲韻正同。 風·葛藟》、《魯頌 文》以『遠兄』二字作音,可證。」承珙案:《王 字本、閩本、明監本皆作『遠兄弟父母』、《釋 本爲誤。『母』讀若『每』,與上『淇水在右』爲 「家藏明人舊刻本作『遠兄弟父母』,始知俗 |小雅・沔水》「母」與「友」韻,與此「母」「右」 後見《唐石經》亦然。」《校勘記》云:「小 「女子有行,遠父母兄弟」,臧玉林曰: / 焯謂 顧 氏《詩本音》仍作「遠父母兄 其未加考正,漫從《大全》 · 閟宫》皆「母」與「有」韻,

但當爲笑而見齒之貌耳。文》:『鹺,齒參差也。』」詩不必定作是解,《一切經音義》云:「磋,古文齹同。《説瑳,疑「鹺」之假借。「瑳」字本一作「磋」。「巧笑之瑳」,傳:「瑳,巧笑貌。」案:「巧笑之瑳」,傳:「瑳,巧笑貌。」案:

「佩玉之儺」,傳:「儺,行有節度。」《説、宜《稽古編》之譏之心。 段云:「此『儺』字本義。其此用毛義也。段云:「此『儺』字本義。其此用毛義也。段云:「此『儺』字本義。其此用毛義也。段云:「此『儺』字本義。其此用毛義也。段云:「此『儺』字本義。其之说、詹風。要皆與「行有節度」之「隨」。《關有甚楚》之「猗」。《陽清《檜風》。要皆與「行有節度」、「為」。其為以為,宣《稽古編》之譏之所,而爲「腰身褭儺」。之説、宜《稽古編》之譏之心。

芄 蘭

「芄蘭之支」,傳:「芄蘭,草也。」案:傳

見耳。 象乎。 則 即「尖」字。 脆。 《疏》:「芄蘭,一名蘿摩,幽州人謂之雀 誤。 邢 例。 當柔潤 如 氏《稽古編》云:「宋沈括言芄蘭莢在枝間 蔓生,葉青緑色而厚,摘之白汁出,食之甜 此「莞」當爲「雚」。 當作「芄蘭,雚草也」,如「木瓜,楙木也」之 草」字或 韘 疏 解 芄,衍字也」。 是决 《爾雅》「雚,芄蘭」 結 鬻爲茹滑美。 :「雚,一 説纖 况 温 近世《本草綱目》祖其説 錐 首 如錐, 良,信任大臣,豈 故 ,非沓矣。 「雚」字之誤 甚。」承珙案:沈説 章言『支』不言『莢』也。 名芄蘭」,郭注「雚芄」「或傳 以 葉後 爲 興。 其子長數寸 《説文》:「芄蘭,莞也。」 或謂「莞」亦衍字也。 但詩 曲 」郭注:「雚芄蔓生。」 韘 如張弓指彄。 或「草」上 人託 亦 立專爲 當 興,本 似 ,言芄蘭實櫼 ,似瓠子。」陳 見《夢 脱 葉,但不 「雚」字, 毛 喻 據 溪 物 鄭 人君 此 瓢。 陸 筆 義 取 復 寫

> 端象其環,狹末象其 尖。 談》。 制,亦當與芄蘭之葉相似者,固可存之,以 正,本圓 田《芄蘭疏證》亦云:「葉油 其説雖本沈括,然亦得之目驗。 蘿摩,圓端大莖。」李時珍云,葉長 經》及《説苑》引詩皆作「枝」。 亦可云枝。 《名醫别録》云: 「芄蘭葉嫩時 子長數寸」者合。 解也。 韘音涉,張弓指 其云「莢出 末狹。」考玦形 葉 「支」本與「枝」同 間 彄 缺。 如 如 也。 解 沈云古人爲 環 結 緑 此葉後 而 錐 色,厚 莢綴於枝上 缺 近時程氏 則 而 與 灣 後大 陸《 此 《唐石 而 似之。 業之 葉圓 不 疏 が前 似 平 瑶

『不我甲』,亦 我所知、不如我所狎也。 謂不顧我、不嘉我、不思我也。 言『甯不我顧』、『既不 「能不 ·我知」,王氏《述聞》曰:「《詩》凡 當 謂 不 知 我嘉』、『子不我思』,皆 我、不狎 能,乃語 此不 我 詞之轉, 謂 我知」、 如

也。 自 而 我 觿 才 成人之佩,而不自謂 支」興君子當柔潤温良,正 箋乃如字訓爲才能耳。 知,以驕慢人也。」是毛本讀 『能』爲『而』。」承珙案:傳云:「不自謂 言之以 人君治成人之事,故以童子而 雖 知」,鞢是射御之事,故言「狎習」。 無」當作「有」。 不自謂 ,而實 能 謂 相 有 則』之文正 狎。 之能。 成人之德。下章「能不我 傳 我 用 反 已狎習。 不 無 此 刺 蓋 與 「能」當讀 知」,於經 意釋詩,於詞旨最 惠 刺 我 公之驕慢,所謂 其 與『能』字 相 此説是也。 驕 蓋 知; 我 而 觽爲 爲『而』,言童子雖 文 雖則. 知,所以 無 惟以「能 不 禮 相 解結 與驕慢 順。 佩 「能」爲「而 詩蓋以「芄蘭之 應。 甲」,亦當 爲深婉。 佩 疏 韘 陳美 爲 觿。 之物, 段 遠 不我知」爲 古字多 相對。 柔 而 懋堂 大 此皆 以 潤 然雖 實 臣 故 鄭鄭 若 刺 温 不 則 云 云, 也 又 正 言 服 借 惡 與 不 良 無 如 佩

厜

所狎習」,則淺直少味矣。 箋説「不 如 我衆臣之所知」爲 「不如 我 衆臣、 之

《文選》注引《蒼頡》:「蕊,聚也。」即以爲「萃」之假借 萃。 假借。 文》:「繠,垂也。」哀十三年《左傳》曰:「佩玉繠兮。」注 萃。」蓋「悸」即「萃」字之借。 悸爲垂貌。 稺省,稺亦聲,稺、萃聲相近,故悸亦可借爲 節度。」段懋堂曰,此未知以「悸」字爲 繁然,服飾備也。」案: 縈然者,垂意。 麗也。 《韓詩》以萃爲垂貌,猶《爾雅》之「崒者 垂帶悸兮」,傳:「垂其紳帶,悸 承 珙案:《釋文》:「悸、《韓詩》 毛云「垂其紳帶悸悸然」,是亦以 則「悸」爲「萃」之借字無疑。《説 悸从季聲,季从 縈與萃,音亦相 悸然 何 字 云 : 近。 作 之 有

《稽古編》曰: 案、《射禮》,右巨指著决以鉤弦,食指、中指 佩韘。」箋云:「韘之言沓, 童子佩韘」,傳: 「《説文》訓 「韘,玦 所 韘 以 也。 彄 與毛 沓 能 手指。 射 意 御 同 則

韘即 環大擘本」,皆爲送死而設。 無端,古之玦則如環 經》。 系,所以箸指,亦可以佩。 决捍」見於《内則》,「佩極」之文則不見於《禮 爲沓者,馮氏《名物疏》駮之當矣。 鞢爲决者,故鄭易爲「沓」。 沓用 無名 曰:「童子佩韘。」」」承珙案: 骨, 韋系箸於右巨指。 其真。許云:『韘,射决也,所以鉤弦,以象 指,沓,取其沓於指也。 無明文。而毛説較古,又有許 士喪禮》注云「决以韋 今之扳指,而制微 然《説文》不云「韘或从弓作弽」乎。 朱 或謂沓以韋爲之, 韘字从韋,故 韋 沓 爲之,亦名『極』。 以 放 弦 而 决用 不同"今之扳指 爲之藉」,又云「以 缺,其缺處當聯 从章, 枼聲。 韘之爲决爲沓,皆 棘 然禮亦未有以韘 段注《説文》, 恐未必然也。 及骨 孔疏謂禮 極,取 説 相 及象爲之, 而「右佩 輔,當得 其中 宜 以 如 無以 《詩 謂 環 蓋 韋 爲 紐 於

河廣

《左傳》僖公八年:「冬,宋公疾,大子兹父固 魚 也。」上夫不言母之愛子而託于舅,固 請曰:「目夷長,且仁,君其立之。」公命子 「臣之舅 曰:「請使目夷立。」公曰:「何故?」對 深》曰:「《説苑》宋襄公爲大子,請于桓公 子,衛戴、文俱未立也。 作于衛未遷之前。 狄入衛之後,戴公始渡河 睢陽在河南,自衛適宋必涉河。 爲衛文公時。 襄即位,其母思之而 而 解曰: 不止,故作是詩也。」嚴《緝》云:「箋謂 《序》云:「《河廣》,宋襄公母歸 在衛,愛臣,若終立則 「能以 非 也。 國讓,仁孰大焉? 時宋桓猶在,襄公方爲世 作《河廣》之詩,疏 衛都朝歌在河北,宋都 舊説誤矣。」許氏《詩 .'而南。 不 自魯閔二年 《河廣》之詩 可 于衛 臣 以 由不忍 不及 往。」 曰: 因 , 思 以 宋

之山

]1]

言者,其

有深情與?」此

亦滯於鄭箋

欲

稍

疏

義

以

通

其説,

非達

詁

也。」范氏

地》引劉曰:

『珩言謂不

必

渡河,

而

仍以

故國

鄙情,安見其發于愛子之至性而有循禮 ,遂不勝其拳拳而作此焉,則亦愚 已没,其子即 也哉?」《虞東學詩》曰 時思及往宋,是前乎此者未嘗思,今見 若襄公既已即位,不惟衛徙楚邱 出 [志,遂] 竊謂桓公在時,必無出婦思返 夫 未 與廟絕,尤不宜 八人之思 獲 位,思以國母就 命,至父疾 謂 襄公即 子,不 「鄭箋謂 位 而 止 復 又固 形 萌 , 夫人思宋 養 諸 此 而 想 哀 婦之 度義 襄 義 之。 也。 吟, 無 公 有 非 耳。 嚴説實指渡河者爲得《序》傳之意,箋疏之説 以 桓公夫人而曰襄公母者,以此詩爲思子 矣,奚必待襄公即 母歸于衛,思而不止」,則是被出之時即思之 蓋望宋但以思子。」承珙案:《序》云「宋襄公 與仁宗私 相思之理 詩 也。 爲實詠。 瀋》曰 孔疏以《河廣》「葦杭」爲設詞,嚴《緝》 見 : 今玩毛傳於首二句不言「興」,則 事 《詩億》引宋仁宗廢 詩 雖 ,明夫人之不思 位

而後思哉?

《序》

不

而

作

則

之理。

而

義

不

可往。

故

襄公於前

請

傷父之意。

然

以

望宋爲

言

然

於

桓

公無

后

郭

氏

不

桓

公,是也

自鄭箋以

辭

害

宋 卒於衛文公之八年」,其出夫人當在 夫桓公迎衛渡 位之後」,則衛不 河之後。 在 河 許氏《名物鈔》以《集傳》既云衛在 南, 然則 而 又言「《河廣》之詩 河,疑此時未出夫人。「桓 衛在 在河 河北之説爲 北矣,其説自相 作于 誤。 衛既 襄 河北 承 珙 渡

之志

即

位

而夫人思之,與詩義不相應。

其

誤。

疏謂

本

不渡

河,特假

有

渡者之詞。

《集傳》亦

此

是

曲

詩固:

從賦,不從興

也。

应

[書釋

不可

先君

使此

河

可

渡,而

母

爲夫人未出之證 之,桓公未嘗禁也。 篇載襄公兹父以大子讓目夷,目夷逃之衛 兹父從之三年。 而宋衛之好未必遂絶。 經 是雖出 傳 逆河宵濟之事,恐不足 不 詳 母 其 况《説苑·立節 在 事 衛,而 然 襄公從 夫 人 雖

以爲德之至。」承珙案:此説蓋欲以曲通箋 尺之睽耳。 明明以迎養示其子矣。 子將何以爲情? 假而曰『遠莫致之』,是又 夫人之情 也,「曾不崇朝」可至也,若曰吾於汝不過咫 於不論,而曰誰謂宋遠乎,『跂而望之』即是 詩,恐傷襄公之心也,假而曰『靡日不思』,其 不忍疏母子之情,孝之至也。 然守不可歸之義,而又曲體孝子之心, (詩序廣義》曰:「襄公甯讓千里之國, 苦 矣 蓋 意實思之,而語若爲未嘗思 夫人之賢至矣 是以甯置母子之情 而夫人之作是 故孔子

> 涉也。 論 棣」之解略同,實于本詩母子之義不 大旨謂有求則得,所思不遠,與《論 疏 即 執務》篇。 位後思之之説。 然其云「好德如《河廣》」者 所 引 孔 子 語 出《鹽 語》「唐 相關 鐵

「抗」者。 成傳義,則「杭」之爲「抗」明矣。《廣 箋云「一葦加之,則可以渡之」,以「加」字申 文》爲「抗」之或字,「抗」有舉而加之之意,故 引《詩》。毛傳但云「杭,渡也」,「杭」在《説 子造舟,諸侯維舟,大夫方舟,士特舟」,並 案:段説非是。《説文》「斻」下但引《禮》「天 爲之舟也。舟所以渡,故謂渡爲斻。」承 【一葦杭之」、『杭」即『杭」字。詩謂一葦可 「斻,方舟也。从方,亢聲。」段云:「《衛風》 「一葦杭之」,傳:「杭,渡 「抗,渡也。」疑詩「杭」字本 杜篤《論都賦》「造舟於渭,北 也。」《説 亦 雅 文 》: 有 杭 • 釋 涇 珙 以

孔皆知「杭」非即「斻」字也。 孔皆知「杭」非即「斻」字也。 孔皆知「杭」非即「斻」字也。 八章懷《後漢書》作「北斻」,注云:「《説流」,章懷《後漢書》作「北斻」,注云:「《説流」。 八時知「杭」非即「斻」字也。

伯兮

《序》云:「《伯兮》,刺時也。言君子行

非過時不歸也,自當以箋疏爲正 六年王人救衛,謂「之東」者,東與齊戰。不 知王人救衛,非「爲王前驅」, 一 詩學》又因「自伯之東」一言,乃引《春秋》莊 繻葛之役當之,證佐明白,無可疑者。 《陸堂 經中有「爲王前驅」一語,已爲確據。 之語?」承珙案;首《序》雖止 文邪。若但是衛國用兵,何以有『爲王前 也。 三國從王,必會兵東都乃行,非謂鄭在 役,爲王前 西疑之,又云無明文可考。 刺宣公也。鄭在衛之西南,而詩言東者 王,正也,而《序》以爲刺時者,刺其過時,非 「從王伐鄭,事在衛宣公十三年。 專刺宣公,而云『刺時』也。」朱氏《通義》曰: 氏曰:「是役 孔仲達解此詩最當。 驅,過時 也,王爲主,而衛 而 不反焉。」嚴《緝 朱子終以鄭 然則《春秋》非 云「刺時」,然 人屬 戰即罷,亦 三國之從 焉 鄭箋以 故不 影 在 . 衛 驅 「, 時 明 東 衛

假借。 傳於《檜風》之「偈兮」云:「偈偈,疾驅。」此 不同韓作「疾驅」,而略同《碩人》訓義者,蓋 引《字林》云「偈,邱竭反,健也」,「武」「健」義 篇》引《詩》從韓作「偈」,而訓仍同毛,云「武 兮」、《韓詩》又作「偈」。 文,故當爲「武貌」耳。 同,毛殆以此「朅兮」又即「偈」之假借耳。 注引《韓詩》曰:「偈,桀侹也,疾驅貌。」《玉 韓曰「健」,毛曰「武壯」,義亦 以傳訓「朅」爲「武壯貌」者,謂「朅」即「仡」之 云:「有朅,《韓詩》作『桀』,云:健也。」段氏 庶 傑」古字同,疑毛亦以 王 蓋《説文》雖無「偈」字、《一切經音 有朅」,傳云:「朅,武壯貌。」彼《釋文》 伯 承珙案:有揭,韓既作「桀」,「桀」與 前 朅 驅」義 尚在下,此與「邦之桀」連 傳 「朅」爲「傑」之借字。 《文選·高唐賦 朅 武 相近。此「朅 貌 碩 義》 序》 人 惟

人,中士爲之帥焉。」據此 注云:「夾王車者,其下士也。 氏掌執戈盾 士 授旅賁殳、故士戈盾。」注云:「故士,王族故 車,旅費以先驅。」《周禮·司戈盾》:「祭祀 也。《禮》殳以積竹,八觚,長丈二尺,建于兵 文》:「殳,以杸杸,當依《太平御覽》作「杖」。 也, 殳也, 車較也, 酋矛也, 皆以四尺爲差。」 爲下士,其執殳前驅者當爲中士歟 王時以爲儀衛,故不執戈盾。』《旅賁氏》云: 戈輚皆可言「執」,何以獨云「執殳」? 車輢,用則執之。 正義引《考工記》注云:「戈、殳、戟、矛皆插 而 掌執戈盾,夾王車而趨,左八人,右八人。」 也,與旅費當事則衛 無刃。」箋云:「兵車六等,軫也,戈也,人 伯 也 執 而趨,此執殳,以其與故士同 殳, 爲王 此據用以言也。」承珙案: 前 王也。」疏云:「 驅 7,則執 傳 下士十有六 戈 「殳長丈二 ? 盾 夾 《司戈 殊人 車者 旅 《説 賁

驅」者,自是諸侯大夫,於王朝則爲士耳。 則》「州伯」釋之。 合於《詩》義。 **賈以先驅者曰殳。」皆本《説文》。** 文》獨於「殳」下言「旅賁以先驅」,《禮書》云: 盾》所謂 「三命以下,於天子爲士。」衛之君子「爲王前 殳雖建于車,及王行,則執而前驅。」《急就篇》注云:「旅 列國之大夫,人天子之國曰某士。」注云: 一人。」而此執殳之旅賁,則爲士。 《曲禮》: 「授旅賁殳」者,蓋以授中士。 傳以「伯」爲州伯,正義以《内 鄭彼注云:「州長,中大夫 雖引《禮》文,而 故《説 實

然思 惟 東者 北 鄭之正北,王在衛之西南,俱與『東』不合。 東行邪? 孔 而 婦在室,豈遽忘其身所居之地,而以伯 往 疏謂兵至京師乃東行伐鄭,庶幾近之。 自伯之東」、《毛詩明辨録》云:「衛在 ,故云「之東」。」豈有以淇縣目洛陽爲 胡 氏紹曾曰: 鄒氏泉曰: 『周既東遷,衛自 『衛人從王屬右軍,號 西

以 《田間詩學》云:「周室東遷,天下稱爲東周 者。 字。 近於迂曲,當以《明辨録》謂其妻從夫仕於王 不在衛之東,又無主爲容,當自始别已然,何 人殆有死亡之慮,故憂思益深耳。」此蓋因 迨聞王師之東,則伐鄭决矣。 其始至京師以赴王命,猶未知其果伐與否, 其妻從仕于周,故云『自伯之東』。」承珙案: 職,夾車而趨,即執戈盾者,不必拘泥 [殳] 仕於王朝,常供護衛,《周禮》虎賁、**旅** 鄭,由京師向鄭南行,右軍在西路,焉得 『之東』者,猶言『之周』。] 又云:「三國之士 東行之據。 公林父正東行矣。」夫左右 『執』字、『前驅』字而知前驅步從,正旅賁也 必自「之東」之後,故轉而 若泥定兵器爲殳,則建於車右,非常執 又王有從車、貳車而無前驅之車,故於 然則何以云東也? 軍皆從 爲此二説。 伯也前驅,室 蓋伯以 王 而 然終 賁之 衛人 援 東 王 伐 爲

二六四

賁殳」、《説文》之「殳」下云「旅賁以先驅」耳。 朝 云「殳」字不必泥,則未檢及《周禮》之「授旅 者情 事爲 惟既 知 前 驅者爲旅賁,而 又

似以鄭爲易傳者,誤矣。 謂「始欲取以甘心,則『甘心」未得爲『厭』」。 嗜欲所貪,口味不能絶。」此正申傳訓「甘」爲 也。」箋云:「我願思伯,●心不能已,如人心 厭」之意。 願言思伯,甘心首疾」,傳:「甘,厭 正義引《左傳》「請受而甘心焉」,

勘記 字。』《爾雅釋文》引《詩》云『焉得萲草』毛傳 云:『令人,力呈反。 生疾危身,人所共曉,何煩更箋乎? 云『萲草令人善忘』,是《釋文》本不誤也。 正 云:『憂以生疾,恐將危身,欲忘之。』傳不言 憂」,箋以『憂』申之也。 》云:「此當作『諼草令人善忘』,故箋 焉得諼草」,傳:「諼草令人忘憂。」《校 善忘,亡向反,又如 若傳已云『憂』,則 《釋文》

> 作蕙,云令人忘憂也。」所以著其異耳。不知 之與『諼』同也,遂命萱以爲忘憂之草,蓋以 有此物哉? 忘之草而植之,庶幾漠然而無所思。然世 心痗首疾,思欲暫忘之而不 非草名、嚴《緝》力辨其非。 之甚矣。」承珙案:此説是也。 者反據之,並取正義自爲文者以改此傳,失 也。正義本當亦不誤。《釋文》云:『《說文》 鄭不異者,其自爲文每如此,非傳有『憂』字 草。』此正義本『忘』上有『善』字之證。 義説 其意,言「焉得諼草」,謂欲得令人善忘憂之 云『忘憂』者,以鄭説爲毛説。 凡正義以爲毛 衛之君子行役,過時不反。 傳云: 「諼」訓 蓋亦極言其情。 爲「忘」, 可得,故願得 其婦人思之,則 《爾雅翼》云: 非 説者因『萱』音 草名,故 孔疏以「諼 其仍 傳 豈 本

⁰ 願」,阮校本《毛詩正義》作「念」。

句》。 不從 雅》云「焉得諼草」,是叔然所見詩仍 合。 草,忘憂也。」然則「忘憂」之説,始於《韓詩 爲草名,與《考槃》不同。 引《詩》作「萲草」,遂謂《伯兮》詩當作「萲」, 也」郭注云「義見《伯兮》、《考槃》詩」、《釋文》 設想之詞,不謂 詩》注引《韓詩》「焉得諠草」,薛君曰:「諠 謂善讀傳箋者矣。《文選》謝惠連《西陵遇風 此云「願得善忘之草」,似羅 也,而所謂『忘憂』,『憂』之字何從出哉?」據 生論》、《博物志》,以爲皆諸儒 「憂」字。 諼草」。 .萱』合其音,以『忘』合其義耳。 《爾雅》備列草名,而但有「諼」訓,别 艸 《説文》從韓,與毛異義。 作「萲」也 故於「忘憂」之名,但引《説文》、《 陳氏《稽古編》因《釋訓》「萲、諼,忘 實有此草,於「焉得」二字最 毛西 河《詩札》引陸機《贈 然正義 所見傳 附會之語,可 傳箋皆衹 引 然忘 孫 作「諼」, 本亦 注《爾 草可 無 養 作 章 無

則且易「忘憂」爲「忘歸」矣。此可爲解頤從兄車騎詩》云「焉得忘歸草,言樹背與襟」,

有 狐

之論

婚姻 食也。《詩》曰:『父母何嘗?』『心之憂矣』 惡衰乏焉,則知天下之欲富足也云云。 也, 己惡勞苦焉,則知天下之欲安佚也, 情量之也。己惡饑寒焉,則知天下之欲衣食 乎千里之前,非耳能 同引者,因上文衣食並言故 之子無裳。」」此以《鴇羽》篇語與《有狐》二語 王之法,天子親耕,后妃親蠶,先天下憂衣與 出户而知天下,不窺牖 時,喪其妃耦焉。」《韓 《序》云:「有狐, 而 與毛《序》刺時之意正合。 聞乎千里之外,以己之 刺 . 詩 而 時 外 見天道,非目 也。 傳》 也。 日 衛之男女失 雖不及男女 一昔 故先 者 能 視

讀注 謂,非 喻 豈其然哉? 所以配衣』之義。」據此,是傳箋皆以「無裳 室家 則傳皆以衣喻夫,以裳帶喻妻宜配之。 『裳所以配衣』,二章傳曰『帶所以申束衣』, 無爲作裳者,欲與爲室家」,此「寡」是獨處之 即箋云「時婦人喪其妃耦,寡而憂是子無裳, 相棄也。」此語甚明,初非 云『是子無裳,欲與爲室家』之道,申説傳『裳 無 疏者不子細,輒謂《集傳》本鄭箋立説 妻,非憂其無人縫裳而欲與爲室家也。 必以爲未亡人。正義云:「首章傳曰 心亦失 故正義云:「久而無匹,非先爲妃而 《序》有「男女失時 也,謂失其妃耦之道,不得早爲 寡婦、鰥夫之謂 喪 其妃! 耦 故箋 之

故在淇梁與岸側,緩緩然安閒而不迫。衛之國人作也。狐多媚,故有匹;多疑,不涉水,「有狐緩緩」、《續讀詩記》曰:「《有狐》,

百 ? 《有狐》爲國人憫鰥夫,則表國人之仁心,固 但戴以「無裳」爲無與治之,猶不及傳箋以 「無裳」喻無妻得比興之旨耳 嫁而作爲自媒自炫之詞,尚何所取而列之三 勝于彰寡婦之淫志。」」承珙案:如果寡婦欲 説覺優游得詩人之意。 鈔》曰:「諸家皆以爲婦人欲嫁之詞,岷隱之 也,衣帶之屬無與治之,此可念爾。《黄氏 男子失時,故 故後儒多覺其不安,而有取于 有 感於狐 ", 言未· 戚氏雄 有 曰:「岷隱 妃耦 猶 戴説 之可 謂 日

《段國沙洲記》曰:『吐谷渾於河 曰:「厲,謂 之河厲。」此 方也。』隒、厓、厲,皆在旁之名,故皆訓爲方。 「淇厲」並 毛鄭詩考正》曰: 『隒、厓、厲,方也。』又:『邊、厓、旁、隒, 一在 彼 稱 淇 水厓 ,属固梁之屬也。」《經義述聞》 可 厲」,傳:「厲,深 證 也。《廣雅》:『隒 橋 「《水經注 有『厲』名。 ·河水》篇引 可厲之旁。」 詩『淇梁』、 上作橋,謂 , 厓也。」

《史記·南越傳》「爲戈船下厲將軍」,《漢書 之。 與涉水之「厲」轉相引申。 言「側」,則在岸矣。立言次 作「下瀨」。《説文》:「瀨,水 義。 文》作「砅」,,此水旁之「厲」,又借深厲之字 流沙上」之「瀨」,義足 文》:「砅,履 水深之所,次章言「厲」,爲水淺之所,三章 當在由深而淺之處。 辭》:『石瀨兮淺淺。』」是瀨爲水流沙石間 則厲」之「厲」。 「厲」「賴」同聲,故「履石渡水」之「砅」與「水 可名「厲」,實則此「厲」當爲「瀨」之借字。 「厲」爲「深可厲之旁」,固明知此「厲」非「 「淇厲」與「淇側」同義,猶「河干」與「河 戴以厲爲梁屬,非也。」承 是『淇厲』爲淇水之厓,非承上『淇 石渡水 但厲必深水,其旁水淺處亦 上章「石絶水曰梁」,爲 也。 相成,聲亦同 或 故「深則厲」、《説 流 从 序如此。 沙上也。 珙 厲,作濿。」 案 類,而又 「梁」言 側同 傳 《説 《 楚 以

二六

上幾之。 李《集解》引王氏曰:「岸近危曰厲。」則望文李《集解》引王氏曰:「岸近危曰厲。」則望文可厲之旁」者,用彼「厲」以見此「厲」故也。爲之,若但訓「水旁」,與「側」無别。 傳云「深

木瓜

序》云云恐非後人揣度者所能及。 此詩但見忠厚之意,絕無褻慢之情,以《小 子説,則但以爲尋常施報之言,已稍變其義 善衛人之情也。」正用《序》説。《吕記》引朱 桓公之惠而責文公之無恩,故爲是詩以 桓既殁之後,衛文伐齊,「殺長 女》同類。 至作《集傳》,乃以爲男女贈答之詞,疑與《静 云:「《詩》録《木瓜》,《春秋》序績之意,亦以 唐、宋諸儒皆從《序》説。 《序》云:「《木瓜》,美齊桓公也。」漢、 當時 輔廣 最 爲篤信師説者,尚疑 朱子《讀尊 立幼,衛 因疑是齊 孟 風其 人感 辨》

文無 昭二年《左傳》:韓起聘衛,「衛侯享之。 如此等已先見於毛傳,當必有所授之。春秋 瓜》見苞苴之禮行。」《孔叢》雖非真古書,然 明文可據乎? 謂「美人」、《静女》經有其言,而此詩則有 之詩,如古《序》説,本非男女贈答之作。 報當何如,此尤詩人微婉之意也。至《静女》 報,故設爲瓊瓜不等之喻,言若有厚于此者, 擬于重寶,不知作者之旨,正以 桓之德,豈可僅比于草木,衛人之報,何乃自 可以經無明文疑之。劉氏瑾又駮《序》,云齊 大惠而作,則風刺之詩更不當直言其事, 且此詩在《衛風》之末,或如輔説爲衛文忘齊 文,非紀事之史,安得 稱者,故作此詩以致其意。《詩》乃詠歌之 上。 所據。 而朱子不以爲然,但謂美 不知衛人戴桓之德,實有難 且傳引孔子曰 盡 著實跡於篇 :「吾於《木 人當薄遺厚 桓之説 中 哉 於報 於 即 北 何 經 何

取焉。 顧自取 據《詩》義,與古《序》相符,何獨於《木瓜》節 叢》所引孔子之言,自二《南》至《采菽》皆實 燕享,安所取之? 宫文子賦《淇澳》,宣子賦《木瓜》」。 之義而推廣之耳,未可爲此詩正 男女贈答之私,則 禮》篇以《木瓜》爲下報上,此則因施 歌《詩》不類之誚邪? 而北宫之賦《淇澳》,託意宏深,宣子 若謂 何以謂之行禮? 賦《詩》斷章,則《孔 至賈誼 詁 也 而 使果爲 名 新 報 卿

之酢澀 無鼻者爲 以「木桃」 食之津潤不木者爲木瓜; 圓 『木李』以别之。」陸氏《埤雅》始謂實如小瓜, 有雀李,此皆支蔓也。 吕記》引徐氏曰:「瓜有瓜瓞,桃有羊桃,李 投我 而 木李。 木者爲木桃,大於木桃,似木 爲 以木瓜」,傳"「木瓜、楙木也。」 樝 子,「木李」爲榠樝。 李氏《集解》從之。 故言『木瓜』、『木桃』、 而 小 於木瓜 姚寬 李 時 瓜 食 遂 珍 而

> 類乎? 木桃。 説 《本草》祖述其説。 應目爲桃李。 即以爲桃李。 者,因上章「木」字以成文耳。毛公無訓,蓋 自不必復稱爲「木」。 此名耳。 無「木桃」、「木李」之名,後人因《詩》而 生,故獨釋「楙」爲「木瓜」,若桃李本皆木耳, 而「木桃」、「木李」無訓。《爾雅》以 珙案: 樝子、榠樝在《本草别録》、《圖經》 亦 通。 足知「木桃」即桃,烏得爲木瓜之 傳以「木瓜」爲「楙」,用《爾 若樝子及榠樝,皆與木瓜同類,不 任昉《述異記》云,桃之大者爲 徐安道謂别於羊桃、雀李,其 陳氏《稽古編》從之。 詩言「木桃」、「木李」 瓜不木 雅》文, 被以 並

是玉之美名,非玉名也。」此與應劭云「瓊,玉名,則瓊非玉名,故云『瓊,玉之美者』。言瓊琚,佩玉名。」正義曰:「以言瓊琚,琚是玉田報之以瓊琚」,傳:「瓊,玉之美者。

間矣。 玉佩 瓊。」是也。「琚,佩玉名」者,正 則其誤已久。 之華 中有名「琚」者耳。段以琚乃佩玉之一物,不 承珙案:此説非也。 氏云:「『名』當作『石」,謂 女同車》云『佩玉瓊琚』,故知琚,佩玉名。」段 言『玉首瓊支』,因而引伸凡玉石之美皆謂 亦當爲玉名。倘是赤玉,當廁『璊』『瑕』二篆 之精也』之類。此上下文皆云『玉也』,則瓊 美者』也。 蓋瓊支爲玉之最美者,故《廣雅》 如李賢所引『診亦視也』、《鳥部》『鸞亦 ·瓊瑩」、『瓊英』、『瓊瑰』,毛傳云:『瓊,玉之 「赤,當作『亦』。 《説文》時有言『亦』者 者」同 玉佩」, 故《鄭風》言「佩玉瓊琚」、《秦風》言 唐人陸德明、張守節皆引作『赤玉』, 也。 《詩》「瓊琚」、「瓊瑶」、「瓊華」、 説 文》: 佩玉名者,雜佩非 雜佩謂之佩玉,亦謂之 瓊,赤 佩 玉 納間之石。」 義曰:「《有 玉 也 神靈 段 , 其 注

得爲佩玉名,誤矣。

其初蓋以玉爲者,後乃用蚌珠代之。 荀卿賦 美者」,誤。 誤。《呂記》引傳尚作「美石」。 珠」、《韓詩外傳》作「蠙珠」。 書》言:「佩玉捍珠以 記》,玉爵獻卿,瑶爵獻 琨、珉、瑶皆石之美者。今《説文》「瑶」下亦作「玉之 珙案:正義又云「瑶亦 瑶,美石」。今本傳文作「美玉」者,轉寫之 所見傳本作「美石」,故首章正義引傳云「瓊 所見傳作「美玉」,故引《説文》以存異義。 文,是此傳當作「瓊瑶,美石」。《釋文》: 正義以傳「琚」言「佩玉名」,「瑶」言「美石」, 「玖」言「玉名」,「名」當作「石」,説見下。 瑶,音遥,美玉 報之以瓊瑶」,傳:「瓊瑶,美玉。」首 《周禮》,王獻玉爵,后獻瑶爵。 也。 《説文》云,美石。」是陸 納其間。」《大戴》作一 大夫。 佩玉名」者,賈誼 段氏云:「《説文》 然「珠」字從玉 是其等差。」承 三者互 《禮 (新 孔 童

珠,以充佩玉,故知瑶亦佩玉名也。曰:「旋玉瑶珠,不知佩也。」古人殆以瑶爲

耳。 皆玉石雜也。」此「玖言玉名」,亦當作「玉 名」,則與「琚,佩玉名」同,不得云「三者互 案:首章正義云:「此言『琚,佩玉名』,下傳 傳》師古曰:『玉石,石之似玉者也。』」承珙 玉名。瑶言『美石』,玖言『玉名』,明此三者 爲「美石」三者互文見義。若作「瓊玖,玉 此「瓊玖,玉名」,「名」當作「石」,蓋謂傳訓 曰:「玖,石次玉者。」《説文》:「玖,石之次 石」,蓋以瑶之「美石」、玖之「玉石」,證琚雖 「瓊玖」爲「玉石」,與「琚」爲「佩玉名」、「瑶」 云『瓊瑶,美石』,『瓊玖,玉名』,三者互也。」 玉黑色者。」今此傳作「玉名」,乃「玉石」之誤 玉石,見楊雄《蜀都賦》。《漢書·西域 正義又云:「琚言「佩玉名」,瑶玖亦佩 報之以瓊玖」,段氏云:《王風》傳

引《邱中有麻》傳以明玖非全玉矣。之誤。若此傳本以「玖」爲玉名,則正義不當「瓊玖,玉名」,「玖言玉名」,二「名」字皆「石」「佩玉名」,而亦爲「玉石雜」也。今本正義

毛詩後箋卷五終

涇 胡 承

珙

王

故貶之,謂之王國之『變風』。」正義 於是王室之尊,與諸侯無異,其詩不能 譜》云:「平王以 亂 故 徙居東都 曰:「風 復 王 雅, 城

鄭意似謂詩人之作,自降爲《風》耳。 頌 作『風』,非謂採得其詩乃貶之也。」承珙案: 當爲作『雅』,猶《校勘記》云:猶,同「由」。 雅之作,本自有體,而云『貶之謂之風』者,言 王德於邦君,明其不能復雅,政化不足以被 會鄭意,其《穀梁序》云:「孔子就大師 ,因魯史修《春秋》,列《黍離 》於《國 貶之而 范甯誤 風 正 雅

侯。 《黍離》箋:「平王東遷,政遂微弱,下列於諸 猶春秋之王人,稱『王』而 也。 爲近之。 已,則惟孔疏以「風雅之作,各自有體」者,似 故曰王國風。」此爲聲調之説,亦近渺茫。 黄實夫曰:「周室未遷,則其聲,天下正 其危難以風。」是豈得謂盡出民俗歌謡乎 作于周大夫。 之《風》同也。 以後,朝廷既 群 詩遂亡,獨有民俗歌 燕饗樂章,及公卿大臣規諫獻納之作。 自降,亦無 后 其詩不能復雅,而同於國風焉。」《釋文》 平王遷而東之,則其音乃東土之音耳 也。」《 正義又引服虔云:「尊之,猶 此 困 理。 學 無制作,公卿又無獻納,故《雅 然《王風》之首篇爲《黍 《君子于役》序亦云:「大夫思 紀 陳潛室又謂《雅》詩 聞》已駁之。 謡,其體製音節與 列於諸侯之上。」 即 鄭 謂 離 多 稱王 (列國 東遷 朝 詩 聲 無 即 會 X

至驪 康之世乎? 者則繫之《王》,采於列國者則各繫之其國 故都者,則繫之《邶》、《鄘 録者皆平王 録》曰:「邶、鄘、衞、王,列國之名,其始於成 非也,謂以『王』尊周者 徙都成周,義固不得舍王 歷景王,都王城者十二世,敬王避子朝亂,乃 年春必書『王正月』,猶可目爲尊王。 云 十章採自王 王」也」。」似鄭 周」,則與《周南》混矣。 周」可稱也。 陸堂詩學》曰:「《春秋》,魯國之史。 王城譜」,則「王」即東都 Ш 之禍,先王之詩 集 畿,將不稱『王』而奚 以後之詩,此變風 注 太師陳詩以 余謂『王』亦以地而言,自平王 本 亦 此 同 服 下更有 率 亦非 義。 故謂以『風』 貶周者 -已闕 觀民風,采於商之 》、《衞》,采於東都 王 而 也。」顧氏《日 稱 一猶 然《詩譜》謂 城,亦地 之所由名也。 軼,而孔子所 問周」。 飛? 尊之,故 〈黍離》 名也。 或曰 于元 且 之 知 稱 稱

於義。 世? 《雅》亡也。《春秋》所以繼《詩》亡者、《詩》之 間,若其亡矣,亂臣 爲教,長於諷諭,其微婉常餘於言外:《 有然也。《詩》存,而 襃姒威之1者,必其事著於王官,迫於忠憤 嘉桓叔。 嗟》稱禦亂而實刺莊公,《揚水》諷 不紀録之以進於王。國亡則四詩俱亡,非 者,太師不采詩,王朝無掌故,諸侯之國史亦 熄而《詩》亡,《詩》亡然後《春秋》作。』《詩》亡 范氏《詩瀋》曰:「孟子曰:『王者之迹 孔子以匹夫 天王狩河陽,夫人 其有深切著明,如所謂『赫赫宗周 而 操筆 列國之事 賊子何以 削,事 孫 于 可得之絃 齊,有不必 核其實,文生 彰其惡 晉昭 於 誦 而 猗 萬 之 僅 而 詞

詩 《南》、《王》、《豳》,皆天子之詩,雅、頌有《賓 也。 風; 曉如此 筵》、《抑戒》、《魯頌》,皆諸侯之詩,不得以 頌 風 而其 也 善乎,夾漈鄭氏之言曰:『《七月》者,西周之 之不作? 秋》即《詩》,《詩》亦史也。 言 亦變爲風 會其旨,惟弒父與君則直 高 專屬之諸侯。或曰平王政教東遷,故斥爲 ,體自風也。 而 而 《黍離》者,東周之風。』非《黍離》降爲國 雅亡。 爲 夫王降爲 見 於雅。」汪 詩》體有 者 或 乎? 約 且二《南》與《豳》,雖爲風之終始 風則 而後儒 章如愚曰:『王之《風》,非貶王 而 風、雅、頌之殊,非雅 魯之《頌》,非聚魯也,體 風,或是衰周 琬曰:『十 一也, 豈亦有升降之殊 王室雖陵遲,而雅 達 乃曰《黍離》降爲國 微微 而 臧 書之耳。 是在 孟子之言,明白 五. 時勢,何至雅 或 讀 風 詩 史者之善 是故《春 重 中 誰 風 於風 有 本頌 敷? 能 而 風 禁 詩 雅

> 王也。 斥爲 風』之謬,顯然矣。」 不逮幽厲也。」由三家之説思之,則「王降爲 不自斥,采詩者必不敢斥其所得之詩以告於 風 風 行 也,孰斥之? 幽厲之詩猶列於雅,而平王獨否,是 父請 命 於周 王不 然 後 自斥也 有 頌 然 作詩 則 王 之

雅 迁 《詩》亡者也。 儒原立兩義。 道衰,王跡止 説,曲言『《黍離》降風』也。」又曰:「自 有「不能復雅」之云,楊龜山據之,以雅 東、瀍水西之王城,皆以地言,不應從 「周」爲周之南,「召」爲召之南,「王」則澗 王,猶以《周南》、《召南》係二公,其 仲 、頌俱亡,而安溪《詩所》又特據風雅 兼 《虞東學詩》曰:「先儒以《王風》係 而存之,古義略具。 息,頌聲不作,故《詩》亡。」是 後世鄭學盛行,遂遺 然考趙岐 注《孟》則曰:『太 王魯 「齋則」 超説。 失 爲説, 謂 同 康 風 Ψ. 爲 立 成 水 平 遺此 近。 之典廢,所謂「迹熄 爛然著明,二雅之篇可考焉。洎乎東遷,而 迹於筆削之文,而非進《春秋》於風雅之後。 之,不得已而託《春秋》以彰衮鉞,所以 天子不省方,諸侯不入覲,慶讓不行,而陳 同,撻伐震於徐方,疆理及乎南海,中興之跡 夷厲以來,雖 陳之以考其得失,而慶讓行焉,所謂『迹』也。 職,巡狩則天子采風,述職則諸侯貢俗,太師 亦可存而不論。 之作,何與於『跡』? 此義不明,則不獨『《黍 今即諸儒所論《詩》亡者而折衷之,則魯齋爲 離》降風』支離難據,即迂仲、魯齋、安溪諸 王迹耳。 論 莫 蓋《詩》者,風、雅、頌之總名,無 能 若疑《國風》多録東周,《魯頌》亦多僖 0 王者之迹,何預於《詩》? 愚 一經板 竊 以爲都 蓋王者之政莫大於巡 蕩,而 而《詩》亡』也。 非 甫田 要義。 東狩,舄芾來 所 孔子傷 《春秋》 欲 庸 究 存王 一狩述 舉 者, 彼 詩 説

熄,不繫於本書之有無也。」世,則愚謂《詩》之存亡繫於王迹之熄與

黍 離

《左傳》衞壽竊 來。 苑》,劉向一人之作,其説《詩》旨趣當同。但 閔兄見害之事。 之詩、《黍離》是也。」王氏《詩考》以劉 唐於文侯父子之間借以爲風。《新序》、《説 離》。」」此蓋亦以《黍離》爲公子壽之詩,故 載:「魏文侯封太子擊於中山,三年使不往 當爲《魯詩》說。 序》:「衞宣公子壽閔其兄伋之見害,作憂 『於《詩》何好?」倉唐曰:『好《晨風》、《黍 『子之君何業?』倉唐曰:『業詩文。』侯曰 趙倉唐爲太子奉使於文侯。文侯 序》云: 旌先往,是死 $\overline{\ }$ 且 承珙案:《説苑 黍 |使《黍離》果爲 離 ₩, 閔 在 宗 伋先,安得有 周 壽作 • 奉 也 向 使》 日 所 列 倉 傳 思 新

之

衛

風

明

辨。」此用韓義,而 甚之時,反以爲稷之苗,乃自知憂之甚 求亡不得,憂懣不識於物,視彼黍離離然,憂 御覽》又引《韓詩》曰:「離離,黍貌也。」詩 時,尚是西周,不應其詩列於東都也。 伯封求而不得,作《黍離》之詩。」此大旨與劉 離》,伯封作也。」陳思王《令禽惡鳥論》 昔尹吉甫信後妻之讒,而殺孝子伯奇,其弟 一勰云:「思親者莪蒿不分,閔 、《序》所謂 惟李氏《集解》以 傳》、許氏《名物鈔》皆以視黍爲稷釋 黍稷皆言彼者,正見有黍 《詩考》又引《韓詩序》云: 事 何 盡爲禾 爲 與人又異。 冠 「閔周」又本毛《序》。 於《王 黍是也 爲不必如 風 然尹吉甫在 》之首 有 此説。 周者黍稷 稷, 徧地皆 ? 《太平 其 范氏 承 曰 : 首二 宣 不 也。 珙 莫 黍 人 王 足 也。 《史記》:『平王賜襄公岐以西之地,曰:「戎 理 破,平王視同敝帚,不復加 都 之説,以爲秦不應毀廢本朝宗廟宫室也。 不免耳。 戎,始得至岐,岐 在岐以西。 侵奪我岐豐,秦能逐戎 曰:「此惑於鄭氏《秦譜》『横有西都八百里』 故 然,所見黍離當在野外。 去 廟 官 仍隸周境,秦不得過而 亦有之。」承珙案:《 地盡以封秦,不應鞫爲禾黍。 而作是詩。」季氏本謂 終襄公世不能克戎,至文公十六年 室 盡 史言殷墟 爲 豐鎬在岐東、爲戎所據、非 禾黍

向

説

同

而

序》云: 「周大夫行役至宗周,●過故宗 謂:

句,

補

劉

以

東仍

獻之周。

是豐

岐

故

問焉。

特

爲

戎

磋

城

壞

生麥,則

周

墟

黍

葺

銅駝荆

棘

固

所

史記》秦獻

地

于周,在

0

関

周

室之

顛

覆

彷

徨

不

恝

以事理推

之未

必

盡

錢氏

天錫、

亦

謂

岐

居

《虞東學詩

秦

有

逐

,即有其地。」』是秦

排

至」下,阮校本《毛詩正義》有「于」字。

本謂 此,而 富 禾 故 平 强 都 Ė 黍。」此事之必然者。 雄天下,而傷周室不競」之謬論 詩 東遷後二十一年,當犬戎蹂躪之後。 周始得有其地。 人見黍稷之盛,知秦 箋云: 「宗廟宮 大夫行 室毀壞 《虞東》之説 地 前 役, 廣民勤 其 因 足 以 地 將 破 經 盡 以 季 過 爲 至

《名物鈔》互易朱《傳》「黍」「稷」之訓,以 實。 黏 本 頗 而 注已辨之云:「黍有數種,亦不似蘆。」許氏 箋《詩》不詳稷之形狀。 陶 有 稷 引其説,亦不言稷。 陳氏《稽古編》以「黍」爲今之黍子,以 晚,黍 隱 黏者爲「稷」。 稼 不 彼黍離 書 黏 居「黍與 前 引雷禮之説 小而稷大,黍穗散 稷 離,彼稷之苗」,鄭氏注三禮 稷 性 相似」之語。 疏 此誤以穄爲稷,非是。説見下。 謂 所 《集傳》云黍似 氾勝之種殖書,鄭氏 辨 黍 似 貴 而 明。 而 稷穗聚 而 稷賤 陶説 然雷 黍 蘆者, 唐 氏 黍 爲 仍 黍 得 及 早 本 有

書言種 稷穄 子。 黏者 是以 也。 《黍考》曰:「《説文》:『黍,禾屬 『穄』音相近,穄奪稷名,承譌日久,論者因 今山 皆非禾也。 文異,散文則通 謂黍爲禾屬 太原以東,則呼黏者爲『黍子』,不黏者爲『鏖 『糜』與『穄』之名,於是黏者得 以大暑而 人殊,皆不若程氏瑶田《九穀考》之精析 説 文》獨言以大暑 西人無論黏與不黏,統呼之曰『糜黍』。 禾屬 釀 「稷」爲今之小米,其誤更甚。 武邑人呼糜之米曰『稷米』。 物,而 黍 酒及爲餌 而黏者黍,則禾屬 種,故謂之黍。』《説文》以 皆云大火 **糜**, 而黏者,非 以 黏 稱『黍』。 曰穄。 餈 不 而 酏 中,是以 黏 穜 謂 分 粥 蓋 謂之『禾屬』,要之 禾爲黍屬 之屬。 飯 黍 而 言種 稷,失之矣。 用黍之不黏者 夏 不黏者糜。 專稱『黍』矣。 至 圃 黍之極 不黏者有 北方『稷』 而 其餘言 而 禾况 黏者 不黏 穜 "。 其 也。 時 謂 者 X

名也。 也。 高大似蘆。故元人吴瑞曰:『稷苗似蘆 也。 其 稷,百日不蓺稷。』秦漢以來,諸書並冒粱 先,粟次之,黍糜又次之。 然则首穜者,高粱 稷。」今以北 粱,通謂之秫秫,又謂之蜀黍,蓋穄之類,而 謂段説是也。 案:氾勝之云:「黍,暑也。 之,了日 冬令,首穜不入。』鄭氏注:『舊説首 亦大,南人呼爲蘆穄也。』《月令》:『孟春行 「秫,稷之黏者。」重文作『朮』。 案:稷齋,大 正 《管子書》:『日至七十日,陰凍釋 五穀之長。」『齋,稷也。」重文作『楽」。 雖南北氣候不齊,曾未聞有正月蓺粱粟 無論稷粱二穀缺一不可,即以《管子》言 時 黏者爲秫,北方謂之高粱,或謂之紅 至七十日」,乃八九之末,今之正 實 夏 其《稷考》曰:「《説文》:『稷,齋 方諸 至 也。」 穀播種 段 種者必待暑。」 正與許同。 氏以《説文》「大」字爲衍 先後考之,高 粱 穜 而 承珙 粒 月 最 謂 文 爲 蓺

乎 ? 粱最 形大,故得『疏』稱。《論語》『疏食菜羹』,《玉 蜀葵。」又:「凡經言『疏食』者,稷食也 粱。 通 秫也。以秫爲黏稷,於是他穀之黏者亦 穀者,稷爲長,是以名云。」其黏者黄白二種,所 也。 故曰 者。 藻》『稷食菜羹』,二經皆與菜羹並舉,則『疏 合聲。黍類之大者爲蜀黍,猶葵類之大者名 者,故得專紅粱之名。 稻」,是也。不黏者赤白二穜,民 名、《廣韻》:「稷,五穀總名。」因之爲祭穀之總名 稷」一物可知。 稱之曰秫。 「蜀黍」爲「秫」之缓聲,「秫」爲「蜀黍」之 鄭氏注《甸師職》:「叠盛,祭稷所用穀也。 高大而又先穜,謂之五穀之長,不亦宜 稷爲首穜。 而 故司農之官曰后稷,因之爲五穀之總 高 梁早種: 崔豹《古今注》所謂『秫爲 首種者,高粱也。 『疏』言其形,『稷』舉其名 於 正 月者, 《穀譜》: 則 南 蜀黍一名高 北 俗多種 諸穀惟高 並 築,稷也 有之, 假 借 赤 黏 謂

穗

糜後。 不能收。 問之農民。 黍糜遲 則常云『離離』,欲記其 見稷之實」,正義:「稷則『穗』『實』改易,黍 津,見黍鏖正秀, 稷之名,即南 大夫役當有 承珙又案:二章傳云「詩人自黍 種,黍鏖五月下種 音之譌,程氏所言可爲定論。 也。」承珙案: 緝》以「苗」、「穗」、「實」惟取協韻 ,故歷道其所更見」,三章傳云「自黍離 」、『稷猶苗』者,至此始信《詩》言不謬矣。」 以二物大 種 在地時日久,其秀反遲,若不早穜,斷 而 向 則曰: 期 疾 時 疑 人謂之蘆穄者。 黍名古今不易, 熟。 高 而 相 反,但 而 粱首穜,而《詩》乃云『黍 類者,蓋高 ,而《小雅》「黍稷方華」正 高粱穜在黍糜前,秀在 程氏云:「嘗以六月過天 高粱竟畝無 事尚未周了故也。」嚴 初至,故不變『黍』文。 粱早 惟高粱正 而高粱尚有木 穄,當亦 離 一秀者。 種 離 此即《吕 而 見稷之 晚 月下 稷 因 離 離 黍 通。 見, 已 故 形,秀亦 非 氏 實。 以

《湛露》「其實離離」,傳云:「離離,垂也。」是 其明證。程氏 苗、稷之穗、稷之實,蓋以早晚 夏之月,天子以雛嘗黍,庶人秋乃薦黍。」是 云:「農家 猶興桃夭者,因葉及華,因華及實,蓋一 都謂之「苗」。 記》所引張氏 黍有早晚三輩 旬爲中時,五月上旬爲下時。 黍已離離 安世以爲往來非 總之,離離言其垂,自秀至實皆可言之。 華實紀時,不得援以 日所賦 時 離 有 穜 離 先 而 黍 説,以爲作文者須是如 也, 稷 然經文豈有 後,種有早 ,則當「離 曰:「離離者,狀黍生下垂之 以三月上旬爲上時, 然《桃夭》傳 或猶苗,及黍猶離 穗 亦 一見,楊用修駁之,以 離 離 離」時, 晚,大致不差,抑 如 爲比。 也 本云 此 實 行而異。 故《月令》: 凑韻 而 亦離 喻女 《爾雅翼 或 離 此,不 者 此説 值 四月上 而 容德 離 時 稷 稷 也 仲 或 > 所 非 亦 爲 劉 口

説。 久而: 必 妨 可 作此 也 然則 以 執 詩,「苗」與「穗」皆追溯之詞,本不 毛傳「歷道所見」之云,自因行 論 者。」 姜氏《詩序廣 義》 亦 役既 有 此

非 疏適歷之意,故字从离聲。 否。《玉篇》則云:「稿,禾把 采《釋文》之説,抑宋元時《説文》尚有此 文》作「樆」,黄公紹《韻會》同。 今《説文》無此字。 ,疏以爲「磬希疏相離」是也 明堂位》「叔之離磬」注謂 《釋文》云:「離、《説文》作稿。」承 王氏《詩考》亦 《毛詩》作「離離 也。」蓋 編懸之磬歷歷 未知二家係 取 引《 字 其 稀 與 説 珙

同。」承珙案:「靡」本不訓「遲」。 文》無音反,據文義,當讀 「嫲,迷彼反。 行邁 靡靡」、《稽古編》曰:「靡字、《釋 毛傳 **篠篠,猶遲** 訓 『遲 遲也。 遲 上聲。 」,義同,當亦音 今作「靡」。』 《説文》: 王 一篇 》:

《詩》「憂心熎熎」,正作「愮」不作「揺」也 雅》而第引《戰國策》「心摇摇 豈以「揺」「愮」字異故邪? 毛蓋以「揺」爲「愮」之借耳。 即用《爾雅》「灌 中 心 摇 摇 (), 傳: 灌、熎 「摇 一怪, 憂 摇 《玉篇・心部》引 憂無 無告也」之訓 如懸旌」之語 正義不引《爾 所愬。」此

聲。」凡穀之華皆吐於穗,非 秀」,即謂黍穗。 傳《説文》皆以 秀,人所以收。 與彼『秀』别。」承珙案:《説文》:「采,禾成 未穗。今毛氏所謂『秀』,則 云:「朱氏《論語 「彼稷之穗」,傳:「穗,秀也。」嚴《緝 采 从爪、禾。 嚴氏以「吐華曰秀」與「成穗 解》:『吐華曰 爲 秀。 《月令》注 華而 穗,俗从禾, 已成穗 秀。』是秀爲 後 穗,故 而秀茂 散 毛 舒

毛詩後箋卷六

有秀也。 華」,此「華」即 之秀」别,不 穗 即 秀, · 知 秀,散文通 既 穀 秀 類 即 惟 實。 菽 作華,餘皆 耳,非於華之外 念出 車》「黍 不 稷 華 别 方 而

氏《 我不能息兮」,傳云: 引傳文以「噎憂」爲句也。 之然。」《玉篇》以「噎」謂噎憂,是自爲 息也。」三傳皆探下句「謂我心憂」「憂」字釋 次章云:「醉於憂也。」末章云:「噎,憂不 非是。毛傳於首章云:「揺揺,憂無 之,不應末章 憂,《老子》作『嚘』,氣屰也。」承珙案: 噎」,謂『噎憂不 噎者,咽喉蔽塞之名。 詩小學》云:「《玉 無 中 「噎」字,而段 穴 如噎」,傳: 忽作「噎嚘」之「嚘」。 能 息 亦云當作 「憂不能息也。」此 也。 「噎,憂不能 篇》引《詩》『中 憂深不能喘息,如 《鄭風 噎憂, 「噎憂」,與《黍 ·狡童》「使 息也。」段 雙聲字。 正 所 解 此 想。」 則 義 : 心 非 能 説 如 經 噎

離》同,尤非是。

君子于役

故爲 使無飢 范氏 死亡。 『苟無飢渴』,蓋思其危難 所憂者,死亡耳。 意。」承珙案:范氏《詩補傳》云:「行役 記》曰:「攷經文,不見『思其 子行役無期度,大夫思其危 此説,蓋不始於《讀詩記》矣。 在 序》云: 所謂 渴 南 宋 以生患也。」此闡發《序》義甚明。 危難 初,必其時 《君子 即即 飢渴 疾 于役 病 則致 已有疑《序》之言者 所 死亡也。 ×, 由 疾病,疾病則 難 刺 危 致 以 平 難 風 而風諭之, 卒章 王 以 焉。」《吕 也。 風」之 ·祝其 之人 致

陽》與此爲一人所作,故俱以爲大夫妻歟?而賦之。其説微異,豈欲扭合下篇《君子陽念之之辭,《集傳》又以爲大夫行役,室家思朱子《詩序辨説》以爲國人行役,而室家

指此詩,不得援以爲證。

《總聞》已引班叔皮《北征賦》「日晻晻其將暮ぐ,觀牛羊之下來。寤怨曠之傷情兮,哀詩人之歎時」四句爲證。不知李善注《文選》於人之歎時」四句爲證。不知李善注《文選》於人之歎時」四句爲證。不知李善注《文選》於然果何所據而知之? 至「室家之思」,王氏

> 之反無期,不應此句獨言不知所至也。 所,何有不知其所至者? 且通章皆言行役 爲「時之久」,「曷至哉」爲「地之遠」。 夫古人 爲「時之久」,「曷至哉」爲「地之遠」。 夫古人 輔氏廣、嚴氏粲皆從其説,遂分「不知其期」 輔氏廣、嚴氏粲皆從其説,遂分「不知其期」 三之反無期,不應此句獨言不知所至哉?」《虞東學 之反無期,不應此句獨言不知所至哉?」《虞東學

本》傳云:「自羊徂牛,先小後大也。」其餘傳 等。《詩》中先羊後,次章順類之大小,殊爲穿 章作「牛羊」者,不過傳寫誤倒。而説者遂謂 章作「牛羊」者,不過傳寫誤倒。而説者遂謂 。《詩》中先羊後牛者,此詩及《小雅·無 整。《詩》中先羊後牛者,此詩及《小雅·無 等 。《詩》中先羊後牛者,此詩及《小雅·無 等 。《詩》中先羊後牛者,此詩及《小雅·無 等 。《詩》中先羊後中者,此詩及《小雅·無 等

云:「羊性畏露,故早出晚歸。」此説亦近箋無説者,自以便文不關意義耳。《埤雅》

於鑿。

成而 同。 文》於「有佸」又引《韓詩》云「佸,至也」是矣。 因,下文「羊牛下括」傳云「括,至也」,而《釋 凡物之總會者曰括,故此傳云「佸,會也」,而 又案:「括」與「格」聲亦相近,《易略例》「語 也。」《釋文》:「括,本亦作佸。」「會」與「至」義亦相 檢 括』。」《尚 小雅・車舝》「徳音來括」傳又云:「括,會 ·譽」皆同字。又「佸」與「括」字異而義亦略 岳」「會」疊韻爲訓,故「栝」與「檜」、「髻」與 《説文》:「括,絜也。」絜有約束之義。 後 「俖,會也。」引《詩》「曷其 |曷其有佸」,傳:「佸,會也。」《説文・人 有格」《釋 格 書》「格其非心」,正義以「格」謂 有 至 文》 二訓 云: ,故「括」亦 本『格』作 有低」。 訓 蓋

至」矣。

君子陽陽

本乎。」 居也。 矣。」蓋此詩正《中谷 也。陳氏《稽古編》曰:「序《詩》者,其 氏《詩傳》曰:「君子以賤 詩及《中谷有蓷》、《兔爰》皆云「閔周」,彼二 遭亂,相招爲禄仕,全身遠害而 詩皆有憂詞,此獨言樂而亦云「閔周」者,蘇 《序》云: 雖有貴位,而君子不居,則周不 \ | 君 子陽陽》,閔 有雜》、《兔爰》之所兆 爲樂,則貴者不 周 已。」案: 也 可 君 此 知 輔 可 子

《毛詩明辨録》曰:「古者士大夫家有樂,不「以大夫招其妻入於舞位,亦或有微礙否?」時如輔廣已疑其師説。許氏《名物鈔》曰:婦人所作者,因篇首俱以「君子」爲言耳。當無子,稱本從《序》説,後疑此詩亦前篇

思矣。」 以盛。 何至 自 師、鐘師,皆中士、下士爲之,於論鼓鐘,周何 之樂也。」陽陽之君子,其磬師之流歟? 自 自當與《簡兮》同意。 『磬師教縵樂、燕樂之鐘磬』注:『燕樂,房中 舞。 考 執 擊。 執 若君 簧執翻 即 簧由房,周何以衰。 子 幼習象勺,成人之後亦不聞無 行役 ,聲容並 初歸,雖有室家之樂,亦 徐氏 肄?」承珙案:此詩 與喬 論 曰:「《春官》 世者 미 磬 以 故

寢」, 息時 簧」、「執 房中之樂。」案:房中,對廟朝言之。 下章「由敖」,箋云「從之於燕舞之位」者,此 燕」亦燕息之燕,非燕享之燕也。 》據《儀 駁正 所作之樂,非 「右招我由房」,傳:「由,用也。 翿 義 禮》「燕,朝 」,樂舞既備,不應作 「小寢」之説,章氏 廟朝之樂,故曰「房中」。 服于寢」注 易又 謂 :於房 《虞 人君 燕於路 或 謂「執 君 東 中, 學 燕 有

皆誤。

改。 《集韻》。今《説文》引《詩》作 俗,即作「纛」亦非。 也。 也。 也。 同義。」蓋 字,「翿」乃「儔」之别體。 承珙案:《説文・羽部》:「翳,翳也,所以舞 字之意。《考文》古本反用添傳,失之甚矣。 傳並引之』,正説傳用《爾雅》而去其一『纛 『翿,纛也』,又引『纛,翳也』,然後説之云『故 文》古本『翳』上有『纛』字。 궁 「翿」。 據此,知《詩》本作「翳」。 「『翳也』之上當有『纛』字,此『熠燿,粦 从人,壽聲。」徐鍇 粦,熒火也』之例。」《校勘記》云:「《考 从羽,殿聲。 左執 若「纛」字,六書所 儔,正字,或 翿 傳: 《詩》曰:『左執翳。』」此 **爾** 翿 作「翻 「翿」,乃後人據俗本《毛 日 雅 : 無 纛 考正義引《爾雅 《人部》:「儔,翳 「儔,古與 也, 《説文》無「翿 」,經典 不但 釋 翳 言》當本 作 也。 遂 「翿 「纛 段 作 詩 爲 用 氏

約 弱 鄭注 雅 既 識 正義仍引《爾 故傳引《爾 當是「左執翳」,傳當是「翳,翻 雅》本作「翿、翳 傳 本用《爾 曰 翳,以 纛」字,何用 之日 既 亦 》本作「翿,纛 以「翿」易 「翳」,又别 壽 引《爾 風 往往往 爲 翿 也,「 翿 雅 雅》「纛、翳 「翳」釋「翿 值 翳」,《 雅 有俗人據改者。 弱 翿 其鷺 雅 》釋詩、《 》作 野 野 並 》,中間 又 有作「纛」之俗字、寫《 翿 「纛,翳 引 爲 也。 弱 也。」 謝 也」,不作「纛、翳 」,復以「纛」易 也」,皆當作「翻」。 釋言》文。」 京 票 。 翳 翳, 」,然「翳」「翿 爾雅》二句 也。 也」,自是後 傳云: 若《陳風》經文,則本作 纛,翳 可省一「翿」字。 義 也 《周禮 後 相 也」,則詩文並 可 翿 人 承,故《説文》即 人因誤本改 也,翳 雖 知 句 多 · 弱 詳見《爾 「翿 是以 鄉師》「執 乎? 聲義 孔 識 也。 也。」正 也。 所 爾雅》者 翿 雅 而 若《爾 之。 《王風 見《 並 翿 古義 此 他 纛」及 同, 釋 傳 至 無 詩 爾 義 經 少

> 也」一句耳。 「翿」,不作「翳」,故傳亦止引《爾雅》「翿,翳

者。 **珙案**: 夏, 鄭司 也。 是旄舞並非 指 云: 葆幢,自是析 客之燕樂,正 此箋又謂 東學詩》曰: ·旄,旄牛尾,舞者所持以指麾。」此「翳」是羽 祭祀賓客,舞其燕樂」之文耳。 麾』。 《説文》: 燕舞 言 農云:「旄舞者,氂牛之尾,辟 箋云: 樂舞以羽 此説: 以 陳 自 羽 纛 祥 非是。 「翳,舞者 舞。 用 用 與 「《宛邱》箋謂 羽 羽 野, 野 道 旄舞,當以《宛邱》箋爲 舞也。 於 旌引二舞者,其説 爲 引《 按羽舞,析衆羽 燕樂,顧 《周禮 之, 春 也,所 所持 固 《周禮 其首。」故 秋》 非 樂師》「有旄 氏特 弱 旄 傳「 以 謂 人 舞 羽 旄人》注 以《旄 舞 所持 舞 不知祭祀賓 鄭 也。」「聖」下 舞 爲之,非 師 者 信矣。 以 雍 也 以 正。」承 題 所 以)° | |≪ 舞 旄。 以 持 云 麾 有 虞 纛 旌 以 而

麾,非謂旄舞也。爲「羽舞」。即《宛邱》箋,亦謂持羽葆幢以指

錢氏 非 悟敖游之訓即毛傳耳。 作訓,而但云「欲使我從之於燕舞之位」,豈 者,「游」謂 傳》文。此「敖,游也」,疑即所引毛傳,後來 類,其有單舉一義不著某云者,多係《故訓 舉或並 敖」即謂 傳訓爲「遊」,此「由敖」不應無傳。 各本皆脱,賴《釋文》存之。 周禮》之「囿游」也。 敖,五刀反,游也。」陸氏《詩音義》凡傳箋並 以 曰: 毛既訓「游」,不煩更釋乎? 右招我由敖」,案:《小雅》「嘉賓以敖」 引他説者,則著「毛云」、「鄭云」之 用燕游之舞相招。 「敖,游也。」因 燕游。「執翳」是舞之事,則「由 此 即本之《釋文》,但未 謂 毛以「敖」爲「游」 游處 箋更不爲「敖」字 爲「敖」,猶 嚴《緝》引 《釋文》:

揚之水

《詩》,不得謂天子之六師不用 《稽古編》以《集傳》謂周制凡有討 遠屯戍于母家」,固西周以前未有之事 卒伍之名,蒐苗獮狩之法,及成王踐奄伐 民而爲諸侯戍守者。 所言皆天子征伐諸侯之事,從未有 甚辨。承珙案:出征究與遣戍有别。 又周公之東征、宣王之南 師親征之明證,見於《書序》與《外傳》者, 夷,穆王征犬戎,共王滅密,宣王伐魯,皆王 典記,因歷舉《周官・大司馬》諸職所言偏 侯之師,王師 其民而遠屯戍於母 《序》云: 止衞王室,不以 「《揚之水》, 家,周 此《序》言「不撫其民 人 刺 征 出征,未 怨思焉。」 平王 以 北 征 伐,即 以 伐。 伐皆用 也。 畿 知 也。 經傳 見於 其説 陳 甸之 不 出 東 而 兩 何 諸 氏

揚之水,不流束薪」,傳:

「興也。

揚,

經,國 激揚 既 風・ 興,而於《唐風》仍不明所興之意。 案:若如《鄭風》傳義,則「揚之水」二句爲 惡」云云,取興與《王》、《鄭》二詩大異。 去垢濁,白石鑿鑿然,喻桓叔 政不行於臣下。」二篇興意略同。 急,而恩澤之令不行於下民。」於《鄭風》云: 水至湍迅,而不能流移束薪,喻平王政教 則此篇 水》傳云「激揚之水,可謂 激揚之水,喻忽政教亂促。不流束楚,言其 」,語意不貫 云「激揚之水湍 揚之水》則云「激揚之水,波流湍 也。」不 風言「揚之水」者三,不應異義。 興意當同。 言 興意。 鄭箋於此篇云:「激揚之 迅」,又云「不能流 正 不能 義 以 《鄭 流漂束楚 盛强,除民 惟以 風 而於《唐 • 疾,洗 承珙 移束 乎」, 鄭箋 經證 揚之 所 煩 反

台:『是子獨處鄉里,不與我來守申,是思之「彼其之子」,《黄氏日鈔》曰:「古注

情」。 天下理外之情,尚得爲情之正 既云「室家無同 國中不出戍之人而言。」是也。並不以爲室家。 謂行者思居者而言耳,許氏謙曰:「彼其之子,指留 者」,首章箋云「彼其是子,獨處鄉里」,此第 理,而詩人云爾者,思之情然也。」蔣氏悌《五 詞於處者,其實所思在父母妻子。」黄氏所謂 疏衍之,乃云:「役人所思,當思其家,雖 理。」承珙案:《序》下鄭箋云「思其鄉里之處 家,以國風事類考之,『彼其之子』凡五,未有 經蠡測》云:「《集傳》以『之子』指戍者之室 子,成人指室家 皆從之。 目其室家者。 戍申,言周人不當遠戍 言也。」至歐陽、程、蘇 「古注」,指此。 晦 菴《傳》獨從古注云:『彼其之 况征戍之人,初無攜室同 然實誤讀鄭箋而强爲之説 成之理」,而 而言。」夫室家豈有同戍之 ,則以爲國 也。 《詩記 又以 人怨諸 爲是「思之 行之 侯不 孔

之境。 《水經注·淯水》: 距 亹 信者,云故申城在鄧州 也。 不知,蓋緣誤本《通 縣,申伯之國。 西。」又司馬貞云:《 證《齊太公世家》注徐廣曰:『吕在 於申城,在南陽宛北序山之下,故《詩》云「亹 水,虞夏之際受封於吕。 證以《潛夫論》:『炎帝苗胄,四岳伯夷,或 也。」閻氏伯詩曰:「《詩集傳》云:『甫,即 王 四 城 申伯,于邑于序」。 之舅。」又云:「甫,諸姜也。」「許, 在鄧 今未知其國之所在,計亦不遠於申。』 不 申 與 、里有 州 既 我 不確, 南 戍 奇。 陽 吕亦在 申 縣 -__,傳: 典》謂 條宛西吕城, 吕遂茫然。 其密邇 西 地 四 宛西三十里有吕。」更 南陽縣北三十里,故 宛縣之西也。」三證 理志》: 7 所以《括地志》最 申在今鄧 明晰 申, 里。 姜姓之國 至此,而 然則 宜哉。」 申 四岳佐 在 州 南 信 兩 陽 南 諸 承珙 陽 朱子 或 禹 宛 陽 治 封 請 相 縣 可 宛 吕 姜 平

之耳 于 所 姓。 義云: 可 服,必求之申。 許與申爲唇齒,戍申必兼 城在南陽府西三十里,今名董吕村。 可 義》引《國語》史伯 不戍甫許。」此説非是。 是以爲賦,以禦北方。」」然則申吕相距必 吕。』《左傳》:「楚子重 案 : 田,申公巫臣曰:『不可。 姜。』《鄭 中。 弑 知 知。《一統志》:「申伯國在河南南陽府 也。」《竹書紀 既 ^ 周 申侯、魯侯、許男、鄫 「言甫許者,以其 此説於情事 然則平王戍 重章以變文,因借 語 語 **>** 富 史伯 申吕方强,其隩 辰 年》: 曰 此三 曰 似 : 日 近。 王 請 或 申息爲 幽 齊、 同 當成 戍甫 甫 此 取 子立 欲殺太 至《 王 出 許,今河南許州。」 許 許、 申吕所 於申吕 + 以 集傳》以 周者 許。 四 以 南北門户 愛太 故 其 南陽縣 申、 岳,俱爲 言 年爲 子以 太 助 申, 何氏《古 以 子 吕 子 以 南 己 , 附郭 邑也 爲 其 由 宜 亦 成 爲 而 犬 有 ´, 甫 戎 伯 近 申 咎 正 賞 大 必 實 姜 申 吕

雜引他説,●鮮所折衷,獨此條所見甚確。非楚邑,當以在宛縣爲正。」王氏《詩考》往往云:「汝南新蔡有大吕亭,故吕侯國。」《輿地云:「汝南新蔡有大吕亭,故吕侯國。」《輿地州之方城内,非平王時之申矣。又《郡國志》在信陽軍,則梁氏益謂是楚靈王所遷在信陽

聲。」是 知古人同字異義,無煩改音也。」承珙案: 之聲不與「戍許」相協,箋義爲長。」今則二 「蒲」之音,未詳其異耳。」盧氏《考證》曰: 周 説文》:「蒲,水草也,或以作席。从艸,浦 ·蒲」讀上聲,故以傳爲不協,箋義爲長。不 孫毓以『蒲草』之「蒲」讀平聲,『蒲柳」之 蒲,蒲柳。」《釋文》引:「孫毓云:『「蒲草」 「不流東蒲」,傳:「蒲,草也。」箋云: 則蒲草 職 方》「其澤藪曰弦蒲 讀從「浦」聲,正 與「許」協。 」司農注:

> 乎 ? 聲既分以後,未足以評毛鄭也。 所以異。 品 皆可與「許」協,安見必爲 蒲,或爲浦。」「堯時萐莆生庖 脯」,或亦作「蒲」。 一別,殊屬謬説。 孫毓朋王難鄭者,此字獨從鄭箋,强 然即「蒲草」與「蒲柳」異音,亦在 陸作音義時,已不能詳其 古無四聲,「蒲」「浦」本 蒲柳乃協「許」韻 廚。』《論 衡 》作 四 牛

中谷有雅

澤,非陸草也。魏博士等以爲菴閭。《本草》符中,傷於水。據《本草》,充蔚正生海濱池云:『菼,鵻。』考《本草》諸書,充蔚子並無云:『菼,鵻。』考《本草》諸書,充蔚子並無一一年谷有蓷」,傳:「蓷,雖也。」馮氏《名

^{) 「}他」,原作「地」,據《續經解》本及廣雅本改。

訓絶殊,皆與「蓷」無涉。 之「蓷,鵻」、「菼,鵻」,其字皆當作「隹」,馬 自當衹作「萑」,以别於「藿」,「萑」十頭 「萑,艸多皃。从艸,隹聲。」職追切。二字音 艾蒿,高二三尺,亦 菴 毛氏何嘗以蓷爲菼乎? 人所加。 毛傳『鵻』字同,後人輒加『卄』頭耳。 菼,亦 以云爾。」《説文》:「蓷,萑也。 菼, 騅 説文》:「茬, 薍也。 生」,各本皆誤。 釋草》曰:『萑,蓷。』蓋《爾 詩》曰『中谷有蓷』。」段氏注云:「『萑』當作 「蓷」 名『鵻』,皆謂其色似夫不也。」承珙案: 生雍 相 也」、《説文》之「刻,一 亂 毛傳於《大車》訓「菼,鵻也」,恐其 州 ,故又申之云「蘆之初生者也」。 111 谷 及 《王風》傳曰:『蓷,鵻。』 E 無『蓷』名。 黨 从艸, 在聲。」胡官切。 且《爾雅·釋言》之 《爾雅》之「在,蓷 道 邊, 雅》本作『隹』,與 曰騅」,及毛傳 春生 从艸,推聲。 不知古人何 苗 固後 葉 如

> 《韓詩》及《三蒼》悉云益母。」嚴《緝》據《本 未必能久浸於谷中之水而不菸也 生。即如菴間,在《子虚賦》亦卑溼所生,究 草固生於下溼,若谷中,水之所注,亦不能 非。不知蘇頌《圖經》又言「充蔚,今園 愈烈,色愈鮮。」則其性不宜水可知。 又云:「益母草在野甚多,最能任酷 田野極多」,是不必 草》益母生海濱池澤,以毛傳「傷水」之説爲 旁、 云:「舊説及魏博士、濟陰周元明皆云菴 鳥旁亦皆轉 寫 所 盡生水濱。 加 耳。 至正 王氏《總 義 引陸《 且凡 烈。 圃 聞 疏 隰 H 及

引《詩》「灣其乾矣」。是則詩本作「灣」,不作並不引《詩》。惟《水部》「灣,水濡而乾也」,下訓「乾」,但引《易》「燥萬物者,莫暵乎火」,「乾」爲乾燥、「溼」爲卑溼。不知《説文》「暵」谷中,傷於水。」諸家皆誤認「暵」字,故以何,暵其乾矣」,傳:「暵,菸貌。陸草生於

其初。

此由泥於乾燥卑溼之義,而

傷,始則溼,中而

有薄厚。J孔

疏

作「脩」,訓「敝」,與此義略同。

爲草

病之狀。

間也。

病,則或成槁瘁,或成浥爛,皆有菸鬱之形 中,水之所注,庶草所不能生。既傷於水而 傳又以爲「陸草生於谷中,傷於水」。蓋谷 次章「脩」爲「且乾」者,又介於槁瘁、浥爛之 義可該,故傳以「玂」爲「菸貌」,並非如 謂浥爛,百草經此皆菸邑而無色。 「乾」、「脩」、「溼」皆以「暵」言之,則必非「乾」 《豳風》「予尾翛翛」傳云:「翛翛,敝也。」翛,定本 乾固菸貌,脩與溼亦皆爲菸鬱 衍之云,先舉其重,然後 然經文承上「中谷」言之,故 脩,久而乾,有似君子於己 箋於末章云:「 艸,於聲。 乾謂槁瘁,溼 云「菸貌」者, 不 知 觀經於 其 倒 鵻之 日 「暵」 本 同 婑 當如「外强中乾」之「乾」,謂菁華已盡,乾竭 乙。」「乙,物之達也。 徒存。許書此種訓義最爲微妙。毛傳於三 字从水,説其本義。此「乾」與「乾燥」異義 脩」、「其溼」二字相連也。《説文》「玂」不同 連上一字作形容之詞、非以「其乾」。「其 而薄。 本作「濕」。《水部》:「溼,幽溼 人也。从土,㬎聲」,則是與「乾」對稱者,字 「溼」。《説文・乙部》:「乾,上出 章云「鵻遇水則溼」者,此「溼」亦非「乾溼」之 「暵」但訓「乾」,而曰「水濡而乾」者,以「鸂 其」與「嘅其」、「條其」、「啜其」,四「其」字皆 之形耳。蘇氏《詩傳》以爲 燥其溼者,以爲旱由漸 廣 **涪」訓「幽溼」同。** 》:「鬱,幽也。」「幽」與 李《解》、嚴《緝》皆從之。 幽」即敊爲 **倝聲。」《土部》「濕,下** 而甚,興夫妻之以 先燥其乾者,終更 「鬱」同義,是 幽 然經文「暵 未之「幽」。 也。」此 也。 从 與 漸

之但訓「燥」也。

也。」菸鬱者,兼乾與溼言之。

(説文》:「菸,鬱也。

从

暎」。

可

知毛傳

亦必

作「薦」。

然遇水則溼,凡物皆然,尚何待於故訓乎。 菸邑而無色。」此其義也。 兮,獨於邑而煩惑。」在物則爲「菸邑」、《楚辭・九辨》:「葉 故在人則爲「於邑」、《後漢書 溼者,失意潛沮之名。」蓋人憂鬱謂之溼,物幽鬱謂之溼, 溼」亦 當 爲菸鬱之貌、《方言》: 與泛言乾溼者不同。 馮衍傳》: 溼 「日曀曀其將暮 ,憂也。」注 굸: 不

字相連爲義。 矣!」《説苑》同 《詩》皆作「何嗟及矣」,然《外傳》引孔子曰: 誤倒矣。 詳玩箋語,經文當作「嗟何及矣」,「何及三字文 其君子棄己:嗟乎,將復何與爲室家乎!」 義相連,「嗟」字自當在句首。 本皆然,從來無人是正。 不慎其前,而 何嗟及矣,是决绝之語。」可知孔所見本已 何嗟及矣」,箋云:「及,與也。 《韓詩外傳》二、《説苑·建本》篇 ,無「嗟乎」二字。 而所引《詩》仍作「何嗟」,亦皆 悔其後。 傳寫者誤倒之。今各 《序》下正義 嗟乎,雖悔 是正 以「何 泣者傷 及二 無 云: 及 引

> 字當在「何」字下,非今本誤倒。 嗟及矣」,而未檢所引孔子語,遂以「嗟」爲句中 傳 寫 誤倒。 王氏《釋 詞 》謂 《韓 此説非是 外傳 家兩 引 《詩》皆作 語助, 一何

兔 爰

矣。 蔡、衞、陳伐鄭 范氏《詩瀋》曰:「《後序》以此爲桓王詩,朱 禍患之興,稠沓如此,不如無生之爲愈也。」 子初説,後作《集傳》仍用此語。 事;及我生之後,而逢時之多難 子不詳其世。 「東遷以來,至于桓王伐鄭之時,近七十年 見西周之盛,故曰方我生之初,天下尚 生焉。」《吕記》引朱氏曰:「爲此詩者,蓋 諸侯背叛,構怨連禍,王師傷敗,君子不樂其 我生之初,雖時已亂離,尚未至此。 《序》云:「《兔爰》,閔周也。 考桓 一事見《春秋傳》,他無 王在位二十三年,惟率 戴氏《續詩記》曰 如此。」此朱 桓王失信 所考。 及 無

》曰:「陳啟

桓王伐鄭,一

用兵,而遂

爲

矣。

庇仇,戍申戍許,征役不息,非『逢此百罹』、 十年,又歷幽至平至桓五十餘年,則是八十 王失信,王師傷敗,君子不樂其生』。 其人自 初,正當宣王中興,爲西周之盛,我生之後, 細繹之,非痛定之思也。 若東遷已定,民方安集,不至於如幽 王時,遇此君弒國亡之亂,故言『逢此 |王時詩,不必拘定平王。 豈經幽王之亂,反安然不憂,至此 後,戎患未息,平乃靦 源辨朱《傳》『我生之初, 至犬戎入寇,王死驪 ,即在宣王中興 爲,我生之後 幽王之初年,周室 、辨録》曰:「此篇 百憂乎?」翁氏 《序》謂『桓 蓋我生之 逢此 Щ 顔 若此。 時。 邪?」承珙案:諸家皆泥於「生初無 時。」即此「尚無爲」之義矣。 西周之盛; 事而言,故以《序》云桓王時 衰。』尤足 拍》亦云:『我生之初尚無爲,我生之後漢祚 其詩曰:『宣和七年冬十月,尚是中 連禍之甚,則雖屬東遷之始,而尚 只是概論中國諸侯之不臣,未有若此 以愚度之,所謂『我生之初,天下尚無 十歲,尚從征役,無是理也。』此言甚 十五年。 王十三年,距西周六十四 天下尚無 王 風》次平王諸 其 曰 陸務觀生於北宋末戎馬倥偬之際, 如朱子之言,則此人作詩時 「王師傷敗」,指繻葛之戰, 事』之説,云:『《序》以 相證,豈 而 以 爲 詩之後。 亦 幽王時者,又不應列 必 其 年,距宣王之崩 者,其人不及 生於東 故《虞東學詩 蔡文姬《十八 此 不至 爲」指 漢 · 原 爲 時構 ぶ事』者 應八 辨。 事

百罹」。

正當幽

當是幽

「逢此百凶」乎?」《毛詩明

禍始

大劇。

東遷以

尚平,故

生

初無爲。

百罹

。」則明爲平王詩也。

在

栢

九

桓

Ŧ.

《詩》曰

:『我生之初

尚 無

之甚。

序生

初猶及見西周之盛

盛

時

於

見

時

而

無

事

傷

敗

怨

難,轉憶少不更事之時爲足樂耳。 不必較量於平桓之世,而皆可通矣。 無用,亦猶無爲也。 造」傳云:「造,僞也。」三章「尚無庸」傳云: 無爲者,言不識不知,無所事事。 之云:「言我幼稚之時,庶幾於無所爲。」是則 之初尚無爲」,傳云:「尚無成人爲也。」箋申 失信』云云。 是亦以爲平王時詩。其實皆不必然。「我生 簡劄失次耳,因此《序》言『桓王』,下《序》言 庸,用也。」僞,即爲也。相臺《五經》本「僞」作「爲」。 我生之初」但自言其幼時,並不繫於時代。 平王也。 此與上 若不用衍序,則篇次相從正 疏謂《兔爰》本在《葛藟》之下, 篇俱爲閔周, 蓋因長大之後,多歷 而 衍者綴以『桓 如此説,則 次章「尚無 得。」 艱 但 王

心之不均。」箋云:「有緩者,有所聽縱也。|事爰,緩意。鳥網爲羅。言爲政有緩有急,用|「五日,有兔爰爰,雉離于羅」,傳:「興也。爰| 有

中。 也。」或謂 爲急矣。雉言在羅 民之視聽 而不動以死。 「百凶」乎? 有不至於大亂者,非所 蹙者,正義云定本作「操」。 師古注《漢書·蕭 曰:「爰爰,發蹤之貌也。」「蹤」當作「縱」,顔 聽縱者,謂解放之。《 一急之物,故知喻 「操之已蹙」之義。《釋文》既音七刀反,又云今作 而放之也。」箋云「聽縱」,與《韩詩》義同。 有急者,有 躁」,與箋義合。非是。正義曰:「兔言緩,則 於不知耳,原非如士燮、叔孫婼之祈死 解縱 無 則法制 政有緩急,未爲大害,何至於欲 所 所從,手足無所措 且「尚寐 躁 不知政刑乖舛,皆由于緩急失 蹙 日隳,操切則禁防益 也。」 何傳》曰: ,則兔無拘制矣。 政有緩急、王心之不 無 案 : 謂「百罹」、「百憂」、 切經音義》引《韓詩 吡」者,不過欲付世 此 此即《公羊傳》 箋 發縱,謂解 ,百弊叢 申 舉一緩 厲,斯 傳 生未 意 寐 均 紲 雉

耳。近世釋以爲欲死者,過也。」欲『無吼』、『無覺』、『無聰』,付理亂于不知故《黄氏日鈔》曰:「人寤則憂,寐則不知,故

葛 藟

傳》: 比 庇 則《序》説與《左傳》合,無可疑者。 公族,公室之枝葉也。 室道衰,棄其 記》曰:「《序》云刺平王棄九族,故三章皆言 者」,於葛藟取興之意殊不親切。 『終遠兄弟』。 世衰 廕矣。 ,况國君乎?」杜注、孔疏皆引此詩爲證, 《序》云:「《葛藟》,王族刺平王也。 宋昭公欲去群公子,樂豫曰:「不可。 民散,有 若作 葛藟 族親 九族焉。]案:春秋文七年《左 流 猶 棄 民 能庇 其鄉 爲兄弟,是此句實陳 失所解 其本根,故君子 若去之,則本根無所 里家 ,則應首二章自云 族 而 翁氏《詩 流 《集傳》謂 離 ·以爲 失 棄 周 九 附 所

章皆以『遠兄弟』爲説也。」與『謂父』、『謂母』、『謂昆』義相比協,不宜三『遠其父母』,而末一章乃云『遠其兄弟』,方

受王恩,葛藟之不如。宋胡氏旦反其説,以曰:「箋疏本謂葛藟得河潤而生長,興己不「緜緜葛藟,在河之滸」,陳氏《稽古編》

取之。 此言藟名燕薁,與陸《疏》云「藟名巨瓜,似燕薁」者微異。 之證。 然云「好生河滸邊 恩惠以育子孫,今王無澤於族人,不如葛藟生 哉?」承珙案: 河之意,而曰「葛藟能庇其本根」,則非生 莫」,反足爲葛性好水之一證。 覃》篇言『中谷』,谷者,《爾雅》以爲水注谿之 所。 名,其近水更甚於河滸。 生,不言所附之木必在山不近水也。 若『樛木』、『條枚』、『蒙楚』,止言其 縣縣」,夫物生縣 地之喻,明矣。《太平御覽》引《毛詩 葛 名燕薁籐,好生河滸邊,得水潤而長,喻王九族蒙王 又引 然案之文七年《左傳》所言,雖不 然所引諸詩,惟『旄邱』誠爲高阜耳。 宜 他 生 詩 邱 」,與《别録》「千歲藟不生大山川谷」合, 胡氏 詠葛藟 陵 不不 緜 此 宜 語 説、《吕記》、嚴《緝》皆 不絶,安見其不得 生 ,以爲葛性喜燥惡溼 水 詩言『萋萋』、『莫 畔 又此詩 以 題綱 河滸 喻 附木 至《葛 己 邊 ·見在 亦 之失 也。 不 云 而 地

> 義。 Ш 非水中,正葛藟之所託以生者。 而生之,亦所 解》又引王氏説,謂水所盪危地 云: 則 非 谷邱野,而不生於水厓,吾不信也。」李《集 性 此則節外生枝,殊可不必 河滸、河涘、河漘,乃近水高出之地 不 宜 水 可 以 知 自 姚 固。 氏 陸 識 氏《 名 埤 解 也 而曰必生於 雅》即 ,潤澤葛藟 亦 駁 用 胡 並 其 說

説 蘇 人,是謂他人爲父,《吕記》所引 者,有二説焉。 我,亦無顧眷我之意。」後儒 己父。族人尚親親之辭。」其下「謂 寡於恩施,今已遠棄族親矣,是我謂 已相遠矣。」箋云:「兄弟,猶言族親 亦莫我顧」,箋云:「謂他人爲己父,無恩於 風王以一本之義,嚴氏粲、郝氏敬、張氏彩 氏之説是也。 終遠兄弟,謂 然指斥過 説斥 他人父」,傳:「兄弟之道 主 甚 不 解 一、恐無 ·愛其 此 王氏、李氏 ,異於箋疏 親 是 他人父, 他 也。 理。 而愛他 人爲

誤。 弟』、曰『從父昆弟』、曰 母 未有「無恩」之文,安得云又哉?」謂有父道者,必兼 記》曰:「又者,繫前之辭,所以又上箋『無恩於我』也。 箋疏以「父」、「母」、「昆」皆指王言,蓋九族之 自其親疏言之,謂於王疏 云:「小功以下 次章箋云「王又無母恩」,此本箋語,正義標起止不 已遠我,雖謂爲父,而亦如他人之莫我顧矣。 他人爲父,尚安肯顧 則雖戴王爲父,而不異謂他人爲父矣。 戴王,本所謂天地父母者,乃王已遠棄族親, 母,直自視如他人之父母,亦於理不 之説是 「已」,正與「亦莫我顧」「亦」字相呼應,言王 道 今各本脱去句首「箋」字,遂屬之傳文,非是。 雖 也。 疏必曰昆弟,親親之辭也。 也。 三章 此 則謂 爲兄弟。 傳云:「 王不 我乎? 『從祖昆弟』、曰『族昆 顧 昆,兄 篇中言『兄弟』者, 也。 兄弟,即 《喪服》曰『昆 傳訓「終」爲 也。」段 此詩 是 順 不 夫謂 懋 《校 自 顧 堂 稱 惟 父 傳 勘

> 則他人,親親之道微矣,所以 各異之處曉然易明。 弟」爲族親之義。《將仲子》「畏我諸兄」傳云:「諸 得循九族之稱也。」此説甚 后作民父母,况九族之親乎? 公族。」亦是謂 曰『兄弟』,謂 兄弟」,而其下文「謂父」、「謂 小功以下爲兄弟也。 王. 日『昆』,不 陳氏《稽古編》曰: 敢 精,足明箋以「兄 爲刺 且. 以 母」、「謂昆」, 名雖父母 於 其戚 也。」 每 章 戚 君 元 兄

采 葛

言「不見」,正懼讒隱微深切 聽讒、晉風・采苓》之詩亦 鈔》曰:「《詩傳折衷》載晦菴新説 中明言及之,與此篇 近人情,而不反古。」或謂《采苓》刺 入必乘其間 《序》云:「《采葛》,懼讒 ,故曹氏 不同。 引古語 之語。 以 承珙案:此詩三 云: 比 也。」《 聽 『一日不 讒。 蓋讒言之 聽 黄 采葛 讒,詩 氏 此 比 日

奏之。 見君爲三歲。」此皆足以申明古《序》之義。 詩人懼人之讒,至不敢去朝廷,故以一日 郡,疑張湯也,京房不敢離左右,疑石顯也。 日,上之」。 讒之。」如上官桀等謀譖霍光,「伺光出沐日 解》曰:「小人譖 朝 非爲 其 其 弘恭、石顯欲譖蕭望之,候望之出 懼 容 ·讒,亦足見情疏之易間。」李氏《集 刀, 范氏《補傳》曰:「汲黯 即 人,多因其不見,則 ^ 孟子 * -暴十 寒』之 不願 乘間 喻 不 之 沐 而

矣。或言采之地,則以地取義,『沬鄉」、『新見於君,憂懼於讒矣。」《吕記》云:「毛氏所見於君,憂懼於讒矣。」《吕記》云:「毛氏所見於君,憂懼於讒矣。」《吕記》云:「毛氏所謂『事雖小」,蓋通三章言之。葛之『爲締結』,蕭之『共祭祀』,艾之『療疾』,特訓釋三時,之。葛、所以爲絺綌也。事雖小,一日不「興也。葛,所以爲絺綌也。事雖小,一日不「興也。葛,所以爲絺綌也。事雖小,一日不

以攻疾 久 而 采葛所以爲 變亂黑白,無所不至,所以可懼在此。 屬奉公而暫違君側 言采此三物皆爲有用,獨人臣出使於外,本 萊非之太過。」承珙案:毛傳三「所以」字,蓋 出,末章爲急事使出,亦非穿鑿之見也。 申其意,以首章爲小事使出,次章爲大事 簡,兹獨詳焉,良以興義攸存,不容略爾。 無他詞焉,則義在葛、蕭、艾三艸矣。傳文至 盈一匊」之類是也。 之『春日』,薇之『柔止』、『剛止』之類是 或言采之事,則以事取義,『不盈頃筐』、『不 田」之類是也 詩傳》曰:「朝有 也。」此説申傳,似勝於箋。 有讒之者。 病耳,雖事之無疑者,猶不敢行,畏往 締絡、 采蕭所以 是以 或言采之時 讒 一日不見君,而如三月之 ,則讒説遂行,顛倒 《采葛》之詩言采之外, 人,則下 供祭祀、采艾所 則 至箋本以 东 以 敢 時 有 取 是非 所 蘇氏 義 采 也 東 使

通。真瞽説矣。 使,黄氏震乃云采葛非人臣之事,於情事未等喻使事之小大緩急,初非真爲采葛而出

大 車

古 諸儒特以「豈不爾思,畏子不敢」二語,以爲 盛,而必陳其後之不能革心者以爲古歟? 夫詩人既欲陳古,何不直陳文、武、成、康之 變風、變雅中凡詩詞之美者多謂之「陳古」。 遷之時而已。」承珙案:此説非是。 能革其心,與《行露》之詩異矣,亦僅 其在文、武、成、康之後歟? 蓋惟止其奔,未 男女之訟焉。」《吕記》云:「此所謂『陳古』, 陵遲,男女淫奔,故陳古以 免而無恥,特政刑之效耳。不知此正 發乎情,止乎禮義」者,詩人抑揚之詞,何 《序》云:「《大車》,刺周大夫也。 范氏《補傳》曰:「 據詩所陳,當禮 刺今大夫不 《序》於 勝于東 所 能 聽 禮義 可

> 也。」此説得之矣。 也。」此説得之矣。 也。」此説得之矣。 也。」此説得之矣。 以此説得之矣。 也。」此説得之矣。 以此説得之矣。 以此説得之矣。 以此説得之矣。 以此说得之矣。 以此说,此说,此言言

然,服毳冕以决訟。」箋云:「古者天子大夫 其出封五命,如子男之服。 引曹氏曰:「毳衣,冕服也。 服毳冕以巡行邦國,而决男女之訟。」嚴《緝 日 王祭禩則服之、未有服以聽訟者。」陳氏啟 夫之車。毳衣,大夫之服。 「毛謂 「大車檻檻,毳衣如菼」,傳:「大車,大 服毳冕以 聽訟,●當本於師 享王於廟,及助 天子大夫四 乘其大車檻 説 檻 源

❶ 「聽訟」、《經解》本《毛詩稽古編》作「决訟」。

之服 乘此 巡邦 衣使者」之比。 如漢遣直指使者衣繡衣巡行郡國,稱爲「繡 古 制 ,必有見也。」承珙案: 毛意亦衹以大 車、服 也。 國 爾 一块獄弊訟,故因 耳 此 康 服 成 不必泥於毳冕助祭而非 而來者,爲出封聽訟之大夫, 好 以 禮 車服 一》釋《 以指 詩 目其 而 不 人,謂 聽訟 夫 易 出 此

冕之服 又據《説文》『秭』字之訓 子》云『被褐』,皆以爲賤服,大夫安得服之? 别是一物,非 『菼』作『剡』,云『帛騅色』,『璊』作『璊』,云 玉」字。 左傳》云『褐之父』、《孟子》云『褐夫』、《老 以 毳爲綱」。 此 毳 似之而實不然 以絲爲之,毳 陳氏《稽古編》曰: 衣如 **元**義冕。 故《埤 璊」,傳: 雅》據此 衣以毛 李彭 璊 也。 ,則稱即毛布矣。 Ш 「《説文》引《 赬 、馮 布爲之,名同 毛布者,褐 爲説,謂『毳衣』 也。」「顏」下 嗣宗亦謂 也。 詩》 ·當脱 既 毳 實

> 詩説。 《周禮》注爲 聲。 注以 但西胡毳布,究未 **瀱爲璊,則引《詩》「毳衣」自當同大鄭《周禮** 衣如瀱。」此所據 謂 義乎?」承珙案:《説文》:「璊, 如虋,故謂之璊。 **瀱,帛騅色也。** 毳 《詩》曰:『毳衣如璊。』」《説文》既以 毳衣爲罽衣,與毛異義。 衣 蓋謂罽衣之騅色如綱帛之騅色耳 爲 毛 正耳。 布 之衣 从糸, 剡聲。 虋,禾之赤苗也。 小必以 亦與 而 毛傳 爲冕服 又 日 不 如 其《糸部》云: 《詩》曰:『毳 同,疑皆三家 ,則當以後鄭 毛 以 布 毳爲繝,色 从毛, 滿 有 此 毳 文

然則周法始合葬也。 「『合葬,非古也。 乃使夫婦之禮有 室,則外内 此章言古之大夫聽訟之政,非但不敢淫奔 穀則異室,死 . 異,死 則 自 别。」正義 神 周 則同穴」,傳:「生在於 經稱『死則同穴』,則所 合同 公以來未之有改也。』 爲 引《檀弓》曰: 也。」箋云:

有本。 云: 臺,逢於何欲葬其母於其牖。 葬以同穴者乎。《晏子春秋・諫上》:景公成路寢之 后之葬。 之正禮。 體。《詩》云:『穀則異室,死 定陶恭王 之禮自周 陳古者, 書》哀帝太后 「穀則異室,死則同穴。」此亦謂是夫婦之正禮也。 若係 陳 此詔 而 且天下有生不得爲夫婦,而死可合 興焉。」此 周 引此 淫 公以 丁氏 與毛義正合。箋疏之言,皆爲 奔者約誓之辭,何至用以 詩,足知詩所陳者,必夫婦 來賢大夫。」承 崩,上曰: 西京詔書將 晏子言之,景公許之,引《詩 則同穴。」 「朕 以 珙 聞 太 案 夫 后 附葬 合葬 比 婦 **^** 太 漢

邱中有麻

聲,故或疑許書脱「劉」篆,或疑「鎦」之「卯」《説文》有「鎦」無「劉」,然「藰」「瀏」皆从劉引曹氏曰:「留,本邑名,其大夫以爲氏。」「彼留子嗟」,傳:「留,大夫氏。」嚴《緝》

《路史》以「留」爲國名,唐堯長子 内 北 云:「合水北與劉水合。 氏縣劉聚,周大夫劉子邑。

《水經·洛水注 大夫留氏之邑。《漢書· 即劉累故城。 失其爵邑乎?」承珙案:《括地志》云,劉 子采地,是爲劉康公。豈子嗟之遭放逐,並 周邑氏也。 堯之後,●在夏世已有劉累,其來 「留乃東周畿内邑。 妘姓,漢地隸彭城。 之别體,「鎦」又省作「留」,故留 下本作「刀」,轉寫譌「 劉子 流注於劉 國,故謂之劉澗。」諸 厥後八十餘年,而留邑復爲王季 聚,三面臨 蓋在夏爲劉累邑,在周則 緱氏縣有劉聚者,是若 陳氏《稽古編》駁之曰: 田。 澗。 水出半石東 地理志》:「河 在 竊意 緱 所 氏 舊矣,不以 氏 監明之後, 劉 西南周畿 言皆合。 即 即 Ш 劉 爲 南 一, 西 氏 鎦 緱 周 聚

● 「若」字、《經解》本《毛詩稽古編》無。

《春 《水經•渠水注》所引孟康曰「留,鄭邑也,後 要皆以邑氏 采於此。 者,皆不足以證《王風》之「留」也。 城之留,則《左傳》襄元年楚子辛侵宋、吕、留 爲陳所 至蔡仲省留 △「古者鄭國 其稱劉何? 秋》劉康公見成十 劉摯、即劉獻公。 并,故曰 雖未知其即子國、子嗟後人與否, 者。 而爲宋所執,此則地與宋近,即 以邑氏也。」若桓十一年《公羊傳》 處于留」,及「遷鄭焉而 陳留」者。 襄十五年《公羊傳》云:「劉者,❶邑 劉狄,即伯盆,獻公子。 年。 之後 至《路史》所云彭 有 劉 夏、 野留」, 皆食 襄 十五

記》,以毛爲附會。善乎,李氏《集解》曰:歐陽《本義》謂其人其事不見於《春秋》、《史無異説,亦必其時古籍尚存,有可徵信者。承珙案:不但毛公必有所據,鄭箋從毛,並父。正義云:「毛時書籍猶多,或有所據。」

書 ? 子嗟之父,不應同時見逐,又不應先思其子。 邱中有麥,著其世賢」,則是引父以顯子, 秋》、《史記》中求之也。」至正義云:「子國是 其奕世有德,遂言及子國耳。 放逐皆言子嗟耳。❷ 今首章先言子嗟,二章乃言子國,然則賢人 嗟所治,非子國之功也。二章箋『言子國 『麻麥草木,乃彼子嗟之所治。』是言麥亦子 耳。」此疏善達傳箋之意。 思子國也。 去之,或王惡子國,先去子嗟,使之不安其 「先言子嗟而後及子國,或王惡子嗟,並子國 此 猶《陳風》所 蓋詩 中所 卒章言『彼留之子』,亦謂子 謂了子 陳便是實事 但作者既思子嗟,又美 仲 之子」, 姜氏《廣義》曰: 跡,不必於《春 故首章傳曰 豈 必求於他 嗟 使 非

[「]者」下,阮校本《春秋公羊傳注疏》有「何」字。

[「]皆言」,阮校本《毛詩正義》作「止謂」。

子後父,皆非也。」位。説者乃云無父子並斥之理,又曰不宜先

來之時 下同。」正義述毛云:「彼留氏之子嗟,其將 又《釋文》云:「將,王申毛如字,鄭七良反。 每正文一字,釋者重文,所謂長言之也 本以疑之矣。若以毛鄭皆重文爲疑,則傳箋 往往爲人所改,江南者多善本。 臧玉林曰:「此詩三章,章四句,句四字,獨 施』重文,疑江南本誤。 駉駉牡馬」等。 ·噂噂」、『沓沓』,皆是。」承珙案: 臧説是也 潰潰」,《十月之交》『噂沓背憎』,傳箋云 邶·谷風》『有洸有潰』,傳箋並云『洸洸』、 `將其來施施」五字。《顔氏家訓 南 將其來施施」, 施 本悉單爲「施」」,又以 然。」此所謂讀 則此之單爲『施」,不得據 傳:「施施、難進之意。」 然顔氏所述江 「將」如字也。 如「有杕之杜」、 傳箋皆『施 ·書證 北本 河 篇》 北 如

> 反也。 之「將」,訓當爲「且」,非訓 其將來食」,是鄭意讀 來,正《序》所謂「思」也。 子無怒」之訓「將」爲「願」,「將其來」者,願其 依此,則 反」,是謂鄭訓「將」爲「請」。 然次章箋云「言 來」矣。 竊謂 經文當作「其將 毛讀「將」如字者,猶《氓》詩「將 如《簡兮》「方將 《釋文》云「鄭七良 來」,不應 爲「請」而讀七良 作 將 其

·略 説 之,麥以食之,又有李焉,且皆邱中植之,則 則邱中有李,又能使人不盗也。」承珙案: 此 子産相鄭,桃李之垂於街者,莫之援也。 曰:男子畝,婦人桑之謂『思」。 留子之政脩矣。此人之所 氏之子所治。」陸氏《埤雅》曰:「言麻以 最 同 合詩旨。 邱中有李」,箋云:「邱中而 其人必 篇中思人愛樹之意 能 勸農桑、教樹 以思也。《法言》 吕子曰 ,與《甘棠》 有李,又留 衣

毛詩後箋卷六終《古義》乃以陸説爲不識比興之意,過矣。《古義》乃以陸説爲不識比興之意,過矣。

毛詩後箋卷七

涇 胡承珙

緇衣

鄭

《緇衣》之賢者即指武公,並非别有武公所好 之賢。至箋《詩》更一本《序》傳改衣授粲皆 黄氏 願改制授之以新衣。」是鄭注《禮》時,本以 後世開東閣之比。」此則詩中「適子之館」, 衣緇衣者,賢者也,宜長爲國君。 無此文義。考鄭注《禮記•緇衣》云:「言此 「子」指武公,「授子之粲」,「子」又指賢者, 公適館而還,以所得王之廪粟授之賢者,猶 能有其國者,由善善之功,遂以『授粲』爲武 云:「序《詩》者發明其意,以武公之德,所以 云"「周之國人以鄭武公父子善於其 於其職」者。朱子之解不誤。范氏《詩補傳》 箋云:「善善者,治之有功也。」蓋即所謂「善 善而天子善之,亦就其文爲説耳。」承珙案: 在此位,故作此詩以美之。」此説是也。 [震曰:「明善善之功費 解,朱 其衣敝,我 云武公有 (職,宜 其又

周人愛武公而致其惓惓之意,其義甚明。

所作而附於《豳》,何不可之有。嚴《緝》云《破斧》、《伐柯》、《九罭》,皆周大夫陳氏《稽古編》謂若周人之作當入《王風》,則

是也。

又云:「依《釋文》作『飧』,《禮》『公飧

五牢以下』之類。」承珙案:此説非是。

飧

餐」音義皆異、《魏風

伐檀》「不素飧」與

氏《詩小學》曰

:

「此假借

也。

粲、、

餐

同

.部。

内有 館兮』。彼二者與此『次』爲一物。」是也 府,次舍之衆寡。」注云:「次,諸吏直宿,若 也。」承珙案:《周禮・宫正》:「比宫中之官 焉。』注云:『内,路寢之裏。外,路寢之表。 諸 今部署諸廬者。」疏云:「此『次』謂若《匠 正謂天子宫内卿士各立曹司,有廬舍以治事 九室如今朝堂,諸曹治事之處也。 箋云:「卿士所之之館,在天子之宫,如今之 云『外有九室,九卿治之』,即《詩》云『適子之 九 廬也。」正義引《考工記》説:「『王宫之制, ´卿。』彼言『諸曹治事處」,此言『諸廬」, 九室,九嬪居之,外有九室,九卿 適子之館兮」,傳:「適,之,館,舍。」 六卿三孤 朝

亦隘

次章傳云:「好,猶宜也。」正義於「蓆,大釋經「宜兮」,蓋訓如「象服是宜」之「宜」。故也。」承珙案:毛於首章「宜」字無訓,但云也。」承珙案:毛於首章「宜」字無訓,但云三、《釋詁》文。言服緇衣者,大得其宜

還予授子之粲兮」,傳:

「粲,餐也。」段

《周禮・掌客》「上公飧五牢以下」,乃待賓客

「不素餐」分言,甚明,傳何至訓「餐」爲「飧」。

之禮,武公人仕於周,初非朝王爲客也。

傳云:「諸侯入爲天子卿士,受采禄。」則

「粲」者所包甚廣,不必沾沾

飯。

李《解》引

土氏,又泥於「粲」字,以爲粟治之精,於義

亦通 已,雖其 廣多也。蓋於卒章致其殷勤,尤爲 傳「蓆,大」之訓義 也」,仍蒙首章「宜」字,以爲大得 宜世居卿士之位者也。 ,而文義稍迂曲。 也。《説文》云: 衣大多,猶恐其敝 正相 《釋文》引《韓詩》云 足。 蓆,廣多也。」此 而 大,即謂 思改作 其宜 '', 此 有 所 一,於理 與毛 加 儲 正 之 所 無

將 仲 子

范 諫而 其 母 非 鄭伯、大鄭伯之惡,《左傳》云:「稱『鄭伯』, 譏失教也 鄭伯克段于鄢」、《公》、《穀》二家皆謂是甚 聖 氏《補傳》謂: 人以恕待人之道。 ,以害其弟。 公弗聽,小不忍以 序》云: 謂之鄭志。 「《將仲子》,刺 「克段之事,論者多過其實, 弟叔失道 不言出奔,難之也。」 致大亂 獨《將仲子》之《序》 而公弗制,祭仲 莊 公也。 焉。」《春秋》 不勝

《序》首言刺莊公,已具《春秋》褒貶之法,其 殺。 其寵榮,初 仲之詞,其時實衹以母所 下云云,乃就詩 筆,故意與《左氏》合。 也。嚴《緝》言《將仲子》首《序》必經聖人之 段,心固 情事哉? 與《左氏》合。 不得無罪焉。 譏,不加抑制。 飲酒、田 以恕待之。」陳 『畏人之多言』,是也。 「公穀二子未嘗見國史,段實出 無識,不能權利害之輕重,舉措乖 彼特據傳聞以爲懸斷耳,豈能定當日之 未嘗忌之,衹以 獵、馳馬、暴虎耳,莊公機險百 非有 今觀兩《叔于田》詩,段所長 莊公本不得爲大惡 若以爲 詩所云『畏父母』、『畏兄弟』、 氏《稽古編》即用 詞言之。蓋詩 心殺害。 良不謬矣。」承珙案: 有意殺弟,恐未必然 致段不克令終,莊 母 鍾愛,順母 作詩者以 所鍾 人託爲公拒祭 愛,遠 奔,誤 其 違 ,特以 此 私 説,云: ,故聖人 爲 情,恣 倍 衹 嫌 以 庸 諷 澼 於 在 爲 罶

一〇八

必牽合後事,過爲誅心之論也。不失温柔敦厚之意。《序》亦因而明之。不

雅 棘可 連 與杞爲枸檵之叢生者相配。 單言「杞」者,當皆蒙此傳而 《小雅· 月》又傳者,以「杞桋」連文,桋爲赤栜叢 檵」,則其後《杕杜》、《南 名」以別《四牡》之「枸 有杞桋」,傳皆以爲「枸檵」。 山有杞」、《湛露》之「在彼杞棘」、《北 「杞」首見於經,而《爾雅》無明文,故特言「木 言采其杞」,皆無傳。 文,而不傳者,以 以知杞,故無庸傳歟? 杕杜》之「言采其杞」、《南山 詩》言「杞」者凡七,惟此言「木名」。 無折我樹杞」,傳:「杞,木名也。」承珙 四牡》之「集于苞杞」、《四月》之「隰 棘之叢生爲人所共知 檵」,至《四牡》訓以 毛意蓋以《將仲子》之 Ш 有臺》、《北 爲「枸檵」。 《湛 然則自《四牡》 其 他 有臺》之「南 露》與「 心如《小 山》之 Щ **©**四 棘 一之 汽枸 生, 及

謂 與《孟子》「爲桮棬」義近。 皮可煑作飲。」《玉篇》亦云:「柳,柜柳。」與 車轂。 大木。《本草衍義》云:「欅,木本最大者,高 木之衆」、「檀,彊刃之木」例之,此「杞」當是 無明文者,每不欲質言之。 飲,去熱」,亦與 郭引「或説 云:「未詳。 杞也。」考《孟子》:「性猶杞柳也。」趙注云: 樹如柳,葉麤而白色,木理微赤 爲 「杞柳」,當即《爾雅》之「柜 以後言「杞」者六,當皆爲 「今人取其細條,火逼令柔韌,屈作箱篋。」又 ·杞柳,柜柳也。」《爾雅》:「楥,柜枊。」郭 別木。 「櫸樹削取裹皮,去上甲,煎服之,夏日作 今共北淇水旁、魯國 陸《疏》云:「杞,柳屬 一同。 或曰: 郭注「或説」合。 後世謂之「櫸柳 枊當爲柳。 柳。 枸 然則陸《疏》所言 然以下章傳「桑 泰 機 山 也。 ,故今人以爲 《圖 惟 毛傳於《雅 柜柳 汶水邊,純 經影芸 生水旁 將仲子》 《别録 似 注

《詩》「杞」有三、《將仲子》同陸説、《 是詩衹有二杞,並無三杞之别也。 援崔豹《古今注》所言,證陸璣乃釋下「南山 與「棘」並言,自當爲叢生之枸檵,不必 仲子》之「杞」與「枸檵」别歟? 有杞」,非此章之「杞」,其解甚確。別見《小雅》。 山木、《南山》亦當爲枸檵。 五六十尺,合二三抱。]此 「杞,一名枸骨,山材也」云云,姚氏《識名解》 「南山》、《湛露》之「杞」爲山木。 不知《湛露》 、杕杜》、《四月》、《北山》皆爲「枸杞」,而别 陸《疏》所 其所據陸《疏》 嚴《緝 由 四牡 以《 一别爲 將 × 謂

無傷 以 興所在。 木。]案:二傳於木必兼言其形性者,自以 無折 喻 害我 我樹檀」,傳:「檀,彊刃今本作「韌」。 無折我樹桑」,傳:「桑,木之衆也。」下 故箋申之云:「無折我樹杞,喻言 兄弟也。」然則所謂桑與 可 知 桑 以 喻段之得衆,所謂 檀者 蓋 厚 之 將 皆 取

> 衆」,檀爲「木之彊」,箋謂祭仲驟諫,莊公固 謂「不必如此分别」,然玩 莊公不制段於早,而段之彌强也。]李迂仲 牆」,卒曰『無踰 拒,則王説似於傳箋有合。 曰『無折我樹桑』,卒曰『無折我樹檀』,以言 氏:「以謂 之恃彊,所謂「多行 得衆」也,段懋堂云「比諸兄多言」,非 而莊公拒之彌固 始 曰『無踰我里』,中曰『無踰 我園」,以言仲子之言 也。 不 始曰『無折我樹杞』,中 . 義 也。 傳 以 是。 李《解》 桑 檀 爲 以 「木之 彌 引 喻 峻 雖 我 Ŧ 段

章。 言可畏」,然實以全詩皆有關于兄弟,並 十六年。 三句,此則斷章取義耳 承珙案:子展之賦此詩,杜注 惟《晉語 吴氏肅公曰:「子展賦此 取兄弟相護之意,則豈淫 》姜氏 勸重耳 歸國 詩,見《左傳》襄二 雖 ,專引卒章末 云「義取衆 奔 語乎?」 非 斷

叔 于 田

則於 故許氏《詩鈔》亦云:「詳味其辭,非 過 等語,不知所謂「仁」、「武」、「美」、「好」者,不 濠之李士實、劉養正輩。 私黨哉?」承珙案:嚴氏「安史」之説本於李 説之稱爲『美』『仁』,猶河朔之人稱安 刺,非小人虚譽之詞。 得『仁』、『武』、『美』、『好』之名,猶誦宣姜爲 陳氏《稽古編》曰:「叔段善飲酒 黄《集解》《王士禛集》亦云其黨如淮南之伍被、左吴,宸 『邦媛』,皇父爲『孔聖』云爾,是君子微文之 于京,繕甲治兵以出于田,國人 飲 過矣。鄭師一出,京城皆叛,段何嘗 酒 「刺莊」不合。 序》云: 服 馬之事,蓋 《叔于田》,刺莊公也。 是猶泥於詩中「仁」「武」 但 以爲舍是皆無足道者。 以此爲私黨美段之詞 嚴《緝》謂京城 説 工服 而歸 小人黨 私 馬,而 史爲 叔處 黨諛 之。 有

惡者之言,乃君子知幾者所作也。」

也。 空耳。 言「國人」,不復言巷,猶云傾城出觀,里巷爲 塗」,即《説文》所謂「巷,里中道也」。 居間巷,下雜民伍。不知 泥于詩中「巷」字,謂段以國君貴弟,不應 可疑,孰不可 段之事鑿鑿明甚,夫猶此『叔于田』也。 辭。」則胡不思後篇「獻于公所」之語,其爲叔 矣,而又云:"或疑 明乎此,可無所用其疑矣。 何氏《古義》曰:「朱子于此詩既從《序 且謂從叔者巷之人,非以 疑邪?」承珙案:《詩序辨説 此 亦民間男女 傳訓「巷」爲「里 叔爲居此巷 相説之 鄭箋但 此 出 而

野」承前二章『于田」、『于狩」而申言其地。酒』言,蓋飲酒者宜好會也。三章『郊外曰承首章『于田』而申言其時。『美且好』對『飲言,蓋巷居者宜相仁愛也。次章『冬獵曰狩』劉氏《詩益》曰:「『美且仁』對『居人』

容也。」

大叔于田

乎戒之。然言外見公之於叔,不早諭教,卒 叔段、《椒聊》爲美桓叔。● 矣,説詩不用首《序》,則二《叔于田》皆爲美 克段』譏失教之意同。首《序》經聖人之手 「二《叔于田》皆美叔段之材武,無一辭他及。 多才而好勇,不義而得衆也。」嚴《緝》云: 使陷于不義。所言在此,所刺在彼,此風人 知其不足以有爲,而且將及于禍,故意又似 勇,詞似愛之,實則形容其輕揚麤暴之氣習, 也乎哉?」承珙案:二詩皆衹言叔之材藝武 主文譎諫之義也。 而首《序》以爲刺莊公,蓋與《春秋》書『鄭伯 《序》云:「《大叔于田》,刺 叔段、桓叔 莊公也。 可美 叔

> 耳。 耳。當以《釋文》本爲長。」承珙案: 顔師古 也。《釋文》云:『叔于田,本或作「大叔于 據《詩》本與《釋文》同,章首無「大」字,故於 之曰:「叔,莊公之弟,大叔也。」可見小顔所 二篇之比。其首句有『大』字,援《序》入詩 異,詩文則同,如《唐風·杕杜》《有杕之杜 作者意殊。」是與『或作』本同。 田」者,誤。」正義標起止云『大叔至傷女』,又 經》、小字本、相臺本皆有『大』字,此 注《漢書・匡衡傳》引《詩》「將叔無狃」,而釋 十言『叔』,不應一句獨言『大叔』。 或名篇自 上篇正義云:『此言叔于田,下言大叔于田 「將叔」字作此解。 蘇《傳》云:「二詩皆曰『叔于田』,故加 「大叔于田」,阮氏《校勘記》云:「《 《開成石經》則據正義本 此詩三章共 正 一義本 唐石

▶ 「聊」,原作「柳」,據《續經解》本、廣雅本改

後 窭

自以段有「大叔」之號,故即以爲别耳。 小」之「大」,非也。 『大』爲别。」亦是以大小爲説,有是文理乎? 叔』皆放此。」然則此《序》加「大」以别之者, 「叔,大叔段也。」《釋文》:「大音泰。 | 緝》云:「短篇者止曰『叔于 さ 首章不應加「大」,是也,而讀「大」爲「大 以 曰『泰』,又加『大』於首章,失之矣。」此 兩驂如舞」,傳:「驂之與服, 别之。 不 知 者乃 上篇「叔于田」傳云: 以 段 有 田」、長篇者加 大 叔之 後『大 號 嚴

> 如 之容,如 謂 依傳兼驂與服言之,何疑於服爲 舞邪? 四 馬 安 唐明皇舞馬之類。 行 能 與 舞 節 相 應 然則「 非 謂 如如 衡制,不 舞」自 有 舞 能 蹈

傳》: 虎以 誤。 引此爲《齊詩》之説。 極爲 段爲京城之主,其所寓即公所也。」承珙案: 暴虎以獻 暴虎以獻 公之意。 叔從公田,説本毛氏,並不始于朱子,黄氏殊 『公」爲莊公,華谷遂以爲叔段從莊公出田 而獻于公,傳謂從公田者,是蓋叔 獻莊 襢裼 得情,黄氏駁之亦非是。 「鄭伯好勇 襢裼暴虎,獻于公所」,嚴《緝》云,暴虎 公,乃自矜武力以驕其兄。 暴虎,正 於叔也。」《黄氏日鈔》云: 戴氏《續詩記》曰:「言勇力之士 ,氣陵其兄,不如岷 而 叔段 國 此雖三家傳聞異 人暴虎。」王氏 好勇輕脱之常態, 《漢書 隱之説爲 有示 「晦 嚴《緝 《詩考》 詞 匡 勇於 當 一衡

節。

一正義

曰:「此經止云『兩驂」,不言『兩

和諧

中

服」,知驂與服

和

諧中節者,以下二章皆

説

兩服」、『兩驂』,知此

謂『如舞』也

服

制

於

衡,不得如舞,其言舞

也。」承

珙案:《周官

·保氏》注

舞

交

云:「御車在交道、車旋應於舞節。」此

氏 追曰:

「五御之法

有舞交衢者,蓋《詩》所

經所云亦總驂服。」董

正可作《毛詩》以「公」爲鄭伯之證。

珙案: 乎? 侈,何知不比 驂服各一色。 乘,於乘之中有黄者,又有鴇者,或 氏《古義》曰:「後章『乘鴇』,豈又四 上色誇之,固不必泥 而兩驂爲鴇也。」姚氏炳曰:「此不過舉馬之 | 駁彼乘黄」,則亦非必不可得者。 乘鴇」俱當於『乘』字略斷 何叔乘馬之驟易如此, 叔 姚説是也 于田 物齊色以快一時耳目邪?」承 ,乘乘黄」,傳:「四馬皆黄。」何 如《小雅》『四黄既駕』、《魯頌》 四 一馬爲 讀之。 一色,亦不 愚謂『乘 蓋 以叔之驕 兩 馬 服 四 必 黄」、 皆鴇 爲 馬 分 黄 爲

口

不必。

也。」承 者,文義 上駕者,言兩 襄,駕 兩 珙案: 相 服 對 也。 上襄」,箋 服 ^ 説 高 在 上 誘 前 文》:「駕,馬 駕者,言爲衆 注《吕覽》云:「上,猶 駕 云: 軛 與與 兩 兩 服 驂 在 馬 中 在 軛 之 央 後 中 最 夾 雁 也 前 行 良 轅

> 稱。 云: 引《説文》「驤,馬之低卬」,以「襄」通「驤」,亦 也]。」是「上 諸家因箋説而以「上駟」解之,非是。 「下,猶後也。」是「上」爲前,「下」爲後,古 駕 即 謂 前 駕 《大雅 人自 下 武 有 》箋 或 此

《稽古編》曰:「玩疏語,傳衍一『揚』字。 之,此所以簡奧難 記》、嚴《緝》引此亦無下『揚』字。」承珙 風》傳:「虚,徐 經文「揚」字作訓,不必更疊「揚」字。 陳説是也。 曰:「言舉火而 火 烈具揚」,傳:「揚,揚 毛蓋以「揚」「光」二字連讀 也。」即蒙經文「其虚其邪」訓 揚 通也 其光耳,非 訓 光 揚 也 爲 光 如《北 即即 也。」 正 案 ≈ 吕 蒙 義

磬 無 元吉曰:「考磬、控、縱、送之義,孔 正文,朱《傳》『磬』、『控』從毛,而『縱』、 止馬 抑磬控 曰 控。 忌 發 抑縱送忌」,傳: 矢日 縱,從禽 曰 送。」 氏 「騁 申 黄 毛 馬 謂 氏 曰

故惟 **绔**,子悦切。 又當 前。 弓隨 剡差斜似簫,故 本蘇 之事,體如羅文,又未嘗不相 案:朱《傳》言「舍拔曰縱,覆彇曰送」。 馬之良,下章言馬者只一句,下三句言射畢 「覆,倒也。 應之耳。 送 覆彇」二字殊不明晰。 張 放箭 在下章矣。 角弓》正義云:「北狄角弓,弛則體反。」 弛弓,始有覆彇之象。 若如所言,乃所謂「翩其反矣」者。 弓,稍皆内 矢傾倒,直指於前以送矢。」此説非是。 氏《詩傳》。「舍拔」見《秦風 别 解 然此章言射者只一句,下三句言御 也。 則 前手攧。 彇,弓弰也。《禮》疏:『弓頭稍 以 送,送箭 一向,僅 亦謂爲簫。」射者既發矢,則 上言『善射』、『良御』 嚴《緝》亦覺其不安,故改爲 缚 也」。 即縱也,攧即送也」。 發矢,亦不至傾 許氏《名物鈔》云: 此則獵畢之事 如射者之「後手 配 也。」承 駟 而 鐵》, 倒指 二語 《小 分 珙 以

> 之馭馬,收縱俱在轡,轡操之則身直,舍之則 案:「磬」即「磬折」之謂。《禮》凡言「磬折 身僂,故曰磬。 磬以言乎人之馭馬也。」承珙 曲 承「善射」、「良御」而言,不必改易傳訓 獸命中,亦是言射之事。 其 〈實毛謂 折 如磬。 《毛詩明辨録》云:「騁馬曰磬,謂使 「發矢曰 夫馬之馳驅,不能 縱 從 禽曰 磬、控、縱、送仍 送」, 如磬折,惟 從 禽 也 謂 之 X 分 逐

文 *: 爾雅 乘乘鴇」,傳: 「驪 鴇, 釋畜》本作「駂」、《詩》疏引《爾雅》作 音保,依 字 白 作 雜 **駂**。 毛 日 承 鴇。」《 珙 釋

亦

可單言「磬」也

其形如曲,人之倚立亦當然也。」此則「磬折

齊」,注云:「磬且聽也。」疏云:「磬之折殺

疑「磬折」不當單言「磬」。

考《曲禮》「立如

立於車中者,身必稍曲

向前

,故謂之磬。

或

者,皆謂屈身如磬之折殺。

凡騁馬時,人之

毛詩後箋卷七

本有「駂」字也。 本有「駂」字也。 本有「駂」字也。

比喻略同。 首,兩驂在後而如夫手,則「如手」與上「雁行」 箋云:「如人左右手之相佐助 齊首」與前章「上襄」義同,兩 鄭以『如』者比諸外物,故易傳。」承珙案: 兩 驂如手」,傳:「進 此似箋勝於傳,正義申之是也。 止 如御者之手。」 服 也。」正義曰: 在 前 而 齊其

馬慢忌,叔發罕忌」箋云:「田事且畢,則其「火烈具阜」,傳:「阜,盛也。」下文「叔

易 説。 路,其火自當更盛。 田用燎。 之時,其火將止,不應復言火盛,此詩 獵之際,其火方揚。 用火,因焚萊除陳,草皆殺而火止。」則獵 説爲近。 炤之。」陳氏《禮書》謂此即《爾雅》之「火田」, 故箋申之云『列人持火』。 火有行列也。 言火盛? 承珙案:首章「火烈具舉」,傳 以疏云「宵田」爲非。 馬行遲,發矢希。」夫田 曰:「火烈,嫌爲火猛,故轉『烈』爲『列』,言 「蒐田火弊」注云:「火弊,火止也。 烈」爲「列」,箋云「列 也 然經文云「具舉」、「具揚」,則「宵田」之 且若係火田,則《周官·大司 首章初獵之時,其火乍舉。 火有行列,由布列人使持之, 末章 《吕記》、朱《傳》皆用其 故 事 人持火俱舉」。 知箋 獵 此爲宵田,故持火 既將畢矣,何 畢 疏 將 之説 歸,持炬 春田 次章 自是 正 不 以 炤 主 復 口 宵 畢 義 正 以

清人

《序》以此詩爲公子時素惡高克。此於《序》以此詩爲公子素作,亦如《王風》毛傳之「子國」、「子嗟」,必有所據。《漢書・古今人「子國」、「子嗟」,必有所據。《漢書・古今人「子國」、「子嗟」,必有所據。《漢書・古今人文國、「子」、以一、

宋公遇于清」,杜云:「清,衛邑。 河上 之邑也。」《續漢書 縣有清亭。」與中牟絶不相涉,不知劉昭何以 有清口水。劉昭《補注》云:「《左傳》閔二年 遇于清』,杜預曰: 《左傳》閔二年無遇清事,隱四年「公及 ,鄭之郊也。」箋云:「清者,高 「清人在彭」,傳:「清,邑也。彭,衛之 • 郡國志》: 河南中 『縣有清陽亭。』此 濟北 克所 牟 東 語誤 帥 阳 縣 衆

於彭。 不當引以爲證 之上,鄭衛相 爲高克邑」,此條上下文皆止言清,不當贅及 即是水也。」案:酈氏 清口水,司馬彪《郡國志》曰中牟有清 在衛都,與傳云「衛之河上,鄭之郊」者不合, 聞》引《左傳》昭二十年。衛侯、甯喜盟于彭水 又云:「期水北與七虎澗合,逕期城北,東會 又屈而北流,至清口澤,七虎澗水注之。」下 釋地》云『中牟縣西有清陽亭』是也。 謂『清人在彭』,彭爲高克邑也,故杜 逕清陽亭南,東流,即故清人城也。 云:「丁巳晦,公入。」則是入國而盟,彭水當 水注之。 舛誤至此。 云「清者,高克所帥衆之邑也」。至王氏《總 疑「彭」當爲「清」,傳寫之誤,即箋所 清池水出 惟《水經注》:「渠水又 近,彭或指此。 清陽亭西南平地 所引 甚明,但其云「彭 考《左傳》上文 (東,清 東北 《詩》 預《春秋 清池水 口水 所 池

兵,不得無夷矛。」顯與鄭義相戾。 總之,《考

疏乃云:「前驅在車之右,當有勇力以

用五

箋云: 『二矛重弓,備折壞。』直是酋矛有二, 弓而重之,則知『二矛』亦一矛而有二,故彼 以『二矛』與『重弓』共文,弓無二等,直是一 等也。《記》又云:『攻國之兵用短,守國之 常。酋、夷、長短名也。』酋短夷長、是矛有 尺,夷矛三尋。』注云:『八尺曰尋,倍 用長,宜有夷矛」,是也。然《伯兮》詩「爲王 **酋、夷,正義申之謂「禦狄于竟,爲守國之兵** 無夷矛也。」承珙案:《伯兮》箋引《考工記》 有夷矛,故知『二矛』爲酋矛、夷矛。《魯頌》 兵用長。』此禦狄于竟,是守國之兵用長,宜 也。」正義曰:「《考工記》云:『酋矛常有 「二矛重英」,箋云:「二矛,酋矛、夷矛 此箋以「二矛」爲 尋 曰 几 轕耳。 兮》疏牽於「六等」、「六建」之文,致生轇 者義異。此疏及《魯頌》疏釋箋皆當。惟《伯 惟守國之兵宜之。守國者或嬰城阨隘,不必 之,至酋矛,皆以四 下不一,故見爲重,自與《魯頌》但言「二矛」 「重英」、「重喬」,則必「二矛」有長短,所建高 用車,故兵車之「六等」不數。 建於車上,但其長至三尋,自非車上所利用 不數軫,而取五兵與人爲六。 不必更數夷矛。若「六建」,言建於車上,故 建」不同。「六等」是就車身言之,故自軫數 工記》言「兵車六等」之法,與《廬 「酋,發聲,直謂矛。」是兵車但以矛爲一等, 尺爲 差。 蓋夷矛雖 若《清人》言 司農 人》言「六

亦可

注

云

四尺,當漢尺一丈八尺,所謂丈八鍦音「委蛇 有酋矛而無夷矛。 王氏《詩稗疏》云:「兵車所載之戎器 夷矛之長三尋,古尺二丈

三七

前驅」,則是攻國之兵,故箋不言夷矛。而彼

「兵車六等」,亦無夷矛。

王氏 則前で 常制 也。 守。 之「蛇 是與經文「重英」、「重喬」之言相背,其説 矛又當建於車左,二矛分建,無由 車與否,經無明文,尚可存之,以備一説。至 執弓而矛備,因勢之遠近則隨用。」承珙案: 守者步卒操之,進却隨 刺 六尺有四寸。 右盤 一矛,猶《小戎》之有二弓,右持矛而弓備,將 所持者當 ,則礙于車後之籓,而舉之必後。 矛 謂兵車 若建於車上,則不相等而易摇。 車無夷矛而云『二矛』者,二俱酋矛也。 重而無力,故不可以 。』『鍦』、『蛇』、『夷』三字通用。 ,將執弓,右用矛。 一爲 矛 也。 建於 車 無夷矛,雖與鄭異,然夷矛之建 後世步騎或用之,古者惟用以 右 隴 所 車右,而將 西 持, 健 手,所謂長兵短用者 兒歌》: 臨敵,則惟所便。 備將 攻而惟用以守望。 居 車 帥 「丈八 之用, 左,所備之 見其爲重 舉之後, 蛇 持之以 今尺 則 矛 用 右 工 左

非矣。

有高工 荷」。 雉名。 也 當有物以題識之。 級,故謂之重高。 言喬者,矛之柄近于上頭及矛之銎室之下, 爲荷葉相重累也。 縣毛羽。」《釋文》:「喬,毛音橋。 五兵之最高者也。 『喬,高也。』重喬,猶如重英,以矛建于車上 『朱英』,則 負荷也。」正義 累荷也。」箋云:「喬,矛矜近上及室題,所以 箋云:「各有畫飾。」下章「重 「二矛重英」,傳:「重英,矛 二矛於其上頭皆懸毛羽以題識之,似如 下重累而相 《候人》傳曰:『荷,揭也。』謂此二矛刃 《韓詩》作鷸。 以 朱 曰:「《魯頌》説矛之飾,謂之 負揭。 染 傳解稱『高』之意,故言『累 沈胡可反,謂兩矛之飾 而二矛同高,其高復有等 其題 爲 荷,舊音何,謂刻矛 英飾。 箋申説『累荷』之意 識者,所以 喬 | 傳: 有 釋詁》云: 鄭居橋反 英 縣 「重喬 飾 毛 也。」 羽 相 頭

英」也。 也。」 矛頭即 者,非即以「喬」爲毛羽。 也。」見《續漢書・百官志》注。 謂刻矛柄爲飾。《周禮 喬,累荷」者,謂矛有短長,刻畫之處重累 畫之,故箋云「各有畫飾」,即《閟宮》所謂「朱 華有畫義,故曰 之」杜子春云:「英蕩,畫圅。」疏云:「以 爲「矛有英飾」,箋云「各有畫飾」。 意本同。 雉名,鄭固無是説 毛 累 《釋文》因《韓詩》作 箋謂矛 相 矛柄。 承珙案:「重英」、「重喬」,傳箋所釋 羽 負荷 彼疏以朱英爲絲纏,非是。 陸孔申之,各有得失。 傳 者 以 然,故謂之累荷也。 柄 I 則是 時 刻 畫圅。」干寶注曰:「英,刻 事言之,●猶今之鵞 畫 ,而以爲「荷葉」則 爲 也。 題 掌節》「以英蕩 「鶴」,而牽 此蓋刻矛 鄭讀 識, 其引舊説謂 乃所 「喬」字亦 傳以「重英」 經傳不 以 一合鄭 柄而以 英飾 傳云「重 縣 非 刻 毛 言矛 矛 當 毛 意 者 大 輔 頭 羽 畫 英 稍 以 如 朱 惟 同 當以 得之。 0 謂 兵。 將 傳」,

俱善述毛意者也。 出其上,人舉目即見之,故指以爲言。首 氏。」陳氏《稽古編》曰:「『重英』、『重喬』均 累荷」,則與箋説不合。 者所以懸毛羽」,皆是。 沈重音胡可反,而 言其采畫之飾,次章言其負揭之形耳。」 重喬,猶云『重英』。 揭」、「二矛重累如 毛傳爲正。 正 義釋 傳,引《候 箋云『畫飾』,疏云『重高』, 云「兩矛之飾 兵車『六建』之中,二矛最 相 諸説紛然,不如直從毛 負揭」,其釋箋謂 馮氏《名物疏》云: 而又云「懸羽重累 人》傳訓 相 負 「荷」爲 荷」者 題 爲

重

有

云:「左,左人,謂御者。 右抽,抽矢以射。 也。兵車之法,將居鼓下,故御者在 左旋右抽,中軍作好」,傳"「左旋, 居軍中爲容好。」箋 右,車右也。 中軍

荷。

毛。

阮校本《毛詩正義》作「鄭」。

视。 掌馭 馭犯 礙,且 度。 如此。 逢 且. 禮》『大馭掌馭玉路,犯 雖以 六轡而 在右,將居鼓下在中央,主擊鼓與軍人 車右。J孔疏以爲凡 人持矛 左 右。』《史記 《尚書 $\widetilde{\Xi}$ 一父爲 戎車 居 軷 王氏《詩稗疏》云"「御必居中,所 天子之尊, 其曰『王自左馭』者,自左 視不及右驂之外靷而舒斂無度矣。 閟 若將之兵車 ",暫攝 中 制 ,中人御。」正義以 宫》笺云: 甘誓》:「左不攻于左,右不攻于 ·, 而 犯 馬 右。 集解》引鄭注 也。 載 馭 况 《公羊傳》 如如 將 居 而 使其居 中 乎? 在 「兵車之法,左人持弓, 玉路之儀」,則天子 ,則御者在左,勇力之士 〔兵車,甲士三人,所主者 ·,王位 車 亦 軷 左,則攬轡偏 **搴之**戰, 云:「左,車左, 日 無 此爲「士卒兵車」。 固) 王自 居 在 『逢丑父者,齊 中之理。《周 左 左馭, 齊 而 矣。 繒 侯 而 『戎僕 即 親 中 以 爲節 馭 縱 右, 也 戎 將 故 下 齊 送 右

清 我右,此 射。」是已。 耳。 侯之車 者,大將之幕下卒也,古未有呼將爲中軍者 禽 抽 者,有右旋 御 特録之。至鞌之戰,張侯御郤 證。 左,則車右持矛以刺,右旋先矛以要敵 以車左車右言之,蓋言戎車 夷易位,未可知也。 中,將在左』之言,既無典 肘,余折以御,左輪朱 者左。 左。 矢以射,勢以稍遠 **案**: 曠 毛傳曰:『左旋,講兵。 《駟 ·右也, H 王氏考之經傳,立爲四 所謂 要之,杜預所云『自非元帥,御 翱 鐵 而 蓋兵車之法,有 翔 》之詩日 『右抽』矣。 先矛者。左旋 代 而 頃 以 公當 軍 然則『左旋 而便也。 "【公曰左之。」禽左 殷。」則似 戲 左。」 , 斯 (據, 而 蓋車戰之法類然 證 惟 克,曰:『矢 先弓 左旋以 此 可 回旋演 右 此 田獵之法,逐 傷 將 右 郤 郤 條 抽 Ē 以 抽」者 克 經有明文,故 居 克 以戰之法 先弓 迎 抽 或 左 居 、則將 敵 矢 之 以 者 貫 中 則 於 矢 以 非 傷 明 余 居 而

之比 戰 將執旗鼓,豈必鼓定在中? 好。」則以「中軍」爲「軍中」,猶「中谷,谷中」 輪,焉知 案:《左傳》言車戰之法,如僖三十三年,「秦 鄭 本不當以一車言之。傳云:「居軍中爲容 而居中,解張有「左輪朱殷」之言而居左,然 者左射以菆。」皆足爲御在 師過周北門,左右免胄而下」。宣十二年, 者,中軍之士,亦以見衆之且 (詩)疏 楚許伯御樂伯 于時 也,韓厥 ,並未嘗以「中軍」爲將。故「左」「右」亦 有明 非元 對 唯據成二年鞌之戰,以爲郤克在鼓下 未有三 非 車左、車 證。 帥 因夢避左右,而代御居中,杜 射 傷 御皆在中」之説,近於因 軍,中 攝 總之,此詩「左」、「右」、「中」, 左 右 手 叔 而言。 而 軍者 爲右。 流 血 零翱 對 於左邪? 解張之血染 樂伯曰:『致師 車中之證 左拒、 散也。」承珙 翔』、『作 右 文遷 且 注 拒 好 是 左 故 因 而

矣。 非是。 必非 戎車 不必以證此詩之「中軍」耳。 祭足、原繁以三軍軍其前 「居軍中爲容好」也。 繻葛之戰,原繁、高渠**彌** 口 車左、車右之謂。 桓元年《左傳》: 旋演戰之法,申明毛義 至云鄭時 王氏 衛人 謂「左 是鄭之三軍 以 以中軍奉公, 甚的 燕 未 師伐鄭, 旋 有三軍 门,此即 右 抽 但 舊 鄭 是 則

羔 裘

《羔裘》美其大夫,較《羔羊》之美在言外更爲 平談,斯其所以爲盛與,只此便分正 已,其他無溢美之詞,與《芣苡》、《桃夭》同 如《羔羊》惟述其衣服、威儀之合度、舒徐而 著明,何以 子以風其朝焉。』《毛詩 小序》於變風中有頌美者皆云思古之盛以 《序》云:「《羔裘》,刺 在列國 |則爲 變風。 明 辨 朝 録》云:「鄭之 也。 蓋王化之行, 言古之君 變。 如

變風 斥之人。所謂言之者無罪,聞之者足以 耳。許氏《詩深》曰:「刺朝,如宋人《諫 衣》、《車 也。」此説得之。 就官與地言之,皆以風刺其同朝,非有所 記》及《待漏院記》之類。 之意,非詩之詞 古之美,而其意則以刺今。《序》所言者 哉?」承珙案:此説非是。 刺今之不 有刺 鄰》、《駟鐵》諸篇,《序》何嘗不言 然,則 而無美。」亦不然。《淇澳》、《緇 是 也。 沈氏又云:「如《序》説,則 變 風 所美在此,則所刺在 有 此就 刺 此詩所陳純 而 衣服言之,彼 無 美, 豈 是思 理 戒 顓 院 彼 詩 也

侯」,義並可通。《釋文》又引《韓詩》云:「恂」同。是毛云「皆直且侯」,韓云「信直且與《溱洧》「洵訏且樂」《釋文》引《韓詩》作毛義皆本《爾雅》。《韓詩外傳》「洵」作「恂」,「洵直且侯」,傳:「洵,均。侯,君也。」

「矣」。此訓似宜從韓。 「黄」。此訓似宜從韓。 「黄」,川司直」之「直」,「侯」即「美士」之 為,則首章「洵直且侯」似統下二章而言, 之司直」,三章云「邦之彦兮」、「彦」爲士之美 之司直」,三章云「邦之彦兮」、「彦」爲士之美 之司直」,三章云「邦之彦兮」、「彦」爲士之美 (侯,美也。」如《大雅・文王》「烝哉」,毛本

子」之「記」。」皆然。 之子」之「己」。」《崧高》之「远」,箋云:「聲如「彼記之 異。 作「己」,知《韓詩》亦本古文。《王風 相錯亂。 似。」蓋古人於此等以聲爲主,聲同則字不嫌 傳》襄二十七年引「彼己之子,邦之司直」正 子」、《新序・節士》、《義勇》兩篇亦皆作「彼己」。《左 水》箋云:「其,或作記,或作己。 推之《大叔于田》之忌、箋云:「忌,讀如「彼己 彼其之子」、《韓詩外傳》作「彼己之 如毛必作「其」、《揚之水》、《汾沮 然其字亦必 各 有 師 讀聲 · 揚之 承,不 相

> 曲兵將鉤之。晏子曰:『吾聞留以利而倍其 《韓詩外傳》云:「崔杼弑莊公,合士大夫盟 合。 戴氏用王肅之訓,以爲受君命,非也 之子,舍命不偷。』晏子之謂也。」《新序 君、非仁也、劫以刃而失其志、非勇也。」」其 謂晏子曰: 『子不與吾,殺子。』直兵將推之, 「舍」爲「舍釋」之「舍」矣。 然鄭雖訓 「舍」猶 勇》篇同此。蓋以「舍命」爲「授命」,與鄭 下引《詩》曰:「『羔裘如濡,恂直且侯。彼己 「處」,而云「是子處命不變」,謂「守死善道, 爲作音。又云:「沈書者反。」是沈重意以 文》:「舍,音赦。」此因箋訓「舍」爲「處」,故 見危授命」之等,是以「命」爲「軀命」之「命」。 至復命而後釋,終始如一也。」承珙案:《釋 「澤」與「舍」義並爲「釋」。 言自受命於君 以以

姚氏《識名解》曰:「正義以君裘用純,此詩「羔裘豹飾」,傳:「豹飾,緣以豹皮也。」

狐白 爲 列 異文 豹皮 子》見《揆度》篇。 子」爲大夫士。正義以狐青羔裘,君皆用 裘,諸侯之服也」,分析甚明。 豹褎」,「羔裘豹飾」之等,其下又云「錦 也。」承珙案:姚説是也。 子之服,亦指 褎之制,未聞 履皆謂之飾。 之服也。 以 褎 大夫士雜以 剛 非古, 大夫豹幨」,正足證豹飾爲 飾 裘,錦衣以裼之」,下乃言「君子狐 ,其義上達。 爲袪衰也。 ,明飾非褎。 異 皮 過矣。 愚按: 飾義通 豹褎、豹飾 臣 有緣領者。 士大夫言,未嘗專指人君之服 豹飾自指 「上今《管子》作「卿」。 之服 嚴《緝》云: 陸農師言國君體柔 引《玉藻》『豹褎』、『豹飾』 傳所謂 引《 爲異。 用,凡緣領、緣褎、緣 褎袪而言,裘惟 《玉藻》以豹飾 唐 《玉藻》首云「君衣 『緣』,蓋言領,人君 風》作證 「或謂《檜 人臣之服 《埤雅》引《管 故鄭注以「君 大夫豹 , 謂 而文之 而 青裘 衣 爲君 有 緣 飾 純 羔 以 狐 緣 以

> 也,止當爲刺在朝之臣。」 之服,「舍命不渝」及「司直」、「邦彦」,皆臣 裘》專 羔裘》兼刺君 刺 其 君 湾唐 臣。 然此詩言豹飾,止 • 羔裘》專 刺 其 臣 是臣 鄭 下 事

《書》孔傳,而不知《皋陶謨》疏 爲東晉孔 珙案: 嚴氏但知 『三俊』 爲剛、柔、正直之出 章第二句皆言德美,知『三英』非英飾 自以英俊本爲才德之稱、淮南・ 分配《洪範》「三德」者,實出鄭注 直,英即俊也,毛氏之説有源 三之數。今考『立政三俊』,注以 度,無文可據。毛氏以爲三德,或疑牽合於 三,如『五紽』、『五緎』、『五總』之類。 嚴《緝》云:「三英,或以爲裘之英飾 云:「三德,剛克、柔克、正直也。 「三英粲兮」,傳:「三英,三德 傳 所本。 毛公以「三英」爲「三德」, 流 所稱 泰族訓 矣。 ,其義尤古 爲剛、柔、正 粲,衆意。」 以「九德 也。」箋 只是 此詩 也。」承 前後有 77. 每

豈非蠧生於木而自戕其木者乎? 裘。」是「英飾」之説原本毛公。而以之駮傳, 英爲裘飾,則《羔羊》傳云:「古者素絲以英 英爲裘飾,則《羔羊》傳云:「古者素絲以英 英爲裘飾,則《羔羊》傳云:「古者素絲以英 黃。」箋以「剛、柔、正直」申毛,亦必因《書》之 萬人謂之英。」邢疏《爾雅序》引《禮辨名記》:「德過千人曰

遵 大 路

也,「操」字彙聲,訓爲奉也,二者義皆小也。」《毛詩寫官記》曰:「『摻』字參聲,訓爲斂路兮擥子袪』,則以『擥』爲『執』,原無『摻』な》無「摻」字,宜通作「攕」,云「好手貌」。不文》無「摻」字,宜通作「攕」,云「好手貌」。不以此詩正義明云《説文》「摻」,以即此詩正義明云《説文》「摻」。若宋玉賦云『遵大學、無「摻」字,宜通作「攕」,云「好手貌」。不以此詩正義明云《説文》「摻」等」、與二、。

執裾留人而自稱爲「好手」者乎? 载母摻。」最亦與斂義近。總之,「摻」「執」二字 時也。」撮亦與斂義近。總之,「摻」「執」二字 以曰摻。」毛訓「摻」爲「擥」者,《説文》:「擥,撮 與《方言》同。《方言》:「摻,細也。斂物而細謂之擊, 異。是孔所見《説文》本有「摻」字,訓「斂」,

末。』則袪袂不同。此云『袪,袂』者,以袪袂案:玄端之制,士之袂二尺二寸,袪尺二寸。 裁,袂聯腰腋之際,而袪則袖口也。《唐風·裁,袂聯腰腋之際,而袪則袖口也。《唐風·送哥,,則横施異飾于肘腋之間,甚不類矣。之語,皆沿毛傳之誤。」承珙案:正義引《喪之語,皆沿毛傳之誤。」承珙案:正義引《喪之語,皆沿毛傳之誤。」承珙案:正義引《喪之語,皆沿毛傳之誤。」承珙案:正義引《喪之語,皆沿毛傳之誤。」承珙案:正義引《喪本,袪爲袂之末。《唐·羔裘》傳云:『袪,袂也。』王氏《稗疏》曰:「毛傳云:『袪,袂也。』王氏《稗疏》曰:「毛傳云:『袪,袂也。』王氏《稗疏》曰:「毛傳云:『袪,袂也。』

傳義 俱是 也。」此散文得通之證 之譏傳,妄矣。 王逸注 而言 司徹》。 甚 ,是袪未嘗不 衣 或言「反袂拭面」、《公羊傳》。 明。 袖 本末 經傳或言「以袂拂几」、《儀 别 耳, 通稱袂。 一《楚辭 故舉 • 哀時命》云:「袪,袖 類 王氏不察,而 以 曉 皆指 人。 禮 袖 此 以 口 釋 有

耳。 莊公不 道」釋「故」字,以「善道」釋「好」字,「使我然」 殆誤會箋末「使我然」三字以爲釋經「故」字 衍之,乃云「以莊公不速於先君之道故也」, 釋「故」字,非讀「故」爲「是故」之「故」。 孔疏 道,遂聽君子之去而不顧耳。 莊公不速於先君之道使我然。]承珙案: 也。」箋云:「子無 云「不速於先君之道」者,言不急急於先君之 殊不思下章箋云:「好猶善也,我乃以 無我惡兮,不寁故也」,傳: 速 於善道 使我 悪 我擥 然。」是明以「先君之 持子之袂,我乃 以「先君之道」) 寁, 箋 以 速

好,以見詩人述己之私情,期

君子之必

行之意甚堅。

既

陳故

舊之情,復

陳昔日之

之,君子勿以我爲

可醜,不敢速忘

昔日

之好

也。既欲擥其袪,又欲執其手,以

見爲

王

留

惡,不敢速忘故舊之情也。 《補傳》云:「詩人謂君子何忍舍我 《緝》云:「莊公失道,君子惡之,遵 言故舊以先君之義風之,庶其或留 也。不言其惡莊公,而以爲惡我,婉 我而不留,不可倉卒於故舊也。言棄去之速 去。其國人欲擥持其裾袖以留之,曰子無惡 也。」揆之經文,皆於「寁故」二字倒 氏曰:「子無 也,我之故惟願子之不速去也。」《吕記》引朱 而去。我欲擥其袪而留之,君子勿以 欲變其説。 三字於經無 當矣。 如李《解》云:「言君子無惡 惡我而不留,故舊 宋儒 不 能 我欲執其手而 通鄭箋之意 不 君遵 循大路 也。」范氏 可 我 置 辭也 遽 大路 爲 留 嚴 可 絶 我 而 而

爲長。 爲長。 爲長。

女日雞鳴

寤晨 婦相 爲賢,將白圭、猗頓皆可升堂入室邪? 况夫 燕賓之用,皆陳古説德事 生」解之。夫勤生者,小民之細 編》曰:「首二章士弋鳧雁,女則宜之,以 古義以刺今不説德而 興紙 燕樂而 序》云:《女曰 自 謀 不 及賓客,則與説 口 腹之需,斯乃飲食之人,與 雞鳴》,刺不説德也,陳 好色也。」 也。 歐 德 行耳。 陳 陽氏以『勤 何關? 氏《稽 以 此 爲 夙 古

於「偕老」二字,以爲賓客一 儀也。」義本傳箋,何等正大。 歐陽《本義》泥 傳多載其事,此詩已先之矣。 賢婦善相其夫,爲酒食以待賓友延譽者,史 則所燕之賓與士相親愛,老而 當。 言「偕老」? 老之理。 「『將翱將翔,弋鳧與雁。』此主酒食待賓客之 主中饋,惟酒食是議,豈徒以之自享? 章,則《集傳》當矣。」承珙案:陳説是也。 宜之,女爲士宜之也,與子偕老,承飲酒言 『子』字,箋疏皆指賓客,與首章差,殊爲未 之賢? 始信古注之義長 留色者相去無 及爾偕老」,皆夫婦 偕老」即爲卒伍約誓之語,安見賓客必不可 今案: 『子』字應是女目士之言: 蓋見《鄘 况以婦人而願其夫之賓友白首 幾,并不 風 之詞。 君子偕老》、《氓》詩 得謂之勤 也。 時相接, 豈有偕 然《擊鼓》之言 不衰也。 惟二、三章 唐李華曰: 生,惡 古之 得

三二八

樂,無不安好。」宋 思《鹿鳴》又曰「我有嘉賓,鼓瑟鼓琴」邪? 者,亦泥於妻子好合如鼓瑟琴之類耳,獨 好」,傳云:「君子 如 新 尤足 見 其 賢 智。 儒 無 故不 必 至 以 「琴瑟· 徹 爲 琴 夫 在 婦 瑟。 御 親 愛之 賓主 莫 不 意 不 和 静

與君子共肴也。」《埤雅》云:「『加』與『玄鶴 言」之「宜」亦當承上「宜」字。 並從其説。 加」、『加雙鶤』之意同。 也。」箋云:「所弋之鳧雁,我以爲加豆之實, 之」即爲「加豆」。 言「弋」,下「宜之」方言「肴」,自不應以「加 曰弋。」承珙案:陸説是也。「弋言加之」專 云:「宜乎,我燕樂賓客 肴」,而下「宜」字無 弱弓微繳,加諸鳧雁之上。」《吕記》、朱《傳》 弋言加之,與子宜之」,傳: 此「弋之」承上「弋」字,則下「宜 蘇氏《詩傳》亦引《史記》: 訓 ,則爲同 弱弓微矢,乘風振之 而飲酒, 傳於「宜之」訓 義 與之俱 可 「宜,肴 知。 至 篓

云:「宜飲酒之肴。」正義引。是也。不當與上異訓。《爾雅》「宜,肴也」,李巡注老。」正義謂與上「宜,肴」別。 王氏《述聞》謂

璜, 衆 也。 注 衡即珩也。 不及琚瑀。 注,合諸説以推詳佩制,大約珩上横,兩璜 孔疏引《説文》、《列女傳》、《玉藻》注、《玉府 垂,衝牙在 「『佩玉瓊琚』 傳云: 者,珩、璜、琚、瑀、衝牙之類。《稽古編 玉與珩之間。 魚豢《魏略》及《三禮圖》、《韻會》皆從之。 衡牙、蠙珠以納其間。] 疏 《玉府》注引《詩》傳曰: 知子之來之,雜佩以贈之」,傳: 《大戴禮·保傅》篇作 兩璜 皆未若賈公彦《玉府》疏言之詳 中 《玉藻》疏所言亦略 央 『佩有琚瑀 衝 突前後,琚 雙 『佩玉有蔥衡, 衡」、《漢書 云:《詩 , 所以 瑀 相 下 則 納 同 \forall ?》傳, 有雙 納 間 雜佩 日 師古 '; 而 下 於

^{■ 「}玉」下,阮校本《周禮注疏·玉府》注有「上」字。

組之

中

不别

係

玉。

二説各異。

源案:

中

組

琚

者

非佩名

有

琚

瑀,爲拘

捍

兩

衺組之用,不應旁組

亦

置

故

賈

疏

言

琚

瑀

所

置,

在

衝牙組之中

央

兩

璜

之

組

中

有

係

玉

又毛傳云:

琚

也,又惟中組之中有琚瑀,旁 組繩 二組 璜。 以 《大戴禮 文 》: 賈疏 也。」: 以 見《木瓜》。 毛 納於珩 於文當爲 安得此徑寸之珠 **衰繫於珩** 禮》及聶氏《三禮圖》,然瑀 錢二説皆有所失。 名,瑀即石之可爲琚者,則是以 佩 「次」作 説文》作「瓊,琚也。」誤。 傳 雜之。」《韓 玉 據此 不合 似。 瑀, 名。」 琚 與 • 然則 璜之兩 ,知《詩詁》之説良是。」承珙案: 前 「瑀琚」, 衝牙之中, 孔 保傅》篇:「玭 瑀」不言 石之次玉者。」據正 「琚, 佩 詩》傳 疏 謂 琚瑀二 引 而佩之? 大 組 玉 珠 朱謂琚在旁組之中 言「蠙 「蠙 而 段注謂「名」當作 説 以一 物,琚 名 曰 並 傳 文》 珠 也。」 瑀 非 兩 珠 ; 珠 珠 中既 Z: **雖** 爲 以 云 錢氏以琚爲 不 以 偂 此 玉,瑀 瑀 本盧 大戴》則 納 義引。 受三 瑀 貫 亦 琚 言「琚 瑀 石 其 據 介組 石爲 「石」,亦 瑀 正 辩 爲 組 間 爲 今《説 石 義 .,既 琚 天 瑀 琚 又 又 玭 引。 大 佩玉 次 琚 非 佩 佩 文 説 下 貫 瑀 戴 與 朱 玉. 今 玭

有五

,皆穿於其間故也。』 賈疏之言佩制

較

明

於孔矣。

朱子《集傳》、錢氏《詩詁》皆祖

其

蠙

也。

蚌珠,故曰

蠙

珠。

納其間

者,

説。

但朱

·以琚

瑀

皆爲

佩

名,琚

在旁組之中,

瑀

在

中組之中。

錢

以

琚爲佩名,瑀乃石之可

穿琚

瑀之内角, 衰係衡之兩頭, 組

末係于

其

琚

瑀

所置當於懸

衡牙組之中央,又

以

後

觸

璜

故故

日

[衡牙。

案,《毛詩》傳別有琚

瑀

又

以

組

懸

于衡之中

央,於末著

衡牙,使前

半壁口

一璜,乃《

《逸禮記》文,見《大宗伯

溢

故曰

雙璜

組懸

于衡之

兩

頭,兩

組之末皆有半璧

日

璜

謂《韓

詩

衡

横

也

謂

蔥

玉

爲

横

梁。

下

詩 後 箋

亦非 珠,非 之名未盡 即 稗疏》謂 蠙 也 一類 珠 琚 于此,故言『之類』以包之。」王氏 ,故曰「雜」。 琚 瑀即玭珠,而玭珠專名「雜 瑀 並 稱 正義申傳云:「 是 所 佩 有 玉 有 佩, 佩 石 玉 有

率爲多改反。 與『凝』,『徴』訓『火音』則音『祉』。《上林賦》 咍爲蒸登之陰聲,若『乃』之與『仍」,『疑』之 也,不當改爲『貽』。」孔氏《詩聲類》云:「之 『蔵持』,韋昭 韻相通之理。 召』爲『宫徵』,『得來』爲『登來』,『仍孫』爲 『耳孫』、《詩》訓爲承,皆之咍、職德韻與蒸登 贈』字斷 贈」字皆叶入聲。 顧 氏 「戴先生曰當作『貽』。 不可讀入聲,姑闕之。」段氏《詩小 \sim 詩 云『持音懲』。 此『來』『贈』爲韻,古合韻之一 『螣』字在登韻則爲『螣蛇』之 本音》曰:「《集 然『來』字或可讀 古書用『等』字, 韻》『來』字、 然古人『徴 入聲,

> 《説文》「倗」讀若「陪」,「剻」 訓爲「升」。 近」,亦皆之咍、職 以「來」「贈」韻本可通,所辨極確。 「詒」、「贈」之與「詒」形不 形近致誤。 改「贈」爲「貽」,始於雪山《總聞》,蓋 之言『載』也,此六書轉注之道也。」承珙案: 樂」,重注以爲 「又」協,一 收於登韻、咍韻、等韻、代韻、《詩》則惟 ·載」,又何足爲異? ·耐」,『螣』可 螣 在 德 韻 然「貽」字雖見於漢碑 與『忌』協。 《漢書 則 以 古書『能』字。 爲「螟螣」之「 讀『縢』,則『贈』亦 德 • 與蒸登相 周緤傳》注「憑、陪聲 『曾』之言『則』也,『則』 《樂記》『人 ·相近。 讀若「陪」,「德 螣 通之證 能 段氏、孔 經典 今更考得 能 不 疑二字 可 可 衹 以 耐 字 以 相 氏 作 讀 讀 與 無 几

0

耐」,原作「能」,據阮校本《禮記正義》改。

張逸以文姜爲問 意。」」如鄭此答,則以爲此詩刺忽不娶文姜。 乎?」答曰: 德音不忘。 志》: 『張逸問曰: 「此《序》云齊女賢,經 請 刺忽之不昏于齊。大子忽嘗有功于齊,齊侯 身有賢行,大國長女,刺忽應娶不娶。 何必 而 妻之,後復欲以他女妻之,他女必幼於文姜, 姜、《鄭志》未爲定解也。 嫁不至於此。 狐》之刺,魯有《敝笱》之賦,何德音之有 至於見逐,故國人刺之。」 正義云: 《鄭 妻之。 經謂之『孟姜』者? 《序》云:「《有女同車》,刺忽也。 齊女賢,而不取,卒以無大國之助, 文姜内淫,適人殺夫,故齊有《雄 「當時佳耳,後乃有過,或者早 作者據時而言,故《序》達經 ,鄭隨時答之。 詩人以忽不娶,言其 若然,前欲以文姜 此箋不言文 鄭 人 云

姬是也。庶長稱孟,齊孟姜是也。或文姜是賴「孟姜」者,古者男女異長,嫡長稱伯,宋伯則所謂齊侯又請妻之者,其非文姜明甚。至則所謂齊侯又請妻之者,其非文姜歸魯已久,實賢實長?」承珙案:《春秋》桓三年「夫人實

《褰裳》二篇爲作於前立時,以《山 時,今合之鄭事,殆不謬也。 憐惜歟? 者,豈非以其世子,當立而不克令終,故 載,事至微矣,而國人閔之,刺之惓惓 年六月歸,至十七年遇弒。 六篇皆爲忽而作。 一年五月立,是年九月奔衛,其繼以 蘀兮》、《狡童》、《揚之水》四篇爲 陳氏《稽古編》曰:「鄭詩二十一 案"忽六詩,孔氏以《有女同 計忽兩爲君,其始以 前後在位不 忽之立 有 作於後立 桓 而 扶 篇,其 出 蘇 無 及三 + 桓 獨 Ŧī. 奔 加 已

嫡出,孟姜是庶出耳。

廣漢 之歸 情 甚 忠愛之思,千載如見矣。」承珙案:《吕記》引 其遠君子 權 禍 鄭突不能恃宋以 而 故多惋惜之情,未弑,故多憂危之語。 奔,後立四 所憂在内也。 昏,《褰裳》之思見正,皆汲汲於外援 也 少,追 也 詩 臣 生 之逆節 大 張 不得 一於内 而 人追恨其失大國之助者,蓋見忽之弱爲 有大 念其資於大國 宋 復見弑也,因惡高渠彌而 蓋 氏 人 擅命 忽者,先君之世子,其立 近小人,主弱臣專,孤立 無 也。 曰:「忽之不昏於齊,未爲 詩,其作於忽之未弑 ,援,或當時有賢方伯起 之 自 執 然則前立二詩,其作於忽之既 萌 使忽能 與忠臣良士 祭 矣。 竊國 仲 1,或 故《 也 用賢 矣。 有以 釁 Ш 故《有女》之刺 去奸,斷 起 有扶 共 自立 於 圖 乎? 外 蘇》諸 一,此國 或 不能去也, 無輔之事 而 也 也 政 制 Œ 正 也。 既奔, 失 則 之, 詩人 威 人之 篇刺 使 也。 福 故 臣 忽 辭 則 結

> 耳。二 曲 而 其 童』者,而猶憂之而 其 人之情 (無忠臣· 暢。 始 也,不能懲創 陳氏 也 或 良士 之説 猶不 人 見 欲遽 蓋 而至此極也。 其 而 本於此 用賢,於是 逐 不 絶之者,以 而 能餐、不能 憐 一, 而 其 無 推 夫忽蓋不足道 至有目之爲『狡 助 其立 闡 息也,又関 情 至 之正 事 於 尤 其 故 復

歎,亦未失忠厚之遺也。 亡大援,以 禍亂之萌已非 時,内多嬖寵 昏 之,忽之辭昏有二。 禮義之公, 有 之辭昏未爲 可 爲辭,其守 刺之罪,故力斥《序》爲失是非之正、害 趙氏 文哲有《媕雅 致 而 不正 失 外 外 義 疑 國 此 朝夕之故。 不可謂 一,其 有權臣,群 一,國人 詩 堂别集 始以: 失國 亦 淫 不正。 目 非耦 且忽之辭昏,祭仲 以 * o 奔之作。 擊心傷 勢孤 公子交構其 日 忽以守小 爲辭,繼 特 : 援 是 朱子以 形 弱, 間 鄭 諸 節 嘗 莊 以 亦 間, 而 考 忽 嗟 師 未

閾,伯

有之賦《鶉

奔》何以

見斥於趙

孟

邪

。」承

宣子謂

六

卿

賦

詩皆昵燕好

則

所賦

諸

其醜者?

如

日

賦詩斷章,則牀第之言

不踰

和

之義。

若果淫詩,豈有鄭

人賦

鄭

詩

而

自

彰

傳》昭十六年。

飾

昭彰

耳目

者乎?」《虞東學詩》曰:

\ 左

盛

六卿餞韓宣子,子旗賦《有

女同

與唱

洧》之相謔,《桑中》之相要,有如是之威儀

步之節。

曰『孟姜』,則本齊族之貴。

彼《溱

車》,子柳賦《蘀兮》,皆有求助大國,相

就經文詮之,同車者,親迎授綏之禮也, 行者,御輪三周之候也。 立。』忽不能聽。 奔之詩者,朱子特以《鄭風》而臆之耳。今 詩者與序詩者一人之私言乎? 。是當時,鄭之廷臣及後之據經作傳、 子之教如 『君多 君子譏其善自爲謀 左氏者,皆以其辭 内 龍,子 曰『佩玉』,是有 無 大 援, 昏爲失, ,而謀不 至以爲 將 不 矩 同 啚 所以不可廢也。 而以《序》合之,則微婉之旨畢見,此《序》之 亡,尚不如許昏於齊,猶或可藉大國之助 以忽之辭昏無 裳》、《風雨》必皆非淫詩,固 忽雖言自求 詩自子産《羔裘》外,其 存也。 凡詩人言外之意,不必詩中所有 多福,而卒之不能 可刺者,殊不知詩人之意,以

淫

親

承

孔

作

及國

不言之乎?

餘

如《野有蔓草》、《

寒

無疑義。

至諸家

自

保,國亂

身

間 爲 乃 嚴《緝》以「有女」即「孟姜」,其文重複,「彼」 女。 也。 美孟姜」指忽所不娶者。 美。」正義謂忽實不同車,假言同車以刺之。 詩 娶他國之女,其説出 别指之辭。 舜,木槿 學》因之,謂 親迎與之同 有女同車, 顔如 也。」箋云:「鄭人刺忽不 「有女同車」指忽所娶者,「彼 車,故稱 即 忽所娶之陳 舜華」,傳:「 自 承珙案: 歐 同車之禮,齊女之 陽《本義》。 嬀。 以「有女」 親 迎 考《春 娶 同 **田** 車

當 ? 複也。 服飾 整。 秋》鄭 哉 人,下言「孟姜」,實指其姓,不得謂之文 娶之失自在言外。 時,有女同車,其容色佩服之美若此,彼何 木槿之華,朝生暮 隱八年,何 川則 之美,而 其實此詩衹因辭昏失援,故設言親 殊 孟 公子忽 姜也。 爲 無 得 理 如 不足恃。 因 通篇皆形容歎羨之詞, 陳 後 落,雖翱翔 嚴《緝》又謂 逆 日 上言「有女」者,虚 婦 辭 嬀 説本《埤雅》,亦 昏追咎於前娶之不 乃 以 佩玉、徒有 所娶之他 王命結昏 想 迎之 而 多 威 女如 其 人 穿 不 儀 在

瑀 文》,而證其爲佩 瑀」。 正 義 所 引此傳『瑀』作『玖』。 考《女日 以 將 牙之類』。 翱 納 將 間 翔 雞 鳴》傳云『雜 校 正 佩 則『衝牙』及『珩』引《玉 勘記》云: 義 玉 瓊 説之,於字皆引 琚」, 此據宋本。 佩 《女曰雞 傳 **:** ,珩、璜、 今本皆作 佩 有 | 説 琚 鳴 琚 **>**

> 琚」。 人注 箋,不敢横生異義 借『玖』爲譬况矣。 若此傳作『瑀』, 是極言昏禮之美。 又李華書云:「《詩》曰 案:上篇傳言「琚瑀」,此篇傳言「琚玖」,古 玖與瑀皆是石次玉,玖 引《邱中有麻》云『貽 獨無所證,故先引《説文》瑀、玖,石次玉,後 藻 經,原有互見相 此奉舅姑助祭祀之儀也。」亦可 .璜』引《列 女傳 則傳自有明 如 唐人説《詩 此 我佩玖」,而 作『玖』者是 ×, 足之例。 是佩, 『琚』 『將翱將 證,不 引此 則 《校勘》説是。 》,其恪 瑀 云『然則琚 翔, 經 也。」承珙 當舍之而 亦 佩也」。 見 佩玉 惟 守傳 此 「瑀」 詩 瓊

其 齊侯請妻之音。 作音,可證。」《吕記》引長樂劉氏 「也」字。 德也。」《校勘記》云"「近本誤作「傳其道 德音不忘」,箋云: 小字本作「傳道 鄭人懷之不能忘也。」此蓋 其德也」爲是。 示 忘者,後 曰 : 《釋 文》以「傳 「德音,謂 德」,又 # 傳 道 道 脱

疑於 譽,此言『德音不忘』即所謂賢而不娶也。」 恨不娶之也。 知 緝》云:「言齊女有賢譽,至今使人不能 孟 姜 所指者爲文姜。 本 . 非 文姜,安知 《車舝》『德音來括』言其有賢 不 足當德音之美。 其必 無賢德? 忘, 嚴 不

山有扶蘇

或 非 推舊交之『都』,作爲歌詩肆 乃思絕者之美好,而厭 之曰:『此是淫女見絶於男子,而復私於人, 改此詩爲『淫女戲其所私者』。 取其説,著之《讀詩記》。 説『所美非美』謂賢者佞,智者愚也。 之女縱 美然。」朱氏 而 《序》云:「《 録 有淫行,何至 此惡詩,幾何不慮後人之唾棄乎? 霈著《經學質疑》。 云:「朱子初 Ш 有扶蘇》, 所私之狂狡也。」夫鄭 明 斥 朱子亦曾與之,後 情無忌。 新 刺忽也。 好之『狡』,顯 白雲許氏 以 吕東 聖人 所 萊 申 美

此必不可從之説也。」

蘇」,與「扶持」別,是經字本亦作「扶」。 箋掍合而改之。」承珙案:《佩觿》引「山 扶疏」、《吕覽》『樹肥無使扶疏』,是則扶疏謂 樹上枝葉,●扶 借也。《上林賦》『垂條扶疏』、《劉向 注:「扶之言扶也,古書多作『扶 字,非也。」《説文》:「扶,扶 雅》引毛傳「扶蘇,扶胥,木也」。 大木枝柯四布。 『疏』 通作 『胥』 ,亦作 『蘇』 。 字爲長。正義作『小木』,乃淺 也。」段氏《詩小學》云:「此從《釋文》無 有荷華,是爲高下大小各得其宜。 鄭風 Ш 山 有扶蘇」,傳: 有扶 疏 蘇》,毛意山 上出 屋」、《楊雄傳》『枝 「扶 蘇,扶胥,小木 有大木, 隰 疏 四 人用 是所見本尚 疏 布 後 同 . 傳 鄭 也 X 」。」段 有扶 影梓 . 音 假 説增 則 以 小 葉 埤 鄭 僅

● 「樹上」、《漢書》作「柱生」。

彼白梓。」據此,則「枎」自爲木名。 員》篇:「五沃之土,宜彼群木,桐柞枎櫄,及 之地」,注云:「榑木,大木也。」「榑」亦 柯四布」之謂。 曰「扶蘇」,急言之曰「扶」,扶蘇即枎木耳。 扶木」即榑桑,榑桑猶言大桑。 扶」。《淮南 惟 傳 ≪ 吕 墜形訓》:「扶木在陽州。」此 既 ... 以 扶胥爲木, ・求人》篇 《 管 子 似非 東 蓋緩言之 至 僅 榑 地 作 木 枝

大小, 欲樹 倒,失其 隰 隰,大謂扶蘇、松,小謂荷、龍,正言以 山,喻忽置不正之人于上位也。 義近牽强 二章一 ,喻忽置有美德者于下位。此言其用 荷于山上乎? 毛 各得其宜」。箋云:「扶胥之木 例,皆謂各得其宜。 傳以「山 所也。」承珙案: 傳意高、下謂 荷 華 有扶蘇,隰 喻美德,不宜置于下位,豈 且首章既以 有荷 箋互易其 華」言「高 荷華 扶蘇 小 刺 生于 喻 生于 臣顛 忽。 Щ 茅 下

喻不美,使山隰倒置,比物錯互,非也。美,荷華喻美,下章又以喬松喻美,●而游龍

雖美而 念孟 耳。 林•蠱之比》云:「視闇不明,雲蔽 子充,皆假 貌,則與『狂且』意義不貫。」承珙案:子都 爲賢者,一爲女子也。若以此『子都』爲美 『子都』,以德之美。猶『美人』之名,或稱美 此詩之「子都」。 見子都,鄭人心傷。」蓋不見者,謂有 貌,或稱美德也。 也。」嚴《緝》云:「世稱美好之人爲『子都 子》所稱『子都』,以貌之美,此詩 後儒因《左傳》公孫閼字子都,遂 「不見子都」,傳:「子都,世之美 不見。 言賢者,不必 下乃見「狂且」,則 而「子充」無所考,豐坊 《詩》『彼姝者子』兩出 實 有其人。《易 所 日 美 所 附 .光,不 所 好 乃造 非 蔽 會 者 爲 美 則 稱

❶ 「喬」,原作「槁」,據《續經解》本、廣雅本改。

無稽之言,不足與辨。 之宋大夫名狂狡者爲「狂且」、「狡童」。 類皆爲瑕叔盈字子充之説,并以宣十二年《左傳》

但如「西方美人」之謂,而非以爲美色耳。以美惡妍媸爲君子、小人之喻,次章『子充』即是一本有作「美人」者。「子都」即美人,專,定本云『所美非美然』,與俗本不同」。據事,定本云『所美非美然』,與俗本不同」。據以美惡妍媸爲君子、小人之喻,次章『子充』以美惡妍媸爲君子、小人之喻,次章『子充』。《稽古編》曰:「首章『子都』、『狂且』,鄭

馬 高 云:『一名馬蓼,葉大而赤白色,生水澤中, 丈餘。」」承珙案:《 草》云:「『紅,蘢古。 也。」「 紅名蘢 隰 有游龍」,傳:「龍,紅草 鴻 即 古,其大者名蘬。』陸璣《 · 「紅」。 廣 雅》云:「鴻、龍 龍 其 頡」即「龍古」,語 大者蘬。」舍人 也。」正義 疏》 頡 引

龍」。 之轉。 所 邪?」姚氏《識名解》云: 不根茇者,生於萍 容華生蔈,蔈生萍藻,萍 南》言水草之始,海閭 次章言『喬松游龍』應此『五位之土』也。 群木安遂,條長數丈,其桑其松,其杞其茸。』 草之偉者,然所配扶蘇、喬松不 草即水紅,下溼地皆有之。」引《詩》「隰有 『其山之淺,有龍與斥。注云:「龍、斥皆古草名。」 荷華,應此『五沃之土』也。 生,蓮與蘼蕪,藁本白芷。 言五沃之土,桐柞 爲蓼之大者,即今之水 蓼而大,生水旁。」語與《廣雅》微異。 自 ,必是從其始生微者言之,豈有 是也。《爾雅翼》云:「龍與荷 《本草經》云: **枎**櫄,秀生莖起,五 藻。 「葒草, 生 紅。 屈 藻生浮草。 屈 然則 龍 淮 龍 《圖 其『五位』曰 屈 南 名鴻 豈 同。 首章言扶蘇 經》云:「 葒 亦 龍生容華, 逆 此 凡浮 溯 大抵 《管子》 華是隰 一臭疇 浮草 龍 蘢 《淮 如 草 之 游

蓋謂 也。 訓》歷言人物所生,皆取其類之相近者言之, 不始於羅氏矣。 大而 云『隰有游龍』。」言「屈」字之誤。 一游 龍」,未可據也。」承珙案:《淮南 况高誘注云:「屈龍,游龍,鴻也。 同類者相聚以生耳,非必以彼物生此物 生 萍 蔈 細 物 者 邪 ? 羅端良 以『屈 然則其説 龍」爲 《詩》 墜形

同,不應異訓,故正義并以「狂且」指昭。惟悉之,失之矣。」惠氏定字曰:「《狡童》序以昭公,失之矣。」惠氏定字曰:「《狡童》序以昭公,失之矣。」惠氏定字曰:「《狡童》序以昭公,失之矣。」惠氏定字曰:「《狡童》序以昭公,失之矣。」惠氏定字曰:「《狡童》序以。自指昭公而言。但此詩首章「狂且」,傳學」,自指昭公而言。但此詩首章「狂且」,傳不應異訓,故正義并以「狂」「殺童》序以。所為,自指昭公而言。但此詩首章「狂且」,傳問,不應異訓,故正義并以「狂且」指昭公、原不爲無據。」承珙案:「狡」爲明以目昭公、原不爲過于指斥。「彼簽章》序以。「於好」之「狡」,與護力,與其之。

案: 《序》云「所美非美」,則「子都」、「子充」爲美 公之言,故曰:"「狡童,昭公也。」昭公有壯狡之志,傳以「狡 後脱誤移於此耳。彼《序》刺忽不與賢人圖事,爲賢人指 之義於《狡童》篇釋之,似此傳「狡童,昭公也」係彼傳上文: 著之,不應於下章始言。 爲長。其言是矣。然以傳義求之,疑傳文有誤也。傳以章 童」之義在後總釋,此因略而不言。 且」、「狡童」目昭公也。傳如以目昭公,亦必於釋「狂且」下 舍失當,反正對言,合《序》「所美非美」之義,無由以「狂 首二句爲反興,則下二句義當接成。 曰:「孫毓謂傳以「狡童」爲昭公,於義雖通,不若箋指小人 義實勝於傳,不必曲爲解説。 言其義,傳文何雜碎乃爾! 「子充」爲良人,正指君子,則「狂且」、「狡童」當指小人,用 而「狂且」、「狡童」爲不美,正與經文脗合,箋 此說雖無明據,然細釋文義,固是通論 又上章解「狂且」之義,而「狡童 彼此參校,知不如 不然於此言其人,於彼 傳釋 「子都」 爲美好 汪氏《毛詩異義 是也。」承 昭

蘀 兮

蘀兮蘀兮,風其吹女」,傳:「蘀,槁也。

略斷 也。」 其吹女」之「女」不得指大國,又當自喻 以傳箋爲是。 本屬古義。 正, 以 兮伯兮」與《旄邱》同。 之意。《吕記》、嚴《緝》皆本之,以風之吹 人 喻國將危亡,以「倡予和女」爲大臣 謀 和 臣 國 蘇氏《詩傳》則謂此憂懼之詞,而非 ,「予和女」之「女」是指大國而言,而「風 於君,不 并謂倡 待君倡 ,理之常也。 難 者 君出令,臣行令,又係常經,仍當 或且因《褰裳》序云「思大國之見 而 待 若謂思大國之倡,則「倡 後 望晉之倡義納忽,以 君 和 今也君弱臣强,專命 。」李氏《 命 而 承珙案: 風 動, 集 詩人 解 <u>*</u> 所 相 此 喻號令, 以 約 詩「叔 君 其國 三字當 自恣 刺 倡 倡 之 達 倡 和 和

當是『女』也。箋以爲群臣相謂之詞,言女倡傳以爲君責臣之詞,言倡者當是『予』,和者《稽古編》曰:「『叔兮伯兮,倡予和女』,

是兩

「女」字異義,非也

文義 者叔 和屬群 斷 相 必如傳義,下二句乃與上興意一 乎?」承珙案:經 父爲伯氏,安在 矣, 自 康成之意,徒以 君臣不相 叔父,鄭厲公謂 相 謂 『予和女』三字連 則我將和 謂耳。 殊不 而 而 和 倡 臣 者 明 倡 和,又爲 則與興意乖 晰 伯 案:《左傳》魯隱公謂 和,應舉 之 乎, 原 叔伯爲兄弟之稱,當是群 也。 叔伯之稱君 抑倡 繁爲 群 以 風 讀。 臣 倡 如 隔 者伯 吹 箋 伯父,晉景 自 和 蘀 然傳義 以 之常理 意 且既云伯叔群 隕 强 ,則『倡』字當 而 興君 弱 和 不可 貫。 者 相 以 勝矣,鄭之 公謂 公子彄 叔 服 倡 正之也 施 箋以 乎,於 將 臣 於 荀 和 倡 臣 林 臣 倡 爲 臣

贏。 引《老子》「故物或行 羸 ,或載或隳」,「隨,古音 隳,即『墮』之俗字。 顧氏 《唐韻 正》云:「吹,古音昌 或隨, 或响 旬禾反。 皆在 或吹,或 歌 韻。」承 羸,古音 戈 反。 强 珙 或

本从 字。 案: 相 王氏《總聞》讀「和」户圭切,引《老子》高 證 傾 **嫷省聲也** ,長短之相形,聲音之相 以《詩》音讀之,自當如「瑳」,以 説 是徒見今韻 文》 吹 嘘 「隨」人支韻 也 从 口 和 欠」。 ,而不知 ,前後之 協 是 不和 相隨 會 下之 隨 意

狡 童

所弑 同 立不 子謂《春秋》止書『鄭忽』,不以忽爲君也。 臣 夫《春秋》書『鄭世子忽』,則國 以忽爲君,故詩人目爲『狡童』。 盟 啚 事 ,中間不書『鄭伯』,非故略之也。 一時 ,死不赴告,孰 序》云:「《狡童》,刺 7,權臣 杜預譏忽守介節 而爲突所 擅 命也。」朱氏《通 從 逐 而 ,歸國二年 書之? 而失大援,父没而 忽也。 固 《春秋》此 旋爲高 義》曰:「程 此説 忽之國 不能 殊 生不 渠彌 與賢 非。 也。 不 類 不

傳》: 豈私 之也。 之。 忽矣。 古 可刺之道矣。 討,外無强援, 高渠彌發難 與我好兮。」』『狡童』可 歌》《尚書大傳》以爲微子作。 假狡童以 矣,但解此詩爲淫女所作,則其失殆有甚焉 也。 能自 有 以愚臆之,此詩乃昭公見弑後,國· 諫 此 然昭公之復國 不聽。 伊 君 方言,動相指斥,不必未成 初 《史記》:『箕子過殷墟,作《麥秀之 朱子又云忽無大罪,國 鄭忽乎哉?」承珙案:桓 川奈 鄭 鄭 爲刺也。 人亦 伯將 何亦 而 昭公立 聖人 不 内無良輔, 不 能 以 踵其失乎? 君之,此 『狂且』、『狡童』,蓋當 録此等詩,以示 也,祭仲擅 高 察,突居 ,懼其殺己也,辛卯弑 渠彌 自 曰:「彼狡童兮,不 紂,則此不嫌於 以至於亡,則固 爲 蓋 鄭 卿 爲 權 别 人不 朱子之辨 ,昭公惡之, 人者始 篡 十七七 而 都 人哀之,而 或 戒 不能 應 而 者 年《左 萬 數 不 可 左 世 制, 能 多 刺 擬 加 時 袒

疏云 弑國危而 者,故《山有扶蘇》、《蘀兮》、《狡童》及《揚之 之爲人,殆見賢 謂 惡」,以見其 水》皆致慨於其不能任忠良、去權奸,以致身 也,而不知早誅焉,以及於死,故言『知 知之明,而嫌其心不斷也。 公而立公子亹。 忽善自爲謀」者,皆不足於忽之詞。 :「韓子以 不悟也。 無 權 加 爲言君子 也。」此與桓六年《傳》「君子 君子謂昭公知所惡矣。」孔 不能舉,見不善 知所惡者, 日知之若是其 而不 非 能 蓋 多 忽 所 其 明 退

通 疏 獪」也。 申之,以爲『佼好』之『佼』,非如後世解爲『狡 一於乎 Ш 稱 亦云:『佼好之幼童。』則『佼童』 只是少年 有扶蘇》箋云:『狡童有貌而 ,非甚不美之名。 錢氏 《狡童》傳云:『昭公有壯狡之志。』 子!」古人質樸,不 竹汀曰: 「古本『狡』當爲『佼』。 衛武公刺厲王 ·以爲 無 嫌。」段氏 實。」孫 云: 毓

之志 則又非 志在· 昭 形貌佼好之稱明甚。 傑也。」據 子·非相篇》:「古者桀紂長巨姣美,天下之 皆當作『姣』。 力之士。」是「壯狡」與「雄武」意略 秋》作「壯狡」。《詩・碩人》箋「長麗佼 以『童心』釋之,是也。」承珙案:「狡」、「佼」、 而憂之,至不能食息焉。 人僚兮」、《釋文》並云:「佼,本作狡。」《荀 姣」三字古通。 還》箋、《猗嗟》箋「昌,佼好貌」,《月出 詩經小學》云:「『壯狡』與《月令》之『壯佼』 公爲悖理者,皆不達古人文義 自會奮 而闇于事機,終將及 徒 一,而所 形 此,則箕子以狡 貌。 姣,好也。 與 《月令》「養壯佼」、《吕氏 高 圖 注《吕覽》云: 者 且 非 此 然則謂 福,愈: 其 童目 有壯狡之志,正義 傳 人,故 云「壯狡之志」, 紂者,亦止 使 者 毛 「壯狡,多 惟 同。 人 以 也 狡 思 有 |||佼 好, 童 其 昭公 壯 故 目 狡 爲 春

褰 裳

所言 是事 行,國 大叔 晉賦之,即 章取義者,如詩 有如是之唐突者乎? 而公然歌於聘卿 於《左傳》,而未察其斷章取義之意。不知斷 宣子曰:『起在 晉人欲攻鄭,令叔向聘焉,視其 子産爲 ,其能終乎?』

二朱子以爲《詩序》之失本 子不我思,豈無他 拜。 ,則「狂童之狂」乃斷章以 「鄭六卿餞韓 人思大 序》云: 宣子曰:『善哉,子之言是。 是 之《詩》 斷 國 此,敢勤 章取 本爲 祖餞之際,必無是 之正己 褰裳》, 宣子。 三 : 義矣。 鄭忽而 《吕覽 士。』叔向 子惠 子至于他 思 也。」昭 子大叔賦《褰裳》。 若謂 見 作,而歌詩 · 求 正 思我,褰裳 譏韓宣,天下 歸, 以 也。 十六年《左 人》篇 (有人與 人乎?』子 本國 理。 狂 不有 者爲 且如 淫 日 童 鄭 涉 無 詩 恣

> 異 其《詩》」耳 事白,無 有人,子産在焉,不可攻也。 心,不可攻也。」晉人乃輟攻鄭。」此 庸 别 生 一歧説。 「爲之《詩》」即 秦荆 近, 尤義 其 謂 詩 有 炳

合。 以名? 狂也且。」 篇》云:「僮 羊》曰:「其稱『世子』何? 十五年「鄭伯突出奔蔡」、《公羊》曰:「 仲、高渠彌者,亦未是。 突賂宋奪嫡,實爲戎首。 也。」承珙案: 奪正」,忽爲「復正」,與《序》云「思 突歸于鄭」、《穀梁》曰:「曰突,賤之也。」 詩傳》謂 然則所謂「狂童」, 狂童之狂也且」,傳:「狂行,童昏 奪正也。」「鄭世子忽復歸于鄭」、《公 傳 狂 日 幼 童爲忽,固 狂童,箋疏 迷荒 『狂行,僮昏所化也。』」字皆 者。 非指突 祭仲等固屬 非。 《春秋》桓十 皆以 復正 詩》云:『狂 或 而 又 指 也。」夫突爲 以 突。 何? 見正」者 亂 爲 臣 指 僮 年 蘇 突何 所 玉 氏 書 祭 桓 化 而

作「僮」,今《毛詩》作「童」者,乃借字耳。

者,固屬借字。 『袴』,非其義也。亦有作『騫』者,謂虧其下 段云:「《詩》言『褰裳』,當作此篆。『褰』訓 摳衣,不必有虧損之義也。《白虎通》云: 體之衣,較作『褰』者爲長。」今案:作「褰」 與襦」,是「袴」爲本義。《毛詩》借爲摳衣之 案;《説文·衣部》「褰」下引《春秋傳》「徵褰 本或作『騫』。《説文》云:褰,袴也。」承珙 詩 「《易》曰『黄帝、堯、舜垂衣裳而天下治』。 拂衣,騫裳也」作「騫」,亦以聲同,故借以手 騫』,騫,虧也。」蓋因《釋文》或作,故云然 》曰『褰裳涉溱』,所以合爲下也。《弟子 又《手部》:「攘,摳衣也。从手,褰聲。」 段注《説文》於「褰」下云:「古騫衣字作 上爲衣、下爲裳? 褰裳涉溱」、《釋文》云:「褰,起連反, 即如《左傳》襄二十六年。 以其 先言衣 也。 何 注

云: 《水經》作『潧』,誤也。」又注《説文》「溱」字 『溱』、《外傳》、《孟子》皆作『溱』。《説文》及 聲。』《詩》曰:『潧與洧。』『溱水,出桂陽 韻,二章『洧』與『士』韻,出鄭國之水本作 韻,曾聲在今蒸登韻。此詩一章『溱』與『人』 洧,《詩》作「溱洧」,誤也。』按,秦聲在今真臻 武,入洭。从水,秦聲。』《廣韻》: 云:「《説文》:『潧水,出鄭國。 「《地理志》鄭水作『溱』,粤水作『秦』。 傳:「溱,水名也。」段氏《詩經小學》 『潧水 从 水, 南 臨

知 出 錯如是。 異,「潧」下注又與「溱」下注異,不知何以舛 誤。」承珙案:段氏注《説文》,與《詩小學》 變之耳。 别如是,後來因《鄭風》異部合韻,遂形聲俱 今經傳皆非古本。《廣韻》曰《詩》作『溱洧』, 經》皆云潧水在鄭,溱水在桂陽,蓋二字古分 與『人』韻,學者疑之。玉裁謂《説文》、《水 故《水經》『觀峽』亦名『秦峽』也。 又《方輿 潧」字云:「按曾聲在十六部,●而經傳皆作 溱水』讀如秦國、《前志》『秦』爲古字。」其注 何 桂 出平輿之溱水。」若其出鄭縣者、《説文》以 陽臨 時 秦聲側詵切,則十二部。 ,其音如 盡《毛詩》、《國語》、《孟子》、《史》、 紀要》引《舊志》云『溱』與『尋』同 《説文》引《詩》,爲『潧』字之證,知 全氏謝山曰:「按溱水、《説文》以 武者當之,而《水經注 「溱」,其字不作「溱」也。 ・汝水》篇亦 《鄭風》『溱』 據此 可證

> 《爾雅》:「烝,塵也。」《 文》也。」又《説文》「蔆」,司馬相如从「遴」。 即「潧」之轉音,不可謂《詩》失韻,亦不可據《詩》以疑《説 「潧」,今《毛詩》作「溱」者,讀「潧」如「溱」,以諧韻耳。 「溱 皆不誤也。錢氏《養新録》曰:「「溱洧」之「溱」,本當作 韻。經傳作「溱」、《説文》、《水經》作「潧」,蓋 登二部中字自有可通轉者,故「潧」與「人」亦 也。」箋云:「古聲寘、填、塵同。」此 溱溱」,與《閟宫》「烝徒增增」皆爲衆盛之義 「潧」雖異部,殆以音近而通。《小雅》「室家 存其舊,稍留《説文》之學。 漢》諸書之「潧」胥改爲「溱」。 楙 承珙又案:「溱 風》 傳:「烝, 猶 幸《水 真臻與蒸 經 窴

宋、衛,宋本「衛」作「是」,蓋「宋衛」乃「本是」二字之誤。齊、晉、宋、衛,後之荆楚。」正義云:「齊、晉、晉、晉、宋、徹,後之,箋云:「言他人者,先鄉

作「則在」。 作「則在」。 作「則在」,上海古籍出版社影印經韵樓本《説文解字注

齊不在助突之列。

箋當止言齊晉,必不兼及

羊》多「齊侯」二字,《左傳》、《穀梁》無之,是

助突爲篡,故思大國正己耳。」考袲之會,《公

耳。 通。」《校勘記》云:「據此,是正義本箋無『宋 定本云『先鄉齊、晉、宋、衛,後之荆楚』,義亦 大 夏大國 國。 其實大 故 ,與鄭境接連,楚則遠 國 箋舉 非 獨 以 齊晉,他人非 爲言,見子 在荆 與 獨 他 荆 州,是南 人之異 楚 也

諸

者,此承定本之下,因引《春秋經》有宋公、衛 國』者,誤。下文又云『而告齊、晉、宋、衛』 今正義作『齊、晉、宋、衛,諸夏大 皆可通。 恐他人之先子也。是則激之之意。」二説 宋衛、定本有「宋衛」 氏《詩傳》則云:「『子不我思,豈無他人』,我 望大國之正己,其情甚切,不主一國也。」蘇 思,則豈無他國 説謂爾不我思,則當有他國思 自爲悠緩之詞,非

思 我

者乎,何爲皆不

來也

告急之意。

當云子

不

我

者

非

是。

嚴《緝

* *\frac{\frac{1}{2}}{2}

舊

我者。

如

此

則

衛』二字。

豈無能任其事者乎。 者,正謂 改注。經果是『士』字,何須傳乎? 前文『士 謂 曰 : 士 曰昧旦」,何以不傳也? 爲士者,亦以其能任事,故名之耳。《北 耽』皆不傳。」承珙案: 事即士之假借字,轉寫以 「經當本作『他事』,傳當作『事,士 豈 無他士」,傳:「士,事也。」段氏 與泛言「士」者不同,猶云子不我思 蓋「士」本訓「事」,其稱 『吉士誘之』、『無與 傳訓「士」爲「 注改經,又以 也 懋堂 經

之櫟邑。

其年冬,經書『公會宋公、衛侯、陳

侯、陳侯、蔡侯

伐鄭」。

《左傳》稱:『謀納

厲

公也。』則是諸侯皆助突矣。

由宋、衛、蔡、魯

侯于袤,伐鄭』。

十六年四月,『公會宋公、衛

案:正義又云:「《春秋》突以十五年入于鄭

侯,遂并説『義亦通耳』,與上文不同。」承珙

似

同,段氏於彼亦云:「經當作「爪事」。」與《東山》「勿 Ш 訓「士」爲「事」,與《祈父》「予,王之爪士」傳 也。」皆因文立訓,使與本義相 士」直訓「士」爲「事」者義異。 士行枚」、《敬之》「陟降厥士」、《桓》「保有厥 他 『》「偕 士,猶他人也。」 偕 士子, 傳 云: 「士子, 故箋申之云: 比附。 有 王 故 事 此 者 傳

丰

陽倡 禮 也。 之詞以刺之。 曰: 而意終欲隨之。 女之情,而其父母之惑也,故託爲女子自怨 ,以名通在女子不必知其夫之字也。 「此《坊記》所謂親 蓋言俗之衰薄,婚姻而卒有變志,非男 《序》云:「《丰》,刺亂也。昏姻之道缺, 而陰不和 悔不送,以明己之不得自主, 男行 後二章望 而 迎「婦 女不隨。」戴氏 其復迎己以 猶有不至者』 行昏 東原 「叔

> 亂。 《記》云:「婚姻之禮廢,則夫婦之道苦,而 恥道盡,尚足以污簡册哉 又稱伯,一女子而欲從二人,是人盡夫也,廉 亦可 奔而備衣裳、駕車馬以行者乎? 不行者有之。若以爲淫奔之詩,天下豈有 辟之辠多。」然《序》但云刺亂,未必 見惑由父母爾。使父母知男女之情如 必無自主不嫁者也。此託爲女子之詞,正以 不出於女子。 曰:非也。凡後世婚姻變志,皆出於父母, 其人也。 兮伯兮」,便文連稱,不 或者國亂民貧,父母變志,男親 以 解矣。」承珙 或曰,女子始 詩言迎者之美,固 案:此説極 知其字之辭, 有所爲 留 所 者 且既 爲 願 · 非 定 迎 非 員 此,惑 嫁 稱叔 爲 不 而 通 也 淫 淫 女 浮 知

《桑中》言送者相似。承珙案:送,猶致也。者。」或謂昏禮,女隨男行,無所謂送,故當與「悔予不送兮」,傳:「時有違而不至

《荀子 姑。 幣也。 異説 意。 康成《詩》箋爲得其義,何爲注《禮》乃更妄生 不至也。」正與《丰》詩 也。」其「昏以 昏姻失時,男女多違。 迂曲。《陳風 以「違」爲「夙 民,婦猶有不至者。」毛傳即 傳以「違而不至」釋之,蓋即以「送」爲致女之 託言於其家之不致,非 女」者,即以女授壻之謂。 婚姻娉内,送逆無禮。」注:「内,讀曰 違」,以「不至」爲「不親夫以孝舅姑」,解殊 《坊記》:「子云:昏禮,壻親迎,見于舅 舅姑承子以授壻,恐事之違也。 · 富國篇》云:「男女之合,夫婦之分, 送,致女。 知 鄭 爲 • 東門之楊序》云:「刺 先 夜無 期,明 注 逆,親迎也。」《春秋》言「致 《禮》後箋《詩》,固當 違 相 星煌煌」傳云:「期 命」、「毋 自謂 親迎,女猶有不至者 類。 此女悔其不行,故 用 其不送男子也。 《匡謬正 此語。 違 宫 以此 鄭彼注 事」之 納,納 時 俗 也 以 謂 而 坊

> 《詩》箋爲定論。 時行」,其實違而不至,變故 異人之色」,於《陳風》亦云「女留 盡由未嫁之女先從奔誘而然耳 但於《鄭風》云「時不送則爲 或非 他色,不肯 一端,未必

門堂也。《著》云『俟我於堂』,文與『著』『庭 外,此言待之於門,事之次,故易爲『棖』也。」 以王爲毛説。 於廟堂。庶人雖無 爲類,是待之堂室,非門之堂也。 尊,故於門設塾,庶人不必有塾,不得待之於 非爲文次,故轉『堂』爲『棖』。 巷」,此言『於堂』,『巷』之與『堂』相去懸遠 『庭』之下,可得爲廟之堂。 此篇上言 『於 前。』按:此篇所陳,庶人之事。 『堂』之義。王肅云: 『升于堂以 云:『禮,門側之堂謂之塾。 何俟 我 乎堂兮」,正 箋以《著》篇言『堂』,文在『著』 廟,亦當受女於寢堂。 義 日: 謂 上言待於門 士禮,受女 出 人君之禮 俟。」 此 俟 傳 於 孫 不 塾 毓 解

三四七

《漢 既 門」,以「塾」爲「夾門堂」,不誤。《尚 即「家有塾」之「塾」。 旦坐於右塾,鄰長 傳》:「上老平明 之塾。」二句連文,「門 塾」,正義曰:「《周禮》,二十五家爲閭,同共 且 承 然里門自 孫毓謂門側之堂者爲是。庶人雖未必有塾, 堂室之堂,則不應先言「巷」而後言「堂」。 内,亦非 爾雅 二字古通 巷,巷首有 上既 珙 人,婦人同 ·釋宫》:「関門謂之閎,門側之堂謂 待於門外 食貨 事之次。 棖 ,然此詩 有塾名。 爲 巷相從夜績。」此可見一里之 志》亦云:「春秋出 門, 門 坐於右塾,庶老坐於左 閩 門邊 本不 雖申 坐於左塾。」又云:「冬,民 此 《學記》「古之教者 E 又待於門,仍是自外而 |側|即 豎 郭注 有 棖 煩改字。 木, 塾,故云家有 《論語》。 以「閎」爲「閧 関門之側、「塾」 非 可 若王肅以 申堂 民,里胥平 待人之處 《史記 書大 塾。 家 惟 頭 爲 有

> 巷,巷外有 王謂堂在寢 第分明,不必從鄭 之門,始俟乎里 門, 也 門 中 側 之巷,繼俟乎巷首之門, 改 有 「堂」爲「棖」,亦不得同 堂。 親 迎者既 出 寢 次 廟

東門之墠

此也。 不待禮 曰 文。 解 解。 奔男之説。 序云『男女有不待禮 「朱《傳》以鄭詩多屬淫 有不待禮而 準上章 據《爾雅·釋言》「後,淺也」,無「踐,淺」之文。 「此詩 乃今詳繹諸 《序》云:「《東門之墠》,刺 毛傳本渾言男女交際之難易, 而 奔,故 最 亦難 惟以『踐』爲『淺』,疏以 相 難 奔者也。」翁氏《詩 曉。 易爲喻。」「踐,淺」,疏以 思古之人能以禮 家之説 此是思古 而 奔,故於《 相 ,而知《序》説 奔者』,獨 之詩 亂 附記 東門之墠 也。 自 爲《釋 爲 取 初 亦 防 李樗 其 男女 無 無 不 也 明 女 得 如

越

禮

而

行

有禮

以限之也。」此説亦足以發明

特

義

不

. 得

往耳。

室既邇矣,人之遠者

不容

故曰 從者也。 似,無淫奔之風,婦人女子猶知所守,而不 氏克《詩説》曰: 茅蒐生焉,則是任意指目,意味索然矣。 奥,其義甚精。 則 其來迎己, 以墠阪之遠近難易喻禮與非禮之别,比興深 下二句實與《漢 人甚遠』者,言其 愛而不見」相似,皆有可望不可即之意。 墠平易踐, 阪峻 茹藘在阪』焉,言其 東門之墠」,言東門除處之地易往 爲淫奔之説 甚遠,如晉人所謂室邇人遐者。 《出其 則曲説 濫 若但云門外有墠,墠邊有 廣》之「不可求思」、《静女》之 東門》亦同 「此詩之意,大抵 難登、毛義本無 人雖 觴矣。」承珙案:此詩每 也。」陳氏《稽古編》曰 難 甚 行 近,卓然有 也。 此, 『其室則邇 非 難 不通,鄭箋 與《丰》相 也。 踰之物 不 鄭 可 謂 而 阪, 犯 其 劉 傳 輕 望 章 : 有

傳義。

地。」鄭一 讀音 墠,除地 作『壇』。 司馬職》「暴内陵外則壇之」注 依字當作墠。』是《釋文》、正義 『墠』。」《校勘記》云:「《釋文》云:『壇音善, 者謂之墠。『壇』『墠』字異,而作此『壇』字 書》言『壇』、『墠』者,皆封土 作『壇』,《左傳》亦作『壇』。 『憚』,字 同 壇」,今《唐石經》亦作『墠」。」承珙案:《 「墠』。」盧召弓云:「惠氏棟、余氏蕭客所據《唐石經》作 壇」,注同。 ·墠』之『墠』。」《王霸記》曰:「置之空墠之 曰墠,蓋古字得通用 東門之墠 司 亦或爲『墠』。」據 町 《毛詩》古文,故作「壇」、《韓 農 云: 町者。」正 <u></u> 唐石經》以下 _**,** 傳: 壇, 義 讀 云: 從 東 此 偏 門,城 『憚之以威』之 者謂之壇,除地 也。 其《禮記》、《尚 知 . 乃 檢諸 云: 古「墠」字多 依定 經字 周 今定本作 東 本 壇 禮 門 詩 ·, 字 皆 本 讀 也 大 作 作 則 如

平夷 意。 猶坦。」是也。 也 「墠 《論 其 地。 衡 • 華 (韓詩) 語增篇》「町町若荆軻之間」,謂 嚴 毛云「除地 音 訓 1義》引《 「墠」爲「坦」,亦平易之 常韓 町 町者」, 詩 傳》 日 町 町 墠 平

阪。 字「藘」「廬」可通,不當改「藘」爲「廬」。 有 則如東門之墠。 之際近而易,據正義當無「而易」二字,今各本俱衍。 禮記 茹廬」,以爲是菜廬,故曰「其室」,又曰「有 畦」,以成《易林》之誤,不足據 家室」。 茹 藘 鄭詩兩言「茹藘」,蓋茅蒐是其地産 釋地》「陂者曰阪」、《説文》作「坡 从阜,反聲。 茹 藘 月令》「阪險」,高誘注《吕覽》云: 在阪。」《毛詩寫 汪氏 在阪」,傳: 一梧鳳 遠而 E E 日 難 「茹藘,茅蒐 澤障, 「此因《漢書》『菜茹 官記》據《易林》作 則如 「如」字,據相 日 山 也。」承珙 也。 脅 者日 也。 男女 **爾** 臺本 古

> 地,故傳以喻遠 云: 阪 險, 「其長居險,故言阪 傾 危 也。」《 而難也 書 • 尹。」是阪者,險遠之 立 政 () 「阪 尹」, 鄭 注

即之意,其非淫奔之詩决矣。 南 遠,實勞我心。」即此亦可見詩言爲可 傳義相合。 不得,銘曰:「丹厓 通。」高誘注云:「《詩》所謂 我心反。」此正用毛氏得禮不得禮之説。 鼎》:「東門之壇,茹藘 得禮則近,不得禮則遠。」案:《易林 • 説山 其室則 訓》:「行不合,趨不 即如晉酒泉太守馬岌求 邇,其人甚遠」,傳: 百尺,青壁千 在坂。 室邇 禮義不 · 尋。 同,對門 人遠。」亦 邇 克 望 室 費之 近也 示 邇 宋 《淮 與 X 纖 與 口

靖 也。』《太平 靖 善也。 東門之栗,有踐家室」、《 ~ 〈藝文 言東門之外,栗樹之下,有善人可 御 ... 覽 》 類 聚》 引《韓 引《韓詩》云: 詩》云: 韓詩》「 「栗,木名 靖,善 踐」作

與下《風雨》思君子同者,則又未必然耳。者正同。既曰「善人」,必非淫奔之謂。或謂與成爲室家也。」據此,與毛傳言「男女之際」

文曰 相 此章下二句自當謂無禮則貞女不從。 承 鄭國之女,何以不待禮 我,我無由從子。 曰 而 也。」箋云:「我豈 正 同 班案"首章下二句,傳謂「不得禮則 俱 ,我豈不於女思爲室家乎,但子不 言以刺亂之意,且與上章室邇人遠文義 一貫 去耳。」正義 「爾」曰「我」,當爲男子目女之辭,尤足 豈不 也 爾思,子不 貞女之行,非禮 述毛 不思望女乎,女不就 亦云:「貞女謂 我 而 奔乎? 即」,傳:「即 故 不 以 刺 動 遠」 但經 禮 男 之。 迎 今 就 子 我 就

風雨

《序》云:「《風雨》,思君子也。 亂世則

言曰: 甚備。 度 詩 範。 皆無可按,即漢後史事,其於經典有關合者 已。非欺暗室,豈况三光? 數至於此,命 綱立身行己,終始 也。」」如何自『淫詩』之説出,不特春秋 故善人爲善,焉有息哉?』《廣弘明序》云: 云: 松柏彫於微霜, 彫者,松柏也。 作《經典稽疑》,載《風 『梁簡文於幽 思君子不改其度焉。」毛氏 一概埽盡 也。 蓋 《詩·風》云: 言君子有常,雖 廢帝倮之,迫之使走,粲雅步如常,顧 「風雨如 郭黁叛,吕 如 此 事實,載之可感,言之可思 如《南史•袁粲傳》: 『粲峻於儀 縶 晦,雞鳴不已。」』此《風 臨 中自序云: 而雞鳴已於風雨。』《辨命論 難不移者,君子也 光遺楊 如一,風 「風 或 雨≫ 處 雨 亂 如 軌 一詩,行 大可 「梁正· 雨 晦, 世,而仍 書 如 曰:『陵 日 雞鳴不已。 晦,雞 士蘭 文 不改其 取 陳 雨》之 事 鳴 陵 霜 何圖 證 晦 而 實 蕭 不 不 者 伯

者,時累不能 案:《文選》陸士 察。」亦是用《序》意也 淫 説 之故 行 事,俱 而 此 淫,是以 等 旦 遂 一衡《演 翼 歇 迅 然。 絶, 風 連 陵雨,不謬晨 即 珠》云:「貞 無 造 可 次 據已。」 不 移 乎期 禽之 承 臨 珙 難

《詩》曰:『風雨湝湝。』」段注云:「今《鄭風 是兼采三家。」承珙案:《玉篇》亦引《詩》曰 衹 也。』許引《詩》證『寒』義,所據 文》作「湝」,云:「水流湝湝 風 有『風 曰 湝,水今本作「湝 潜湝」者矣。 雨 湝湝」,雖 風雨 雨淒 淒淒」,傳:「風 凄』、《邶風》傳曰:『淒,寒風 承用《説文》,亦必當時有本 湝 _ 且 此 也。 雨 從 與今本異,或 宋本。 淒淒然。」《説 从水,皆聲。 寒 也。

詩 水經注 經 小 風 雨 學 | 云: 瀟瀟 湘水》篇"『二妃從征、溺於湘江、 _, 傳: 「《説文》:「潚, 「瀟瀟,暴 水清 疾也。」段氏 深 也

> 霄, 潚。」轉似以「瀟」爲正字,誤矣。 云: 別有「瀟」字從「簫」,曰「水名」。《集韻》 潚」是淒清之意,入聲音肅,平聲音修,轉音 韻》一屋二蕭皆有『潚』無『瀟』、《詩》『風雨 貌。』李善引《字林》:『潚,深清也。』 考《 皆形容欻忽之貌, 嚊潚率』、《西京賦》『飛罕潚箾,流 《説文》語。今俗以『潚』『湘』爲二水名,且 語。 『潚」誤爲『瀟』矣。 神 ·潚』。」承珙案:《玉篇》「 思玄賦》『迅猋潚 游 俗本誤爲『瀟 「瀟瀟,風 洞 又釋『潚』字云:『潚者,水清深 庭之淵 雨 出 暴疾 人 ___ 與 其媵我』,舊注:『潚, 羽獵 潚 貌 毛傳『暴 明 湘 潚」訓與《説 刻 之浦 賦》『風廉雲師,吸 舊 曰 本 疾』意正 水名。 一用《 《毛 鏑 山 趫 也。」用 文》同, 詩 海 合。 則 廣 潚 疾

珙案:《玉篇•口部》:「嘐,古包切,雞鳴「雞鳴膠膠」,傳:「膠膠,猶喈喈也。」承

者也。 嚴《緝》以「膠膠擾擾」爲「雜」意,姚氏炳 者,「嘐」之借字。 也。」「啁」下 膠粘」 〈詩》曰 楚詞 **≫** ⊟ 有接續不已之意,皆所謂郢書 雞鳴嘐嘐。」是《毛詩》作「膠」。 ·引《説 「鴟 雞 《埤雅》以「膠」爲「固」 啁 文》云: 哲而悲鳴 「啁,嘐也。」又 廣韻 燕 又以 義, 説 膠 引 引

子衿

史》: 原屬 然。」如 以 甚 遲,學業遂廢。《子衿》之歎,復見於今。』《北 則學校不修焉。」毛氏大可 有 來,儒軌 據者。 風 《序》云:「《子衿》,刺 大甯 刺 此 ,未嘗儇薄,且亦 引用,不一而足。朱子作《白鹿 · 陵夷,每攬《子衿》之詩,未嘗 中,徵虞喜爲博士,詔 如北魏獻文詔高允曰:『道肆 學校 漢 曰:「『青衿』一詩 唐以來行文之 廢 日 : 也。 『喪亂 不 世 慨 陵 洞 亂

> 今。」亦與詩旨有合也。 「青青子衿,悠悠我心。但爲君故,沈吟至耳。」蓋三章皆有此意,魏武《短歌行》云:耳而俱在學校之中,己留彼去,故隨而思之子而俱在學校之中,己留彼去,故隨而思之則又從《序》説矣。」承珙案:首章箋云:「學賦》亦云:『廣青衿之疑問,宏菁莪之樂育。』

字。 衿,當從《漢石經》作「裣」。 曲袷如矩者。 施衿領正方,學者之服也。」此即 之所服。」承珙案:《漢書 云: 方領,能 襟」。 約,衣系 襟」同。 張有曰:「約,古作 「視諸衿鞶。」皆非衣領之謂。 青青子衿」,傳:「 《玉篇》云:「裣,衣 矩步。」注引《前書音義》曰: 然不當作「衿」,「衿」乃是「紟」之誤 也。」《士昏禮 注以「衿領」連言,正同 総,别作衿。」非。 青衿,青領也, 馬 **裣之别體**,或作 裣 施衿 援 交 傳》: 深衣 領 《説文》: 結網。」又 爾雅 也。」與 「頸下 毛義 「勃 學子

《家訓》亦云:「孫炎、郭璞注《爾雅》,曹大家 學生以青爲衣領緣衿也。」此亦似以青衿、青 兩 既無『也』字,群儒因謬説云青衿、青領是衣 注《列女傳》,並云:『衿,交領也。』鄴下詩 衿、領一物,而重言青青者,古人之復言 者斜領下連於衿,故謂領爲衿」是也。 下,而謂之領者,《顔氏家訓・書證篇》云「古 也。」衽,本所以掩裳際者。 裣爲交衽在領之 同假借爲「裣」,經典相承通用,遂致「裣」、 文》「衣系」義近。 謂之褑」云:「佩玉之帶上屬。」此皆與《説 郭注於「衿謂之袸」云"「衣小帶。」於「佩 云:「衿是領之别名,故云『青衿,青領 襟」、「衿」三字不分。 (大矣。)今案:《釋文》云:「青青,如字。 處之名,皆以青爲飾,用釋『青青』二字,其 與 上 糸旁譌衣爲「衿」,又以 衣眥 《説文》:「淦,交衽 謂之襟」 迥 非 正義 也。」 也。 事 聲 衿 本

> 衽」。 者,以與「心」協韻。 義》引《字林》云:「襮,黼衿也。」亦是以領爲衿。 實義相成耳。《爾雅》:「黼領謂之襮。」蕭該《漢 謂之「青裣」。《説文》:「捷,裣緣也。」經文言「裣 領 爲 孫炎注《爾雅》用毛義,故曰「交領」,其 《説文》言字 蓋深 衣自 領 傳以 及 之本 衽 裣 皆 義,故 統於領,故舉領 以 青緣之, 但日 「 交 書 總

異。 《尚書》「舜讓于德弗嗣」,徐廣曰:「今文作 傳訓「 繼其志」也。 《學記》云「善歌者使人繼其聲,善教者使人 『不怡』。」見《史記集解》。 詒,寄也,曾不寄問也。」「詒」「嗣」音本相近 以詩樂,誦之,歌之,絃之,舞之。」承 繼之義,引申爲學習,故訓「嗣」爲「習」, 鄭箋「嗣,續」之訓,亦與毛 「嗣」爲「習」者,「習」與「襲」同,皆有 「子甯不嗣音」,傳:「嗣 《釋文》云:「嗣,《韓詩》作詒 是毛 韓 習也。 字通 同。 珙案: 其 而 古者教 下云 訓 即 因

歟? 時。 蟠,先王之道所以續 倦,窮而不濫,死而後已,得時則行,失時 則庶人修之。修之之道,從師無常,誨而不 大夫修之。大夫失道,則士修之。士失道, 行而廢也?」此蓋謂從師修業,不宜廢墜之 夫子何營營乎?」薛收曰:「子非夫子之徒 房玄齡問於薛收曰:「道之不行也,必矣。 「女曾不傳聲問我」,則從韓説耳。 其引《詩》猶用毛義也 『縱我不往,子甯不嗣音。』如之何以 天子失道,則諸侯修之。諸侯失道,則 而不墜也。 古者謂之繼 《中説》: 不 則

挑兮達兮」,傳:「挑達,往來相見貌。」

皆同。 《詩》曰:『挑兮達兮。』」此「達」與「泰」音義 同。其實往來者,謂其避人游蕩,獨往獨來, 覽》引《詩》「達」作「撻」。《殷武》傳云:「撻 二義自相足也。 來貌。」 毛彼傳云:「佻佻,獨行 記》十八。引《詩》亦作「佻」。 文・辵部》小徐本引《詩》作「佻兮」。 貌」。古「貌」字作「皃」,或誤爲「見」,淺人因 「佻佻公子」、《釋文》引《韓詩》作:「嬥嬥,往 於「見」下添「貌」字耳。「挑」與「佻」同。 來,故知挑達 云:『岁兮達兮。』」又:「達,行不 云:「挑達,往來貌。」正與《韓詩 正義本傳文似無「相見」二字。 正義曰:「城闕雖非居止之處,明其乍往乍 ·挑達,往來見貌。」無「相」字,當本作「往來 《説文・水部》:「泰,滑也。」《太平御 爲往 來貌。」承珙案:據此,則 《小雅·大東》 《釋文》云: 大東》傳 貌。」此 相 《初學 遇也。 《詩》 《説 傳

毛謂乍往乍來,皆狀其滑泰耳。疾也。」疾速亦滑利之意。許云「行不相遇」,

子也。 闕。』箋申之曰:『登高而見於城闕。』明非 字,非『象闕』之『闕』 猶軒縣之缺南方,泮水之缺北方,不敢同天 闕」也。 隅」也。 國,其城制宜闕南方,詩人目驗知之,發於刺 謂之闍,《周官· 曰:「闉 文如此。」段氏《説文注》云:「案、《毛詩》傳 審是,則城故 「軿」字注:『古者,城闕其南方,故謂之 (公羊傳》注:『天子周城,諸侯軒城。 南 在城闕兮」,武氏 《毛詩》『城闕』當作『軟』,闕,其假借 三面 ,曲城也。閣,城臺也。]城門上有臺 面以 無臺謂之鞅、《詩·子衿》所謂『城 有臺 受過也。」與許氏說合。 有闕見于南方矣。定十二年 匠人》、《詩・静女》所謂 而 也。 南方無 虚谷曰:「《説文》 傳 曰: 臺,故謂之 『乘 城 鄭 而 爲 軒 軮。 「城 城 見 侯 城

墉不完,如《公羊疏》所疑也。

揚之水

之援 《古義》曰:「鄭突奪適非正,然其出 也。 于物無親者,讀此詩可想其概。 自其失位以 侯尚有會師而謀納之者。 所以謂之『終鮮兄弟』,傷忽之無助也。」何氏 子亹,皆忽之弟,同氣相殘,迄無甯歲。 侯之于曲沃,其 篇,比昭公不能制突也。 微弱之比。 也。」郝氏仲輿曰:「國風《揚之水》有三, 閔忽之無忠臣 ,内未有臣 《序》云:「《揚之水》,閔無臣 一《唐風》,比昭侯不能制 一《王風》,比平王不能令諸 至復國,迄於被弒,外不聞鄰國 民之戴,意其人 事同,故其比同。突與子儀 良士,終以 昭公之于突,與 忽以 死 曲沃也。 必多猜喜忌 世子當立 朱《傳》改爲 而作 也。 奔也,諸 是 君子 乃 此 侯 皆

也」。 獨章首二句難通,即本句亦自不協,兄弟可 以多寡言,若夫婦 句當作何解?」承珙案:以兄弟爲昏姻,非 如弟』者,蓋親親之辭。 弟,昏姻之稱、《禮》所謂 淫 者相 或又云『兄弟』如所謂『宴爾新 會之辭,而 而曰「終鮮」,此何言乎? 于「兄 然章首《揚之水》二 弟」難 不得嗣 通 爲兄弟」是 則 昏,如兄 日 一兄兄

「忽兄弟争國,親戚相疑,後竟寡於兄弟之恩,《左傳》忽突争國,而子儀、子亹皆已死,而原繁謂厲公曰莊公之子猶有八人,不得爲鮮。蓋昭然完是少。謂要其終,必不相助,雖多猶少处,謂之『終鮮』,猶司馬牛曰『人皆有兄弟,我矣,謂之『終鮮』,猶司馬牛曰『人皆有兄弟,我矣,謂之『終鮮』,猶司馬牛曰『人皆有兄弟,我矣,謂之『終鮮兄弟』,獨無』是也。」嚴以「終」,為「終竟」,為「終」,為「終」,為「終竟」,為「終」,為「終意」,為「於」」,為「終意」,為「於意」

出其東門

見有此意,且如所言,則於時方悲哀之不暇, 五争,兵革不息,男女相棄,民人思保其室家 焉。」承珙案:傳以「有女如雲」爲「衆多」,以 焉「願室家得相樂」,解經本極平正。箋乃云 爲「願室家得相樂」,解經本極平正。箋乃云 作者之妻時亦棄之,心不忍絶,轉非經文「聊 作者之妻時亦棄之,心不忍絶,轉非經文「聊 作者之妻時亦棄之,心不忍絶,轉非經文「聊 作者之妻時亦棄之,心不忍絶,轉非經文「聊 《序》云:「《出其東門》,閔亂也。公子

又何娱樂之有?

此 己一人所以 謂毛音如字,鄭息嗣反。 上章述毛云:「言其見棄既多,困急者衆,非 如雲者,皆非我思所存也。」毛鄭皆訓「存」爲 存」,傳云:「思不存乎相救急。」箋云:「此 『舊』指誰家。」承珙案:此説非是。「匪我思 也。陸不分毛鄭,而别後反爲『舊』,未知 之上章,則音徂者,毛義。子徐切者,鄭義 義在『思』也。 之所存,則『思』應讀去聲。 「存」爲存救,則『思」應如字讀。 在」,其義一也。《釋文》爲「思」字作音,乃 「且音徂。《爾雅》云: 思」音當亦無異,陸氏强生分别耳。 不誤。 匪我思存」,陳氏《稽古編》曰:「毛 救恤 下章又云:「雖則衆多如荼,非 下章『匪我思且』、《釋文》云: 故 其思 存也。 不得存乎相救急。」 其實「存」義不殊, 毛義在『存』,鄭 舊子徐反。」合 鄭箋以 正義於 爲思 以

> 引《爾雅》「徂,存」之訓,正所 章箋云:「匪我思且,猶匪我思存 救」,不得謂毛義在「存」,鄭義在「思」也。 救」,不知傳文是「存乎相救」,而 我 乃引他家舊音,讀「且」如「既亟只且」之 且」猶「思存」之義。其又云「舊子徐反」者 毛無訓,故表明之。《釋文》音「且」爲「徂」, 「且」,蓋以爲助語辭耳,然而 思所 存 救。」 陳 氏 遂據 此 以 以證明鄭箋「思 傳 非鄭義也 訓 非「相爲 也。」鄭以 下

傳云:●「校也者,若緑傳本作「祿」,誤。色然,為一、置文色,女服也。」《説文》作「綥」,云校」為一、過未嫁女所服。」承珙案:《説文》「蒼艾經,一、灣艾色。从糸,畀同聲。《詩》曰:『縞衣蓼巾,蒼艾色。从糸,畀同聲。《詩》曰:『縞衣蓼巾」,傳:「縞衣,白色,男服也。

明之? 屬 而 舊時夫妻,願其還自配合」,似非毛意。 多 縞 婦 藘」爲茅蒐之染女服,若猶是見棄之女,則忽 嫁女所服」,則或出三家詩説,與毛義異。毛 文》義與《小正》傳同,足徵其來甚古。 云「願室家得相樂」,當即閔亂者自言其室家 ,,不可救拯,故言彼縞衣之男、綦巾之女是 行説。 喪服,忽而茅蒐染衣,有是事乎? 衣綦巾,思得相保。箋謂「棄 人未嫁 次章傳以 正義述毛,言「詩人閔被棄之女衆 者服之。」緑色即蒼艾色也。 「如荼」爲喪服,又以「茹 而 復留 至「未 何以 固 **^** 説

包以前作「員來」之類。正義曰「云、員古今多假「云」字爲之,如《秦誓》「若弗云來」,衛但用爲語辭,則古人多假「員」字爲之,後人「員」是物數,「云」乃古文「雲」字,皆非語辭。「剛樂我員」、《釋文》:「員,本亦作云。」

又《正 也。 或據「昏姻 文》「君子員獵,員獵員游」爲證是也。 得之。楊升葊引《秦誓》「雖則員然」、《石鼓 字」者,以「員」爲古之借字,「云」爲今之借字 傳云:「云,旋也。」獨於此「員」字無訓。 益也。」《商頌》「景員維何」傳云:「員,均。」 「旋」,謂樂於與我周旋,殊可 云:「言且留樂我員。」正義 《小雅•正月》「員于爾輻」傳云:「員, 月》「昏姻孔 孔云」之傳,亦欲 二乙」、《釋文》:「云、本又作員。」 以 不必。 訓 爲 助 此「員」爲 句 辭 近人

所聚會之處,故知謂國外曲城中之市里也。 之中,故轉爲『彼都人士』之『都』。 臺也。」箋云:「闍,讀當 『都』,謂國外曲城之中市里也。」正 在」上衍「不」字,非是。 以《爾雅》謂臺爲閣,在城門之上,今《注疏》本 出其闉闍」,傳: 此言『出其』,不得爲出 | 量,曲 如『彼都人士』之 城 也。 都者,人 義曰 闍 城

鄭讀 之出 之甕城,此地 言出 即統于城門。 **義自通,不煩改讀** 出 城臺」分釋「闉」「闍」,然臺在城門之上,亦 也。 珙 其闉闍」猶言出其重門,不必以臺中不可 量 署 爲疑。 ,如闕在門上,豈不可云出於闕下乎? 案 「闍」爲「都」,謂曲城 此 依 也。 《詩》曰:『出其閩 説 正 况闍 義所引,今《説文》「曲」作「内」,誤 容有 文 故許氏但以 从門,者聲。」毛雖以「曲城」、 在城上,而出 闉 市 聚。 下 中市里。曲城如今 然「出其闉闍」,文 「城 閣。」」又「閣」下 於其下 曲 闉 重門」釋之。 闍 亦 城 可 曲 謂 从 重

引《周禮》「地官掌荼」及《既夕》注與此箋皆「蒤,委葉」爲《周頌》「以薅荼蓼」之「荼」。又「荼,苦菜」爲《邶風》「誰謂荼苦」之「荼」,服也。」箋云:「荼,茅秀。」正義以《爾雅》而有女如荼」,傳:「荼,英荼也。言皆喪

體 東兮」,又云「白華菅兮」,然則英荼爲茅菅之 英言其白。正義引《六月》「白旆英英」證 秀,信矣。《廣雅》:「葤菘,茅穗也。」「葤」即「茶」之別 以「茅秀」申之。《詩》有「白茅包之」、「白 記》所云「荼白」者,未明言其爲茅爲薍,故 英,白雲貌。」是毛傳但以爲白茶,如《考工 其物相類,故皆名荼。」毛此傳云「英荼」者 彼傳云:「荼,萑苕也。」疏云:「茅薍之秀, 言葦類之秀。 「英」是白貌。考《小雅・白華》傳亦云:「英 注云:「皆芀荼之别名。」「葦醜,芀」,注云: 非彼二種荼草。 「蔈、荂,茶」,郭注云:「即芀。」「猋、藨,芀」 · 蔈、荂,茶」爲 口「茶,茅秀」, 其類皆有芀秀。」是《爾雅》此三句相連,皆 至毛傳以「如荼」言「皆喪服」,「皆」者 此乃《豳風》「抣荼」之「荼」。 則 即 如 姚 此詩之「荼」。 茶者,乃 氏《識 名 茅 解》 草 秀出 承 以《釋草 珙 一之穗

順 不在 衆多之意,與上 傳曰:『秦網密於秋荼。』」王氏《總聞》、范氏 云:「雖則衆 雖 雖 補傳》亦皆以「如茶」爲「密」,如此乃於下文 也。 則 則 喪服。 喪 義 服, 協 非 多 埤 若但 我 如荼。」是傳意仍重 章「如雲」一例。 雅》云:「雲言盛,茶言繁。 思所 取 喪服之義,則下文當云 存救」,於文義終不 故 正 在衆多, 義 述毛

野有蔓草

以 汲 爲 之澤不下流,民窮於兵革,男女失時,思不期 而會焉。」案:此詩及《出其東門》,朱《傳》皆 苟 爲淫詩,遂謂「如雲」爲冶游之女,「野田」 ,男女亟聚會,故 地理 合之區。 序》云:「《野有蔓草》,思遇 志》云: 後 儒多 鄭 其俗淫。 或 疑 土狹 其説。 鄭詩 而 險,山 今案:《漢 曰:『出其 時 也。 居 谷 君

> 爲朱《傳》之濫 所傳爲得其正。 時也。」此漢晉人《詩》説,蓋出 兮。』此其風 東門,有女如雲。』又曰: 云:「時草始生而云『蔓』者,女情 偕臧」之語,則於「遇時」爲宜。故知《毛詩 聊樂」之言,則於「閔 也。」《太平御覽》引韋昭 觴。 然揆之經文,《東門》有 亂」爲近。「蔓草」爲 『溱 與洧 於三家者,實 急 答答 方灌 欲 以 問 促 灌

有。 年之郡詩》「火閔團 此。」承珙案:《説文》無「漙」字,《玉篇 改之爲『團』字,讀爲『團 本有作水旁專者,亦有單作『專』者,後人輒 『團』,采《釋文》也。 徒端反。」《校勘記》云:「《考文》古本『漙』作 此「漙兮」,古只作「團」,《藝文類 引正作「團」。 零露漙兮」、《釋文》:「漙,本亦 《匡謬正俗》所云《詩》古 《文選》謝靈運《永初三 朝露」,謝 .圓」之『團」者,即 朓《京路夜發 聚》卷八 作 團,

詩》「 顔 引《詩》「零露團兮」。 露」,江淹《雜體詩》「簷前露已團」,李善注 露餐」,謝 氏以後人改「漙」爲之,非也。 猶霑 餘 惠連《七月七日夜詩》「團 露 III. 一陸· 此必六朝古本作 士衡《苦寒行》「飢 專 專 滿 待 並 繁 零

溱 洧

貌。」承珙案:段説是也。 志》又作『灌灌』,亦當讀汍汍,皆水盛沄旋之 汎汎,蓋『汍汍』之誤。 『丸』。 若作『汎』, 音父弓反, 則音義俱非。 注《説文》云:「『汎』當作『汍』,音『丸藥』之 『洹』,音丸。《説文》作『汎』,音父弓反。」段 「洹」之重文,胡端切,可證「汍」「洹」一字。 **弔魏武帝文》「涕垂睫而汍瀾」,李善注兩引** 文選》歐陽堅石 方涣涣兮」、《釋文》云: 詩「揮筆涕 **汍**汍與洹洹同。《漢 《玉篇》「汍」爲 汍 「涣、《韓詩》作 瀾 陸 士 衡

灌」與「汍汍」亦同字也。「雚與汍,古今字,同」。此足證《漢志》「灌《漢書・息夫躬傳》「涕泣流兮雚蘭」,又云

也。 亦當作『香草』。今作『蘭香』,無理之甚,此 之以勺藥』,毛傳:『勺藥,香草 又引《韓詩》之『蘭』以明 譌。《釋文》本毛傳必本是『蕑,香草也』,故 鈔》、《藝文類聚》、《初學記》、《白帖》、《文選》 《澤陂》云:『蕑,當爲蓮。』可證『蕑』字不得 疏》本以改《釋文》,其誤遂至於此。 『蘭也』。今《注疏》本毛傳『蕑,蘭也』亦有 注皆引《韓詩》:『秉執蘭草。』此『蓮也』當作 訓『蓮』也。《太平御覽》引《韓詩》:『蕑,蘭 云: 也。」臧氏 「蕑,古顔反,蘭香也。 方執蘭 「方乗萠兮」,傳:「萠, 在 而拂除。』《後漢書》注、《北堂書 東 曰:「萠 與蓮 同異。後人據《注 蘭 是 韓 兩 也。」《釋文》 也。」則此 詩》云: 物。 下文『贈 鄭 蓮 箋

除, 蘭 臆 今《注疏》本箋云:「蕑,當作蓮。」「蕑」乃「蘭」之誤。 至《澤陂》箋乃謂毛傳之「蘭」當爲「蓮」耳。 箋云「託采芬香之草」,即承 作「蕳,蘭 陂》傳云: 毛於此傳云:「蕑,香草也。」於《陳 也」,正本毛傳。 何煩言『蕳即蘭』乎?」承珙案: 陳風》。 改之驗 香草 此時安得有蓮,此固 若《韓詩》説以 也。」「前 也」,則於《澤陂》無庸發傳矣。 也 「萠 ,蘭也。」蓋互相足。 正 若傳 即 義 蘭 引 本作『萠, 陸 此詩 可不 此 幾《 用《韓詩》,『香 傳「香草」言之。 辨而明者也 爲三月上巳祓 疏》云: 蘭也」,陸 臧説是也。 若此 風 · 澤 傳已 萠 説詳 鄭 璣 草 即

都梁 於上 省 頭 草 Ш 品品 陳 氏《稽 ,引《唐珤經驗方》云:『夏中置髮中, ,謂之『水香』。 ,又名都梁香。 脏,故名。』其説良是。然今之省頭 古編》曰 《本草 : 《别録》名 「蘭 《神農本草 綱 目》以爲即 蘭澤草,出 今 列

語。 草,氣 節 即 蘭 小别。 辨之矣。」承珙案:正義引陸璣《疏》云:「蕑 記》、陳止 證》、陳正 蕙」、蓋誤始 澤蘭即澤蘭也。 爲澤蘭。《炮炙論》云:『大澤蘭即蘭草,小 色,或一莖一花,或一莖數花者,强名爲『蘭 無芒者,爲蘭草。 物性有變更耳。」又曰:「蘭草與澤蘭同 「零陵」當作「苓蘦」。 赤白色,成穗。 中 ,蘭,香草也。」歷引《左傳》、《楚辭》及孔 而 赤,高四五尺。 爲三焉。 又云:「其莖葉似藥草澤蘭,廣 不甚佳,人亦莫珍,而古 紫莖素枝,赤節緑葉,其莖圓 齋《盗蘭 敏《遯 于黄山 其曰蕙者,今之零陵香是 又有生山中者,名山 齋閉覽》、熊太古《 媆時並 後人以 説 莖微方,節短,葉有芒者! 谷。 漢諸池苑及許昌宫中皆 》、方虚 可 然朱 葉長似茅,花黄 佩。 谷《訂 晦 八九 人顧 菴 蘭 《離 重之, 節 而長節 月有花 説》皆已 冀 蘭,與一 長 越 騒 也。」 類 葉 緑 集 辨 此

投物 西北 《范子計然》云「大蘭出漢中三輔 種之。 故 漉 馬矣。」《説苑・雜言》篇同。 雖以 弘農」,此其别也。今閩廣所産之蘭,不宜於 草在上品,澤蘭在 蘭當之。李時珍歷引諸家之説,以正 指爲都梁香。 可爲定論矣。 必非今之山 所言,《毛詩》之「蕑」已極明晰。 云:「今夫蘭本,三年而成,湛之縻醢 投 輎 何由 姜氏 水中 于酒而香洌,其貴敵匹馬。 ,既成,則易 蘭草、澤蘭爲一物,爲陳藏器所駮,然皆 可著粉 廣 圃 蘭。 湛。 義 今更有可證者、《神農本經》蘭 惟寇宗奭、朱震亨始以今之山 入詩人之詠? 中 注《本草》者,陶隱居、蘇恭 藏 以匹馬。」注云:「本,根 Ĭ: 澄 中品。 衣 酒 一夫 ,著書中辟 曰 《家語》作:「湛之以 惟 即《太平御覽》引 漉。 蘭之根葉俱 《晏子春 以 若今蘭之根 白 蘭 按其形狀 酒 魚。」 嗽 而賈匹 出 其誤, 口 據此 河 秋》 香 也。 東

之證。」
之證,立見敗腐矣。可爲今蘭非古蘭

以茅」。 秉 在 非。 之山多菅蕙。」菅即 乃「蕑」字之借。 也。」承珙案: **蕑之爲香茅** 之茅香。 「方秉菅兮」,故附會爲茅。 秋秀,不同時矣。 莖香葉之都梁。 也 莖葉,無庸 若以菅茅爲蘭,別無 王氏《詩稗疏》云:「此所秉之蕑,非 《風俗通》曰:『此祓禊之始。』則 《周禮》『男巫掌望祀望衍』,『旁 可 以 王説 知,又不容與都梁、蘭草 **佘**山 八九月 所以然者,勺藥 『蘭』與『葌』通,《本草》謂 蓋 萠 海 因《 也。 經 方華, 所 (漢書 郭注以「菅」爲茅類,亦 據。 西 不知《漢志》「菅 Ш 疑 况 經》:「天帝 地 春榮,都 非 都 理 春 梁之香 志》作 游 所 亂 秉 招 紫 梁

《稽古編》曰:「疏引陸璣云,今藥草勺藥無「贈之以勺藥」,傳:「勺藥,香草。」陳氏

或

非

承

珙

離

同

類,

巳祓除時,安得 久,柯葉之香 華,殆據閩 而經與 女相贈,容或以之。 録》云: 也,未審今何 然江 柯 藥草之勺藥當之。 詩》『離 、芎藭。 ,葉似蛇牀而香,騒人取 案: 經 中 勺藥並 雖 有勺藥華乎? 葉之香,華不與焉。 然古人以香草爲佩, 山 中 婑 蘼 離 ·風 經》云, [《]北 説 不 蕪 香 草』語,遂疑 夫 蘼 稱,董以 土,非所 文》亦云: 歇,華則否矣。 草見《離騒 , 一 名 江 草。 Щ 經》云,繡 蕪、芎藭,本與 洞 又案: 東 庭之山 勺藥爲江 以 《集傳》以 萊謂 朱《 離,芎藭 解鄭 勺藥是江 》,亦 江 Ш 勺 傳 蓋 亦 香 離 詩 草多 草多 以 藥 况上 蘭 佩 以 不 離 也。 蘼 江 之 爲 苗 之 爲 贈 欲 嚴 必 初不 以勺 爲江 草。」而王逸注《楚辭》「辛夷」、服虔注《漢 即本之,以勺藥 承珙 經》繡山 辛夷自是草類,非今之所謂 也。」揖著《廣 夷」,《史記》作「流 辛夷。』是則 也。』孿夷者、《楚辭》之所謂 之足咀。 江 蕪。」但《吕記》引董氏云:「唐《本草》『可 辛雉」,「雉」「夷」聲 留」音轉, 離 又案: · 足 離 藥爲和味,故 』。」今《本草》諸 ,恐未可信。 以 若今之所謂勺藥者,味酸 多勺藥」, 和 則孿 **^** 孿夷、留夷,蓋 漢 味。《廣 雅 爲 夷 書 · 义 夷」。 相 辛 日

•

司

馬

相

如

傳》「

雜

以

留

辛

夷之别名

耳。

張

揖

日

留留

夷,

新

夷

以

勺

藥

爲

孿

夷。

「 攣

郭璞

注

留

夷也。

^

Ш

海

曰:『勺藥,一

名

宋董氏

因《韓

三月開

貽

往往

取

其

勺

藥之和

則

必

其

香

味

苦

而

雅》云:

『勺藥,

孿

夷

書並

無

此

語

則

以

勺

藥

離

王氏《稗疏》云:「古

香

氣,非

是

在

柯

葉,故

以

緝》皆從其説

其

譬。

則

士

也

陶

隱居云

類

也

别

離

雖

屬

肊

見

葌、勺藥、蘼

蕪

勺藥、芎藭。

^

兩見《山

海

即

新夷,故郭注《山

海

經

夷。

毛傳云

:「勺藥

近。

亦皆云「香草」。

則

木筆者。

《稗

疏

調,而 楊雄 失其和」,諸言勺藥者,或别爲調和五味之通 之醬」、《南都賦》「香稻鱻魚以爲勺藥」、《七 訏之樂、勺藥之和。]亦當謂鄭詩之「勺藥」爲 云:「鄭國淫僻,男女私會于溱洧之上,有詢 以 名,要與詩言香草者有别。 命》「和兼勺藥」、《論衡・譴告篇》「猶人勺藥 香草之可以和味者。至《文選・七發》「勺藥 爲和味之草而已。高誘注《吕覽・本生》篇 藥爲何草,惟引司 此 爲 賦云「甘甜之和,勺藥之美」,以此知 勺藥,亦非 贈之以調和,有是文義乎? 無據。 馬 相如賦云「勺藥之和」、 然陸《疏》已不知勺 若但是 Ŧī. 味均 其

毛詩後箋卷七終

毛詩後箋卷八

涇

胡 承

珙

警」耳。

《序》「警」當作「敬」、《釋文》、正義本始皆作

《雞鳴》見古之君子不忘其敬也。」據此,知

子,亦不忘其敬。」《孔叢子》引

孔子曰:

「於

雞 鳴

齊

臣以 爲 焉。」《釋文》:「警,居領反,本又作敬。」承珙 起早於常禮,敬也。」次章云:「夫人以 案:箋於首章云:「夫人以蠅聲爲 淫怠慢,故陳賢妃貞女夙夜警戒相 敬戒」二字。 東方明,則朝,亦敬也。」三章云:「無 我 《序》云:「《雞鳴》,思賢妃 故憎惡于子,戒之也。」此正用《序》 毛傳亦云:「古之夫人配其君 也。 雞鳴,則 哀公荒 成 月光 使衆 之道

之語。承珙案:細繹經文,首次兩章上二句 自當爲夫人之言,下二句乃詩人推原夫 乃是蒼蠅之聲耳。」次章經下正義略同 又言,夫人言雞既鳴矣之時,非是雞實則鳴 己以雞鳴而起,欲令君以朝盈而 上二句爲夫人告君之言,下二句爲詩人叙述 乃言曰,雞既爲鳴聲矣,朝上既以盈滿矣,言 下,正義又云:「陳賢妃貞女警戒其夫之辭 婦可起之禮,下二句述諸侯夫人之言。」至經 《序》下正義云:「二章章首上二句陳夫 起也。 一,亦以 作者 人所

三六七

自以爲尚早,非經意矣。 此《序》下正義恐有

序》疏以下二句述諸侯夫人之言,則是夫人

言之時實景如此,而其恐晚之心愈見。

若如

彼此互岐,未及檢照耳。 譌脱,否則當時非一手所成,致與經下正義

氏,皆足正《集傳》「初告」、「再告」、「三告」 君,本心常恐晚,故言之複耳。 已云三章皆一時之言,首章即 飛時又促之也。」承珙案:黄氏《詩經通解》 故,與上二章並 第,非真有兩 次章舉君夫人可以朝之時,以爲立言之次 此警戒之詞 一章即所見以告君,三章即將旦之候 稽古編》曰: 耳。 度語 一時語,非兩促之不起,至蟲 首章舉君夫人可以起之時 也。 「此詩人陳古刺今,設爲 末章又自言警戒之 所聞 此説先 以 告 於陳 以 君 告

聲,有 日 雞遠 似 匪 雞 雞 鳴 鳴 雞 則 》,讒 之鳴。」《太平 鳴 蠅 蒼 聲相 也。」 蠅 似 之 也。」《 又引《 聲」,傳: 御覽》引《韓 韓詩序》雖 薛 「蒼 君 章 蠅 句》 與 之

是。 非 蠅 恐晚 聲耳。東方明矣,乃託辭曰此月出 也。」毛氏《國風省篇》有二説,一 也。」范氏 已遲之詞也。『月出之光』,此幸其尚早之詞 季氏《詩説解 承珙案:「雞 同。 曰:『哀公荒淫,雞鳴矣,乃託 飛而有聲,雞未鳴之前無 以雞聲爲蠅聲。 之早起,誤以 毛 一以爲賢妃之言,一以 東方之明,豈猶是月出之光乎。 似將作聲矣,可安寢而 異 《黄氏 義, 然讀者且當從古説,庶三章之義聯 ,聞其似者而以爲真。』至曹氏 而 《詩瀋 日鈔》曰 薛 鳴」、「蠅聲」,諸説紛紛不一。 頤》曰: 蠅聲爲雞聲。 君 * 嚴《緝》則云蠅 説 曰 : 匪 「古説 「言非 「『蒼蠅之聲」,此疑其 雞 爲哀公之言, 怠朝哉。 則鳴」二句 蠅 皆以賢妃 但 晦菴云:『心常 聲 辭 | 雞 以天將 也 日 説謂「 則既 此 始 警之愈 次章言若 之光耳。』 戴 欲 正 未 蒼 謂 鳴,蒼 雞 明 其 貫。」 蠅之 岷 知 與 哀 既 孰 切 隱 73 夫 毛

是月出之光耳。」此與毛西河前説 媮,亦以下二句爲其君之言,與 孔顨軒《經學卮言》曰:「此篇 又以莫爲夙 則莫,刺興居無節也」。 尚夙也,而以 東方明矣,其實乃 意,首章以 於朝,君猶曰 至以爲哀公託 匪」字文同 雞 東方明 鳴 夙 也。 莫矣,蒼 爲莫也 爲莫焉。 略同, 義 月 是既 矣, 異 辭 出 於蠅 傳》。 若因 群籟 言。 景。 出 下二句文義並同,不必 亦有 蠅 謂:《虞東》之説較勝諸家。 似 雖 蠅 」,尤爲武斷矣。 况 蠅 俱動 毛薛 蠅聲之故 聲不先雞鳴,故 時 不知詩 不夜飛,或人起驚觸,或火光所照,宿 聲、月光,皆歸 群 了,轉未 以 以驚飛作聲,惟夜静乃聞,若 飛 人摹擬賢 爲 作聲。 而 似 有聞 並 遠 雞 蠅 北 改次章之「月出」爲「日 不得 想像,無 妃恐 聲者。 别爲周旋,轉多窒礙 鳴 方多蠅,夜起 不曲 者, 晚 然諸家皆 實 容 此詩首次兩 爲之説。 神 Ι. 泥 情 於 滯。」 恍

體

物

之

天

明

每

逢

此

蠅

戴氏

説

略

同

諸臣聞雞鳴之聲既

盈

與《東方未明》

所刺

同

蠅之聲矣。

次章

則

所謂

不能

辰

夜

不

夙

説以

爲

刺

莫矣,

而

以

爲

夙

也。

之光,東方

未

明

也。

鳴

矣,

其

實

乃

蠅

已有

聲,不

但

惚

疑

承

珙

其

實

大

疑

其妃之詞 爲賢妃告君之語。 也。」二語釋經義 同 夢」,情也。 《吕記》引王氏曰 ,聞妃言而能自克若此。」嚴《緝》又 『會且 極正大。 何氏《古義 歸矣,無庶予子 : 『蟲飛薨薨, 傳箋本皆以 影以 爲: [憎 甘 君告 與子 此 章

早者爲晚,其説顯自矛盾。

白雲許氏

又

以

晚,雞聲早。

哀公既不欲

早起,何反

以

一聲之

章爲賢妃之相警,二章爲國

君之相

拒。

安溪

本《集

復疑『月出之光』爲『日出之光』,此

者、《虞東學詩》駮之云:「據曹説

是蠅

聲

孔説首章於「既」字不合。

君

而

詞

意又微

異。

毛前

説兩

章

皆可不必。
是女昵昵,恩怨爾汝之辭。」承珙案:此二説視朝而起,吾會朝即歸,庶無爲子所憎。此云:「君起已晏,猶曰吾方甘與子同夢,迫於云:「君起已晏,猶曰吾方甘與子同夢,迫於

極有理趣。「會且歸矣」,季彭山曰:蘇《傳》云「群別所歸治其家事」,此毛説也。《集臣亦欲退朝而歸治其家事」,此毛説也。《集臣亦欲退朝而歸治其家事」,此毛説也。《集臣亦欲退朝而歸治其家事」,此毛説也。《集

之『説人』,豈因二篇而混邪?《雞鳴》又無《外傳》無此文,疑本《溱洧》序文也。《雞鳴》又引《韓詩外傳》:『溱與洧,説人也。』考今又引《韓詩外傳》:『溱與洧,説人也。』考今『説人也』。」沈氏清瑞《韓詩故》曰:「《御覽》「《雞鳴》,讒人。」《玉海・詩考》云:「一本作「《雞鳴》,讒人。」《玉海・詩考》云:「一本作「《雞鳴》,讒人。」《華詩》曰:

讒人之意。簡編紊缺,無以定之。」

還

也。『營』爲地名,則『茂』與『昌』亦地名。 營邱。]郭景純謂:『淄水過 作『巙』,音皆乃高反。」《釋文》引崔《集注》本亦作 『營』。之,往也。 兮。』」師古曰:「《毛詩》作『還』,《齊詩》作 營邱、《詩》云:『子之營兮,遭我 又引作「猱」。《方輿紀要・青州府》: 『猛』。」案:今《水經・淄水》篇仍作「峱」、《御覽 在 十五里有峱山。《漢書・地理志》:「臨甾名 · 嶩」。錢氏竹汀曰:「《釋邱》: 『水出其左, 營邱』本取 還,便捷之貌。峱,山 齊地。」《詩地 「子之還兮,遭 回環之義,營、還同物,非别音 嶩,山名,字或作『峱』,亦 理考》云:「《水經 我乎峱之間兮」, 名。」《説文》: 其 南及東。」是 **虖嶩之間** 臨淄 注》作 猛 》九百 縣 南 山 九

《集注》已以「還」、「茂」、「昌」三者皆地名, 《釋邱》云『涂出其後,昌邱』,即此 雖 峱,此不煩言而破者矣。 還,《韓詩》作「嫙」, 乎?」承珙案: 王説是也。《讀詩記》引崔 兮」、『子之昌兮』,豈得亦以『丰』『昌』爲 邱」、『宛邱』之類,皆連『邱』字言之,無單 之昌樂,茂即泰山之牟,『牟』『茂』古字 與?」范氏《拾遺》云:或謂「營邱 未實指其處。此詩三章第二句皆言「峱」,若 上一字者。錢以『茂』與『昌』亦爲地名,又引 王氏《經義述聞》云:「凡《詩》中『旄邱』、『頓 「還」、「茂」、「昌」爲三地,何以每往輒遇于 與 雅》『昌邱』,皆非也。《鄭風》『子之丰 毛異,亦不以爲地名也。 故 詩之『昌』 城 地 通 即 而 名 稱 濰

二章言牡,三章言狼。蓋狼,物之尤暴戾者,姚氏《識名解》云:「陸農師以爲一章言肩,「並驅從兩肩兮」,傳:「獸三歲曰肩。」

同物。 同。 故詩以 書• 之「豜」、《周禮注》引又作「肩」。 通 或者「豵」「豜」等本爲豕名,因而 與「豵」對,故屬之豕。 邪?」承珙案:傳云:「獸三歲曰肩。」《後 必别其子母、牝牡之序,作者之意豈暇 以狼之暴戾者列後,羅氏又以肩牡 之説,不可以論詩。 於牡,以乳護其子,非可得犯也。」總之先 後牝者,蓋鳥之類,雄摯於雌, 獸之類,牝 之子,次章從其牡,末章又從其牝。 知何獸而先言之。 稱。 《説文・豕部》引此詩作「豜」。 馬融傳》注引《韓詩薛君 故《廣雅》云:「獸 《豳風》傳:「豕三歲爲豜。」彼以「豜 爲後。 但以 羅端良又謂:『首章從 狼列後,則前 如陸氏泛言肩牡,而 此但言 歲爲豵,二歲爲 章句》正 「獸三歲」者 廣爲 肩牡 可知肩、豣 屬 爾爾 先 凡獸之 二者 狼 與 牡 及 而 風》 謂 毛 漢 後 此 狼 而 不

豝,三歲爲肩,四歲爲特。」 是凡獸之大小皆

詩 最猛者言之。 《疏》云狼「猛捷」,自是難獲之獸,故末章舉 牡 故 可 意 名 」,則 此篇首章舉其大者言之。 止 之。 於如此 田 獵貴牡 栩 風 此所以互相夸譽以爲戲樂。 ,不必過 **>** ,故次章舉所貴者言之。 獻 豜 一爲穿鑿。 于 公, 《秦風》「奉時 是 肩 爲 大 獸 陸 辰

者 謂 偶』之『人』,以人意相存問之言。」據此,各注 禮》「賓入三揖」注:「相人耦。」《匪風》箋云 曲 相 正義引《論語》注云:「人偶,同 中 禮》注云:『人偶, ,耦之事成於此,意相人耦也。」《聘禮》「每 揖」注: 親耦也。 我 庸》「仁者,人也」,注:「人也,讀 偶能烹魚者」,「人偶 儇,譽之也。」承珙案: 揖 我謂我儇兮」,箋云: 以 《大射儀》「揖以耦」注:「言『以』 相 人 稱爲 相與 能 爲 敬也。」《公食 輔周 禮儀 揖 「子則揖 位 耦者,謂 道 皆 人偶之辭, 治民 同 如『相人 也。」 開我 【者」。 大夫 以 揖

> 爲耦。」諸 字當從「二伐爲耦」、《説文》:「耒廣五寸爲伐。 所 言「人 乃正字。 注多借「桐人之偶」爲之。 八偶」, 猶 曰 親 近 所 謂 同 則 相 此箋作 親 二伐 者。

《禮 膓 承珙案:《 熊、狼、野 麋、鹿、麝、狼、兔。」正義 年《左傳》「爲六畜、五牲」杜 正義亦引《内則》「狼 熊不屬。」又《獸人》注:「狼膏聚,麋膏散 夏獻麋。又《内則》無熊,則六獸當有狼 熊、麕、野豕、兔。」鄭康 六獸,辨其名物。」鄭司農云: 可 煎 」語,是狼實古人供膳所用。 和,其皮可 内則》《少儀》諸文,當有野豕,無 並驅從兩狼兮」,陸《疏》云:「狼, 豕。] 陳祥道 内 則》自「狼臅膏」外,又有「狼 爲裘。」《周禮》:「庖人掌共 臅膏」爲 云:「考之於《詩》及 成 引 云:「獸人冬獻 服虔云:「 注 證。 「六獸,麋、鹿、 云: 至熊蹯 昭 五牲 磨、 鹿、 二十五 狼。」 雖 其 "; 而 膏 去 見

經傳 庖。 故《周 其 物 珍 禮》「六牲」當以 貴 非 田 獵 所 後鄭 常有,不 爲 正 可 以 充

著

爲 形志》亦作「蓍」。 韋 則不言所據,未必出於三家。 且濟南之著, 顔於上文「子之營兮」明言《齊詩》作「營」,此 而, 也。」范氏《拾遺》曰,此蓋三家説 失,並 昭 顔師 音弛咨反,乃「蓍龜」之「蓍」字,魏收《地 漢 謂 書 古 即《齊風》之「著」,皆非 • 曰:「著,地 地理志》引《詩》云「俟我於著乎 顔氏乃音竹庶反,以韋 名,即 濟 也 南 承 郡 珙 著縣 案: 昭

引《昏 夫以 雅 庭」、「堂」之證, 簾,士以 『門屏之間謂之宁。』陳 虞東學詩》曰:「朱子《集傳》及《吕記 禮》『俟于門外』以下之文爲『著』、 帷一, 則無屏矣。 竊 有 未 盡 氏《禮書》言『大 《詩》曰『俟我 釋 然 者 爾

壻 家 乎 矣。 之禮矣。曰『俟堂』,不復. 夫家之著也。」但以「俟著」當《昏禮》之「俟於 説,本之《吕記 爲剖别而著其義 説,而於『俟著』、『俟門』猶 於門外之禮矣。 當時古禮盡廢,既無壻往婦家之節 外,謂壻家大門外。』則俟於門 闥」,皆不在大門之外。 此據諸侯以下言。 内』,此據天子言。 於著」,蓋 『著』爲『宁』,則賈 外」,與此詩節次不合。《虞東》之説,略本 而」字,言不過如是 節節與記傳所引者相反,故詩人連 ,其禮亦復簡略。 簾 帷之 **%** 《韓 李巡 曰『俟庭』,不復行寢 如此。」承 《吕記》又引 爲 疏所謂『路門之外,屏樹 詩 蔽 所 説 限, 謂 日 云云 所謂 『俟著』,不復 而《儀 正 亦謂 行升自 珙 似 也。 門内 案 混 張 『門屏之間 之屏。 外, 併 禮 氏 逸 西 兩 爲 注 曰:「著 非著 集傳》之 一**,** 而 一齋有 階 門揖 塾 之 間 下 婦 既 行 也 其 禮 門 九 至 之 以 \vdash

於堂 與此無涉矣。 猶有送者,故《士昏禮》「壻乘 范處 在大門外。 著、庭、堂皆無俟婦之事。 闕」,諸侯以 不出闕門。」廟門謂之祭門。 待之事,則不應先外 疑於先後失次。 人,則俟著、俟庭、俟堂本非一人一事,無容 至著」,乃以 二年《公羊傳》注云「夏后氏逆於庭,殷人逆 禮,送女,父不下堂,母不出祭門,諸母兄弟 序》下正義謂毛意「是受女於堂,出 門屏之間 婦婦 ,周人逆於户」,疏以爲《書》傳文者,尤 至壻家,自 義《補 此詩若從箋疏解爲一人一 日 傳 雉門爲闕門。 鄭 ***** 著」,未 義 著而 而 述毛。 惟箋疏以此爲壻在婦家 辨 庭 而後内。 析 嘗明 而堂相次 尤 不知傳以三章各一 詳 蓋是 是則壻 指 《爾雅》「觀 其車」注謂壻 《穀梁傳》曰 夫 若毛 時 八爲順。 家 闕 在婦家,於 或 傳, 而至庭、 門 事,則 婦家 若隱 衹云 謂 以 之 車 内 相

當爲 《禮》之名充耳是『塞耳』,即所謂瑱縣當耳 之以瓊華乎而」,毛於「尚」字無訓 無理。故當從毛,以每章一人者爲正。 成,何以獨先見素? 今之絛。 鄭,孔疏謂其不然。 華」爲士服,「瓊瑩」爲卿大夫之服,「瓊英」爲 充耳,猶瑱不得謂之爲紞 故謂之塞耳。 者,目所先見而 爲紞。織之,人君五色,臣 조 君之服。 「君子以素爲充耳,謂所 詩人我嫁者,● 充耳 色不雜不成爲絛。」夫絛 以 正義述之,以爲見其身之所佩 素 縣之者,别謂之紞,不得謂之 乎而 云。」正 非嫁 承珙案:王基云: 正義謂取其 義 傳: 者自 耳。」孫意是 引 則三色。 以 孫 謂 素, 縣瑱者,或名 毓 也。 (韻句 "; 但 既 象 云: 此言素 雜 瑱 7,殊爲 至「尚 「 我 毛非 色織 瓊 箋

可見。 者,蓋 昏服爵弁,《周禮》冕弁,皆用玉,則瓊華等自 即冕弁之飾。 皆可言「服」、《南 言「尚之」矣。 下,而加之以瓊華,曰尚。若身之所佩,不得 是冕弁之飾,故曰「尚之」。 以 此經云「尚之」,則瓊華、瓊瑩、瓊英疑 傳言「服」當爲衣服之飾。 禮,人君冕而親迎。 山》傳云「冠矮,服之尊者」 充耳在冕弁之 《儀禮》士 不知冠 冕

子謂 不 都人士》「充耳琇實」,此尤爲士庶人用 冕,則異説 瑱』者,何氏殆未之詳歟? 喪禮》所謂『瑱用白纊』,《檀弓》所 耳琇瑩,會弁如星」,則不特施於冕也。』何元 王五冕皆玉瑱,而《詩》於衛夫人言玉瑱,則 特施於男子也。 惟冕服 虞東學詩》云:「陳祥道曰:『《弁師 可 用充耳,一命以下不得用 以息矣。」承珙案:《 冕服用瑱,而《詩》言「充 明瑱之不獨用 小雅 謂 ,則《士 「練 項之 彼 於 角

語》曰: 之,非謂「華」、「瑩」、「英」皆石名也。 瓊不可以爲石,故當連「華」「瑩」與「英」釋 耳,必非以瓊、瑩爲二物。 毛傳三章皆「石」, 瑩」者,謂石色如瓊玉之瑩,猶《淇澳》「琇瑩 即以此爲君、卿、大夫、士之别。次章云「瓊 曰 文》:「瑩,玉色也。 玉」,以「瓊英」爲「美石似玉」,語有深淺, 傳以「瓊華」爲「美石」,以「瓊瑩」爲「石 緝》引曹氏曰「英、華、瑩皆光采」,是也。 石之次玉者」七字,此後人因《毛詩 『如玉之瑩。』」今本《説文》「省聲」下多「一 从玉, 熒省聲。 衛 風》傳 有 逸《論 《説 但 玉 似

説,非是。 中間雜人「石之次玉」一語,於理宜删。 箋云「瓊英,猶瓊華、瓊瑩」,可見「瑩」與 不知《説文》引《論語》「如玉之瑩」正證明「玉色」之義,不應 美石」,《 反以定本兼言「瓊瑩」者爲衍字,非也。 玉石名,故云似瓊似瑩」。 ·英」一例,定本次章箋必不作「似瑩」。 似」字當本作「之」,鄭以「似瓊之瑩」申毛 正義本誤作「似瑩」,遂云「『瓊』『瑩』 俱 次章箋云:「石色似瓊似瑩也。」下 風 》傳 有「瓊 一、石 似 玉語 觀其引定本末章 遂 以「瑩」 段注謂是字義别 亦 爲石 正義 華」 名。

東方之日

女淫奔歸於君臣之失道,亦是推本之論。毛此而意在彼,主文而譎諫者也。《序》又以男以日月在東方皆言君臣明察之盛,所謂言在以日月在東方皆言君臣明察之盛,所謂言在

來,月出却去,尤爲不近情理矣。 以禮來者哉? 宋儒因之,並謂是女子淫奔, 傳,文理皆順。若箋以「彼姝者子」爲男子, 以禮迎,始能歸我而行夫婦之禮也。 也。 然。 來在男子之室。夫謂之「淫奔」,而日出輒 來,我則就之」。 天下有强暴在室而尚望其 以美好稱之者哉? 下又云「在我室者,以禮 來在女室,則是强暴矣。天下有遇强暴而尚 室。履,禮也。 以每 在我之室者,由我以禮聘,始來就我而爲昏 「姝」同,乃指女子之美。 下句 「室」 爲男子之 次章「闥」亦男子之闥。發,行也。 其云「姝者,初昏之貌」,蓋與《静女》之 章下四句 皆陳昏禮之正, 即,就也。 言彼姝之子所以 以刺今之不 如 言我 此釋

兮」,傳:「月盛於東方,君明於上,若日也;人君明盛,無不照察也。」次章「東方之月「東方之日兮」,傳:「興也。日出東方,

其當 物 爲 暾 出 臣 在東方皆喻不明,義殊 西,既望則終魄于東。」故 韓 明盛。 不 無 暾 兮東方」,王逸注云: 察於下,若月也。」承珙案:《楚 . 詩 明 隱 明,故有淫奔之行。 而 薛 東方之日。 盛大也。」楊子曰:「月未 而昏也。」此説最 蔽,姦慝莫容, 君 吕記》引程 章 句 》,謂詩 其義淺矣。 如朝廷 氏 迂曲。 人言 「日始出東方,其 合傳旨。 詩人以東方之日 曰 傳以日月在東 所 日 明於上 《文選》 説者顔 望則載 月 箋以 辭》「 明 也。 照 色 注 方皆 暾 日 魄) 盛 引 月 刺 今 則 于 容 將

以爲即今「闥」字,引《西京賦 無 上 排 「闥」字。 飛 飛 名之 闥 闥 在我闥兮」,傳: 而 而 上 曰 仰 《門部》: 出 飛。 眺 __: 」,≪西 承 山此 珙 「闒,樓 闥 都 二選 案 賦 門 皆樓 賦 》説 説 上 内 稱 户也。」段 了神明 也 井 飛 上户 」。《説 幹 闥 ´, 在 樓 三三日 文》 日 注 以 高

> 是謂 爲闥 本。 門。』《後漢書・宦者傳》注引《爾雅》曰「小 訓 切言之,則闥 謂之闥」,與今本《爾雅 字。漢人多作「闥」、《前漢 作「達」。《東京賦》「八達九房」,「達」即 闖爲「樓上户」者不同。 闥」,薛注:「宫中之門,小者曰 也」,則與薛同。 賦》「飛闥」云:「突出方木 爲是樓上户之「闖」,於義似近,故 ·樊噲傳》《霍光傳》,注皆云:「闥,宫中 「門内」,用毛義。 毛訓 以内也 《釋文》引《韓 「門内」者,以與上「室」字同 爲 小 然《西京賦》又云「重 門, 詩》「門屏之間 又云「飛闥, 渾言之,則 》不同,此 或別有「闥」字,或通 也。」《玉篇》「闥 書 所據 闥。」此 高后紀贊 薛 突出 門 曰 注《西京 闥 義 以 當 是 則 閨 方木 内 達 皆 古 閨 與 出

東方未明

「序》云"「《東方未明》,刺無節也。朝

《序》下言之。」今案:傳於三章云:「古者 杜蕢酌 無所 郝氏 者。」何以又誤爲傳? 何以未見? 挈壺氏,以水火分日夜,以告時於朝。」 其 刺挈壺氏之語,故傳 告僕夫』云爾。」承珙案: 廷 而作《序》者原其本以責君也。」嚴《緝》云: 哀公興居無節,詩人歸咎於司漏者以 辨説》之惑。若許氏《名物鈔》云:「詩 也 無 興 仲輿 歸 。」黄氏 朱子《辨説》云:「刻漏 政,然所以興居 居 而飲 咎,不敢斥君 無 E E 節 實 師曠、李調,乃所以 《序》下箋云:「挈壺氏,掌漏 號 「興居號令,非辰夜者所得司。 夫 令不 曰:「詩人微其意 而 時,挈 無節、未必皆挈 亦無 求 許氏竟似目未見注 以上諸説皆足以 諸挈壺氏,所謂 壶 挈壺之意, 不明 氏不 規晉平也。」 固 能 以 壺 掌 可 、諷之。 責臣 許 而 氏之 無 以 其 或敢 流 氏 有 於 刻 明 解 見 職

> 《竹書》用《東 不能明其世次,無庸肊爲之説。 不止哀公一世,《序》既不斥何公,是當時 值,故移之於王朝歟? 案:孔疏以哀公當懿王時,不誤。 周王,正所謂 哀公適當懿王之時。 號令不時,挈壺氏不能掌其職。』據齊世系, 兀 年,天再旦于鄭」,沈約 韓氏怡《讀詩傳譌》曰:「《竹書》『懿王 方未明》之《序》,殆以 一國之事繫一人之本。」承珙 是齊廷之顛倒,化起 然齊之挈壺失職,當 注 謂 『興居 沈約 懿 無節 哀 相 注 於

召 發篋視衣,盡 文侯封太子擊于中 之倒之,自公召之。」、《説苑・奉使》篇:「魏 不俟駕,顛倒衣裳而 擊 襲,勅倉唐以 《荀子·大略篇》云:「諸侯召其臣,臣 也。」倉 唐 顛 日 倒 雞鳴時至。 Щ 『臣來時不受命。』太子 走,禮也。 太子曰: ,後遣趙 太子起,拜受賜 『趣早駕,君侯 倉唐賜太子 《詩》曰: 『顛

早,故箋云: 求衣 誰 方 曰 遂西至謁,文侯大喜。」據此,人臣朝君,未明 不夙則莫」,而興居 未明 與 自 謀 君 類 故 故 侯賜 是常禮 倒 勅 「漏刻失節,君又早興。」至末 衣裳。 擊衣,不 子 以 雞 但「自公召之」則 顛之倒之,自公召之。」 無節之弊始盡見矣。 鳴 以 時 爲寒也 至。 ^ 詩》曰: 欲 召 於 擊, 時 章 東 過 無

傳但 傳》云「辰 此 孔子「時 注云:「時 子 晨」矣。 【夜之漏刻,不必又轉「時」爲「伺」。 齊物論》「見 以「辰」爲「時」,只當 不 其亡也」之「時」,謂察候 能 夜,司夜。」此 夜之限甚 辰 夜 , 卵 而 傳: 明」,則誤以「辰」爲 求時夜」、《釋文》引崔 蓋 「 辰, 如 以「時」爲「伺」, 正 義 時。」案:《 云不能 夜之早晚。 若《集 時 莊 節 如

永 則 書 正 義 漏 六十 云: 「馬融、王 刻 夜 漏 四 肅 + 注《尚書》,以 刻 日 短 則 書 爲 漏 日

《尚 長爲 此蓋 異 云: 同者 刻,又與馬 刻,夜三十八刻,冬至晝三十八刻,夜六 刻以爲冬至晝短,此其所以誤耳。」王氏 爲傳已减之矣。 言日永日短之數,則 未减,又减晝 六十、夜漏 見之漏與不見者齊也。 + 四 十五刻,日不見之漏四十五刻。』又與馬王 馬馬 干 刻。 .書後案》云:「玄《授時歷》夏至晝六 「鄭知 用 五十五刻。 ,鄭言日中、宵中 刻、夜漏六十刻,日 據 \pm 鄭於《堯典》注 地 肅 鄭 日 中 四 難 並 見之漏 十,减 Ŧī. 而 言,故 不同。 鄭之説。 刻以增之,是鄭之妄説 因馬 因 以冬至反之,取其夏 晝 、與歷 减 融 晝夜刻數長 者其漏齊 云: 以 蓋 書 所 日永者,日見之漏 中、宵中則晝夜各五 裨夜 甚錯。 《尚 地勢有在 漏 『日中、宵中者 减 五. 而 矣。 書 刻 則 又 Œ 馬 不 减之,故 極于六十, 鄭意 融言 南 可矣。 義 · 意 在 ***** + + 引 耳。 謂 晝 西 至 馬 示 莊 夜 肅 其 其 漏 日 融 Ŧi. 日

三八〇

駮。」 爲限。 刻 則畫五十五刻,夜四十五刻。 以 刻 下旬言之也。」承珙案:《尚書正義》又 者,日自長至 夜三十五刻。 刻,據日見之漏。 上刻六十五,夜 云。』高誘注《吕覽》云: 分日之一,四時之間九日有餘,較一刻爲 短 周 天之晝夜以日出 此。 則 數 止 禮 孫氏淵 馬、 長 于 日未見、日没後 四 日未出前二刻半爲明,日 而 極 挈壺氏》疏云:『馬云春秋晝夜五十 鄭、 鄭 于 六 如《尚 則 漸 授時 《 授 又取 十二,短 一年通閏,有三百六十五日 長 漏水上刻三十五。』各 若兼 時 日 人爲分,人之晝夜 書疏》云:「鄭與馬異者, 歷》三者皆是 南北之適中者言之耳。 歷 增 五. 日未見、日没後 極 據 『夏至之日 刻數,各據一 刻,則畫六十五 于三十 燕都 若夏至晝六十 而 入後 也,王 八,其 言 一月上 故 以 晝 五刻, 一肅妄 一刻半 不 漏 云: 不同 畫 昏 刻、 水 率 中 同 四 明 夜

> 同。 鄭互 刻,計 或 與 五刻。 法。 校五 五。」亦與鄭同。 之日,晝漏水上 分晝漏五十,則夏至六十刻矣。」此 多五刻。其注《考靈 馬 爲 然 香。 日 少五刻,日 敷! 日永晝 異,且多於鄭 刻。」據 入而言。 高誘注《吕氏春秋》「日短至」云:「冬至 春 日 損 分至夏至 夜五 短畫漏,兼 此 漏,不兼 短 此王氏所云「地 知 知 刻以 畫漏 刻 而 十刻 四 鄭 九十二日,當增 其 裨於晝, 注《尚 + 日未出、日入言之,故 又多五刻者,蓋欲備 日未出 所云 燿》云: 五,夜漏 則 書》於日 夏至之刻 並 與日入言之,故 則畫多於夜, 有 不 「九日增减 水上 止 南 十刻 1永書 北 兼 注 刻 正 日 又 未出 與 與 五. 漏 馬 + 馬 理 少 復 較

南山

序》云:「《南山》,刺襄公也。」箋疏以

珙 矣。 文姜。 惡 雄 刺 刺文姜。 誤入《齊風》,尤爲 改爲 之大惡,無 之作也。 者,諱其氏而 齊之子,而非齊之婦也。 不可 謂 襄公也。」《虞東學詩》曰:「章首既 狐 目 章 季彭 喻 桓 全詩本皆爲刺 發端,是意主於刺襄以及文、桓 刺 亦 魯 以 嚴《緝》謂 吴氏易堂曰:「前 桓之求 後兩言『取 Ш 雄 襄公淫乎其妹,下二章責魯桓縱 此 所歸咎,而 又以 狐 爲 意 也 詩 匹。 且詩 齊 國之通稱 臆斷。 襄 稱 人不當以 妻」,是刺魯桓 不知齊 而作,後二章乃惡其 「齊子」,疑爲 人 責之魯桓。 八嘗以 不曰「姜」而曰 「齊子」者,謂 兩言『齊子』,是 ,此所以 襄 雄 雄 鳥獸之行,何 狐目其君 雉 《敝 魯人 目 一, 皆 耳。」承 以 爲 衛 一、符》之 其爲 齊人 之作 宣 南 所 齊 公 欲 君 以 Ш 恣

崔 高 大 南 也 Ш 崔 崔 或 君 傳: 尊 嚴 南 如 山 南 齊 Ш 南 崔 崔 山 然。」正 也。 崔

> 又東逕 齊南 義 也。」《方輿紀要》: 南郊 十五里,一名南野 Ш 口者歟 曰 一一一詩 Ш 山 臨 下,左思《齊都賦》曰『牛嶺鎮 。」●案:《水經注 1 淄 人自歌土 縣故 城 Щ° 南 南 風, 東 郊 此當即《詩 一》:「淄 Ш Ш 得 III 在 天 不 臨 齊 水 出 淄 水 逕 其境,故云 縣 所謂 其 牛 口 東南 、南』者 , 水 山 西 南 出

傳旨 謂 者 非 配 當配雌,今雌雄 别,失陰陽之匹。」李氏迂仲 惟 也。 妻,今襄公兄與妹淫 雄 雌 狐 雄 『雄狐』亦 之匹,而 但 傳云「雄 狐 與 綏綏」, 其 類 無 無 狐 如『雄雉于飛』,言鳥獸 相 傳: 别 别,失陰陽之匹,以 相 隨。 也。」承 隨 が雄 ,亦失陰陽之匹 一者,非 鳥 狐 珙案: 獸之性,淫不 曰 : 相 謂 隨 綏 孔 李説 雄 ,疏: [] 綏 喻 相 心。」此 之雄 夫 最 然 當 得 雄 無

❶ 「齊」上,阮校本《毛詩正義》有「南山」二字

狐行 匹。 親,配 二雄也 義謂箋以狐 南山、「雄 | 求匹 箋惟 非 其正 偶 以 無二雄相隨之理,其實傳本不謂 形 狐」各自爲喻者異義。 狐 , 故 在 貌綏綏然」,則 日 Ш 上,合二句爲 綏 綏然 無别,失陰 意與傳同。 一喻 其云「雄 與與 陽之 正 傳

服,而 不宜 公也。 疏强 承珙案:毛於上章「南山」、「雄狐」各自爲 雙之美,貴賤各有其耦 喻,此「葛屨」、「冠緌」亦各自爲喻,謂葛 兩,喻文姜及姪娣與傅姆同 之賤者。 爲申之,皆非 同處,猶襄公、文姜不宜爲夫婦之道。」 葛屨五兩, 葛屨五 下有五 五人爲奇,而襄公往從而雙之。 冠矮,服之尊者。」箋云:「葛屨 兩之多。 兩,冠緌雙止」,傳:「葛屨 則屨具於下矣。 是。 如此。 後儒 冠緌尊飾,而 處。 惟 箋説迂曲 蘇 冠緌雙止 冠矮,喻 氏 《詩 上 屨 有 冠 (傳》 賤 成 屨 服 襄 五.

取

兩屨以履女。

然則葛屨五兩,親迎之禮

琮,大夫、庶人以屨二兩加

束修,夫人受琮

案:《士冠禮》記 意。 爲耦。 或又據《説苑》言親迎之禮,諸侯以屨二兩 未嘗不可 玄端黑屨,素積白屨,爵弁纁屨。 喪服不易其稱,安得有五者之異?」承珙 屨。』變『皮』言『白』,可見葛屨惟用 皆以葛爲之。 散屨,爲 用葛,爲便於時。 與屨爲耦,雖五 於齊,曷爲又相 則緌具於上矣。 周禮·屢人》注有纁屢、黄屢、白屢、黑屢 至葛屨所以言「五兩」者、《放齋詩説》引 襄公、文姜非其耦也。」二説皆能 五. 備纁黑諸色,曹氏之言不爲 兩。 《士喪 姚氏《識名解》謂:「屨 兩各有耦。 從哉。」又吕 云「屨,夏用葛」,其下即 言文姜有匹 其纁、黄、白、黑諸色未 禮》:『夏葛 冠矮之雙,亦 氏 一於魯,襄公有 大 臨 則是 屨,冬白 本色,故 曰 無 葛屨 惟 得毛 加 云 又 耦 必 夏 自 屨

既耕 疏》本 履之名。衡,古『横』字。 縱横耕田。 箋云「必先耕治其田」者,約略言之,亦非 躐」,疏以「踐躡概摩」言之,自與耕田 摩 縱横耕田,且書傳未有謂耕爲獵者,故知 亦與此傳言「獵」 「横從,游行 作「横行治其田」,非是。 而踐躡 獵之也。」承珙案:獵, 氏《詩經 《坊記》引《詩》「横從其畝 概摩之也。 治其田 一意同 游行者,往來踐治之 也。」此從《釋文》。 古者推耒耜 也。 衡獵之、從獵之,謂

注

謂

今《注

宜

經

典 亦

通

作

不同

而

耕,不

小學》云:「 賈思 勰《 齊 民 要

毛詩後箋卷八

謂

上,則 正 治也。 横」,可見《韓詩》字雖作 音義》又引《韓詩》傳 從』與『縱横』不分二音。」承珙案:《釋文》引 術》曰:『凡種 、韓詩》「東西耕曰横,南北耕曰 (韓詩》『從』作『由』。 與毛同耳。 麻 衡治之、縱治之、乃種之,然後 無葉也。』此正合毛説。 麻, 耕 『由』亦『從』也。 不 曰「南北 厭 「由」,訓 熟。 曰從,東 世,《一 縱 獵 仍爲「從」, 横 猶 七 古『隨 得 踐 切 西 徧 麻 也 經 以 Ħ

樹

也。

衡獵之、從獵之,種之,然後得麻。」正

侯五

兩明矣。

今案:下二章方言取妻,此

章

諸

也,「二兩」當作「五兩」,大夫以下二兩,則

恐未及親迎之事,且於「冠緌」又將何説

蓺麻如之何?

衡從其畝」,傳:

「蓺,

也?

義云:「在田逐

禽謂之獵,則『獵』是行步

踐

《詩》曰:「娶妻如之何。」傳曰:「娶,取 妻如之何」,當是用三家詩。 詩》。」承珙案:《白虎通義》引《詩》亦 也。」」玄應 段云:「《衆經音義》曰:『娶,七句切, 詩》不同,疑亦三家字異耳 下章云「伐柯如之何? 取妻如之何」、《釋文》:「取,七喻反。 所 據 《毛詩 匪斧不克」,與今《毛 與 陸 即如《坊記》 異, 或 是《 作 取也 韓 引 婦

之祭。 甚明,傳説自不可易。 言告廟之事、《白虎通義》因有「娶妻不先告 皆告於廟,非徒一卜而已。 説,故解《左傳》 「先配 廟,示不必安也」之説。 相 户西。』注云『爲神布席』。 其後諸禮皆轉以 故特言之。」承珙案:《士昏禮》親 按、《昏禮》婦家受納采之禮云:『主人筵於 爲卜者,以納吉爲六禮之一,故舉卜言之。 年《左傳》「圍 謂告。」正義引《曲禮》「齋戒以告鬼神」、昭元 굸: 告神」,又以女家之布神席當之。 似。 證娶妻自有告 取妻之禮,議於生者,卜於死者,此 必 其説 女家尚每 父 已爲 布几 母 孔 廟之法。 事告廟,則夫家將 筵,告於莊共之廟而 疏 傳 : 後 所 鄭君蓋亦主不告廟之 其實他經言告廟者 祖 駮。 必 而又云:「箋必以 」,以「祖」爲載 明以 告 至注《曲 父 ト爲大 迎 然《曲禮》 母: 以 行 廟 一禮》之 六禮, 前 來」, 不 事, 道 之 箋

告君,必先告廟。是則鄭君本未有定論矣。人,冠、娶妻必告。」鄭云:「告於君也。」亦既王世子》曰:「五廟之孫,祖廟未毀,雖爲庶之意,實主男氏而言,觀上下文可見。至《文

甫 田

作。 傳》: 以 此忽近圖遠之明證。」承珙案:《詩序辨説 紀而滅其國,乃兄弟之間弗能 實指齊襄。 身篇》亦引此詩,蓋言詩之用。 所 禮義而求大功,不修德 云《甫田》悟進學,《衡門》悟 此 以求者非其道也。」《詩序廣義》曰:「古人 未見 夫詩 《序》云:「《甫田》,大夫刺襄公也。 襄公討鄭 無達詁,讀詩者原有引 其 以詩之言『遠人』者證之、《春秋 爲襄公之詩,故泛指爲 而殺子亹,伐 而 求 諸 衛 處世。楊子《修 防,以 侯 而 而此詩之作 ,志大心勞 納 伸 戒 至篡弑 惠公,侵 觸 時 類之 無 而

功。 反以 之謂歟!」此 境,意者地廣 當 此 法,故 内足然後 及外,自近者始。 鹽鐵論 悟 日則實 爲 《詩》云:『無 進學,見《困學紀聞》。 《楊雄《 舊説 有所指,必非泛作格言,了無 邺 地 相 法言》引之以説修身,李 外。 所引 而 廣》 傳 不 與與 篇云: 今中 田 近者親 證 耕,多種 詩 甫 乃 國 不合, 詩 田,維莠 「夫治國之道,繇中 未爲不可。 附,然後 獘落不憂,務 本義,何氏《古 耐 何也 不耨,費力 驕 來遠 驕。」其 和 而 關 百姓 在 而 風 伯 義》 係 斯 無 邊 人 於

通,而 若以 君 外,非比 以 一句 内 每章 河詞旨 善 田 此 乃云戒時人厭小 其 詩 甫 四 顯興 田 明 首次 身,外 句 白 之難獲比 平 隱 兩 列 無 之謂 脩 章,傅箋皆以上二句 爲 可 其 比 疑者。 矣。 德 思遠人之徒勞,尚 而務大,忽近 則 居 至 所 《集傳》改爲 無 末 比 幾 章箋云:「人 之意 何, 而 可 在)興,下 圖遠, 以立 於言 屬可 比。

> 公躐 功。 深婉矣。 李《解》、《吕記》皆從 見之無幾 范氏《補傳》、嚴氏《詩緝》乃謂 等躁 猶是婉孌之童子,少 何, 求之喻 突耳加冠 説 自 其 可通 爲 説、《集 自脩 成 人 然不如箋疏 童子冠弁爲 飾,什么 也。」蘇《傳》、 《傳》亦 然 因之。 而 襄

雅》: 《載芟》「有厭 喬」。 桀」意近 之喬桀,邈 桀,猶驕驕 美也。」箋云:「桀,先長者。」故 桀」,傳云:「桀桀,猶驕 「喬,高也。」下文「桀桀」亦高出 承珙案:「驕」蓋 維莠驕驕」, 儔 也。」潘安仁《射雉賦》: 其桀」,傳云:「言桀苗 類 而 毛傳 殊才。」與此「驕驕」、「 無 驕 「喬」字之借。 訓 也。」《法言》作「喬 次章「 此傳云:「 「何調 厭 維莠 之義 然 **爾** 桀 翰 桀 特 桀

文》無「忉」字,當通作「惆」。 「惆」之爲「忉」,「勞心忉忉」,傳: 「忉忉,憂勞也。」《説

忉怛 但」。 不可解 本有此 憂也。」《釋文》亦不云有作「切」者。 此條當有脱誤。今《爾雅・釋訓》:「忉忉, 怛』,不復言『切』,失之遠矣。」承珙案: 或變爲『忉』。 切」,憂也。 惆悵 猶 作「怊」,蓋「忉」又「怊」之省也。《匡謬正俗》 也。」《荀子 云:「《甫田》篇『勞心忉忉』,《爾雅》音 切切」者, 忉」字相類。 艄 之爲 而 九辨》:「惆悵 王仲宣《登樓賦》: 『心悽愴以感發,意 ,恨也。 憯 ,然於韻不協。 惻。」諸 而顔氏又明言「忉」當作「切」,殊 後之賦者叙憂慘之情,多爲『忉 《莊子・天地》篇釋文引《字林》 今之學者諷 『切』字从刀,匕聲,傳寫誤亂, 禮 舠 如 論 耳 此 兮而私自憐。」《玉篇 篇 類,皆當音『切』,字與 或謂次章「怛怛」有作 *****: ^ 説 惯 誦 文》: 辭賦,皆爲『忉 然 不 惆 嫌。」《 即 顔氏 謂 失 写切 意 古 楚

《五經文字》又云:『十,《字林》不見。』可 《詩・風》。《説文》以爲古「卵」字。』《九經字 文》者所爲也。 文》『卵』字作『卄』,唐時不誤,確然 樣》曰:『廾,卵。上《説文》,下隸變。』是《説 言礦,計非礦字也。《説文》『卵』字本作『計 文 》: 於《石部》妄增之。 『廿』變爲『卵』始於《字林》。 用,故轉從「石邊廣」之字。」語甚明晰。 總角之「廿」字。 注:『十之言礦也。』賈疏云:『經所 『古文磺。 不作『卵』,《五經文字》曰:『十,古患反,見 穬。〕段注云:「各本此下出『十』篆,解云: 卵』不作『十』,則五季 「磺,銅鐵樸 總 角 《周禮》有卝人。』按:《周 **计**兮」, 《説 此官取金玉,於什字無所 石 『廿』果是古文『磺』,則鄭 文》即 傳: 也。 以後據《字林》改《説 一 十**,** 無『十』,乃有淺 从 石,黄聲。 今時《説 幼 穉 云「十」是 也。」《 可證 禮 文》作 十之 讀若 》鄭 證 説 人

何必一 則《周 亦如 也。 借爲『金玉樸』之『磺』,皆於其雙聲求之。 字無所用』哉? 云「兩 假借,非以「丸」爲「卵」之本字也。 高注謂古字或以「丸」爲「卵」,是以聲義相 或又據高 明以「卝」「礦」爲二字,若果有從石之「砒」, 云與角十之字有别,亦誤。」承珙案:段説是 幼 '卵』字」,不應又有「十」爲古「卵」字。 説文・石部》之「廿」當作「砒」。 周禮》者徑謂『十』即『磺』字,則非矣。 穉 或據《一切經音義》「礦、古文础、同 「鯤」,引申爲「總角卝兮」之「卝」,又假 云『之言』,賈何必云『此官取 角 禮》多古文、注不必轉「廿」爲「礦」矣。 」,猶後人以 如『十』字之形」,鑿矣 誘注《吕覽 《説文》『卵』字古音如『關』, 稚子爲雛之意。 • 本味》篇 不知鄭注 金 云「丸,古 嚴《緝》乃 一世訓 玉 一,於十 不 二, 是 又或 知 讀 近

盧令

百姓聞 樂之。 《還》意略同,不信《序》「陳古以 莊 此 事,故通篇直 證。」承珙案:後儒説《詩》者多謂 焉。」何氏《古義》曰:「《國語》及《管子書》皆 君能有美德,盡其仁愛,百姓欣而奉之,愛而 想望之詞,故以 知《還》詩「揖我謂我」等語,是自夸其從禽之 年,齊侯田于貝邱,此 稱襄公田獵畢弋,不聽國政。 獵畢弋而不脩民 獨詳者,自以《序》刺襄公,故詳述人君之 四年,公與齊侯狩于 《序》云:「《盧令》,刺荒也。 順 而 時 ·説之,其聲令令然。」傳文多簡, 游 刺其荒。 田 爲 與與 事,百姓苦之,故陳古以風 陳古。 百姓共其樂,同其 此詩云「其人」者,是 足爲 首章傳云:「言人 《左傳》載,莊 襄公好田 《公羊傳》載 風」之語 襄公好 此 (獲,故 之明 詩 與 田 八 而

引《孟子》爲證,此善申傳義者也。事。足知《序》傳所言,必皆有所受之。正義

非是。 曰 : 環 而 獜,聲也。 於首章言「令令」,情景最合。《玉篇》:「獜 韻》:「獜獜,犬健也。 田犬頷下有環,必先聞其聲而後見其狀,故 義爲「健」,殆據《齊》《魯詩》歟? 下二章言 然「泠泠」當亦指聲言。 曰:「《韓詩》作『盧泠泠』。」此雖與毛異字, 健」上脱「犬」字。 獜獜,犬聲也。 重環」、「重鋂」,則此章作「環聲」爲是。 説之。 聲。」《説文・犬部》:「獜,健也。 盧獜獜。」」承珙案:《吕記》引董追 盧令令」,傳:「盧,田犬也。 令令,纓 疏 義作「鈴鈴」者,以今字明古字,易 亦作鏻。」則不明爲何聲。 中 力珍切。」又《青韻》引《玉 每有此例,非别有本作「鈴 郎丁切」。 出《説文》。今《説文》 若《説文》作「獜」而 以爲「犬聲」,尤 《詩》 篇》 廣 蓋

「鈴」,可見。句」,經下云「盧令至且仁」,皆作「令」,不作句」。觀《序》下正義云「《盧令》三章,章二

者,皆辭兼二事,若『鬈』是『好貌』,則與『美 與 字》以爲其字从手作 爲凡好之稱耳。 義相近。此傳但言「好貌」,則是由髮好引 服長鬈貂。」長鬈,謂毛長也。 作婘。」合之此傳,是「婘」與「鬈」同,又省作 記》:「燕則鬈首。」《管子》:「百工商賈不得 曰:『其人美且鬈。』」此「鬈」之本義。《雜 卷」,傳云:「卷,好貌。」《釋文》:「卷,本又 案:《還》詩「揖我謂我儇兮」,《釋文》引《 詩》作「婘」,音權,好 「卷」。《説文・髟部》:「鬈,髮好貌。 下章「偲」字意複。 「其人美 且 鬈」,傳: 箋謂「鬈」爲「權」、《五 灌」。 正義 貌。《陳風》「碩大 「鬈,好貌。」承 云「箋以諸言『且 但訓 皆與《説文》本 爲「勇壯」, 《詩 一經文 申 且. 珙 一乎?
一一乎?

一一乎?

一一乎?

一一乎?

一一乎?

一一里。

「一里。。《稽古編》曰:「『美』是美史一也」,故易之。《稽古編》曰:「『美』異義,是一也」,故易之。《稽古》之『真如渥丹』、《駟鐵》之『舍及之。《終南》之『顔如渥丹』、《駟鐵》之『舍及之。《終南》之『顔如渥丹』、《駟鐵》之『舍及之。《終南》之『顔如渥丹』、《駟鐵》之『舍及之。《終南》之『顔如渥丹』、《駟鐵》之『舍及之。《終南》之『顔如渥丹』、《駟鐵》之『舍及之。《終南》之『顔如渥丹』、《駟鐵》之『舍水門漢』,皆是矣。」承珙案:《鄭風・叔于位》,故易之。《稽古編》曰:「『美』是美思,

『多鬚』,而引《左傳》『于思』語爲證,則兩章俗,而彊壯稱能傑。」亦其義也。《稽古編》義亦近。如《能部》云:「能獸堅中,故稱賢義亦近。如《能部》云:「能獸堅中,故稱賢善「才,多才也。」《説文》:「偲,彊力」與「才」「其人美且偲」,傳:「偲,才也。」箋云:「其人美且偲」,傳:「偲,才也。」箋云:「其人美且偲」,傳:「偲,才也。」

思』二字爲義,非偏釋一『思』字也。」載賈逵云『白頭貌』,皆不云『鬚』,且合『于《左傳》杜注云『于思,多鬢貌』,《釋文》、正義意複矣。况《説文》『鬈,髮好貌』,不云鬚也。

敝 笞

耳。 刺哉? 桓即斃於彭生之手,詩何得責其防閑 疑。然于歸時,文姜淫行未著也,末年如齊, 不得云大歸,則詩言『齊子歸止』定指于歸無 也,舍是無言歸者。文姜如齊,始于桓末年 案:女子之歸有三:于歸也、歸甯也、大歸 國患焉。」陳氏《稽古編》曰:「《序》以爲惡魯 魯桓公微弱,不能防閑文姜,使至淫亂,爲二 桓微弱,是也。 時僖公已卒,不得言歸甯。 《序》云:「《敝笱》,刺文姜也。 蓋嘗考之矣,魯桓弑君自立,惟 朱《傳》以爲刺莊公,失之矣。 又非見出 齊人惡 而 以爲 恐諸

制母, 旨。 爲惡 姜」,則因敝笱之興而 深哉。」承珙案:首《序》言刺文姜,是全詩 見禍本,故不於如齊刺之,而於歸魯刺之,恉 乘公之日,而敝 於晚年發之耳。 勢不得不畏内,養成驕婦之惡,已非一朝,特 與文姜之驕逸難 女,於其嫁也 (序)義之長。 文姜,尤非詩旨 見 其下云「齊人惡魯桓微弱,不能 《吕記》引胡氏、楊氏之説,皆從《序》以 桓。《集傳》始改爲 討, 而 以爲 齊侯 結 或又泥於《序》首之言,以敝笱 當制其僕從。 ,親送之讙。 于 婚 於子翬逆女之年矣。詩人推 然則笱之敝也,不敝於彭 嬴 於 制 齊 可 以 知。 推原文姜淫亂 成 以 刺莊,又疑於子不宜 婚。 古 則嫁 桓既恃齊以自安, 其 其説牽率,不如 文姜 位 時扈從之盛 又僖 故 之所 防閑 不 公愛 由 文 本 由 生 媒

「其魚魴鳏」,傳:「鰥,大魚。」正義引

可信。 雅》: 别 之「鱨」即黄 《本草》以鱤魚爲鰥,乃李時珍説。 鱤魚」,郭注 名黄頰。』《 賦》「鰅鰫鰬魠」,郭璞注云:「魠,鱤也。 者,啗也, 啗,故又名鱤魚,又名鮨魚。』鱤者,敢也。 色黄,鱗似 其盈車者耳。 魚體似鯮而腹平,頭 『魴』『鱮』同稱,非甚大之魚,衛人所釣,偶得 車」爲證。 紙,侈口魚也。」《玉篇》:「魠,黄頰魚。」《廣 孔 有 叢 「鮥魚」,亦 「紙、航、鯖,魠也。」陸《疏》又以《小雅 子》 總之、毛傳云「大魚」者、不過以見非 則定 山 鱒 《稽古編》曰: 衛 (類魚。 亦云:「一名黄頰。」《説文》: 海 而 人釣 斯語 不 非敝笱所制矣。」承珙案: 經 稍細,大者三四十斤。 名 然皆不以爲鰥。 良然。 於 鰥 東山經》「减 似鯇 河 「嚴《緝》謂『鰥』 得 而 然案《本草》: 鰥 綱目》之説 口大,類似 魚 焉 水,其中多 考《上林 《説文》 其 似 善吞 鮎 大 「鰥 與 盈 而

者,如今鱮亦有小有大。 敝 不知魚子尚未成 耳,非必大至於盈車也。 次章釋鱮 笱 雖强笱亦不能制矣。馮氏《名物疏》云: 所 能 制,不必定是 ,亦云『大魚』,則鰥特魴 魚,何云制以笱邪?」 盈 『盈車』即鰥之尤大 鄭箋以爲魚子,殊 車。 若果 盈 鱮之類 車之

歸齊。 謂于 氏遂如齊」,乃歸齊實事。」承珙案:《南 齊爲淫縱其欲,而 之「曷又鞠止」、「曷又極止」固謂 齊侯及如齊師者各一,皆於齊魯之境,未嘗 又從張氏説,以 三言『歸止』,惟桓十八年經書『公與夫人姜 云:「婦人謂嫁曰歸。」《集傳》從之,而於此 「考莊二年至七年經,書姜氏會齊侯者三,享 齊子歸止」,案《南山》「齊子由歸」 如下篇《載驅》所云,是其事也。 此 詩 本其初嫁言之,以見文姜驕伉 爲歸齊。《虞東學詩》云: 兩 詩所云「歸 止」者,則皆 桓與姜氏如 此詩 Ш 箋

止」爲歸魯,而《敝笱》之「歸止」又爲歸齊,詞由來者漸,非一日之積耳。若《南山》之「歸

同義異,恐非詩旨

耳。 皆言其衆盛,以見豪奴悍婢簇擁 之爲惡。」夫從者之「如雲」、「如雨」、「如水 《鄭風・出其東門》「有女如雲」、《大雅 「由文姜淫泆、故從者亦淫 **伉難制之意隱然言外。** 之時,其從者之心意如雲然。 定。」此與下文「雖 爲從者心意無定、可善可惡之比,正義遂云 云:「其從,姪娣之屬。 云:「如雲者,如其從風,東西南北,心無 奕》「諸娣從之,祁祁如雲」,傳皆以「如雲」言 「衆多」。鄭惟《韓奕》同毛,於《出其東門》箋 後知魯桓微弱,文姜遂淫恣,從者亦 「其從如雲」,傳:「如雲,言盛也。」案: 則」義不甚協。 言文姜初嫁于魯 箋乃以三「如」字皆 亡,非也 雲之行,順 而 來,其驕 此 箋又 隋 有 風 栢

篇 》: 字異而 唯, 貌。」此蓋皆本《韓詩》,又加水旁耳 弓》「莫肯下遺」,箋云:「遺, 云: 本言語聽從之稱,引申爲凡物之聽從。 韓詩》作遺遺、言不能制 「瀢瀢,魚行相隨。」《廣韻》: 唯 其 [義同,「唯」與「遺」皆有「隨」義。 唯, 魚 唯 行相 唯 隨 傳: 順之貌 唯 唯 。」《釋文》: 出 也。」案: 讀 人 曰 「瀢, 不 隨。」《玉 制 毛韓 魚盛 唯 《 角 唯 箋

載 驅

禮義,故盛其車服,疾驅於通道大都,與文姜 之使知。『載驅』若指文姜,當其發夕于魯, 淫,播其惡 而此篇獨繫之『齊人』,正恐讀者但見詩 齊子」,不辨其 詩》之例,鄭詩 《序》云:「《載驅》,齊人刺襄公也。 於萬民 何以刺襄,故加『齊 不 焉。」許氏《詩深》曰 書『鄭』,齊詩不書『齊』。 人。以 「序 著 稱 無

> 《詩》與《春秋》相表裏,豈不信哉? 齊人 子」,而不稱「姜」,其有諱惡之意,亦復 出之,所謂言隱而旨顯 車馬馳驟之盛,無所指斥,而以「齊子」對 刺其君,其詞宜隱 痼之疾,而善言其情狀矣。」承珙案: 夕魯道,而後詩意了然。 齊人目擊襄公之薄薄載驅,遂想見齊子之發 簟 茀者, 何 曲 國君之路車,非夫人之翟茀。 見其 『薄 故 薄 「簟茀」、「四 ? 也。 可謂 惟 至諸詩皆稱「 屬 發淫人隱 之襄 [驪]但 公, 齊人自 昭 言 微 古 則 齊 其 深 照 以 知

爲 于防。』杜注:「魯地。」傳曰: 鄭俱以上二句指襄,下二句指姜,《集傳》改 莊二年冬,『夫人姜氏 續,必並言文姜,文方貫也。 今案:《春秋 齊 刺文姜。 地。」傳曰:『書 《虞東學詩》曰: 嚴華谷言四句分作二人,詞意斷 姦也。』七年:『春,會 「《載驅》,刺 (會齊侯于禚]。 『齊志也。』杜 襄公。 杜 齊侯 氏 注 以 毛

引陳 公而不一及耳。 必盡然。 志」。 爲『至 乘,但乘安車駕一 蔽之别」。《毛詩 衛夫人之車以翟茀」,以爲「此男子、婦 叙一人之事, 豈容先在 無誤,文亦無不貫也。」承珙案:何氏《古義》 子發夕」,明是聞襄來而暮夜啟行赴之。 首言『載驅薄薄』,明已在道疾行。 及齊境,正 祥道《禮書》云「襄公方叔之車以簟 詩 齊 中 地 總之,齊人作詩刺上,不應反 杜 四 則姦 所謂 舉『魯道』,兩言『汶水』,始終不 發 明辨録》又云:「婦人不立 馬,而 至魯地爲齊侯之志者。 夫 人,至 道 無四驪。」其實 而 後啟 魯 地 行? 則 末言『齊 齊 傳箋 舍襄 人車 亦 侯 弗 若 不 况 之

林》云:『襄送季女,至於蕩道。齊子旦夕,薛夫子、王叔師皆訓『發』爲『旦』,故《焦氏易惠氏《古義》曰:「《小宛》詩云『明發不寐』,「齊子發夕」,傳:「發夕,自夕發至旦。」

留連 未悟傳意即以「發」爲「旦」耳 寐」爲「從夕至明,開發以來,不能寢寐」, 此「發夕」爲「夕時發行」,以《小宛》「明發不 言「旦夕」,彼「明發」猶言「明旦」耳。 夜達旦」,即所謂「夕至明」也。 亦傳寫衍「發」字。 亦是以「發」爲「旦」。「自夕發至旦」當本 『昏鼓四通爲大鼓,夜半三通爲 「自夕至旦」,傳寫衍「發」字。《小宛》傳云 通爲發明。』發明,猶旦明也。」承珙案:毛義 明發,發夕至明」,當本作「明發,夕至明」, 久 處。」旦夕,猶 《祭義》注以 發 夕 也 「明發」爲「自 此「發夕」 説 文》 日 正 明三 日 作 LI

與下「翱翔」、「游敖」一例。蓋首章「齊子發猶言「此何事也,而乃於焉樂易乎」。「樂易」「豈,樂。弟,易也。」此獨云「於是」云「然」,然。」承珙案:毛於《蓼蕭》「孔燕豈弟」直云然」,傳:「齊子豈弟」,傳:「言文姜於是樂易

之説。 樂易乎? 豈得泥於「强教悦安」之訓,而疑文姜不當言 非 儷句,文義未嘗不配。 息車徒耳。 説詩。」承珙謂: 此 而「發夕」、「豈弟」、「翶翔」、「游敖」皆爲疊字 夕」,言其 「發夕』猶言 『發寫』。」此 三章形容其 圛」,此古今文絶殊,非關聲誤者,不當引以 園』與『濟』不韻。《尚書》之一作『涕』,一作 豈弟」爲『闓圛」,與『發夕』相儷, 獨在道爲然。」不知此「樂易」猶言「流蕩」, 「弟」爲「圛」。 「《方言》:『發,舍車也。 之發。』郭注:『今通言發寫也。』《詩》 然下三章方言在道,不應首章先言解 且 段氏《尚書撰異》云:「鄭箋欲改 在道坦 夕 往 正義云:「若是其心樂易, 來 易舒徐,毫無 魯 説是也。 道 鄭箋讀「豈」爲 則 爲 用 一篇之提 戴氏《詩考正》 《 詩 東齊海 慙恥 小學》又 뻬 、岱之 「闓」, 之狀。 綱 不 下 知

安、肥城、甯陽至東平入濟,綿亘數百里,或 云:「原山之汶,以今輿地 襄公之時,汶水之北尚是魯地。』《虞東學詩 云:「魯在汶側,齊在魯北。 公既無禮義,乃疾驅其乘車以入魯境。」正 邱在汶水之上邪。」承珙案: 不可考。今以《春秋》所紀會地按之,或者祝 文姜渡汶以往。至鄭箋所云『都』爲何邑,已 是襄公渡汶而來。再會於穀,穀在 境,亦文姜渡汶以往。 焉,襄公與文姜時所會。」《稽古編》欲以《水 元年《左傳》稱:『公賜季友汶陽之田。』當齊 地」,而不知其所在。 文姜渡汶而往 云:「莊二年會禚,禚在禹城、博平之間 經注》所謂「文姜臺」者當之。《毛詩明辨録 汶 水湯 湯」, 也。 箋 四年會祝邱,注 云: 五年如 七年會防,防在 「汶水之上 考之,自萊 水北 首章箋云: 齊師,師未出 日陽。 東 蓋 阿,亦 金 有 魯 齊 都

拘、《春秋》可以 會齊侯,無會汶之事。 在汶水切近之處。嚴《緝》以《春秋》姜 之水皆潀於汶,魯之大川也。」據 分或合,出 ·汶上有都」者,依《序》「大都」言之,不 春秋》之闕 凡東蒙徂徠之陰,岱岳之陽,諸 人 也 皆在 補《詩》之亡、《詩》亦可以 魯境。 諸氏 馬之貞《臨 錦 曰 此, 知 清 Ш 氏 必定 不 箋 溪 新 <u>Fi.</u> 必 補 澗 云 閘

萊蕪 列。 出 此 東至安邱人維。」《説文》:「汶水 於「琅邪朱虚」下注云:「東泰 云:「《禹貢》汶水出西南入泲,桑欽所言。」 水 泰 泰 然《水經》於二汶源流詳 Ш Ш 汶水有二。 人游之汶、《書》、《詩》、《春秋》所 東 東 萊 而 朱 蕪, 西南 入維。 虚之汶,其流 \Rightarrow 从水,文聲。 漢志》於「泰 入沸。」班許皆以二 短 促,非經 略迥異, 山 山萊蕪」下 一、汶水 桑 出 欽 琅 説 則 邪 傳 稱 所 皆 以 汶 所 汶 朱 出 注 即 出 並 水 虚 逕鉅 必其 鄙

謂泰山 《詩》所謂「魯道有蕩,齊子由歸」者也。 《漢書》。入沂之汶見《水經》。 汶,曰 北,出入二國之境。 惟出萊蕪原山至安民亭入泲之汶,在齊南 濟之汶見《禹貢》、《論語》謂之『汶上』,《書 『汶』,蓋指『大汶』言之。 而所叙牟汶、石汶、柴汶等皆不過汶水支流 傳》謂之『北汶』,即今大清河。 故 河爲大。」承珙案:酈注《水經》雖 「牟汶」易「浯汶」爲五。 上夾水有文姜臺。』案:成二年『齊侯伐 也。 平縣 在 龍 嬴汶,曰柴汶,曰浯汶,合經流 郡水皆名曰「汶」者也。《元 郭緣生《述征 魯 』,注:『龍在 故城 地 者也。王 東 而 此詩與「魯道」連言, 記 西 泰山 記》有「五 南 于欽《齊乘》曰: 氏 酈 流,城 博縣 蘭 氏云:『汶水 汶」之名, 泉曰:「詩 齊有三汶,清 人維之汶 四 東 不言五汶 南。」 有 和 爲 魯 志 五. 今汶 桓三 我北北 日 見 南 魯 則 以 北

于嬴」。 陽東平間,故襄公之來會由之。 爲大都通邑,惜正義之未能詳指其地 城 嬴縣。』哀十一 南 酈氏云:汶水屈從博縣西南 然則 益知齊魯往 齊侯 嬴博以 于 年『會吴子伐齊,克博,壬 嬴 來要道實在嬴博、當今甯 南屬魯界,龍以 注 嬴 齊 扼要之地,即 邑。 流 經龍 也。 北 今 屬 申 泰 鄉 故 齊 至 Ш

猗 嗟

胡氏 傷 能 聞》以爲:「莊公早年 母,失子之道,人以爲齊侯之子焉。」王氏《總 生於桓公六年,至即位之時纔十三歲耳,固 之尊,倚齊之强,安可防閑?」其後,郝氏敬 防 魯莊公有威儀技藝,然而不能以禮防閑 閑 ·允嘉、鄒氏忠胤、黄氏懋容皆於莊之不 序》云:「《猗 有 2恕詞 焉。 然則 嗟》,刺 而桓公已殁,文姜挾 曷爲刺莊 魯莊公也。 考莊公 齊人 13 其

> 作當 作於如齊納幣逆女之時乎? 其詳。 姜屢 好貌。」毛於《甫田》、《候人》之「婉孌」並訓 也。」蓋莊之忘親暱仇,於此爲甚,《猗嗟》之 曰:「娶仇人子弟以 梁》一則曰:「不正其親 齊,詩人無由 二十三年如齊觀社,二十四年如齊逆女、《穀 之美,非齊人熟觀而審悉之,不能言之如 固已無所逃罪。 難 「少好貌」,獨此言「壯好」者,豈亦以《猗嗟 責 在此 會齊襄,莊公身已弱冠,責以不能 以 而莊公二十二年以前,其身實未嘗至 防 時。 閑 其 「興刺。 觀 母 惟詩中歷言莊公容貌技 末 0 章「猗嗟孌兮」傳云: 其即 薦舍於前,其義不 惟二十二年如 位 迎於齊也。」 後二 年至 齊納幣 七 防閑, 年,文 ·可受 再 此 藝 則

案 : 揚。」「美 「抑,美色」者,毛蓋 抑若 目 揚兮」,傳:「抑,美 揚 兮」, 傳 : 以「抑」爲「懿」之假 好 目 揚 色。 眉 [。] 承 揚, 廣

借。 日 字。《説文》引無「之」字。 法一 者,「揚眉」猶言「盱衡」。 目之動,似不足以言美。惟嚴《緝》引錢氏 言》:「盱、揚,雙也。 言,與「廣揚」之「揚」不同。 長身之貌,「抑」爲 詩》曰『美目揚兮』是也。」毛云「好目揚 揚,起也,言目俊」,范氏《補傳》引《禮記 揚其目而視之」,謂其瞻視之明,是也。 抑若」也。「美目揚兮」,此「揚」專指 正 **衡厲色」,李善注《文選》引《漢** 例。 「眉上曰 或謂之揚。」郭注:「盱,舉眼 爾 揚 E 正義本作「頎若」,定本作 雅 眉 抑。」是 *****: 形目 衡。 」謂 懿, 美,謂 也。 廣額之美,故曰「頎若」、 早 燕、代、朝鮮、洌水之間 驢瞳子,今本「子」上衍「之」 美也。」韋 此 好目於揚眉見之,故 启 句 《漢書 揚 《集傳》以「揚」爲 與「頎若長兮」文 目」也。 「頎而」。 注 · 王莽 書音義 或 「頎」爲 也。 然則 語 目 [《]方 傳 眉 ¥ 毛 日 而

「眉毛揚起,故名眉爲揚。」非毛意也。者,渾言之,其實揚眉即揚目耳。正義云:者,好也,皆謂目之好。毛云「婉,好眉目」婉兮」乃總上二章「揚兮」、「清兮」而言。婉美目謂之揚。揚屬目,不屬眉。末章「清揚

仰視、俯視也。爲「名」爲「清」,即所 清明也。 珙案:《説文》:「顔,眉 又與『目』共文,名既 璞曰:『眉眼之間。』《爾雅》既釋 兮」,故先言目之「名兮」、「清兮」蓋形容 上於給」之「上」、「不下於帶」之「下」,謂目之 名兮,目上爲名。』孫炎云:『目上平博。』郭 名,目下爲清。」正義曰:「《釋訓》云:『猗嗟 目上爲顔。若目下爲 「清」。竊謂此「目上」、「目下」當讀爲「視 猗嗟名兮,美目清兮」,傳:「目 下文「儀既成兮,終日射侯,不 目上,則清爲目下。」承 顴 目之間也。」是眉 頰之際,不 如此,『清. 謂 得 上 出 其 視 下 容 不 謂 īF. 爲

州 夏喪其子而喪其明。」注云:「明,目睛。」《冀 時 超《晉書音義》云:「名,目也。」此固不誤。 從 審 事 固之狀。 郭 君 碑》:「卜商號咷,喪子失名。」何 名」與「明」通 檀弓》: 子 目

望羊」。

「羊」與「揚」通,此「美目揚兮」當爲

「舉目」之證

也

則青

也。」《廣

韻

瞷,

人目

多白

也。

戴 目

即

上視,諸

書謂

之

間 藐流盼,一 名,豈得謂失其眉目間乎?《西京賦》:「眳 又引《玉篇》云:「《詩》『猗嗟顯兮』,顯,眉目 也,本亦作名。」此則 顧傾城。」「眳」與「名」同。 非 是。 如云喪子失

釋,誤矣。至「目下爲清」,即「清揚」之「清」。 云:「眳,眉睫之間。 縣藐」者,縣藐猶眳 貌也。 藐,好視容也。」二字分 薛綜注《西京賦

彼「清」與「揚」對,「揚」爲「舉目」,則「清」爲 低目」。 「清」爲「下視」,其義一也。上視爲名,「名」即 此「清」與「名」對,「名」爲「上視」,

據

齊 或

爲

甥。」正

義

「明」。

人目上視則多白。

《説文》:「眅,多白眼也。」《春

秋

Ĭ

鄭游販,字子明。

此亦

證。

《説文》又云:「

瞷, 戴

藐」雙聲,即《方言》「驢瞳子謂之縣」郭注謂 略 言。 以言也。』謂不 既備,所以終日不出正也,不當泛作威儀釋之。 南 云:「傳言『外孫曰甥』者,王肅 教之以儀,則喜矣。」此言莊公善射,惟其射儀 也。 有規矩之數。」《泰族訓》:「射者數發不中,人 以爲威儀容貌既備。承珙案: 儀,即謂 眼當爲俯視。 晉書》: • 俶真訓》:「善射者有儀表 《周禮 外孫得稱『甥』者,按《左傳》云:『以肥 展我甥兮」,傳:「外孫 儀既成兮」,箋云:「成,猶備也。」正 「阮籍能爲青白眼。」白眼者,仰視不顧之狀。 「青」與「清」同,此亦足見 ・射人》:「以 指 襄公之身, 射法 總 「清」爲下視也 治 云:『據外祖 日 之度,如工

射

儀。」《

淮

匠

射

儀

義

⁰ 言」,阮校本《毛詩正義》作「信」。

傳》: 孫。 之得 出。」或者鄭所見本有之,與毛「外孫曰甥」義 也。 言,不應代詩人爲絕其相名之倫,孫毓之言 皆 正義以爲《釋親》文。今《爾雅》但云: 非 相 犯 亂於此哉? 者之所及,豈毛公之博物、王氏之通識 我舅者,吾謂之甥。 外 左傳》云「我之所自出」耳。 親 也。」承珙案:傳云「外孫曰甥」者,不過如 稱甥。』以上孫評,以下孔駁。 名之倫,更本 孫爲甥」,正 「接菑,晉出也。 亂 備 鄭箋「姊妹之子曰甥」,雖不見《爾雅》, 喪服》「緦麻三月」章有 爾 類,使時 彌甥。」孫毓 雅》:「女子子之子爲外孫。」《儀 抑者以襄公雖舅,而鳥獸其行, 於外祖 人皆以爲齊侯之子,故 義所謂 貜且 굸: 此《爾雅》之明義,末 齊 以言也。 出 『姊妹之子曰甥。 「總據齊國爲言」是 也。」何休注 然此是毛傳之 「男子謂姊妹之子爲 外 文十四年《公羊 凡異族之親 孫」。 以「出」爲外 ,而當 傳以 絶 其 學 謂

相成也。

《禮》所云「容體比於禮」、「節比於樂」者。 得義。 皆言射,此「舞」亦當謂 云:「巽」爲「齊」。 「舞則纂兮」,言其舞應雅樂也。 善舞,齊於樂節。」此用《薛君章句》釋《韓詩 謂雜出不齊也。又「選」從異聲,虞翻注《易》 字子選。』《史記・平準書》「吏道益雜不選」・ 「齊」。《史記 事齊力,田獵齊足。」擇者,選擇。 雅》:「既差我馬,差,擇也。 「『選』之爲『齊』,其訓 齊力」、「齊足」皆選擇之事,故 舞則 至「舞」曰「齊」者,正義 選兮」,傳: · 仲尼弟子列傳》:「任不齊, 是「選」之訓「齊」,蓋從 未聞。」承珙 「選,齊。」正 以 樂 宗廟齊豪,●戎 節 云:「當謂 但此詩三章 射 「選」可訓 之事 「齊毫」、 案 義 曰 : 即 爾 其

●「豪」,阮校本《爾雅注疏·釋畜》作「毫」

射,不 舞者,皆極一時之選。 射則貫兮」並言乎? 應雜 選 者 此一 於 語美其善舞。 倫 等最 此則何與於莊公而 上。 夫 或又謂 全 詩 供 美 事 其 與 于 善

秋豪 殺矢彀弩而射,雖冥而妄發,其端未嘗不 弦,視之若一焉。」《韓非子》曰:「夫新 矢相屬,前矢過 張湛注引郭象曰: 注:「箭適去,復歃沓也。」《列子》作「鏑矢復沓」, 之,適矢復沓。」《釋文》:「適,丁歷反。」郭 爲伯昏無人射,引之盈貫,措杯水其肘上,發 復。」承珙案:《莊子・田子方》篇:「列禦寇 三而止。 的 「善射者能令後鏃中前括,發發相及,矢 也,然而莫能復其處,不可謂善射 也。」此皆足爲箋説之證。 「四矢反兮」,箋云:「反,復也。 每射四矢,皆得其故處,此之謂 「箭鏑去,復往沓。」《列子•仲 準 而 無 絶落,後矢之括若 「得其故處」 禮 ?,無常 砥 尼》 一, 射 中 礪

> 乃爲更進一義耳。 之儀也。」此於《韓詩》「變,易」之義爲近。 此義,上章「不出正兮」已足該之,必如箋説 五射,「五日 詩》「反」作「變」,云:「變,易。」《周禮》保 當 即 射 井儀」,疏云:「四矢貫侯,如井 所 謂 參 連」 也。 釋 文》 引 氏 韓

毛詩後箋卷八終

毛詩後箋卷九

葛屢

魏

其 民 可刺 爲 詩 之之故者,而 之。」姜氏《廣義》曰 句 直 人之意 '儉而太 機巧趨利,其君 實也。」張氏 自 序》云:「《葛屨》,刺 標 題 ,正使後 目 過 此詩明言之,以儉本美德 ,至於褊急, 故 鳳 世驕 不 岡《詩貫》曰: 儉 「風 必 侈惰慢者不得 嗇 别 人從 福急, 褊 立 則不 也。 詩 無 柄。 説 而 「此詩 能無譏 魏 無德 出 地 『編』與 以 所 陿 是詩 末二 原 以 以 矣。 隘 無 將 刺

涇 胡承珙 《碩鼠》之所以

洳》之所以

作也。

蹙迫之至,則

貪殘

並

進

歌

也

瑣屑蹙也

,而徒爲容好

屑蹙迫之謂。

瑣屑之至

,則與民争利、《汾沮

『儉』異,儉本美德,儉之失乃爲

褊

褊

霜。」正: 案 : 既敝,而 並 説 走 毛以「繚繚」釋之。 云:「繚,纏也。」此可知「糾」爲纏繚之貌 糾 繚 憂 修 繚 道 繚 也 同 飾 稱 路,祁 此 威 也。 唐 也。」又云: 糾 説 儀 范 義 魏之風焉。」 然 以 糾葛屨,可 氏《補 非 比 以 ,則有名無實,此《園 夏葛屨,冬皮 寒 繩 是。 鄭 「繚 糾 木 衞之淫 休 傳》亦云: 纏之,糾 繚」爲「 糾, 也。 説文 嚴《緝》言「魏之男子葛 以 履 靡 繩三合也。」《糸 李《解》引王 而 屨,葛 霜 流 稀 4 「男子 復糾,謂其可 蕩, _, 傳: 疏之貌」。 部》云: 畢 有桃 屨 穿 竟差勝, 非 糾 糾 》之所 氏 所 糾 4 糾 承 以 程 以 繩 部 故故 屨 以 奔 相 珙 繚 氏 履 猶 故

所以言屨者也。」 耳。《集傳》因『繚』字通爲『繚戾寒凉』意,以 之葛屨。」此 合下『履霜』。然此四字乃霜空秋氣之云,非 曰:「今江東以絲合物 皆 善善 讀 毛 ,皆呼『繚繚』,即 傳 者。 姚 氏 《識 名 傳 解 説

不當爲興。 不當爲興。 不當爲興。 不當爲興。 不當爲興。 不言興,則謂以葛屨之履霜,喻女手之縫裳 不當爲興。

聲,七遥反,訓爲奉。是唐初《説文》確有《説文》『摻」參聲,此音反,訓爲斂,『操』與『摻」等也。』是『摻』字自有本義。孔正義引『摻、擥也。』是『摻』字自有本義。孔正義引『摻、擥也。』是『摻」字自有本義。孔正義引『摻、擊也。」是『摻」字傳:「摻摻,猶纖纖也。」

摻女手,紘績善織。」字亦作「摻」。 《魯詩》亦作「攕」矣。《文選・古詩十九首 篆。 或者假「摻」爲「攕」,亦未可定耳。《易林》:「摻 段氏謂俗改「攕」爲「摻」,但《毛詩》多假 乃以訓詁 摻摻,猶纖纖」者,皆以今語釋古語。 云:「讀若《詩》『攕攕女手』。」《玉篇》引《詩》 注引《韓詩》作「纖」。 非矣。」承珙案:《説文・戈部》「씣」下亦 曰:「《石經》作『攕』。」此指《漢石經 亦作「攕」,即本《説文》耳。《吕記》引董 攕」之俗字,由 繚」疊韻,「摻」「纖」雙聲。《韓詩》作「纖」, ·摻]字之證。 知「摻」之有本義,則知用「摻」爲「攕」之 字代經文耳。 淺 不知《説文》本有「摻」字也。 人『摻』『操』不 毛傳云 楊氏 「糾糾,猶 旭 分 前 以「摻」爲 学,則 奪『摻』 繚 糾 氏 是

襋,領也。好人,好女手之人。」箋云:「服,「要之襋之,好人服之」,傳:「要,褼也。

非 宜 則 衣 執 謂 整 記》衣服之制。」承珙案:箋云「楆也、領也在 統於衣,不得分楆屬裳、領屬衣。 云「襚者左執領,右執要」,皆指衣之要領,並 又分别裳要爲上者。 上」,自當專指 可使整治屬著之。』《校勘記》云:「案要領皆 「褑爲裳要。」此語 二者於衣於裳各在其上,且又功少,故 襋』爲衣 爲 從 左 如 屬 也。 領,右執要。]又曰: 一手執衣, 執 衣 初。」然則襚服有衣有裳,而左右執之, 著之。」正 説。 衣領,右執裳要。 被也、 領 ,故云『要, 楆也』。『要』是裳 領。 吕 《説文》亦云:『襋,衣領 衣言。 義 也 手執裳。 記 在 曰:「《士喪禮》:『襚者左 陋 上 嚴《緝》皆本之,以 甚,是未考《儀禮》、《禮 裳爲男子之下服,斷 《士喪禮》及《襍記》所 『襚者以 ,好人尚 此『要』謂裳要,字 孔 疏 誤 褶必有裳,執 可 讀《禮》文, 使 正義云: 整治 《要,則 (「要」 好人 也。」 之, 無

> 執 乃使之縫裳,失其宜矣。」 衣領也。』皆是衣之上也。 爲裳要。 領,右執要」,蓋衣之要 惟 李 氏《集 解 **>** 也。 日 有好人之所事, 《説文》: 士 喪禮 而

《説文》,然《玉篇》云: 疏》。 獨 要。古人傳注有 謂此『要』乃人衣帶下之要,非人身要領之 虚 已見本篇。 毛謂詩之「虚邪」即漢人之言「虚 曰:『衣帶下者,要也。』字不從『衣』。 衣》等篇言衣服皆作『要』,《禮 要也,淺人加『衣』耳。 虚徐也」,蓋「虚」「徐」疊韻,是當時有此語 毛傳此二條則 也。」亦此 承珙案: 段氏《詩經小學》曰:「傳『被也」當 此 例。」 古人訓詁固 傳 未 此説 此 「要,被也」,「被」字雖 必 義例。《北風》傳:『虚 焦里堂已 然。 如《禮記 被襻 有即 <u>~</u> 北風》傳仍當作 有 也。」「襻,帥 駮 用本字之例 正,見《毛詩 徐」也 玉 喪 藻 服》 傳 本作 不 見 注

系。 著」申釋之,益知此 或漢時通用有之,故毛公用以釋《詩》。 易事也。 楆襻,是用功少,猶今人縫衣者亦以領、紐爲 當云縫紩緶緝之,不得言「屬著」矣。且領與 於衣者,故箋云「屬著之」。若衣身之要,但 衣之所有,故箋云「在上」,又皆以他物聯合 系,猶今人言紐 系。又衣系曰襻。」《類篇》同。 普患切,衣襻。」《集韻》:「楆,衣襻也。 「被也、領也」,即承傳文而以「在上」及「屬 廣 韻 《説文》以小篆所無,故不收此字, 褸, ,非衣裳之要。 於 「褸」非指 霄 切,楆襻 衣之要矣。 據此, 被爲衣 蓋褑與 、。 又: 觀鄭 領 或从 皆

子始嫁,治其禮儀如此,而遽可使之縫裳要夫,不敢當尊也。象揥,婦人之盛飾。言女下章『左辟』『象揥』語方順。左辟,婦入門辟鄭,惟『好人』異耳。『好人』即縫裳之女,于鄭,任『好人』異耳。『好人』即縫裳之女,于

間,凡美色或謂之好。」是也。 於《詩》,一爲宣姜之飾,一爲「好女」之佩,以 經證經,知毛傳不可易也。 「美」與「佳」本有「大」訓。 亦有以「美人」、「佳人」 爲男子之稱者,然 『佩其象揥』如何作男子之服。」承珙案:古 子疑縫裳之女所作,而以『好人』爲大人,則 是以刺之。《序》刺其君意,只見之言外。 襋 「容好」解。《方言》云:「自關而 以 自 服 歟 魏 俗 如 此, 由 此「好人」只當 其 况「象揥」兩見 用 西,秦晉之 心 褊急

《説文》:「媞,諦也。」又用傳 雅 不得見兮。」王逸 嬰。」承珙案:《楚辭· 要爲嫢。」《方言》:「自關而西,秦晉之間,謂細 妻,媞也。 釋訓》:「媞媞,安也。」毛傳用《雅》義 「好人提提」,傳:「提提,安諦 从女,規聲,讀若癸。 注 七諫 云:「媞媞,好 **》**:「西 義。 施 秦晉謂細 媞 也 又 云: 而 貌 引。」《爾 《媞,而 有容 也。 日

《毛詩》作「提」者,「媞」之借字。 注云:「安舒貌。」引《詩》「好人 爲女子好貌矣。《檀弓》「吉事欲其折折爾」, 公主」,顏師古謂與《詩》「好人提提」音義同。 《詩》曰 説文》:「姼,美 折」者,又「提」之譌字也。 『好人媞媞。』』《漢書 女也。」是古人皆以「媞 敘傳》「姼姼 八提提」。 <u></u> 禮 記 》作 媞 蓋

汾 沮 洳

爲正 子, 異字 以 此 勤」,惟定本直 采菜,崔靈恩《集注序》亦 詩 能 矣。 ,然輒 並 勤,刺不得禮 序》云: 本無『子』字。」是陸氏 無 正義云:「王肅、 3 語及「君」。 乖 √ 汾 云『其君』。」承 謬 孔 也。」《釋 沮 洳 疏 》,刺 顔師古等定本 反據之以爲 孫 作『君子 文》云: 以 毓皆以 儉 珙案: 也。 有「子」字 『其 儉 毛 魏 其 爲 君 君 鄭 以 大 者 采 能 夫 君 儉 有 釋

於「其君」立説,豈竟未一檢傳箋乎。菜,而嚴《緝》從之。《虞東學詩》且謂康成泥

《魏風》非晉矣。《園有桃》、《十畝之間》皆言 《邶》、《鄘》皆爲《衞風》,而《魏》與《唐》異,知 鄭、宋、魯亦有大宰,鄭有少正,魯 正,晉有公行,齊 也,安得言汾者即 理志》: 汾水出 國之侵削,非 南 「公行」晉官爲説。 風》爲晉詩,范氏處義遂據 而 河之處即 詩,猶《邶》、《鄘》皆 族』皆晉官,汾水又出 河 魏必無之。」承珙案:《潁 曲 嚴《緝》云:「或以『公路』、『公行』、『公 故其詩曰『彼汾一曲』、『寘諸河之 魏 舊 普 國,所 事 太 亦 原 也。」姜氏《廣義 爲晉地哉。 然班《志》云:「魏 衞 有 謂 ,西南入河。 詩,非也。 於晉,疑《魏風》皆 公行,安見 南 枕 此 濱詩 詩「汾 河 吴有太 曲 季札 北 傳》 ₩ El 王氏 晉 水」晉 亦有 (宰,陳、 有 在晉之 涉 以 觀 是官 汾 謂 《魏 少 晉 水 地

趙岐注:「齊大夫也。」子之、蓋其先也。 篇》,有「公行子之之燕」,楊倞注、《孟子》「公行子」 世之明驗。 側」。」《魏譜 者斷此詩爲作於晉既并魏之後也 正 齊之公行亦 義 引此 「側」作 于。 見 於《荀子 此爲詩 自 不 · 得 因 作 大略 於 此 魏

里。 禮 Ш Ш 相 海 謁 亦『管涔』之異名。 今太原府嵐縣西南三十里。 漸 詩》「彼汾沮洳」。 「經》以 洳 戾之山 ,或説出汾陽北 同,『京』『涔』相 晉水 職方》亦云: 淮南子》作『燕京』。 者。」錢氏獻之曰:「《地理志》: 彼汾沮 所 爲 東三百 管 出 洳」,傳"「汾, 涔 無 Ш 里有沮 「汾出汾陽。」《 汾 山。』案:後説是 轉。 也。 王氏《稗疏》據之,謂「沮 《説文》: 『汾水出 水。」承 北 《水經注》曰「『燕京』 在 山,汾水所出。』《 洳之山 今忻州 古『燕』『管』字聲 珙案: 水也。 静樂縣 山 也。 郭璞注引 鄭 海 沮 『汾陽在 北 四,其 經 注 晉陽 百 晉陽 四 周 Ш +

> 《山海經》以詩之『沮洳』爲 之「沮 曰:「汾沮洳,即《左傳》所謂『汾隰』也,郭 沮洳」以水與山連言之,不成 「如」,山 洳 Ш 海 Ш 洳」與下「一方」、「一 經》云: 名,非漸洳之謂」。 在今河南 其 水 輝縣 出 沮 與汾 今 案: 如 山名,謬矣。」 曲」同義 ் 文理。 殊 《水 不 則「洳」當 相 經 劉帝 涉。 若「汾 注 **>** 注 臣 引

可食, 案 : 味酢 志》引《切 謂之乾絳。 之莫。』《埤雅》云: 通謂之酸迷,冀州 柳葉,厚而長,有毛刺,今人繅以 璣《疏》云:「莫莖大如 陸佃 「言采其莫」,傳:「莫,菜 而滑,始生可以爲羹,又可生食。 與毛傳言「菜」者不合。 韻》 所 苺」音「茂」。 云,似指 今吴越之 人謂之乾絳,河 「子如楮 爲《爾 然薦 俗 箸,赤節,節 苺 呼 雅》之「藨苺 實 爲 藤生,惟子 也。」正義 陸《疏》亦衹言 而 茂子。」 取 紅,故 汾之間 繭緒。 承 甘 冀 引 五. 謂 其 酸 珙 方 似 陸

也。 《潛揅堂答問》曰:「《爾雅》無莫草。 **藾蕪」,亦即《詩》之「莫」、陸璣所云「酸迷」** 似而味酸,呼爲酸摸。」酸摸即《爾雅》之「須, 曰:『彼汾沮洳,言采其莫。』」此所引《義疏》 狹,長二尺,食之微苦,即今莫菜也。《詩》 校《本草》,據陶隱居説:『「羊蹄有 未知何家,以「莫」爲「藄」亦無他證 葉可爲羹,未及其實,不 橅」。」孫説得之。」 綦,月爾」, 苺。 古人訓「莫」爲「無」、「規模」字亦作 《齊民要術》則以「莫」爲《爾雅》之 引《詩 義 疏》云:「綦,菜也。 得因「乾絳」之名附 孫淵如 惟錢氏 種 極 葉 相

寸則 德,美無 案、地官 度教節,則民知足」。 寸,得尺則 彼其之子,美無 有度,言不 大司徒》施十 尺,不 可尺寸。」韓氏怡 可限 度」,箋云:「是子之 無 量 度,則不知足,得 有二教,『九曰 皆由 其君 日 儉 :

> **藚起興**。 也。」何刺之有。 驟用之於上位。 爲指賢人,刺晉君疏公室而信任卿族,故因 詩學》曰:「《春秋》世 汾水之間有隱居不得位者,以采莫、采桑、采 民願戴之」語。何氏《古義》遂以「彼其之子」 外傳》引此詩,極言君子之美,有「雖在下位 是,信無限度」,殊失箋意。 窮賤之役,殊不似貴族,訝之之辭也。」《韓詩 如玉」,猶言虚有其表也。 孔疏以爲「其美如 寸」,似非盡美之詞。下二章「美如英」、「美 無有度,即是儉不中禮之意。 美,而詩人美之,正所以刺之。」承珙案:美 「采莫、采桑,窮賤之事也。 不中禮,是以居官者亦不知足。 然《外傳》斷 其信任 卿 章,似非本旨。 雖 卿族不 有賢者在 賦丰美之容而躬 王氏《總聞》 箋言「不可尺 世 獨晉爲然 俗 下,豈 常田 且 日 以 能 間 爲

「殊異乎公路」,傳:「路,車也。」「殊異

陶定 疑公行、公路爲一官。 杜 族,又宦其餘子亦爲餘子,其庶子爲公行』。 僕掌戎車之倅。 謂之公路。明公路即公行,變文以韻句耳」。 車之族」,案: 軞車是兵車,非路車。 兵車主 也。」晉有餘子、公族、公行,而無公路,故疏 車,主從行。《左傳》: 宦卿之適子 『以爲公 乎公行」, 餘子者,餘子自掌餘子之政,不掌公車,不得 公行之官,因謂傳有「公族、餘子、公行」, 列。」正義引《左傳》宣二年。 車之族,是也。從公之行者,主君兵 詩》有「公路」、「公行」、「公族」,「知公路 公路,主君之軞車,庶子爲之。 注:『餘子,適子之母弟也。 Щ 曰:「《周官》: 巾車掌王之五路,車 傳 : 。公路掌路車,主居守。公行掌戎 公行,從公之行 據此,諸侯亦疑分公路、公 公路,箋引『趙盾 杜注 也。」 晉趙盾 庶子,妾子 一,以 (車之行 軞 箋 爲 車 爲軞 云: 爲 非

謂公族屬也。《將仲子》「畏我諸兄」傳云: 之政,據《左傳》注,衹主教卿大夫適妻之次 車,不得謂之公路。]説固詳矣。然餘子所掌 夫之子爲之。末章傳云:「公族,公屬。」亦 與餘子守宫制合。 出疆之政,庶子以公族之無事者守于公宫。」 即位,始立此三官。疑魏之公路、公行、公族 之亂,詛無畜群公子,自是晉無公族」。 路,箋説似未可據。又《左傳》先言晉「麗 之倅。路爲車之大名,主軞車者不當名爲公 曰:「正義云:"餘子自掌餘子之政,不掌公 亦皆以同姓爲之。《文王世子》云:「公若有 「諸兄,公族。」明非公族大夫矣。 公路、公行,當是兩官。 夫之子,當守於王宫者也1可見。」承珙案: 官・小司徒》『大故致餘子』鄭注『餘子,卿大 行 ,路車主守。 或 即 既云同姓,不得不以 以 軞車,服虔以 餘 子爲公路, 黄 氏 爲 觀 成公 卿大 元吉 戎 姬 車 周

云: 《稽古編》曰: 草大,其 復。』陸璣《疏》云:『今澤蕮也。 其葉如車前 傳曰:『水蕮也。 曰 : 兼存郭陸之言、《吕記》、朱《傳》亦因之。 陸璣『澤蕮』之説。 「《釋草》云:『蕢,牛脣。』郭璞引《毛詩》 『今澤蕮。』蓋明以 言采其藚」,傳:「藚,水舄也。」正 味亦相 「《爾雅》『蕢,牛脣』,郭注不用 似。 如續斷,寸寸有節,拔之可 《爾雅》别有『渝蕮』,郭注 徐州、廣陵 陸《疏》爲非 人食之。こ 也。 孔 疏 義 惟

> 《爾雅》一物數名者甚多,不得因 舌。」此《爾雅》「牛脣」之名,以其 亦 者,不知當今何草。 遂疑蕢非澤瀉。 瀉,一名水舄」,與毛傳釋藚者同。 「藚,水舄也。」正用傳文。陸《疏》自爲有據。 注《本草》,謂 其説當矣。」承珙案:李氏《集解》亦 嚴《緝》引曹氏 蘇頌云:「澤瀉 未見的據。不如陸説爲長 蕢非澤瀉。 語 春生苗,多在淺 郭注云「如續斷 辨之甚 王氏《稗疏 悉,以 然《神農 水 爲 蕢非 以 既 中 寸 本 《説文》: 形 爲 有 寸 ,葉似牛 -經》「澤 引陳 牛膝 有 似 澤 渝 節 耳。 翥

園 有 桃

其君 無 或 德教,日 小而迫」,以下於經無當,然《序》不過 國 《序》云: 一小而 以 侵削,故作 迫 《園 而 有 儉 桃》,刺時也。 以 是詩 嗇,不能 也。」正 用 其 義 大夫憂 民, 雖 推 云 而

非 盡 必 鼠》刺 省 原 斂之事矣,何反不能用其民乎。 民 魏 屬一 無 也 貪,其勢然 或 作 風 用 詩 以 重斂 戰,其 之由 ,不取於民 葛 跡 然箋語實多室礙,正義曲爲 屨 耳 似 也 侵削之由 刺 相 編。 鄭 食園 若果薄 反 箋 而 乃 實 汾 桃而 由 云: 相 沮 税 是 因。 洳 省 己。 也 「 魏 **>** 用, 」。」承 諸詩 刺 蓋 君 不施 儉 則 褊 薄 , 珙案: 一番者性 雖 必 與《碩 解説 德教 公 未必 無 税 重

本作 舉經文。 굸: 桃 案,『食』字是也。 承珙案: ,其實之殽 肴。」《初學記 「傳『殽』字、小字本、 「殽,豆實 袁 有桃,其實之殽」,傳:「興 經文「殽」當本作「肴」。 正義説箋云 》二十四 也。」以 或 此傳以『食』解『殺』,非複 有民,得 引作 明 與「核」 食桃爲殽,正用 「肴」。 相 其力。」《校 對文。 臺本 賓 《釋文》: 也。 之初 作『食』。 此 勘記 但 傳。」 遠 筵 和 以 有

「不知我者」、《校勘

記》云:

《唐石經

也。 桃,其實之食」。 云:「肴,食也。」《吕記》引傳 食 解 《説文》: 殺 ۰, 即 「肴, 啖 彼箋 云「非 也。」 穀 蔡 而 文亦作 邕注《 食 之日『 典引 園 殺 有

道 説 用 此詩爲無 經文未嘗有兩「有」字也。 有 意,故以上二句興,下二句改「心之憂」爲「心 憂,則我歌且謡 傳》云:「言園 是託興,無他意義 用民力之言,而 一,何以 憂」。 ,取義深隱,故毛以 以 秦留仙《毛詩日箋》曰:「詩 傳文爲 爲經。 黄氏佐遂謂兩「有」字相 義之興,是《三百篇》不過 比,又與比 有桃,則其實之殽矣。 其 不知詩 矣。」此蓋疑篇 意 ,亦未必然。」承珙案: 固在言外。 爲 以 顯 興。 亰 興 許氏《名物鈔》 桃 隱之旨戾 《吕記》引朱 可 中不見用 或謂 食興民 應爲興。 中 雖 信 無 二句 心 民 力 口 不 氏 亂 以 11 有 集 口 止 能

毛詩後箋卷九

爲正 我者』,正義 作「不我知者」,惟蘇氏《詩傳》、王氏《總聞 氏讀詩記》、戴氏《續詩記》、許氏《名物鈔》皆 作『不我知者』,小字本 朱《傳》、嚴《緝》與相 同。」承珙案:李黄《集解》、范氏《補傳》、《吕 依之耳,不可 相臺本 非 臺本同,當從《唐 也。 同。 據 箋倒 相 以 臺 改經。 經作 本 作『不 石經》 下 章 知 知

卿」。 我所 不當自 君。」注云:「士,卿士也。」是「公士」猶言「公 箋釋爲「事」者,蓋 也。」此不言者,當即以「士」爲人臣之通 承珙案:《鄭風》「豈無他士」,傳云:「士,事 儀 禮 爲歌謡之意者,反謂我於君事驕逸故。」 謂我士也驕」,箋云:「士,事也。 尚 稱爲「士」。 喪服》:「公士、大夫之衆臣 ·秦誓》疏云:「士者,男子之大 以《序》言「大夫憂其君」, 然古者卿大夫皆可稱士。 爲 不 稱。 其 知

爲未仕之稱,亦可不必。對,此自不當訓「士」爲「事」。季氏本以「士」同,傳皆訓「極」爲「中」。彼以「士」與「女」既,臣通稱之。」下章「士也罔極」與《氓》詩語號,臣通稱之。」下章「士也罔極」與《氓》詩語

間語 《史記集解》引鄭注《尚 也。 弓》「何居」注云「居,讀 其、《釋文》音「基」。 當斥「彼人」。「謂我」之「謂」,釋經「曰」字。 珙案: 毛以「彼人」指「不我知者」,則「子」亦 言彼不知我者之人,謂我歌謡無所爲也。」承 而 欲何爲乎。」正義曰:「夫人,即經之『彼人』 何爲,即經之『何其』也。 其,語 子乃謂我欲何爲乎。 今定本云『彼人』,不云『夫人』,義亦通 助也」正同。 彼人是哉,子曰何其」,傳:「夫人謂我 助也。 齊魯之間聲如『姬』。」與《檀 毛意 「何其」與「何居」同 `書》「若之何其」云: 蓋 如姬姓之姬,齊魯之 正 彼人謂 云彼 義述毛,以爲「彼 人豈果是哉 我何爲者

哉,子於此憂之何乎。」此解迂曲,不如 憂者,既非責我,又曰君儉而嗇,所行是其 既於經文「是哉」上增「君之行」三字,又代 云:「彼人,謂君也。曰,於也。 彼人」目憂者爲「子」,皆失毛旨。 又言 君之行是哉,子之歌 謡 欲 不知 何 其 鄭箋 我 爲 傳 所 乎。 義 道 爲 乃

雅 年「盍亦求之」,盍求之也。 者,猶盍亦也。 傳》索隱引文穎云:「蓋,合也。」《孟子》「蓋 似以「宜」釋「蓋」。「蓋」與「盍」古字通、《爾 亦反其本矣」,趙注:「蓋當反王道之本。」蓋 憂所爲者,則宜無復思念之以自止也。] 鄭 ,猶合當也,與此訓「蓋」爲「宜」同。 亦」者 釋詁》:「盍,合也。」《史記 其誰知之,蓋亦勿思」,箋云:「無 ,以「亦」爲語 王氏《經傳釋詞》曰: 助。 《左傳》僖二十四 昭元年「子盍亦 • 司 馬 凡言 蓋亦 相 知 意 如 我

> 義亦可 耳。 《孟子》「盍亦反其本矣」,盍反其 《吴語》 遠績 此,「蓋亦勿思」爲作詩者自言其 後儒 禹 通。 功 「王其盍 則皆以「勿思」指「不我知者」言之, 而 大 庇 民 亦鑑於人」,盍鑑 乎」, 盍遠 績 而 大 、本也。 止 於人也。 庇 而 民 勿思 也 據

陟岵

《导》云:「《陟岵》,孝子行役,思念父母也。」許氏《詩深》曰:「詩稱『猶來無止』。」 矣。然作詩之意,主於思親,非若《揚水》、 矣。然作詩之意,主於思親,非若《揚水》、 、場羽》爲刺其上而作,故以『孝子』書之。」鄒 、場羽》爲刺其上而作,故以『孝子』書之。」鄒 來無棄』,則其遠行從役必有不得已於此者 來」。《陟岵》以私情言,故曰『猶來無止』、『猶 來無棄』,則其遠行從役必有不得已於此者

木曰岵。」「有草木曰屺」。

《爾雅》:

「多草木

兮」,無可 説》云:「山無草木曰岵。此所以言『陟彼 案:段説是也。 怙也。屺有陰道,故以言母。 無母,何恃也。 言荄滋也。 基者,根 説申毛亦善。 也,疑『有』『無』字本同毛,後人易之。」承珙 母尚恩。』則屬辭之意可見矣。許,宗毛者 毛公所據 段氏《詩經 傳異、詩正 「屺」字。 **岵,無草木峐。」《三蒼》、《字林》、《聲類》並云「峐** 王肅 》本作「屺」。 依《爾雅》」。 《説文》、《釋名》皆與《爾 基 《史記 站也。 也。 爾雅》似勝。 小學》云:「岵之言瓠落 岵有陽道,故以言父。 義》以爲傳寫之誤。 《終南》「有紀有堂」,紀,崔《集 見正義。 《易》「箕子」釋文引劉向 《韓昌黎集注》引施士丐《詩 律書》云:「箕者、萬物 以其無草木,故以譬之。」此 後儒亦多以《爾雅》爲是。 毛傳訓「紀」爲「基」, 毛又曰: 『父尚義, 雅 《釋文》云 一 無父,何 也, 妃之 與與 根 作 岵 即

棋。」此亦可爲有草木名「屺」之證。

「父曰嗟予子」,顧氏《詩本音》引李因篤曰:「『父曰』、『母曰』、『兄曰』皆至『行役夙夜無百,而『子』、『季』、『弟』、於句半爲韻,各協下行,而『子』、「季」、「佛」、「死」韻,而仍以「父曰」至「行役」爲句,所云「句半爲韻,而仍以「父曰」至「行役」爲句,所云「句半爲韻」,詩中似無此「行役」爲句,所云「句半爲韻」,詩中似無此「行役」爲句,所云「句半爲韻」,詩中似無此「公曰嗟予子」,顧氏《詩本音》引李因篤已」六字句,此説直截。

倦也。 父、母、兄思念之詞。夫「無已」、「無寐」尚 思其父、母、兄戒己之言。 倦。」承珙案:鄭 戒詞尤明。 「行役夙夜無已」,箋云:「無 觀次章傳 箋意實本於傳。《集傳》以 以 云「無寐 此詩三「曰」字爲 **無** 無解倦者,戒 耆寐 也」, 己, 行 其爲 爲 其 無 役 其 解 者 口 解

之詞、《毛詩》假「無」爲之耳。
一之詞、《毛詩》假「無」爲之耳。
《隸釋》,而與「閔勞」語意不合。此自是以失伍爲戒,而與「閔勞」語意不合。此自是以失伍爲戒,而與「閔勞」語意不合。此自是以失伍爲戒,而爲閔其勤勞,不得止息,至三章云「必偕」,殊

「尚」、《吕記》、朱《傳》從之,是也。《毛詩》多古文之證。蘇氏《詩傳》訓「上」爲

「猶來無止」、「猶來無棄」,毛鄭於「止」原「棄」皆無訓。《集傳》以「止」爲「死則止而棄」一意,然不如李《解》引《左傳》「見獲於敵死」一意,然不如李《解》引《左傳》「見獲於敵系、一意,然不如李《解》引《左傳》「見獲於敵為止」及《吕記》云「母尚恩,故曰無棄,言無真一」及《吕記》云「母尚恩,故曰無棄,言無與「棄」,皆無訓。《集傳》以「止」爲「死則止而與「棄」,於兄始正言之。」

十畝之間

民,得其力」,語正相應。此篇序但云「其國篇,《園有桃》序云「不能用其民」,傳云「國有國削小,民無所居焉。」《魏風》言「刺時」者二《序》云:「《十畝之間》,刺時也。言其

意蓋以 别一 興,苟且成俗,乃至男女無别 미 削 削 刺 小 小」解經耳 可 民 見 經中所言不僅刺其削小,鄭箋乃專以 承 無 魏 珙案:首章傳以「閑閑」 所居」,後儒 以 削 小之故, 或 疑 自安僻 或 ,所以一 小 爲 陋 民 口 一男 多一未 禮 刺 女 教 無 傳 不 見

爲 甫 甫 閉然,削小之甚。J蘇《傳》疑一夫十畝,無 田 本此爲説。 云"、「古者一夫百畝,今十畝之間,往來 畝》之詩。」此不過以見其國之小耳。 山 城 生。 徒 ,合於古 之地者,疑家授十畝以 南 餘里,處河山之間,土地迫隘,故著《十 西二面,並 有 横渠張氏謂 近 畝之間 郭園 制 《吕記》則云:「横渠指桑地爲 去大河 廛 兮」、《水經注》云:「故魏 但 而 又 周 已 謂 制 則 魏 可二十餘 國郛 · 毓草 地侵 似 不然。 木。 之外有 削, 里,北 朱《傳 無井授之 果如 聽 鄭 爲 者 去 是 影即 場 以 閑 箋 首 場 或

> 曰 : 也。 窄則曰『一葦杭之』,『十畝』亦 情性之言,亦不必 各二畝半,合爲五畝之宅。 以爲定數也。」 畝 民 曰『靡有孑遺』,言廣則曰『日 畝之桑,今止有十畝,是削其半。 二十畝,在邑者亦二十畝。 將 「《詩》中言多則曰『則 况詩 何 既削 所 所謂『十畝』者,特甚言之耳, 食 小,豈容尚守古法,容或數家 乎? 嚴《緝》又云:「或謂井廬 7屑屑: 政 使 求 周 制 合。」李氏《集 百斯男」,言少則 八家,則在 一處本共有二 闢 果 此 國百里」,言 家 類 要之,詩 賦 也 袁 井者 共之 未可 邑 廛 解 +

閑 閑閑然男女無别。 廣 貌,此「閑閑」義當略 往來之貌。」承 開 博之貌。 ,小知間間 桑者閑閑兮」,傳:「閑 間 間, 珙案:下章「泄 。」《釋文》引 《莊子 有 同。 所 間 • 惟 别 齊物論》: 簡文云: 其 閑 也。」然 泄 地 然男女 隘 爲 人多,故 開 則 多人之 「大知 無 廣 閑 博 别

故《廣 動摇 者,無 有合。《皇矣》「臨 也。」此閑閑往來者,亦群動紛紜之意 雅》云: 所 間 别 「開開 與 此 衝 傳 ·盛也。」 閑 閑 閑 閑 傳 爲「 云: 無 閑 别 閑者 義 亦

傳亦互相足也。正義又云:「言『之間」,則 兮」、「逝兮」而總解之。 家,故『泄泄』爲多人貌。] 此則未必 見其多人。「泄泄,多人」又可見其無别,二 前以「閑閑」爲 解之。」承珙案:此 者。」正義曰:「云『還兮』,相呼 云『或行來者,或來還者』,見往來相須,故總 云『逝兮』,相呼而共往。 傳探下章之意,故 家之人。下章『之外』,地旁徑路 行與子還兮」,傳:「或行來者,或來還 往來貌、「往來」即合下「還 疏極是。毛傳每 且「男女無别」,即 而 2然耳 共 有 行 歸 此 非 法 口 下

〈説文》:「呭,多言也。从口,世聲。《詩》「桑者泄泄兮」,傳:「泄泄,多人之貌。」

多人,故此傳又以「泄泄」爲多人也。 《説文•曰部》「沓」下云:「語多沓沓也 則「泄泄」、「沓沓」皆爲多言之貌。 泄」,傳云:「泄泄,猶沓沓也。」與《孟子》同 引《詩》「無然詍 曰 : 無 然 呭 呭 詍。 言 **^** 毛 部 詩 詍 大 雅》作「泄 多言由 多 言 也。」 於

伐檀

材,名曰素餐。』又司馬相如《上林賦》。 詩。 選》曹植《求自試 餐」,素者,質 素食兮,先其 檀》見賢者之先事後食也。』董仲舒 詩拾遺》曰:「《孔叢子》引 無功而受禄,君子不得進仕爾。」范氏《三家 注引《韓詩薛 《序》云:「《伐檀》,刺貪 表》、潘 事 也。 而 君 後 岳 章句》曰:『何 但 其 《關 食,謂 有 中 -詩》、傅 質 孔子 也。 樸 治 而 i E 咸贈 身 在位 無 注引張揖 以 也。」《文 百:『不 何 『於《伐 治 爲「素 劭、 民之 Ŧ

獨張揖 以《伐檀》爲刺不用賢,正與《毛詩》義同,不 子之令。」王吉,學《韓詩》者,見《儒林傳》。 民,此《伐檀》所爲作也。 率多驕驁,不通古今,至於積 句 珙案: 范説 進,張揖謂『賢者不遇明王』,俱 \mathbb{H} 王吉傳》: 吉上疏曰:「今使俗吏得任子弟 叢子》、董仲舒及薛漢之説皆與 曰:『《伐檀》刺賢 意同 `耳,全詩之旨自以《序》傳爲正。 也 《毛詩序》謂 非是。 者不遇 董薛諸義皆止説章末二 在 位 宜明選求賢,除任 明 貪鄙 的治 王 也。」案: ,賢者不 非詩意。」承 孟子答公孫 人, 亡益於 《漢書 · 得 其 孔 仕

以俟世 仕,中四句爲 君子」斥「伐檀之人,仕有功,乃肯受禄」,詞 箋本《序》文,以首三句爲君子不得 毛於章首 用,若俟河水清且漣」,則其爲興體 在 三句雖 位 貪鄙,無功受禄,末二句 不 言 」興,然 云《伐 檀 進 明

> 甚隘 旨明· 清 之言悖矣。 考義玩辭,故知傳箋不可易也 乎。末二句又以伐檀食力爲不素餐,則於義 子弟從之則孝弟忠信,不素餐兮,孰大於是」 氣不合。 厲志之詞,則於曰「胡」、曰「爾」 詰問 干,遇清 三句爲賦,意味索然矣。 漣 以 白, ,與孟子所謂 自 漣 無 且既爲自耕而食,安得有三百之多 樂、《吕記》、嚴《緝 耐 可 '易者。 無 用 「其君用之則安富尊榮,其 ,范《傳》、 後 儒 又謂 》皆 、朱《傳 或 同。 謂 中四 》略 伐檀 或謂 同。 [句爲 河 指 伐 直 干,玩 斥語 君子 檀 以 首 河

八十 之卿 也。 萬五千石。」許氏《詩深》曰:「三百廛,大國 以《漢志》準之,畝 廛。」《放齋詩説》曰:「三百廛,爲田三萬畝 畝 田 大國 胡取禾三百廛兮」,傳:「一夫之居曰 而 也 卿田三千二百畝,共三百二十廛 制 每井八夫,每夫一廛,助 禄 出 焉。 收 一石有半,三百 故以廛計之,重民力 耕 廛 公田 當 兀

其所食有三百夫之入約略言之。若如《放 大國之卿,而 齋》云三萬畝 以食邑所入言耳。」承珙案:三百廛,自 邑三百』,蓋下大夫食邑制也。此云『取 言『三百 《易》云『其邑人三百户』、《論語》稱『伯 舉 魏在當時又不得爲大國也 ,固非人臣之制,即如許氏準 成 數 也。」 何 氏 ^ 古 義》 |只舉 禾』, 氏 日 以 駢

然則當云『貆 類。」 『貉,豸種也。』並非 也 日 假『貉』爲『貈』,造『貃』爲『貉』。 箋云:「貉子曰 (説文》:「貈似 狐狢」連文者,皆當作 l。』彼見《埤雅》言『貛貉同穴』**,**而《説文》以 則 李 胡瞻 由 時 「轉寫 珍 爾 庭有縣貆兮」,傳:「貆,獸 ,貈之類』矣。」陳氏《稽古編 譌 本 貆。」貉,當依《爾雅 狐、善睡獸 舛。 · 草 》云『貆 獸名。又云:『貆,貉之 《釋獸》曰:『貈子貆。』 此『貈』字。 也。」段注云:「凡 與 貛 同,今狗 《説文》: 今字乃皆 》作「貈」。 名。」 貛

> 加。 則李氏以 也。」賈疏引《爾雅》:「貈子貒, 貒,貈醜」,「貒」作「貛」,知「貒」「貛」一字, 野豕也。」段注據《瓜部》引《爾 也。」承珙案:今《説文》:「貒,獸 亦見《説文》。 鑵」乃「貒」之或體 貆』爲貉 今考鄭注《地官 貆 類, 爲 故 貛 貛 爲 一、似非 即《 此 。「野豕 説耳。 爾雅》之『貒』耳 • 草 無 據 也」三字,後人所 人》云:「貆,貒 不 知 雅 或曰貆。」然 貛 》、狐、 也。」「貛 乃 野 貍 貊

等。 漢徐 《楚茨》傳箋與此同。 故爲禾秉之數。 『三百囷』相類,若爲釜斛之數,則太多不類 義云:「詩内言『億』者,毛鄭 箋云:「十萬 及其用: 岳《數 胡取禾三百億兮」,傳"「萬 術 也 記 日 億。 乃有三焉。 遺》曰:「黄帝 秉,把 『三百億』與『三百廛』、 三百億,禾秉之數。」正 也,謂刈 十等者,億、兆 各從其家,故 爲 禾之把數。」 法,數 萬 日 億

禾三百億兮』,毛用中數,鄭用下數。鄭注以兆,兆兆曰京也。」甄鸞注云:「《詩》云 『胡取

爲億,古數也。」《詩正義》因謂:「傳以時事「賈唐説皆以萬萬爲億,今數也。後鄭十萬數爲多,故合而言之。」韋昭注《國語》曰:

制》正義云:「《尹文子》百姓、千品、萬官、億《詩》、《書》古人之言,故合古數言之。」《王

言之,今《九章算術》皆以萬萬爲億

箋

以

詩》傳『數萬至萬爲億』,此《周頌》傳文。是大億醜,皆以數相十,此謂小億也。鄭氏所用《毛

積者而言。《楚茨》「我庾維億」,傳云:「露也。」承珙案:三百億爲禾秉之數,蓋指其露

上「廛」下「囷」之數 比出於田 積之多。 「萬萬」、「十萬」皆屬約略 容,故爲露積。 積 七萬尺,立方開之,幾六十五尺」,非 日庾。」疏 而貯於倉者數有定限, 以「一庾之積,方一尺 然則三百億者,亦極 相遼絕也 無庸疑其 而 其辭,不 言其 倉 長 所 三十

也。 此 『四』、《廣雅》之所本也。」承珙案: 盧説 司農注《周禮》云:「三歲爲特,四歲爲 特。」盧氏召弓曰:「《齊》傳曰『三歲 豳》傳曰『三歲曰 或别有師承,與毛互異耳。 古字「三」「三」皆積畫,故傳寫多誤。 胡瞻爾庭 有縣特兮」,傳:「獸 豜』矣。 則此『三』當 肩。」 肩 歲 是 作 鄭

文》云:『飧,水澆飯也。从夕食。』言人旦則『魚飧』之『飧』,則非傳所云『熟食』也。《説「飧,讀如『魚飧』之『飧』。」正義曰:「鄭以爲「不素飧兮」,傳:「熟食曰飧。」箋云:「不素飧兮」,傳:「熟食曰飧。」

熟食 熟物 贵 義以 若掌客之飧饔,與常食不同,且多生腥,不盡 之饔乎。 母之尸饔」傳云:「熟食曰 配」,故易之也。」承珙案:《小雅 禮,飧饔大多 飯」之別 得 言 口 熟 謂非 見此但言 也。 此爲《説文》,今《説文》:「飧,餔也。 ,謂黍稷也。」此「飧」自指客禮。 食專屬黍稷,正 「飧」爲 釋文》引《字林》: 飯 熟食乎? 故《大東》「有饛簋 蓋毛於「饔」「飧」皆謂熟而 名。 可 飯 停 非 易傳 「熟食」者,必 」之别名。 可素,不 故 傳 者,《 由牲 夕 義 則 「飧,水 本通 牢不皆熟物故耳。 試 鄭 得與「不素飧」相 食 饔。」又豈謂禮 飧」傳云:「飧 即 志》 飧 非指禮 **無** 以 澆 ·祈父》「有 答張 庸 飯言之,又 是『 飯 可食者 食之飧 然毛必 从夕食。」 也。」正 '飧' 爲 逸 食

碩 鼠

《序》云:「《碩鼠》,刺重斂也。國人刺

相傳以 上 者,以爲 論 楚、伊 至《史記 甘心流亡。 詩作。』《潛夫論・班禄》篇亦云: 春秋 其 大 **云:**『歌《碩鼠》也。』《馬融傳》注引《説 歌顧見」,以上下文義求之,「顧見」自是「碩 藝文類聚》別 適彼樂土」云云耳,未必 甯戚擊車 碩鼠》作。」此詩 鼠 君 坂且休息, • 取 也。」威瓦 重 尹 舉難 此爲賢人去國之詩。」承珙 斂 下》篇: 甯 集解》引應 去殷、田 蠶 輻 戚之歌,其 其引以證賢 氏 》篇『甯 食於民,不 而 吾將捨汝 載 學標日: 歌《 周 令 甯 正意自因 饒 末有履 劭 碩 戚擊 去魯,並 戚 所 鼠 詞 脩 歌》 相 「《韓外 稱 人去國者 》。』今《説苑 牛 氣 爲此 其政 畝 齊 重 角 南 似 之税 引此 或 首,末云 斂, 疾 是後 山 詩所 傳》於接 貪 歌 矸, 履 《碩 1,緣詩. 詩。 民不堪 鼠」之譌 案 亦僞 而 由 白 善説 畏人,若 畝 高 合吕 擬 「黄犢 作 鼠 石爛 託 鹽 誘 税 輿 》篇 也 类 之 鐵 去 蓋 氏 而 作

《碩鼠》在齊桓時已有,亦可證魏詩之不作於詞。劉向、高誘以所歌爲《碩鼠》,必有所據。

雅》所 雖 鼠 同引此詩, 序》之證。 曰 : 鼠 又《九家易》曰:「鼫 我黍。」是以「碩」「鼫」爲一也。 玉篇》:「鼢, 鼫鼠 鼫、《子夏傳》作碩。」古字本只作「碩」可 鼠」即《爾雅》之「鼫鼠」,亦即《易》之「鼫 Ŧi. 列十三鼠 晉》九四即引此詩:「碩 碩鼠 鄭氏箋《詩》,但以「大鼠」釋之。 技之鼠 鼠 亦即 《詩正義》云,舍人、樊光注《爾 畫伏夜行,貪猥無已。」皆足爲《詩 鼦 碩 鼠」之名,然荀許皆未 鼠」,箋云:「碩,大也。」案: 也。」「酸」亦「大」義。 此 惟此鼠最大,故謂之「碩 以 則《荀子》之所謂 鼦 鼠喻貪,謂四也。」翟元 鼠」爲「 「碩 鼠 《説文》以 《易釋文》: 鼠 碩鼠,無 _ 唇梧 嘗 蓋《爾 其 以 鼠 鼠 雅 知。 爲 鼦 注 食

> 無論 陸說。 雀鼠。 説也。 者。 鼦 河北縣是也。 不從其説。 鼠」即云「關西呼『鼩』音『雀鼠』」,是郭氏 也。」此又於「鼫鼠」之外,别有 苗,人逐則走入樹空中。 人立,交前兩脚於頸上跳舞,善鳴。 五技鼠、《詩正義》遂云舍人、樊光亦 詩》之「碩 鼠,「有五能 螻蛄不得有五技,亦豈能食禾黍者乎。 而所云「或謂之雀鼠」,郭注《爾雅 其形大,故《序》云大鼠 陸氏《詩疏》云:「今河東有大鼠 誤矣。至崔豹《古今注》云,螻蛄 鼠。 孔疏 言其方物,宜謂 而 猶泥於「碩」「鼫」字殊,當從 自孫 不成技」,此 炎注《 亦有五技,或謂 爾 更與詩 雅 也 所 此 炭以 鼠 謂「大鼠 魏國 同,此 食人 非 無 亦名 影鮖 鼦 鼠 能 之 禾 已 鼠 今

宦于吴』。韋昭曰,宦爲臣隸也。貫當讀爲義》曰:「貫,《魯詩》作『宦』。《外傳》云『人「三歲貫女」,傳:「貫,事也。」惠氏《古

碑》謂「宦」即「貫」字。
「事」。《釋文》『徐音官』。此『宦』字之誤。傳書》作「宦」,仍當同毛義爲「事」耳。《專壽文王有聲》云「武王豈不仕」,傳訓「仕」爲近、」承珙案:《説文》:「宦,仕也。」《大雅・云『貫,事也』,蓋本《爾雅》,而與『宦』義亦云『貫,事也』,蓋本《爾雅》,而與『宦』義亦言。《釋文》『徐音官』。此『宦』字之誤。傳

「爰得我直」,傳:「直,得其直道。」箋

斂也。 知所本。 或謂什而 相足,其説是也。 云: 「得我直」,謂得遂其性,不違生人之正道 直 説 猶 亦可 取 正 一,取民正道,「得我 通。 也。 《論語》:「人之生也直。」 《集傳》訓「直」爲「宜」,未 戴 氏《 詩 考正 直」謂不重 ***** 曰 箋 與 傳

我爲勤勞」,則於「肯」字不可通矣。同。」是當讀爲「勞還帥」之「勞」。若謂「不以也。」案:《釋文》:「勞,如字,又力報反。注也。」案:《釋文》:「勞,如字,又力報反。注「莫我肯勞」,箋云:「不肯勞來我。」《集

毛詩後箋卷九終

❶ 「勞苦」,文淵閣《四庫全書》本《詩集傳》作「勤苦」。

毛詩後箋卷十

涇 胡承珙

蟋蟀

唐

中禮 以 帝時人。 哀之、傷之,即《序》所謂『閔之』也。 促」,『局促』之義正與《序》『儉不中禮』 『哀《蟋蟀》之局促』,《古詩》云『《蟋蟀》傷 樂也。」陳氏《稽古編》曰:「漢傅毅《舞賦 爲 枚 ,故作是詩以閔之,欲其 《序》云:「《蟋蟀》,刺晉僖 乘作。 《古詩》,亦名《雜詩》,《玉臺 乘,景帝時人。《文選》十九 及 時 公也。 以禮 傅毅,明 一新詠 儉不 自 同。 $\frac{\times}{\Delta}$ 局 虞

聞孔子曰: 星。 公以大康貽戒,昭公以 君,諷以 以禮爲界。 爲刺儉。 儉爲 傳》: 襄二十七年。 曰 : 也。 生之慮。」可見諸詩皆欲其奢儉得中,原非 『百歲之後,歸于其居。』皆思奢儉之中,念死 我不樂,日月其邁。』『宛其死矣,他人是媮。』 故唐詩《蟋蟀》、《山 蟀》,趙孟 義有本可知矣。」承珙案:《孔叢子》引孔子 首 一、昭明 「於《 美德。 此 其民有先王遺教,君子深思,小人儉陋 時毛學未行,而《詩》説已如 刻 大康馳 《後漢書》馬融上《廣成頌》云:「臣 蟋 曰:『善哉、保家之主也。』」此皆以 於蘇 奢則 是以《蟋蟀》、《山 《漢書・ 蟀》見陶 李前 驅之節。」 不孫 鄭 樞》、《葛生》之篇曰:『今 伯享趙孟 地理志》曰:「參爲 **儉則** 唐 則 不 儉 亦 顔 能 以 德之大也。」《左 固 師古注"「言僖 樞》之人並 馳 爲 驅 ,印段賦《 西 奢儉之中 被 京 此、《序》 幾。」 時 並刺國 馬 晉 蟋 專

儉極 是奢 句又 則不 此。 中 言也 之古,不 此 亦 大 融 禮 姑 刺 傳《 下,此《蟋蟀》所爲作。」此尤足見《序》説 儉 似 每章 行 可 僖 , 則 鹽 樂 謂 得 戒 公儉 毛 鐵論 樂而 其耽 前 ,毋一於儉; 儉,衹見其不樂而已。 中耳。 詩 如 不中 四 者 無 《稽古編》所 句似爲荒樂者代述其言,後四 於逸樂,其實不然。 通有》篇引孔子曰: 荒 禮 其 所云憂深思遠者,正 ,仍不害其爲 故 言 與 後則謂樂自 全篇皆言中 班 ^ 引 志 枚 儉; 經之大旨如 À。 乘、傅毅之 前謂 不可 有 禮之 不中 蓋 節 在 吾 此 禮 事 大 於 乃 君 詩

蟋蟀 此 室户之外,與户相近,是九月可 月後 ,則歲未爲莫,而 之事、『九月在户』。 歲 則 聿 歲遂將莫耳 其莫」,正 云 義 『歲聿 謂 云:「《七月》之 此 十月以後爲 其莫』者,言其 言『在堂』, 知。 時 篇 歲莫 當 謂 在 调 九 説

來告。」 [《]竹 以 《邠風》,則自 春,傳自注云:「晉侯使以 也。」」何氏《義門讀 『莊伯之十一年十一月,魯隱公之元 獻公滅虢之月,平公時絳縣老人甲子,其文 之除。』《日 莫」,其意與此同也。」《陸堂詩學》曰:「 可以互證。 證晉用夏正。 莫,采蕭穫菽。』采穫是九月之事,云『歲聿云 明『莫止』亦十月 下 也 左傳》稱申 後傳載於前 書》:『 采 蓋 薇 三日 經 曲 知 \Rightarrow 生縊 余謂 必 云 沃 歸 九月 録》云,據《左傳 《夢溪筆談》云: 來告 ,經書於後,皆準諸 莊 日 於新 平王 歸 也。 \exists 伯改 前 書記 乃 + 歸 城 歲 書 以前,晉國 月矣,『歲聿其莫』 日 》則 用 亦 左 而 歸, 陽止。』十月爲陽 夏 殺太子申 經書 明》云:『歲聿 據 氏 正。 僖 歲 以 特 》,晉用 其 亦 四 仍用 發 此 本 年 事 莫 新易舊 此 年 生之故 注 於 ÷ 止 夏正 周正 庄 可云 Ŧi. 云 年 月 口 据 云 其

之異。 伯改 謂秋冬爲昏姻正 天」,毛以「三星」爲參,「在天」爲始見東方, 已晚,不必定謂歲 案:莫者,晚也。 泌所云「傳據晉史, 秋之末,皆用 巳」,傳年月日 午,晉侯入曹」。 是年「冬十二月」也。二十八年經書「三月丙 「三正」通於民俗,十五國風皆然,非必由莊 用 用夏正之故 僖五年經書「冬,晉人執虞公」,傳 夏 即以 Œ, 晉詩 且告有遲 周 無不同。 正 也。 城 九月以後,自秋徂冬,歲事 時,此 耐 終,似可無泥 經據 因 濮之戰,經云「四 論、《綢繆》之「三星 速, 以闢《竹書》之説 亦據夏正言之。 知晉自叔虞以 周歷」之誤。 亦 有 於周正、夏 即告 於 承珙 當 月 亦言 及 至 蓋 在 羅 春 己 正 時 辭

鄭子駟引逸《詩》云『職競作羅』,晉范宣子責曰:「《十月之交》篇云『職競由人』,《左傳》「職思其居」,傳:「職,主也。」《稽古編》

主。 其職,又思其職之外。」蓋皆以「職」爲 職事,而更思其外。」蘇 思其職外,若以「職」爲 爲《集傳》之所本。 相戾矣。」承珙案: 『顧念其職之所居』,則又以爲職任之義, 居」,謂主思其所居之事,義在居不在 語本渾成。 戎云『言語 矣。 言主當 漏 集傳》既訓 洩, 如 此, 則 然經言 歐陽《本義》云:「不廢 職 非 汝 氏《詩傳》云:「既 實字 職 『職』爲『主』,復云 之由」,『 事 「職思其外」,不言 也。 則經文爲不 職 職 職也 思 皆 其 思 其 訓 自

山有樞

曰 : 記》曰:「詩人豈真欲昭公馳 爲樂之爲愈。 是物也,行且 《序》云: \sim 所以激發之,非 Ш 爲 有 他 樞 人 所 刺 有 驅 晉 勸 飲 昭 曾不 其 樂哉? 公也。」《吕 爲樂也 若及今

直斥 制 之乎?」承珙案:《蟋蟀》本非行樂之詩,若 忽作曠達語。 矣。」朱氏《通 之痛,而 以待亡,何 也長,而 舉之時,而欲告之以保身甯家之道, 者傷之,以甚愚之主,至急之勢,百務穨廢 桓 可見 曰 : 來日大難》之類,此何關 迫 ,日就危亡,故詩 叔 禄 。 毋 一。」胡 若然,不過如 切。 昭公,託爲同儕 强 棄軍 且 爲 振其欲死之氣。 其人也 朱子乃以 氏 漸 他 如 其 允嘉曰:「是時昭公弱 逼,若朝生之菌,夕而即落 人守也。』乃此詩之意。 快 姑 義》曰:「唐俗 是時曲沃成師勢盛,昭公不 樂以 吕 無緒,故喟然曰:與其 後 嬃 爲答《蟋蟀》之詩,相 人作此以諷之。 世《將進 永日? 悉出 相告語者,憂危之 詩人語苦而 於理亂者而夫子 珠 儉嗇,不 玉 酒》、《箜篌引 所以 寶 器 發 不自豎, 散 其詞 應 則其 末章尤 意 其 堂 勸 情 促 此 龌 傷 下 録 不 能 詩 齪 説 識 最 行 不 迫 心

> 陶 爲戒 來,是欲相 又 以 唐之遺風 ,而勸之者乃遽怵 此爲答前 率而 哉 篇之意 、于流 則 以 蕩 前 放 死 篇 曠 期 將 尚 之域,尚得 以 至、他 好 樂 人且 無 爲 荒

也。 虚」。 釋》載《魯詩》作「蓲」者,亦字之借。 蓲 其 字。是毛氏詩作『樞』也,《爾雅 無『藲』字。」承珙案:《校勘》説是 首,所以别户樞字耳。 云: 經》譌爲『户樞』字,而俗本因之。」《校勘記 『蓲』,《毛詩》當作『藲』,亦作『蓲』。 音甌。]段氏《詩小學》曰:「《石經 侯反。』《爾雅》「藲,荎」,郭氏引《詩 〈實《毛詩》不作『蓲』,《釋文》『或作』本 「《説文》『蓲」下云草也,不以爲『樞 亦不作『藲』,故《説文・ 《漢書·地理志》「山藲」,師古曰:「藲 Ш 有樞」、《釋文》:「樞,本 《漢 志
『山 艸部※木部》皆 ***** 或 魯詩》作 藲 加『艸』於 》作「山 也。 作 《唐石 亦然。 蓝, 本草 有 烏

與「藴」與「鬱」聲義皆通。「宛」有藴結之意,「宛其死矣」,傳:「宛,死貌。」案:「宛」

釋此篇之「宛」,於義疏矣。 之證。《秦風》「宛在水中央」箋云:「宛,坐 也。 苑」注云:「苑、病也。 見貌。」此爲思見其人而言之,《集傳》乃用 又《俶真訓》「形苑而神壯」注 又近鬱幽之稱,故 云:「本亦作苑。」《淮 苑讀『南陽宛』。」此尤足爲毛傳「死貌 傳 南 以爲「死貌」。 苑讀南陽之『宛』也。」 本經訓》「百節若 云:「苑、枯病 《釋文》 以

生」,賈山《至言》『媮合取容』,及《漢志》、張「偷,讀曰偷,偷取也。」臧氏《經義雜記》曰:「偷,讀曰偷,偷取也。」臧氏《經義雜記》曰:「偷,讀曰偷,偷取也。」臧氏《經義雜記》曰:「偷,讀曰偷,偷取也。」臧氏《經義雜記》曰:「倘,讀曰偷,偷取也。」臧氏《經義雜記》曰:「倘,讀曰偷,偷取也。」臧氏《經義雜記》曰:「他人是愉」,傳:「愉,樂也。」箋云:「他人是愉」,傳:「愉,樂也。」箋云:

之訓 部》「媮」,爲「巧黠」,故 稱,故「佻」又訓 《人部》:「佻,愉也。」 和氣之薄發於色也。 之意,則「愉,薄也」當如段注作「薄樂也」,故 也。」承珙案:《説文• 自 之本字,臧以「愉」爲「偷」之本字,亦誤 俗改『愉』爲『偷』,使人易曉,猶《召閔》『不云 偷樂字,恌薄字則作『偷』,或作『媮』,故 偷 「愉」下引《論語》「私覿愉 〈説文》「憪,愉也」,「愉,薄也」,「憪」本閒 樂」,是用其本義。 恍,愉也」,誤。又「媮」訓 賦 「頻」即 字,當即 「愉」、《周禮》「則 水頻字之省,而 「媮」 作 一爲『偷 「偷」, 媮 鄭自以三家詩有作「媮」 _ 民 如《鹿 引 心 無「恌」字。 毛於 引 不 蓋 申之,爲凡淺薄之 偷如也」。 鄭 部》:「愉,薄 愉 「巧黠」,當爲 申 康 鳴》「示民 依 此 爲 成 」皆是。 詩 俗改爲『濱』 偷 時 訓「愉」爲 盗 以 愉愉者, 臧 「愉 若《女 不恌 古無 引作 也。」 「偷」 鄭 静 考 隨 爲

義無別,故應從毛爲正。取」,「是保」爲「居」,則次章與末章「入室」意次章言「安」,語有次第。鄭以「是愉」爲「偷者,遂讀「愉」爲「偷」。然毛於首章言「樂」,

茹。 閏切。 『栲』字叶『杻』,陸語應不謬。」承 皆同,不誤也」。 栲」,『然栲之爲 中,亦虚大,『爪之如腐朽』。陸『謂 目》云:椿,『皮細 曰 : 云『从木尻聲』。 『橁』,俗書爲『椿』。 『杶』之或體。《書・禹貢》作『杶』,《左傳》作 榜」讀爲『糗』,則 「案:栲,山樗也。 山 樗、『皮粗肌虚 椿、樗、栲三木同 有栲」,傳:「栲, Ш 又案:《説文》『栲』作『柷』, 苦浩 徐鉉 樗,《 肌 見《莊子》。 而白,其葉臭」。 實 此 類 爾雅》、《説文》、 切。 樗,臭櫄也。 切 而 而微分。 山樗。」《稽 非 赤, 陸《 别一木又名「橓」,式 許 媆 意矣。 珙案: 疏 葉 Щ * Z 栲生 香 本 『櫄』乃 樗 古編 一許慎 毛傳 不名 甘 · 草 山 口 緇

皆以「栲」「杻」並舉,杻既彊韌,中爲車輞 隰之木可爲材用,不應及樗。 且此及《小雅 陸《疏》以「栲」爲栲櫟,「皮厚數寸,可爲 雅》毛傳皆云:「樗,惡木也。」此詩取興於山 Ш 尻苦刀切。聲,未嘗不可讀「栲」,亦未嘗不與 輻」者,近之。 妞」叶也。 「糗」,今人言『栲』者,失其聲。」不知「概」从 謂 而 其 實 葉及皮色之似耳。 非 樗 陸氏又言:「許慎『栲』讀 類。 郭注《 爾 雅 **爾** 》云「似 風》、《小 "; 則 樗 爲 車

自有 者可爲棺槨,小者可爲弓材。」與《考工記》: 「官園 周禮》「檍」讀爲「億萬」之「億」,與陸《疏》 取幹之道七,柘爲上,檍次之」合。 先鄭注 杻 |字。檍,《説文》作「樈」,云:「梓屬。 「檍」字,云「杶 隰有杻」,傳: 種之,正名曰 也。 萬歲」者合。 「杻,檍也。」《説文》無 从木,意聲」,「杶」下 或謂《説文》 大 經

體。 棣,細葉,材中車 詩人所詠,至晉尚有其名。 下多杻橿 妞。 蓋即借「手械」之「杽」字爲之,後人始寫作 與?」承珙案:《爾雅》、《毛詩》之「杻」,古人 許無『杻』字,豈其字正作『紐』,俗作『杻 『丑』。《韻會》云《説文》作『膪』,今文作 傳皆云「杻,檍」。段懋堂曰:「《玉篇》『杶』 柏。 『檍』,可知『檍』『檍』爲一,不必别有『檍』字。 下無『杻』字,依《汗簡》所載,當即『杶』之變 橿 「檍」既爲「杶」、「杶」又作「杻」、故《爾雅》、毛 云「木也。 · 西山 , 枋 『屯」旁側書作『母』,非从『子丑』之 或从 然郭注《爾雅》云,關西呼「杻子」。是 也。 經》「英山 」,每以「杻」與 从木,屯聲。 熏作 枋木可作車」。 - 輞。 櫄」,又云「杻,古 其上多杻橿」,「大時之山 一名土橿。」考《 橿 夏書》曰『杶 然則「杻 郭又云:「杻 」連言。《説文》 文杶 Ш 幹 海 似

亦同,爲彊韌有用之木可知。

然也 有樞 擊弗考』。」承珙案:《御覽》五百八十二。引《山 亦曳也」同例。 召弓曰:「《文選》二十六。 ·今定本云『弗鼓弗考』,注云『考,擊也』,無 或作」本。 或作」本,今《注疏》本乃以陸改孔耳。 ·亦』字,義並通。」據此,是陸據定本,孔據 「鼓,如字。 》曰:「子有鐘鼓,不擊不考。」此皆同 弗 鼓 弗考」,傳:「考,擊也。」《釋文》 毛傳「考,亦擊也」,與上文「婁, 陸必以「或作」本爲非,恐未 本或作擊,非。」正義 李善注引《詩》『弗 盧氏 曰 :

揚之水

而歸沃焉。」承珙案:《詩》所謂刺其君者,非公分國以封沃,沃盛彊,昭公微弱,國人將叛《序》云:「《揚之水》,刺晉昭公也。昭

《大叔于田》皆刺鄭莊,而詩詞反似言叔 尚未涣散,其樂從沃者,沃之黨耳。 有 鄭箋泥於此文,遂有「桓叔除民所惡 言聞命而不敢告,乃正所以告之。 公微弱,國人將叛而歸之」,乃是據事直 是國史推見至隱之語。 所,其可刺孰甚焉。 如此,爲之上者,任其包藏禍 也。彼以大都耦國、孽子傾宗而爲人所歸 似言桓叔之美者同意。 美,與此《揚之水》、《椒聊》皆刺晉昭,而 文譎諫,風人之旨也。 此詩託爲叛者之辭,云既見桓叔 隱,或且有詭詞以託意,反言以著事者。 不容顯言者。 徒刺之已也, 禮義」之説。 必 故其慮深,其情 嚴《緝 實 有 故此《序》云「刺昭公」, 愛君 》云,昭公時,晉人之心 《鄭風》之《叔 其下云「沃盛彊 蓋其美者,非真 憂國 心而 切,而 之心 而樂,又反 此所謂 不早爲之 、民得以 作詩者 于 其 而 段之 詩 田 事 美 附 反 如 轉 有

於末 作也。 彊盛而已。鄭箋以「揚水」喻桓叔,「白石」喻 云 《王風》皆 設爲 人。」所謂「善 之本詩,亦多不合,固未必得毛旨也。 激揚之水微弱,無轉石之力,徒使之鮮 類,潛通逆黨 毛於國風三《揚之水》,惟《鄭風》有傳,此及 聞之而不以告人者,正 ,既與《王風》所云激揚之水喻平王政 也。」三章云:「粼粼,清澈也。」皆不過 ,以興昭公微弱,無制桓叔之權,徒坐視其 「鑿鑿 章云: 鄭風》喻忽政教亂促者自相 或 其説最爲當理,後儒多從之者。 所以 人 相 然 不 泄 語 明興意。 鮮 收收 聞 政命」者,當如 之詞 沃黨之謀,而非 曲 拾人心。 明貌。」次章 沃有善 日 我 然其於「白石鑿 所以 詩 聞 政 齊陳氏 有 人見微知著 云: 告之也。 命, 叛晉者之所自 命,不 乖異,即 不敢 一時 厚 敢 皓 今考 施 至傳 明 以 教 以 潔 鑿 「, 故 之 潔 告 案 煩 謂 告 乎。 頗 雖

民

者也。 作,天下有欲叛之人而乃爲 王,實欲燕殺之也」。」承珙案: 語,直同兒戲,不虞敗乃公事邪。 密謀,而明明見之篇什。 憂」,則如徐 沃』,褚炤所云『不知汝家司空以一家物 不特末二語 朝元老,悲歡故是不同』。 云:「素衣朱襮,何等服物;我聞 一家,亦復何謂也」。『云何不樂』、『云何 得詩人微婉之旨。《集傳》以 爲沃,陰實聳晉,猶厮養卒所云『名爲求 且叛人之詩,又何録焉。 秦氏 詩 爲發潘 廣所云『君爲宋朝佐 測 **>** 曰 : 父之邪謀 「『素 前二章已有微詞 且『不敢告人』一 衣 此以 此不 也。」凌氏濛 朱 以 爲叛者所 襮 上數説 有命,何 命,身爲晉 自 ·煩言 謬意此陽 彰 從 其 而 子 趙 其 干 破 事 自 似 初 龃

丹朱中衣。]案: 素衣朱襮 (), 傳: 傳似當作 襮,領 襮 也。 黼 諸 領 也 侯 繡 黼

乃成爲 黑共 爲黼 刺名。 得 處 謂之黼,五采備 此 義,其意不與箋同,不破『繡』字,義亦通 云 毛既訓「襮」爲「黼領」,故下即引《郊特牲 秀,衆家申毛,並 云 編, 繡」爲 繡 爾 爲 疏申 黼 雅 爲 (黼者,繪是畫,繡是刺之。 ,非訓『繡』爲『黼』也。 繡刺 文 知非『繡』字也,故 丹朱中衣」,而於次章之「素衣朱 詩》曰: 繡, 「綃」,正義云: 傳甚諦。 傳言『繡 黼也」,其義已明。 繡文,不 黼 初刺 説 文 『素衣朱襮。』即 以 文》: 得 謂 ,黼』者,謂於繒之上 一色即是作繡之法,故繡 鄭據《魯詩》「素衣朱綃 依字。」正義云:「傳意 褗 之繡。」若五色聚居,則白 别 領。』是取毛『繡 爲 「《考工記》:『白 襮 黼 破『繡』爲『綃』。」承 稱。 《釋文》云:「繡音 黼 孫炎注《爾 領 繡、 也 雖五色備具 全用毛 黼不 从 一繡刺 黼 繡 衣 與 得 也。 「繡」 」,破 雅 」爲 義。 类 暴 但 爲 黑 以 口

> 《漢書 者黼繡」,皆以二字連稱,故不必破「繡」爲 珙 綃」也。 案 繡 郊祀歌》「黼 既 爲 刺 繡 繡 周 自 張」,《賈 不 妨 與 誼 黼 傳》「美 連

繡黼 純。 領。 絜白。 疏: 領爲襮,亦自有表暴之義。 首章之「襮」,次章之「繡」,其義 據《吕覽》高誘注訓「襮」爲「表」,遂謂朱襮非 「朱襮」 卿 大夫之妻刺 未詳 爲黼 不知《郊特牲》「繡黼」、「丹朱」是二事 《易林•否之師》曰:「揚水潛鑿,使石 經傳未有言中衣以朱爲 一亦衹 衣素表朱,游戲皋沃。」黄氏生《義 其 領之襮,丹朱當 制 謂中衣以朱 孫 黼 炎 以 作 爲 領, 爲 褗 從鄭注爲 鄭注《 緣, 領 如 表者、《詩》之 今偃 以 士昏禮 也。 《方言》: 黼 領。」賈 中衣之 刺 至黼 領。 府

❶ 「緣」,原誤作「緑」,今據文意改。

同字。 榮愛爲 嫁 纙 義 之,加於領上 知 口 今小兒却襲衣 小兒次衣 衣。」《方言》:「緊袼謂之樞。」彼注云:「 文》:「褗,樞領也。」「樞」下云:「一 説文· 玉 衱 深衣」云:「古者方領,如今小兒衣領。」《 笄,被 於 見 被禪 黼領之制 謂 藻》「深衣」之「袷」。 婦 表暴也。 糸部 領連」者,聯領於衣,即偃領之義 廣川王 人黼 之褗。」 黼 顈 也。」《漢 於領上。 黼。]注云: 「暴,頸 領 如 如 ,故謂之褗 **企**士 也 去「刺方領繡」。 亦 郭 小 ,頸下施衿,領 别 連 注: 兒 昏禮》:「女從者畢袗玄, 書 也。」《玉篇 施 言『被』,明非常服。」此 次 • 於衣上,與 「顏,禪 廣 即 領。 袷者,交領也。 衣。 川惠 衣 》作 蓋别 領 又謂之襮,亦取 也 領 王 也。」「」 正方。」據 服虔曰: 也。 (男子 連 一傳》曰 以 一,謂 日 士 綺 同 衱 與「襮」 妻 次 繒 鄭 : 也。 此, 如 始 爲 姬 即 裹 説 注 即

從子于鵠」,傳:「鵠,曲沃邑也。」《水

《詩》之「鵠」,則是以 謂 微誤。 經注》: 二地相去不遠,故傳 平陽府曲 《詩》所謂『從子于鵠 沃也。 縣』。」今左邑在聞喜縣 氏,行至左邑桐 年行過更名。」考《武帝本 公「武公」當作「成侯」。 曰 兆「兆」當作「洮」。 都在曲沃,旁更有邑者 《漢書· 晉武公自晉陽 「涑水又西 沃 縣 西 地 鄉 南 亭。 南 理 自晉陽徙此,武 四 衹 爲 聞 志》:□ 一者也 逕左邑縣 十里。 徙此,秦改 以 即 東三十里,桐 聞喜,故曲 南 1,得之。 鵠 故 粤 紀》云:「將 」。」承 爲曲 曲 河東 破 酈注 沃。 以以 故 沃 珙 郡 爲 城 以 邑。 帝元 沃。 非 爲 案 左 左 南 左 鄉 也 邑, 一邑縣 故 聞 幸 晉武 邑 此 正 鼎 在 爲 緱 曲 説 但

學 善 窮居於暴國, 》云:「《荀子 ,違其惡,隱其敗,言其所長,不 我聞有 命,不敢以告人。」段氏《詩 而 臣道 無 所 避之,則崇 篇》:『迫 其 脅 稱 美, 揚其 於 其 亂 所

注異。 《傳》言『臣之業在《揚水》卒章之四言』者,恐 有此本歟 言,似較杜注爲合。 以 傳》云:「卒章四言曰:『我聞 以 四言』,謂第四句『不敢告人』也。」此又與 漢初相傳有脱誤。」臧氏在東曰:杜注《左 人」,此所引無「以」字,不知傳寫脱誤,抑別 云,「《左氏》曰『臣之業在《揚之水》卒章之 章皆六句,此章四句,殊太短。左氏定十年 人,妨其躬身。」]按,所引即 爲 一字爲一言也。 成俗。 且以「四言」爲「第四句」,非謂 (詩))日 : 然傳箋皆云「不敢 承 或 珙案: 有 此詩異文。 大命, 有命。」是杜 \sim 關 不可 雎 ***** 前二 以告 字 正 以 人杜 義 告

椒聊

見沃之盛彊,能脩其政,知其蕃衍盛大,子孫《序》云:「《椒聊》,刺晉昭公也。君子

《序》,則以此詩爲美桓叔可矣。」 强,而不及昭公,其意則憂昭公之弱,而 將 桓叔。言在此,而意在 有晉國焉。」 嚴《 緝》云: 彼 也。 山此 説詩 詩言 不 桓 用 非 叔 首 主 之

《詩經小學》曰:「傳不以 《揅經室集》曰:「椒聊,『聊」字舊訓爲 説。 也。 『求』通也。是《爾雅》此句專爲《唐風》而 謬矣。毛傳云:『椒聊,椒也。』『也』字上 毛鄭皆知,而郭璞 『梂』也。又云:『朻者聊。』『朻』亦即『梂 訓矣。《爾雅》云:『椒、榝醜茦。』『茦』即 脱『梂』字。鄭箋云『一梂之實』,意實承傳 述言之,緣傳已專訓,不必再爲『聊,梂也』之 ·聊』疊韻,單呼曰『椒』,絫呼曰『椒聊』。」《毛 《詩》『兕觥其斛」,『斛』每作『觩』,『丩』 然則斯義自魏晉以後,皆昧之矣。」段氏 椒聊之實」,傳:「椒聊,椒 未詳 ", 陸 「聊」爲 璣妄爲『語 語 也。」阮 助」之 語 助 必 而 氏

《詩》曰:『叔聊且。』蔎蔎,香貌。」據此,益 釋 爲 椒 文》以「茶」人《艸 見「聊」非 聊之蔎蔎兮」,王逸注 云「今一梂之實」耳。《楚辭・ 作「朻」。 椒 承 聊 菉。**』**合觀之,大椒名檓,小椒 詩 『未詳。』又曰:『檓,大椒。』又曰:『椒、榝 經之「聊」,亦 珙案:此 樱。」「樛」即「村」字、《毛詩・南有樛木》、《韓 聊之即「朻者聊」矣。 , 料與萊同, 可以 明 辨 名家椒。」《名醫别録》陶注云:「俗呼 「朻」亦即「梂」字。 録》云: 語 以 助。 小 必毛傳已作「椒椒」也,故 《爾雅 部》、蓋草 至王 椒 名朻, 爲『聊』字非語 逸以 云"「椒聊,香草也。 今考《本草經》:「蔓 **>** 雖未有 『朻者聊』, 木散文得通耳。 鄭箋之「梂」自是 爲香草者,猶《説 名 九歎》云「懷椒 朻 據 助之證 · 村 然 郭 古 注 詩 名 可 但 知 醜

不一、秦椒色黄黑、似蜀椒而大、即《爾雅》《虞東學詩》云:「馮復京曰:『椒樹種

經》以 出景 景山 爲語 朹 似可 庸泥於高木之説。 高木,以此椒爲檓 南 草也。」考《水經注》:「涑水 大者。」承珙案: 者聊。』《説文》:『朻,高 『且』又語助 者,皮紫赤色。 檓 物。 十 ,其朻者名聊」,「聊 八里。 也 通 山。」《太平寰宇記》云,景山 助、《集傳》本陸 爲草,亦散文 其草多秦椒。」郭注:「子似椒 此説尤爲肊撰。 蜀椒 秦椒、《 據 恐 此 則陸《疏》所謂 晉 難 , 則 **◎**山 本經》列 則 地 成 至何氏《古義》云「檕梅 則 馮 近秦,當指 不知 海 句。 (疏》。 即 通 疏 木也。」 經 朹 耳。 木中 以 按:《 「朻」即「梂」字,無 之高者」,與椒 又與 然 此 《虞東》引朻 北 「似 椒 『聊』既 品 疑即 爾 秦 在聞喜縣 山 景 茱 爲 雅 椒。」「聊 經 而《 秦 萸 水 椒 而 **>** 椒 語 有 Ш 之高 云 細 叫朻 助 刺 爲 爲 説 水 海 東 葉

「蕃衍盈升」、《文選・景福殿賦》、曹子

建《求 椒 多子。」皆是。鄭箋欲合沃盛反常之喻 儀》云:「皇后 椒 繁興」四字,疑 聲同字通耳。 盈 第五倫傳》注:「后妃 性 升。 者,衹以其 一少實,蕃衍者非其常,恐非 通 此 親 親 所 表 蕃 又李注 引疑三家詩,「蔓延」與「蕃 稱 亦三 \approx 衍, 椒 李 一家詩 房,取 如《後: 善注 「兩引《詩》下皆有「美其 以 傳之語。 椒 並 其 漢紀》注引《漢 塗壁,取其 引《詩》作「蔓延 蕃 詩 實之義。」 意 古人 轉謂 繁 取 衍 又 官 衍 於

承 樹 굸: 言 實 則不啻一升,纔據 云: 珙案: 非徒 「知蕃衍盈升謂一梂之實者,若論一樹 裹之内惟有一實,時有二實者少 梂 箋云:「今一梂之實,蕃衍盈升。」❶ 種 滿 實,蕃 升 爾雅》「茅、榝醜菉」與「櫟其實林」 升 耐 假 衍 已,不得 多 一實又不足滿升。 一升。』若 爲 喻,非 以 種 種 實 實爲 事 實,則 也。 耳。 喻 驗今椒 成 王 也。」 正 今 肅 義

> 非 一菜」。 者,乃借櫟實之梂爲之。孔疏誤以「一梂」 正因其蕃衍,故以 所謂實者乃椒目矣。 今椒之一粒,故云「一裹之内惟 雅》云此類結子成毬朶,是也。 聚 也。」皆謂其實叢生攢蔟爲菉耳。 衹一實。 之「梂」義 生成 實事」乎? 今椒 房貌。」《 若椒 同 與茱萸皆多實,結聚成 而 微 榝之菜 説 異。 取興,何得云「假多爲喻 文》:「菜,茶 夫椒 櫟之材巢自 ,則郭注云: 之一粒,焉得 箋 有 裹者, 榝 鄭樵注《 「莱、 云「一材 菜,詩人 實」, 裹 . 萸子 如 梂 即 則 爾 裘

「無朋 反。 毓申毛,必 鄭云 ,平均不 碩大無 不 履 朋 朋一, 黨,則 反, 朋黨。」《釋文》云: 謂 傳: 申 無 毛 比 朋 作 例 毗 也。 比 至反。」正義 也。 三王 音 箋云 肅、孫 必二 引

❶ 「盈」,阮校本《毛詩正義》作「滿」。下引正義同。

毓 謂 陸 斯 比 孫 悖理傷教之言,豈可爲 沃,自是鄰國,不得 以「無朋」爲「不朋黨」,乃易傳,非申 厚」,即鄭子封謂叔段「厚將得衆」之意。 之與京」之意。 傳以「朋」爲「比」,無比 氏謂 至殺 毓 不 云 無朋 然矣。」承 鄭申毛,作毗 昭 「桓叔能 比之行」,誤以鄭義 桓 公而 叔 珙案: 阻 次章「碩 求 脩國 邑不臣 人 以 至反。 馬。 .政 傾宗阻 孫 訓? 者 氏之 大旦! 即 撫 能 以 孔述傳 爲 民 均 陳 孽 邑爲罪。」此 論 毛 平 篤」傳云「篤, 平 敬 傾宗 義,乃 均, 極 而 仲占辭 「朋,比」, 爲 與與 不 别 ·傳也。 朋黨, 正 潘 封 駮 大。 「莫 箋 於 孫 真 父

借。 條 此 勘 記 「傳以『長」訓『條」,乃謂『條』爲『脩』之假 」,謂木枝長,故以 》云:「案,正義云:『《尚 古字『條』『脩』相 椒 聊且 ,遠條且」,傳:「條,長 條 通 爲長也。」其説非是。 ,如《漢書》『脩侯』之 書》稱 「厥 也 引。』《校 木維

> 同。 正義及《唐石經》以下,各本俱作『條』也。」 條』二字皆以氣言之,不以枝言之也。 比 『長也』之訓而爲之耳,●非有所本。 《考文》本改經二『條』字皆作『脩』,及 考箋云『椒之氣日 益 遠長」,是此 此經 經 下 『遠 依 章 自

升上徑 吕 編 案 : 詩先言升,後言匊,相 豆。 陶人》疏引《小爾雅》云:『匊,二升。 二匊 而升小,升之所容不足以 廣雅》以 》曰:「宋 氏大臨亦言二升曰匊。 《埤雅》云先盈升,後盈 豆,四升。」陳吕之説,應本於此 蕃衍盈 一寸,下徑六分,深八 爲「兩手謂之匊」,匊, 董氏引崔《集注 匊」,傳: 備 兩兩 而 《周 己。 盈 一》謂 手 匊,則 禮 匊 分。 日 匊 考今《廣雅 故 • 考工 匊。」 《稽 升也 大於升,古 也 古 陳 . 者 一。」承 氏), 故是 記 匊 或 祥 道 大 珙 爲 古

❶ 「及」、《毛詩正義》阮元校勘記作「乃」。

升」爲「兩手」。 引《孔叢子》「兩手爲匊」,蓋宋以後已誤「二 無 本作「二升」,後人改爲「兩手」耳。 所據「二升爲匊」,必當不誤。 兩 手 謂 匊 語 此傳及《小雅 ,當即《小爾 ·采緑》傳皆當 雅》文。 自《御覽》諸 然賈 書 疏

别爲 之遠 聞者。 段氏《詩經小學》云:「一章曰『遠脩且』,傳 《揅經室集》曰:「目得者可概以聲聞,鼻得 曰『脩,長也』。 每相假借,故《衡方碑》亦借『聲』爲『馨』矣。」 之遠聞也。』『聲』字與『馨』字音義相近,漢人 者亦可概以聲聞,故《説文》曰:『馨,香之遠 、 詩・ 椒 聞 傳 聲也。 遠條且」,傳:「言聲之遠聞 矣,而足利古本尚 也。」今本前後章皆作『條」,則毛不應 从香, 殸聲。 殸, 古文磬。』又曰: 聊》次章『遠條且』,毛 从只, 粤聲。 二章『遠條且』,傳曰: 可證。 讀 傳曰:『言聲 如 馨。』案: 經言『脩』 也。」阮 『言馨 氏

之。且上章解言椒氣之長,次章解 傳異也。 聞之遠,此訓 傳,毛當有所案據,自作正義時已無文以言 永久長,聲氣遠條鳳鳥鴹。」此歌上文多言樂 次章云「言聲之遠聞也」,是總兩章「遠」字釋 其不可通也。」承珙案:《校勘》説是。 之,後遂專繫諸第二章『遠條 每有此例,如《采蘋》、《木瓜》之屬是矣。 詩乃言桓叔聲之遠聞 借,非有異也,不宜更爲之訓。 「馨」字之借。 上章云「條,長也」,是總 遠聞也」乃篇末總發一篇之傳,謂此《椒 『條』,與上章同,皆訓『長』,爲『脩』字之假 者,枝條之長。 「馨」字,今譌『聲」。」《校勘記》云:「考 至《衡方碑》「耀此聲香」,「聲」自 詁 《漢志 互相足之例,不嫌 『條』者,芬香條 • 也。 郊 祀 兩章「條」字釋之。 篇末總發傳,毛氏 歌 且」一句,而 此傳『言聲之 鬯之謂 「造兹 於經 喻桓 傳於 新 同 叔 聊 此 是 此 疑 而 聲 傳

毛詩後箋卷十

與此不同。

醫》傳:「馨,香之遠聞也。」此經文本「馨」字,傳自作「馨」,《詩》同,則此傳「聲」字似不必改作「馨」。《鳧聲,則「聲氣」必非「馨氣」,「遠條」二字又與

綢繆

毛爲 指也 理,且 得其 也。」 齋詩 也。 夫 綢繆以 野,爲三月之末、四月之中見於東方,故云不 婦婦 興,而 時 興 自 説》皆能 男女待禮 綢繆束薪 束 義明白 爲 束薪也,而仰見三星之在天。」則 薪 則以「束薪」爲賦 束 又云:「詩人叙其婦語之詞,曰 既 薪 發明毛説。 爲 ,不可改易。 之事 而成,若薪芻待 」,傳:「 實 事, `, 無 興 論 則 也。 昏 所 矣。 鄭箋乃謂 《潁濱詩 夕負薪不 謂 《集傳》 7人事 綢繆,猶 興 者, 傳》、《 束 而 又 薪 既 合 似 後 纏 何 情 放 方 於 束 此 從 緜

爲候? 傳》『火伏而後蟄者畢』,此取 謂 見,何以示之? 取其將見未見之時以言之者。 以 已伏爲候。」其説過於紆回,故 火星不見,嫁娶之時 又爲二月之合宿,故嫁娶者以爲候焉。 星,謂心星也。 説,往往兩存之。 以嫁娶用仲春,則以三星爲心,心爲大火,三 不指其見者言之,從無既指某星爲候,而 自《堯典》、《夏小正》以至《春秋》内、外傳, 月火始見,則時已 正月皆可嫁娶,故陳昏姻之正時以刺亂 秋冬爲昏姻 始見東方也。 「三星在天」,傳:「三星,參也。 古人觀象授時 正 心有尊卑、夫婦、父子之象, 三星在天,可以嫁娶矣。」毛 時,十月參見東方,自此 孔 〕晚矣。 承珙案: 經傳以 疏 也。」夫既不見矣,何 曲 , 所 疏家於毛鄭昏期異 爲 以 申釋,云: 將見爲候,彼取 明 知 民。民 箋云:「二 毛 星紀候, 義 在天, | 左 昏而 所 不 以 又 口 不 至 無 鄭

易矣。

《儀禮》「良席在東」、《孟子》「其良人出」,鄭 訓 可見毛公以前,經師已有訓此「良人」爲「美 皇后,妾皆稱夫人,又有美人、良人。」師古曰: 策》:「賣僕妾售乎閭巷者,良僕妾也。 注「婦人稱夫曰良」,是也。承珙案:「良」既 嫁於鄉曲者,良婦也。」此婦人稱「良」之證。 知此美室者,以下云『見此粲者』,『粲』是三 《漢書 女,故知良人爲美室。『良』訓爲『善』,故稱 曰:「《小戎》云『厭厭良人』,妻謂夫爲良人。 良,善也。」此「良 ·美』也。」諸家皆以古無稱女子爲「良人」者, 「善」,則「良人」,男女皆可 見此良人」,傳:「良人,美室也。」正 ·外戚傳》:「漢興,因秦之稱號,適稱 人」當即因《詩》而 通 稱。 有此 《戦 出婦 稱。 國 義

「子兮子兮」,傳:「子兮者,嗟兹也。」王

作「嗟嗞」。 《尚書大傳》曰:『諸侯在廟中者,愀然若復 雅・釋詁》:「嗟、咨,鎈也。」此「嗟咨」亦當 娶者,殆失其義。」承珙案:《説文・言部》: 以『子兮』爲『嗟兹』。鄭箋謂『子兮子兮』斥 言『子兮』,猶曰『嗟子乎』、『嗟嗞乎』也,故傳 文武之風也夫。」是『嗟子』與『嗟嗞』同。 乎,楚國亡之日至矣。』《儀禮經傳通解續》引 《青州牧箴》曰:『嗟兹天王,附命下土。』皆 《秦策》曰:『嗟嗞乎,司空馬。』《管子 見文武之身,然後曰:嗟子乎,此蓋吾先君 歎辭也。或作『嗟子』。《楚策》曰:『嗟乎子 苑•貴德》篇曰:『嗟兹乎,我窮必矣。』楊雄 稱》篇曰:『嗟兹乎,聖人之言長乎哉。』《説 「誊,咨也。」段注謂「咨」當作「嗞」。。今考《爾 文》:『嗞,嗟也。』《廣韻》:『嗞嗟,憂聲 氏 ^ 經 義 述聞》曰: 鄭箋以「子」斥「娶者」固誤,然猶 嗟兹, 即 嗟 嗞。 也。 《説 經

『子兮子兮』」,則從古無自稱爲「子」者矣。謂詩人子此娶者。《集傳》言男女「自謂曰

有不同 氏 無 珙案:《説文》「邂逅」係新附字,陳誤以爲許 與毛義殊,亦足證此『邂逅』與鄭詩別矣。」承 傳『解脱』,《釋文》音『蟹悦』,其義則箋疏俱 豈可言不期 字形互異,略可見者 而會』是『邂逅』本訓,鄭詩正當此訓。 『邂逅』指昏姻,言昏姻之禮必相約而後成, 〈稽古編》曰:「《鄭・野有蔓草》傳『不期 釋文》:『邂,本亦作解。 此 發 本文,非 · 邂逅」,此云『解説之貌」,意當日經文必 明。 詩言男女昏姻者不 見此邂逅」, 《鄭風》釋文云:逅,本亦 也 韓詩》云: 而 會乎。 陳 意 傳:「邂 謂 也。 『邂覯,不固之貌。』 宜毛公之别 《鄭 同 逅,本亦作覯。」此 案:《説文》『不期 風》爲君臣 近,解説之貌。」 其實「邂 作 爲 遘 逅」字 釋 遇 唐詩 也 雖 此 而

> 遘會,與《韓詩》「不固」義近。 書• 期 心 猶會合也。」蓋 逅公卿立之,還爲大害。」此「邂逅」亦謂 與兄弟謀曰:「今晏駕道次,濟陰王在 亦是遇合之意。 可言之。《魏志・崔季珪傳》注:「大丈夫爲有邂逅耳。」 真訓》「孰肯解 只當作「解構 大旨是會合,無分期與不期,皆可稱也 而 解意説耳。 閻后紀》:安帝幸章陵,崩于葉。 遇, 卒然會合,故云「不固」。 傳云「解説之貌」,即因 」, 但 《韓詩》云「不固之貌」, 凡君臣、朋友、男女之遇合,皆 構 人間之事」,高注:「解 爲會合之意。 總之,「解覯 淮 則 會 <u></u> 南 内, 閻后 後 合 倉 由 漢 俶 獬 不 而

杜

并 其宗族,骨肉離散,獨居 爾。《稽古編》云: 《序》云:「《杕杜》, 綢 而 刺 無 繆》、《杕 時 兄弟 也。 小將爲 君 杜 不 一》、《羔 能親 沃所

沃也。 皆親戚叛之,所以不振,安得目爲泛泛行道 晉,椒 或 《序》但云「刺 《鴇羽序》云『刺時』,不云『刺昭公』,又言『昭 裘》三 宗族離 氏仲輿曰: 聊 定指某公。 非昭公詩,則《綢繆》諸篇可知矣。」承 公之後,大亂 日 乎? 衰,詩人憂時感事之作,明白無 聊蕃 詩 鴇羽》之間, 如《王風 叛,公室孤 衍 總之,爲昭公以後,曲沃日盛 「晉自昭公被弒,與沃五世相 序》 比 五世」,明是亂後始作。 時」,自以 • 不 沃,一盛一 葛藟》、《鄭風 言 概判 立 。 刺 詩人以杕杜特生比 非一 何 爲昭 君, 衰比 君之世,故不 公詩, 疏 晉 • 以 將 揚之水》, 殆非 其 《鴇 折 疑。 珙案: 在 而 攻, · 晉 羽 也 郝 · 能 椒

杕 也。」此傳「杕,特貌」,宋本作「特生貌」。 特貌 有杕之杜,其 杜 赤 棠 也。 葉 湑湑」,傳: 湑湑 , 枝 葉 不 興 相 《釋 也 比

皆爲 也。」此疏 盛 下章言『菁菁,葉盛』, 茂盛之貌。 傳》取反興。承珙案:正義云:「《裳裳 誤久矣。《釋文》「湑湑」下云「不相比次也」, 用 華》亦云『其葉湑兮』,則『湑湑』與『菁菁』皆 反興也。」《虞東學詩》曰,毛取正興,當從《集 以獨生之杜猶葉茂,起獨行之人終無與,此 比焉」、「胡不依焉」之義。朱氏道行曰:「詩 是傳文「比」下有「次」字,疑即取 文・木部》:「杕,樹貌。」「樹」當作「特」, 訓》引傳云「杕,獨貌」,亦無「生」字。 文》引傳 杕」爲「特貌」。 毛傳。 而 枝 葉 條稀疏 盛 但 然《家訓》引《説文》已作 申傳甚 其 傳於此云『湑湑,枝葉不相 云 云 以以 特 諦。 凡樹木必枝葉相兼,始見扶 「枝 貌」, 喻宗族 葉 蓋傳意「湑湑」、「菁菁」 互相明 無「 不 相 雖 生」字。 比 耳。 彊 次」者, 經文「胡 「樹貌 不相 言葉 顔 則 親 雖 比, 三,其 氏 茂 者 説 暱 即 家

於文義 湑 希少故見其 實是茂盛 次」形容「有杕」,即以影合興意,可謂善於體 親 也。 密 諸言「盛」者訓 物,且亦是反興,非正 疏 希少之貌」,則與 箋以此 ,而枝條稀疏不相比次,其幹之孤 茂盛之狀。 」、「菁菁」就經文言葉之盛,而以「不相 附,其身之孤立 猶獨行之人宗族雖多,而 殊 刺不 不 而 順 (枝,不取葉爲興耳。」語多牽强, 得爲希少者,葉密則 親宗族,不宜以 特生之杜有幹無枝,雖 也 義 乖異。 绿 一自若 竹 興 菁菁]及「菁菁者莪 也。 也。 疏曲 箋以「菁菁」爲 盛 故 離 爲 爲喻。 傳 心 同 申之,云: 離 仍 一色,由 特 德 其 以 **菁** 自 葉 不 比 湑 相 若 繁

字。 助」。」 何 不 欲 胡 相 承珙 使 不 推 相 佽 佽 案 推 而 焉」,傳:「饮,助 以 助之。」正 **^** 次第 日記 》引崔靈恩《集注 助之耳, 義 曰:「飲,古『次』 非訓『伙』爲 也。」箋云: × Z

> 手指 以「推」明「伙」,正是以「助」明「伙」耳。」 「次,比也。」鄭 與「比」本 「伙」作「次」。 「伙」並言。 次」亦非 胡不伙」與上「胡 聲之轉。 相次比也」,亦是以「依」爲「次」。 《儒行》 「伙」之爲「助」,猶「趦」之與「趄」。 互. 不 相 可 拿車 注: 注《周 訓 轉 注。 推, 不比」同義,「比」訓「輔」, 攻》「决拾既佽」,箋云「謂 助」也。 禮》云:「比,次也。」此 舉 薛 也。 綜注《東京賦》云: 舉 焦里堂曰: 猶 與 也 與 「次」「且 箋以「推 猶 次 助 也

《釋文》:「睘,本亦作煢,又作榮。」《 月》之「惸獨」、《孟子》引作「煢獨」。《閔予小 無傳,蓋以「睘」、「惸」、「嬛」爲一字矣。 此惸獨」、《周 毛於此傳訓 思》、李善注《文選 範》正義 獨 引此 無 頌 詩 所依」,於《小雅 • 作「煢」,王逸注《楚辭 閔予小子》「嬛 • 思玄賦》引皆作「焭」。 無 • 正月》「哀 嬛 所 在 書 依 灰」皆 · 九 念 正 也。 洪

睘」,字同今《詩》,而 文》「睘」下云「目鷩視也」,引《 也。」段注云:「回 似《毛詩》本皆作 子》之「嬛 (獨行多懼,義亦未始不 取裵回 嬛」,《 無 所依之意。」其説 釋 「榮」。 文》引崔《集注》本作 轉之疾 訓 與毛 《説文》:「煢, -相通耳 飛 微異。 也。 亦 詩 通。 引申 》「獨 然無依之 又《説 行 爲 煢 П 睘 祭 疾

案: 以 竭 云: 「、 服之窮也。 姓」亦統言之。 同 同 矣。 通 姓」乃統宗族言之。 姓於宗廟。」注云:「所出王之廟。」此「同 乎。」 古稱「同 「土揖 庶姓, 不如我 其 疏 庶 五世 云 無 庶姓,時揖異 姓 姓」,有親 同 《禮記 别 親 姓」,傳"「同姓 袒免,殺同姓也。 于 四 者。 世,謂 上 大傳》:「四世 異 疏 而 襄十二年《左傳》: 姓,昏 姓、天揖 之别。 戚 上至高 單 于下, 姻 祖 六世 周 同 也 同 一,以 姓。 昏 官 祖 而 下至 則 一親屬 姻 也。 • 緦, 注 此 可 司 對 曲

别有屬,不得疑此謂 所謂 己,兄 義云:「上云『同父』,故云『同姓』爲『同祖』。」非 章「同父」舉其至親,下章「同姓」舉其 義,絶不爲親。 詩》云:「桓、莊、武三世弑逆,律以《春秋》之 祖」,乃統宗族言之,非即以「祖」爲祖 共承高祖者爲同姓,高祖以上 爲宗,是别于上也。庶,衆也 于此。 轉廣遠,分姓衆多,故曰庶姓也。」據此 上,與高祖 『其庶姓别于上』者,五 之父者也,言服 沃 「他人」言之,則 以 亦晉同 弟同 五世 兩 頭 不同,各爲氏族,不共高祖 承 姓,服 該 袒 高 中間 詩 祖免而 免殺同姓 祖 人 同 屬 之後 也。 所言『同父』、『同姓』,義 非爲沃事 未遠 姓」當謂 無 世 傳 也」者 正 以 爲 相 服 以 後 報 疑,則《虞 也。」 一爲 共 ,减殺同 高 「謂共 ,庶姓别 緦 同 庶姓。 始祖者。 祖 麻 姓」爲「同 是。 以 承 是 至 父。 ,則以 此 姓 别 若 東 異 服 疏 也 學 謂 自 正 干 祖 盡

强解。 决,亦復何所底止乎 者矣。《毛詩寫官記》乃又以「居居」、「究究」 及著《集傳》,以「居居」、「究究」義未詳,不敢 羔裘豹袪之人。」是朱子初説 爲美其大夫。 古,在毛鄭之前,此而不信,是古書無可 在位不恤其民也。」案:《吕記》引朱氏 「在位者不恤 序》云:「《羔裘》,刺 夫《爾雅》爲釋《詩》之祖,又興於中 其民,故在下者謂之曰 夫苟蔑棄《雅》訓,而 ! 時也。 本從《序》也。 晉人刺其 徒 彼 憑肊 服 證 日 據 是

同, 袪,袂」。 ·袪』下云:『袂末也。』正義云:『此 在位 羔 與民異 裘 定本 豹 袪 云「袪,袂末」,與《禮》合。』 心。」《校勘記》云: [],傳: 「 袪, 袂 也。 「《釋文》 本 解直云 末 不

毛詩後箋卷十

《釋文》本與定本同。 末」別之,仍當從定本爲是。 無庸復傳。 大路》傳已云:「袪,袂也。」散 袪爲袂末。 義云以裘身爲本,裘袂爲末,無取於袂爲本、 自因 當以 取 正義本爲長。」承珙案:《遵 喻本末,故 下傳云『本末不同』,正 文得通,此 以「袪」爲「袂 可

語。 《左傳》昭八年疏亦引《爾雅》「由,用也」。今《爾雅》無此 苦。」正義曰: 案: 毛於《執競》「自彼成康」傳 也。」正義 懷惡不相親比之貌。」箋云:「其役使我之民 此『由』訓爲『用』,故『自』得爲『用』也。」承珙 也。』《大雅 人,其意居居 自,由 「自我人居居」,傳:「自,用 曰:「《釋詁》云: 也。」展轉 緜》「自土 「《釋詁》云:『由,用也。』案: 然有悖惡之心,不恤 相 漆 訓,是『白』爲『用 沮」傳云:「自,用 『由、從,自也。』 亦云:「用 也。 我之困 居居 彼

24 四 π

懷惡 文義較 我者乎,念子故舊之人而不去。 無釋。 我之困苦」,上「我」似詩人自我,下「我」又民 但此詩,毛衹訓「自」爲「用」,而「我人」二字 成 自言我,語意不順。今謂「自」者,詞之用也。 也。」蓋此訓雖不見《爾雅》,實爲經傳 命」及注《尚 我人」對下句「他人」言之,乃指其在位者。 自居 康 不 之道。」 居 相 順 箋既云「役使我之民人」,又云「不恤 而 ,倒裝句耳。下乃云豈無他 親比,何也。 豹袪者,我人也,乃用是 書》「自服于土中」皆云:「自,用 鄭 箋《大 「自我人居居」猶言我 雅 江 漢》「 如此,似於 居 自 人 通義。 能恤 居然 召 祖

習之惡。」與 **凥」,蹲踞字作「居」。** 居』字乃箕居字」,故「居」又與「倨」通。 正 義 引 李 毛義合。 巡 注 爾雅 案 : 曹 憲《廣 《説文》居 》云:「居居 雅 音》云「今 處 不不 字 《説 作 狎

> 同。 言》: 《荀子·子道篇》云:「子路盛服 祛祛」,《唐石經》作 居」同,亦謂其有倨敖之色也。 子曰:『由是裾裾,何也? 文 》: 充盈,天下且孰 《漢書· 「袿謂之裾。」郭注云:「裾,或作袪。」是古字「裾」「袪 「袪袪」爲彊健,亦於「裾裾」聲義相近 郅都傳》:「丞相條侯至貴,居。」亦以「居」爲「倨」。 倨, 不 遜 「袪袪」,傳云:「袪袪, 也。」 肯諫汝矣。」」「裾裾」 倨 敖 無 汝服 禮 《魯頌 既 故 見 彊 爲 盛 孔 健 駉》以車 也。」《方 與「 子,孔 可, 惡 也 居 色

子與我 邑也。 箋義是也。 之民也,故云 曰:「指謂 豈無他人」,箋云:「此民, 王 有 肅云:『我豈 故 他國可往,非 後儒 舊 豈 也。」與 無 有謂 他 人 他 鄭 無 可 欲 同。」承 他 人 歸 去 或 指 此 往 可 采 者 卿 曲沃者。 珙 歸乎,維 邑 乎。」 大夫采 案: 適 疏 彼 正 姜 申 念 采 義 园

❶ 「康」,阮校本《毛詩正義》作「安」。

見唐民 人所親 人心。 之,誠所不忍。 也。 氏《廣義》曰 也。 上不見 故者,謂 愛。皆忠義感發語。 好者,言子在故國 有不渝之忠義,亦見君臣無立國之經 恤 "「曲沃之君,民已讐之屢 而 祖 萌 且子爲舊君之臣,猶足 父 事讐之心。 以 來,已相 而 聖人存《羔裘》, 無異志,亦足爲 箋泛指 服 屬,一 他 世 以以 旦 國 繋 去 是 豈

是於雙聲取義。 通。 惡。」承 IF. 【緝》以「究」爲「察」,皆可不必。 究究,不止貌 義 傳以「究」亦爲惡,故 引孫炎注《爾雅》云:「究究,窮極 自 珙案:王逸《楚辭 我 人究究」,傳:「究究,猶 也。」其訓與孫炎「窮極」 蘇《傳》以「究」爲「久」,嚴 云「究究,猶居居」, 九歎》章句 居 居 義相 人之 曰 : 也。」

鴇羽

《序》云:「《鴇羽》,刺時也。昭公之後,

世。 《補傳》已云然。况詩中明言「王事」、《左傳 《序》既云『昭公之後』,不得併數昭公矣。 時者,當作於小子侯及緡爲最後 伐曲沃。」皆所謂「王事」也。 於晉。」九年: 翼。」桓八年:「冬,王命虢仲立哀侯之弟 隱五年:「秋,王命虢公伐曲 大亂 案:以孝侯至緡爲五世,李氏《集解》、范氏 詩,不容言晉亂 滅緡之後,曲 八年,視前數君獨久,其時豈得 子初説不數昭而數緡,最得之。 侯、鄂侯、哀侯、小子侯 作是詩也。《稽古編 孔疏以爲追 五世,君子下從政 「虢仲、芮伯、梁伯、荀侯、賈伯 沃武公始繼晉而 者反 刺昭 》曰:「鄭箋以 闕 公,謬矣。 役,不得 緡 爲 而 沃,而 五. 然 不 作《無 世, 養其 緡在位二十 則 數 無 也。」承 此詩云刺 一二君之 立哀侯於 亂 此 昭 父 衣》之 非 母 珙 而

「集于苞栩」,傳:「栩,杼也。」《稽古編》

其殼 其説 汁。 櫟爲 生。」故説者或 案:陸《疏》於「苞栩」、「苞櫟」雖各爲説,然 詩,於『櫟』引《爾雅》『櫟其實梂』及《秦風》 之『苞櫟』是也。 櫟之名。 櫟』,各有釋。 風》之『苞栩』是也。 曰 : 云:「秦人以柞 『苞櫟』之陸《 ·栩杼』及《車舝》、《采菽》、《旱麓》、《緜》諸 (緝)云《詩》有二作樂: 《爲汁, 之屬 杼,或謂之爲栩。 謂櫟爲杼,五 「苞栩」云:「栩,今柞櫟 此 詩『苞 也。 説詩 可以染阜,今京洛及河内多言杼 疏》,則 《藝文類聚》於『柞』引《爾 曰柞櫟,或曰木蓼。 栩』及《秦風》之『苞櫟 其子 -櫟爲 者不明,言其爲兩木,惟 今案:《草木疏》二風之『柞 方 房 櫟,河内 又『櫟其 通 嚴説 其子爲阜,或言阜斗。 生爲林,木 《爾雅 語也。」其説 非 人謂· 無據矣。」承 也。 實材」、《秦風 》『栩杼』、《唐 蓼子亦 木蓼爲 璣以 徐 当皆有 「苞櫟」 州 爲 人謂 櫟 雅》 此 房 珙 嚴 柞

似 柞 皁。 耳。草下之『櫟』,非《木部 部》『草斗,櫟實也』當作『柞櫟實』,損『柞』字 栩、柔、樣草爲一物,是名柞櫟,亦名櫟,而 爲梂者合。 聲。」《艸部》:「草 也」,「梂」下云「櫟實」,段注云:「許『櫟 从艸,早聲。」此則栩、柔、樣、櫟並 櫟」,仍一木也。 然於《唐》、《秦》之「苞栩」、「苞櫟」皆爲「柞 秦詩 『梂』二篆連屬,正與陸《疏》云木蓼、子房生 「樣」即今之「橡」字。 木,予聲。 此 榝 也,亦非子材生之櫟 ,陸雖以「柞櫟」與「木蓼」之「櫟」爲二木, 椒 也,宜 — 曰 《艸部》以『菉』系諸榝椒矣,此則 樣。 讀若杼。」「樣,栩 從其 然則許意謂 从木,羽聲。」「柔, 方土之言「柞櫟」 《説文》:「栩,柔 斗, 櫟 惟《木部》「櫟」下云「木 也。 、實也。 櫟爲 》之『櫟』。 柞 實 木蓼 與 也。 棫 栩也。 也。 是 也。 日象斗。 爲 爲一木。 从 也 木,羕 許 其 意 非 啪 以 實

不同。 説 詩》單言「作」或連言「柞棫」者,自與「柞 装し 文》别以木蓼爲櫟,然本非《詩》所 系 若「苞栩」、「苞櫟」,則同 諸 櫟 也。 今 案: 段 説 爲 分 柞 析 櫟。 有 甚 也。 櫟 細。 即

爾 較直 息也。 所解 堅固」,其義同也。」《經義述聞》云: 曰 : 云: \overline{Z} 而 靡盬」之『盬」同。 蠱 爲 後 者,惑 雅 蠱 一截。」承珙案: 三王 近 繼之 此云『盬,不攻致」、《四牡》傳云『盬,不 我迫王事,無不攻 王 》:『棲遲、憩、休、苦,息也。』苦,讀 者 王 事 也 《周 事 事靡息,故不能藝稷 以 事 靡 靡 不 也 易》山 物 盬 鹽」之下須先述其勞苦不息, 能 既 」,傳:「盬,不 謂 正 惑 藝 王事靡盬者,王事靡有 稷 物 亂 風 義 終致 蠱 蠱 以「盬 黍 致,故盡力焉。」正 必 云云 正 有 義 黍也 損 」與「蠱」同,於 事 , 始失之迂。 攻 壞。 引 致 非 褚 「如毛鄭 《序卦 訓 所解 也 氏 曰 蠱 與與 箋 似 止 義

堅固 爲事。」 非。 矣。 於王 戎以 《儀禮》之「沽功」,皆即 也。 牡》、《杕杜》,則文王方率諸侯以 於怨懟,以説《鴇羽》、《北 關,義尤正大。 者,公義也。 云:「盬,不堅固 且. 傳》「器用盬惡」,即 盬,且也。」亦苟且 盬、雜,猝也。」 《四牡》云:「王事 《左傳》 敵愾,而 事靡息,則是相 有二 ,已含有勞苦不息意,原不必更作 靡息之言似非 此 》襄二十九年: 服 解 事之心, 甚 傷悲者,情思也。」此 於勞使臣、勞還役之詩乃致 若以 晰 也。 郭 不堅 立之意。 「葬靈 注 他 詩旨,不 且. 市 爲 思歸者、私 靡 將 若《周禮》之「苦鹽」、 此「盬」字。 以 王 盬,我 王。 固之謂。 不免陰行善事之謗 恩 山》尚可,施 事 皆倉卒 《漢書 靡 而 如 鄭 上 歸過於上,恐 有 心傷 從 恩 卿 朝聘,伐 止 則語 毛 有事,子展 王事 也 也。」又: 《方言》: 息 悲。」 鄭 息夫躬 之 則 本 靡 傳 憾 狄 四 盬 近

印段 所解 固事晉楚,乃所以蕃屏王室,即 處。 堅 確合古義,不可易矣。 往。 事晉楚,以蕃王室也。 詩 伯 》云:「王事靡盬,不遑啟處。」 有日 弱 ,不可。]子展 王 王事無不堅固之意。 事無曠,何常之有。」此謂 日 「與 東西南北,誰 人其莫往 弱 傳箋 敢甯 不 猶

肅 翼」、「鴇行」皆連「肅肅」言之,「行」自當爲 也。 之法如此。 羽莖也。」二篆 也。」承珙案: 經小學》曰:「『行」『翮』求諸 也」,是「翮」與「猴」 羽本謂之翮」,鄭注《地官》亦 翮 翭」之假借。 羽 聲也。」《鴻雁》釋文云: 翭」「行」雙聲之轉,且詩以「鴇羽」、「鴇 肅 此及《鴻 肅 鴇 羽、翼、翮以類相從,不釋爲行 行」, 傳: 相 訓「行」爲「翮」,疑謂「行」爲 《説文》:「猴,羽 雁 次,雖似微别, |析言之則別,統言之則 肅 行, 肅 其 羽」傳皆云:「肅 翮 雙聲合韻 「肅,本又作 也。」段氏《 云「翮,羽本 本 然《爾雅》云 也。」「翮, 詩 同 列 訓

> 劇。」《 翼 行列」之説,非詩 而 别求 廣雅 解。 *****: 퀢 埤 意 雅 潮 也 》鴇 飛 也。」總之不 群 居 如雁,自然 當 舍 有 羽

無 衣

《序》。 《有杕之杜》皆刺武公」語,故據以改此《序》 僖王乃賜之命。 命之意,似恭 之者,其臣之意美之耳。」此可 則正義明云:「《世家》稱武公厚賂周僖 公」,則《序》本作「美」可知。 「美」爲「刺」耳。 疑武公非所當美,而《唐譜》正義有「《無衣》、 是詩也。」「美」字、《注疏》本有作「刺」者, 始并晉國,其大夫爲之請命乎天子之使而 《序》云:「《無衣》,美晉武公也。 張氏《詩貫》曰:「此詩人述其賂王請 而實倨, 是於法武公不當賜之。 然《序》下正義 以著其無王之心也。 至不當美 屢言「美武 謂 善於 而美 武 讀

《序》義。 淺近 惡之情,刺意不言自見。聖人録其詩,所以 揜。 謂『美』者,正如符命美新,九錫美魏,作史者 皆愚夫愚婦之所爲,故正其失而書刺。 劉仁 之始,亦止據事直陳,初不知其爲美爲刺 傳譌》曰:「此詩作自曲沃之大夫,當其作之 但據事直書,而其惡自 傷王靈之不振,欲使後 而序詩者特以爲美武公,正以著曲沃大夫黨 美之,非《序》者美之也。 也。」許氏《詩深》曰:「此 〈序》首國史所題,其下推説,意深且遠,宜爲 安本 恭嘗 者 此《序》之書法 所 謂 爾。』何其 訾議矣。]案:諸説皆足以 使者曰:『旌 亦 與此 如 是 昭 世 凡里巷淫邪之詩, 節 詩之美晉武,作者 詩 而已。」韓氏《讀 揭于萬世 亂 吾 語 賊 所自有, 氣 知所懼 如 而 出 一發明 此所 一轍 不 但 也。 也。 詩 可 要

「不如子之衣」,「子」字,毛鄭皆未明言

《序》云『請命乎天子之使而作是詩』,則毛 時。 所指。 嚴《緝》以「子」爲指王使者得之。 有六命之衣,愧己未受服于王,不如其衣安 所謂『天子之卿』即『天子之使』也。 言》曰:「傳直言天子之卿六命,車旗 「六」者,變文成章,則又非是。孔氏《經學卮 服章數有定,次章何復以「衣六」爲言。 以「子」指武公,如公子暈謂隱公曰:「百 恭敬,何敢爲此倨傲之詞,公然指斥? 六爲節,初無變『七』言『六』爲謙之意。 安子,諸侯説子。」是諸侯之臣,亦呼君 武公雖有無王之心,然方其請命,必且謬爲 故曰『子之衣』。」語意亦未明晰。 「子」,以此爲作於晉大夫美其君始得王 「子」爲「天子」,則古無斥天子爲「子」者。 然使果謂武公服其命服安且吉兮,則 正義曰:「就天子之使,請天子之衣, 《集 但謂言 因使者 衣 傳》 故 或又 命 服 公 命 > 爲 姓 以 以 惟

燠耳 耳。 沃 卿來使於晉,亦假以 乎不。」觀《左傳》莊十六年。❷ 當侯伯,得受六命之服,列於天子之卿,猶 鄭箋云:「變『六』言『七』者,❶謙也。 慢之言,而「六兮」亦非徒變文成章之謂 且 有衣六、衣七,而不如子服命服之安且吉、安 衣」,乃王命之服也。 孔説是也。此述其請命之辭,若曰「子之 重其使,出於封畿即 封」爲出於封畿,非封 如子男之服。』正義曰:『毛意以《周禮》「出 「子之衣」,一其加服,一其本服。」承珙案: 大車》傳曰:『天子大夫四命,其 伯 燠 也。 以 如此,兩「子」字乃爲親切言之,既 雖 所以要之,令爲請 上章『子之衣』,亦斥使者之衣 軍 爲晉侯」,注云:「小 得加命。』然則此天子之 今晉君未得王命,則 七章之服矣。故 爲諸侯也。 「王使虢公命 命于王 出封 尊 國, 而 不 王 Ŧi. 故 "。 至 敢 非 賜 兩 命 命, 也 傲 言 愈 雖 曲 必 服 而

> 軍。」 衣」三字,總少著落耳 或不敢必 不敢遽以 沃之傾宗弑逆,事所罕見,故雖釐王 國之禮命之。」蓋春秋之初,周禮 疏 云: 爲侯伯,亦情事之常。 大國之禮待武公。 晉 地 雖 大,以 初 則 并 當武 晉 但於「子之 猶 或 一受賂 公請 在,如 故 以 尚尚 曲 小

冠弁 衣。 疏 冕,則孤卿絺 蓋謂卿從車六乘,旌旗六旒。 車旗衣服以六爲節。]正義曰: 有三章而此云『六爲節』,不得爲卿六章之 云: 故毛鄭並不云『章』。」《周 也。 一豈曰 舊説天子九章,據大章 飾 無衣六兮」,傳:「天子之卿 則六玉,冠 冕。 絺冕,衣一 則六 辟 章,裳二章,止 禮 而 衣服者,指謂 「云車旗者 積。 言,其章 司 三公毳 服》賈 六命 别

^{)「}變六言七」,阮校本《毛詩正義》作「變七言六」。

[「]十六」,原作「十八」,據阮校本《春秋左傳正義》改。

車旗 首章「七兮」云「冕服七章」,此但依《典命》文 明中有小章,乃可得依命數。」承珙案:毛於 三命、二命、一命,天子之卿六命,大夫四 命、六命。 皆九而已,自餘鷩冕、毳冕以下皆然。 章,與天子同,無升龍,有降龍。 小 有小章者, 若無 所 申爲是。 衣服以六爲節,不言六是章數 章依命數,則皆十二爲節 卿大夫玄冕一章,卿大夫中則 賈疏「小章」之説,似非毛意。 小章, 絲冕三章, 則孤 其小章 上公亦 常以 必 章 有 命, IF. 有 叮 知 别 九

有杕之杜

後世 氏《廣義》曰:「武公以篡弑 命 武公寡特,兼其宗族而 無 中屠 貮 序》云: 心 而 、管幼安之徒,固自有人也,豈以 超然于塵俗之表,泥 「《有杕之杜》,刺 不求賢以自輔焉。」 得 國,國人以王 晉 而 武 不滓 公 如 如 也。 姜

> 是杜 而 言之,何故以特生之杜起興乎? 以 而汙。 武 若果美其好賢,則當如菁莪、棫樸,舉其 相率而去之者,故詩人以 立無助,猶杕杜也。 氏《續詩記》已有此 能用天下國士乎?」即此詩意。 紹使者曰:「歸 詩之意也。」《田間詩學》云,三國時賈詡謂 飛冥冥,天子亂命不得而脅,亂臣賊子不 無以得賢人之詩,列于《無衣》之後,以 此 明者矣。 公之飲食爲義 不皆杕,凡言「有杕」者,皆取興於特貌 詩美武公能好賢者。 《易》曰『肥遯』,其殆斯 語 而 袁本初:兄弟不 説,謂「武公翦滅宗國 就之歟? 當時賢者必有不義其 爲刺」。近人乃 試思「有杕之杜」, 故采 人歟? 承珙案: 此不待 相容 刺 。盛 此 見 武 者 有 戴 孤 袁 鴻

輔耳。諸儒解義各出:謂教武公求賢之法,《虞東學詩》曰:「此刺武公不能求賢自

食之。 國人 也。 故《爾雅》曰「曷,盍也」。 案:蘇氏《詩傳》云: 而 用 矣。蓋緩言之曰「曷不」,如「曷不肅雍」是 食之,庶其肯從我乎。」是已以「曷」爲「曷不」 也」郭注: 自輔,事非切類,不得爲比。 不能養也。 言君子適我 有好賢之心,惟恐無 何 ·曷』爲『何』,似不如《爾雅》注之曉達。」承 陳氏 飲食之,此《集傳》説 但 急言之則曰「盍」,亦曰「曷」,聲近義通 餘説 自致其意,曰何以飲食之,此嚴《緝》説 飲 病其 説 雖 也; 而 盍,何不。 以杜之孤生道左,興武公之不求 不能 多,要不出 而 謂好賢 來遊,若果中心好之,何不飲 此 飲食,所謂 疏 以 申 「苟誠好之、曷不試 而恐不足以致之,無自 諸 箋 四者之域。 飲食賢者,此《吕記 也; 家 義 皆據《説文》以 謂君不能養賢, 也 悦賢不能舉,又 《爾雅》『曷,盍 ; 謂 使 今案,詩 武 公誠 飲 珙

> 爲「至」。 訓「及」爲善。 國,皆可來之我君所。」正義曰,「逮」又别 可以適我乎。 「逝,及也。」則毛韓義同。 蓋以「噬」爲「逝」之假借。《爾雅》作「遾」。《方言 爲「逮」,訓「逮」爲「及」。 云:「北燕曰噬。」《釋文》引《韓 邶 「逝不相好」云:「不及我以相好。」是訓「逝」 · 日月》「逝不古處」云: 暰 此則與「適我來遊」語意重複,不 肯 適 箋云"「彼君子之人 我 ۰, 傳 此訓「噬」爲「逮」, 噬 肯 詩》作「逝」,云: 噬 「逝,逮。」次章 適我,謂及今 逮 也 至於此 毛 如 訓 於

有西施之美容,讒妬人以自代。』」承珙案:章》:『妬佳冶之芬芳兮,嫫母姣而自好。雖顯『食』韻,乃之、幽之通。『食』音『飤』,『好』 與『食』韻,乃之、幽之通。『食』音『飤』,『好』 一中心好之,曷飲食之」,孔氏《詩聲類》

「周旋」之義,故云:「周,曲也。」《釋文》曰:「周,《韓詩》作右。」與今本《釋文》曰:「周,《韓詩》作右。」與今本《釋文》曰:「周,《韓詩》云:「道周,周,右也。」是訓》引。與一十一一一一一一一一一一

葛 生

反,非即謂其死亡。《車鄰》「逝者其亡」傳《説文》云「亡,逃也」,故云夫從征役,棄亡不珙案:此「棄」如「猶來無棄」之「棄」,「亡」如戰,則國人多喪矣。」箋云:「喪,棄亡也。」承戰,則國人多喪矣。」箋云:「喪

《詩》意,角枕錦衾之粲爛,夏日冬夜之懷思 作。故箋讀「予美亡此」之「亡」爲「無」,能得 詩調之曰 説》:「袁羊嘗詣 其没,家莫聞知」者,殆仿佛似之矣。」《世 寡婦之噍殺。然曰『予美亡此,誰與 是也。古注及程朱皆不作悼夫之亡,而嚴 可哀矣。」范氏《詩瀋》曰:「晉自武公以後 則知其或已喪亡而心猶冀其歸也。其情亦 **豈悼亡者之所宜言乎?** 者,非悼亡者,而華谷則直以爲悼亡。 章傳明有「夫不在」語,則必不以爲嫠 曰『百歲之後,歸于其居』,則唐人所謂『其存 谷獨主以爲説。今玩詩文意尚和緩,似異於 用兵之多未有過於獻公者。《序》以爲刺 傳意。季氏《詩解頤》曰:「程子以此詩思存 云:「亡,喪棄也。」亦非死亡之謂 "『角枕粲文茵,錦衾爛長筵。』 劉恢,恢 在内 但曰 『予美亡此』, 眠未起,袁 此 獨處」, 今觀 婦之 詩 獻

説。 《古義》據此 果有此義也。 尚 小序》,不過以肊解之,未必六朝説《詩》者 小 序》以見袁以 公主之不平,殆以其言褻慢。 明 帝 女,主 以 爲 見 死 悼亡之詩。 詩 嘲劉,故主不平耳。 大 不平。」 然傳箋並 劉 孝標注引 孝 標 無 何氏 亦 此 引

同。 所依託,故以葛蘞之必得所依 問 今不在 也。 所美之人不在此 曰:「《漢書》云:『不以在亡爲辭。』亡此者 亡,無也。 也。 ,明其爲一婦人隻身無託也。」承珙案: 與」,非義 吾誰與居乎,獨處家耳。』《毛鄭詩考正》 其 予美亡此,誰與獨處」,箋云:「予,我。 『誰 此也。 夫從征役不歸,生死 與獨 言我所美之人無於此,謂其君子 也。 既言其夫今不在此,而又 處」與《檀弓》『誰 ,留誰獨處哉。 『與』當音『餘』。 未 爲 可 反顧歎 興, 知 與哭者」語 婦婦 誰 而言 與,自 傷之 嗟 無 子 曰

媾」,則下二章「獨息」、「獨旦」又非韻矣。詩學》又謂此四字兩韻,如《易》之「匪寇,婚婦人自問之辭,是也。若《田間詩學》、《陸堂《毛詩寫官記》亦引《檀弓》以證此「誰與」爲

錦衾。 見所出,則《王風》正義有云:「毛時書 猶自齊 箋云:「夫雖不在,不失其祭也。 禮,夫不在,斂枕篋衾席,韣 角枕粲兮,錦衾爛 而行事。」後儒 多疑 兮」,傳: 齊 用 角 枕 攝主,主婦 齊 而 錦 藏之。」 則 衾,未 l籍 尚 角枕

則 明衣」是也。然天子、諸侯之所服用,而 齊則 此 以 意,以『禮,夫不 之齊物,●故覩之 今夫既不在,妻將攝祭。 傳云:「齊則角枕 人亦有之者,豈庶人不嫌上同, 在,其祭也使 周 云 夫人嫁則 君錦 衣錦褧衣」爲庶人之妻嫁服乎? 至正 自 無故 齊日用之,如斂有 禮 必有所據。」此語可 是故因己之齊,出夫之衾枕,非 齊 出 衾」,此皆天子諸侯斂時所用。 不 也 角 玉 出夫衾枕, 枕 府》大喪「共 故 錦 人攝 衣錦 王 衾 在 肅 錦 也。」又釋箋云:「夫 ,斂枕篋 而 代爲主,主婦 加 云: 衾, 夫在之時 明衣,而《論語》「齊 思 則是 褧襜」,而《丰》詩又 角 爲讀 夫 『見夫齊物 枕」、《喪大記》小斂 其身既齊,因 念席 齊 也。 毛傳者之通 時所用,❷是以 韣 傳又自 猶 如《碩人》傳 用此以 自 而 用 疑 齊 藏之」, 夫 雖 明己 出 義釋 生 此 必 而 而 齊。 例 夫 以 或 有 時 不 增 枕 行

耳。 思。」是也。」此 者。」今案:此説過于迂曲,仍從箋疏 之衾,以禮自防,有若齊然,故亦 而詩言之者,婦人以夫不在 卮言》云:「毛意以 箋疏以爲攝夫齊祭,乃演傳 疏 申釋,語 爲角枕錦衾本齊 皆明 ,韣其常所與共寢 暢。 用 孔 義 角 爲得 時 氏 而 枕 所用, 失之 錦

傳。 案: 風》也。 毛萇注云:『居,墳墓也。』」 承 傳》「百歲之久,歸乎其居」,注云:「《詩・ 蓋傳於「居」訓「墳墓」,故下章云: 兆域、室爲竃穴别之。 也。」箋乃更申之曰「室,猶冢壙」,則以 今注疏各本「居,墳墓也」四字,是箋,非 此殆傳寫脱誤,當從章懷所引作「傳」。 「百歲之後,歸于其居」,《後漢書・ 若毛於「居」無訓 「室,猶 蔡邕 居 晉 珙 爲 居 而

[「]物」,阮校本《毛詩正義》作「服」。

[「]則」,阮校本《毛詩正義》作「明」。

下忽云「室,猶居也」,不應鶻突至此。

采芩

好聽 好聽 謂「未見其果作 可見也。」及作《集傳》,則第以爲聽讒之詩, 引申生事以實之。《吕記》引朱氏 之,皆無異義。范氏《補傳》、王氏《總聞》并 不信,則詩必有年月日時、作者姓名乃可。」 事之可據,孰有如獻公聽讒者乎。 讒,觀驪姬譖殺太子及逐群公子之事, 讒焉。」案:此《序》語 《序》云:「《采苓》,刺晉 於獻 公時 簡 郝氏 獻公也。 意明,後儒 曰:「獻公 仲輿 如是猶謂 獻公 曰 : 從

徵也。』《埤雅》云: 首陽,幽辟也 苓,大苦也。 陽之巔不必有苓,其下也不必有苦,其東 采苓采苓,首陽之巔」,傳:「興 首陽,山名也。采苓,細事 細 事,喻小行也。 「苓生于隰,葑生于圃 幽 辟 喻 也。 也。 則 無

> 體惡而上體美者也。則讒人之所以嘗試其 太過,然實天下之名言也。」 謂讒言之起由君數問 讒」義尤合。故《吕記》曰:「孔疏引申毛傳, 案:諸説過於穿鑿,不如毛傳所云「細 君者,無所不用矣。」此與范氏《補傳》略 則甘苦相半,所謂『采葑采菲,無以下體』,下 行」、「幽辟無徵」,其取譬爲切,且 也不 而苦,若讒者之入人,必先甘 **乙:「苓甘此誤以苓爲甘草,故云然。** 必有 葑 則 理 可 以 小事於小人。雖求之 無 信 矣。」《 而 後苦。 辨已見 於「好 同。 爾 《邶風》。 雅 事 承珙 而 小 葑

廣曰:「蓮,一作領。聲相近,假借。」是又借記・龜策傳》:「龜千歲乃游蓮葉之上。」徐《七啟》「搴芳苓之巢龜」,皆借『苓」字。《史·《上啟》「搴芳苓之巢龜」,皆借『苓」爲「蓮」。與氏《詩小學》曰:「枚乘《七發》「蔓草

爲「蓮」也

苓爲大苦,不得言「芳」,漢人多言「芳苓」,故 游蓮葉之上」即此「苓」。「若水中之蓮,則凡 雅翼》知古字「苓」「蓮」通借,乃以《史記》「龜 以《詩》「采苓」爲「蓮」,其説與朱氏同。 苦,不得爲蓮。」承珙案:《義門讀書記》亦誤 信。」若然,豈首陽之下必無苦,首陽之東必 當爲「蓮」之假借。若《詩》自言苓,本無庸改 其説曰:『水華而采於山顛,喻人言之不足 以致朱彝尊引李注證《唐風》『苓』即『蓮』。 字,於《七啟》又曰與『蓮』同,皆不指爲假借, 龜皆可游,不足爲奇。」不知《龜策傳》又云 李善注《文選》,於《七發》直臆斷曰古『蓮』 但云『苓,香草名』,不知爲『蓮』之假借字。 常巢於芳蓮之上」,故曹植《七啟》用之。若 由六書之假借不明也。苓本大 顏師古注《漢書·楊雄 **爾** 傳》 言也,則毛意似當作「僞言」,與鄭 疏合而一之,殊誤。 爲」之「爲」,非「詐僞」之「僞」。 疏説既非 箋義述毛,云:「人之詐僞之言,有妄相稱 言』。」正義從定本,故皆作「僞言」。 然又用 喻小行,首陽幽辟喻無徵。 「采苓首陽」興人言之不可信,傳以采苓細 意,而又以箋義通爲傳義。承珙案:《詩》以 知箋云「爲人爲善言」,則鄭意「爲言」是「作 薦,欲令君進用之者,君誠 正義云:「王肅諸本作『爲言』,定本作『僞 言」如「相爲」之「爲」,以「詐僞」之義爲非。 言以稱薦之,欲使見進用也。」《釋文》云: 《白帖 『僞』字,非。」陸意因箋言「爲人」,故讀經「爲 「爲言,于僞反,或如字。 下文皆同。 本或作 「人之爲言」,箋云:「爲言,謂爲人爲善 詐僞類》引此作『僞言』。 王氏《經義 夫無徵之言必僞 亦勿得信之。」不 述

487

鄭

事

無葑乎?

領」爲「蓮」也。

《晉語》曰

義異。孔

聞》曰:

四六〇

「僞言誤衆」,是其義也。」

是畔道,無是援取,無是貪羨。」凡經言「無然」皆如是解。者,無是也。《皇矣》「無然畔援,無然歆羨」傳云:「無也。」毛意以「苟」爲决詞蓋然者,是也。 無然一 苟亦無信,苟亦無然」,傳:「苟,誠

哉。 疑,聽讒之根尚伏,幾何不復爲讒 受之,且無答然」。後儒因謂人言當舍,亦且 無遽舍之,而徐以 箋訓「苟」爲「且」,訓「然」爲「答」,謂「且無 僞言何得施其伎哉。此真止讒之法也。 以「無然」者,則直斷其無是。 言,三章「無從」者,不聽從其言。而皆繼 信」者,不信其言,次章「無與」者,不用 舍之,《陟岵》傅云:「旃,之。」此不復訓。 文》曰:「旃,之也。」誠亦無是事理也。 上言人之僞言,誠亦 故知訓「苟」爲「誠」,傳義 待其 無 審察。 可信矣。 確 如此,則人之 則是 不可易。 嚴《緝》引《釋 當舍之,當 人之所 首章「 猶 豫 中 狐 其 無

毛詩後箋卷十終

毛詩後箋卷十一

涇 胡承珙

車鄰

秦

俗,至仲入仕王朝,初備其制。故《序》下言 樂侍御 曰:「附庸雖未爵命,而自君其國,則車馬禮 大,有車馬禮樂侍御之好焉。」《虞東學詩 詩作於秦襄之世。 奎勳俱以秦仲時未必得備寺人之官,因謂 『秦仲始大』。 《序》云:「《車鄰》,美秦仲也。 所宜 有 劉瑾 也。 愚謂 、何楷、錢天錫及近日陸 而 秦 仲初溺於戎俗,及爲 保解在 西陲,因 秦仲始 仍 此 舊

> 所有。 《詩》語不類。」姜氏《廣義》因之,謂:「秦仲 作此不祥語也 府詩辭中多有之,不必疑其於頌美之詞無端 古人言樂者每及於日月易逝、壽 豈遂無一日之樂,而以爲與《詩》不類乎? 雋」,國大將興。 支離。《鄭語》史伯謂 《序》,不可訓也。」承珙案:許氏《名物鈔》又 至下二章「逝者」云云,不過及時行樂之意。 食燕樂告之,蓋勸之以養晦之意。」此説尤爲 以初造之秦當猖獗之戎,適以滋禍,故以飲 夫,蓋日與戎戰,六年而死,非可樂時也。 云"「秦仲雖嘗爲附庸之君,自宣王命爲大 大夫,得見周京聲物之盛,效而爲之,亦情 諸家泥 於 即其世保西陲,入仕王室, 襄公始爲諸侯,鑿空 「秦仲、齊侯,姜嬴之 命無常,樂 改 理

《稽古編》曰:「閽寺守門,古制也。欲見國「寺人之令」,傳:「寺人,内小臣也。」

高所以 後世 其 語 則 之儀,飲食燕樂之禮,所以爲美。 亦因 也。 尹 非 聖人録《車鄰》以 寺人之令。』次章乃云『既見君子』,見由寺人 夫侍 《序》但 君 人,内小臣也」,疏以爲「在内細小之臣」。 「内宮之事 者 奔走使令乃其常事,何得謂望夷之禍遂肇 陲,百事苟簡,至秦仲始大,能具傳宣命 詩旨。」承珙案:郝仲興引《月令》以奄爲 |嚴説 司馬 侍 刑餘爲周召、法律爲詩書皆始於此,故 俾 ,遂極論之,又牽合穆公學著人事,以 御僕從豈 美秦仲 專 之傳 御 翳奏事七日不得見之兆形矣」。 制 而 僕 附 也。 從罔非正人,今秦用 有 會 不 無 給使令賤役者邪。 秦事 冠《秦風》。 侍御之好,不過 《秦風》首章:『未見君子, 有不禁,此秦作法之弊,趙 過 使 以 令賤 快其議論耳。其實 役 議論 耳 見其先 雖美,然 寺人爲失。 楊用 嚴《 傳云「寺 緝 解 修 》謂 此 此 **令** 處 本 爲 因

> 於此 此 詩 也。 乎 ? 宋 明 人 經 説 往 往 借 端 發 議 不 獨

見諸 御而 「寺」或作「侍」者,自由 近。 足爲寺人傳言之證。 公果、公賁使寺人僚柤告公,昭二十五 孟張,成十七年。 不必以《周禮》官名相例。《左傳》晉有寺人 云「内小臣」者,猶《文王世子》之「内豎」耳 人,内小臣』者,非内小臣之官。」 承珙案:傳 「《巷伯》箋云:巷伯,内小臣,與寺人之官相 右正與内小臣」、《左傳》齊有寺人貂,晉有寺 「寺人,王之正内五人」、《儀禮・ 人披,明天子諸侯皆内 彼『巷伯』即是内小臣之官。 家 出,襄二十七年。 IE. 謂 義 引《周禮》「内 秦仲大夫不 齊有寺人賈舉,襄二十五年。 則大夫得有寺人,又可 齊崔杼使圉 宜 小 近 小臣 臣,奄 有 侍 寺人之非。 通 與寺 稱 上士 燕禮》「獻左 此傳言『寺 人駕,寺人 人别官。 顔 四 年。 師古 人,

|医謬正俗》謂「侍人」與「寺人」有别,亦

非也。

侣並. 泥於「並」字之誤耳 樂,或士亦與焉。」承珙案:《燕禮》「公以賓 氏《續記》謂「並坐」爲簡易相親,未有禮節之 坐」,非「並坐不横肱」之「並」。《呂記》及戴 及卿大夫皆坐乃安」。此「並坐」猶云「皆 上,士立於下。1.彼言正法耳。 秦仲君臣 坐,燕不與。』注云:『朝燕於寢,大夫坐於 云: 「《檀弓》稱工尹商陽止其御曰: 『 坐鼓瑟,君臣 樂焉。」又者,對經「既」字言之。箋云:「並 坐,以供鼓瑟之事,非君臣並坐。」此皆 何氏《古義》又云:「是伶工之輩與其儕 既見君子,並坐鼓瑟」,傳:「又見其 以 閒 暇 燕飲相安樂也。」正 朝不 安 義 禮

《序》云:「《駟驖》,美襄公也。始命,有

之事。《序》一 氏《禮書》云:「《春秋傳》曰:『惟君用鮮,衆 大夫所有。 夫、士不與焉。 給而已。」是天子、諸侯有四時田 爲諸侯始於襄,故此篇稱『公』。」承珙案:陳 田狩之事、園 有所受之矣。 止之。」然則前篇但言車馬、禮樂、侍御,衹 「秦之爲大夫,始於仲,故上篇稱『君子』,其 此篇盛 **囿之樂焉。」范氏《詩瀋** 以屬秦仲,一以屬襄公,當必 故鄭豐卷將祭 稱其田 獵園面,自是諸 請 獵之禮,大 田 ,而子産 爲 侯

驪與黄亦皆馬色,而《詩》有「四 黑色。」析言之也。《月令》「孟冬駕鐵驪」注 黑曰驪。』《説文》:「驪,馬深黑色。」「驖,馬 案:傳云「驖,驪」,渾言之也。《魯頌》傳云:「純 云: 驖」,是「驖」本謂 「鐵驪色如 「駟驖孔阜」,傳:「驖,驪。 鐵。」考《爾雅 馬色,即因 以 驪」、「四黄」, 爲 釋畜》 阜、大也。」 馬名。 無 赤 如

皆作『駟』,謂有所以 言 孔 乃謂之駟。」今《詩》作「駟驖」、「駟騵」,而《干 也,故言馬四 即 旄》疏引《異義》及《公羊》隱元年疏、《説文》 驖」字下皆作「四」,不誤 四」,下一字皆馬名也。 阜」,今《詩》「四」作「駟」,段注 用 四牡」、『四騏」、『四駱」、『四 之爲 名 「,則但 是 已 間之四。 加 又《 乎駟者。 説 言『駟介』、『俴駟』, 文》引《詩 言施 乎四 駟 黄」,皆作 謂一乘 「《詩 馬 兀 者, 驖

之獸以 者,獸人獻時 之獸以供膳,傳引《獸人》所獻以證虞人奉之 氏《經義 狼』以下 冬獻狼,夏獻麋,春秋獻鹿豕群獸。]箋云: 奉是時牡者,謂 奉時辰牡」,傳:「時,是。 待射。」此合傳箋釋之,其義 述聞》謂:「虞人驅 皆《天官 節之獸以 機 虞人 人》文。 也。」正 供膳,故虞人驅時 禽以 義曰: 按,獸 辰, 時 待射,斷 己諦 『冬獻 人 所 也。 獻 無 王 節

之, 者 《騶虞》之虞 道 射。 似。 不必膠執如 發。」若泥於無冬但驅狼、夏但驅 名物」,注謂「以 也。 獲」言射禽之事,故箋以爲虞人驅禽,所 亦能取獸 日》「其祁孔有」: 「祁」當作「麎」。 獸之最大者。 冬但 伯又引後鄭注《周禮》「慎」讀爲「麎」,及《吉 「慎」。 一, 無容疑於獵 如春蒐,索取不孕者,夏苗,除 《騶虞》傳云:「虞人翼五 此「辰牡 承珙案:《周禮》「獸人掌罟田 驅 嘗 《周禮 無 狼、 非 所 此。 人何 夏 辨 但 」當作「麎牡」,與「騋牝」句 · 大司農》注: 『五 故下文曰『辰牡孔 但 非 一獻以供膳。 擇。 X 以 古人田 一獸以駁傳義 驅 搏 豝豵 驅 麋 所 當 之 時 獵 必 牡 田 理 五. 自有因 以 但下文「舍拔 之獸」。 也。 一豝,以 待 也。 歲 辰 射, 麋之理 碩」。」馬 時 爲慎。」 風人之 麎, 麋牝 獸, 害 容當 擇物 待 是 當 苗 公之 獣 辨 以 法 讀 稼 > 有 則 待 則 其 相 元 是 爲

右體 右。 者。 去車遠者,矢不能貫獸,故命媚子微左以 者,非爲中殺。 左,人不能 然後左向射之能以 射之也。」《毛詩明辨録》曰:「逐禽左者,逆 少牢》,凡牲 同。 右之意。 禽獸 解第一殺,第二、三殺,皆自左膘射之達於 耳。」承珙案: 射獸必左乃爲 俎,近於不虔。殺其左而右體俱整,仍 雖 車上射獸,亦必 公曰左之」,箋云: 以 使左當人君以射之。 騎射,奔馬可以逐獸,故有順驅 鄉 死之遲 飲》、《鄉 射 古之逐禽,射於車上,與今騎射 升鼎者皆用 其左也。 以獸逆車而來,必在車左,而 此 速爲言,但考《儀禮 中殺。 解 中 射》用 有步 左。 極 公之有 細。 蓋射必有 「左之者,從禽之左 右 右 騎合圍 若車順驅 」胖,載 體 夫周人尚右 何休《公羊傳 與與 命使 驅 俎 祭 傷 雖 潤 特性》 御 同 者亦皆 以 以 逆來, 在獸 左 而 何 迎 殺 車 惟 是 實 田 輕

不

尚

鼎

以

驅

潤

注

車右 《既夕》、《士虞》以 者,蓋獸自遠 於射矣。《車攻》正義 之。」此誤會箋語。 箋云「從禽之左射之」者 子」,皆是。正義云:「公命御者從禽之左逐 以便於射耳 射之。」亦誤。 謂當禽之左射之。 尚右之故。 虞》記云: 至天子之所」,又云「驅禽之左右以安待 可見吉禮之腊,亦用右胖。 僕掌之,虞人乘之。《吉日》傳云「驅禽 而 旋 車向左,則 「升腊左胖。」「腊」爲 但獸之來未必定在車左,設出 至驅禽待射者,即 奔突而來,公命御者旋當其左 凶禮 亦云: 若逐禽而出其左,轉不便 相背。 反吉,乃用 「凡射 射 獸,皆逐後從左廂 故「公曰 係 必 驅 中 田 左 逆之車 獸之肉 一胖。 左 左之 一,自以 ^令士 於 天 而

也。」正義云:「《夏官・大馭》及《玉藻》、《經 車,驅 輶 車 逆之車也。 鑣 傳: 置 鸞 輶 於 輕 鑣 也 契 異 箋 云 車

74

六五

解。 詩内 也。 衡者也。」與《韓 通 傳亦云:「將將,鸞鑣聲。」《異義》載《禮》戴、 也。 義》云: 及《文選 綜注《東 或異,故鄭亦不駮。 易之。」承珙案:《小雅・ 解 鸞在鑣。」以 詩》毛氏二説,謹案云「經無明文」。 蓼蕭》傳曰: 義》引《魯訓 之注皆 今考劉 鸞和 保傅》篇文與《韓 此云『鸞鐮』, 傳 ***** 「鸞和所在,舊説不 京賦》,皆 曰 : 所在,經無 思玄賦 昭 云 無明文, 『在軾 鷥 注《續漢書 ***** 鱒 内 曰:「和,設軾者 在 》舊注 傳》同。 則鸞 在 與 衡 《商 韓 衡, Œ 日 詩》説同,故鄭依用之。 且 和 同。 和 文。 在 則 和 一般周 頌 庭燎》「鸞聲將將」 • 於 在 與毛 高誘 同。 在 輿 在 《經解》注 服 烈祖》箋 鑣 軾 鑣 服志》載《白虎 軾。」又《大 或異,故 故 虔注《左傳》, 同。 注《吕覽》、薛 曰 然《考工記》 謂 也。 異於 鸞。』箋不 乘 《左傳 且. 絲鳥, 車 引《 一般周 乘 之 爲 云: 設 戴 īĒ. 韓 鸞 兩 車

> 爲在鐮日鸞之證 芑》、《烝民》、《韓奕》、《烈祖》。《烝 明。 戀。 文》時定論 以此 鐮,與《異義》 慎曰:「《詩》云『八鸞鎗 許晚年定論。」承珙又案:《輿服 又曰「輔車鸞鐮」,知非 八鑾鈴,象鸞鳥之聲,和則敬 兩 八鸞」與「四牡」 四鑣八鑾,此破鸞在衡之説,專宗毛氏,是 輪崇、 服 《説文・金部》云:「人君 馬 知鸞必 鸞若在 耳。 車 廣、 也。 《詩》辭每言『八鸞』,當謂 在鑣。」此 衡,衡惟兩馬,安得置 衡 兩存韓毛者 長, 《詩》言「八鸞」者四: 對文,明係一 参如一 疏 鎗」 衡 主 也 不 申 則 同 。」此主謂 則 也。」段注云: 乘 毛 馬二鸞,尤 常亦造《 車,四 衡 義 志》注引 馬二鸞也 之所 民》兩 其 八 馬 灣野 馬 、辨甚 容 有 説 許 足 在 惟

者,謂達其搏噬,始成之也。此皆游於北園「載獫歇驕」,箋云:「載,始也。始田犬

後世 袁 北 似 莲,載獫猲獢』,**甯得謂以** 謬妄。」惠氏《古義》曰:「《西京賦》『屬 時 謂『歇驕』非犬名,以車載犬所以歇其 不可取信。《集傳》又引韓 犬,其説始於《文選》張銑注。 乃言相土地之初 恒有,但不必更載田犬以 載 爾雅》改『歇驕』從『犬』,以合毛氏耳。 此如《定之方中》,上章既言建國之事 園 相 ,後言調習,文義 所 獫猲 事 調 連, 爲 車 習 恐 也。」《稽古編》曰 載犬,休其足力。 獢」語本在將獵之前,正與《詩》箋謂 而意不屬耳。」承珙案:《西京 脱合。 難 以 證古。 也。 後 不順。 儒謂 嚴氏《詩 : 副車 從耳。 田 夫田 「後 李氏 愈《畫記》爲 事 載犬邪。 五 儒 已畢,游 緝》引《補 畢 (《集 謂 或疑先言田 前 臣多謬 以 解》 游,事 輶 ,下章 驕 此尤 蓋文 車之 É. 于 車 賦》 説 逸。 傳》 據。 北 · 載 所

> 小 戎

始盛 也。 日》之旨也。 子宣公、成公讓國以 文公盡有豐岐之地,至德公徙於雍,德公之 牧,卒致富强。 莊襄以來,歷世不隳其志,殘 東。凡爲臣子不反戈而鬭,孰 邱、大駱之族,夫且弒幽王、虜褒姒 此不識時務者之言也。 曰:「或以秦有天下二世而亡,因歸咎此 矜其車甲,婦人能閔其君子焉。」姜氏《廣義 甲以討西戎,西戎方彊 無以爲 特規模有廣狹, 則 《序》云:「《小戎》,美襄公也。 由襄 功。 《小 公也。 襄公奄有鎬京,通大國,其子 駟 戎》即《采薇》、《六月》之義 鐵 則 蓋 ***** 及穆公,遂霸 攘 而征 王霸有異音 西戎殺 篇,即《車 外 所以安内,非威 伐不休, Щ 無是心。 秦仲 賸 西戎。 水 ·, 不可 攻》、《吉 壶 備 以 周 國 秦自 轍 耕 滅 其兵 詩 其 則 以 犬 遂

武

造邦以前也。」 周則是而秦則非。秦之失在有國以後,不在

義》日 驅」,何所用之? 句,所以 謂首章「駕我騏馵」,故王言兩 戎,駕兩馬」者,然下二章並未 周之制歟?」承珙案:《釋文》引王肅云「小 昭所據乃《司馬法》所云,《六月》詩所謂 曰:"此有司之所乘,故曰 里,故五十人爲小戎,里有司帥之。] 韋 云: 一乘,步卒七十二人,今齊五十人。]棟謂 「四牡」、曰「俴駟」,則王説非矣。 「此群臣之兵車,故曰 桑梁 七十二人爲大戎,五十人爲小戎,其 「案:《齊語》及《管子》云:『十軌爲 馭 戎後收」,傳:「小戎,兵車 兩 輈」,所 驂 也 以 若止 馭 兩 一兩馬, 服 小戎。 小 也。 馬。 戏。」惠氏 别言車名,而 則「游環脅 「游環」二 古者戎 不知首章 《埤 也。」 雅》 元 韋 箋 車 昭 古

《記》言『五分其軫間』,若獨 《六書故》首明之。 軹皆指左右 旁木加于軸,故加軫與轐爲四尺。 輿後横木,則不得言『方以象地』。 崇三尺有三寸,加軫 木,安得加 『五分其軫間,以其一爲之軸圍。』 言之。《詩》疏兼 不得言『間』矣。 曰:『輪人爲蓋,弓四尺,謂之庇軫。』又曰: 也,以象地也。1又曰:『六尺有六寸之輪,軹 道據注駁孔,非也。」阮氏《車制 收輿者。《考工記》注謂輿後横木,蓋 曰 輿下四面材謂之軫,軫謂之收。 : 「收謂之軫,戴 傳 : 轐 倭,淺。 兩旁而言,非 軸 之上 及前後 康成于軫圍既謂『輿後横 東 收, 據《考工記》:『軫之方 乎? 與轐焉,四尺 原 軫 ,則其旁可 謂 也。」《 指 且 輿 爲 輿 庇 下 興 後 軫 四四 虞 後 圖 是説,戴 一使軫 明矣。 若輿後 、庇輿、庇 且軫之兩 知 面 東 横木, 解 也。」又 據 材 學 獨 陳祥 合而 曰 詩 構 爲 則 侗 面

材,亦

有闌義,故

亦

謂之收歟?

姚 氏

姬

傳

井闌謂之收。

收有遮闌之義,軫

爲輿下

四

面

勿幕』《釋文》引陸績注云:「收,井幹也。」是

曰

「《記》云軫之方以象地,蓋軫六尺六寸。

輿下三面材持車正者,故獨以軫爲輿 元案:《史記·天官書》曰:『軫 不察『任正』、『衡任』之名,以 』則又通謂之『輿』,未免自 亦四 星 居 謂 《記》曰三分車廣,以 深四尺四寸收於軫矣,非謂軫名收也。」承 立木焉,是爲收。 寸爲輿後,其前廣 此傳明是以「軫」訓「收」,姚説似非 毛公曰:『收,軫 如軫,而 其 一爲隊,蓋 深四尺 四寸以 也。」謂 以二尺二 毛意

珙

設

趣

後横

木也。

正

爲

岐其説。

蓋

由

木』,于『加

軫與 轐

『楘,車 之繩,上下轉相縈,則是歷録者,紡車交縈之 筟車」爲 「維」。 之麻鹿。」麻鹿 章之貌。』增一『然』字,削一『有』字,文意遂 如畫卦交爻作『乂』也。《廣雅》曰:『繀車 成差異。 則歷録自爲 歷録。」王氏《稗疏》曰:「傳言『束有 『歷録』、『陸離』聲相 録也。梁輈,輈上句衡也。 五楘梁輈」,傳:「五,五 一歷録 古未聞以『歷録』狀文章者,或因 東交也。』東交者,東之互相交, 物。 ,即歷録 筟車者,紡 《集傳》云:『歷録然,文 近而附會耳。 也。 車也。 許慎 束 輈五 説『著絲 也。 《説文》: 紡 東,東有 車 歷録」, 楘, 相 於 維 歷

等。」此

亦車

兩旁爲軫之明證。

《易·

井》「收

尺有六寸,既建

而地,崇於軫

四尺,謂之二

之車而牝馬」,即《小戎》義也。」承珙案:《考

工記》又云:「車軫四尺,謂之一等。 戈柲六

收也。』『軫』『振』音義同。

《晏子春秋》『棧軫

謂之收。《中庸

》『振

河海

而

不洩』注:

『振

面

爲軫之明證。

蓋軫,所以收衆材者,故又

中,又有二星爲左右,轄車之象也。』此

爲車,主風。』《索隱》引宋均説:『軫四

歷 《説文》「束交」字仍當作「交」爲是,《韻會》引 歷録」,「録」當本作「录」。《説文》:「录,刻木录录也。」 之,又纏束以爲固,謂之歷録。 之轅,率尺所一縛」,是也。 之轣轆車。』《墨子・備高臨》篇説連弩車之 也。 徐楚金《説文繫傳 **쀟縛」,讀若《論語》「鑽燧改火」之「鑽」。** 法,亦云以磿鹿卷收。 或金或革,未詳其制。 縈,如紡車之左右交縈,務爲 ·交」作「文」,恐誤。《革部》「鞻」下云「曲 歷録」。 不 録束交也」。 而 《廣雅》本《方言》:「維 可 枘鑿,恐致脆折,故皆用束。 何文章之有邪。」承珙案:王説 以言車 此即所謂五楘。 許又云「鞪,車 之 「录录,猶歷 楘 也。 而於束之上更以 蓋皆圍繞纏束之名。 歷也。」許 輈之束 然則梁輈以 車,趙魏之間 鄭司農云「駟 軸東也」,「幣, 纏 故毛云「束 固 有 云「楘,車 ,此 五 其 之謂 革 絲交 東之 蓋 字 轅 是 有 縛 車 謂 輈

> 車衡 「文章貌」,語本孔疏,漢儒無 東謂之楘,其 上衣 義一 軸 束 耳。《集傳》以「歷 謂之鞪,衡 此 衣 解 謂之務,與 也 録 輈

則當服用 鞅 膺 文》:「鞅,頸靼也。」是靳、纓、鞅 司農注《巾車》云:「纓,謂當胸。」當胸 作「靳環」爲正。《説文》:「靳,當膺也。」 反,無取 **驂馬背上。**「驂」當作「服」。《釋名》云:「在 沈云舊本皆作『靳』。 背上,所以禦出也。 上。」以驂馬外轡貫之,以止驂之出。 也。」《釋文》:「靳環,居覲反。 云『如驂之有靳』。 壅服 也。 游環脅驅」,傳:「游環,靷環 馬之胸,故謂 馬之頸,所以 於靷也。」承珙案: 既 夕》注 據《左傳釋文》無「有」字。 云:「纓,今 脅驅,慎駕具,所以 之頸 負 靳者,言無常處,游 軛 而 靼,又謂之當膺 「靭環」當從 上繫 本又作『靷』。 馬 爲 于 也。 一 物。 鞅。」《 衡,其下 左 服馬 居 即 止人 陸 游 傳 説 當 鄭 釁 氏 在 在 背

衡,後 具。 鞁將 者廣,原不止於靷 定九年。 人,而傳云「慎駕具」, 駕,馬 之游 事 也 貫 環 制 上 蓋 之首 絶」,韋注 靷 貫 驂 有 Ē 繫 驂 在 傳 靷 馬 環者,以 環 也 王 義 於 馬 軛 又 之外出故 齊 ,游在背上。」然游 猛 云云 可 云: 軫 中。二 轡以 服 頸 曰 以 馬 以「鞁」爲「朝」。 一种 : 不 其 當 貫 「吾從子如驂之靳。」其環 之胸 脅驅 當 御馬 鞁,車 驅 游 服 驂 衡,若任 也。 但脅驅所 動 馬 馬 ";胸上 慎 朝 者,以 則駕具當指 於服 ·駕具 之脅, 之外轡, 駕 正義 以 具」者、《説 一有靳 引車 環 其 馬胸背之間 也。」《國語》「兩 以 云:「游環 内 愛慎 所 條 考駕 止 ·, 非 以 故《左 以 皮 駕 驂 禁 貫 乘 上 恐 可 中 馬 具 /轡,非 文》 其 駕 繫 馬 之内 所 混 傷 者, 傳 出 包 之 於 之 爲 駕 而 又 軓 即 約 絫 呼 \equiv 揜 日 軓

以

以

能

謂

其

靷 續 傳: 陰, 揜 軓 也。 靷 所 具

如伏 下板 正當 處 之,故左右轉戾不 後軫則有 而 空處,下垂 環。」戴 以 名揜 、軝。」阮 呼 爲 函 者,誤矣。」 引 軓 之。 前軫 揜軓 之日 朝, 兔,爲半 也。 皆揜 也。 在 軓 氏《 實 軾 如 氏《車 揜 任 鋈 軓之爲 É. 至 非 自 考 前 輿 是則 《詩》謂之陰。 軓,如約 正 ·規形 於前 程 輈 爲 白 别 板 工 垂 以 興前 氏 上 制 有 也 記 輈 金 範 物、蓋 致 以 持之,在 並 軫 《通 上。 圖 量 圖 也 、敗折。 下 容 韋 轂 物。 解 軓 此 軓 藝 與 飾 輈 曰 革 **≫** ⊟ 在 以 鋈 輈 續 亦揜之使不見,故 録 : 輈 也。 身。 直 式前 輿 揜 續 軫 全繋乎 前 續 此陰板 侯 車 圍 티 : 前 曰 式 軫則 白 或直· 起 輈 靷 陰者, 旁 尺 軝, 絫呼 前 軫 揜 處牙錯 與輿之力 金 也 下正 故漢 日 此 板直 輈 掩乎 有 命 飾 寸 故謂 輢 輿前 軓 侯 揜 箋 續 中 曰 之日 以 輈 相 起 輈 式 靷 軓 云 . 朝 亦 在 之 此 嵌 處 爲 陰 前 銜 略 式 前 韋

革不能. 也。」 是也。 引 良曰 傳不言「軸」,許云「軸」以著明之。 哀二年《左傳》,郵 也。」 於陰板之上, 靷 此 揜 較大 在旁挽 古之駕 軓 軸 面。 軓 蓋 楊倞注《荀子》引《説文》:「靷,所以引軸 揜軓之所由設與。」 承珙案: 相 謂 靷 軓在 如 則 靷 箋云「揜軓 正 我 廣 四 诼 從 其 陰下之靷 義謂「以 此之長,必須爲環以接 助之。 似 雅》: 馬 兩 不 興下 後 車 輿下,陰在 者 靷 能 則 亦非 左 將 齊 陰靷 八繋於車 而出 服 右 《詩》所 平, 在 絶,吾能 板木横側 馬 也。 亦 軾 IE. 於朝 有 夾 正 ,伏兔也。」此語 前 軾 軸 《説文》: 義謂靷以 當 陰 轅,其頸 謂『陰 垂 前,陰高於朝,是名 故《説 前,以 輿 板 止之。」正 輈 車 前 · 恐 上,所言 前 示 靷 負 1,所以 續之,故 文》以 繋於衡 非。 皮爲之,繫 啊 沅 鋈 者也。」《詩 可 軛 義 程 無 續 至「 雖誤, 兩 引 陰 靷 曰 : 衹 以 爲 是 軸 曰 其 驂 陰 映 説 有 飾

> 靷 殆 力之處, 然 有 此誤。 伏 耳。 以 兔 其 本 自 何以 若靷繫於陰板之上,陰板 在 下 軸 引 而 上 車。 出 正 於 《詩》以「陰靷 以 揜 靷 軓 繫 之前, 於 軸 連 故 故 非 挽 張 日 言者 揖 陰 致

熟不 摇 續靷之環」,又云「軜之觼以白 鋈 金沃灌 金以 而 續環,蓋即今之嵌銅事 鋈。』鋈乃白銅之名,從無沃灌之義 銷 銷」,則尤誤矣。 而 以 台 白 鍊成銅片嵌入之。 沃 不 相沾洽,其上之漫出者,施以 王氏 銅 灌 金 而 古 沃 也,本 得 《稗 矣。 靷 灌其 相黏合者哉?」承 環 《釋名》乃云: 疏 也。』《集傳》惑於其説,更云 **>** 不以 環」,又改 世豈 曰 : 爲沃 $\overline{\sim}$ 一有已 件,作者必 若以 廣 灌。 雅 劉 『鋈 成之鐵, 銅 * 珙案: 金爲飾」,説 熙「冶」 箋云「白 液 錯 傾 鑿 沃 白 鐵 也 鑢 沃 傳 可 以 銅 必必 , 則 作 字 用 但 金 謂 云 他 # 之 動 飾

毛意 靷 環。 遂以 銀 銅 者,以白金爲矛下之錞。 銅 環等似非白 塗銀之説。 「鋈」名,遂誤以 銀 "是也" 泛鋈 爲· 鐵 爲 總名爲 以 嵌 觼 白 銅 軜者,以白 金,「鋈續 ,或又以 古人質樸,未必 金,此或是白銅、白鐵,未必皆 金之柔者所宜 爲沃灌,勢不得不沿爲嵌 爲 者 金爲 鎪 即 疏泥於《爾雅》白 金 繋軸 以 塗 則 作此 白 銀 之觼。 之類 金爲 正義云「金 工 巧。 續 製之 鋈 其 但 金 錞 實

人及 曰 : 也。 虎皮爲文之證。 **轂**,長轂也。」段氏《詩 、説文》『虨,虎文彪也』,『彪,虎文也』,此皆 高 「《釋名》:『文茵,車中 許慎則云: 文茵暢轂」,傳:「文茵,虎皮也。 年乘安車,餘皆立 **爾** 雅》斥 傳不釋『茵』者,以人所 茵,車中重席。」 經小學》曰:「『虎』上 Ш 文皮謂虎豹之皮, 乘。 ·所坐也。』古者婦 竊 謂 汪氏 大 路 梧 易知 暢 越 鳳

車轂徑 轂長即 長耳。 也。 尺五寸,其圍 兵車轂長三尺二寸。 轉而鼓琴」。 法》曰:「成方一 長三尺,柏車轂長一柯,是行山之車其轂 中。」又襄二十四年《傳》: 坐具。然成二年《左傳》云:「丑父寢 至《大雅》「淺幭」,即以虎皮蒙軾,原不 虎伏軾。」則段云「虎」上有「文」字者爲是 席、大車簣、戎 有可箕踞 坐也。」承珙案:《 暢轂,長轂」者,正義云:大車轂長尺五寸 兵車轂長謂圍三尺二寸,依古筭 轂 圍 不知《考工記》明言以其長爲之圍 一尺六寸有奇,未可謂之長轂 坐臥之處,固 也 服虔曰:「轉,軫也。」是兵車 一柯有半,是古筭法 ,何得以徑度爲轂長? 車文茵,皆車 里,出長轂 續漢 或謂大車轂 書 未 • 必 張骼、輔躒 輿服志》云: 無 中之飾 乘。」即 茵 以藉之耳 長謂 徑 非 法 此 也 量 《司 「皆 於 盡 則 徑一 所 文 亦 踞 轏 馬 兵 73 爲 以 柯

尺五 度。 長 其 二 其 無此 覆考之,皆不能合。 工》云「轂當入輿下 最長之度,未 是漢儒以柯度,故知其爲三尺二寸耳。 軌外,統計 寸 以 亦當隨之而 尺六寸,兩 車人》之制,未有直言轂長三尺二寸者,乃 暢 置 五. 軸末出 ,椁其漆 其 六寸足矣。 崇,以其一爲之牙圍。 暢法。」承珙又案:《考工記》云:「六分 分,暢轂之軸 其一爲之圍。 輻 也 輪 軸 長。 注云輻外長 於轂外,以轄鈐之,是軸 可謂 離 毛 内 長 車 詩 非 而 故《記》云:「衡任 轂之菑輻,二在外,一在内, 「經無 箱各 明 勢必兩 中詘之,以爲 七寸」,程氏《通藝録 是轂限輿外,轂長 丈以 辨 五分其軫間 七寸,故 録 **※明文」。** 一尺九寸,輻内長 尝云 末各長尺許,出 外不可。 參分其牙圍 軌 車 報長。」● 至鄭 以 以 者五 之 然 約長 其 八 廣 者 注 然恐 細 分 尺 而 僅 》反 | 考 , 軸 其 則 考 於 九 爲 漆 八 六

> 定。 轂 之,而出輿外至轂末之長度不見,殆以 之軸 由之無不合轍。 程氏疑「徹 車,其軸之用 處較轂短者而 之長度故歟? 寸之一, 難長 因謂「 韋 而 則所 「經涂 衡 廣 軸 任 力 力處均視 八 謂軸之長 加長,故乘之而安。 者 均限 程氏 九軌」必爲三等之徹 尺」,鄭注不詳所 其説 軸 以 曰:「轂 也 自 徹 八尺,何 通 度但指 廣 軸 韋 以爲之度,則 長 以 則 横 尺 出 能 輿 若三等之 三寸 軸 『、恐難 安?」 廣,分别 下者言 當 隨 置 Ŧi. 概 故 彼 轂 輻 分

驂 鬣 雅》曰: 曰 以 駠。 騧 騏 驪 駠是中 騏 中,中 駠 ^ 中 淮 服也。 , 騎驪是驂」, 箋云: 駠 南 子 騧 ***** 駿,兩 驪 日 上 駟 騑 驂 故 也。」: 欲 服 馳 赤 陸氏《埤 以 騏 服 身 欲 黑

^{↑・。↑・。「}爲」下, 阮校本《周禮注疏・考工記・輪人》有「之」

非所貴 者也。 之在 即上 騏 夏,左驂 馬 雅 大 步 駟、駿用 與傳箋略同。 則此詩單名「駠」者,自以箋「赤身黑鬣」之解 承珙案: 聊」者,有「駠馬 牲。 任 其白之在足而題之以『馵』,此章則因 。』」何氏《古義》因之, 正 朔 體 |章之『騏馵』,乃《爾雅》之所 重爲主,今車猶以轅馬爲貴。 列 懸 箋本《魯頌· 蓋 叫 以其犂 ,故《淮南子》曰,旁光不升俎 牝驪,右 牝 上駟? 二名,何 此妄 題之以「駠」耳。 馬 黄。」 且 兼駠白色者,名之曰駁。 説 也。」用 駠白,駁」與「左白,馵」,《 此 1 駿牝 《列女傳》趙津女言:「湯 白 駉》傳。 得牽合爲 也 可 腹、騵」、「駠馬黄脊、騝」。 見古 《爾雅 靡; 《説文》:「駠,赤身黑毛尾。」 此 謂 附 武 人 : 羅願云:『古者駠 一此 驂 合《埤雅》之説。 王伐商,左驂 何得 釋畜》 或 至駕 謂 章 用 云服 之『騏 『駠白駁 牝 ,駠駁不 無單 特上章 車 其駠 用 以 駠 牝 伐 言 中 服 服 爾

則必用牡,未聞服可劣于驂也。

馬欲 耳。 馬僅 但二 之餘。 爲觼 子 馬 以 因此 云: 朝者,納驂内 轡者,所以 司會均入以爲軜」盧注:「軜在軾前,斂六轡 經傳皆言『六轡』,明有二轡當繫之。 内 軜 轡繋軾 承珙 也。」故疑 謂 人,則 比 也。』《大戴 正 **刺繫於軾前。**」正義 鋈 轡當 司 《詩》曰:『鋈 論 以 「以轡比 案 會之均 篇 制 偪 觼 項 前 》「三公奉 轡,繫於軾 馬 此説 於 軜 上,其 廖 者。」引《 禮 脅驅 之左右,令之隨 人,則六轡皆納于 六官,則 馬 傳: 非 以 盛 左右 有 内轡,不須 也。 軛 觼 詩 德》篇「六官以 兩 前 持 軜, 曰 : 旋 轡 轡止 朝。』王氏《 ,其繫之處以 「洪 納」楊 説 以 也 驂 文》: 聽 於六 四 以 左 内 逐人 牽 右 命於驂 馬 觼 注 軜 轡 挽 使, 軸。」《荀 而 八轡, 馬之有 意。 也 中 軜, 稗疏 爲轡 無 故 而 而 服 非 金 知 驂 箋 而

餘。 令大 必言其「餘」。不得據此 《戴》云「斂六轡之餘」,正指 軜 若車止六轡,則但云「斂六轡」足矣,何 同 軜 謂 **駿馬** 内 爲四馬六轡之證也。 轡 繫 軾 駿内二轡爲 前 者。」 盧 注

戰,「齊侯不介馬而馳」本非兵家之常,此詩 駟。」此與《管子・參患》篇「甲不堅密與俴者 云: 義之不如毛矣。 方言兵甲之備,豈反以不介爲詞? 然《清人》明言「駟介」,成二年《左傳》鞌之 同實」、「將徒人與俴者同實」二「俴」字 也。」《釋文》引《韓詩》云:「駟馬不著甲曰 「倭,淺也,謂 **俴駟孔群」,傳:「俴駟,四介馬也。」箋** 以薄金爲介之札。介,甲 可 相近。 知 韓 俴

即三隅,鋒謂棱也。「戣」「瞿」與「厹」聲亦相命》疏引鄭注:「戣、瞿,蓋今三鋒矛。」三鋒曰:「刃有三角,蓋相傳爲然也。」《書・顧「厹矛鋈錞」,傳:「厹,三隅矛也。」正義

但謂其鋒作三棱形耳。 合。《曲禮》孔疏云:「矛如鋋而三廉。」是 轉。 矛」。案:「仇」「厹」字固可通,如《國策》「厹 當《考工記》之「酋矛」,亦即《毛詩》之「厹 器》篇云:「仇矛頭有三叉,言可 「仇由」是已,而以爲頭有三叉,則與三隅 由」、《吕覽》、《韓非》、《史記》、《淮 矛也。」其下即言夷矛云云。劉意蓋 《釋名 用器》《兵器》兩言「仇矛」。 以 討 南》皆作 仇敵之 以仇 <u></u> 亦 不 矛 兵

《人部》:「儔,翳也。 也。 支, 号聲。 干也。苑,文貌。」箋云:「蒙,厖 近,然則傳訓 「蒙」與「燾」同訓「覆」。《説文》「燾」从壽聲。 翳,翳也。 畫雜羽之文於伐,故曰厖伐。」承珙案: 蒙伐有苑」,傳:「蒙,討 《周 从 書》 羽, 殿聲。」《支部》:「鼓, 从 蒙」爲「討」者,猶訓 以爲討。」此 从人,壽聲。」《羽部》: 羽 數 也。 也。 字 「蒙」爲 討,雜 伐, 相 中

雜 糅」,注云:「今文『糅』爲『縚』。」據 國中射,則 糅」,注云:「此 射》記「旌各以 燾 雜」義。 儔」「翳」等義 羽之名。 「雜」,釋「討羽」爲「雜羽」也 討 [《]易 羽者 皮樹中, 「討」與「翿」聲相近 翿 其 亦 猶言 雜 物, 可 旌 卦 以 也。」糅者 通 無物則 「燾羽」也。 傳》 翿 於「雜 旌獲, 日 蒙蒙 以 _ 雜 ,故箋申 白 白 \sim 也 羽 儀 蒙一 雜 羽 此 與 與 禮 知 而 朱 著。」 亦 翿 朱 討 君 爲 羽 羽 有 鄉

矛柄 紲 弓靴裹案:當作「置鮅弓裹」,傳寫「弓靴 記 約 説文》:「柲,欑也。」「欑,積竹杖。」蓋 又引《詩》「竹柲」。 之,因名 也 •考工》引《詩》「竹铋」,注《儀禮 ,皆積 。」正義云:「《説文》:『紲, 竹閉 竹 縨 訫 縢」,傳: 而謂之「柲」。 爲 枻。」●承 閉 儀 禮》經文作 紲。 弓檠殆亦積竹爲 珙 案: 繋 緄, 誤倒 也。 鄭 繩 • 「柲」者, 既 注 凡戈 謂 以 縢, 夕》 周 置 繩

> 是《記 欑也。 之也, 謂與《 之,故 頭。 謀,「潛師閉塗」。 者,謂竟其角。 作「柲」,其實 《傳》: 恒 閉 君 閉」爲「紲」, 秘」皆有 塗」即 殯 角 如 》所謂紲者,即 如 而 檀 欑至於上」,注云:「欑,猶菆 亦得名「柲」。 《説文》:「欑,一 楚昭 此 弛 達, 譬. 弓》「菆塗」義 , 則 「欑」義。 「攢塗」也。「攢」與「欑」同,是「閉 弓之常 王卒于城父,子閭 其 非謂 也。 如終 達者,謂長於淵幹,若達 弓 《史記·楚世家》索隱曰 不 用 以 故《毛詩》作「閉」、《儀禮 紲 《毛 弓靴也。 利 **紲然**,故 繩 傳云「閉, 於 同 非 紲 曰叢木。」《喪 詩 引 也。 弓之 》作「 鮅。 絃、 鄭注云:「 日 與子西、子期 左氏 《考工記》: 送矢。 利也。」恒 紲」者,即 閉 譬 也。」鄭意 者, 如終紲 哀 大記 其張 於簫 六 閉 紲 角 訓 年 猶

❶ 「枻」,阮校本《毛詩正義》作「紲」。

類耳。 《詩 縢 也。 則翩 弓轮 大 帶也。」段氏據《文選》注「帶」上 枻 謂 紲 枻」,注云:「枻 今人以「枻」爲「舟楫」之「楫」者,楫 **紲繫」之解,誤與此** 紲」字又作「枻」、《荀子・ 之紲。 而 輔弓弩,猶榜 同 疾,若見紲於铋。」則似以 正 尒 所 鄭 物,以其能持弓,謂之檠,以 然而反。」蓋檠者,藏弓定體之器。 角弓》正 義》云「紲爲繫名」。 用 注 縢,《 此 以約者亦謂之縢。 語 紲 説 不 又名閉,以 角弓》傳曰:「不善 「縢,束 誤 義 文 ※云: 所以 者,檠枻也,正弓弩之器 以「紲」爲 又云: 同。 輔弓弩而船 也。」是 竹爲之,故曰 絾 補 緄、《説文》云:「織 「角過 非相 然於「縢 「成」字。 紲 也。」《周 「綿 《魯頌》「朱英緑 縢 本 爲 縢」, 》「接 淵 舷 其能 紲 約物之名, 亦 輔 接則 繋 約」義複 檠 亦 亦 謂 人則 船 竹 縛弓, 巧 繩之 之榜 泥 送 舷 也。」 閉 檠、 用, 用 於 如 矢 故

> 縢 傳云 此詩之韻,首章 縢 繩 也。」 當 是 以 也 江 氏 慎 修 所 分

:

聲别: 「輈」、下七句六韻去入 叶上「驅」字,然 文》「如字讀」。 此 悉轉『續』、『玉』、『屋』、『曲』爲平以 皆轉入模,於是不得『驅』字之音。 『玉』、『屋』、『曲』皆爲平聲,尤誤。 安。 是。 『驅』、『續』、『轂』、『馵』皆 有此説。 『驅』爲一 十虞韻有一支通十八尤、十九侯, 亦當音『邱』。 顧 顧氏亦誤以『驅』字連 《古韻標準》曰:「首三句『收』、『輈』、 氏之蔽。」承珙案:「續」字自 有轉紐,意[屋]即爲[烏]之入聲,於是 《載馳》首章『驅』字祛尤 韻,下則五 舊 其引徐 不如 誤 人一去爲 以 江 通 貌 『驅』字連 氏 作 用 有 以 爲 辭 下,而 去人二叶 一韻。 屢 正 驅 反, 反 又不 而 顧 當 轉 下 一件「驅」。 段氏《音 似 韻 侯 則 郝氏敬 氏 『續』、 從 音,未 爲 已欲 知 韻 此 不 《釋 收 韻 知 爲 處 己

與『

朝』 [邑] 自爲

』、『邑』、『念』爲平聲以韻

的。

顧氏謂『中』字不

Ż

韻

韻

此方音稍轉,似陟

林切。

爲

雜

Ĕ

臨」與「躬」韻。

《古韻

標

傳》「中」「禽」韻、《恒・象傳》「深」「中」韻 也。《七月》「冲」與「陰」韻、《蕩》「諶」與「終」韻、《雲漢 「中」「驂」爲韻,「中」讀如「斟」,《易・比 證,不知此皆去入通用,古人原無四聲之別 又謂《集韻・三燭》内有「馵」字。 類》又引《詩》中「屋」「燭」二韻讀去聲者 附」、「屬」、《桑柔》之「谷」、「穀」、「垢」等爲 楚茨》之「具」、「奏」、「禄」、《角弓》之「木」、 句轉韻,「期」「之」自爲韻。此所分是 五、六、七、八句「合」、「軜」、「邑」爲 次章孔氏分首二句爲一韻。三四句 》引《東京賦》以「驅」、「燭」、「屬」爲韻 韻,末二句『期』『之』自爲 準》曰:「『中』與『驂』 ,而轉下文『合』、 舊叶諸仍反,未 『驂』,不知『合』 孔氏《詩 • 韻。 象 可 如 聲 鳳,戴勝亦爲戴鵀,仍叔亦爲任叔,皆蒸登與 韻。 用方音。 「《小戎》三章末句不入韻,説古音者以 侵鹽添關通之證。」錢氏《潛揅堂答問》 謂此以「蒸」「登」韻「侵」,如《大明》之「興」、 此平上爲韻也。 吻,猶《都人士》「我心苑結」之轉「藴結」也。 三句「群」、「錞」、「苑」爲韻,與首章同。 實,驂何能與『合』、『軜』、『邑』韻。末二句 亦兼有『歆』音。《學記》『不興其器』注云: 古曾之爲朁,興之爲廞,堋之爲穸,朋之爲 本在二十阮,而與「群」「錞」韻,則轉入十八 本分明,乃讀『念』字爲韻,誤甚。」 三章亦首 興」、「音」五字 林」、「心」爲韻、從方音偶借。 興之言歆也。』《儀禮・既夕》《士虞》二篇皆 顧 氏蔽於入聲通轉平、上、去之説,其 案:『興』字固 下七句以「膺」、「弓」、「縢」、 一韻,亦與首章略同。 以 虚 膺 切 段氏曰:「凡 爲正音,

證。

也。

均

表

末二

江氏

苑

韻、魯頌 『音』爲韻也。」承珙謂此不 『侯』、『興』與『林』『心』爲韻,此亦以『興』與 歆」,是『興』與『歆』 通。 有『聲三』之文,而 弓」、「縢」、「興」皆與「音」爲 膺」、「懲」、「承」與「綅」爲韻、《説文》「雁」从 **語」省聲,「]** 閟宫》「乘」、「縢」、「弓」、「增」、 从 注 雁聲, 云『噫興』,一 《大雅 故 獨 韻 「興」與「音」爲 》『維』、『于』、 也。 小戎》「膺」、 日 噫

兼 葭

謂 委曲 禮 霜,然後歲事 之。毛傳最簡,此首章傳云:「白 襄」,而其下乃有「用周禮」之説,自必有 毛公未見《詩序》也。 ,將無以 發明《序》意,亦足見《序》在傳前 序》云:「 固 成。 其 兼 國焉。」案:首《序》但 葭, 國家待禮,然後興。」 刺襄 趙氏文哲曰: 公也。 [露凝 未能 云「刺 |《詩 如 :所受 未 戾 用 可 此 爲 周

> 不憑虚 絶不 有傳授矣。 慕之而作,於以欺天下萬世,豈不易易? 申公詩者,謂此乃秦之君子隱於河上,秦人 如果鑿空妄説,則必依 爲賢人肥遯之作,都無確指。」試思作《序》者 氏佐、唐氏順之,或以爲朋友相念之辭,或以 於是後之説《詩》者如 序辨説》謂 相 而創 比附,以自納敗闕也。 此詩 一襄公「不用周禮」之説,與詩 不 . 詳 所謂, 朱 附詩 氏 公遷、朱氏 而 詞,若近世僞 是可知其必遠 斥《序》之鑿 (善、黄 爲

説申毛,非毛意也。 樂,言得人之道乃在禮樂之一邊。」此用 維是得人之道,乃遠在大水一邊。 『是』也。所謂是知周禮之賢人,乃在大水之 邊,假喻以言遠。」正 方,難至矣。」箋云:「伊,當作緊。 「所謂伊人,在水一方」,傳:「伊 **^** 小雅• 義云:「毛 白駒》「所謂 大水 以 爲 緊,猶 維 王 喻 所 也 伊 肅 禮 謂

爲語 篇。 非 賢人可知。 賢者有乘白 此箋破「伊」爲「繄」,轉「繄」爲「是」,雖不以 雅》「無 以 於得賢人。」是「維人」與「伊人」皆指賢人。 『是』也。 申毛 與毛異也 與此 然其 辭,然其以「人」爲「賢人」,亦所以申毛, 競維 意 IE. 所謂是乘白駒 上文傳云:「宣王之時不能 也 同 彼箋亦云:「伊,當作緊。緊,猶 駒 人」,彼箋云:「人君爲政,無彊 ,毛不復訓「伊」字,自以已見此 此「伊 而 去者。」則毛意「伊人」即 人」,毛訓「維」者、《大 而去之賢人。」蓋 用賢, 所 指

在 求 至」,是本以 濟 ,道來迎之。」案:傳言「逆 溯 水中央」,傳:「順 洄,逆禮則莫能 溯 此從定本作「求」, 洄從之,道阻 經文「道」爲道路。 流 以至也。」「溯游從之、宛 正義本作 且長」,傳:「逆流 而 涉 日 「未濟」。 禮 溯游,順禮 下文云 則 道 莫 能 順 來 而 禮 求 上 迎 以

> 《吕記》因之,以 質實,斷無以人爲理者。 之路,不得泛以「理道」言也 則遠而難 道,實不啻道來迎 彼岸爲遠,至 類,「所謂伊人」猶曰「所謂此理」。 古人文詞 難通曉,自王肅 之」,此「道」 道路漸移而 一貫,然經云「伊 ,順禮則 即 近 中 ,由一方而至中央。 指「道阻」之「道」,謂 此 誤認 央則 .人」、云「道阻」,自當爲求腎 近 詩 人耳。 而易,雖求 傳中「道」字爲「理道」, 全篇皆比,猶《鶴 較近矣。是雖 且此詩不過言逆禮 因其文義古奥,猝 道 求賢理 蓋 順 人往 此 禮 鳴》之 岸 則 一規 本 對 其

脗合。 中。 則道遠不 「襄公如水旁之人,不知所適。 溯游」二句爲順 傳箋以「溯 嚴《緝》從之,謂 歐陽《本義》乃以「伊人」指襄 能達,欲 洄」二句爲逆禮 禮則易而近,按之經文最爲 順 流 「逆流 而 下 則 則 道 欲逆流 不 則 阻 免 難 且 困 公, 而 於水 而 遠 F.

皆各 其邇 可 過 必不能: 坻爲之礙矣,又有大於坻之沚爲之礙矣。」此 或 于功利,必無見伊人之理。 在 語 在」,明是冀幸之意,而以爲不足之詞,亦於 之道無變今之俗,終於 襄公僻 伊 猶 以 此 水 氣不合。 人」非斥君之詞,且經上云「在」,下云「宛 知其未 逞肊 中 溯游不已,則登岸何從。 可 ,溯洄、溯游,皆逆也。 如何 勉强 以 處 説,以 縱 行之。 有當矣。 戴氏《續詩記》則謂 隅 可 一葦凌茫然而改途以 從」。 纽 求 勝 於功 順 於傳箋、試尋繹經文而 何氏《古義》又 流則 利 夷 狄 惟 以 在水際則 初言在水 而 在 道 將有小於沚之 已。 水中 爲 「在水一 遠 求至焉。 ,喻由 謂: 而 此 可從, 中 難 方言 無 央, 强 致 論 今

麋。」此用《爾雅》文,以「麋」爲「湄」之假借雅・巧言》「居河之麋」,傳云:「水草交謂之「在水之湄」,傳:「湄,水隒也。」《小

傳義之精如此 爲「升」義,故此以「水隒」見其高意。 傳獨以「湄」爲「水隒」者,案:《説文》: 也。 崖也。」「崖,高邊也。」下文「道 水草交」之訓 《説文》、《釋名》 ,則近於言平,故不用《爾雅· 湄 美 皆 阻 司 且 爾爾 躋」,「躋 雅 若從 「嫌, · ※ , 此

《甫 《爾雅》合。『坻』『沚』同訓,不可通,聲之誤 也。 耳,較之水湄 爲水隒,故言「且躋」。箋云:「言其難至如 坻」、「渚」亦「沚」之誤。」承珙案: 升阪。」坻爲 詩 田》箋雖 經小學》曰: 《説文》『坻,小渚也』,引《詩》『宛在 宛在水中坻」,傳:「坻,小渚也。」段氏 云坻 水 則易升矣 中 「『小渚』當作『小沚』, 爲 小 水 沚 中 ッ 對 高 上一旦 地,不過 上文「湄 躋」言之。 高於水 水中 乃 與

文》:「涘,水厓也。」「厓,山邊也。」蓋山邊、「在水之涘」,傳:「涘,厓也。」案:《説

交

相

左

喪禮交相

右

亦其義

也

此言

ゴ道

而

左

順

也。

故禮皆袒

左

清

罪乃袒右。

吉

順之意,謂

右

名》: 矣。 義,不當但謂其 道來迎之者,故此章以「沚」與「右」相 其右而名。 夫水出其右,則沚已在左。 氣有所制止 水中 阻且右」,亦謂逆禮則莫能 云「水中之沚」,然已自右而 「水出 何以 沚 則 明之? 其右 也。」然則小渚曰 言 順 取 日 禮 韻 傳云: 沚 也 而 邱。 求, 小小 乃不 以濟。下文「宛在 沚, 1沚,或 左矣,亦 渚 在 日 也, 亦因 右 沚 西 即 而 小出 承 所 此 方 在 爲 謂 雖 左

知潘詩實作『詩』也。 沈氏清瑞《韓詩故》曰:「《文選》潘安仁 叔 源《游 若仍作『沚』字,是 雁 曰 映 西 持 以 中所引作『沚』。 蘭持」,『沚』與『持』同,據 池 雁 詩》『褰裳 映蘭持』, 證之。 詩既作『持』,則注 順 與毛同, 李善注 俗本改 蘭 考第二十 **沚**」注 引《韓 詩 李 亦 中 引

作『持』矣。 此 潘安仁詩『歸 『持』作『時』,改注 詩章句》『大渚 二卷謝 河陽縣詩》曰『歸

亦迂

迴,言『右』,取其『涘』『沚』爲韻。」

承

珙

云"「右者,言其迂迴也。」正義

曰:「出

其

左

案: 此言「且右」者,疑亦有逆

傳 別

「涘」爲「厓」、「漘」爲「水隒」。《伐檀》經

[言「漘」,故「漘」亦訓「厓」,皆對別

散

通

之

是厓之别名。

《葛藟》以「涘」與「漘」分言,故

厓,高起者曰

嫌。

承珙謂「厓」乃總名,「漘」

謂

平,洒下謂

側

水邊者斗峭。」蓋平

·者 曰

堂云:「《爾

雅

*

厓

『夷上洒

下,漘」。

夷上

也。」《葛藟》傳又云:

「漘,水隒

也。」段氏

懋

水邊

皆得名「厓」。

<u>~</u>

王風

•

葛藟》傳亦云:

涘, 厓

也。」《魏

風

•

伐檀

>

傳

云:

「漘,

厓

例。

訓

則此章「涘,厓也」者,始亦指其平者歟?

道阻且右」,傳:「右,出其右

也。」箋

此傳以上章「湄」爲「水隒」,與「漘」同

不見他 校正 别有 于枝 文,不應「大渚」、「小渚」與 然果「洔」「沚」同字,則 即「沚」、《爾雅・釋文》亦云「沚」本作「持」, 珙案:沈校是也。 據今改古,並及潘詩。 渚也,音沚。]即 何 説文》:「持,水暫溢且止,未減也。」此義 不 所據,故與 其誤,世不復知《韓詩》有『诗』字矣。」承 **持之中**」,郭璞 徑 書 引《毛 「要可 詩 毛 識 此。 迥異 證 持 郭注《穆天子傳》云「持」 乎? 注: 學者罕見『持』字,但 二非即 敷 王氏《詩考》引亦未及 薛 『水岐成詩。 君 毛相反若是。 穆天子 「沚」字。 所引亦《爾 傳 薛 ***** 持,小 曰 君 雅 雖 考 飲 或 知

終南

以 地 戒勸之。」案:詩文似美非戒,而《序》言戒 ,始爲諸侯,受顯 序 **※**云: 終 南 服 》, 戒 ,大夫美之,故 襄 公 也。 作 能 是 取 詩 周

略同。 不忘其 疑而 爵禄》篇曰:「爵禄之賤也,由處之者不宜 章 謂戒襄公無忘 忘」,與《小雅 宜爲人君者。《詩》曰:「顔如渥赭,其君也哉。」」此與箋意 於壽考,而 詞,觀「其君也哉」箋云「儀貌 首二句起興語 無「宜」字,傳語何從而來。 然此等傳文似皆爲《序》而 者,蓋於頌美之中寓 「言衣服佩玉之美如此,宜其有人君之道,至 韓詩外傳》云:「故君子容色,天下儀象而望之,不假言而 四 傳云:「宜以戒 海 未定之詞」。 稱 嚴《緝》乃謂 初,戴氏《續詩記》。 頌之不忘」同,當爲 民 不忘也。」此説與《蓼蕭》正 周 略見戒意,以下則皆頌美之 蓼 賜 蕭》句 不 「其者,將然之詞。 恐 ,范氏《補傳 宜 有規戒之意 非 也。」毛雖 惟 同。 詩旨。 李氏 發,不 但傳箋止 正 後 尊 解。 ╎《集解》云: 嚴 或 儒 至「壽考不 耳 然,經 不 於此 謂 也」可見。 注《序 中 於兩 願 毛 哉者 義云 論 語 襄 文 於首 或 公 並 章

之説 宜 衣 至 也 也。」此亦足證《序》「受顯服」而「大夫美之」 止 繡裳,君子之所服 賤 也 一,黻 一,貴 其 其人,斯貴其位矣。 人,斯 衣 (繡裳。 賤其 佩玉 位 也。 矣。 鏘鏘,壽考不忘。」 愛其德,故美其服 其貴也,由 《詩》曰:『君子 虚之者 黻

西、北。 也。」《 襄。 東徹 記》言終襄之世,不能 經要義》云:「終南 峰,故班《志》注於武功下。《初學記》引《五 大壹山,古文以爲終南。」蓋大壹 。」則不專指武 疑 藍 此《詩序》與《史記 岐 漢 終南何有」,傳:「終南,周之名 周 田 歐陽《本義》較《 名山 縣 • 地 亘 莫如終南 理志》:「右扶 至 功 廣。 可 山,長安南 知。 取 影相 平 兼 ,舉終南則 岐 Ė 蓋終南 豐。 戾。 葭 以 風 序》箋,據《史 Ш 不知 李黄《 岐 山 武 也, 西起秦隴, 西 爲 可 功 之地 一名太 終南 岐之東 以 縣 Ш 集解 中 該 東 賜 岐 主 有 南

> 舉。 《穀梁子》曰:「王者無 西皆有效 言正與《詩序》相應。 興,亦未爲不可 「至止者,受命服於天子而 能攻逐戎,即 公雖 周之後,受服西 地,始爲諸侯,首舉周之名山,舍終南 曰:「天王遷洛,岐酆 記》載平王曰:「戎無道,奪我岐豐之地。 不必泥於襄 未能 終 南 遽 不 有 有 也。 必定 周 歸,道經終南 其 地之未至終南。 地 地。」故秦襄公塚中鼎 至岐 錫公。」見《通 此大夫美其 然 外,命之則成矣。」《史 既 東之地。 來。」是 有天子之命矣。 大夫 鑑前 則 君 且 朱子 因 箋 襄 編》。 將 能 公救 以 云 謂 取 何 其 起 所 唐 銘 襄

皆 學》謂 曰 : 是則條自名柚,無緣以 不 「《爾雅》:『槄, 知傳非訓 有條有梅」,傳: 毛傳「條,槄」與《爾雅》「柚 「條」爲「槄」,蓋以 山榎。』又云:『柚 「條,槄。」 稻爲條。」段氏《詩小 何 ,條」異。 「槄」爲 氏《古義 此

深 非。 雅》於「槄,山榎」下引《詩》「有條有梅」,可謂 本作「悠悠」,是其證例。 字攸聲、舀聲同音假借,《論語》「滔滔」者 條」之「條」者,自以橘柚非終南所宜耳。 文》,不誤。 之假 古字通用,且斥郭注以「柚,條」爲「橘,柚. .説文》引《詩》「右抽」作「右搯」,證「由」「舀」 槄,條」之異文,故傳知「條」即爲「槄 通毛義矣。 借字 承珙案:郭景純 也 毛以「條」爲「槄」借,必 馬 元 伯 「柚、條」之注原 日 正義引孫炎注《爾 爾 雅 柚, 知 本《説 非 條 鄭 柚 之 古 以 即

之。」案:「采色」,正義作「采衣」爲是。 文,則錦 裘,朝廷之服。」箋云:「諸侯狐 衣,其上 錦 玉 更無他服。 衣加 衣狐 藻》「錦 於狐裘之上,即是在 裘」,傳:「錦衣,采色也。 衣 以 正義引《玉藻》注,謂君 裼之」者,錦 裘,錦衣以 衣 朝禮 即 是裼 據傳 服。 裼 狐

衣 爲 雖 證。 已,於後不復服之。 謂諸侯在天子之朝廷服此服,引《曾子問》以 止 帛裹布,而謂可 晉之辨爲允。 不當引以爲證。 皮弁服白布之衣,古人不以 弁服,不知衣錦褧衣,婦人之服,非以裼裘 褧衣 」明錦 藻》注云「素錦」,已屬不合。又引《詩》「衣 之外更有上服,如皮弁祭服之等,此在經文 並未明言。 氏注《禮》之説。 衣白 人 狐裘」,終之以『黻衣繡裳』,蓋先言燕服 臆度,義或近之。 君 禮服,裼襲之説當以《五禮通考》蔡氏 「諸侯受天子之賜,歸則服之,以告廟 毛之裘,以 燕服,云:「《終南》之詩,始之以 衣復 且 至傳以 傳以 以錦裏布乎。 素 有上衣,天子狐白之上有皮 凡袒 錦 陳氏《禮書》乃以 故視朔受聘服麑裘。」此 「錦衣」爲「采衣」,而《 爲 狐裘爲 而有衣曰裼。 衣 で覆之, 朝廷之服,正 然則古人裘外 使 可 裼 狐白 謂 裼 此 裘 而 而 義 德 玉 衣 鄭

乎 ? 知。 粹白之狐,而有粹白之裘,則狐白之難 《名物疏》云:「古人之裘最重 重者也。 衣:天子諸侯 朝,君臣同服,惟卿大夫得衣之。 也哉」方言儀 繼之以祭服也。」案: 故天子以爲朝服,諸侯以 且先燕服 陳氏以爲燕服,戾矣。」 貌尊嚴,而 以 而後祭服,又何義也 錦 ,卿大夫以素,蓋禮服之 下文「顔 獨舉其 孤白。 爲賜 無服 如 渥 又别 服 丹, ? , 有 天下 其裼 得 馮氏 其 凡 是 在 可 無 理 君

所宜 日: 平如堂』,是正義本此傳當無『平』字,故下文 然。』《校勘記》云:「正義曰,定本又云『畢道 平如堂也。」箋云:「畢也、堂也,亦高大之山 云: 云『因 解 有也。 定本 有紀有堂」,傳:「紀,基也。堂,畢 ·, 堂 傳「 非 畢,終南山之道名,邊如堂之牆 畢 也。 若 道 云『平如堂』,則自道言之 此 如堂」』。」段氏《詩小學》 自 兩崖言之,故《爾 雅》 · 道

二十八里。《詩》注云:「畢,終南之道名也。」《書》云:「周 也。 字與否,一也。」《元和郡縣志》:「畢原在萬年縣西 邊之如牆,互相發明,兩無不足。 公薨,成王葬于畢。」是也。」 本作『平如堂』,正 毛云『畢道平如堂』,據其平處解經之『堂』 中間之道。 雅》『畢,堂牆』,謂『畢』爲堂之牆,『堂』爲畢 南山道名,邊如堂之牆然。 蹕」、《列女傳》作「坐不邊,立不蹕」。 誤,遂爲之遷就其説 衹釋經之『有堂』一 矣。」又箋 『基也』。正義云: 邊」雙聲。 「畢」同,是「畢」即「邊」也。 箋因傳言『畢』,故用《爾雅》解『畢』爲兩 「畢也、堂也」,段云: 《大戴禮 中間道平如堂,兩畔崖高 義 今箋唯云『畢 事者云云,是正 云『畢道如堂』,有『平』 保傅》篇注「 耳。」承珙案:「畢」 故箋以「畢」爲終 焦里堂曰:「《爾 二畢 堂本平,定 也、堂也」, 也」當作 二四二 坐不邊 義本已 如牆 與 與

用 章之事,原非十二章之「黼黻」。 是本不以此「黻衣」爲九章之「黻」。 義》曰: 衣」。《論語》「而致美乎黻冕」,「黻冕」猶言 也」,則直訓「袞」爲「黻」,是「黻衣」猶言「袞 工記》云文、章、黼、黻、繡五者,言刺繡采 承珙案:傳但引《考工記》「黑與青謂之黻」, 繡裳』猶言此有黻之衣,其繡之則在裳也。」 也」,舉其章之末者,則餘章著矣。 異其文耳。」陳氏《禮書》云,《爾雅》「袞,黻 章色, 黻皆在裳。 備 袞冕」,故鄭注云:「黻,祭服之衣也。」《詩 但引《繢人》而不言章次,可謂善於解經。 也。 謂 衣」與「繡裳」對言,必非 之繡。」正義 故《爾雅》「黼黻、彰也」,謂黼黻者 「九章盡 衣 繡 于黻,故以 云: 言黻衣者,衣大名,與繡裳 傳: 「鄭於《周禮》之注差次 黑 與 謂刺裳之「黻」。 黻 青 該之。 謂 又云「袞,黻 之黻 鄭注《考 何氏《古 『黻 Ŧi. 文 所 衣 色

> 衣,誤矣。 諸家泥於九章之次,必謂舉在裳之黻以該

黄 鳥

故曰過之。」即此可見三良之死,由于逼迫而 秦穆公要人從死,言今田横 殉,義過《黄鳥》。」劉德曰:「《黄鳥》之詩 之死歸咎穆公。《漢書 耳。《史記•蒙恬傳》曰:「昔秦穆公殺 未允。此非末减康公,自以康公之罪不 從己死,此臣 穆公以人從死,而作是詩也。」案:《左傳》以 而死,罪百里奚而 「死而棄民」專責穆公。 三良之死,國人哀之,爲之賦《黄鳥》,且以 正義云:「不刺康公而刺穆公者,是穆公命 《序》云:「《黄鳥》,哀三良也。 自殺從之,非後主之過。」此説 非其罪也。」此 《序》説皆與之合。 叙傳》:「旅 不 要 亦但以 而 有 或 ?從者, -待言 人 三良 三良 人 刺 刺刺

後」。 特」? 然,初 死,何得云「殲我」,又何必云「可贖」乎? 兮」,足見其殉有 樂從可知。 穆公則刺之,其爲穆公之要以死而非三子之 矣。今考《左傳》及《詩序》於三良則哀之,於 與梁邱據、安陵君同譏,焉得爲「百夫之 遂責三良,復言「而 學《齊詩》者,此或《齊詩》之説。楊雄《法言》 酣,言曰:『生共此樂,死共此哀。』于是 息、仲行、鍼虎許諾。 而 士多從死」,應劭注:「秦穆公與群臣 李德裕謂三良之死殉榮樂,非殉仁義, 非 東坡《和陶詩》即用此説。 願 以 况經云「殲我良人」,云「如可 身殉 甚不得已者,若果許公以 也。 不近於義,安得爲信其 及公薨,皆從死。」衡, 自 匡 是且以詩言爲慎 衡 云 秦 穆 貴 飲 奄 贖 信 酒

終,亦得其所。」箋云:「興者,喻穆公使臣從交,小貌。 黄鳥以時往來得所,❶人以壽命「交交黄鳥,止于棘」,傳:「興也。交

《詩》「緜蠻黄鳥,止于邱隅」,注云:「知鳥擇 案 : 岑蔚,安閒而止處之。」疏云:「岑謂巖險,蔚 謂草木蓊蔚。」棘與楚亦所謂草木蓊蔚者,故 故棘、桑、楚皆爲得所。 雅》傳云:「緜蠻,小鳥貌。」小鳥性宜叢木, 之至小者。 所,而不知《詩》凡「黄鳥」皆即今之黄雀,鳥 之棲,昔人所歎,以爲得所,可乎? 之,謂與出谷遷喬者異,其説然也。 死 曰:「宋劉景素在藩,有鵲 知傳箋「得所」之興爲正 鳥之失所止,興三良之不得其死也。] 承 詩》曰:「黄鳥止 刺刺 此亦誤以黄鳥爲黄鶯,故謂 其不得黄鳥 故此傳云:「交交,小貌。」《小 棘,毛鄭以爲得所。 止于棘之本意。』《 《禮記 集于 戴 氏 承 大學》引 塵上飛鳴 止棘 續 虞 蓋 夫 龜 詩 枳 以 爲 東 Ш 珙 失 黄 棘 駁 學

● 「得」下,阮校本《毛詩正義》有「其」字。

物 風 有感,亦此意也。」 相 ,得失不關于心,一 煙之上,止則隱於林木之下,形體無累 追 素 泫 然 日 : 何樂哉!」詩人覩物 岩 斯鳥 者, 游 則 參 而 于 於

悼慄。 登三良墓之人,王則以『臨穴呼天』爲三子之 三良而 復東征。 許諾自殺,且已死 秦人臨三良之壙,止宜哀不必懼。 乃穆公。毛訓『惴惴』爲『懼』,自謂 殺從死,故以『惴惴』爲秦人臨視其壙者爲之 壙,皆爲之悼慄。」焦里堂曰:「箋謂三 也。」箋云:「秦人哀傷 《左傳》言秦收其 王 臨 仲 死,故立號 然《序》稱穆公以人從死,則殺三良者 其 秦蒙毅對使臣云:『昔者秦穆公殺 宣、曹子 穴,惴惴其慄」,傳:「惴惴 建均 而臨 曰「繆」。』三子非自 良以死,君子知秦之不 此 有詩,曹以『臨 其壙,何欲 奄息之死,臨 百身以 誠是三人 三良。若 一殺,審 穴』爲 良自 視 贖 懼 其

> 序》,以《黄鳥》爲秦之殺三良, 惴慄爲他人。然於章首取興之意又云黄鳥 三良之臨穴悼慄也 止 妻子 自殺之旨不甚相合。 下箋云三良「自殺以從死」,故 棘求安,「喻 兄弟 ,皆從箋 臣之事 而 推 故不 君亦然 之耳 如從《左傳》、《詩 三,則 不得 而 承 珙 「惴惴」即 又與 不以 案 三良 臨 序 爲

晨 風

部》: 馬相如傳》注。 鴥」、《釋文》引《韓詩》。 外傳》作「鷸」,乃古字通用,如「回遹」作 鸇 鷐 鷸 也。」案:此「駅」與「鴥彼飛 如 「翰,一名鷐風。」《毛詩》作「晨」,古文 鴥彼 驚 《説文 鳧之失侣」是也。 晨,依字當 晨風」, 之類。 · 鳥 部 傳 : 故「鷸」亦訓「疾」、《海賦 「潏水」作「泬水」《漢書 「鸇,鷐風 鴥, 疾 隼」同 飛 貌。 也。」又《 晨 (韓詩 回回 風 羽 爲 司

若非 之革》云「晨風之翰」,又《豫之咸》云:「晨風 得以晨 發,如宋玉言 晨風發,送子以賤軀。』此『晨風』亦指鸇言。 稱乎?」姚氏《識名解》曰:「李陵詩:『願因 木披 疾,故云願 翔。』曹丕詩:『願爲晨風鳥,雙飛翔北 名物集覽》云:「《古詩》:『晨風 當言集彼北林,不得言『鬱』。」陳氏大章《詩 假 文翰,隨時就温。 傷 借 云朝雲夜雨。 鳥名之證 靡,故曰『鬱彼北林』。 若晨 鸇,何以言『鳥』言『翼』,何以 耳。 風 促。』又:『亮無晨 爲 戴侗《六書故》云:「晨風 因 朝風 二鯤 晨風之發託賤軀以 款,言風之刊也。 也。」承珙案:《易林・小畜 魚朝發』之『發』。 雄雌相和,不憂危殆。」亦 風 翼,焉 相隨 懷苦心,蟋 風爲鸇 以 與 風 朝 能 蟋蟀並 八八而 鸇 耳,不 風 飛急 凌 林。」 也 風 則 林

「鬱彼北林」,傳:「鬱,積也。」案:鄭司

毛作「鬱」者,正字。三家作「宛」,借字耳。自覆也。」「鬱,木叢生者。」古「宛」「鬱」字通。「宛」,未知於三家何屬。《説文》:「宛,屈艸外傳》及《説苑》引《詩》仍作「鬱」。 此作外傳》及《説苑》引《詩》仍作「鬱」。 此作是注《周禮・函人》,「惌」讀爲「宛彼北林」之

子 箋釋經「忘」字,本與傳異,正義强 毛,殊失毛旨。 之業」,乃作詩大旨,非即指詩中「忘」字也 於《序》文「忘」字之故。 多」,則謂「假穆公之意責康公之忘己」,此 箋以「憂心」爲思賢,與傳同。 者而言,「思」謂穆公思之,「忘」謂康公忘之。 心中欽欽然。」「如何如何,忘我實多」,傳: 「今則忘之矣。」傳文兩「之」字相承,明指賢 擊於中山,三年莫往來。 「未見君子,憂心欽欽」,傳:「思望之, 《韓詩 外傳》云: 其實《序》言「忘穆公 趙倉 魏 唐爲 至「忘我實 文 以鄭説 大子使 封 泥 沭

《吕記》、嚴《緝》皆從毛義,是也 子講德論》云:「太子擊誦《晨風》,文侯論其指意。」 若 箋説,以爲子之忘父,而乃誦之以諷文侯之 此詩爲君忘其臣,故倉唐引以爲諷。王褒《四 於是文侯大悦 我實多」,此自以忘我者也。此句依《文選》注引。 唐曰:「好《黍 於文侯,文侯 忘其子,雖曰斷章,亦言之不順矣。 程《傳》、 「《晨風》謂何?」對曰「鴪彼晨風」云云至「忘 曰:「好《詩》。」文侯曰:「於《詩》何好?」倉 離》與《晨風》。」文侯曰: : 《説苑・奉使》篇略同。 中 Щ 一之君 亦 何 好 據此 乎? 必必 如 對

總由泥於櫟木與駮獸之不類耳。段氏《詩小人又據《爾雅》之「駁,赤李」,及「瓝九葉」樊隰有樹檖」皆山隰之木相配,不宜云獸。近縣有樹檖」皆山隰之木相配,不宜云獸。近然,陸《疏》以駮爲梓榆,據下章「山有苞棣,

《易林·无妄之觀》云:「三羖六牂,相 行。 名。 略同。 《詩》中言「山有」、「隰有」者,固多舉草木爲 學》日 傷賊。」《吴都賦》「驀六駁」,劉淵林注即 獸因狀得名,故《廣韻》直云「六駮,獸名。. 「禽鹿六駮,白舄朱首」,亦是狀其毛色。 云,言「六」據所見而言,恐未必然。「六」字 皆木爲疑。至傳不解「六」字,正義引王 次章乃言「紀」「堂」。不必以「苞棣」、「樹檖 當爲「犖」之聲借,「六駮」即「犖駮」,疊韻 等,不必『駮』與『櫟』不爲類也。」承珙案: 義似二文對舉,與他詩言「山 如《召南》之「林有樸樕」、「野有死鹿」,據毛 言,然風人之興亦未可盡拘。 犖駮者,言其文采。 迷入空澤,循谷直 其在兩章者、《終南》首章「條」「梅」, 案,《 鵲 巢》『旨苕』、『甓』、『旨鷊』之 北 李尤《平樂觀 經 有」、「隰 涉 其在一章者 六駮,爲 引此 隨 賦 肅 俱 爲

然歟? 豈 詩。 獸,咸以 臨 見於野, 爲兖州 政,州 得謂諸言六駮者皆以所見有六而云 亦 爲 東 刺 切經音義》九云,魏 北 史。 引 化感所致。」此皆以六駮爲獸名, 七十里甑 此 州境數有 詩。 《北史·張華原傳》: Ш 猛獸 中忽有六駮食猛 初 爲暴,自 三年,六駮 華原 再

檀」,文亦同此。」承珙案:姚説是也。 等,順言之則檖樹耳。《鶴鳴》詩『爰有樹客「赤」字,邵氏以爲連引舊注之文耳。何氏當作「羅」。《詩正義》引《爾雅》「檖,赤羅」,作:「核,羅也。」《爾雅》云:「檖,蘿。」字亦作:「核,羅也。」《爾雅》云:「檖,蘿。」字亦作:「核,羅也。」《謝文》 「濕有樹檖」,傳:「檖,赤羅也。」《説文》

無 衣

《序》云:「《無衣》,刺用兵也。秦人刺

《吕解》●、嚴《緝》皆以爲陳古刺今之作, 刺。 《前編》、何氏《古義》以爲秦莊公時,許氏《名 爲 謂 詞,所以刺康公非王法 征伐自天子出」,可見此經「王」字乃思古之 事見《史記》,亦勤王之事,皆可美而 其 君 命伐西戎,皆以敵王所愾。穆公會晉納王 有奉王命征伐者耳。不知莊公、襄公之奉王 中「王于興師」一語,以爲衰周之世,列 説》、《陸堂詩學》又以爲穆公時。 物鈔》、季氏《解頤》則以爲襄公時,惠氏《詩 申包胥賦《無衣》,似非 善讀毛傳者。 此詩自宋以來、諸家 觀「王于興師」傳云「天下有道,則禮 好 攻 戦, 亟 或謂定四年《左傳》秦哀公 用 兵, 而興 而 刺用兵者。 異 不 師。 議 與 紛 民 故蘇《傳》、 此皆泥 紜 同 然哀公 何以云 欲 或 金 焉 氏 可 無

❶ 「吕解」、《續經解》本作「吕記」。

《三百篇》豈 刺,乃王 之賦 衹 氏《 取 有下至東周百年以後者乎? 與 稗 子 疏》即 同 仇」之意,不 以爲秦哀 公時 歸 本 詩 詩 之美 夫

定以 至箋 相與 死。」正 無衣,我與女同袍』乎? 言不與民同欲。」考 死,如朋 共弊之,以興上 袍 姓同欲,則百姓樂致其死」,則此經所言 豈曰 唐風 「 豈謂子無衣乎? 一句爲興者,謂 · 繭也。 朋友 同 云: 無衣」者,言有衣也。 豈 一義 曰: 袍, 岢 曰無 「此責 友樂 興君上也。 以 Ŀ. 日 興上與百姓同欲。 「傳既 同 與百姓 無 衣,與子 康公之言也。 以「同 與百姓同欲,則百姓樂致其 衣 衣六兮」,彼文 樂有是袍,與子爲朋 袍 以 也。』」承珙案: 同欲,則百姓樂致 王肅云云,恐非毛意。 袍」興「同 此 同袍」,傳"「興 爲 興,又言『上 彼非 君豈嘗曰『女 仇耳,不 故王肅 正 無 衣 與 毛 但 此 友同 朋友 與 以 云: 同 也。 以 必 其 百 上

> 耳。 請 命 故以經證經,足知箋説之不合。 爲 重 猶 之此 亦 非 無 衣 但 以 日 袍 親

類耳。 之「讎」,《吴越春秋》引《詩》亦作「讎」,義自 之「作」,謂 可通,但與下二章「偕作」、「偕行」語意不相 意相承,軍興次第如此。 云;「行,往也。」此則結隊前行也。 傳云:「作,起也。」「作」如「田 章「同仇」,謂聯爲 此傳以「仇」爲「匹」者,蓋謂同仇即同伍。首 「怨耦曰仇。」毛鄭於詩「仇」字,義皆各異。 與子同 振 起師旅。 仇」,傳"「仇,匹也。」 軍伍。 末章「與子偕行」,傳 箋以「仇」爲「讎怨 次章「與子偕 與追胥竭作 笺 三章詞 作」, 云:

文》云:『澤,如字。毛:澤,潤澤也。鄭:褻本箋『襗』作『澤』。案:『澤』字是也。《釋「襗,褻衣近汙垢。」阮氏《校勘記》云:「小字「與子同澤」,傳:「澤,潤澤也。」箋云:

傳 異義 傳文簡質耳。 猶《釋名》云「汗衣、《詩》謂之澤,受汗澤也」, 潤澤也」,蓋本以澤爲衣名,其曰「潤澤」者, 作「澤」,不作「襗」,知宋時本尚多未誤者。 字亦改爲「襗」矣。然箋不云「澤」當爲「襗」, 是也。《釋文》所據箋本自作「澤」。 誤。」承珙案:《校勘記》謂箋字亦當作「澤」, 衣 袍襗之屬。」賈疏引《詩》「與子同襗」,則並 周禮 云易傳爲「釋」,是孔所見箋本與陸不 『澤』,箋字作『襗』也。 『襗』,乃依鄭義易字以曉人,非謂經傳字作 説文》「釋」下不引《詩》,可知許鄭皆未嘗以 澤」爲「襗」也。李黄《集解》、《吕記》、嚴《緝》引箋皆 也。 而經字則同之證。 • 玉府》注:「燕衣服者,巾絮、寢衣、 澤」之意。 説文》作「襗」,云: 箋云「澤,褻衣近 《校勘記》以爲毛鄭字同 相臺本依之改箋者, 正義云故易 絝也。 」可作 汙垢」, 傳云「澤, 正義則 É 傳 毛 同。 經 申 作 而 鄭

[澤」,與《曲禮》「共飯不澤手」之「澤」同。」
義異,亦非也。汪起潛曰:「箋云「近汙垢」,其

渭 陽

《渭陽》未,「愔便號泣。子恭亦對之欷歔」。 **僁田廬**,有司勿復請 公,康公時爲太子,贈送文公於渭之陽,念母 此皆見舅思母之意。 齊書》:楊愔幼 者,朕甚傷之。其令許侯謂馬光,封 有司奏防兄弟,悉免就 不可廢也。《後漢書 念母乎? 悠我思」一語斷之。送舅而 詩皆送舅之辭,而《序》云念母,則以經文「悠 舅氏一門,俱就國封 《序》云: 《序》每求作詩之意於言外,所以 時,其舅源子恭問 「《渭陽》,康公念母 以以 《序》下云:「穆公納文 • ,四時陵廟無助祭先后 國。 馬 慰朕渭陽之情。《北 援 臨 《傳》: : 有深長之思, 上路,詔 建 許陽侯。 讀《詩》 也。」案: 初 八 日 思 年 至 非

之不 卒,不可復見,故繼之云:「我見舅氏, 則與下二句文意不貫矣。 存焉。」正義以「不見」爲「不見文公之反國 而作是詩也。」此「念母之不見」謂母 見 也 見舅 氏 如 母 存焉 及其 即 三前 如 位 母

焚舟 開 傳》所記 或 其事而著之詩。 傳》重耳卒後七年,康始即位,無緣此 陽。』君子曰:慈母生孝子。」何氏《古義》 氏《續詩記》亦疑「即位」爲晉文復國,其説 其弟重耳入秦,秦送之晉。 曰:「孔疏以『即位』爲康公即位。 而送其舅氏也,作詩曰:『我送舅氏,曰至渭 何氏之先。 即 ,晉師不出,取王官及郊,封殽尸而還, 位 列女傳》云:「穆姬賢而 後,而 猶 相 仿佛。 康公思之耳。 姜氏《廣義》又云:「秦穆濟河 詳味《序》意,或衹謂 孔疏誤也。」承珙案: 太子罃思母之恩 如 有義。 此 則 案 : 與《 重 時 死後, 耳返 列 復述 [《]左 戴 己 女

> 宛如昨 雍之請 戰,每主晉客秦,多抑揚焉, 之意。」此論尤爲平允。 見晉伯中原,皆西秦羽翼。 思母之意。 乎良心,故説《詩》者疑其即位後,無復因 記》、嚴《緝》皆引張南軒之説,謂康公怨欲 自可 迴 之激發也。」此則斷以爲康公即位後所作,亦 遂 思母 る霸 通。 西 戎 ,而多與徒 氏劬勞,欲 日,故從此抒寫其情。 總之,令狐之役,曲 志得 惟 朱氏 意 滿 報 衞,未嘗 道 無 行曰 康 由 公即 前 非 《春秋》於秦晉交 即録《詩·渭陽 「讀《渭 此悠悠之思 當年送舅歸 其後趙盾有 位 不 在 秦晉交絶 秦。 陽 吕 害 便 量 爲 立 或

權輿

曰:「謝疊山責詩人禮貌衰而不去,而説者之舊臣與賢者,有始而無終也。」姜氏《廣義》《序》云:「《權輿》,刺康公也。 忘先君

爲。 節 鬭者平居 多失其實。 也。」承珙案:姜説是 去之,乃知從前惓惓君國之意,正未忍 者,亦忠厚之意歟 因 編之入樂、聖人録之爲經乎? 休戚,諫不行、言不聽,禮意漸衰而後翻 視 試思果如其説 不忍斥言其大者,而 『彈鋏 相 如以《無衣》爲秦民强悍、樂於戰 謂 無 以《權力 魚』之類 ! 亦 且爲穆公舊臣 也。 輿》爲游 復何關勸懲,而國史 不 後儒好爲議 但 責 知 其 居 士食客之所 奉 食 與與 養 但 論 遽 之小 然决 君 指 而 絶 共

禮物大 以全詩皆説飲食之事,不得言屋宅,故知爲 肅 我厚,設禮 云:「屋, 具也。 陰 述毛,以「夏屋」爲所居之屋。 幼 於我乎夏屋渠渠」,傳:「夏,大也。」箋 達 具。 食大具 至以「夏屋」爲大俎 而 楊升菴《丹鉛録》引《禮 渠渠 以 食我,其意 猶勤勤 也。 其説 勤勤 孔疏 言君始於 記 出 然。」王 中鄭, 》「周 於元

> 薄, 合。 矣。夏、大。屋、具。既有《爾 傳 之帡幪也」,以證古人言夏屋即爲大屋。 援「房俎」、「大房」以 常日授粲,此謂 得毛旨。 説雖辨,然不敢信。 依》作「蘧蘧」。《法言》「震 駰《七依》「夏屋渠渠」、此據正義。《文選》注引《七 若覆夏屋者」、《楚辭・大招》「夏屋廣大」、崔 正》皆用之。何氏《古義》則 人房俎」、《魯頌 無 雖禮食不足爲大烹,至常 餘」,下章繼之以「不飽」,謂 猶《頌》之「大房」。 自以屋室常語,不煩故訓。 蓋「大具」對下章「每食四簋」言之,彼謂 惟鄭箋「大具」之訓,似於經 、》「籩 有 時盛設。 爲證 承珙案"毛於「屋」字 豆 惠氏《詩説》、戴氏《考 風 大房」,以《風》之「夏 也 凌 歷引《檀弓》「見 雨,然後 故上章繼之以 食 雅 則 王 待賢之意 》正訓,不 鮮 一肅 知夏 所 可 以 文 述 飽 再 無 屋

於我乎每食四簋」,傳:「四簋,黍、稷、

之例。 器物 即 禮賢者及諸 盛,則陳八簋 朔月「四簋」注云「日食稻粱各一簋 禮分簋爲黍稷器、簠爲稻粱器,此對文則别 官・ 簋」,箋但云「陳其黍稷」,不及稻粱,蓋 月大牢當六簋,黍、稷、稻、粱、麥、苽各一簋 故稻粱在簠。 之禮,是主國之君與聘客禮,食,備設器物, 稻有粱,知此四簋之内兼有稻粱。公食大夫 稻 云:「以諸侯朔月少牢四簋推之,則天子朔 《伐木》『八簋』,皆以天子、諸侯朔月之盛食, 四 引此詩爲簋 簋、黍、稷、稻、粱者,以《公食大夫禮》有 不具,故稻粱在簋」。 掌客》注皆簠盛稻粱、簋盛 統言之,則簋 孔 舅也。」承珙謂《 申 更加以稻、粱。 此言『每食』,則是平常燕食, 盛稻粱之證。 毛 ,引《公食大夫禮》注 亦可盛稻粱,如《玉藻》 承珙案:鄭注二 小 馮氏《名物 此章『四簋』、 雅 黍稷,而 而已」,疏 陳 及《 一自用 饋 疏 八 云 秋

> 其《禮》 粱,亦由統舉則然耳。 器也」、「簠、黍稷圜器 毛意言簋可 注 分 别 以 之例。 該 簠 此 也」,則又以黍稷該 如《説文》「簋,黍 則 仍 傳 不易 者 鄭 稷 稻 方 知

毛詩後箋卷十一終

毛詩後箋卷十二

涇 胡承珙

宛邱

陳

舉大夫之惡以 陳是大夫之事,由君身爲此惡,化之使然,故 曰:「毛以此《序》所言是幽公之惡,經之所 推求原本者,往往有之。 公不見《詩序》。 公之惡,經《序》相符也。」承珙案:《序》刺 公,而傳以經文「子」字斥大夫,後儒因疑毛 《序》云:「《宛邱 刺君。 然詩中就事指陳,而《序》則 鄭以經之所陳即是 ×, 如此及《東門之枌》 刺 幺 公也。」正 義 幺 出出

> 所爲。 《序》異。《集傳》以「子」爲泛指游蕩之人,則 言。」《序》以爲刺幽公者,非無自矣。 知。 爲言,則係於其國,非僅一方之風 也,舜後嬀滿之所封。」則宛邱爲 城 邱在陳城南道東」、《括地志》以宛 擊鼓舞羽至于「無冬無夏」,似非閭巷細民之 正所 皆言士大夫之淫荒 中,即古陳國。 劉氏克《詩説》曰:「名詩以 謂 且《爾雅》「陳有宛邱」,《水經注》「宛 國之事繫一人之本者,未可謂傳與 考《説文》云: 而 實幽 公風 陳 化之所行 「陳,宛 陳國 邱縣 所都 土 所 之地 都 在 邱 口 可 陳

『蕩』。 子 • 『蕩』。 『《魯論》作「坦湯湯」。』是古皆以『湯』爲 義》曰:「湯,本古『蕩』字,王逸引此詩正作 天地》篇 「子之湯兮」,傳:「湯,蕩也。」 惠氏《古 古文《論語》『君子坦蕩蕩」,鄭 或音: 他 「數如洪 郎 反者,非。」 湯」、《釋文》引司 承 珙案:《莊 馬 注 本

言》: 字爲之。 謂之愓。」經典多通作「蕩」,古文或又借 徑斥爲淫蕩者辭 華嚴 惕 佚 訓「湯」。 「婬、惕,游也。 經音義》則以「像」爲「惕」古文。《方 蕩 説 此 文》:「惕,放也。」又「像,放 傳 其 《吕記》云: ĪĒ 實 氣緩急不同。」誤矣 謂 放 經借「湯」爲「蕩」,初非 江沅之間謂戲爲婬,或 蕩 之 「湯雖訓『蕩」,與 蕩 依 字 也。 湯 當 以 作

説 郭 言其 也 言中央高矣,何以 與 宛邱 高 此 璞 中 臧 。」正義曰:「《釋邱》云:『宛中,宛邱。』 故 傳 曰 右高、前高、後高 宛邱之上兮」,傳:「四 玉 李巡、孫 正 央宛宛 宛邱 林 反。 經 謂 中 案 : 義 然,是爲 炎皆云『中 雜記 變言『宛中』。 央隆峻,狀如 爾 **∀**⊟: 若此 雅》上文 四 方高、中 央下」,取 「《爾雅釋文》: 宛邱 方高、中 備 負 中央隆 明毛傳 説 · 央 下 一邱 邱 此 央下 傳 形 矣。 峻, 也 是 有 爲 曰

邵 《釋名》云:『中 高而 《爾雅 其 四 郭氏 傳同。 器也,涇上有一泉水亦是也。」亦用 也。 邱。 邱,上一邱 所止之邱,但頂上汙下耳 不了,故重曉之。 乖 反,謂 廣 宛 異 氏《爾雅正 雅 於粉 下云『邱 矣。 何,此郭氏所以不從先儒也。』案:水 方高、中央下即是上文「水潦 施 又下云「邱上有 》舊注: 藴聚隆 釋 於 施博士於阮反,讀爲宛,義與李孫合。 言 邢 反,讀爲菀,音藴 阮 中 疏 反 偃 義》又引《釋 央 上 高 『四方高、中 云: 央下 也。 一有邱 仰 宛 孫 既言邱上有邱,非中 下 也。 郭 曰宛 下同。』《元和 云 耳 , 爲 邱 謂 承 氏 宛 爲宛邱」,作者 ·, 非 中 邱 亦非言中 珙 以 山》一宛 邱」,謂有上 央下 ,與毛傳、李孫皆 央 案 有 爲 四方高、中 汙 中央高 邱 曰 臧 一中隆 也 郡縣志》載 宛 宛。」與 説 央 所 宛 舊 郭 是也 者, 以 下 央 嫌 止 説。 如 央下 於 也 證 降 偃 潦 泥 手 以 粉

邵氏 邱同。 誤。 若中 中 如 雅》「邱 城 宛 否 涇 上 (宛宛 行負 央 西 中 《説文》:「陘,絶坎。」亦謂 窓下 三 十 謂《釋名》與郭義同,亦誤 央 當 然,非 如偃 背有 隆 爲 不 有一泉水」者,「涇」或爲「陘」字之 始 里 中 峻 知 器」者,正 可謂之「中」, 號 邱 央 中 邱 何以 日 隆 爲負邱」,郭氏謂與「宛 背 央隆 隆 峻 有邱者,謂 謂之「隆中」乎? 峻之謂。 中,凡 考《漢 形容中央 如柤中、 地 晉 邱 至《釋名》「中 春 後 必 中有坎窞也。 下 涂 别 四 秋 貌。 尝云 方 有 中皆是。 又《爾 高 其 又 中 襄 邱 阻 宛 陽

珙 缶]又將爲擊缶聲乎? 如舊説以『坎』爲擊鼓聲,然則後章『坎其擊 古義》曰: 以 爲 坎其擊鼓」,傳:「坎坎,擊鼓聲。」何氏 舞節 説 文》訓 「坎,通 故 日 竷 竷 作發、《説文》『竷,舞也 爲 其擊鼓。 按,舞 舞 後章放 引《詩》「竷 必應節 此。」承 擊 鼓

> 舞邪 坎坎 聲,故傳以重文形容之。 我」無傳,自應與《陳風》同訓。 凡革木瓦石聲多相 或用三家詩,與毛異。 舞 詩 我 坎,伐 壿 ? 博舞我」,則 段 注 據 檀 韻 聲。」此 此處 會》引《說文》仍作 自應同今《詩 近,故《魏 又 毛於《伐木》「坎坎 下章「缶」爲瓦器 豈 「鼓我」,又《士部 得 》作 風 「坎」是擊鼓 以一 》傳 「鼓」爲是。 又云: 坎 鼓 此 引

文 舞 以祀星辰也。」 云: 可 云: 也。」是傳意 云「翌,舞者以 以 翳者,舞 翳, 羽部》云:「翚, 弱, 爲翳。」末章「值其鷺 值其鷺羽」,傳: 翳 舞者 也, 以「鷺 人所 羽冒覆頭上」義同。 此 所 所 與鄭 以 持 羽」即下「鷺翿」,故箋申之 以 自 以 樂 舞 「值 蔽 司 舞 指 也 之義 農注《周 麾。」 以 持 翿 羽 此 也。 承 淝 皆 古者 傳: 「翿 珙案: 禮 自 謂 《説 鷺 翳 執 鳥之羽 舞 樂師 其首 文》又 羽 《説 用 而

雖譌爲「待」,然轉刻之失耳。」顏注《漢書》以「值」爲 翳爲舞者之蔽! 葆幢。」此殆帥舞者所持以指麾之具。或謂 《王風》。 安石説,訓「值」爲 時所用,故傳以翳翿爲 作「執羽葆」,故郭注《爾雅》云:「翿,今之羽 之。」豈即鷺羽 翟 「立」,蓋疑「值」爲「植」之借字。 李《解》引王 作「翿,翳也」。 翳,舞者所持,謂羽舞也。」與此箋正互見其 周 值,持也」即同 故 然《王風》明云「執翿」,自以訓「持」爲 禮》「舞師 「措者,置也,非其義。 鄭注《周禮》引「匠人執翿」、《雜記》 簡 兩岐。 兮》: 教羽舞」鄭注:「羽,析白羽爲 ,翻爲舞者之導,然大要皆舞 毛傳所引蓋古本,不誤。 說見 毛訓。 傳訓 右 「遭遇」,謂是 《爾雅》「纛,翳也」,當本 手 「值」爲「持」,《説文》 依《韻會》所據正之。《韻 今《説文》作「值,措也」。段 秉 一。而《王風》箋云: 翟 此 百姓 用 鷺 厭苦之 羽 者 會》

正,不必更求别解也。

東門之粉

然則政乖民困之故可想矣。」《詩深》曰:「前篇刺邦君,此篇則疾卿士,《詩深》曰:「前篇刺邦君,此篇則疾卿士,原陈是也。《序》之以『疾』書者二、《萇楚》所陳是也。《序》之以『疾』書者二、《萇楚》所陳是也。《序》之以『疾』書者二、《萇楚》《序》员:「《東門之枌》,疾亂也。」許氏然則政乖民困之故可想矣。」

聚會 必全詩皆男女之自述也。 男女自賦其事。 握椒」,據箋當作「遺」。 傳》以末章「視爾」、「遺我」今《毛詩》各本作 也。」承珙案:嚴氏 是誚責之辭,非相樂之辭。 淫,非淫者自 天下後世諷誦之邪? 之作,皆淫人動於淫思,發爲淫辭,非 會聚之時,而二人自通情好,不以爲恥。 義者矣。聖人何取淫人之言著之爲經 奔』、『刺亂』、『疾亂』之説耳。 疾 其 而 如 賦 此,故 其 事 作也。 以 即 不知所云 相 其言而 此條 似兩相親愛之語,故以 味此詩『不績其麻』,正 樂,蓋不 故凡刺詩,皆作者 專指《集傳》。 爾我之以爲刺 「爾」「我」者,正由 首《序》未易盡去 如 用首《序》 此 則 蓋《集 凡 11: 而 乎 刺 「貽我 ご刺 詩 禮 爲 刺 使 詩

女,『南方之原』爲國南原野,非陳大夫原氏。歐陽氏駁毛鄭,以『子仲之子』 莫可知其爲男《讀詩質疑》曰:「此詩,毛鄭之説俱得。

復言『市也婆娑』、『原』是郊原、『市』乃市井 皆指女言,語亦 章文意俱明曉 邁」,乃道其男女之相説,贈物以 章之『婆娑』,原氏之女也。 爲合。案:首章之『婆娑』,子仲之男也。 方之原,又婆娑於國中之市,揆之情事,俱未 方之原,於理不順。又上言『南方之原』,下 粉』,次章言『南方之原』,既往東門,復往 也。又首章『婆娑其下』,次章『市也婆娑』, 女,而末章『視爾如荍,貽我握椒』又爲男女 故不得不以『子仲之子』爲女。 作原氏之女,而次章『不績其麻』絶 之女也。』蓋其意不欲以『南方之原』從 朱子因之,故《集傳》云:『子仲之子,子 相説,則於上下文之脈絡,亦未見其 在國門之外,一在國門之內,既期會於南 通達,而無錯亂複疊之病矣。 煩贅。 又首章言『東門之 末章『越以 但兩章皆言 (結好。 無 爲 所承 則三 妥帖 仲氏 毛 南 鄭

甚確 案:嚴氏 女賦詩相樂而自言『不績其麻』者也。」承珙 集 傳 亦未必然。 示 又 此 云 績其麻」,直是刺其廢業,未 條 一此 一準經文以申毛鄭,其 男 玩『子仲之子』,明是 女聚 會 而 賦 其 事 有男 他 以 説 人 相

其俗 事神以欺 粉》二詩 然歌舞于市中者。 亦云:「大姬,婦人尊貴,好祭祀,用史巫,故 夫》之 解 今多不修 言『婆娑』,正 浮侈篇》。 陳夫人好巫而民淫祀」之語,班固《地理志》 巫 何氏《古義》曰:「王符《潛夫論》案此見 鬼。」引《 更自 爲 誣 云《詩》 中饋、休其蠶 證。 細 巫 明 民、熒惑百姓」云云。此詩 陳風 覡之事,未有良家子女 鄭《譜》因之。 晰 刺 况『不績其麻』二句,《 乎。」承珙案: 不 坎其擊鼓》、《東 織而起學巫祝,鼓舞 ·績其 麻,女也 此皆推本之 自 匡 一婆娑。 作門之 衡 而 潛 有 群 所

會 論 且以子仲爲男巫、原氏爲女覡,則又因事附 巫 一風耳。 經無明文,未可據信 蓋 上 然必以 有 好 之, 此二詩即 漸 漬 或 俗 爲 巫 酣 祝事鬼之作 歌 恒 舞 爲

者 非 即 中》之姜氏、弋氏、庸氏 女,則下此者可知。 表》胡公滿後有仲牛甫、仲爾金甫,子仲氏 前。」此説非是。 氏《名物疏》云:「此詩作於幽公時,在宣公 「子仲氏,陳宣公子,即《詩》『子仲之子』。」馮 葬原仲」爲陳大夫姓原之證。《路史》注 是女。正義引莊二十七年《左傳》季友「如陳 大夫氏。 7,不得 嚮壁虚造。 其後歟? 「子仲之子」、「南方之原」,傳皆以 而 箋則申之以爲「之子」是男,「原氏 廢。 總之,傳箋於此 范氏《補傳》曰: 如《 承 邱中 珙 古人姓氏 案 ,皆其類也。」 有麻 《新 類必 》之留 「舉二氏之男 唐 幸 有憑依,斷 書 而 氏 留 • 世 於經 爲陳 云 豈 系

明。 案: 苟且 語。 也。」 日 儒 王 上 日 差 傞」,然於文義 差」音「吁嗟」,則經文「穀且于嗟」,殊不 一音嗟。 云 必 作 誤 處。」《釋文》:「旦,本亦作且。王七也反, 善明,曰 差,擇」爲是。 《韓詩》作「嗟」,或古字「差」通作「嗟」, 以 一發 徐 即爲「嗟」義。 嗟。 也。 箋云:「旦, 穀 日 爲 邈讀「且」爲「士曰既 『差于 月 日 七 意相 《韓詩》作嗟,徐七何反。沈云毛意 擇 徐子餘反。 案:毛無 何 相擇矣,以 于差,南 日。 反, 疑 擇,則是男 穀 亦殊費 明。 日 黄氏 但箋以「擇」爲「相擇」,正 一,不 改字,宜從 即 王肅直 方之原」,傳"「穀, 南 于, 曰。 差,鄭 以 解,自不如箋訓「旦, 日 子擇女」,是也 方原氏之女可以爲 · 當 爲「屢 鈔》云:「果擇吉 以「且」爲苟且, 曰『穀旦于 初 且」之「且」,讀 差,擇也。 鄭 佳 舞 反, 讀。」承 傞傞 」 之 擇也 ·差』。 後 . 成 珙 善 朝

本謂擇人,並非擇日,不煩改訓。之言「觀」,古無此訓。箋以「差」爲「相擇」,同,約以良辰而往游觀也。」承珙又案:「差」『差』之言『觀』也,與下章『穀旦于逝』詞意一

蓋以 頭。 前 義。 擇地,此説 原氏女家是也。」承珙 期,豈容人擇。 上 最上之處? 最上處,可以從之也。」承珙案: 此 列上 頭 耳。 南 竊 原氏之女居在南方,何以 正 義云: 意 方原氏之女容美藝嫻, 頭也。」疏以 此 陳氏《稽古 亦未合。 《邶風》「在前 箋「上處」亦 「南方之原氏 箋謂 爲在舞位 擇善地 編》云:「 又案:箋謂擇人,亦 是 上 謂 有美 而游,下文南 之前行而 見其 處」箋云: 可 舞 陰 以 列之 女, 晴 必 居舞列 未 國 似 爲 上頭 處上 中 可 非 「在 或 之 簺 之 預

詳。」顧氏《詩本音》亦不入韻。孔氏《詩聲《集傳》於「南方之原」下云:「無韻,未

轉。 善,又音陀。 瑳兮」《釋文》七我反。 切,未嘗 案: 王氏《詩總 裸从果,驒竈 聲如『和』。其餘偏旁尤多出入,若媻从般, 也」;《漢書音義》如 官》注曰『獻讀爲 反,《説文》引『嘽 繁氏』之『繁』步何反,漢沛 『原』字與『麻」『娑』韻 類 韻、《生民》『時 鄲」音「多」。 媛」爲韻。 **>** 曰 詩 能旁引曲 不 戈 叶 皇矣》『度 韻 史記》曲沃桓 也。」蓋已見及於此 《説 从單,皤嶓从 高祖 爲 維 聞》云:「原,今人猶呼 證。 摩 寒 姜嫄』與下『何』韻 文》「茬」,讀若 ·嘽駱馬』字作『痑』;《周 亦與下「展」、「絆」、「 原之陰 功 淳曰陳宋之俗,言『桓』 莎」之「莎」,齊語聲之誤 其 今更考得《鄘 同。 臣 鮮 原」與 侯 他如《左傳》『殷民 酇縣之『酇』才何 叔 聲,二部 表》 番之類。」 子鱓,索隱 上『阿』『池 「和」。 但 風》 僅 每 蘇 顔、 承 瑳 據 御 與 ^ 互. 水 林 音 兮 珙 靴 此 方 相

> 賦 經 元桓與戈歌通轉之證也 × 注 馬 》云「蠻」「麻」聲 融 廣 成 頌 並 相 以「鼉 近。 司 與 馬 電 相 韻 如《子 虚

明,故以 者,本謂男女促數會聚 行。 之「數」。 也,會聚之義。 又云:「鬷,總。」《中庸》作「奏 促數,爲攢凑總會之意,故《商 然上文既云「不績其麻」矣,何又以 緵,王肅之意,謂傳以「鬷」爲「緵」之假借耳 『鬷,數績 數一升而 魚麗》傳作「數罟」,知 鬷,數。邁,行也。」正 竊疑毛意訓 「穀旦于逝、越以 「總」訓 《豳風 麻之縷也。」」承 用 繩 紀之,故鬷 申之,非與毛 • 然 「鬷」爲「數」,蓋讀爲「數罟 九罭》傳「緵罟」、《 則 此 「緵」有「數」義。 義 而 鬷 傳「鬷,數。 行。 珙案: 曰 : 邁」,傳: 爲 異。 數。 一般 鄭以 頌》「鬷 假」, 布 謂 王 數 八 玉 麻縷,每 邁,行 小雅 逝, 奏 麻總而 肅 十縷爲 數者 篇 假」傳 」義難 グ猶 往

與毛異,義亦當同耳。 三家詩 後, 數 也。 从彳作「後」,必非 《詩》曰: 『越以 麻 縷可知。 後 邁。二此 其 字 或 雖 據

也。 華紫,緑色,可食,微苦』是也。 名錦葵。 氏又云:「荍 葵、蜀葵爲一,羅 蜀葵也」,自是别草,與芘芣異。 豹《古今注》以芘芣一名戎葵,一名荆葵,一 雅》、陸《疏》皆以荍 草,多華少 荍 「蜀葵。 ,故謝氏云『小草,多華少葉,葉又 故《陳 ('蚍衃」郭注:「今荆葵也。 華似五銖錢大,色粉紅,有紫紋縷之,一 視爾如荍」,傳: 然《爾雅》本 大抵似蘆菔 風》男子悦女,比之曰 葉,葉又翹起。」」承珙案:《廣 ,荆葵,蓋戎葵之類。 原《爾 爲 華,故陸氏云『似蕪菁, 有「肩,戎葵」,郭云「今 荆 「荍、芘芣也。」《爾 雅翼》駮之極是。 葵,爲郭所本。 『視爾 謝 亦其文采相 崔氏混 氏 比戎葵葉 云: 如 翹 (故), 惟崔 小 起 雅》 羅 荆

> 言如 録 氏《名物 》又以 戎葵之華 爲蕎麥,皆無稽,不足信 疏》引 濮 小 氏 而 可愛 説 以 爲紫荆、《毛 也。」此 説 近之。 辨 馮

衡 門

一海。 《鶴 之。 之。 也。」承珙案:《序》於十 人人耳情怡 鶴鳴》篇同,純 則誘之。」姜氏《廣義》曰:「此篇與《 曰:「是詩與《甫 曰 立志,故作是詩以 勸 鳴》如《易》之取 陳僖公愿 齊襄公志大 日 序》云: 此 惡、曰思、曰閔、 則 而感發興 極 $\overline{ }$ 用 淺 而 比 衡 近、 心 田》皆視其君之失 無立志,所謂 誘掖其君也。」范氏 象,詞 體 門》,誘僖 勞,所謂 極 起、《序》之所以爲『誘』 而 風 日 五國 正 致 傷 氣莊重,故《序》 意宛然言 過 三日 而 風 公 也,詩 至 不及也,詩 曰 也。 疾、曰怨、 理躍 美、曰 小 下。 而 愿 《補 然,使 雅 則 正 而 刺 傳 惟 救 抑 無

世者 云: 責、 必 且 者因僖公之謚 其上,若徒爲詩 者之詞。 待而得。」此説 首章言小國亦可以有爲,下二章言大國不可 加 而 而 皆有 作 悟其懦,無自立之志,故作詩 無 言「誘」者,獨 日 「詩人以僖公性不恣放,可 詩 立志」,實與 時世 所依據,决無 然《三百篇》之作,吟咏 日 懼 一, 雖 而 善 日 見 不 人 配 申《序》意。 詩 戒、 於 可 自 以 意脗 此篇。 以 此詩,故改爲隱居 日 盡 適,亦 益 哀、 知,然《序》所指 合。 法 日憂,其旨多矣。 《序》言僖公「愿 復 朱子謂 强 以勉進於善, 歐陽《本 何關 配 以 情性 欺 誘 天 政 序《詩》 進之。 下後 教 以 無求 義》 者 ? 風

问 云 淺 塾堂宇,此唯横木爲之,言其淺也。』《經義 陋 衡,古文『横』,假借字也。 也。」 衡 門之下」, 正 義 曰:《考工記 傳: 「衡 、門,横 門之深者 木爲門,言 玉 有 注

> 《藝文類聚》引劉禎《毛詩義問》曰:「横一木 門,乃往來之衝,安得云「可以棲 而上無屋,謂之衡門。」 「衡門」爲城門之名。 而爲門於其下,則又不得謂之横 述聞》曰: 「門之爲象,縱 承珙案: 此 而 解 不横 最 |遲||乎 明 此 門矣。」 若謂 晰。 説 非 若 因 横 城 木

引之,以爲三家異文,恐未必然 《古義》曰:「《嚴發碑》作『西 也。」漢人以音近借用。 特書碑者偶用古文「西」字耳,非必詩 棲,故因以爲「東西」之「西」。」或作『棲』,從 文》: 『西,鳥在巢上。 木妻。是『西』爲古文『棲』也。」承珙案: 棲遲」異字 西」者。 可 以 至《 棲遲」,傳: · 異義,《説文》:「徲,久也。」「侇,行平易 婁壽碑》「徲 象形。 「棲遲,游 王伯厚《詩考補遺》并 侇 衡門」,則更 遲衡門」。 日 在 息 西 也。」惠 本有 方 而 此 與 説 鳥 氏

泌之洋洋」,傳:「泌,泉水也。」案:

樂飢 《邶》「毖」字亦當作「泌」,從《説文》「駃流」之 以 泌陽縣,漢舞陰地,後魏立爲上馬縣。天寶元年改爲泌陽。 泌陽縣。 則《衡門》之「泌」非水名審矣。《寰宇記》:「唐州 又云有泌水出潕陰縣旱山,然並不引《詩 作「沘」,皆不作「泌」。 『泌』爲泉水也。」王氏《詩總聞》云泌在南 此『泌』字異義同,亦當爲泉水之流貌,非謂 也。」此云:「泌,泉水 邶 地 比水所出、《水經》亦作「比」、《吕氏 。」在邑界。」案:此係後人附會,恐未可信 有泌水經其陽,故以名之。《詩》曰:「泌之洋洋,可以 風》「毖彼泉水」傳云:「泉水始出毖然流 説見《邶風》。 今考《漢志》南陽郡有比 嚴《緝》云:「毛以彼『毖』與 酈注《水經·親 也。」二傳 陽縣 正 相 水篇 春秋》 應劭 應。 陽

洋洋 飢 箋云: 然,飢者見之,可 可以 樂飢」, 飢 者,不 傳: 飲 足 「樂飢 於食 以 樂 飢 也 可 。」《釋文》: 以 泌 樂 水之流 道 忘

經》初 也。 《詩》本有作「疒」下「樂」,以形聲言之,殊 傳》二引詩『可以 其義。藥字當從「疒」下作「尞」。』案:《説 肅所私撰 飢」,是傳中『樂道忘飢』之言非毛氏本文,乃 文》注、《唐石經》後改刻、足利古本『樂』皆作 飢』矣。 《文選》王元長《永明十一年策秀才 作『樂』,鄭本作『樂』。 文》云:『糜,治也。』療,或糜字也。 云:「小字本、相臺本經文皆作 『糜』。正義引王肅、孫毓皆云『可以樂道 『樂飢』,不云『樂』當爲『樂』,是經本作『樂. 曰:「自『案《説文》』以下,陸語也。《韓 .舊皆作「樂」字。 樂,本又作 據正義云定本作『樂飢』,知孔本作『樂 刻同 而 後加疒作 糜,毛音洛,鄭 孫 毓從之也。」阮氏《校勘記 療飢」。 逸《吕記》引《釋文》「逸」作「晚」。 瘵,用鄭義 下注 臧生鏞堂云鄭 力召反。 放此。」盧 樂』。 也。 則毛 沈云: 沈 《唐石 召 云: 弓

於訓 不 經耳 必作 誤論 傳亦 肅 皆沈所謂晚本也。 不如 舊皆 本作『樂』, 采正 但可易傳義耳,不容經字先已異也。 本作『穈』,斯不然矣。 飢」,或後改耳。 樂』讀爲 「樂」,是正義本即 得鄭箋改字之例故也。」承珙案:《校勘》 傳中『樂飢 而 沈言, 釋中改其字以顯之也。 作「樂」,以 形聲以致陸駮。 作 議 惟傳 删 『樂』者,以『樂』爲『樂』之假借, 之矣。 則作 中『樂道』字不容改,近 陸欲調停晚本,失之。《考文》古 可可 證毛氏《詩》是『樂』字,不當 《釋文》『又作』本及正 『樂』審矣。 義、《釋文》也。 以樂道忘飢」一句 陸 其 誤 沈但當如正 作『瘵』。標起止云『至 意 然陸云毛本作『樂』,鄭 不 鄭非於毛外別有本, 實 從沈 由 於 晚本乃因此 正義 而 晚 義所云,觀 不 本惑之,且 此箋不云 盧 云定本 云 鄭本亦 屬之王 文 檢 弨 義 舊 遂 改 而 樂 作 此 本 本 道 而 矣。 者。 説 是

以

泌之洋洋,可以療飢。」」此引《詩》雖: 憤忘食矣。《詩》曰:『衡門之下,可以 先王之風,有人亦樂之,無人亦樂之,亦 傳》二:子夏曰:「雖居蓬户之中,彈琴以 贊》『衡門之下,棲遲偃息。 階《郭 案:《唐風·蟋蟀》傳云「休休,樂道之心 釋•繁陽令楊君碑》『徲伲樂志』、蔡邕《焦君 玉林以 《詩》皆作「可以療飢」,或三家容有作「療」字 亦足證「樂道」之言爲毛公常語。 忘食」,皆本於此。」盧召弓説非是。 忘飢」義合。 其云「有人亦 吾 鄭據之以爲訓釋,然未必 也 有 此 友 道 ^ 列於後人據鄭箋改經字之條,當 洪 列 碑》李注、《太平御 女傳 筠 疑《外 樂,無 軒 ^ 老萊 讀 人亦 傳》引《詩》亦本 書 妻 樂」,則 叢 傳 泌之洋洋,樂以 録 輒改 覽》五十八 **※** 云: 與 (文選) (經字。 又《韓 作 毛 承珙又 作 棲遲 傳 可 蔡 臧 引 發 外 隸 伯

飢」。「療」字,後人所改耳。

東門之池

覺。 無戲 君之 傳寫之誤,或因齊姜氏牽引《有女同車》之詩 言。」此謂晉文安於齊姜氏勸之行之事,尤與 《列女傳·魯黔婁妻傳》君子謂黔婁妻爲樂 氏次仲曰:「『淑姬』非妖麗之稱,『晤歌』亦 詩大旨略同。 《邶・静女》、《齊・雞鳴》、《小雅・車 此詩賢女切化意合。 君子於善,引《詩》曰:「彼美孟姜,可 又《晉文齊姜傳》君子謂 貧行道,引《詩》曰:「彼美淑姬,可與晤 淑 浪笑傲之態。 淫昏,而思賢 序》云:「《東門之池》,刺時 姬 晤歌,以見婉轉 《集傳》以爲男女會遇之詞 池水漚麻,以喻漸漬而不 女以 「淑姬」作「孟姜」者,或 齊姜潔而 而善人。」承珙案: 配君子 不瀆,能育 也。 也。 · 牽 》諸 此 與 疾其 言。」 張 晤 與

以詞意而言,亦可見其不類矣。遇」,而經文曰「彼美」,豈是覿面之辭? 即耳。總之,皆非淫詩可知。且既云「男女會

外 已 門内有池,池水東西七十步、南北 謂『東門之池』也。」《元和郡縣志》亦云東門 池在陳州城東門内道 水至清潔而不耗竭。 池』。」承珙案:《水經・渠水注》:「陳之東 詩言『東門』,皆是城門,故以『池』爲『城 曰:「以池繫門言之,則此池近在門外。諸 非 也。 「東門之池」,傳:「池,城池 故 跡。 若毛云「城 水中有故臺處、《詩》所 南。 池」,故當在 此皆後代遷徙 八十許步, 也。」正 城 義

爲婦人之美稱。成九年《左傳》引逸《詩》孫昌盛,其家之女美者尤多,遂以『姬』『姜』『姬』者,以黄帝姓姬,炎帝姓姜,二姓之後子『姬』者,以黄帝姓姬,炎帝姓姜,二姓之後子「彼美淑姬」,正義曰:「美女而謂之

之故。 婦人 董氏反譏其無考,而謂陳女稱「姬」,以大姬 陳因元女以封,故詩人猶言『淑姬』。 云: 姬』『姜』爲 孔疏引《左傳》「姬姜」之言,最爲確據。 甚矣。 美稱也。」《吕記》引董 雖 天下豈有女子冒 有 姬 婦 姜, 人美 無 棄 稱,於書無 憔悴。」是以『姬 母 氏 姓以 曰:「周,姬姓 所考。」承 爲稱者乎? 孔氏 姜」爲 珙 以

東門之楊

案:此與《鄭》之《丰》略同。 莫須有之事,未必盡由於此。 之色。」於此云:「女留 云「刺 一端。 時 時」。 男女多 序》云:「《東門之楊》,刺 鄭箋於《丰》云:「時不送,則爲 昏姻失時,男女多違,其 違,親 迎女猶 他色,不肯時行。」此 有不 彼云「刺 毛傳於二詩皆 時 至者 也。 故 亂 異 一, 此 也。 似 昏 非 姻

至也。 至,則不親迎者可 與《坊記》同,乃 而 婚姻以有故而失時,則男女多失禮,不復能 迎而不至,語本渾融。范氏《補傳》云「當 説甚是。云非奠雁而不至,則不信《序》「親 之《綢繆》風愈下矣。故詩人述其言以刺 勢利寒盟,以他故爽約,則父母之命難憑,媒 其迎而婿待之也。此亦未即是淫女。 如古之親 迎」之説。 也。」承珙案:姜氏以不至未必即是淫女,其 妁之言莫據,弃信不顧,風俗之敗壞,視《唐》 姻之候久矣,而女不至者,非既奠雁而猶 曰:「霜降逆女,冰泮殺止。 無 「不至」云云,蓋已不信《序》之説。 此語,箋所言似未合《序》意。 納吉納徵之後,女家復有異志,不許 迎。 若毛傳,但云「期而不至」,未嘗云 今幸已有成約,而女復有異志 極 知矣。 言 其 、敝,謂 總以 時已莫春,失婚 見昏姻之禮 親 姜氏《 迎 然《序》 而 廣義 或 時 時 以 不

曰: 華」,二五皆陽: 因之,據《易 失時,正如東門之楊竟至衰落。」惠氏《詩説》 不如。」二説略同。 得陽氣之先者,言人反不及時。」 冬嫁娶之時耳。 義,非毛義也。 楊葉秋冬焉得生? 時,故云男女失時,不待秋冬也。」承珙案: 牂然 楊葉長大興 曰:「毛以爲作者以楊葉初生興昏之正時, 補傳》乃云: 「楊之發拆首於衆木,婚姻失時 , 盛貌。 東門之楊,其葉牂牂」,傳:「興也。 晚於正 言男女失時,不逮秋冬。」正義 •大過》「枯楊生稊」、「枯 「楊葉雖盛 毛意但云楊葉既 李《解》引程氏曰:「楊,最 以 只此發明興意已足,范氏 時。 楊 而云初生爲正時,乃鄭 象之,則楊 毛以秋冬爲昏之正 漸 至凋落,喻男女 盛,已非秋 所 又 以 引 則 陽 木之 比 陸 生 氏 牂 男

> 並無衰落之意,此説 終則至於枯落,故曰後時也。」今案: 也。 也。 然楊易生亦易老,始而牂牂 春氣之動 楊 最 殊可不必。 先 一發,所 以 繼 比 男先 而 肺肺 經文 于女

盛 其「仲春」之説。 合而一之。此又以牂牂爲三月中者,皆自圓 日之旦,歸妻在冰泮之前,明係 期。」承珙案:李説是也。 「據詩言『歸妻』,則實已迎女,安得以 以冰之未泮,已親迎也。」李《解》駮之云: 妻,迨冰未泮」,自謂及冰泮行請期禮耳。 婚姻之月惟在仲春。 時晚也,失仲春之月。]正 ,何得沾沾于此數日間 箋云:「楊葉牂牂,三月中也。 其葉 肺 肺 傳 然即二月,楊葉亦 : 其《邶風》云『士如 肺 加 義申 鄰 遂以爲失時 肺,猶牂 風》請 · 之 曰: 二事,鄭 興 牂 未始不 期 鄭 (者,喻 也。 爲 乎? 箋乃 以 請 歸 旭 以

案:

《易林

革之大有》:「南

山

之陽,

華

傳並 借。 近。 爲「赤羊」、「肺石」爲「赤石」,言霜降後則 故「肺肺」亦爲「盛」義。《生民》「荏菽旆 多。」茂,字又作「旆」。 象形,八聲,讀若輩。」又《艸部》:「茷,艸 炎注曰:「敦,盛也。牂,壯也。」「將」、「牂」、 枝,故曰敦牂。敦,茂也。 占經》引李巡 牂聲相近。」《詩・樛木》、《破斧》、《正月》等 記 將」,與此「東門之楊,其葉牂牂」正同。 鏘 也。」此傳「牂牂然,盛貌」,正與「壯」「大」義 '肚」並以聲近,故義同。 旆然長也。」音義亦同。 鏘 内則》注云:「將,當爲牂。」疏云:「將、 。」「陽」 云"「將,大也。」《北山》傳"「將,壯 爾雅 •釋天》:「在午曰敦牂。」《開 曰:「言萬物皆茂壯,阿 本 作 楊」,「 何氏《古義》謂 此 亦與「肺」聲相近 肺,疑爲「朮」之假 牂, 壯也。」又引孫 鏘 鏘一 本作 「牂 旆」傳: 那 羊 《禮 元 其 將

無謂。楊葉赤,以附會秋冬昏期之義,殊爲穿戰

墓門

也」,與《論語》「三已之」、《孟子》「王曰已之」 意。 蘇吕 明甚。 師 故豫告桓公,欲令早爲諭教。此詩人忠厚之 乃作於桓公之時,自以佗傅不良,恐陷於惡 其不免。 數年之間情性變易如此,則其無良 昏愚之質,及至如鄭涖 案:《序》云「無良師傅」,傳於「夫也不良」云 良師傅,以至於不義,惡加於萬民焉。」承 「夫」謂「傅相」,正依《序》説,則《序》在傳前 傅 可 觀《左傳》,佗能 則以「夫」指陳佗,不用毛義。 《序》云:「《墓門》, 知。 程蘇《詩傳》及《吕記》皆從《序》説,而 經文「知 而不已」,箋云「已,猶去 勸 盟 桓 刺 公親 而 陳 歃 佗也。 如 仁善鄰 忘,洩父知 不知此 陳 似 佗 珙 無

裹乎? 惡,無此 鰓鰓然追咎于其傅之不良,縱罪魁 也。 黜去其弟,翦手足以安子孫,恐無此 要其終而言之,非此詩作於陳佗弒 章「顛倒思予」乃詩人先見之言,逆料其必至 於此,猶云「後君 佗,則當桓公在時,陀惡並未彰著,而 (序)云「至於不義,惡 已字 若在桓公卒後 向 斷獄之法,尚得謂與《春秋》 謂 黜 退 也,正指 噬 ,則佗已身爲大逆,而尚 加 臍,他日請念」之類。 萬民」,則作《序》時, 師 傅 而言。 而 逆之後 若指 理。 遽 相 誅 勸 表 黨 末 之 陳

何以 則 如 愚謂佗何足告。 其 爲 司 馬 尚 師 黨逆矣。」承珙案:佗既 虞東學詩》曰:「詩末三句,舊主告佗, 傅 望 之 必 其 於 皆同 知 成 而 濟 范逸齋謂冀佗之悔悟,則詩 去之? 悪 耳,於佗之惡 相濟, 且 如商 即 爲弑君之賊矣, 臣 去之,亦不 能 之有潘崇, 解 免乎 過 ?

也,此 作歌 之賊、於法當誅其身、絕其祀」,則佗既弑君 予」,皆非 行,用生此荆棘」,並不指桓之墓門。 箋原未嘗誤也。 以後,説《詩》者多因《墓門》興刺 豈於弑君之賊而猶望其 已當誅絶,何以 傅之訓道,至陷於誅絶之罪」。 誅退惡師。 誤會經義,一則曰 云歌以 先君,較疏義爲勝。 在,仍用其言,必將至誅絶,再 意,止言陳佗無良師傅,以陷於惡,並 「知而不已」爲欲佗之去其惡師 用醉, 即 訊之」,訊,毛云「告也」,韓云「諫 追 謂 其 刺之語 告諫桓公耳。 殊不思箋云「陳佗 非 云仍用惡師將至 用之於佗 至「墓門」傳正云「幽 陳佗既立爲君,此 然云告佗者,乃疏誤,傳 八晚蓋 下文又云「顛倒 明 矣。 也。 由 疏既云「弑 則 也 不 誅 以 但 故蘇《傳 覩 日 M絶乎? 下章明 欲 惟 爲 賢 師 傳 未 閒 令佗 追 嘗 師 傅 孔 箋之 咎 以 思 希 君 猶 良 疏

言秦師過周北門耳。 然城門豈可 聞》已據《左傳》鄭之墓門,謂此亦是陳城門。 家詩中有 棘,有鴞萃止。」故曰繁鳥萃棘也。』據王注 肆其情欲。婦人則引《詩》刺之曰:「墓門有 吴過陳之墓門,見婦人負其子,欲與之淫泆, 扶其大子偃師奔墓,賈獲與其妻扶其母以奔 之所。《左傳》襄二十五年: 鳥萃棘,負子肆情』,王注曰:『言解居父聘 墓門之瀆人」,杜注曰: 氏《經義述 之道,爲淫泆戎狄之行。」是亦以墓門爲 唇微遵跡,有狄不甯」,王注云:「人循闇微 墓門」蓋亦陳之城門。《楚辭・天問》『何繁 過陳之墓門」,則墓門爲陳之城門可知,猶 .此説 聞》云:「襄三十年《左傳》『晨 有 行淫泆之地? 棘」, 也。」承珙案: 王氏質《詩總 傳: 王注本《列女傳》,蓋 墓門,墓道 『墓門,鄭 况《天問》上文云 鄭師 入陳,陳侯 城 之門。」 門。」此 幽 僻 \equiv 云 自 王

故傳以爲「幽閒希行」也。墓。蓋冢間可以避兵。此「墓門」亦即其地,

「昔」爲「夕」,則既言夕,又言夜,於文贅矣。 弓》「疇昔之夜」,不過 然,乃感慨之詞,非指桓公之時爲昔。 然矣」者,謂蔽 以爲追刺先君者,皆泥於此語。 不誅退,終致禍難,自古昔之時常然。」諸 者,古也。故箋云:「國人皆知其有罪惡 之夜」,注云:「疇,發聲也。 也。」用《爾雅》文。 同。」承珙案: 注《爾雅》以「誰」爲發語辭,即本鄭注。 何日也。《記》云『疇昔之夜』,『疇』『誰』正 曰:「夕,誤作『久』。誰夕,猶今人言不記 「昔」爲「前」者,與此傳訓「昔」爲「久」同。 誰 昔然矣」,傳:「昔,久 此説 於聰 《 禮 記 • 非是。 明而 謂 忽於禍 前日之夜。 箋云:「誰昔, 檀弓》曰「子疇 昔,猶前 也。」 亂,自昔皆 不知「誰 段 也 至《檀 若訓 鄭 懋 昔 昔 訓 郭 儒 而 是

必在於夕乎?對。若必以「昔」爲「夕」,安見華元殺羊食士以「昔」爲「前日」,正與下文「今日之事」相以「昔」爲「前日」,正與下文「今日之事」相宜二年《左傳》「疇昔之羊,子爲政」,杜注亦

也,所 《詩》,則梟者、《旄邱》之『流離』也,所謂少美 区。 記》補。 鴟鴞、鸋鴂,梟云不孝鳥,是物異也。 得聲,『梟』從鳥頭 長醜、食母而飛者也。鴞者,《墓門》之『鴞』 羹臛,又可爲炙。」」陳氏《稽古編》曰:「『梟』 俗説以爲鴞即 義曰:「鴞,一名鵬,與梟異。 梟,二字從《校勘 ·鴞大如班鳩,緑色,惡聲之鳥也。人人家, ·鴞』字異,物亦異。《説文》『鴞』从号胡到切。 賈誼所賦「鵬鳥」是也。 其肉甚美,可爲 謂惡 有鴞萃止」,傳:「鴞,惡聲之鳥也。」正 一名鴟,《瞻卬》云『爲梟爲鴟』是也。 聲之鳥,『如班鳩,緑色』者也。 土梟,非也。 在木上,是字異也。 陸璣《疏》云: 其 在 鴞云

《魯頌》之「飛鴞」,皆爲惡聲之鳥。《豳風》傳 《豳風》之『鴟鴞』、《瞻卬》之『鴟』、《泮水》之 《爾雅》之『鸋鴂』,郭注既不從『巧婦」之説, 班鳩,緑色。」《莊子·天地》篇云「鳩鴞之在 言「鴟鴞」,皆一物也。 異。説見《豳風》。 『飛鴞」,即《爾雅》之『鸋鴂』也。」承珙案:此 於籠」、《太平御覽》引《廣志》云「鴞,楚鳩 也。」是鴟鴞可單稱鴞,即《陳風》之「有鴞」、 爲鴟類,不誤。《説文》:「鴞,鴟鴞,鸋 鷅」乃凡鳥少美長醜者之通名,《詩》之「流 説分析梟、鴞之異,語甚簡當。 之《詩》,則『流離』及《瞻卬》之『梟』,即《爾 以鴟鴞爲鸋鴂,亦係惡鳥,與巧婦名同 離」不當爲梟。說見《旄邱》。若鸋鴂,則郭注以 雅》之『梟鴟』、『鶹鷅』也。 而以爲鴟類,當即此禽矣。 《詩》或言「鴟」,或言「鴞」,或 陸《疏》云:「鴞大如 《墓門》之『鴞』、 今據《爾雅》以合 惟《爾雅》「鶹 而 所 鴂 實

以鴞鵬 賦[鵬鳥]也 人命鴞曰服。」故陸以爲惡聲之鳥即賈誼所 炙」,故陸云「其肉甚美」。 「夭鳥」注云:「惡鳴之鳥,若鴞鵬。」 賈疏 鴞 鵠鴞胖」、《莊子·齊物論》「見彈 似鳩 此 爲二鳥,然《史記 鴞 而青色」,亦與 大 如鳩之證。 陸説合。 賈生傳》云:「楚 郭璞《西 《周禮 [《]内 Ш 硩蔟氏 經 而 則》 求 注 鴞 雖 云 云

字通用,歷引《詩 氏《古韻標準》、戴氏《詩考正》、錢氏《養 信。徐息悴反。』《廣韻・六至》引《詩》「歌以 録》、段氏《詩小學》皆據此以「訊」爲「誶」之 醉止」,王逸注《離騷》引《詩》「誶子不顧」,江 誶 莊 子》、《文選》、《 顧氏《詩本音》則謂古人以「訊」「誶」二 作訊」,又《荀子》「行遠疾速,而不可託 歌以訊之」、《釋文》:「訊,又作 ・皇矣》、《禮記 後漢書》等「訊 樂記》及 一作辞」、 :醉,音 新

者,或義爲醉告 醉爾以吉象兮」、《文選》「誶」作「訊」:「凡 《學記》「多其訊」鄭注曰「訊,或爲訾」,訊字 通用『誶』,未必 「一本作『誶』」,《漢書·叙傳》《幽 「訊」;《楚辭・ 屈 誼傳》「立而誶語」,《賈子・時變篇》「誶」作 引《廣雅》「誶」作「訊」,《史記・賈生傳》、弔 引《廣雅》曰「誶,問也」、《文選・西征賦》注 子·徐無鬼篇》「察士無凌誶之事」,《釋文》 古讀若醉,聲與訾相近,故通。 訊 本之,謂「『訊」『誶』同聲,故二字互通」。 玄賦》「訊」與「内」、「對」爲韻,左思《魏都 乃訊申胥」、《説文》引作「誶 ·訊」與「匱」、「粹」等爲韻。 王氏《經義 原賦》「訊曰」、《漢書》「訊」作「誶」,又《賈 與 「偪」、「塞」、「忌」、「置」 九歎》「訊九魁與六神」,王注 而 盡 通 爲譌字。 用「訊」,或義 《續列 爲 又引《吴語 申胥」; 韻 爲 女傳 通賦》「既 張 訊 述 衡 問 《 莊 聞 《思 賦 此 引 而

説。 進切 此 或从肉宰作「膟」,是囟有「宰」聲。 爲一音之轉,非字誤。」今又考得《説文》「囟」 囟,引而下行讀若退。』可證『訊』得讀『誶』, 詩證讀》曰: 鑑》引《詩》「誶止」爲證。 未必盡由草書偏旁卆斗相似之誤。戚氏《毛 不始於陸也。 文》亦載徐息悴反,是徐邈已讀「訊」如「誶」, 在詩本有作「誶」者,或即爲「誶」字作音。 若 一部」「逆」者,似从刊之字本可讀若「卒」音, 、小雅》「莫肯用訊」,並無一本作「誶」,而《釋 墓門》之詩正 訊」當爲「辞」,始於《詩 引 亦 而 梁簡文云「作好歌以訊之」,當即用此詩,亦作「訊」不 可爲「訊」「誶」聲通之例。 然如《墓門》、《釋文》引徐邈息悴反,此 「囪」、「恖」、「囪」、「紁」皆从囟得聲, 「《説文》:『一, 古人於「訊」「迅」等字每 作『歌 以 訊 總聞》,據《龍龕 江氏、戴氏始暢 止』。」承珙案: 引而上行讀若 成伯 且囟,息 璵《毛 書作 詩指 謂 其 手

作「誶」。

防有鹊巢

惕惕, 此 《陸堂詩學》曰:「宣公之殺太子,其 取其無間 淫慝乎?」黄氏元吉曰:「男女有私,聖人何 所與私,而定爲男女有私,憂或間之之詞 記》宣公嬖姬生子欺,欲立之,而殺其太子禦 能悉其顛末,賴 急子、晉申生無異。 惜乎,陳國文獻無徵,莫 此爲宣公信讒之證。《集傳》乃以「予美」指 寇,禦寇素愛公子完,完懼及禍 公多信讒,君子憂懼焉。」王氏《總聞》據《 韓詩》以爲説人,故曰愛也。」《集傳》蓋據 詩 乎?」承珙案:《爾雅 《序》云: 愛也。」郭注:「《詩》云『心焉 而於《鄭》録《揚之水》、於《陳》又録 《防有 此一詩猶存,豈可指忠良 鵲 巢》,憂讒 釋訓 ,乃奔齊,以 》: 「低低 賊 事與 惕惕」。 也。 衛 爲 中 官

云然。 之離間。 此, 必定屬男女也 又曰「説賢不能舉」,是君臣亦可言「説」,不 讒之意。 云:「惕惕,猶忉忉 忉 疑 忉,憂勞也。」此 爲男女之詞 説其人,故憂其被讒,然不必爲男女 《孟子》云「爲我作君臣相説之樂」, 《韓詩》以 也。」此 爲説 治詩 「忉 《毛 詩》於《甫 人者,蓋因「予美」 固 忉」無 以「惕惕」爲 訓,次 田 「》傳 章 云 耐 憂 傳

説 傳以 以 唐 致 苕,處勢自然。 漸積構成之。 讒言惑 此 成 有 ,以爲皆不如歐 文,猶多言交織 甓,亦以 讒人。」李氏《集 爲興。箋云:「防之有鵲巢,邛之有旨 防有鵲巢,邛有旨苕」,此詩首二句,毛 人必 積累 由積 又如苕饒 興者,喻宣公信多言之人,故 而 累 陽 成。 而 氏 解》歷引程氏、蘇氏之 以 成。 説。 蔓引,將及於我。 成惑,義與『貝 旨鷊 如防之有鵲 考《本義》曰 , 綬草 雜 衆 錦 巢, 中 色

> 見者 苕,則 誰 樹有鵲巢,則仰而 説。 近 也。」誑惑、壅蔽、義本相因。 憂讒,即「誰侜予美」一 甓。」近方望溪説《詩》即用此義。 邛,高卬之地,必無苕、鷊, 無甓,其理不行。」《補傳》云:「防以止水,必 傳》謂如『采苓首陽』之意,善矣。 「我」,●尤非。《虞東學詩》云:「范逸齋 同。」《吕記》、嚴《緝 爾雅》「侜張 飲, 誑 而易見者也。 也。 然 ()俯而 此説 惑壅 俯仰遠近,苟無所蔽,則皆能見之。 可見 蔽我所美之人,令其多所不見, 誑 亦近鑿,而以「邛」爲 者也。 邱中之地有旨鷊,又遠而易 也。 可見者也。 淡及 堂途之間,人所埽 語可爲明證。 《説文》:「侜,有 戴 中庭之督有令適, 承珙案: 氏《續詩 此蓋云邑 邛上之草有旨 記 而 此詩之爲 除 印 》皆從 毛傳 謂 , 必 中 無 中 廱 無 則 訓 唐 補 之 蔽 用 其

❶「卬」,原誤作「邛」,據廣雅本改。

昏。 之也。」斯言其即此意與! 月曜夜, 蟁 而 書》中山 我 憂讒 塵埃抪覆 靖王云:「白日曬光,幽隱皆照。 畏害之心能 寅 ,昧不見泰山 宵見。然雲蒸列 不 ·忉忉 ,何則? 惕惕乎? 布, 杳冥 物有蔽 畫 明 漢

巢卑之事也 巢卑」之説,曲爲附會。 氏《古義》引《爾雅翼》「水大則巢高,水小則 以「防」爲捍水之隄。夫隄防非鳥巢之所,何 歲之多風,則去高 地在縣北,防亭在焉。」《集傳》用王安石説, 郡國志》「陳縣」注引《博物記》曰: 防 有鵲 巢」,傳:「防, :木而巢扶枝,不聞有水 其實古書衹 邑 也。」《 云 續 鵲 邛 小 漢 知

陽郡郜成侯國,莽曰「告成」。《外戚侯表》有恭反。」竊意「邛」與「郜」古字通。《漢志》山《詩》者皆不言邛之所在。《釋文》:「邛,其「邛有旨苕」,傳:「邛,邱也。」從來説

「邓成侯」,「邓成」即「郜成」,《墨子》「堯葬蛩「邓成侯」,「邓成」即所去「郑」三字皆聲相近。《太平寰宇「邓」、「郜」、「穀」三字皆聲相近。《太平寰宇「邓」、「郜」、「穀」三字皆聲相近。《太平寰宇にず、「郜」、「穀」三字皆聲相近。《太平寰宇心之陰」,《吕氏春秋》云「堯葬穀林。」《檀弓》地在縣北」者合。邱陵,義同「穀陵」,《墨子》「堯葬蛩「邓成侯」,「邓成」即「郜成」、《墨子》「堯葬蛩

食,如 艸也。」即本毛傳。 草』:彼陵苕之草好生下溼,此則生於高邱 與彼異也。陸璣《疏》云:『苕,苕饒也,幽州 「營」。《類篇》:「營,郞刀切。 人謂之翹饒。夏生,形如勞承珙案:「勞」疑當 《若之華》傳云:『苕,陵苕。』此直 豆而細,葉似蒺藜而青。 「邛有旨苕」,傳:「苕,草也。」正義曰 小豆藿 也。」」承珙 毛既 野豆謂之營豆。 以此苕與《苕之華 案:《説文》:「苕, 其莖葉緑色,可生 或作頭。」 一云『苕 作

雅 草。」今案:「旨」訓「美」,不必定是味美,即 **綬文,故曰綬草」,或以其文采之美曰「旨** 文采可觀亦得爲美。 爲苕可生食。 同。邵氏正義曰:「上文『旨苕』,陸《疏》以 文》引《詩》亦 字。《吕記》引董氏曰:「鷊,舊作 詩》又作「旨薦」。 ·釋草》作「虉」。《毛詩》作「鷊」者,假借 「邛有旨鷊」,傳:「鷊,綬草 爲 此云『旨鷊』,亦當爲可食之 薦。」承珙案: 「虉」、「鷏」、「薦」三字聲 據陸《疏》云「鷊五色作 《類 薦。 《説 也。」《爾 篇》 引

鷊」歟!

月出

岱之間日 篇》「君子由之佼以好」,又作「佼」。是二字 也。」與「僚」異義。 篇》「古者桀紂長巨姣美」,作「姣」;《成 人,尞聲。」此其本義也。《女部》:「嫽,女字 本多通借。 引《史記》「長姣美人」是也。《荀子・ 爲「姣」之借字。《説文》:「姣,好也。」小徐 引《詩》「姣人嫽兮」。 承珙案:《毛詩》「佼」 記·司馬相如傳》索隱、《一切經音義》九皆 嫽,同音了。」《唐石經》「佼」作「姣」。《史 而東,河濟之間,凡好謂之姣。]僚,本亦作 「佼,字又作姣,古卯反。《方言》云:『自 「佼人僚兮」,傳:「僚,好貌。」《釋文》: 釥,或謂之嫽。」蓋假「嫽」 爲 《説文・人部》:「僚,好也。 《方言》:「好,青、徐、海、 非

《文選 賦》: 所謂 篇》亦同,並 之,則第二章「舒慢受兮」文例正同。《釋文》 諸言「要紹」者,皆與「夭紹」同。 注:「要紹,謂 蜒」,蚴蟉、幽蟉,皆與「窈糾」同,即《洛神賦 蟉,行動之貌也。」又「驂赤螭青虬之 幽 馬相如傳》「青虬蚴蟉於東箱」,正義云:「蚴 又皆以疊韻字形容「舒」之狀貌。《史記 之姿也。」案:此詩每章第三句皆有「舒」字, 云:「慢,於久切,舒貌。」《玉篇·心部》云: 慢受、舒遲之貌。」《廣韻》同、《集韻》、《類 曲枅要紹而環句」,注云:「要紹,曲貌。」此 「矯若游龍」者也。 「致飾程蠱 舒窈糾兮」,傳:「舒,遲也。 · 西京賦》「要紹脩態,麗 引《詩》「舒懮受兮」。凡此疊字 嬋娟作姿容也。」又《 ,要紹便娟。」又《靈光殿賦》 末章「舒夭紹 服颺菁」, 合上下觀 窈糾 南 兮」, 蟉 · 司 舒 都 蜿

綿并爲一義,●《集傳》以『窈糾』二字分爲兩外添綴成文。』《稽古編》曰:「三詩皆兩字連為」,以「善爲妖態」者也。《虞東學詩》曰:齒」,以「善爲妖態」者也。《虞東學詩》曰:形容,即《梁冀傳》所謂「愁眉啼裝」、「折腰齲

釋,尤屬臆見。」

《釋文》何爲引之? 《校勘記》云:考《釋文》原本作「嫺」,「嫺 蒼》。 若彼文「嬼」作「嫺」,則於《詩》韻不協 同力久反,好貌。 承珙案:此《釋文》 「妖」二字連文,相如賦所謂「妖冶嫺都」也。 '嬼'姣嬼也。」《廣韻》:「嬼'妖美。」皆本《埤 「佼人懰兮」、《釋文》:「懰,本又作劉 《埤蒼》作 原 本誤 嬼。 耳。 **宝** 嬼,妖也。 一篇 》:

「勞心慘兮」、《釋文》:「慘,七感反,憂

❶ 「三詩」、《經解》本《毛詩稽古編》作「三語」。

毛詩後箋卷十二

之失。 韻。 反耳。 《北山》之「慘慘劬勞」、「慘慘畏咎」可作七感 易溷,故六朝人往往互書致舛。 《月出》、《正月》、《抑》皆作『懆』,入韻。 案:《隸書》偏旁「參」或作「叅」,與「喿」相似, 氏三者皆云七感反,其憒亂有如此者。」承珙 懆』。」段注云:「《白華》作『懆』,見於許書。 也 而脱其一。 説見《鄭風》。 也」,音義皆於《詩》不協,蓋『懆』字轉寫譌爲 ·操」「摻」本有二字,由後人以「參」「喿」不分 詩》風。」是陸氏以後本尚有作「懆」不誤者。 《説文》『懆,愁不安也』,引《詩》『念子懆 戴 然《五 毛晃、陳第以後,遞加辨正,足救陸氏 氏 懆,千到切,故與『照」、『燎」、『紹』 詩 經文字》云:「懆,千到 考 正 **>** 曰 但《詩》以韻爲辨,故惟 惨,《 説 如《説文》 文》云『 反,見 而陸 毒

林林

「胡爲乎株林,從夏南,匪適株林,從夏

欲 氣讀, 義 殊 是 曰: 辭反覆,若似對答前人,故假爲觝拒之辭,非 株林,既從夏南矣,尚以爲非適株林乎? 匪適株林也,特以從夏南故耳。」夫夏南本 『君胡爲乎株林乎? 死從子,故主夏南言之,是已。朱《傳》曰 以株林目其母、夏南目其子也。 辭,各二句爲一 二句『胡爲乎』是問辭,下二句『匪』字是 之他耳。 我非之株林從夏氏子南之母爲淫泆之行,自 夏氏子南之母爲淫泆之行? 南 適株 面 非適株 有礙。」承珙案:據箋,首章每二句作 争。」此説是也。 箋 曰 : 林從 云: **觗拒之辭。**』《稽古編》曰:「首章 林而 胡 夏南之母,反覆言之,疾之也。 陳 爲 意。 人 從夏南也。 乎 責 適 靈 適株林即是從夏南 又 曰: 曰:從夏南耳。 株 公: 林 君 而 正 王 何 從 匪,非 義 爲之 肅 疏云婦人夫 夏 日 云: 南 株 也。 以 言非 乎? 然 林 諱 文 在 則 文 從

猶不知 豈爲 亦 也。 諫,不必改鄭 衵之戲,洩冶 爲隱諱之辭。 李《解》皆本 不 林即是從夏南 孫 鄭不 從夏南」,陳氏駮之當矣。 作 毓 事之常。 此 從 間 以 當以 恥,亦何觝拒之有?」故以爲詩人代 則將首章每二句頓斷讀之。 夏 王 答之辭 南 爲 爲 此 乎? 長。」詳王 靈 也 况 詩· 嚴《緝》亦從其説。今案:衷 爲説,而《集傳》因之,然適 諫 公觝 既 若云: 而 乃匪 曰 本設辭,即以刺其飾 即殺之,當時 非 拒之辭。 肅 適 君 以 適 株 胡 爲「反覆言之」者, 株林」,則不得云 《吕記》又云: 林,實是從 爲 彼 乎 相 有所忌諱 適 蘇《傳》 戲 株 於朝, 非 夏南 林? 拒 株

承 塞,野場 珙案:《國語》: 單 胡 若 爲乎株林」,傳:「株林,夏氏 可 棄、民 證 夏氏之邑在 將築臺于 襄公假道于陳,道 國都 夏氏。 外。 其 下 韓氏 邑 乃言 路 也。」 怡 若

是也。 柘 然劉昭《補注》但於「陳縣」下云陳有株 之東北。 朱襄之地,於「柘」下不言即株。《寰宇記 志》:宋州「柘城縣 里,是夏氏之邑去陳國本遠。若《元 國,西華縣在州西八十里,夏亭在縣西 陳 遠。」承珙又案:《寰宇記》:「夏亭城在陳州 界各十里。《序》言朝夕而往,似不宜若是之 或 有株林,即夏氏邑,一名華亭。」考陳 南』注云:『夏南,夏徵舒也。』 今此城北 西華《詩地理考》引作「南頓」,誤。 野,野外日林。 日 以 城 詩《株林》,刺靈公也。 : 「《爾雅 縣 爲 陳 爲 故柘城在甯陵縣南七十里,此又在陳 水之株林 《 前 春秋 ***** 漢志》淮陽 话時陳之株野,而於下邑縣 邑外曰 此言百里之國,五十里之界 本陳之株邑」、《詩・ 此 雖 郊 傳疑不定,要可 國 『胡爲乎株林 郊 有柘、《續志 縣西南三十里 外 日 牧,牧 州 和郡縣 口南三十 本古 株林 邑,蓋 ,從夏 》同 見株 又云 外曰 Ŧi. 淡 陳 里

野 株 而 後變易車 林 必 非 乘以至株林 處 故 靈 公 也 税 其 乘 馬 於 株

驕」。 已誤矣。 字,是後人改之。《皇皇者華》篇 夫、士曰 於《皇皇者華》云『維駒』作 作『駒』者,後人所改。 此,知此及《小雅·皇皇者華》並作『驕」,其 曰 于株」,傳:「大夫乘駒。」臧氏《經義 天子馬曰龍,高七尺以上。 《説文》『馬高六尺爲驕』,引《詩》『我 驕』爲『亦作』。 本作『驕』之證。 :「《釋文》:『乘驕,音駒。 則 駕 駒,高五尺以上。」與《説文》及毛鄭略同,當出 又《説文》引《詩》『馬二歲 我乘馬 「驕」之譌。 沈説當矣。 ,説于株野。 徐疏 正 鏞堂案:《公羊傳》隱元年注云: 鄭箋 義 引《詩》「皎皎白駒」,則 諸侯曰 陸氏於此從沈作 則 與《説文》合,尤可 並 駒 馬,高六尺以上。 作『駒』,誤 乘我 ,本亦作驕。 沈云或作 乘駒 日 内 '同。』據 駒」,則 雜 唐時本 馬 駒」 朝食 卿大 古傳 矣。 驕, 記 維 以

蕩 野。 所 騎 「乘」不同。 《南有喬木》之『五尺以上曰駒』也。 蓋駕者,馬在軛中,容有駕而不乘者。 林。」《説文》同。 株野之外。 六尺以下曰驕。」蓋 株林,或説舍焉,或 往,至株野即説焉,而其所自乘者乃驕也。 義云:「君何爲駕我君之一乘之馬。」可知箋本作「駕」字。 人我君也。 木》亦當作『驕』矣。」承珙案:箋云: 知二 .株』合韻 忘返。 乘 出 之驕,以 然則「駕我乘馬」者,謂靈公本以 詩 至株野,託言 作 《國 君乘馬, 也。 **《**魯 君親乘,此「乘」字當依經作「駕」。 駒 語》云「南冠以如夏氏」,是靈 至 鄭 一于株 頌》傳:「郊 是由 乘君 云『馬六尺以下 非 株 朝 也 他 林 國 林 食 則 乘驕,變易車乘 適,乃舍之 焉。 中至株林 即株,乃夏氏邑,在 段 己。 外日 懋 此言靈公但駕之而 又責之也。 永夕永朝 堂 一野,野 曰 必 日 而 故二文 然則《 : 「我 驕 乘 諸 先 以 外 大 侯 經 一駕 觀 驕 即 夫 或 株 馬 至 喬 車 \Box 正

當日 駒」,遂以 序》但云刺 實得一 實 有易 經 爲乘駒者謂 傳 靈公,並 服 微旨 微 行之事,故箋云「變易車 未嘗及 王 孔 肅 儀從君 見傳 孔 儀 適株。 也 云「大夫乘 不知 乘

澤 陂

傷之也。 男女相説之私。 毓以箋義 作,故聖人存之以立教。 卷」、「碩大且儼」,言其有美容而無貞性,亦 「子之不淑,云如之何」也。 下二章「碩大且 意正與《序》相 傷 思」,謂思此美人,如之何而得見,正義謂 玉臺》《香盒》之漸 如之何」傳云: 《序》云:「《澤陂》,刺 惟其爲刺淫之詩,而 爲長,此已開後 應。 傷者,傷時世淫泆之變。 「傷無禮 「如之何」者,猶《鄘 然郭 注《 自鄭箋以「傷」爲 儒 時 也。」蓋刺者,刺 爾雅》引《魯詩 説 也。」案:首章 《詩》者視同 非 淫 者所 風》 傳 孫 自

> 見之意,又爲鄭箋之所本。 篇「傷」字異文。 陽如之何」證 大也。 「陽」爲「予」,《詩考》以 然則《魯詩》亦似 要皆不如毛義之 有 思 爲 而 即 不 此

IF.

之性,荷以喻所説女之容體。」則「有美一人」 莫知其爲男爲女,其説不可通矣。 箋又云: 申傳意,是也。 二物而下文云一人,自即以二物興一人。 疏 是此草大名,故取荷爲韻。」承珙案:章首言 色。當如下章言『菡萏』而此云『荷』者,以 必以象,當以蒲喻女之容體,以華喻女之顔 荷』共喻美人之貌。蒲草柔滑,荷有紅華,喻 云: 義不言同姓之故。 「正以陂中二物興者,喻淫 云『傷無禮』者,傷有美一人,則此『有蒲 「傳正解『荷』爲夫渠,不言興,意以 有 蒲與荷」,傳"「荷,夫渠也。」正 箋云:「興者,蒲以 案:箋意 風 蓋 由 因《序》言「 同 喻 姓生。」正 所説男 下 荷 與 義

必 姓,故箋有「同姓」之説。 公君 姬,是爲瀆倫。 爲宣公之孫,於靈公爲從祖父。 果合經旨 臣 淫 於其 (國」。 孔甯亦 靈公乃宣公曾孫 稱公孫甯,是靈 然於興意終鑿,未 靈公淫 於夏 公同 御 叔

之莖日 裳。」楊雄則云:「衿芰茄之緑衣,被芙蓉之朱 莖、華、實、根之異。《爾雅》别有「其葉蕸」、《釋文》 當以芙渠惟葉最先見,故以荷爲大名,而後分 渠葉。」本屬 字。」是也。 裳。」《漢書》注引張揖《字詁》云: 珙案" 屈原云" 「製芰荷以爲衣,集芙蓉以爲 爲大名,故言荷耳。 荷,生而佼大。」正義云:「如《爾雅》,則夫渠 箋又云:「蒲,柔滑之物。 與茄」,然則詩 茄。 此言荷者,意欲取 三字。 但《説文》:「茄,夫渠莖。」「荷,夫 《爾雅》以 樊光注《爾雅》引《詩》云 本有作『茄』字者 「荷,芙渠」建首, 莖爲喻 夫渠之莖 「茄,亦 亦 也。」承 以 荷 荷 曰

> 渠也。」正同《爾雅 굸 荷」字通 「衆家並 詩 無 此 「荷」即 句。」 案, 無 「茄」耳 箋以荷爲 者 是 也 傳 莖,則以「茄 궁 一荷, 夫

文 》: 泗。 「息、喘也。从心,从自,自 出涕沱若」是也。 自,鼻也。 呬」爲鼻息音同義近。 承珙 「東夷謂息爲呬。 涕泗 案:《 滂沱」,傳:「自目 象鼻形。」據此,「泗」爲鼻液,與 爾 雅 》: 「 啊 从口,四聲。」又云: 滂沱者、《易 亦聲。」又云: 日 息 涕, 也。」《説 ・離 三 二 自 \Box

疑「儼」爲矜莊,非淫泆之婦人所宜稱。不知 儼』,可見。」承珙案: 謂是女思男之辭,觀『碩 子思婦人,《澤陂》,婦人思男子。 碩 詩》以『碩大』稱 虞東學詩》曰:「許白雲謂《 稱 莊 姜,《車 婦 人多矣。」何氏《古義》又 **整** 嚴《緝》云: 稱 大 且 辰 卷』、『 彼 「《衛風》以 碩 錢天 月 女 碩 出 錫 \approx 大 則 Ħ. 男 亦

皆與《 怒 輔在頰 儼 子 其儀狀端 卷然柔弱。」是非女子而何? 義。 婚。 」 此 粲《神女賦》 也。」《淮南子・脩務訓》「磃輔揺」高誘 傳云:「儼,矜莊貌。」以上傳例之,亦不 不謂《詩》有 磃輔 卷,一 碩 建《洛 也 作「且 大 《檀弓》「執女手之卷然」,正義云:「卷 嬮,好 韓詩》「娢」義相近。 且 本作婘。」《廣雅》「婘,好也」, 則好」,注:「 頰邊文,婦人之媚也。」《説 引《詩》者,以證 神 好耳。 曰 婚」、《薛君章 賦 也 含怒、 曰:「美姿巧笑,靨 難 傳 知 云: 「明 此 《太平御 難 也。 亦 爴 眸 「卷, 知 輔者 善睞 <u></u> 二義 詩》 句》 其字爲經典所 好 覽》引《韓詩 《説文》:「娢, 頰 也。 貌 靨 曰 : 曰:「娢, 「碩大且 輔 上 輔 近 ^ 『碩 奎 奇牙。」此 林訓 承 女部 釋 而 權 也。」曹 即 義 文 》: 大 > 且 》「爴 重 過 注 儼 用 义 有 同 且 謂 傳 王. 頤

> 廣 也 雅 · 云: 婚, 美 也。 總之,皆 謂 婦 人之

貌

非澤中 「蓮」」。 不 草,且《鄭風》「秉蕑 不知《神農本 珙案:此箋是謂傳「蘭」字當作「蓮」,非 荷、菡萏皆屬夫渠。 · 蕑」字爲「蓮」,觀 蘭是陸草,非澤 蕑,當作『蓮』。 鄭欲改『蕑』爲『蓮』,意在 知爲澤蘭故耳。 有 物也 此 蒲 由 與 經》蘭名水 誤 (蘭) 或又疑蘭與夫渠不同 認 蓮,夫渠實也。」段懋堂 正義 蘭,說詳見《鄭風》。 中之物,故知『蘭』當作 「萠」爲 傳 : 即 其實詩人不必然也。」 行見。 在 香 萠 溱洧之間,不得 1,《别 Ш 三章 蘭 蘭,故云陸草。 疏申箋義 録》又名蘭澤 也。」 律 時 箋 改 蓮 云 由 謂 經 承 與

魚檢 篇 反。」承珙案: 「孍,女好 碩大且儼」、《釋文》:「儼、 貌 「職」字 魚檢 切 當 作 釋 「孍 本又 文》 作 本所 **宝**

毛詩後箋卷十二終 一年 一時」者是也。 一時」者是也。 一時」者是也。 一時」者是也。 一時」者是也。

毛詩後箋卷十三

胡 承 珙

傲』者。

大夫以國無善政,不用其言而去之。

去之而又思之,且告之故,以冀君悟,可謂得

或

褊

小,迫于强大,王室衰微

漸

相

并

吞

觀

鄭桓公之欲逃死,則知當日之時勢矣。

乃

逍

遥遊燕、飾其衣服,孟子所謂『及是時般樂怠

涇

檜

羔 裘 道去其君 也

於此。 燕,而不能自 或 其君』,可謂深于詩矣。」姜氏《廣義》曰:「檜 燕,此其微意也。 去之,何哉? 櫄曰:「好絜其衣服亦非大惡,而大夫 小而迫,君不 《序》云:「《羔裘》,大夫以 大夫不忍言其君之過,而特曰 强於政治,故作是詩也。」黄氏 檜君必有大不可正救者,不 用道,好絜其衣服,逍遥 作《序》者謂『大夫以道去 逍 以 遥 遊 止 是 遊

> 使然。 羔裘逍遥,狐裘以朝」,箋云:「諸侯之 大夫有心,能無去乎?」

直安樂公之流,其後

人恃險驕侈、蓋

其家

法

然憂傷是悼哉?

讀《後序》云云,乃知

檜

君

朝服緇衣羔裘,大蜡而息民,則有黄衣狐裘。 今以朝服燕、祭服朝,是其好絜衣服也。 先 言燕,後言朝,見君之志不 虞東學詩》曰: 「箋據《玉藻》『狐 能 自 强 裘』注,謂 於政治。」

初忉忉

有大無道之事不能一朝居之勢也,何以

道去其君」,而《詩》言其君服御之美而已,非

之言,有功於《序》者甚大。《序》稱『大夫以

去國之道矣。」《虞東學詩》曰:「此篇《序》下

日

上言

以

朝

謂

H

出

視

朝

此

云

『在堂

故鄭 君用 案: 蘇 箋引《玉藻》以 錦衣狐裘」,毛傳明云: 推 檜 止言天子,其 止言天子。 狐 錦 諸侯之服 鄭 裘之非燕 氏 狐 子之服 君 衣狐 貉之厚 此説非是。 氏以 以 意 狐白以 以 此 如 祭 爲燕服 此,非 狐 , 檜 服 朝服 狐 此箋則以爲黄衣狐裘者,疏云: 以居」, 服 朝,則違禮僭上,非徒好絜 爲 消 、裘」爲 君 白裘,惟 が 可 爲狐白,亦云諸侯狐裘,並非 朝 諸 用 燕、祭服朝」之説自 鄭 《秦風 經既 知 服 衣繡 侯 以 説 陳方 陳 狐 視 朝天子亦然者,乃是孔 也 不著所用 在天子之朝耳。」若檜 蘇 流白,固 裳」並言黻爲冕服 方説 • 朝 「狐裘,朝廷之服。」 説 氏 終南》「君子至止, 陳 固 尤非是 以 案, 祥道、方慤 非。 . 未 狐 ,而《論語》言 鄭 可 白 至《終 廢。」承 注『狐白 爲 不 諸 可易。 而 則皆 侯 南》 른 , 則 珙 朝

裼衣 然。 曜,然後見其 篇》:「景公之時,雨雪三日,雨不霽。 謂正 謂其裘色鮮美,故 「如濡」。彼傳云:「如濡,言潤澤 之朝亦得衣狐白者,然未必爲禮之正 狐白之裘,坐堂側陛。 ,而裘毛乃得與 即此已可見其服以逍遥,故 寢之堂。」承珙 羔 、裘如 如膏。」案: 膏 一, 日 日 出 日光相照 案:《晏子 光照 晏子入見。」此 有 如膏,猶《鄭 曜」,傳: 之 如 曜 春 脂 不 秋 膏之潤 也。」此 加 禮 日 似 也 風》 公被 諫 諸 出 之 澤 亦 照 侯

之日多,而視朝之日少耳。 堂」,則游燕之後尚有 起以至竟日,皆游燕也。」劉氏《詩 其『以朝』、『在堂』者而 「末章但言羔裘,不及狐裘者,見 何氏《古義》曰:「上言『以朝』、次言『在 視朝 亦無之,則自辨 或曰 適寢之時。今并 其逍 ,狐裘視朝 益 遥 色 曰 燕 而

狐

裘

在堂」,傳:

「堂、公堂也。」正

義

雖 非 正 服 然 尚 爲 政 事 而 設。 若羔 裘 逍 遥 ,

其失益甚,故末章惟舉其重者言之。」

春云: 鄭 語 訓「悼」爲「動」,疏謂「心神震動」,似與《説 則從雙聲爲 言》、《廣雅》皆有此訓。 似非「懼」意。 文》「悼」訓「懼」有合。 動,故爲『動』也,與箋『哀傷』同。」承珙案: 働」字俱作「動」。 悼 ·妯,動也。」「妯」亦與「悼」聲義 氓》詩「躬自悼矣」,傳云:「悼,傷也。」《方 申之以 》「子哭之慟」、《釋文》引鄭 ,猶哀傷也。」正義 中 動, 周禮 心是悼」,傳: 哀 訓 讀 •大祝》「九嫀,四 傷 然則「悼,動 爲哀 竊謂古「慟」字只作「動」、《論 《鼓鐘》「憂心且妯」,傳云: 歟 **慟之慟。」葉鈔《周禮》本**二 ? 然箋以「哀傷」申之, 曰:「哀悼者 悼, 此傳云「悼,動 莊 也 子 動 日 注 即 Ш 相近。 也。」箋 振動」,杜子 云「變動容 木》篇:「振 「慟」字,故 心神震 此傳 也」, 云 動

悼栗。」

素 冠

從鄭。 荒、大裁、素服。」又云: 孫毓皆以箋爲長。 甚、《序》不應止於刺不能三年,三也。 耳,若謂全不 近,二也,不能三年,當謂三年將終,少月 冠素紕」,於「素衣」引《閒傳》「朝 鄭以三章皆言大祥,於「素冠」引《玉 章以「素冠」故素衣,末章「素鞸」 詩,毛鄭異説。 朝服素裳」,故通稱「素衣」,於「素韠」云 **鞸從裳色**」。 也, 刺不能三年, 當先思其遠, 不當思其 序》云: 承 珙案:《周禮 見練冠 $\overline{ }$ 孔 毛以首章「素冠」爲 疏 素冠》,刺 宋儒《吕記》從毛,嚴《緝》 申 是是 鄭有三: 「士之齋服 春即 司 不 服 能 釋服,違禮之 *****: 布不當名素 「大札、大 服 年 則 練 有 編冠」、 藻》「縞 也。」 冠 玄端 王. 無 肅 傳 日 次 此

冠非 必 縞冠 詩人 近 以 『爲期之喪,猶愈於已』,古之不能三年者,意皆如此。」去 不知爲服歲月,然宰我謂「鑽燧改火,期可已矣」,齊宣王 故云「不能三年」。《吕記》引曹氏曰:「不能三年, 且 祭,素服 素車。」「素服」與「素車」連文,更不得謂 素 言素皆是白絹。 ,殊不 謂 素冠爲大祥之後,則《吕記 論 端 **春而小祥**,乃 轉 不見此服 刺 ,雖使短喪,其除之也蓋亦服是冠矣。」 練 其既祥而練已及再期,而 不能 「裳」爲「衣」近於遷 以 冠,而「素衣」專指祥祭之朝服素裳, 玉 知近尚不能,何論於遠? 以送終也。」是則喪 藻》:「年不 素」 三年者當先思其 自 服 與 《郊特牲》:「皮弁素 是當時不復行再期之禮, 練 \neg 玄 冠 順成, 練 對 就 衣,至大祥始除。 ,即此 即 服 則天子素 》云:「除 遠、不當 是 獨不行 稱 素,明矣。 不 白 若以「素 能 素 大祥 思 喪 服 經傳 三年 服 其 之 而 乘 之 雖 \Box

末爲 即 於文義不順 韠當祥祭之時,疏謂先思祥後,却思祥時,殊 意亦以卒章思大祥之人,此未必果得傳旨。 得以禮文不備,疑爲練服之所無。 自與「素冠」、「素衣」同例,皆爲練後所有,不 此其急急乎? 亦但曰「踰月則善」,詩人願見之意亦何至如 三年將終,僅少月日,則魯人朝祥莫歌 今玩詩言「傷悲」、「藴結」,其感甚深。 刺。」而申鄭又云: 練冠爲是,能練冠,則能三年矣。」疏釋傳云: 之祭乎? 大祥之後,則三年已終,於禮 定是三年將終、僅 如 順。 ,所云,亦以首言既練,終言大祥,從初 若箋説素冠在大祥之後、素裳、素 至朞 又案:毛於「素韠」無傳者 而 釋 少月日? 「朞即釋服,違禮 服 即 是 不 郝氏敬曰: 自除,非 能 三年 孔 已甚。」 疏謂毛 一若 大夫子 素冠主 :所當 若果 何 繒 在 必

勞心博博兮」,傳:「博博,憂勞也。」箋

詩人。 指素冠之人。 博」者,正所謂 承珙案:「勞心」,傳不明所指,鄭箋乃屬之 悲」、「藴結」乃詩人自言,故以「我」字别之。」 素冠之人思慕專一,有終身之痛也。 舊以『博博』屬詩人,然三句文勢直 「勞心者,憂不得 然傳以「素冠」爲練冠,則「樂樂」、「博 孔疏乃誤以鄭義爲毛義耳。 練而慨然也,毛意似當以憂勞 見。」《虞東學詩 下,正言 **>** 日 「傷

志同 同 與之同歸。」箋云:「聊,猶且也。 民 歸,欲之其家,觀其居處。」案:「歸」當讀如 「吾誰與歸」之「歸」。 孔子曰:「慎終追遠, 歸 德歸厚矣。」詩蓋言欲得行三年之人,與之 引子夏、閔子 固 心,行此禮以 於厚。下文「聊與子如一」,猶言與之一 聊與子同歸兮」,傳:「願見有禮之人, 正義釋傳又謂 救 騫 敝俗耳。 事 以 過不及者皆 同 歸己家。 箋以爲歸其人 且與子同 當當 觀

和

之以禮,知上文「同歸」必 ·如一」爲「與之居處,觀其行」,亦非 非歸、 家之謂

夏既除喪,而 輕,不肖者之所勉。」」正義曰:「《檀弓》『子 以禮,故 於禮,故曰君子 謂也?』夫子曰:『子夏哀已盡 也。』夫子曰:『君子也。』 子路 弦,切切而哀,作而曰: 『先王制禮 也。」閔子騫三年之喪畢,見於夫子,援琴 曰:『先王制禮,不敢不及。』夫子曰:『君子 畢,見於夫子,援琴而 **,彈之而不成聲,作而曰:**「哀未忘 聊與子如一兮」,●傳:「子夏三年之喪 日 君子也。 見 也。 夫子。 閔子騫哀 夫三年之喪,賢者之所 絃, 衎衎而樂 予之琴。 未 ,能引而 曰:『敢 盡 和 不不 之而不 能 作 也,先 致之 問 敢 自 而 割 而 何 调

⁰ 經 聊, 解》本《毛詩 原作 「願」,據阮校本《毛詩正 後箋》改 義》及 廣雅本、《

彈其 門人 以子 與此 子路 夏居 苑 或當 此 南 閔子騫至孝之人,故孔子善之。 IE 王 正其是非。」《檀弓》疏云:「《家語》及《詩傳》 反 制 異 由 父母異時。 夏喪親無異聞焉,能彈琴而不成聲。 辭 記 未有稱其字者,恐毛公所傳或誤。」不知 修文篇》引此事 疏 弦是也。 繆稱訓》:「閔子騫三年之喪畢,援琴而 不同,當以《家語》、《詩》傳爲正。 禮 爲子貢。❶ 父之喪異,故不同 事 所 ,不必執此以非彼 而 人不 者便文致然耳。 弗 云 敢 父母 其聲切切 得 過 許氏《名物鈔》云:「夫子於 鄭以毛公當有所憑據,故不 並 也 異 爲此行,二者必有 時, 亦與毛傳略 彼説 而哀。」正與毛傳合。 則 也。」承 古書經秦火後,傳 熊 子夏之行 氏 熊氏 珙案: 説 同 也。 以 但 知者, 爲子 又以 與 ^ 誤, 而 淮 説 此

隰 有 萇 楚

《檜》有「疾恣」之訓,引《周語》富 《序》謂「思無情慾者」。 箋亦但云「疾君之恣」,則似鄭所見《序》本 案:《序》下箋以「狡狭淫戲」解「恣」字,首 疾其君之淫恣,而思無情慾者也。」正 立説,欲求所疾之人以實之,鑿矣。 亡由叔妘」,何氏《古義》、《陸堂詩學 「定本直云『疾其君之恣』,無『淫』字。」承 淫」字。 《序》云:「《隰 但詩 以 「無家」、「無 有萇楚》,疾恣 自《困 室」爲 學紀聞》云 辰 也。 》遂緣 曰 義 |「檜之 言, 或 日 人 此 故 無 珙

則「子」字自當指人,不指萇楚,可見者如 一句爲興 此篇傳語甚簡,詩旨難以 ,訓「夭」爲「少」、「沃沃」爲 遽明。 壯 惟 佼 以 首 此

聞

[「]子路」,依文意似當作「子夏」。

苦憔 同, 悾 於温 及其有枝有華,牽蔓輭弱,不能扶持,但見困 家 類 子之心,至長有室家 之多慾,而以未有牽蔓之時生意沃然者爲 取 性,始生正直,及其長大,不妄尋蔓草木喻 疾其君恣欲,至于弱不自持也。 之時,樂其 而 王風 ||然無 较順。 未 是 義 而 己。 而 3稍迂。 端慤 也。 立,童心 柔之鄉,委身釋命,莫知所主,若萇 尤爲 知 爾、夫亦 鄭箋申之,興意自瞭。 兔爰》、《小雅· 戴氏《續詩 ,此訓「知」不依《爾雅》,非是。説見後。 , 則 語有云:『人不婚宦,情欲失半。』 融 無妃 惟《吕記》謂萇楚枝柔牽蔓,比人 浹。 可樂也。 長大無情慾,故於人年少沃沃 何 匹之意」,則全篇皆屬正興, 樂之有?」此與《吕記 集 而後爲所牽蔓,則於文 記》曰:「《隰有 水傳 》謂 · 萇楚始生,其光沃若。 苕華》意近。 政煩 但 漢成帝欲老 賦 以「銚弋之 重,似 但以 茛 楚之 楚》, 影略 爲 室 與 赤 人

> 可通。」 賦 「之子」,《集傳》亦即指狐。 「子」指萇楚,而 黄氏日鈔》已辨之矣。 體,而 謂「民歎 無 不 家」、「無 狐無衣裳,萇楚無室家,説皆未 如 草 嚴氏《質疑》曰: 木之無 室」, 知」, 意 「《有狐》之 難 則 通 以

經》:「羊桃,一 云 羊桃,狀如 草上。」」承珙案: 葉嚴《緝》引陸《疏》「葉」字下多「如桃而光尖」五字。 弋。」《本草》云:『銚弋名羊桃。』郭璞 録》云:「一名萇楚,一名御弋,一名銚弋。」 而 小麥,亦似桃。』陸璣《疏》云:『今羊桃是也。 『今羊桃也,或曰鬼桃。 曰 : 狹,華紫赤色。 一名 「《釋草》文。 隰有萇楚」,傳:「萇楚,銚弋也。」正 鬼 桃 桃, 而 名鬼桃,一 方, 命中 治 其枝莖弱,過一尺引蔓 舍人曰: 莖 皮 山 可 經》 腫 葉似 名羊膓。』《名醫别 以爲 起。」《 「茛 豐 桃,華白,子如 皮張。」郭 神 楚一 山,其木多 農 名 本 日 長 注 於 草 銚 義

其 皮 枝猗儺而柔 詳,當得其實。 陶 汲灌,重而 楚』者,即此也。」蓋 小 説,惟陸氏 「不妄尋蔓」正相 細 注 ,著熱灰中脱之, ,苦不堪 云: 山 云「過 善没,不如 順」者又自相 野 噉 多 鄭箋取喻迂闊,且 反。 花 有 尺引蔓於草上」,與 ,似家 萇楚之爲羊桃, 甚 陸氏又云:「今人以 楊 可韜筆管。」陸所言甚 赤。 柳 完矣。 也。 桃 《詩》云 又 近下根,刀切 非 與所言「其] 隰 Ш 固 桃 鄭 無 有 爲 簺 岐 萇 子

悲夫蕙華之曾敷兮,紛旖旎 同,字又作『旖 順』,而亦云『猗儺』,則『猗 義 以『猗儺』爲『柔 呵 述 然,美貌。 《小雅》 聞》曰: 儺 其枝」,傳: 『隰桑 「萇楚之枝柔弱 難然, 旎 順」。 有 盛貌。』『阿難』與『猗儺』 呵, 楚 但 「猗 辭 華與 其 儺,柔順 乎都房。」王 葉 儺」乃美盛之貌 蔓生,故傳箋並 九 實不得言『柔 有 辨 難』 ₩ E 也。」《 傳 逸注 曰 : 經

腲腇 司馬 草木,更不得泥於「美盛」之訓。 之旖旎也」,王 兮」,又云「其奏歡娱,則莫不憚漫 之柔靡,則不得 皆作「倚移從風」。 披」,漢人詞賦多本《詩》、《騷》,此皆狀草 亦與「柔順 風」,張揖曰:「旑旎,猶阿那也。」《考工記》鄭司 唐賦》:「東西施翼,猗狔豐沛。」此 以「美盛」言,而 義,蓋本於三家詩 荷妮,下垂貌。」楊 「美盛」。 王引《詩》作『旖旎』 \mathbf{E} : 者已」,注云: 相 旖 如《大人賦》「又徛伲以 一義近。 旎 若《上林賦》之「紛溶箾 盛 《南都賦》「阿 《説文》:「移,禾相倚移 褒《 貌 雄《甘泉賦》「夫 以 亦 呵 「猗儺」爲 也。」承珙案: 未 洞 而 那 嘗 詩》云: 簫 腲 訓爲『盛貌』,與毛 無 賦 腇,舒遲 》「形 柔 專指「美盛 那 招 順」之義。 貌。」 翁 旖 旖 何 摇 蓋《隰桑》之 答, 猗 也。」 猗 儺 茸 衍 旎 此 旎 旟 ,張揖 凱 其 此 則 旐 固 以 風 農 華 「倚 注 并 阳 郅 靡 傳 順 狔 近 古 _° 日 兩 非 木 移 那 吹 偈 又 雲 異 從 於 高 口 引

猗 枝既 各有當 阿 儺 難」爲美盛、《萇楚》之「猗 不妨 柔順 「傳義 ,則華與實亦必從風 不 可易也。 至華實皆附於枝, 儺 爲 而 靡 雖 柔 順 概 言 稱

《詩 用之。 之。後人以義非習見,而蔑棄古訓者,多矣。 訓, 案:《釋詁》「知」「儀」爲「匹」,皆以 室』,故知此宜爲匹也。」陳氏《稽古編》曰: 曰 「《爾雅》『知,匹』語殆專爲此詩注脚 如「流」「求」、「干」「扞」之例,皆見 「『知,匹』、《釋詁》文。下云『無家』、『無 樂子之無知」,箋云:「知,匹也。」正義 《爾雅》本釋《詩》、《書》,故傳箋依用 宋儒以其驚俗,仍解爲知識 義。」承珙 故 疊 韻 康 於 取 成

匪 風

「下國之亂 《序》云:「《 匪 周 風》, 道 滅 思周 也。」箋云:「周道 道 也。」首章傳

《漢 《潛夫論》云:「《匪風》,冀君先教也。」《古 云: 二 風 **制兮。』師古曰:「劁,古「怛」字。」説曰:** 風,非有道之風。 君」當國風之「檜」。 其本已譌,尚何足信? 符此論誤以《逸周書》所云「高辛氏,有鄶之 之「道」。此語足以斷之。 曰: 周之政令也。」《詩序辨説》從歐 義》云所謂「先教」,未詳其旨。 如孔子所謂「我觀周道,幽厲傷之」是也。 道倭遲」耳、《序》蓋 詩言「周道」但謂 臣聞古者師行三十里,吉行五十里。 | 書 | :: 據詩以國小而思周道,則不 匪風發兮,匪車 匪風發兮,匪車偈兮」,傳:「發發飄 王 一吉治 適周之路,如《四 偈偈疾驅,非有道之車。」 韓 不 ·揭兮。 詩 達 》,上昌 此 何氏《古義》曰 意 顧瞻 陽《本義》,謂 邑 承珙案:王 李 應爲「道 周道,中心 是非古之 王 氏《集 牡》之「周 疏 曰 : 解 此 至

也 發發者;是非古之車也,揭 , 揭者。

影鈔元 發發; 所傷 兮。」」可見此詩言風言車,皆與周道關係 周道,非是爲風之飄發、車之嘌偈,中心 何云强增乎? 非 義合: 傷之也。」 風 民 萬物甯,故曰 承,其誼 而思古也。李《解》謂毛氏强增「有道」二字, 匪兕匪虎,率彼曠野」之意。 依 發兮,匪車揭《古義》引此作「揚」字,此據誤本。 詩本意。 依 怛而不甯。 「人之不安,如風中車上。」歐陽謂 刻 當成周之時,陰陽調,寒暑平,群生 匪 ,其行遲遲,其意好好。 本,仍作「揭」。 一以 甚古,不宜妄改。又《韓 車 此 也,而 爲非古, 不知傳「有道」即指 所 其風治,其樂連,其驅馬舒,其 引「説」蓋即《内傳》之説, 宋人於此詩各自立説。 蘇氏曰:「匪風也,而 乃至 兮。 以 偈偈。」董氏 顧 爲 瞻 非 然毛韓師 周 有道,皆傷今 《詩》曰: 「周道」言之, 道 詩 以 中 外 張子 心 乃至 自 顧 與 説 爲 三匪 遂, 傳》 ·非 怛 檢 相 猶 有 瞻 毛

殊淺,不如從傳爲得。言彼風之動發發然,彼車之驅偈偈然。意義泛言不安之狀。或又謂古字「匪」「彼」通用,

《韓詩》曰:「偈,桀侹也, 爲「朅」之借字。 兮」,可知「朅」「偈」古同字。《説文》: 訓正同。《白帖》十一。 「高舉」,亦謂其 去也。」疾驅者,有「去」義,則此「偈」字或當 風》「伯兮朅兮」,《韓詩》作「偈」,《文選》注 語。」承珙案:《廣雅》亦云:「偈,疾也。」《衛 依《前漢書》作『揭』,云高舉也。 在車上者必震盪而不安,此亦車中 何氏《古義》曰: 疾驅揚起耳,非 即從《漢書》作「揭」而 ||《説 引此詩又作「匪 疾驅貌。」與 文》無「偈」字, 有 車升、 異 義 即 也 揭 事 毛此 以 車 之 爲 朅 引 則

則散 「周自文武 知亨 誰能 亨魚 以 魚 來 則 」,傳:「亨魚 ,以優柔寬簡爲治,此周道 知治民矣。」《 | 煩則 稽 古 碎,治民 編》 煩

安生 言治民貴安静』。 民俱 俱無發明,遂無有過 後儒言《詩》,略於訓義。❶ 也。 不著重首句矣。」 車』二句俱宜重讀。 章首句著意『亨魚』,則前二章『匪風』、『匪 曰:「陳氏此説甚暢。 子》云『治大國若亨小鮮』,意與毛傳正 舊政令,使以 ,故詩人思得一仕於西周者,告以 厲王時,變爲嚴急,監謗耑利,民焦 不欲煩。 亨魚之法爲治民 知亨魚之道,則知治民之道, 此固已發明傳義矣。 若如《集傳》之說,則皆 然疏中明言『亨魚、治 而問者。」翁氏《附記》 亨魚之説,箋疏 之道· 也。 玩末 周之 然 **《老** 同。 不

作「摡」。正義曰:「《釋器》云:『贈謂之鬵。滌也」,引《詩》「摡之釜鬵」。是《毛詩》本當「溉」乃水名,非「滌」義。《説文・手部》「摡,屬。」《釋文》:「溉,本又作摡,古愛反。」案:屬,《釋文》:「溉,

辭 • 「鬵,釜也。」亦與毛、許義同 必如孔疏「亨魚 即《説文》一説爲鼎,亦曰若甑,而非即 鬵。] 陸意從許以合毛傳「鬵」爲「釜屬」之訓 文》:「鬵,大釜也。 一曰鼎大上小下若甑 以其俱是食器,故連言耳。」《釋文》引《説 鬵是甑,非釜類。 甑 鬵,鉹也。」孫炎曰: 爲鉹。 九歎》云「爨土鬵於中宇」, 郭璞引《詩》云:『溉之釜鬵。』然則 用 亨魚用 釜、不用甑」之疑。 關 東 謂 釜不用 甑 爲鬵。 王逸注 甑 雙 涼 舉者 云 州 《 楚 謂 E

乎西。 歸。 能 周之舊政令。」承珙案:《説 輔周 有 誰將西歸? 道 懷,歸也。」箋云:「誰將者,亦言人 能 西仕 治民者也。 於周者,我則懷之以 懷之好音」,傳: 檜在周之東,故言 苑 善説篇》: 一周 好音,謂 道 西 偶 在

❶ 「訓義」、《經解》本《毛詩稽古編》作「興義」。

傳箋義合。
「蘧伯玉使楚,逢公子皙濮水之上,及見楚三、四『楚最多士,而不能用』云云。於是楚王,曰『楚最多士,而不能用』云云。於是楚王,曰『楚最多士,而不能用』云云。於是楚王,曰『楚最多士,而不能用』云云。於是楚

毛詩後箋卷十三終

涇

胡承

珙

蜉 蝣

《曹》之變風始作。』此詩箋云:『喻昭公之 追。 焉。」《釋文》云:「國小,一本作『昭公國 此《序》多無『昭公』字,崔《集註》本有,未詳 朝。』是《蜉蝣》爲昭公詩也。 而 『《蜉蝣》至《下泉》四篇,共公時作。』今諸本 迫,無法以自守,好奢而任小人,將無所 《序》云:「《蜉蝣 案:鄭《譜》云:『昭公好奢而任小人, ×, 刺 奢也。 《譜》又云: 昭公國 小而 依 小

> 《序》既云『昭公』,則即是可考,凡讀《詩序》 是正 皆如此。」 通。 《下泉》四篇,共公時作』,《釋文》所見乃誤 《譜》正 其正 實,安能必於本篇中 記》曰:「朱子改刺昭公爲刺時 本,因此而去此《序》『昭公』字耳。」翁氏《附 第詩本詠歎之辭,非如史傳之文得所指 義 也。』《校勘記》云:「《集注 義『《蜉蝣》序云「昭公」,昭公詩 所見鄭《譜》左方中不云『《蜉蝣》 確有 可考而後 》是 人,義亦 也。 信乎? 也, 觀 相 前

蝣》刺好奢,亦類也。 變風始於《蜉蝣》。《羔裘》刺絜其衣服,《蜉 詩亦相似。《檜》之變風始於《羔裘》,《曹》之 與「奢」通。 霜,敝由崇儉。 序《詩》者以其逍遥遊燕,而知其必不能自强 何氏《古義》曰:范蔚宗云:「葛屨履 范氏《補 楚楚衣服 傳》曰: 《羔裘》之詩不及政治 ,戒在窮賒。」「賒 「檜曹皆小國

五四三

毛詩後箋卷十四

又出《檜》下也。」然不能自强,猶愈於將無所依,此《曹》所以然不能自强,猶愈於將無所依,此《曹》所以其將無所依,而知其所用皆小人,故不足恃。於政治,《蜉蝣》之詩不及小人,序《詩》者以

爲不如蜉蝣,失詩 奢耳。 莫死而猶美其羽,興曹君危亡將至 氏《質疑》謂毛傳似反以昭公不能修飾 夕死 猶」當作「獨」。 猶 蜉蝣之羽」,傳:「蜉蝣,渠略 作「猶」,義本可 有羽翼 以 承珙案:此 意。 自 修 此可 通,不必改 飾。」 謂 傳言 段氏 不 善讀 蜉 懋 而 獨 也。 蝣 猶 堂 傳 者。 衣 務 朝 朝 日 嚴 服 於 生 生

起興 比。 齇。〕段注云:「齇,其正字;楚,其假借字也。 文》:「髗,會五采鮮色。」引《詩》曰:「衣裳髗 蓋三家詩 ()第二句即指昭公。 陳氏《稽古 衣裳楚楚」,傳: 有作『 『糙糙』者,如毛『革』韓『翶』之 編 》曰:「每章第一 「楚楚,鮮明貌。」《説 若作比體,以 句 以 全章 蜉 蝣

> 比 皆指 非指蜉蝣之羽 服」以就之,非是。」夫曰「衆多」、曰「 引《韓詩》「采采衣服」,薛君曰: 傳云:「采采,衆多也。」《文選 也。」沈氏清瑞曰:「《詩考》以此條人《大東》,改「粲粲衣 此即用《詩》「楚楚」之義。 「不韋使楚服 黑色而云『如雪』,可乎?」承珙案:《秦策 爲麻衣,愈不得以蜉蝣當之矣。 已複乎? 色,此《爾雅》郭注 ,誤與《周南 蜉蝣 且 首句言羽言翼,次句 泛 而見」,高誘注:「楚服,盛服。 可 • 以 螽斯》篇同 知。 而《集傳》遵 衣裳借言,猶 蓋《集傳 次章「采采衣服」, 用 ·鸚鵡賦 復言衣裳 於此 盛 之者 况蜉蝣黄 「采采,盛 可 貌 也 兰,亦 以 也。 確 興 **>** 黑 必 指 爲 貌 注

我君言,文義未順。 歸 句, 」,此於『我』字竟抛 諸家皆未 於我歸 處」,翁氏《附記 明 白。 《吕記》、嚴《緝》皆云『其 荒 箋 矣。 疏 云 且 君君 **>** 曰:「每 以 將 『我』字 何 章 末

濛

初

謂

欲 其

人之依

歸於我,

而

教

誨

開

諭

《表記》引國風曰:「心之憂矣,於我歸 處、歸息、歸説,不競矣。 事,國將滅亡,故賢人之心憂矣。 句是約奢之義,鄧云:「志競則 正義云:「此詩言曹君好潔其衣服,不修政 自明,謂心之所憂者,於我乎不知所歸 處。』此説得之。」承珙案:此但 惟蘇潁濱曰: 『君子悲其 ,憂其國以 乎」,竟似 朱氏鶴 及其身,曰: 是約奢之道也。」於語 欲 以 齡引 作 詩 鄧元 奢,愈競則 (淺陋 者自 將二句連 我 錫説 説,舍也 將 而 於 知 意 愈 爲 處也 奢。 説。 其不 何 更不 君 讀 歸 所 末 歸 當。 《詩》斷章。 之。 該上下耳。 處」、「歸説」皆無傳,必以其義大同,舉中以 作「税舍」解。 館,死於我乎殯也。 之人也。」《釋文》:「説,音悦。」正 云「心之憂矣,於我 上問寒問飢之類,言有口惠者必有其實,故 至《表記》引此 毛傳但於次 夫在 朝者 承珙案:《表記》引《詩》之意,承 康成注《禮》似不如箋《詩》之 詩,注云:「欲 既皆小人矣,尚 章訓「息」爲「止」,而「 所引《詩》「歸説」,仍 歸

説

猶言生於我

平

協。

慮遠

倚,尤未安矣。

歸

其

所

説

忠信

一義以

爲

引

何

誨

諭

之有

於我歸

雅》: 學詩 子》:「掘閲 云: 玉,恐當時常談如 掘関 ₩ E 蜉 蜉 蝣 蝣 「箋云『掘 掘 得玉。」王氏《總聞》 掘 掘 閲 地 閱 解 此。 関,謂 言 傳**:**「掘 地 掘 解 掘 閲 土 閱 其 使 」者,蓋 挑 閱, 始 解 生 撥貌 容閲 曰 : 閲 時 也。」 》。《虞 也。」《 也。」 蜣 掘 閱 箋 管 東 埤 得

《釋文》「説,音税」,此鄭義也。又云「協韻

至三章「於我歸説」,箋云:「説,舍息

也。」

如

我」二字,文義最合。

《詩》疏乃依箋爲説耳。

國既滅亡,於我之身何所歸舍。」 此解詩

「於

字」,則讀爲「言説」之「説」。

故黄氏佐、凌氏

閱。 悦 中, 蜉蝣出孔穴中也。傳云「容閲」即史所謂「容 引「浮游堀閲」,「堀閲」是雙字,猶「孔穴」,言 乎?」《詩小學》云:「古『閱』『穴』通。 闕。』豈『掘閱得玉』别見他篇,而 得龜者」,房注 閱得玉』語,惟《山 故》云讀《管子》『掘 風」,善從之。 穴,皆重疊字。 『穴』通。」《稽古編》曰:「今《管子》並 ·兑』即『閱』之省,假借字也。」《説文》「堀」下 風 莊子》『空閱來風」,司馬彪云『門户孔 過 即 賦》: 『枳句來巢,空穴來風。』枳句、 掘 傳之「容閱」也。 小正》續 地 而 出 《老子》:『塞其兑,閉 子》: 注 開 『空穴』即『孔穴』。 引 解 權數》篇云『北郭 『掘,穿也。 「事是君則 此詩: 其 閱 穴 得玉」,始知『閲 箋云「掘閲, 如 閱,猶門 闢 户 爲 穿地 然 容悦。」「容 近本 有 善注 也。 掘 其門。」 故 至 掘闕 宋玉 無 -逸之 地 泉 云 三與 空 引 解 空 掘 詩 日 而 掘

地解脱 閲,義 中 閲」猶言「解蜕」。 也」,亦謂穿地 中而 也。」《廣 掘 者,故釋傳「容閱」爲「形容鮮閱」。 正 解閱」,「掘」當訓「穿」,「閱」當讀「脱」,謂 「閱者,悦懌」之意相近,亦非是。 爲「形容」? 閲」,二「掘」字皆「 孔穴」解,則「蜉蝣孔 山 義曰:「定本云『掘 閲,容閲」,則「容」乃解經「掘」字,何 經》「峽 解脱變化,説「閱」 亦通。」是孔 而 雅 出。 山多空奪」注 釋詁》:「蜕,解 段以「容閱」爲「容悦」,與 突起。若如段説 即《説文》引作「堀」,云「 《説文》:「蜕,它蟬 所 堀」 見 地 穴」殊不成語。 之譌 與毛異。● 他 解閱」,謂 三 云 : 本箋 也。」《 「空奪 鄭 「掘閱」但作 有 意 鄭箋「掘 作 承 山 開 謂 即蛇皮 所解 但 海 解 珙 出 鮮 蓋 傳 正 案 耐 於 閱 容 皮 解 突 穿 云 地 義 謂 堀

❶ 「説」,廣雅本作「脱」。

訓。傳箋義同,非有異也。「閱」亦讀「脱」。「掘」「空」、「閱」「脱」以聲爲脱也。」然則傳云「容閱」者,「容」疑作「空」,

君所宜服 皆謂之麻衣。 之時,而蜉蝣之生亦不久矣,甚危之至 言麻衣者,蜉蝣朝生莫死,君服麻衣,則 政 風》刺好絜衣服 之,詩言「如雪」者,見其功之至精。 奢,非是。 之定制,未見其奢。 衣」,注云:「麻衣,白布深衣。」蓋古者 云: 承珙案:《雜記》「大夫卜宅與葬日,有司 衣也。」何氏《古義》曰:「諸侯夕深衣,所 「麻衣,深衣,諸侯之朝朝服,朝 而 麻衣如雪」,傳"「如雪,言鮮 惟 ",但狀 於衣 惟深衣以 諸侯朝玄端,夕深衣,此 以「如膏」,則見其君不 服 而云「羔裘如膏」,羔裘 之間 箋以 十五 力求 升 朝夕變易 布 精粹。 而 鍛 衣 侈 夕則 絜。」箋 濯 猶《檜 心心之 · 留 亦 服 本 布 也。 灰 薄 人 禮 麻 意 治 爲 衣 莫 以 深

不徒奢矣。 若非所當服而服之,是僭而

候 人

又請 有因。 同 晉公子如楚在襄王十四年,楚成與曹共雖爲 在惠王六年,曹共公之立在惠王二十五年 之子,不遂其媾。」郵之也。』案: 楚成王之立 語》:令尹子玉請殺晉公子,楚成王不許 數其不用僖負羈 四年有『共公遠君子近小人』之語、蓋 林葉氏言漢世文章未有引《詩序》者,惟 遠君子而好近小人焉。」《陸堂詩學》曰:「石 詩序》至魏始行也。 時,然豈有曹之新 止狐偃,王曰:『不可。 《序》云:「《候人》,刺 若以《 或 語》參之,頗覺其 而 乘軒者三百人,宏説 詩 愚謂《左傳》晉文入曹 而楚君已成 近 曹詩曰 小 人也。 謬。 誦 「彼己 似乎 衛宏 黄 共公 在 ○ 晉 初

説似 附會矣。 以 者? 芾」,而 附會《左傳》爲之,不知毛傳於「三百赤芾」 據范氏謂《詩序》出於衛宏,遂疑此《序》乃宏 十四年《左傳》:鄭子臧 詩偶傳於楚而 疑刺共之説。 奥論》、《詩序辨語》同。 云:「大夫以上,赤芾乘軒。」經文惟 公同時,又何疑於楚王之成誦乎? 不稱其服。」此記當時君子之語,亦正與曹共 服之不衷,身之災也。《詩》曰:彼己之子, 前 經師 皆未可從。」承珙案:葉氏之説與《六經 傳益 候 相 人》之刺 以 承爲刺共之詩,必非衛宏之所能 成王誦之,亦事所恒有。僖二 不知風 「乘軒」,與《左傳》合,足見毛 共 與《蜉 謡之作,列國流 好聚鷸冠,君子曰: 陸氏更據《國 蝣 》之刺 至宋 昭 言「赤 傳,曹 「語》以 序 儒

有。言賢者之官不過候人。」箋云:「是謂遠「彼候人兮」**,**傳:「候人,道路送迎賓客

彼此 言 以此 文兩「彼」字,正相對 夫之服? 以「彼其之子」即指候人。 公寵之,使服卿大夫之服。 李《解》引程蘇之説,謂候人祇守疆場,而共 人」,鄭注謂「選士卒以爲之」,即引此詩,故 謂作候人之徒屬,非候人之官長。」承珙案: 下士 云:「彼,彼曹朝也。」則上「彼」字專指 語不可通。豈此三百者皆由候人而升服大 姦宄,是亦屈于下僚,未嘗不是遠君子也 官」,則即以爲候人之官長率其徒屬以防 此因《周官· 君子 相 則奔走道涂,一 也。」正 「候人」非其官長。 ,諸侯候人亦 形。 曹之候人不應如 語意分明,無庸 義 候人職》云「治其禁令以設候 曰 : 應是士。此乃身荷戈祋, 則委蛇 天子之官,候 照,傳於「彼其之子」 然傳明 此於「三百 此 朝宁,或遠或近 《集傳》本之,似 岐 解 其多也。 云「賢者之 人是上 赤芾 候人, 玩經 備

行列 樂記 里高 牛馬 曰 : 物 器爲殳,其名爲祋,其義爲綴,非祋與綴 亦殳 注《禮》即用以證「綴」之爲「表」耳。 之義,三家詩或有借「綴」爲「祋」者,而 懸之以爲揭示。 又有「高縣羊皮」一義。 之爲「殳」,其本義也。 注》亦作『綴』。」承珙案:「祋」字从殳,「祋」 魯、韓《詩》。《吕記》引董氏曰:「崔靈恩《集 也 融 也。 日役。 《廣 縣羊皮,有不當人而欲入者,暫下 》「行其綴兆」注云:「綴,表也,所以 也。」《説文》:「没,殳也。 敵 何 國賓至 或 成 戈 《詩》云:『荷戈與綴。』」疏以爲齊、 語 與 《詩》曰:『何戈與祋。』』《禮記 頌》「祋殳狂擊」章懷注云: 八役」, 單 關 揭示即「表」也。 襄 傳 尹 公曰:「 以 許氏以其从示聲,故 縣羊皮者,蓋即 告,行理以節逆之, 何, 揭。 周之秩 或説城 祋, 殳 祋 官有之 實則其 有 有二 郭市 鄭 以 也。 表 用 驚 殳 氏 綴 表 •

> 候 姦,或并用以表道歟 先驅之意。 人爲導。」」 然曰「爲導」,則戈祋不 則是「何 1 戈 與 役」者,即 獨 負 弩矢 以 防

:

《禮記 常爲 子在 意相、 職。 言鵜鳥 鳥也。 注不 善居泥水之中,在魚梁以不濡污其翼爲才, 者,非其常也。 如君子以稱其服爲有德。」正義云:「《詩》注 翼乎?」箋云:「鵜在梁,當 水中之梁」,見鵜 應,以 位 同 興 與此 維鵜 • 表記》注云:「鵜 梁,水中之梁。 則當 也。」承珙案:經文「不濡」、「不稱」 也 在 乖者,注《禮》在前,注《詩》在後,所 梁 鵜在梁則當濡其翼,而乃不濡,之 在梁,不濡其翼」,傳: 稱其服,而乃不 必 禮 濡其翼,如 一》注似 以喻小人在朝,亦非 既 在 非《詩 水 鵜在梁,可 中, 胡,污 小 ?》山口。 稱,蓋 濡 人 無不 在 其 澤 位 用物 謂不 濡 傳云 翼 「鵜, 也。 必 其 而 理反 辱 (常。」 ·濡其 洿 污澤 不 其 濡 澤

辭 崔 性貪惡。 口 之,則濡 善,似以「不濡」反興「不稱」,故李氏《詩所》 然就梁竊 善事,攘人之美者,如鵜在人梁上焉。」歐陽 《漢書 云:「水鳥而在梁,則能 合求魚,不合於人梁上取其魚。 譬之人自無 本義》即用其説。《吕記》、嚴《緝》皆從之。 韓昌黎集》注引施士丐《詩 光諫 集 禿鶖。」《小雅·白華》「有鶖在梁」,箋謂鶖 爲 興 惡 而 又案"《表記》注以鵜之不濡其翼 思》云「鵜集兮帷幄」、《章句》言「小人 去,猶以爲戒」云云。 云「貪惡之鳥, 埜澤所有。 矣。 Ŧi. 《北史》魏明 魚,亦非 一行 此 以興不 志》云:「鵜鶘 示 詩 取 濡 詩 興 _, 稱其服者。」此亦非是。 中本旨,不 必 帝獲鶖於宫中,養之。 不 不濡其翼,設他鳥居 非 必 以 説》云:「言鵜 即即 更 可 鵜 於 知鵜 汙澤 如 爲 黄初中,鵜 傳箋取 梁 善。 也。 與秃鶖 求 解 楚 或 八爲 興 自

稱也。 深厚」釋之。「遂,猶久」者,比方爲訓。 重婚曰媾也。」故《詩》疏以「重昏媾者,情必 經音義》廿二。 其來已古。 也。」如此說,則與上章『不稱其服」爲 爲:『婚媾之義,貴賤匹耦各以其類,彼 訓「成」,亦訓 承珙案:此《集傳》所本也。 小人不從群小居卑賤而越高位,是處非其 世詁訓,無『久厚』之訓。 而失其類也。』其説 李氏《集解》曰:「歐陽破毛鄭,以 在 「遂,猶久也。 尊 位、 《國語》晉公子如楚,成王以周禮饗之, 不 今人謂遂意爲稱意,言不稱其寵 遂其 亦 「媾」「厚」者,疊韻爲訓。 是 引《白虎通義》云:「媾,厚也 不久其厚,言終將薄於君也。」 媾」,傳: 以 申」,皆有「久」意 鵜 喻 不 小 通。 媾,厚 然歐氏之説 也 張氏 然「久厚」之訓 也。」 曰:『遂,猶 故故 謂 編考前 箋 一意。」 《一切 曰「猶 遂 則 在 待 官 以 朝

蓋謂· 九 以居之,將不能久厚於其寵也 爲正,言小人竊禄高 謂終其厚矣。 其下云:「楚子厚幣以送公子於秦。」是則所 厚,與曹詩所云「不遂其媾」者其過同矣。 郵 子,王不許。 媾,厚於其寵 獻 而效郵,又甚矣。效郵,非義也。」章注云: 曰:『彼己之子,不遂其媾。』郵之也。 庭實旅 九獻庭實是厚 也。郵,過也。」詳楚子引《詩》之意, 又請止狐偃,王曰:「不可。 百。 據此,則此詩之解,自以毛 既饗,令尹子玉 也,而又殺之,是不終其 位,可謂厚寵,然而無德 請殺 晉 故 鄭 夫 曹 公

興 以喻小人雖見任於君,終不能成其德教。」 云:「薈蔚之小雲朝升於南 朝 稽古編》曰:「《詩》兩言『朝隮』。 貌 薈兮蔚兮,南 南 虹 Щ 也 一,爲將 曹 南 山 山 雨之徵。《候人》之『朝 也。 朝隮」,傳:「薈蔚 隮,升雲也。」箋 山,不能爲大雨 《蝃蝀》之 雲

聲。《詩》曰:『薈兮蔚兮。』」此字與毛同 若《詩》曰『薈兮蔚兮』」,而今《説文》有脱誤。 草莽」爲證,是也。《説文 隮如草木蒙茸。 要之,於詩義無當 兮。』」此或三家詩本有作「嬒」者,或本作「讀 女黑色也。 義仍異。 毛以「薈蔚」爲「雲興」者,謂南 草木、『朝隮』爲雲氣、亦未當。」承珙案:末 云然耳。 蔚」必取草木鬱盛爲義,蓋因二字皆從艸,故 人之繁盛,下二句喻君子之困窮,但於「薈 章四句自傳箋外,諸家之説多以上二句喻 正指『季女』,文義相應也。 山伐木,誤矣。至薈蔚,正指『朝隮』; 雲霧』,正用曹詩語。 隮」,雲也,爲 《説文》:「薈,艸多皃。 从女,會聲。 小雨之驗。 朱氏《通義》引《吕覽》「山 也 張子厚解『朝隮』爲 《詩》曰:『嬒兮蔚 木華《 女部》云:「嬒。 朱子分『薈蔚』爲 海 賦 从艸, 》『薈 婉孌, Ш 一; 而 朝 小 登 蔚

鸡 鳩

得見,若曰天何不假之年,使至今存也,思古 之意顯然。」 詞 實指其人,故連舉 不獨《鳲鳩》然也。 也。」《稽古編》曰:「援古刺今,《詩》之常體 念之情。 子』並稱 君子,用心之不壹也。」張氏《詩貫》曰:「凡 詩》稱『君子』者,單言已足。 而 《序》云:「《鳲鳩》,刺不壹也。 ,惟《小雅 况末章曰『胡不萬年』,蓋思之而 則當定爲思古人之作, 『淑人』、『君子』以 鼓鐘》與此篇 晦翁以爲是美非刺,徒以 『淑 而非 耳。 人』與『君 在 寓 現 蓋 其 位 不 非 在 懷 無

一於下也。」承珙案:《鵲巢》序亦云「德如鳲平均如一。」箋云:「興者,喻人君之德當均鞠也。鳲鳩之養其子,朝從上下,莫從下上,,鳴鳩在桑,其子七兮」,傳:「鳲鳩,秸

理 《毛詩》所出也。《説苑·反質篇》引傳 不容。 性不樹 鳩」,蓋· 之術,莫徑繇禮,莫優得師,莫慎一好。 以一心養七子,君子以一儀養萬物」。 傳》引《詩》首章云云,「言心之均 儀一兮,心如結兮。』故君子結于一也。」此 此傳 也。」此蓋 無足而飛,梧鼠 子‧勸學篇》云:「行衢道者不至,事兩君者 理,究極群書,非可據所不見妄生疑異。 在桑,其子七兮。 戶鳩之所以養七子者,一心也。 説苑》略同。 萬物者,一 「朝莫上下」之説,亦必 鳲 目不兩視 止、桑扈 出三家詩 鳩 均 儀也。 韓詩外傳》云:「凡治氣養心 五技 不啄 之德 而 淑人君子,其儀 明 傳。 而 以 ,耳不兩聽 粟之類。 經 窮。 ^ 一儀理 師 列 《詩》曰: 日驗 相 女・ 承 古人 也。 萬 而 而 其 魏芒 君子 聰。 物,天 知,如 説 兮。 博 甚 慈 好 所 鳲 語 螣 日 明 古。 心 荷 與 鳩 母 以 其 鳩 蛇 鴇 物

則 同,真古義也。歐陽《本義》乃謂「子之七」及 之詩。」據此,則三家詩及諸儒之説皆與毛 不一,謬矣。 也。』君子其結于一乎!」《後漢書・鮑宣傳》 貧,工多技則 云:「天子牧養元元,視之當如一,合《尸 ·在梅」、「在棘」、「在榛」,皆爲 鳲 鳩用心之 「淑人君子,其儀一也。 博 博 乎一也。」《淮 則精,精則神 窮,心不一也。 南•詮言訓》:「賈多端 ,神則化。 其儀一也,心如結 故《詩》 是以君子務 ĕ E 鳩》 則

義本已誤。」承珙案:段説是也。「儀」之爲、"箋語,非傳語。今本標起止作『傳』,是正、"固。」段懋堂曰:「上箋『執義當如一』,下儀一兮,心如結兮」,傳云:「言執義一,則用儀,義也。善人君子,其儀一兮」,箋云:「淑,善。「淑人君子,其儀一兮」,箋云:「淑,善。

《詩》云「淑人君子,其儀一也」。 之,隘矣。且在次章「其帶」、「其弁」,乃言其 此。《吕記》引董氏曰:「崔《集注》作『其 容儀服飾耳。 謂執義如一,尤有明證。 以生則不可奪志,死則不可奪名。』」其末引 無類也。』子曰:『言有物,而行有格也。是 『下之事上也,身不正、言不信,則義不壹、行 也」,於此「儀」則云「儀,義也」,悉爲分别如 各異。故鄭於「人而 漢時,則「禮義」之「義」與「威儀」之「儀」截 「義」,毛時通用,故不 一兮」。」此殆因箋説 一」,則所包者廣。《禮記·緇衣》:「子曰: 而改。 無 更爲「儀」字作訓 儀」則云「儀,威 後儒多以「容儀」解 然惟言「執義 然則「儀一」 義 儀

「貳,疑也」。古「忒」字多借「貣」爲之,或轉之訓「疑」,他無所見,惟《爾雅・釋詁》有「其儀不忒」,傳:「忒,疑也。」案:「忒」

訓 借「貣」爲「忒」,而轉譌作「貳」者。《禮記 《釋詁》「貳,疑也」,字當作「忒」。或以聲近 衣》引《詩》「其儀不忒」、《釋文》云:「忒,本作貳。」 然 雅》作「貳,疑也」,即所據毛鄭《詩》本亦必 借「貣」,又以形近譌「貳」,郭注《釋詁 爲《釋言》文者,「言」乃「詁」字之譌。但又云 必作「貳,疑也」可知。《詩正義》以「忒,疑」 有貳心者皆「疑」。 也。」「恁,失常也。」「忒」「岱」蓋本一字,故 也。」皆於「疑」義不相近。《心部》:「忒,更 「貳、副益 ·忒」,故直訓「忒」爲「疑」。 執義如 爽,忒也」始爲「忒」字作音,則所見《釋詁 学中 如「士貳 一,無疑貳之心」,則不獨所見《爾 又「忒」與「棘」「國」爲韻,古韻皆之 也。」「貸,施也。」「資,从人求 亦 譌 其行」、「無貳爾心」,傳皆 爲「貸 惟毛所據《爾雅》本作 説 陸氏於《釋言 文 • 貝 遂 部》: 有 物 謂 緇

> 詁矣。 忒。」」此尤足見毛傳以「忒」爲「疑」誠確 也。 惑於其君矣。』《詩》曰:『淑人君子,其儀不 爲下可述而志也,則君不疑於其臣,而臣 部人 聲, 《緇衣》云:「子曰:『爲 與 貮 字爲 脂 部 去 上可望而 聲者 本 ネ 知 相 也 不 通

覽 成,治其身而天下治。 當作「釋詁」。文。」則孔所見本已誤矣。《吕 段説是也。 《校勘記》云:「閩本、明監本、毛本傳『正,是 長也』三字葢本在『執義不疑』上。」承珙案: 本同。案:"『長』字是也。」段云::「『正,是 也」,小字本、相臺本『是』作『長』,《考文》古 也』不誤,鄭乃易爲『正,長也』。下章箋『正 ,執義不疑,則可爲四國之長,言任爲侯伯。」 · 先己篇》:「昔者,先聖王 「正是四國」,傳:「正,長也。」箋云: 正義曰:「傳言『正,長』,《釋訓 故善響者不於響於 成 其身 而 天下

爲「是」義同。《説文》:「正,是也。 此引《詩》,皆謂正身以 已也,又將兼人。《詩》曰:『淑人君子,其儀 安,人皆失喪之,我按注云:或曰「按,然後也」。 不忒。其儀不忒,正是四國。』此之謂也。」據 起而治之。故仁人之用國,非特將持其有 儀不忒,正是四國。』言正諸身也。」《荀子• 於身。《詩》曰:『淑人君子,其儀不忒。其 聲,善影者不於影於形,爲天下者 富國篇》:「人皆亂,我獨治,人皆危,我獨 以止。」「是,直也。从日、正。」故《左傳》 「正直爲正。」毛義甚精,不必改訓 IE. 國,與毛傳訓「正」 不於天 从止。 爲 而 下

下泉

公侵刻下民,不得其所,憂而思明王賢伯《序》云:「《下泉》,思治也。曹人疾共

二詩驗之,益明。」 害,所以睠懷宗周 發之煩、供億之困、侵伐之暴,惟小國偏受其 子,則强不陵弱,各得其所,政出諸侯,則徵 道之詩,獨作於檜曹,何也? 罪邪」?《吕記》曰:「《匪風》、《下泉》,思周 王曰: 『大國惡有天子,而小國利之。』以此 而憂宗周之隕,何得云「天下大勢,非曹公之 人憂之,而思明王賢伯者,所謂嫠不恤其 分其田,以其私 必至。獻狀之討,固由自取,然晉人執其君、 公寵任小人,群邪用事,則其侵刻下民,勢所 勢,非共公之罪。」承珙案:此非通論也。共 因《候人》而遂以爲共公。 也。」《詩序辨説 憾 謂:「曹無 爲獨切也。 敗 國 殄民,虐亦 然此乃天下之大 他 戦 國、 事 曰:政出天 可考,《序》 甚矣。詩 房喜謂 韓 緯

下流也。」正義曰:「《七月》云『二之日栗「冽彼下泉」,傳:「冽,寒也。下泉,泉

乃謂 所被之政非 發生。至於寒,則不適於用,而徒以浸彼稂 物,故《大東》亦曰「有冽」、「無浸」。 誤。」承珙案:詩取興之意,重在寒泉之浸 冽」, 蕭蓍草而 物鈔》云:「泉以潤物,然必於春夏之時乃能 清』薛注:『澄清貌。』善注引『洌彼下 泉」,字从仌,列聲,寒也。《東京賦》『玄泉洌 水,列聲,清也;《詩》『冽彼下泉』、『有冽氿 『洌』、《詩本音》從之。考《易・井》『洌』字从 「《大東》傳『冽,寒意也』、《唐石經》誤 此「冽」字當從水,與《大東》異,誤矣。 字從 又 仌,是 傷之耳,於以見王澤不下流,而 澤也。」此説頗合詩旨。 遇 寒 之 意, 故 爲 寒 許氏《名 嚴《緝 也 · 泉」, 作 段

『禾粟之莠』、《詩》、《爾雅》音義皆引《説文》一《采,生而不成者謂之蓋蓈。」段注云:「當作非溉草,得水而病也。」《説文》:「蓈,禾粟之非溉草,得水而病也。《说文》:「蓈,禾粟之

《大田》所以言『不稂』也。 《疏》云「禾莠爲穗而不成」者,「禾莠」亦謂 《大田》「不稂不莠」,傳云:「稂,童 之扁子。 莠,似苗也。」若分爲二物。 中之莠。李氏《集解》引陸《疏》正作「禾莠」。 亂苗,不及蓈者,正以蓈 連「禾粟」言之,正以其似禾粟而非禾粟 云:「稂爲穀之有稃而無米者,南方農 郭注「稂,童粱」,以爲莠類,是已。 下又云:「禾粟下揚生莠也。」「蓈」與「莠」皆 穗而不成,崱嶷然,謂之童粱。』今本『莠』作 惡其類禾而別之也。陸璣《疏》云:『禾莠爲 『蓈』『莠』二字連屬之義。云『禾粟之莠』者 『秀』,誤。」承珙案:段説是也。 成莠也。不成謂之童蓈,已成謂之莠,此 「采』作『莠」, 當據 禾不能成實則爲稂。 以 訂 正 并不成爲莠也。 稂雖無米,亦稍有 然諸書多言莠能 生而 豐年 《説文》「莠」 邵氏 不 則 成,謂 粱 無之, 諺 正 耳 也 謂 義 禾 不

稂爲 知。 《左傳》:「伯有之門上生莠。」其爲陸草 取爲民困之喻。 實,因又誤爲稻 云: 由,寤歎 雨之膏、嘉穀自無稂莠。 蕭蓍,以見庶草之盡。卒章言黍苗之盛,陰 舉童粱之得水而 謂『馬餼不過稂莠』也。 米皮,今南 「農家穫稻、簸而揚之以 故毛云:「非溉草,得水而 稻種。若本係 而 方 不 用 能 種耳。 以 總 忘也。」今案: 稂 病,以見嘉禾之不殖,并及 餇 稻 由 鶩、又 誤以稂爲禾之秀而 種 至於《下泉》之詩 此詩人追思盛治所 ,正與水相宜 以飼 去其稂。」則誤 馬、魯語 病 也。」邵 爲 莠 一,不當 類 則 》所 可 氏 不

禾中之草,故易傳,以爲「稂」當作「凉」。 正 義 謂下章「蕭」「蓍」皆是野草,此不宜 箋云:「稂,當作 喻虐 政 孔 困 申 民 鄭 義,尚有未 蕭 凉。 以祭,蓍以筮,皆草之 凉草,蕭蓍之屬。」 盡。 下 - 泉浸 獨 《稽 爲

《緝》則謂泉流 馬相如傳》「其卑溼則生藏 民,政異 如陰雨之膏; 苞稂日 及小人之喻。 知鄭何所據。」考《釋文》稂,「徐又音良」; 兩相比照,其義自明。 蕭、蓍之野草。 爲可貴之草,故疑 證,康成當别有據耳。」承珙案:陳 此,故破『稂』爲『凉』。凉爲草名,無 唯恐不盡 可貴,故 | 五「莨尾似 漢書音義》云「莨,莨尾 説文》「莨,艸也,从艸,良聲」,《史記 凉」,正義曰:「《釋草》未見草名『凉』者,不 恐 而 , 何 茅」;《 其 民 反以 傷。 不知經文但以下泉曰冽,則不 非 《詩所》、《詩貫》遂皆以 不灌 有 爾 「稂」非「稂莠」之「稂」。 見傷 稂 異 雅》「孟,狼尾」注 良苗,而 爲 浸,則異於黍苗之芃 稂、蕭、蓍、黍,皆以 也。 爲虐乎? 害苗之草 艸 也」,索 莨蒹葭」,集 至箋破「稂」爲 所浸乃稂、莠、 隱 氏以 鄭 鋤 引 他 意 而 云「似 郭 解 爲惠 典 或 去之 蕭 嚴 喻 司 璞 引 蓍 可 因

矣。 屬。」陸《疏》云: 茅 口 尾二草,蓋 爾雅 類 相 陸《疏》云:「蕭, 》之「狼尾」歟 似。 亦 以 形相 鄭云「凉草 覆 「蓍似 似者。 屋 <u>₹</u> 然 藾 名牛尾蒿。」狼 《説文》云:「蓍,蒿 則 蕭蓍之屬」者,豈 蕭。」則蓍與蕭莨 莨 尾 即 足、牛 狼 尾 即 亦

子也 案: 廣 謂 諸侯,則知『有王』是諸侯朝聘天子。」承珙 『諸侯 王 而 王二言四 左傳》「宋公不王」、《國 室 朝覲 朝 傳釋「有王」云「諸 聘 。」正義 有王,王有巡守。』『巡守』是天子巡省 也。 亦 惠氏《詩説 國 國 王 在 事 有勤 有王」、箋云:「有王, 襄二十 其 曰:「莊二十三年《左 無曠 中。 王之事。 ₩□: 」,則凡勤 九年《左傳》云: ^ 商 侯 頌 語》「荒服者王」,此 「《風》之言『王』者 有 凡 》「莫敢 會盟 王之事 事」,是「四 謂朝 征伐皆是, 不 于, 所包 一傳》 ┛以 來 聘 王, 於天 或 曰 : 者 蕃 有

> 宜其 齊桓 位。 也。 之後,終共公世 以《曹》之詩曰『四 詩 五 日『王事 衛 思王與郇伯 會盟,共公幾于無歲不往 是時,齊 下泉序》謂 詩 曰 至 靡 桓始霸,挾天子以 **盬**』,秦詩曰『王于 事 |不與 也 共公。 敦 . 國有 我 會盟 共 王」,皆編詩 又 · 而 曰 公於 『爲 曹遂自此不 令諸 魯 興 自晉文入曹 Ŧ. 僖 師 前 之微 侯。 九 驅 年 而 振, 凡 即 終 晉

職,謂 爲州 其當 之諸侯者。 有 事 州諸 伯 二伯 東西大伯分主一方,各自述省其所 郇伯勞之」,傳: 有 侯 治諸 述職。」箋云: 鄭云『州 也。 侯之功。」正義曰:「二伯 易 傳 伯」,謂爲牧下二伯,治 郁 者, 「郇 伯 以 郇 經、傳考之,武 侯 ,文王之子, 侯 也 諸 職 述 侯

0

義》改。 「二十九年」,原作「十九年」,據阮校本《春秋左傳正

武公滅

《荀,以

賜

大夫原氏黯。

今河東有

荀

瓚注《漢書

地理志》云:「汲郡古文:晉

之,衹各治其當州諸侯。

《左傳》桓

九年:

·秋,虢仲、芮伯、梁伯、荀侯、賈伯伐曲沃。」

此郇伯亦當爲大伯矣。

况一州一牧,二伯佐

伯,以兼卿士耳。」以彼證此,彼召伯爲大伯,

《竹書》:「昭王六年,錫郇伯命。」此或郇侯 承珙案:經、傳亦未有郇侯爲州伯之文,惟 公、畢公爲之,無郇侯者,知爲牧下二伯也。」 王、成王之時,東西大伯 彼云「召伯」,即召穆公。 末章四 毛以爲東西二伯,當時 惟 語 有周公、召公、太 與《 小雅 觀 黍 伯 必遠及兖州之曹,曹人 東西大伯 在冀州之境,若爲州伯,衹治其當州諸侯,未 古荀國也。]又云: 城,古荀國。」《水經注》: 云『郇伯勞之』,蓋其故國也。」是則郇侯封國 云 爾 ,曹國在其所轄,如《召南》之思召 「涑水又西逕郇 何爲思之? 「汾水又

此必

爲

西

逕

荀

城

城。

《詩

毛 詩 後 箋卷十 四 終

職。」正

義

曰:「經言召

伯,亦作上公,爲二

伯,故《黍苗序》云:「卿士不能行召伯之

圭瓚秬鬯之錫,明是繼其祖召康公爲東西大

大雅·江漢》所言召穆公在宣王時受九

命

苗》首章略同。

亦必有所據。

此詩

之後繼世爲方伯者。

毛詩後箋卷十五

同義

而

其後

創

制《

周

禮

》,遂

以

播之《籥

王業之本,

與《大

雅

公劉

尚

書

無

逸

章》,專官守之。

若非

追陳豳俗,何以名之爲

涇 胡承珙

豳?

若非周公所作,又

何

以《鴟鴞》以下

六篇皆周公之詩而附於其後邪?

七月

豳

大王 以 遺風,好稼穡,務本業,故《豳詩》言農桑 書 類及之,非以《七月》一篇兼 之本甚備。」承珙案: (孔叢子》引孔子曰:「於《七月》見豳公之所 造周也。」此實周公上述豳俗,以 徙郊,文王作酆,武王治鎬,其民有 地理志》曰:「昔后稷封 《序》云:「《 七月》, 此因言周 陳 王 斄,公劉處 有文 秦 業 風 明農桑爲 武 也。」《漢 俗 時 衣 先王 而 事。 翢 食 連

隨

事

而變其音節者,饒

氏

魯也;

謂《楚茨》諸

詩而亡之者,王氏安石也,

謂以《七月》全篇

篇爲《豳雅》、《噫嘻》諸篇

爲《

楙

頌》者,或説

有雅 之。 用之,恐無此理。 即自用其説。 息老物。」鄭注以《七月》之詩當之,其箋《詩 以樂田 鼓、龡《豳詩》,以 凡國祈年于田祖 頌;又一詩之中首尾相 周禮・春官・籥章》:「中春,晝 畯。 國祭蜡,則齡《豳 而《集傳》非之,以爲風中不得 逆暑。 於是備列三説: 則歐爾 中秋,夜迎寒,亦如 應, 頌》、擊土鼓,以 雅》、擊土鼓 剟其 謂本 -有是 撃土 節 而

氏

言「掌土

一鼓、《

頌

則

謂

者,皆疏家之誤,而 反覆《禮》注、《詩》箋,乃知所謂三分《七月》 稱觥之事爲《豳頌》,與《詩》箋小異。 趾」之類爲《豳雅》,其後章穫稻 月》以當之之説, 雅》、《豳頌》之説,攻詰尤力,謂宋人諸 之,而於王雪山雜引《笙師》、《眂瞭》以釋《 承珙案:《詩》疏 流火」、「觱發」之類爲《豳詩》,「于耜」、「舉 於《周禮》具有 壽」以上爲《豳雅》,「萬壽無 「殆及公子同 信如所言, 然陳氏 不同 翢 總聞》又謂 籥 謂《周 師 則割裂穿鑿 以 猶沿疏 陳氏《稽古編》一 **学**,可 歸」以上爲 承 鄭氏 爲 必必 雖 禮》注以《七月》首章 見此 實未 本《七月》 屬 家,謂鄭氏三分《七 非 臆 無 爾爾 一官專掌以籥 嘗 本。 誠 疆」以上爲《豳 度,於義 有是也。 釀酒、躋堂、 爲無理。 風》,「以 《籥章》首 詩, 《詩》箋 取 無 説 而 而 礙 鄭 今 介 豳 無 駮 和 《七月》又有 取 者,以其言歲終人功之成。」細繹注意,蓋《籥 男女之正。」又云:「《豳 章》於每祭皆龡《七月》全詩 觥,萬壽無疆』之事,是亦歌其 畝」之事,是亦歌其類。 也。《七月》又有『于耜』、『舉趾』、『饁 風・七月》也。 龡之者,以籥爲之聲。《七 詩更將誰 皆爲農事,此畝《豳》亦多爲農事,故爲伊耆氏之樂耳。 龡 言詩,詩,總名也。」又云:「《豳雅》亦《七月》 月》言寒暑之事,迎氣歌其類也 所謂《豳 耆氏》注云:「伊耆,古王者號,始爲蜡以息老物。」蓋 明堂位 迎寒暑,則 豳 **ĕ** 别 詩 屬。 「土鼓、蒯 》、《豳雅》、《豳 無 穫稻作酒,『 曰《豳詩 他 鄭注「龡《 詩,亦 桴、葦籥,伊

也。

氏《詩

别

無

他

器

鄭

注

章

。影引

耆氏之樂。《秋官

伊

頌

》者,舍《七月》一

其

豳詩》云:「《

豳

器之聲有

可通。

取言耕

作

則

日《豳

而

其取

義

此風也

一,而

謂之《雅》者,以

其言

彼

南

頌》亦《七

月》也

躋

彼

公堂,

稱

彼

兕

類也。

謂之頌

别 然分首二章爲《風》,六章以 用之邦國則 雅、頌之義、《籥章》龡之以一詩而共三用,1 《左傳》「歌《詩》必類」之義。 大 雅 如二南爲房中之樂,而 之雅」、「謂之頌」也。 以下繫云「是謂《豳雅》」,「萬壽無疆」以下繫 者,以類推之而 類乎男女之正者,皆謂之雅,其餘所不言 類乎寒暑之氣者,皆謂之風; 言婦子入室, 指類以曉人。則凡篇中言「鑿冰」、「肅霜 .歸」以下繫云「是謂《豳風》」,「以介眉 彼 ,致後人以三分《七月》之説歸咎鄭君 上爲《頌》也。 故 而 注 謂之頌 K 爲燕樂,皆比 謂 己。 之」者 孔 耳。 氏不善讀 至箋《詩》於「殆及公子 蓋以《七月》全篇備風 又曰「歌 1,言因 用 類 之 以 鄉 上爲《雅 鄭撮舉詩詞 此 箋 取 人 義 其 注,妄爲 義 則 類」者 而 並 爲 謂 小,八章 鄉 之 非 壽 即即 正 正 雅 分 截

戴禮• 音節。 鳴 虞》。」 鳴》、《貍首》、《鵲巢》、《采蘩》、《采蘋》、《伐檀》、《白駒》、《騶 邪 ? 安能 頌、《大雅・崧高》云「其風肆好」,又云「吉甫 與樂各有取義,亦非於一詩之中隨 風體也。 《籥章》言《豳詩》者,正 入樂,各歌其類,合乎雅 章》止言龡《豳》,必不當求諸《七月》之外。 如何采詩 籥 耐 謂之「雅」。 章 此 |《騶虞》,三《伐檀》,四《文王》。」而《伐檀》、《騶虞》皆 判 投壺篇》: 惟明乎鄭氏「歌其類」之義,則 》所 惟 且 某章 鹿 其曰《豳雅》、《豳 風 掌《 入樂以 鳴》、《白駒》在《小雅》,《狸首》已亡, 詩 又《漢·杜夔傳》云: · 爲《風 豳 「凡《雅》二十六篇,其八篇可 義 籥 成節奏,後人已不能 兼 》,明 》、某章爲《雅》、爲《 雅 頌, 是 謂 頌 總 猶雅 翢 故 頌》者,則又 括 「舊雅凡四 風》, 也。 之辭 詩 亦 以 此 事 作 歌。 其詩 曲, 頌 兼 而 可 在 知《籥 知,又 以 見 風 歌 變 當 一《鹿 頌 《大 《鹿 其 詩 與 古 H 國

■「詩」,原誤作「時」,據文意改。

風詩。則不得謂別有《豳雅》、《豳頌》而亡

く女

學》,妄改《七月》名「邠風」,而不 明明有《七月》耳。 文》、《初學記》、《太平御覽》諸書所引《韓詩》 《詩》,宋時久亡,即《韓詩》,在宋儒已有見有 名顯然。此真所謂眯目而道黑白者矣。 家之無《七月》。 不見者,故歐公謂衹存《外傳》,則何由 後之作《六經奧論 (左傳》云「《七月》之卒章,藏冰之道也」,篇 歐陽《本義》謂齊、魯、韓《詩》無《七月》, 此不過傳聞謬説,未檢《釋 明人豐坊 》者因之。 僞 爲《魯詩 案: 齊、 知 昭 四 知 世 年 魯

曰 : 終而復始。」案:大小者,謂上自朝廷纘武鑿 歲改歲終始循環 冰,下及閶閻衣食瑣屑之事。 周公作是詩 潛夫論》云:「《七月》之詩,大小教之, 無 "; 有 陳 休 息也。 一歲之事備矣。 終始者,謂卒 范氏《補 傳》 而

頗諦。 月采蘩。 成耳。 章以六月爲始, 木生火,故蠶以三月。]四 月言之。 之月。案:《月令》云:仲春之月,倉庚鳴。 悔。」此説本之程子,於《七月》名篇之意言之 月、十月言之。 十二月。五章以五月爲始,而 月言之。承珙案:何氏《古義》曰:「春 自七月推至四之日,是二月也。 及者,惟《虞東學詩》引:「蔡宫聞曰:『首 事無不畢舉。 未畢,至七月則耕稼耘耔皆已訖功,止 月則過於中,是時 以『七月』爲首,何 則此章兩「春日」皆謂二月也。」三一章即 國君於是月而 而篇中四序錯陳,彼此先後,從無言 承珙 案:《春秋考異 蓋其意欲使之預備,無後時之 八章宜 而推 以農 也? |章以 訓農 至 爲本,前乎此則 繼 九 意者夏正建寅,至 四 郵》 月。 ,則卒歲與 以 月 曰:「桑者,土 推至十月。六 爲 之日 次章即 七章又承九 日,孔以爲建 始, 《夏小正》:二 而 來 推 歳之 俟 一之液 承 田 章 其 至 功

細,故録存之。」外,無他事歟?』論雖無關大義,而推索極外,無他事歟?』論雖無關大義,而推索極「一」言「二」者,豈當「觱發」之時,「于貉」之

之, 孟秋之月, 初昏 况傳以「火」爲「大火」,或即以大火之次言 引《鄭志》答孫皓問,以《堯典》「星火」謂大火 火」。《夏小正》:五月,「初昏大火中」。 述夏初之《豳風》。 案:《豳詩》皆用夏正,不應據周時之星象以 大火西流于地之未位。 六月而後,日在鶉火。 而大火中。 也。」劉氏瑾曰:「堯時仲夏、日在鶉火、故昏 「七月流火」者,據周公所見而言也。」承珙 五 方,直至七月,而火在申位,始流於西耳。 月午位 「七月流火」,傳:「火,大火也。流,下 ,則六月尚 周公時,歲差當退十六七度,故 在申位,故爲西流。 《堯典》: 中夏「日永星 在 七月日在鶉首,昏 此詩上 未位。巳午位 述 豳俗,而 正義 俱 皆 屬 1時 言

之星宿也。心爲季夏中星,初非以《七月》所言必是周初之次,與《七月》之「火」爲心星别。此亦但謂

日」、『四之日』,不復稱正月、二月,連文也 體,故變文稱『一之日』、『二之日』。 可云三之日,以次而終於十二。若言『十有 日,子月可云一之日,丑月可云二之日,寅月 子爲一,丑爲二,寅爲三,卯爲四。 之爲十二月建,由來久矣。十二子始正北 戌亥爲西北之維。《堯典》又以四方配四時, 北之維,辰巳爲東南之維,未申爲 卯正東,午正南,酉正西,子正北,丑寅爲東 皆非也。 春東作,夏南訛,秋西成,冬朔易。 則十二子 所自起,又或以言『月』言『日』 穿鑿爲之説 一月觱發』、『十有二月栗烈』,則失《詩》辭之 戴氏《詩考正》曰:「後儒以是詩爲周正 自大撓作甲子,以十二子正四方, 西南之維 下『三之 以之繫

而

寅月爲正月,則又礙於周王之正朔,故不 之日」乎? 蓋以 有一月、十有二月以不辭而改爲「一之日」、 異,未必全無意義。 氏,謂言「日」又言「月」,別無義例,只是文 不變其文例,於子丑之月以數紀之。 趾」,未爲不辭也,而何以必曰「三之日」、「四 至『四之日』,下變文稱『九月』、『十月』,又曰 日』,亦失《詩》辭之體,故卒章因『二之日』連 二之日」,可也。 而要之,止用夏正,非雜舉周正,是以『二之 「春日」,曰『蠶月」。 紀時之法,不泥一定。 月、十月若云『十有一之日』、『十有二之 月」、「二月」,則仍混於周正,且與下 而言『卒歲』也。」承 然《三百篇》固多用夏正 以子爲正月,則非追述夏時之義。 周公而陳豳公之事,若用 若云「正月于耜」、「四月舉 如但以隨文便稱,則 珙案:此説本宋張 ,而此篇設 然使言 如以 文 立四 得 周 + 獨 0 謂之「一」耳。可見傳先言此者,正欲人知經 數,連十言之,則爲十有一。除十言之,則直 「日」,謂一月之日、二月之日也。 至於寅卯 月」、「五月」等稱夏時者不合,故又變「月」言 詩》通用三正也。 周四月也。」●不過指類以曉人,亦非 殷正月也。」「三之日,夏正月也。」「四之日, 其下又云:「一之日,周 文但以數紀之意,並非以此爲周正所自起 「一月戊午,師 也。」蓋以十者,數之終。十月之後當復 名,而因見其義也。 「四」。雖云便文,亦即所以 之月,既不可云「正月」、「二月」,又不得再言 「一之」、「二之」,故遂因乘上數稱爲「三」

順。

日

九

四 月」,原作「正月」,據阮校本《毛詩正

渡孟

津」,劉歆《三統歷》見《漢

或

謂

尚 書

泰誓》序云

謂《

豩

正月也。」「二之日,

傳云:「一之日,十之餘

起

避

周正夏正之

必 未免穿鑿耳。 數、《豳 子月可稱一月。 「月」。 詩則因詞託 月」言「日」。 如正 引《武 風》以周公而述夏時,焉可比例。 義「陽生稱日,陰生稱月」之説,則誠 成篇》「惟 况《泰誓》、《武成》專以 不知史文據事直書,自當 事,其體 一月壬辰,旁死 不同,故 周 霸」, 可 正 但 起 變 稱 是

部》有『凓』字,知《七月》作『凓』也。 冽 注引毛傳:『凓,寒也。』今本誤「溧」。 引《毛詩》『二之日栗冽』,毛萇曰:『栗冽,寒 引毛傳: 『慄冽,寒氣也。』《古詩十九首》注 例」,字從冰,是遇寒之意。』《文選·長笛 發,風寒也。 曰:「《下泉》正 ,寒貌。』『冽,寒氣也。』按、
(五經文字·八 也。』《説文》:『凓,寒也。』《玉篇》: 「一之日觱發,二之日栗烈」,傳:「觱 栗烈,寒氣也。」段氏《詩小學》 義:《七月》云「二之日 《風賦》注 今《説 『凓 賦》 . 凓

假借。 火兒」,上字十二部,下字十五部,正与 文》:「滭,風寒也。」《毛詩》即借吹角之「鷄 **冹、**澤沸同。 文『誖』字,在十五部。《説文・火部》『熚 司馬相如賦作『滭沸』,一作『滭浡』。 **鱀發栗冽,皆音之譌。** 《説文》、《字林》均有『冽』字。 詩》字多假借,豬 皆疊韻字,以《説文》爲正。 滭 拔字在第十二 颲。』考《風部》不引此詩。 訛爲『瀨』。《釋文》云:『栗烈,《説文》作 颲 也」、《嘯賦》注引《字林》『冽,寒貌』,是唐 『滭冹』爲正。」承珙案:段説是 「例,寒貌」、《高唐賦》注引《字林》「例,寒風 文》無『冽』字。 且其字不古雅,當從《説文》 **觱从角、叠聲,當爲冹沸字之** 『有冽氿泉』正 發 疊 《小雅》『觱沸檻泉』, 韻 栗 今《説文》『例』 烈 義引《説 雙 聲。 》所引 整,古 《毛 時

也。」正 之説。「七月鳴鶪」或 毓申毛,以 今本作「晚節」,誤倒。 國,非是寒來早,明是寒來晚,故温 言『九月肅霜』,與中國氣同。 功」亦可行於丑 承珙案:《釋文》於毛傳「晚寒」云:「 來晚也』。毓之此言,似欲有理,但案經上下 早寒,北方是也。 張逸云晚寒亦晚温,其意言寒來既 毛傳言晚寒者,豳土寒多,雖 上傳舉晚寒以 晚寒,則此箋當言晚温,而亦言晚寒者,鄭答 『晚寒』者,謂 由 緝》本之,謂 寒氣 義 晚至,故耕 云: 爲 雖 氣候晚而多寒,故 温 明 『三之日 晚猶寒 氣 月,皆不足爲 晚温 而 晚 熱鄉乃 田 氣寒也。」此語 耳。 晚 非舉其 則 ,實勝鄭箋寒氣 也。 于耜」言『晚寒』者 鶪 孫毓以 晚 鳴 晚猶 穫稻 寒,南方是也 『七月 始鳴、「載 晚 寒晚、温 耕 也。 爲 寒,非謂 事 最 亦 乃晚於中 鳴鶪」言 晚,故順 『寒郷率 遲。 謂 上傳言 當。 晚 纘 節 晚之 晚 也。」 武 至 孫 晚 寒

凓冽。

如字。

《大東》正義雖俱引《七月》作「凓冽」,然《四

栗烈、《釋文》亦云「並如字」。《下泉》、

文》云「如字」。《詩》中如《

匪風》之「發兮」,

四月》之「飄

風

發發」,皆以「發」爲「風」,是

爲之,猶「觱篥」亦

通作

篳

篥」 也。

發,《釋

月》箋又云「烈烈,猶栗烈也」,則毛本未必非

《吕記》引董氏云:「栗烈、《集注》作

烈從火,不得爲寒氣。」泥矣。《釋文》

又云:

栗烈、《説文》作風

颲。」今《説文》

月則鳴,豳 晚寒。」案:毛言晚寒者,唯此 二之日其同」云:「不用仲冬,亦豳 ·七月鳴鶪」云:「伯勞鳴,將寒之候 「三之日于耜,四之日舉趾」,傳:「豳 地 晚寒,鳥物之候從其氣 一 條。 馬。」於 箋則 地 也。 晚 五. 於 土 寒

見《毛詩》不同,或兼采三家詩,皆未可定也。

所據本有之。總之,許書「滭冹」等字,或所

颲」讀若栗,「颲」讀若烈,而不引《詩》,或陸

至,然四章又言「八月其穫」,自是穀種不同 屬可通。 取冰,即是二之日鑿冰,藏之或遲一月,且 嘗麻,乃屬天子之制,豈必同於農夫? 驗。 紀其始則早,詠其繼則遲 鳴、草木之落,非一鳴 之寒晚於中國者, 入室,乃言出令之初,未必限於本月。 (月令))亦未明言藏於何月也。 故當但如傳意雖晚猶寒,則地 至 正 正義 義 於 又以 傳箋 又有六事。 穫 外, 稻 而 以《月令》校之, 晚於中國爲寒氣晚 輒止,一落而 ,何必盡同 然如 以上多本《稽 氣物 ? 倉 遽 庚之 季冬 季秋 候皆 嘗稻 爾 盡 地 古

酒 解『至喜』之義,但毛無破字之理,不得 中,其見田大夫,又爲設酒 食也。 田 其事,又愛其吏也。」正 畯至喜」,箋云: 耕者之婦子俱 以 「喜,讀 食焉。 饟 來至 義 爲 日 : 「 言勸毛本作 一於南 饎。 以 傳不 畝之 饎, 爲

非

由於寒來晚也。

文同 爲回 則此 珙案: 饋以勸農人,司嗇至則又加之以酒食,三詩 田》、《大田》兩言「田畯至喜」,又以爲曾孫設 舍人本如是。 或因古本《爾雅》「饎」有作「喜」者。《釋文》引 雅・天保》、《大雅 酒 食。 護,非也 而義異,宜其並爲孫毓所短。 自當如王肅 《釋文》云王 當謂 然此箋云爲 田 畯 派所申。 來 • 泂酌》始訓「饎」爲酒食 至,見 肅申毛,如字。 田 鄭箋破 勤 畯設食,而 勞故喜 「喜」爲「饎」, 孔疏皆曲 樂耳。」承 毛於《小 於《甫

與黄 按 : 而言 氏《識名解》曰:「舊謂 謂 而 此 即《葛覃》之「黄鳥」,非是。 鳥固 豩 (詩及《東山》、《出車》,何以皆不言黄 倉 「有鳴倉庚」,傳: 土屬、 庚 爲二物,而《爾雅》之「倉庚,鵹黄」、 ,則當爲 雍州 爲關 兩物明 中之域,與 關 倉 矣。」承珙案: 西呼 庚,離黄 辨見《葛覃》。 倉庚爲黄鳥。 弱 也。」正 西 接 倉庚 壤。 鳥 姚 義

之,非也 離黄、倉庚並指 楚雀也。其色黎黑而黄。」此亦用《爾雅》,與 但毛傳作「離黄」,《月令》注又作 説文》「離黄,倉庚也」,與毛字同。 鵹黄,楚雀」、「倉庚,商庚」,則 **雡」下又云:「雡黄也。** 物。 段注以篆不類廁而 从隹,黎聲。 同 「驪黄」,惟 爲 《説 — 曰 物。 疑

之用 仲既 用。 事。 所釋,以與《七月》文同,則義可知。 緩 傳》引「或説 木萋萋。 也。」案:《小雅 也 而范氏《補傳》則謂蘩 正義即引《七月》之篇,以采蘩爲蠶 平獫狁,其戍役歸者喜見時物 春日遲 蘩,白 夫《召南》之「采蘩」本爲豆實,而《集 倉庚喈喈,采蘩祁祁」。 調 . 蒿 遲,采蘩祁 所以生蠶。《七月》之「采蘩」 · 出車》云:「春日 也,所以 生蠶。 祁」,傳:「遲 乃婦人采 祁 毛傳 遲 祁 以以 此言 爲 遲,卉 衆 遲,舒 祭祀 生所 更 及 其 南 無 多

> 立異有如此者。 祇爲洗蠶,而范氏又疑爲祭祀之用,其好爲

二年《傳》: 也。 秋 指豳公之子。 之變而動其勤苦之心耳。 爲感事苦,其又云「物化」者,亦 之女同歸,則失之僭,且於下『爲公子裳』、 然,則失之褻。以『殆及公子同歸』爲欲與公 『爲公子裘』有礙。」承珙案:傳但 悲則始有與公子同歸之志,欲嫁焉。」輔 男,秋士感陰氣而思女,是其物化所以悲也 時出,同時歸 悲,感事苦也。 曰:「舊説以『女心傷悲』爲感春陽之氣而 傳 殆,始。及,與也。 》者,桓三年《左傳》:「公子,則下卿送之。」莊三十 女心傷悲,殆及公子 「雩,講于梁氏,女公子觀之。」昭三年《傳》:公 也。」箋云:「春女感陽 雖男女通稱公子,其見於《春 春女悲,秋士悲,感 豳公子躬率其民,同 所云豳公子者, 同 歸 衹 謂 以「傷悲 傳: 見時 氣而 其 物 氏 物 即 思 化 傷 廣

婦乎? 乎? 得言 毛指。 孫蠆 爲悲 當嫁於男公子,不惟非女子所宜自忖,於『殆 傷悲』止同歸之一人乎?」方氏苞曰:「若謂 其許嫁之女,預以將及公子同歸而遠其父母 淫九公子於宫中。」注云:「女公子也。」尚不僅 及同歸』文義亦不協。」以上三説,所辨皆是。 總之,此章求桑采蘩專言春日蠶事之勤 傷悲」者言勞者之作歌,「同 $\frac{1}{Z}$ 以 大姒,莘國女。安得豳國大家連婣 、,即如周之大姜,有逢氏女。 大任,摯國 徐位 ,然傳意似非指女公子,鄭箋所言恐 「同歸」。 其 至《集傳》云「是時公子娶於國中,故 如此則於經文傳意皆合,而亦別無窒 女更公子而嫁公子。 《稽古編》謂"「于歸」止是女子,不 且『采蘩祁祁』既曰『衆多』,而『女心 山口:「此治蠶之女果即豳 且古國君不臣妻父,往往娶於 昭三十一 `歸」者見貴 年《公羊 如 傳 公之 公室 人之 正 故故 非 義 顔

> 礙矣。 春日之難留也,故傳曰『春女悲』。」 蘩,而暮歸之又將及也,是可悲也 來遊者又將歸矣。夫以遲遲之日、祁祁之采 時焉者。 妻,迨冰未泮,冰泮 之子之歸之也,未聞曰『同歸』者。 也。女與同歸,觀公子之儀容徒御,隨其 長,所以傷悲,人常情也。 而還也。」《毛詩寫官記》曰: 王氏《詩總聞》曰: 蓋春日遲遲,采蘩祁祁,而公子之 而 婚禮殺,未聞: 公子適野 「女見: 「言歸妻者,惟 物 甚矣。 公子而 且士如 7,勞田 後 夫 失 者 年 歸

『條桑』無傳,於『遠揚』曰:『遠,枝遠也。實』之『落』。《僮約》云:『落桑皮椶。』毛於不同。今本云『枝落其葉』者,『落』如『我落其條』。鄭云『枝落其葉』者,『落』如『我落其條』。鄭云『枝落其葉』者,『孫』 如『我落其葉也。〕段氏《詩小學》曰:「『條桑』箋,各本葉也。」段氏《詩小學》曰:「《條桑」、養之采其

取 其葉,則又與「猗女桑」同。 枝,則下不應復言「伐」。 若謂不落其枝而采 字爲『挑』也。 斨』二句爲條桑之實。 **斨伐遠揚者,伐其** 揚 反。」此蓋讀 爲條桑。 未必定俗本也。 毛意條桑、伐遠揚爲二事,鄭箋則『取彼斧 亦謂「條」爲挑撥而取之,故云「不備取」。 曰:「蠶月挑桑。」』此最爲俗本。」承珙案: 桑者,條其 「條」有「挑」義,字或作「挑」,《玉篇》所據 釋文》云:「條桑,枝落 ?,條揚. 也 語,乃總下文「伐遠揚」、「猗女桑」二事皆 一。」蓋條 也。」强者爲枝、弱者爲 條者,取也。 下垂 桑者,取桑之大名。 「條」爲「鈔」。 《玉篇》:『挑,撥也。 不揚起之條,采其葉也。 總之,「條桑」若以爲 遠人之枝、揚起之條 《釋文》:「條,沈暢遥 要之,皆不改經『條』 也。 《説文》:「鈔,叉 竊意「蠶月條 不備 曰伐, 曰猗, 條。 取 耳。」此 此云條 《詩》 落 桑 也。 其 亦 斧 蓋

正條桑之事。當以沈重所讀爲正。

傳》疏 曲 東而采之」,亦謂戾曲其枝,然後可采。 其條,但牽引使曲 作「剌」。《説文》:「剌,戾也。 言》:「捔,掎也。」「角」與「捔」同。 束,疑本 引」之義。 《國語》「掎止晏萊」韋注「從後曰掎」,皆「偏 《小弁》「伐木掎矣」傳云「伐木者掎 引也。」《毛詩》字雖作「猗」,義當與「掎」同。 之。」正義引襄十四年《左傳》「晉人角之,諸 箋云:「女桑,少枝長條,不枝落者,束而 刀者,刺之也。 戎掎之」爲證。 桑,夷桑。」正義本作「柔桑」,非是。 其足,而後擒之。 云「掎之,言戾其足也」。 猗彼女桑」,傳: 此傳云「角而束之」者、《廣雅・ 戾,曲也。 承珙案"《説文》云"「掎,偏 而采之。 是「掎」但 角 蓋女桑枝弱,不伐 箋云「不枝落者, 而 東之日 當從定本作「荑」。 訓 从束,从 蓋捕獸者戾 刺 其巔 刀。 釋 女 采

選 其字借「猗」爲之、《齊詩》則用其本字耳。 惟《吕記》引董氏曰:「《齊詩》『猗彼女桑』作 雖 以 所本。然《伐木》正義云:「掎者,倚也。」謂 之者,不斬其條,但就樹以采其葉。」考《文 義。 束 『掎』,蓋掎而束也。」可見毛義與三家同,但 桑條之狀。 猗」爲「長」,則用《節 猗,長也」。 物 以「倚」訓「掎」,要不得爲「倚樹」之「倚」。 縛。 掎 七發》注引《詩》「倚彼女桑」,嚴説似 其峰巔。 桑者何用 詩 嚴《緝》又云:「猗,倚也。 疏 然此 以「東之」爲「束縛」, 此言伐木者以物引 束縛而後采乎? 詩言采桑之事,不當 南 山》「有實其猗」傳 蘇 乃望文生 而 傳 語之, 倚 僅 訓訓 有 取 云

趙」 爾 孟 雅 子》作「博勞」。 司至者也。 七月鳴 正 義 鶪」,傳:「鶪 引 《夏小正》作「伯 樊光注 皆以音近 即《春秋傳》之「伯 伯 而變。 勞也。」毛訓 鶴。 郭璞注 趙 注 本

選 注《漢 鳴」、《夏小正》「五月鴂鳴」、《逸周書》「芒 《史記》之「秭鴂」乃子規、歷書》「秭鴂先 「苦苦」不相 其聲『鶪鶪』,故 義引陳思王《惡 害之鳥也。」《通雅》又謂 曰:「鶗鴂, 鳴。」是也。《離騷》之「鶗鴂」,則伯勞。 索隱云:「秭鴂鳥,春 穀。《丹鉛録》謂 旦。 鴝鵒 文》云白 云: 爾 雅 **^** 思玄賦》「鶗鴂鳴而不芳」李善注引服虔 鴝 鶷 遯齋閑 <u>*</u> 書》 鵒 頭 葛烏 以 喙 鳥,謂之鶷 似 似 一名鶪,伯勞。 類矣。 黄,伯 爲子規,不 覽》謂爲 伯 鶷 以 鳥 勞 爲架犂。 鶮 論》云: 其音名。」云「鶪 勞 而 若《月令》「仲夏, 鶪 而大。』《釋文》引《字林 喙 鶮。 氣 梟。 小。』《初學記》引《通 鶪即 黑。 知 發動,先 「伯勞 《國 諸説不一。 《禽經》注謂 子規 順陰氣 《方言》謂 苦鳥。 史補》謂 以 出 名 鶪」之與 不 而 Ŧi. 埜 1秭鴂。 月鳴 生, 知 至顔 爲 形 爲 滜 種 始 而 賊 文 IF. 布 鶡 似

之例也。 十月 誤。 類是也。 第相因,「七月流火,八月雈葦」、「四月秀葽,五月鳴蜩」之 又五 句,而義已參差,韻復無别,於例爲不倫矣。 蠶月,五月之去八月,中間甚遠,故必轉韻。 也,而下句「八月其穫」則與「十月隕蘀」爲韻。 别之,如「七月流火」與「八月在葦」韻也,而下句「蠶月條 經文果誤。王氏《經義述聞》曰:「是詩紀月之例,或次 云五 總之,《月令》諸 桑」則與「取彼斧斨」爲韻。 以古「五」字如「七」,經文「七月」乃「五月」之 然詩文皆用夏正,不應於此獨用周 司至」悉合。 詩》則但言其鳴爲將寒之候,以起下文「載 隕蘀」之類是也。 然趙注《孟子》引《詩》亦作「七月」,未必 月夏至後, 鶪應陰 日 若作五月鳴鶪 或相距一月,『七月流火,九月授衣』、『八月其穫・ , 鶪始鳴」, 及《吕覽》、《淮 此詩云七月者,或據周正言之。 書言「五月」者、紀其 其有相距不止一月者,則必轉 ,則與八月載 「四月秀葽」與「五月鳴 而鳴,與《左傳》「伯趙 績相距兩月。 此《七月》一篇 南》等注皆 肅説非是。」 Ĕ 蓋八月之去 始 文甫二 「蜩」韻 王肅 韻 鳴。 以

馬」。 譌耳。 地行 《藝文類聚》引《通卦驗》云「伯勞夏至 月。蓋伯勞以夏至鳴,冬至去,五月以 其鳴時。 况鳥物之候,容有不同,鄭箋説 績」,故以 今本《通卦驗》云「小暑伯勞鳴」,則又爲六 鼠 作「鴂」者,字之借,作「鵙」者,字之 ,伯勞所化。」是也。 其去也,蓋化爲鼠。《説文》: 七月、八月連言之,不必定指始 「鵙」字當 亦 可 一鳴」 通 「鼢 後皆 作 而 如

草》云:『萯生田中,葉青,刺人,有實。七月季。』葽其也。」箋云:「《夏小正》:『四月,王萯秀」,夢其是乎。」正義曰:「《月令》『孟夏王瓜生』注云:『今曰「王萯生」。《夏小正》云「王萯秀」。未聞孰是。』鄭以四月生者自是王瓜,今《月令》與《夏小正》皆作『王萯』,而生秀字異,必有誤者,故云未知孰是。《本生秀字異,必有誤者,故云未知孰是。《本生秀字異,必有誤者,故云未知孰是。《本生秀字異,必有誤者,如人,有實。七月

芧、萯、蒹、葽」,「萯」與「葽」並列,則王萯非 論。 熟鬻之,乃可用」。 采, 之「秀幽 毛氏《詩 葽可知。 説,張揖復同《雅》訓,《詩》之「秀葽」可爲定 其上謂之小草。」嚴《緝》引曹氏《詩説》以 説 繞」之號,劉向又有「苦葽」之稱,許慎已宗劉 爲遠志,又云「今遠志苦澀之甚,醫家以 注:「今遠志也。」《廣雅》:「蕀苑,遠志也。 故引以 用毛傳,故引《詩》曰「四月秀葽」,又云「劉向 葽與否,未能審之。」《説文》:「葽,艸也。」即 穆天子傳》「珠澤之藪,爰有萑、葦、莞、蒲、 此 鄭箋以王萯當之,孔疏已不謂然。 味苦,苦葽也」。 乾。]云七月采之,又非 爲 札》用 他如邱光庭,則以秀葽爲苦菜秀, 證。《爾 戴氏《詩考正》用之,且引《戰 之。 承珙案:《爾雅》既 陳 雅》:「葽繞、蕀蒬。」郭 此必劉向説《詩》之語, 翥 則 以 爲 四月已。 即《夏 小正》 有「葽 今考 甘草 秀是 葽

> 者爲近古也。 早者爲言,豈有汎言草盛之理? 説,皆不如曹氏據《説文》、《爾雅》定爲 汎言草之盛秀。 夫人歌》「豐草葽」注云「葽,盛貌」,以爲《詩》 苦葽不合。 於六月,而非四月」,且 或 而謂「葽」即「莠」,則程氏《九穀考》云莠「秀 正》云「四月秀幽」,謂「幽」爲「葽」之轉則可 魏策》「幽莠之幼 至馮氏《名物鈔》據《漢書 夫《詩》紀物成,專取秀之最 也似禾」 莠試之而 爲 味甘,亦與 證 故 歷 唐 夫《小 遠 觀 諸 Ш

之蜩, 《夏小正》五月,「良蜩鳴」,又「螗蜩 矣。 雅 於彼傳云:『蜩,蟬 云: 此云『蜩,螗也』,恐字有 「《蕩》詩『如蜩 「五月鳴 陳鄭之間謂之蜋 蜩,蜋 蜩 蜩」, 螗 傳: 蜩。」《方言》: 如螗」,不得 也 蜩,宋衛之間謂 螗,蝘 蜩 螗 誤。」 也。」 也。』其説 爲 「蟬 承 鳴。 嚴《 物。 珙 之螗 案 緝 爾 是 謂

嘒」,傅又云: 文則 不必執彼以非 蜩。」是蟬 别, 此 可 以 名 蜩 散文通 此 蜩 ,蜩亦可 蟬 也。」亦散文通稱之例, 稱。 '名螗。 \Rightarrow 小 雅 《蕩》傳 》「鳴 蜩 以 嘒 對

《黄氏日鈔》曰:「《説文》乾葉爲蘀,此約《説 槁 删之,是也。 文》意,非本文如是。 語 古訓詁多有此類。 樹檀而下其蘀」,是明以「蘀」爲「乾葉」。 蘀」,傳亦云:「蘀,落也。」《廣雅 與『隕』字何别?」承珙案:《鶴鳴》「其下維 落者爲蘀,即訓「蘀」爲「落」,猶《葛覃》傳云 獲, 煑也」,原本「煑」下有「之」字,盧校據《釋文》、正義 蘀,落也」,正用毛傳。《鶴鳴》傳又云「尚有 簡 也。」彼「槁」謂 「十月隕蘀」,傳:「隕,墜。 ,無庸更加 以 煑之於 濩,即 當從之。 槁葉,猶此「落」謂落木,毛 「木」「葉」字。 **鄭** 風 . 注云『蘀,落也』, 訓「濩」爲「煑」。 蘀兮》傳:「蘀, 鄭箋於「蘀, 蘀,落也。」 釋木》 蓋

傳之訓「蘀」爲「落」,非「零落」之「落」矣。「若振槁然」,「振槁」即《漢書・汲黯傳》之因時之變。《荀子・王霸篇》、《議兵篇》皆云因時之變。《荀子・王霸篇》、《議兵篇》皆云

逗。 皮,明貉之爲皮可知矣。 故傳補言『皮』。皆以 讀,『皮也』二字當句。 謂取。狐狸,皮也。」箋云:「于貉,往搏貉以 不更解,但分别用裘之不同耳。 不言『取』,故傳補言『取』。 自爲裘也。 幸不失鄭意耳。 傳語簡貴,讀者多誤。 謂取狐狸皮」爲 『謂取』二字當句。于,往也。經言『往 「一之日于貉,取彼狐狸」,傳:「于貉 狐狸以共尊者。」《稽古篇》曰: 《吕記》解『貉』爲狐狸之居, 句,故其申毛,詞多牽合, 補爲釋 經『狐狸』不言『皮』, 『于貉』二字當讀,音 康成善會毛意,故 『狐狸』二字當 也。 仲達誤 且狐 狸言 讀

皮。二 取。 物 物,猶之下章誤 大 承珙案: 爲《周禮》『祭表貉』之事,皆誤讀毛傳者 于耜」、下文「于茅」,皆實有其物,則「于貉 也。 往 强 與狐、狸爲三物,明矣。 語 狐 取 合 北 貉 意瞭然。 狸言取,不言往,皆是往捕之而 陳説是也。 無 狄 疑。 貉 字 况傳引「狐貉之厚以 以 Œ. 爲 義云:「于貉言往,不 斯 篇中言「于」者,如上文 義 螽、 《集傳》誤 莎雞、 埤 雅 **>** 蟋 议是 蟀 居 以 爲 爲 取 也。」 貉 其 則

兒 率 振 即 如 斯 以 養 紡 螽 羽 螽 之,聽其聲,能食瓜莧之屬。 六月 斯解 作 絲 Ŧi. 蚣蝑 之 月 振 聲 見《周 斯 其狀 羽作聲,連夜『札札』不止。 故 也 螽 動 頭 莎雞 南 名梭 股, 小而 **%** 六月 羽 ^ 雞 羽 爾 成 ,一名絡 大,有青、褐 莎 雅 而 雞 振 翼》云: 訊 振 崔豹《古今 之。 緯。 羽 「莎 兩 其聲 斯 今小 傳 種 雞

鳴者。 爲 矣。」 又混 者。 注。 起 小 而 非 重 也。」馮氏《名物疏》云:「斯 羽,索索作聲。 蟀。」案,蟋蟀與 云:『莎雞 注 斯螽 異 於 其類。 物,不當合而言之。 ,下翅正 蟲黑身赤 **>** 陸 曰 (其名。 承 崔 莎雞 人 : 璣 珙 斯 ,其誤不始於程氏 IE. 迥然三物 『莎 則 案:《月令》疏引蔡氏 熊。 ,蟲之以 今莎雞之鳴, 螽, 似蠶 其誤起於程正叔,而正 赤,或謂之天雞。 云: 雞 頭 可 正 蛾 「莎 、促織 幽 謂 也。 名 熊 翼 名莎 而 州 誤中之誤。 促 混 雞如 (鳴者。 五色,亦曰 是 人謂之蒲 朱子云 織 莎 孫炎解螒 乃止 雞)雞、蟋 蝗 物,莎 然斯螽 名絡 蟋 而 螽,蟲之以 據 而 六 物,隨 正 蟀, 斑 説 蟀 振 錯。』《 羅 犨 月 7、天雞 雞與 義 色, 亦 爲 羽,不 緯 引, 氏 蟲之 中 雞。」蓋 莎 叔之誤 辨 毛 絡 此 飛 時 以 廣 以 爲 之 正 以 待 變 蟋 股 翅 緯 名 而 志 樊 叔 又 化 蟀 注 船 皆 振 鳴 數 爲 是 蟋 光

繼以翼 近人。 又云《豳風》「七月在野」三句皆謂 晚則同 説者解蟋蟀居壁,引《詩》『七月在野』,以 云: 何以 而 蟀之當 動股」, 變爲 「自七月至十月入牀下,皆謂蟋蟀。 歷 一卷之中自相矛盾,殊不可 莎 爾。」此申箋説,是也。 然今蟋蟀有生野中及生人家者,至 八月、九月、十月而 鳴者? 爲三物, 雞,莎 曰「振羽」,豈有 雞 即 即 謂 以 月而 隨時變化,則斯 經 文 變爲蟋蟀, 不變邪? 一蟲而先以 核之已明: 而「莎雞 莎 雞 蟋 螽 又羅 股 條 寒 蟀 鳴, 則 一歲 爲 月 曰 下 而 氏 又

室,謂 謂 户。」箋云:「爲此四者以 室,塞也。 風 雨 窮極 穹窒熏 攸 除 室中 向,北 也 鼠,塞· 之穴隙 出 其穴有鼠者,更熏而去之, 牖 向墐户」,傳"「穹, 也。 而 塞之,以禦寒氣,所 備寒。」承珙案: 墐,塗也。 庶人蓽 窮。 穹

則所謂 事。 塞鼠之窟穴,則與此箋四事之言相謬戾 室,塞。」而又云:「穹窒鼠穴也。」似即謂 訓義皆同毛傳。 《説文》:「穹,窮也。」「窒,塞也。」二字 鳥 鼠 攸 去也, 鄭《東山》箋亦云:「穹,窮。 與「 塞 向 墐 户 自 爲 窮 四

棣」; 高山 李」之名,而《廣雅》即 鬱本棣屬 月》正義引劉楨《毛詩義問》云:「『其樹高 「山有苞棣」但言棣,而 蘡薁也。」案:傳云「鬱,棣屬」,是以 云:『鬱,一名雀李,一名車下李,一名棣,生 六尺,其實大如 棣之屬。 則與 川谷 「六月食鬱及薁」,傳:「鬱,棣屬。 蓋惟 棣 ,故陸《疏》「唐棣 或平田中, 相類,故云『棣屬』。」此疏 唐 李,正赤,食之甜。」《本草》 棣 得專名「棣」,故《秦風 以 五月 傳即訓爲 爵梅、爵李爲鬱。《齊 有 時實。」言『一名 「雀李」、「車下 唐棣。 鬱爲唐 是 令七 也。 薁, 五.

民要 袁 棣 記 名棣,亦名奥李。」古人多以鬱與棣 薁。」則誤矣。 謂:「車下李即鬱,薁李即薁。 蘡薁者,亦是 棣」,此所謂「棣」,皆唐 鬱」之通轉。 類 中 種之中,又微有别,故《晉宫閣銘》云華林 」,《太平御覽》引曹毗《魏都賦》「若榴 術 而 有車下李一百一十四株, 薁李一株。 司馬相如傳》「隱夫鬱棣」、《漢書》作「薁 小别,二者相類 雅 唐棣單 名雀李,又名車下李,又名郁 稱 棣,而鬱乃棣之類, 棣。 而同時熟,故言鬱 「薁」「郁」,皆 並 言。 正義 **©**史 李,又 此 郁 乃

『蘡」『燕」,聲之轉。《詩正義》以薁爲樹名,薁,蘡舌也。」王氏《疏證》云:「即蘡薁。《廣韻》則云:「蘡薁,藤也。」《廣雅》:「燕傳:「薁」。《玉篇》始有「蘡」字,但云「草也」。

《疏》言蘡薁甚明、《稽古編》謂陸《疏》釋鬱 《山居賦》云:『野有蔓草,獵涉蘡 部》,『薁』在《草部》。毛公但云『鬱,棣屬」, 今 案: 馮氏《名物疏》謂薁與鬱俱爲棣屬,故同得 案:王氏、段氏説是也。《齊民要術》引 「薁李」即「薁」。 不及薁,誤矣。孔疏以「薁李」字偶同,遂以 李』、『薁李』,皆非毛許之『嬰薁』也。」承 未嘗云薁、鬱屬。 注《説文》云:「《説文》『李』『棣』皆在《木 可作酒。』是蘡薁有藤,蒲萄之屬。 薁藤。」郭璞《上林賦》注云:『蒲 生。』《御覽》引《毛詩提綱》云:「藟,一名燕 藤實是。』又引《疏》云:『櫐似 義疏》云:『櫻薁實大如龍眼,黑色,今車 屬,蔓生結子者耳。 **獘李樹** 不 説《詩》者言之,多不 名 《晉宮閣銘》所謂『車下 蘡 《齊民 薁, 蘡 (要術)引陸 薁 自 燕 薁,連 萄 故謝 是 似 蒲 燕蘡 一璣《詩 能 陸 靈 萄 珙 段 蔓 之 而 運 鞅 璣

者合。然則蘡薁之爲草而非木,信矣。如蘡薁。」亦與《詩義疏》「實大如龍眼,黑色」山經》云:「泰室之山有草焉,白華黑實,狀薁李係木生,蘡薁係蔓生耳。《山海經・中「車下李」之名。所言尤欠分曉。總由不知

《詩》又未嘗以爲山韭,不得合《爾雅》、《韓 《詩》而不及山 《韓詩》家果有此説。《説文》於「藿」下引 詩》爲一也。 訓以爲《爾雅》『藿,山韭』。」承珙案:《韓詩》 蘇頌《本草圖經》皆引『食鬱及藿』,而《韓詩》 藿。』」段氏《詩小學》曰:「掌禹錫等《本草》、 也。」可見許所據《爾雅》本不作「藿」,而所引 見「藿」字與《韓詩》同,而遂以山韭當之,非 藿,山韭」之説,見《爾雅》邢疏。此蓋邢昺 食鬱及莫」,乃「薁」字之壞耳。 《説文》:「藿,草也。《詩》曰:『食鬱及 《宋書 韭,於《韭部》云:「韱,山 • 謝靈運傳》注引《詩》作 韭

> 法,撼而落之爲上。」 「外月剥棗」,傳:「剥,擊也。」段氏曰: 「八月剥棗」,學也」,此切言之也。《莊之也。毛云「剥,擊也」,此切言之也。《莊之也。毛云「剥,擊也」,此切言之也。《莊門剥則辱:大枝折,小枝泄。」此「剥」亦爲則剥則辱:大枝折,小枝泄。」此下割,擊也。」此渾言「此謂『剥」即『攴』之假借也,故《釋文》普木「此謂『剥」即『攴』之假借也,故《釋文》普木「此謂『剥」即『攴』之假借也,故《釋文》普木「八月剥棗」,傳:「剥,擊也。」段氏曰:

所以助男養農夫之具。」案:茶爲苦菜,亦所以助男養農夫之用,故箋云「乾茶之菜」 時皆可爲助養農夫之用,故箋云「乾茶之菜」 。或疑苦菜非九月所采,此「茶」即王肅所也。或疑苦菜非九月所采之茶、所薪之樗於是也。或疑苦菜非九月所采之茶、所薪之樗於是不,茶,陸穢」者,如《左傳》「藪之薪蒸」,與樗

後種 黍稷。 稱。 之也。 之輩皆名爲禾,麻與菽麥則無『禾』稱,故於 非徒 同,言已聚也。」蓋納之囷倉爲已聚。《説文》 稼既同」又但言「稼」不言「禾」者,箋云:「既 不見者,明其皆納之。」此説是也。下文「我 熟曰穋。」亦指凡穀言之,非以後熟先熟專承 禾。」蓋禾雖專名嘉穀,引申之亦爲凡穀之通 「『禾稼』、『禾麻』,再言『禾』者,以禾是大名, 稼」下云:「一曰稼,家事也。」此其義矣。 麻麥」之上更言『禾」字以總諸禾。 泰稷重穋四種而已。其餘稻、秫、苽、粱 指 下文「黍稷重穋」傳云:「後熟曰 菽 如《閟宫》之「稙穉菽麥」,亦非以 《説文》:「禾之秀實爲 月 麥也。 納 禾 稼 至「禾麻菽麥」,正義 案 此 禾 稼 稼,莖 者, 此文所 重,先 先種 節 云: 統 言 爲

柔:傳云云者,即《漢志》「春令民畢出在埜,|「上入執宫功」,傳:「人爲上,出爲下。」|

野廬之事,所謂公事畢然後敢治私事也。役者是也。下文「于茅」「索綯」乃又計及于户」意複,故不如范氏、董氏以爲宫室官府之宫功」爲民自「治宫中之事」,則與上「塞向墐冬則畢入于邑」也。而「宫功」無傳,箋以「執

是也。 名。』《儀禮 『絞』,胥失之矣。」承珙案:正義引李巡 索』之『索』。 岐注《孟子》曰:『晝取茅草,夜索以爲綯。』 猶言糾繩。『于茅』、『索綯』,文正 絞者爲綯。 箋云:「夜作絞索以待時用。」《經義 曰『糾絞繩 曰:「索者,糾繩之名。 爾雅•釋言》:「綯,繩之絞也。」蓋謂 宵爾索綯」,傳:「宵,夜。 箋云『夜作絞索』,則是以『索』爲『繩 索」,則是以『絞』爲『糾絞』之 郭璞注《方言》亦云:「 《爾雅》訓『綯』爲『絞』,而郭 喪服》傳:「絞帶者,繩 綯,即 繩 也 綯,絞 相對。 綯 述 繩之 亦 也。 聞 綯 趙

索本亦 是絞 也。 以「索」釋「綯」,義與趙岐正同,非是以「索」 物名,而《爾雅· 繩索」也。 但鄭 即 繩 繩 名,而 云「夜作絞索」,乃以「絞」釋「索」, 云海 此 釋器》云「繩之謂之縮之」是 詩 則是索之爲 絞 也」,猶 綯 綯 ; 猶 繩 繩 也 本

也。 屋治 之官,以乘四時」,顔注訓「乘」爲「治」。 古書不多見,惟《 大略篇》引《詩》「亟其乘屋」,楊倞注云:「升 乘 乘」爲「治」,與毛異,非也。「乘」之訓「治」, ,治也。」承珙案:「乘」之爲「升」,常 其 箋訓「治」者,所以申成毛義。 亟其乘屋」,傳:「乘,升也。」箋 敝 漏。」即 漢 兼二義言之。 書 魏相傳》云「立 疏云 《荀子 鄭 羲 云: 以 訓 和

人春,農事方興,故當急治其屋耳。《荀子・于公社。」承珙案:毛無傳者,自不過謂經冬「其始播百穀」,箋云:「謂祈來年百穀

鄭異。 屋。春事起,爾將始播百穀矣。」其説 也。 民播 故豫修廬舍。」此亦以鄭義述毛,未必得毛意 當與之同。正義曰:「毛以爲豳公又其始爲 亦第以播百穀爲耕事耳。 『《詩》云: 百穀」云:「及爾閒暇, 屋,其始播百穀。」耕難 大略篇》: 種百穀之故, 趙注《孟子》引《詩》「亟其 「子貢 「畫爾于 E: 而祈祭社 茅, 『賜 耕 亟 宵 願 《毛詩》出於荀卿 而 爾 焉 息 一稷。 乘 索 可 耕 乘屋,其始 蓋 息哉 綯。 心孔 田 爾 事 野 ご此 亟 子 不久, 亦 外 其 日 之 與 乘

狀 讀若動。」承珙案:「繇」與「揺」同。涌揺者) 之意』。」《説文》:「沖,涌繇 意。」正義曰:「沖 動 摇 水之動。 之意。 「二之日鑿冰沖沖」,傳:「沖沖,鑿冰之 此「鑿· 正 義 沖, 以 冰沖沖」,亦是狀冰凌被鑿 爲 非 二非 貌 也。 非聲,故云『鑿冰 貌 非 从水,中聲, 聲」,是 也

沖,聲也。」《初學記 於義爲偏枯矣。 飾 小 貌。」亦是謂 垂 鞗 飾 》亦云「聲也」。 革 動 沖 摇。 沖 《七月》釋文: 傳 專以「聲」言, 云: 沖沖 河沖 垂

兕觥 説是 民 也 傳。 也。 爲牲,大夫與焉, 是民 也。」正義日 夫 日 自 加 ,終歲勤 複而脱落數字,古書 「細繹正 飲 也。 以 蓋《七月》詩歷言豳民農桑之事,於其 自飲酒 鄉人以狗,大夫 朋 羔羊。 酒。 傳: 酒斯饗, 曰殺羔羊。 《説文》「饗,鄉 動 「兩樽日 正義 "「埽場是農人之事,則『斯饗』 ,故言饗禮者,鄉人飲 義,知 乃 公堂,學校也。 得斗 又 則 傳 引《周禮 朋。 加 加 酒相 本 以 以羔羊」。 作『饗者,鄉 人飲 類 饗者,鄉 勞。 羔羊。」段氏 然。」承 躋彼公堂,稱彼 酒 觥,所以 黨正》注 故此 也 人以 二,即 酒 珙案: 因 響,斷 兩 狗,大 懋 誓衆 云 本 飲 以 爲 畢 毛 段 鄉 酒 堂 狗

亦不盡 黨正 亦可見 《詩》「十月滌場」以下,云是《豳頌》大 農隙 毛義。 之類,皆爲自祝之辭。」 曰:「古器物銘所謂「用蘄萬年」、「用蘄眉壽」、「萬年無疆 福無疆」,此或據三家詩本,并不 酒之常禮。 爲人臣祝君之詞,不知舉觞稱 詩,「知此『斯饗』爲國君饗群臣之事」, 亦有旅酬、恐其失禮、故用觥也。」此皆善 耳》正義亦云:「鄉飲酒,大夫之饗禮,饗末 民 上文「滌場」不相屬矣。 正 而 飲 飲酒 监 而教之尊長養老,見孝弟之道也」,故 爲祝君之語。 而其申鄭又據《月令》「大飲烝」注 酒于序』之『序』,謂黨之序學也。』《 位 「斯饗」不 者 亦名鄉飲酒。公堂,即《黨正》『屬 《士冠禮》祝詞 爲 民 必 爲 時 况《月令》注又引作「受 國君 務 或謂「萬壽無疆」 農 有日 將 之饗 壽,乃古人 眉 闕 ·作「萬 臣 於禮 壽 矣。 萬年 則 飲 至 劉 飲飲 卷 當 之 引 與 申 此

鴟鴞

注本馬 東晉孔傳以「辟」爲「法」,《釋文》引傳作 必當以《金縢》爲據。 鴞》焉。」此《序》悉與《金縢》合,則全詩大旨 未知周公之志,公乃爲詩以遺王,名之曰《鴟 辟」之「辟」,義當作「治」。 文》以「治」繫孔、以「法」繫許,不誤,今本 ·治」「法」二字互譌。 云:「擘,治也。 「治」、《説文》作「法」。今本《説文・辟部》 、説文》作「治」,非是。承珙案:《尚書》「弗 「我之不嬖。」」王氏《尚書後案》謂:《釋文》 避」,然是謂武王崩,成王幼,故弗避攝政之嫌,與鄭異義。 法」,亦謂 《序》云:「《鴟鴞》,周公救 ·融,以「辟」爲「避」,《史記》亦以「辟」爲 以 法治之耳。 从辟,从井。《周 《金縢》「我之弗辟」,鄭 段氏《尚書撰異》謂《釋 蓋周公初聞流言, 即《説文》「壁」訓 亂 也。 書》曰: 成 王

《詩》,每多異同,獨《鴟鴞》箋與其所注《 《尚書》文義之灼然者也。 管、蔡、武庚未誅之前,義與 既誅之後,不曰誅 無罪,因成王意而書之曰「罪人」,管叔、武庚 斷無出師東征而書之曰「居東」,周公之屬本 蓋辟、非誅殺之名、亦非退避之義。《尚書》 辭位出,巡狩于邊。」此語與當日情事最合。 相成王、管叔、蔡叔不知而讒之成王。 撫東方,就 辟者,謂當體察虚實,推究主名,所以出 縢》最相脗合。 曰「罪人」,必指叛者。曰「得」,必尚未伏誅 史臣之文,據事直書,曰「居東」,必非東征 政,又不可引嫌退避,不顧社稷之安危 子」爲成王,雖亦同毛,而以「閔斯」爲成王宜 自不容遽 興問罪之師。 近控制。 核之毛傳,惟以此詩爲作於 曰殺而書之曰「得」者,此 《越絶書》云:「周 而宗 八毛同。 鄭氏注《禮》箋 親大臣 其以「稚 一受遺 周公 公傅 而 鎮 故 輔

然以 斯 武 者 蓋 我子」者,管蔡爲武 肅 詩 作 自 與 哀 自 鴟 不可」,皆預 甯亡二子,不可 庚煽 灣醫子 此 是 毛 周公居東二年,深 駁 往 救 閔 ,爲主少國疑,遭三監之變,足以 鴞」喻武 毛 難 殊旨 往 謂 其 詩 其 稷 誘爲 已見 鄭 以 屬 依《序》立 屬 群 之閔 並 救之。 黨耳 叔 黨之先臣 重 亦并與《序》不符。 IE 譏,尚欠分曉。 亂,所謂 流言,王室將亂,恐成王不知 庚,「子」指管蔡,「室」 計 斯, 將 義。 之詞, 何以 若如箋説,則全詩皆爲周 以毁我周室。」曰「甯亡」,曰 義,獨此篇皆自用 以 言所 庚所 歐陽《本義》更立辨其 則 大 知流言之來實由管、蔡、 謂 「罪人斯得」也。 非 義 殊 之「救亂」? 以 陷 事 非 滅 殷 也 後之語。 毛於首章傳 親 毛 殷 義。 也 《序》言救 愛惜於 無毁 病 其餘 謂 其 恩 我 傳 鄭 八説, 王 我室 既 王 孺 意 王 斯 於 曰 非 朝。 亂 非 故 子 勤 取 他 室 以 公 惟

理乎 庚。 亦以 傳意或然。」其 以 予二云: 誅之後,必不作此語矣。 防 曰 王 於未然,而 故 爲既誅武 「迨天之未 ? 此 夫 也。 其 詩 管蔡之屬 在 毛意 人既 庚 武 憂其 陰 實 悉與 而 庚誅 死, 雨, 傳 作。 或 意未 鄭 不 後, 而 然,詞 曰「或 殊 可 正 猶 而 義 不 必 王 而 呼 又引 又 遏 如 意 敢侮予」, 實 肅注《詩 以 而 是 絶 明白。 合經旨 鴟 肅 以以 告之,有 也。 注 鴞 全周室。 或 》,亦 若 皆 集傳 比 在 敢 所 經 是 武 誤 侮 既 以 文

過 引 女。』《稽古編》曰: 樹枝,或一房,或二房。 錐,取茅莠爲巢,以麻紩之, 日 鸁 陸《 巧婦,或日 疏》云: 鴟 關 鴞鴟鴞」,傳: 西 謂之桑飛,或謂 女匠 鴟 鴞 「《韓詩》謂鴟鴞之愛養其 似 關 黄 鴟 東 幽州 謂 雀 鴞,鸋 之工 如刺 之襪雀,或 人 而 謂 小 鴂 雀, 襪然,縣 之鸋鴂,或 其 也。」 或 喙 謂之 曰 尖 正 巧 著 如 義

也

人謂

之鵬

鳥

亦 鴟

鴂

也。

形

似

鴞

而

鳩」云《爾雅》「鸋鴂」非此

切經音義

韓詩》之説,誤合爲

鴂,與巧婦名鸋鴂者實爲二物。 毛,又並未明言鴟鴞是小鳥。然則鴟鴞名鸋 案:《爾雅》以鴟鴞爲鸋鴂,而《方言》之「桑 子》亦以鴟鴞爲小鳥,與陸《疏》説皆同。 云:「古堯反,土梟也。下爲驕反,《字林》: 師《楚辭》注云:『鴟鴞,鸋鴂,貪鳥也。』 與《荀子》所言蒙鳩事相合。 ,而《埤雅》力證其是。 佛本行集經》標目《梟鴞》注 毛傳用《爾雅》,《説文》同 郭注《爾雅》以爲鴟類,殆 青白,出 於大樹 二耳。 雖有「鸋鴂」之名,然並 小雀,區 類 郭注《方言》「鸋 于山 茂枝,而 也。 今用之。」承珙 陸《疏》乃因 趙岐注《孟 ,即惡聲鳥 山 别甚 東 託 名 於 明。 惟 鸋 葦 辨耳。 王叔 鴂,俗 進 列 兮,律魁放乎山間。」此皆有美有惡之辭,故 雜班駮與闒茸。」其下文云:「偓促談於廊 赴泥兮,魚眼璣之堅藏。 兮,鴟鴞集於木 因鸋鴂名同,遂致溷于桑飛,大小善惡之不 與郭注《爾雅》合。又云俗名巧婦,可見此 鴂之狀甚晰。 「梟」字下又隨誤本作「形似鴞」,皆非。 梟」,不得云「似鴞」。任氏《字林考逸》引此條,於 林》「鸋鴂」之訓自是釋「鴞」,故當云「形似 ·鷃」下訓「鴟鴞,鸋鴂」者合。 「梟」,上文既以「土梟」釋「梟」,其下所引《字 傳 在 師 》「鱒 顯 《楚辭 名巧 謂 位 ,貪佞 鳳 「鴟鴞貪鳥,而集於木蘭,以言小人 婦。」此 伏竄兮,鴟 九歎》云:「葛藟 其以 升爲公卿也」。 蘭。」其上文云:「傷 注 鸋鴂單名鴞,與《説文》 形 梟翱 同駑贏 似 鴞, 翔」、《漢書》 《字林》所言鸋 又以爲鴟類, 《史記·賈誼 與乘駔兮, 蘭 於 鴞」當

無「鴟鴞」之目。

飛」、《廣雅》之「鹪

鹏

祖

王説

則與巧婦別鳥矣。

王

叔

萬。

子,適以

病

之,不託

鳥

明 珠

廟

桂 樹

似戒 鴟鴞 難。」 皆以 鴟鴞之言,非毛意也。 所欲言,丁甯之也。」直以「既取我子」以 正同。 鴞」,確是呼而告之,與《魏風》「碩鼠 弱也。」是即 於末章云:「巢之翹翹而危,以 食我黍」、《小雅》「黄鳥黄鳥,無集于穀」文例 三章傳云:「手病、口病,故能免乎大鳥之 **翥,鸞鳳挫** 鴖 ,力主郭説 恤 儒 鴞 經中並 鴟鴞之詞,「即非 鴟 功,愛子及室,誤矣」。 ,「難」即指取子、毁室。 亦多以 鳴鳥 箋云:「重言『鴟鴞』者,將述其 翔 翩 用《韓詩》之義。 無「大鳥」字,則所謂「大鳥」即指 小鳥,而不知毛義實與鄭 爲梟鴟之屬,郭注可謂 。」然則《爾雅》之「鴟鴞,鸋鴂」, 邕《 弔 鴟 《埤雅》謂 屈 鴞自道。 原 《吕記》、嚴《緝》皆從陸 文》云 後儒輒謂 可見「鴟鴞 其 詩章首三句 昔賢云鴟 (所託 有 碩鼠,無 據 鸋 不同 意之 枝條 下爲 毛 鴂 鄭 鴟 箋 軒

之喻。 之者。 已。」承珙案: 無所施其力,則『唯音曉曉』,自鳴其 言所以獨操國事,略不自嫌,欲及陰 也。」方氏苞曰:「二章與末章意正 者 言 言爲證,「綢繆牖 至,大懼室家之漂摇 至而綢繆牖户耳。 鳥,俱周公自比,非前則喻先王,而後忽自况 也。」姜氏《廣義》曰:「詩通篇『予』『我』俱 前以『毀室』屬鴟鴞,而此以『侮予』屬『下民』 翹 説謂周公自述其 一、蓋室 翹」句難通,且汲汲自多其功,于忠淺矣。 而深以『綢繆牖户』望成王早圖之也。 何 所以武 周公既以 氏 一毀,則探觳取卵之事,必有起 古 詩次章有《孟子》所引孔 義 庚蠢 自喻 户」自爲及閑 **>** (締造 日 不謂牖户未完而 動, 而王 : ,即以諷 周密,則於末章『予室 次 而四國 心不 章 承 暇 悟 王。 。 而 ,屏身在外, 洶 箋説 章 治其 一相應, 、哀厲 ・『毀室. 風 洶 雨之未 子之 國 雨已 以 不 而 家 爲 靖 而 指 乘

予香食。 而此云「不肖」,則又不得謂「無罪」,真自相危。」夫《尚書》注既言「閔其屬黨無罪將死」,地」,而於末章又云:「今子孫不肖,使家道地」,而於末章又云:「今子孫不肖,使家道「喻其屬黨之先臣積日累功以固定此官位土

肘如 韓義 如毛 有所作也。」許於釋「据」用毛義,釋「拮 也。」「据,戟挶也。」而「拮」下則云:「手口 與「臼」同。 杜注:「抵徒手屈肘如戟形。」是也。「挶」音 哀二十五年《左傳》:「褚師出,公戟其手。」 拮据」、「撠挶」皆雙聲字。 ('°《詩釋文》引《韓詩》:「口足爲事曰拮据。」然 以「拮据」屬手,二字又皆从「手」,則當 義 戟形 「兩手捧物曰曰。」然則戟挶 「予手拮据」,傳:「拮据,撠挶 但 以 以捧物 「撠挶」訓 《説文》:「臼,叉手也。」《玉 也。 「拮据」也 《説文》:「挶, 撠,當本作「戟」。 者,謂屈 也。」案: 又用 戟 經 持 共 兩

茅」。 《禮》:封諸侯以土,蒩以白茅。』《周禮 者、「爲」疑「薦」字之誤。篆文「爲」作爲 近。《釋文》「租,又作祖」者,乃古字通借。 作窠之始事也。」承珙案:傳以「爲」訓「租 曰 : 「爲」,其來久矣。 故云「租,爲」。 正義謂「祖」訓「始」,物之初始必 詩》訓「租」爲「積」,積聚所以爲薦藉,義亦相 白茅」、《白虎通義》、《獨斷》皆作「苴 「薦」作隱,字形相近。《説文》引《禮》「蒩以 桑根之皮,此但納茅秀于窠中以爲之藉,蓋 義》:『蒩,亦作租。』上文『綢繆牖户』,必 祖」爲「薦」者,猶《説文》之「且,薦也」。 鄭注《士虞禮》云:「苴,猶藉 租,通作蒩。《説文》:『蒩,茅 予所蓄租 」,傳:「租,爲。」何 解 釋迂 迴。 蓋 有爲之者, 「薦」之誤 也。」毛 氏《古義 以 也。 取 音 訓 白

「曰予未有室家」,傳:「謂我未有室

傳云: 以 此句 此 其無室家,故不肯遷, 作巢勤苦爲喻,而繼以「曰 案: 上文四「予」字皆爲周公自我。 稚子,易我王室,謂我未有室家之道。」 其管蔡之言。 其 家。」 「曰」字正自明其作苦之由,不應忽接以 承 、恐未 手 輕 我 我爲室家之道至勤苦,而 Ė 説 口俱病者,爲我前此 侮 稚子未有室家之道,故輕侮之。 IE 「賢者不肯遷於王都 四 彼作亂之意也。 義 ,故此章言其輕侮之意也。 必得毛 《小雅 句,文義 云: 予者,還周公自我也。 意 傳 雨 也 以 直 無正》「日予未 截。 日 則此亦當是自言。 予未有室家 未有室家之故。 者 正 予未 也。」彼文是自言 稱 義本王肅 無 他 **汽有室家** 道之人 人言 有室 · 管蔡 曰 上章疾 以鳥之 者, 曰 承珙 以 家」, 侮之 弱 王 述 如 所 則 陳 我 肅 意 則

「予羽譙譙」,傳:「譙譙,殺也。」《釋

悴』,古通字。」《國語 萃。』《後漢書 急也。 南 也。」又:「醮,面焦枯小也。」此皆「 蒼》「憔悴」作 韋注:「憔悴, 瘁,謂减縮 悴」、《漢書・禮樂志》作「癄瘁」,顔注:「 殺小。」此「噍殺」字、《説苑・修文篇》作「憔 **噍殺之音作。**] 正義 其聲噍以 義,故傳訓爲「殺」。《樂記》:「其哀心感者 文 》: 反,又所例反。」承珙案: ·噍,子遥反,徐在堯反,沈子堯反,踧 一之聲義 氾論訓》焦而 殺,色界反,徐所 譙 殺。」鄭注:「噍,踧 字 也。」《左傳》成九年:「無 也 或 「顦顇」。 瘐病也。」《一切經音義》引《三 應劭傳》注云:「『蕉萃』、『憔 作 《釋文》「字或作 燋 不謳」高注:「燋,悴也。」 三 三 : ·吴語》「而日 同 《説文》: 「噍殺,謂樂 例反。」又"「志 在 譙 識」即 消 也。」《釋 反。 燋」者,《 「顇,顦 以 「噍殺」之 譙 殺, 、聲噍 (憔悴), 譙 也, 文》: 棄 色 訓 顇 痽 蕉 蹙

南 毛 也。」高注《俶真訓》以「鎩翼」爲「折翼」,亦其 李善注《文選 也 傳 俶 殺 真訓》、《覽冥訓》俱云: 也」之「殺」,又 • 蜀都賦》引許慎曰:「鍛,殘 與「鎩」 「飛鳥鍛翼。」 同。 **%**

義

脩」。 《 詩 以 以《釋文》爲據也。 淺人所改,《集韻》所據《釋文》未誤。」阮氏 改爲『消』,又或改爲『翛』。 皆作『修修』、《唐石經》、宋《集韻》、《光 易之字,如易『令令』爲『鈴鈴』,易『遂遂』爲 經》皆作『脩脩』。蓋《毛詩》本用合韻,淺 《校勘記》云:「考此經相 一本、《沿革例》云監、蜀、越本皆作『脩脩』, 疏爲據。 小學》曰: 子子 又正義云『予尾消消而敝』,乃正義 尾翛 興國本及建甯諸 翛」,傳:「翛翛,敝也。」段氏 「唐定本、宋監本、越本、蜀 又引 傳有作『脩』作『翛 疏云,定本作『 今本《釋文》亦是 本皆作「翛翛」, 堯 所 脩 本 人 石

> 《吕氏讀詩記》引正義云「定本作『脩脩』」, 也。」此「脩脩」訓「敝」者,「敝」亦謂乾敝 爲正。《王風》「暵其脩矣」,傳云:「脩,且乾 似皆作「翛翛」。《説文》無「翛」字,當以「脩 案:《沿革例》引正 『脩脩』推之,正 ·璲璲』,非其本經傳作『消消』也。 修」與「脩 」同字。 義 若《釋文》、正義之本,則 本當作『翛翛』矣。」承 義云「定本作『修修』」, 以定· 本作 也

東 山

鴞》序合。 大傳》:「周公攝政, 詩也。」案:《鴟鴞序》云:「救亂也。」《尚 東征三年而歸,勞歸 「綢繆牖户」者,故《書》傳云「救亂」, 年踐奄。」是周公於親迎還周以 序》云:「《 其攝政之年即奉命東征 東 山》,周公東 一年救亂,二年克殷,三 ±; 大夫美之,故作 後,必有所以 征 也。 與《 翻譜 周 鴟 書 是

遭流 《序》亦合。 三年而 攝 者於義不合。其謂「武王崩後免喪,周 肅 年、《詩》言其歸之年。 殺管蔡,三年而歸。《書》言其「罪人斯得」之 政,遭流言,遂作《大誥》而 之「三年」。 謂武王崩後明年改元,周公即攝 以「弗辟」爲「弗避」及「罪人」爲周公屬黨二 亦 正 去及來,凡經三年。 加 二年」與「三年」亦非一時。 居 政。 説 歸」,所敘歷歷不誤。 是合居攝之初年數之,首尾共三年,與此 義 東」即「東征」,以《書》之「二年」合於《詩》 言,出居 云: 後 乃作《大誥》東征 書正 歸。」是《書》傳所言「三年踐奄」者 周 蓋「居東」與「東征」本非 公以 於東。 義》 曲 秋 爲 反 ^ 成王感風 書》直數居東之年,除 迴 東晉《尚 而 ,殺武庚、管叔,三年 護,謂: 居 王肅注《金縢》,以 東征 攝 鄭注《金縢》,惟 雷之變,迎 其 書》孔傳即 「《詩》言初 二年克殷, 年 則 地, 東 公始 征 還 同

> 乎? 迎,及王出郊,天乃雨,反風」云云。 啟,始釋然乎? 日 成 其 不啻千里,安能 縢》,若居東已誅三監 王亦 王 時之事。 去 雖 年, 情事種種不合,其不足信明矣。 至愚 未敢 故 若東 曰 **誚公,必待風雷之變,《金縢》之** ,何至叛 二年。」 征 立 《書》又曰「惟朕小子其親 刻 班 人已 皆 迎還, 師 ,則《鴟 與 而歸,則商 誅 鄭 尚 説 令 王 鴞》 異 未 可 出 能 奄去鎬 以 夫風雷 案之《金 郊 悟 不作 相 耐 見 京 猶

《緝》云:「 太行 牧以河北爲山 之。」王氏《詩考》曰: 東 Ш Щ 我 東山 即魯之東山。 徂 屯 東 即商地。」季氏《詩説 軍 山」,❶傳箋皆不言其 東,秦漢謂 必 依 「商故 山 魯蓋古之奄國。 爲 山 固 東、山 都 一,故 在 河北, 西者 解頤 以 東 地 **《書** 唐 山 言 嚴 杜

❶ 「東」,原作「來」,據《續經解》本、廣雅本改。

閻 東山 《多方》云:「奄國在淮夷之北。」趙岐《孟子 居 宗炳《明 之命殺禄 舉事。』然後禄父及三監叛也。 傳》:「奄君、蒲姑謂禄父曰:『武王既死矣, 説近之。 已入魯境,東山當是師行所至之地,故曰 注》云:「奄,東方國。」據此 奄,吾東土也。」又: 定四年。 「因 傳云:「 案:《詩考》所言,究是 所謂『王 今王尚幼矣,周公見疑矣,此百世之時也,請 《説文》:「鄶,周公所誅 氏《四 魯四境之東,一名東 而 小魯」即《詩》之「東山」。 、佛論》云、《孟子》「登蒙 四 書釋地》云:「或曰費縣西北蒙 來自奄」,即東征 《破斧》: 父。」《左傳》: 國,管、蔡、商、奄 周 公 Ш 山。」然則 郁 昭九年。 東 東 而歸之事 可知《孟子》「登 國,在魯。」鄭注 征 非 也。」《尚書大 東 《弘明 Ш 周公以 四 商奄之民。」 「蒲姑、商、 東征 山,惟 丽 或 也 小 是 」。」承珙 踐 集》引 成王 季氏 Щ 皇。」 「我 奄, 正

徂東山」。

歸」、《太平御覽》二十二引作「滔滔 貌。」「大」與「久」義相成,故《楚辭・ 貌。」《江漢》「武夫 慆,疑「滔」之假借。 「年滔滔而日遠兮」,正言久也。 慆慆不歸」,傳: 滔 《説文》:「滔,水漫漫大 滔」傳: 「慆慆,言久也。」案: 滔 此「慆慆 不歸 滔 謬諫》云), 廣 大 不

蓋 案:《鴟鴞》、《東 已久,無緣西行而後始悲。』箋説爲長。」承珙 二年,臨刑之時素服 不宜言己意,故易傳。 西而悲。」正 喪。」箋云:「我在東 辟,公親素服,不舉樂,爲之變,如 周公於骨肉之變有不忍言者。 我東 曰歸,我心西悲」,傳:「公族 義曰: 山》二詩皆未嘗明言其事 「箋以 不舉。 Щ 常日 孫 此 毓 歸 至於歸時,踰 爲勞歸士之辭 云:『殺管叔 也,我 故《鴟 其 心則念 倫 在 之 有 年

征夫 説固 間,零雨 必 之故 但託 彼」、「敦彼」乃指軍士而 知周公之心。 傳引《文王世子》解經「西悲」,《呂記》謂 定亂之由,惟於「我心西悲」一句略致其 山》但爲軍士歷敘其勞苦思念之事,而 我」字仍自述其心 我」字乃周公自我,見得振旅言旋,身在行 以 西 周 在道,遇 可通,於義淺矣。 惟 悲,拘滯尤甚。李氏《集解》謂首四 鳥言以 公之西悲間 於 沾 溼,故 既 述 雨 箋以爲軍士在東,念西 其 取 濛濛,而下 艱 我 深 難危急之情,而不及 子一 曲 于其中。 知 孫毓申之,謂踰 士 言耳 語 句 卒甘 言「制彼裳衣 氣 微 露 貫, 苦。 不知章首二 其 以後「 詞。 下文二 而 [句言 年不 其能 不不 不及 流 《東 悲, 意。 制 言

無也。女制彼裳衣而來,謂兵服也。亦初無「制彼裳衣,勿士行枚」,箋云:「勿,猶

同。 枚』爲釋經之『枚』。 本誤從之,遂以箋『行陳』爲釋經之『行』,『銜 『銜』。《太平御覽》卷三百五十七引《詩》『勿 亦當別爲毛説。 『銜」,應有『行當爲銜』四字,而 本皆非。 記》曰:「案正義,知孔本經作「勿 箋作『初無行陳銜枚之事』。 箋作『無銜枚之事』。 「定本云『勿士行枚』,無『銜』字,箋云『初 銜,王户剛 行陳銜枚之事,言前定也。 士銜枚」,與孔合。 行陳銜枚之事』,定本是也。」臧 用兵者不陳。」《釋文》:「士行,毛音: 間嘗反覆參訂,知孔本爲是、《釋文》、定 「銜」「行」字異,鄭箋即欲改「行」爲 反。 無 今皆 自王 行,户剛反。」正 《釋文》既同定本,音箋 定本經作『勿士行枚』, 不 肅改『銜』爲『行』,定 然,故 《春秋傳》曰: 陸德明與定本 正 氏《 知 士 義釋經 衡 經 經 義 銜 本 枚、 義 鄭 日 作 音 傳 無 雜 善

得云『無銜字』。

本讀經讀箋皆爾,絕無異説。

行,户剛

『銜』『行』二字互異,衹得云『不作銜字』,不 非經中之『載』其比也。故《釋文》云:『無 本「勿士行枚」無銜字』者,必當時或本經於 枚所用,非經中之『行』,如《殷其靁》傳箋之 如此。《釋文》得之。其箋之『行陳』,是説銜 『此』非經中之『斯』、《菁菁者莪》傳箋之『載』 ·勿士行枚』之間更有『銜』字故也。 若但 ·讀爲」,直於訓釋中改其字以顯之,箋例每 一考《釋文》『鄭音銜」者,謂箋之『銜枚』即經 反。』明非經中之『行』也。正義、定 鄭以『行』爲『銜』之假借,不云 肅音,而别爲『鄭音銜』,則經注 『箋云』以下,乃正義自引箋 乃以經「行」字 正義所云『定 云: 一爲 《經義雜記》欲改此經作『銜』,及去箋『行陳 其「初無行陳」之語,若非釋經「行」字,則箋 下又引《春秋傳》曰「善用兵者不陳」以自足。 勘》後説是也。箋以「行陳」釋經之「行」,故 『行陳銜枚之事』以釋經之『行枚』,猶傳以 引之也。」後一説云:「案:舊校殊誤。 則迥不相涉也。《太平御覽》引作『銜』,以破 云『王户剛反』,乃難箋『銜』字,於箋『行陳 字,皆於《釋文》、正義未得其理。又《釋文》 以證『予』字也、非『箋云』以下載定本之箋。 以證,謂箋中『銜枚』即經 『鄭音銜』者,自是陸氏之誤。」承珙案:《校 無『銜』字。 『讀若』、『讀爲』、『讀曰』之例。此《釋文》云 『杭」。銜,从行,金聲,絶不在古人『讀如』、 而必云鄭讀『行』爲『銜』乎? 『樂道忘飢』釋經之『樂飢』也。 如《雞鳴》正義在定本下自引箋 中『行枚』,其間 此何容疑惑 行,古音如 鄭箋

户剛

反爲

王

行」爲户剛

反,則

經亦當同。

更

乖違,上下難通矣。」《校勘記》前一説

之『行枚』。

?

同, 中「行 之者,非也。 認箋讀「行」如「銜」,故别爲之音以異於鄭。 箋以「銜」釋「行」。 由 其説自誤。 相傳之古音古義。不然,「行」字毛無傳,何 臧氏《雜記》謂經作 銜」,亦非 校勘》前説謂鄭以「行」爲「銜」借、《釋文》得 知 其音「衡」? 衡」即「横」也。 乃 也 《釋文》「毛音衡」者,「行」「衡」聲 是 盧氏《考證》又云鄭就「行」讀爲 閒 文, 其云「鄭音銜」者,則誤 即王肅音户剛反,亦是誤 「銜枚」,箋無「行陳」字, 此或六朝以前説《詩》者 何 用 復 引 他 經 作 證 乎 認

假借也。 幹曰枚」,是本義。此『枚,微也』與《閟宫》傳 不成文義。 IE 枚枚、礱密也」皆是假借 義 云:「『枚,微』者,其物微 勿 士行枚」,傳:「士,事。 謂之微者,兵事神密也。 段懋堂云:「《周南》傳『枝 ,謂「枚」爲「微」之 細 也。」此 枚,微 一章言其 日 解 也。」 條 殊 馬

遷」,王注:「緯繣,乖 礙之意。 則銜枚於 言之則爲「乾 部》:「軙,戾也。」《玉篇》: 言語嚻讙 乖剌也。」又作「緯繣」。 爲結紐而繞項也。」考《説文》無「繣」字,《攴 頭,於項後結之。」顏注《漢書·高帝紀》引作 於項。」賈疏云:「繣,謂 語爲相疑惑。」又注《銜枚氏》云:「銜枚,止 訓「枚」爲「徽」也。 完, 云:「枚,如箸,銜之,有繣結項中。 繣絜於項」,云:「繣者,結礙也。 行微」,語殊費解。 融《廣成頌》:「徽嫿霍奕,别鶩分奔。」是 故 曰 勿 口 傳讀「行」爲「衡」,訓「枚」爲 也。 士 ,組繫兩 人儘」。 行 枚狀如 微 《廣 頭 竊謂 鄭注《周 箸,横銜之,爲之繣 承 戾也。」又作「 ,分紐於項,有違 《離騒》「忽緯 雅 珙 以組 傳云「枚,微」者 案: 「儘,乖戾也。」合 釋訓》: 官・ 爲之,繫著 以 絜,繞也 大司 行 軍 徽 「鞍圕 繣其 法 枚 嫿 戾結 馬》 難 爲 兩 止

違。』《 行枚 衣」爲「兵服」,非是 及歸家之服,而亦無 蓋「制彼裳衣」謂其 云「徽也」。 嫿,乖違也。」而《十五卦》又云:「繣微,乖 嚻讙者,故亦可訓「徽」。 爾雅 徽」「微」字通。 集韻》「繣」有古賣、胡卦、胡麥三切,並 釋詁》: 謂 衡 《類篇》則皆云:「微也。」是已。 徽 《廣韻・二十一麥》云: 徽,止 徽 時釋介胄不用,更制在途 事於行枚矣。 取 徽 也。」枚,所以止言語 今本傳作「微」者, 嫿 亦 取「止」義 箋以「裳 「徽

云 引此詩。 蟲 言,蓼蟲不知徙 翼》云:「《説文》:『蜀,葵中蟲也。』古人有 也。」正義曰: 『蠶似蠋。』言在桑野,知是桑蟲。」《爾雅 食葵之甘 蜎蜎者蠋」,傳: 郭璞曰: 『大蟲如 故 「《釋蟲》云『蚅,烏蠋 乎葵菜。 其體 肥大。 蜎蜎, 葵,菜之甘者 指 蠋 亦食於藿 似蠶。」韓 貌。 了,樊光 蠋, 一,而 也。 子 桑

> 《釋文》引司馬彪云:「藿蠋,豆葉中 《莊子・庚桑楚》篇:「奔蜂不 小,謂 蟲 今本。毛公必非因「桑野」之文,望而 蟲則非也 者,乃真 合,今本《説文》「葵」乃「桑」字之誤。 雅釋文》引《説文》本作「桑中蟲也」,與毛傳 文》「蜀,葵中蟲」之説,疑蜀非桑蟲 南・説林訓》亦云蠶之與蠋 也。」考《韓非 乃桑野之地也。」承珙案:諸家皆執今本《説 「蜀,桑蟲也。」似所見《説文》不誤。《廣韻》引《説文》已同 不食桑。 ,則與蠶不類。 其 亦 (似蠶。 《詩》乃稱『烝在桑野』者,葵藿之下 有「蠋」名則可,必謂蠋不得爲 内儲説》云:「蠶似蠋。」《 其在葵與藿中者,色皆青, 今桑樹中有蟲色白大如 狀 相 能 類,若小 化 《玉篇》: 小 藿 然《爾 生義 青蟲 蠋 淮 指

多以「町畽」爲泛言舍旁畦隴,惟《説文》「町」「町畽鹿場」,傳:「町畽,鹿迹也。」諸家

謂 也。 字未必後增。 麋暖。』今《後漢書》譌 斷」,『斷』與『疃』蓋一字。《足部》又有「躖」字,云: 굸: 譌『暖』,然因《埤雅》可以校正也。」承珙案: 物志》『十百爲群,掘食草根,其處成泥,各曰 志》『廣陵郡 鹿,《詩》則言鹿而已。 青韻》『町』但曰『田 下 踐處也。」《集韻》作「斷」。 埤 町」雖義爲「平坦」,然亦可爲「踐處」,「踐」 獸足蹂地曰公,其所蹂之處曰疃,本不 平坦」,於「踐」義不相涉。」又注「疃」字云: 鹿 立 雅》又引《小爾雅》云:「鹿之所息謂之 「『踐處』之『踐」,疑淺人所增、《廣韻 迹所在 田 詩 踐 曰:『町 處 東陽」劉 也。 日 若衹 町 《楚辭• 疃 云一田 處」。 昭注 爲『畯』,《埤 疃,亦作『暖』。《郡 鹿 疃 毛傳『町睡,鹿迹 場。」」段注「町」 云 諸書『町」字多謂 處」,似不成文義。 下 九思》『鹿蹊 『縣多麋』,引《博 云 「禽獸 雅》引此又 所 分斷 - 專謂 也, 踐 或 字 處

> 鹿 場 場 蓋 其 所 踐 者乃 其 所 息之 處 故 日 町 暉

《説林》二訓、《説文》、《博物志》皆合 熒熒然者也。 然則毛以螢火爲燐,非也。]段懋堂曰: 火夜飛之時也,故云「宵行」。」然腐草木得 之燐」、未爲得 之名,非螢火 草》:『螢火,一名夜光,一名熠耀。』案:諸 而光,亦有明驗。 『《詩》云「熠燿宵行」,章句以 許慎云謂兵死之血爲鬼火。 文皆不言螢火爲燐。《淮南子》云久血爲燐 舍人云: 『螢火,即炤,夜飛有火蟲也。』《本 云『熒火』,與《列子・天瑞》、《淮南 火也。」正義曰:「《釋蟲》云:『螢火 熠耀宵行」,傳: 淺人誤以《釋蟲》之『熒火即 也。 也。 衆説並爲螢火,近得實矣。 天陰沈數雨,在於秋 陳思王《螢火論》曰 「熠燿, 然則燐者,鬼火 爲「鬼火,或謂 燐 也。 謂 ,即炤。」 氾 燐, 螢 鬼火 日 .論》 「毛

光亦

不

得同

火

本簡,肯如

燿」與「鸒」,則以 卑居。卑居,雅烏也」一例。 之『燐』。《説文》:『熒,鐙燭之光。』鐙 字又從火者,燐與熒皆火光。 光謂之『熒』,螢火有光亦謂之『熒』。 云:「鬼火有光謂之『燐』,螢火 烏之鳥,人所易 人誤會,故以「熒火」明之,猶《小弁》之「鸒, 也」下必增「燐,熒火也」,正以燐爲鬼火,恐 文》「燐,又作蠎」者合。 炤」當之,又改其字從虫,其誤 與鬼火不得同名爲『燐』,則螢火與鐙 》:「景天、螢火,鳞也。」字作「鳞」, 思王引《韓詩章句》『鬼火 無異。」 此 名『熒』乎? 辭 知耳。 承珙案:段 費乎? 「燐」「卑居」釋之足矣,毛傳 《爾雅》「螢火即 不然,經文但言「 王氏《廣 若陳王作《論 以熒火之蟲,雅 傳於「熠燿,燐 説 蓋 或謂之燐」,然 有光 始 非 雅 於陳思 是。 若 亦 與《釋 疏 》, 乃 炤」, 燭之 謂 得 燭 證》 熠 罃 有 謂 廣 王 羽, 詩》。 「燐」。 駁『熠 行 實。 也。 外,如《文選》張華《勵志詩》「涼風 據。 非 字義畫 粲於階闥兮,蟋 宵流」,今本作「熠熠」,誤。 人皆知熠燿 之失。」此説 「燿」爲「明不定貌」,蓋欲與四 熒」即螢火,並 爲鶯即 爲 虚 若詩「熠燿」之爲「螢火」,自陳 熠燿之爲螢火,實也。 蟲名 也。 李善引崔 燿」之爲 「鬼火」, 辨《韓詩章句》之疏,而非救 曰燿夜。 _ ° 桑扈也。」承珙又案: 如《 其 楊氏慎曰:「古人用 是 爲螢火,又皆知 小 所言形狀本於董道、陸佃。 也。 蟀 不以 豹《古今注》曰: 雅》「交交桑扈 腐草爲之,食蚊蚋。」蓋魏

雅

則

毛

韓

螢火爲燐,毛公必

有

所

而

非

難

螢

火

之

名

毛公詁

訓

也。

五九七

《集傳》以

有

其

(領),

晉

爲

鬼

火

也。

《 集

傳

以

章「熠燿其羽」

毛傳之「燐

與

熠

燿

爲

倉

庚

之

字

有

虚

有

鳴乎

軒屏」,此皆義本《毛

「熠

燿

燐

潘岳《秋興賦

》「熠耀

振

熠

燿

思

王《論

董 亦可證。 《説文·萑部》:「雚,小爵也。 又《二十六緝》:「熠燿,螢火。」「熠」「熠」、「爚」「燿」字並同。 其名爲「宵行」也 「水」之誤,正與毛傳「鸛好水」之説合也 太平御覽》正。 ·鸛」。『小爵』二字誤,當作『雚雀』也。 詩》曰:『雚鳴于垤。』」段注:「雚,今字作 陸 衹 「雚,水鳥。」《説文》「小爵」,「小」疑 鸛鳴于垤」、《釋文》:「鸛,本又作雚。」 云 《莊子》作 熠 燿 别 陸璣《疏》云『鸛,鸛雀也』, 《廣韻 種 『觀雀』。」承珙案: 蟲 · 十八藥》:「鳛爚,螢火。」 ,非螢火,初未嘗以 从萑,吅 **宝** 聲。 依

也。 析薪,於事尤苦也。 瓜之繫綴焉。 專也。烝,衆也。言我心苦,事又苦也。」箋 云:「此又言婦人思其君子之居處,專 烝,塵 有敦瓜苦,烝在栗薪」,傳:「敦,猶 也。 瓜之瓣有苦者,以 栗,析也。 古者聲『栗』『裂』同也。」 言君子又久 喻其 見 心 專 使 苦 專 如

衆,則在薪者必非一 《詩》意矣。」承珙案:傳於「烝在 苦」爲析薪,乃誤以鄭釋毛耳。 似從軍之事苦。 旅,瓜瓣之苦既似征人之心苦,繫綴之形 見衆瓜之繫綴於栗薪,猶征人之繫屬於軍 爲在家之所見,故不言「久」而言「衆」。婦 鄭箋以瓜苦爲比、析薪爲賦,失毛意 《釋文》: 薪」爲「衆薪」。 見,故當念其久。 異者,蓋彼當獨宿車下之時,蠋 「烝,寘也。」此又云:「烝,衆也。」語同 之繫於栗薪。 **灪,力菊反,衆薪也。」段氏云:** 六詩爲比,内而心苦,外而事苦,正如衆苦瓜 同『蓼蕭』、『蓼莪』之『蓼』。毛意此二句,於 「栗,毛如字, 合之《韓詩》,亦無析薪之意。 單行《釋文》本「衆」又作「聚」。 傳意 此承「我征聿至」之後,瓜 瓜,是《韓詩》亦當以 如此已足。 鄭 音 列 《韓詩》謂「廖 爲 正義 桑野」云 廣 在 韓 韻》「廖」 野之所 詩 以「事 而非 而 》作 又 人 訓

烝」爲衆也。

征 情,婉而至矣。 也。 也。 《序》意,又兩章各一意,曲盡人情,不嫌 歎辭,兩「我」字皆代婦人自我。 若以「我」爲 義。」承珙案: 年不見是不見瓜苦。 當遂至也。 家之望女,故「婦歎于室」以下六句皆敘婦 瓜苦爲喻而自言不見之久,寫室家望歸之 家言,趣味短矣。 複。程吕諸儒皆遵用斯義。今概指行者思 人之言,則與二章言其思者複矣。 感陰雨 ,三章是居者之望。 『自我不見,於今三年』,言久不見君子 陳 氏《稽古編》曰:「《東山》次章是行 瓜苦在栗薪,喻君子留滯於外 而興歎,因灑埽以待其來,又指 陳説是 今既以爲行者之語,遂謂 『我征聿至』,言我之行者 思致纖巧,恐非古人文 也。 《序》以三章爲室 古注 如 此 既 合 者 重

「倉庚于飛,熠燿其羽」,箋云:「倉庚仲

歸士 如 春而 之時,新合昏禮」,迂矣。 礙於全詩皆非春令,故又推本於「歸士始 更思所以久長之道耳。箋以倉庚爲紀時 之道也。」蓋謂歸士有新昏者,初來甚善,當 之時。毛於「其新孔嘉」二句傳云:「言久 夏秋,皆非春日,則此「倉庚」亦斷非紀 承珙案: 此説是也。《東山》一篇所紀時物, 義,以「熠燿其羽」爲喻嫁娶之盛,非紀時。 情以樂之。」《周禮 伊威、蠨蛸、熠燿 始行之時,新合昏禮。 鳴,嫁娶之候也。 ·媒氏》賈疏引孔 及果贏、苦瓜之類,多是 熠燿其羽 羽 心, 故 晁 極 明 仲 申 序 長 而

帶,繫於體,因名爲禕。 人之禕謂之縭。 巾 戒女施衿結帨。」正義 也。」郭璞曰: 親結其縭」,傳:「縭,婦人之禕 『即今之香纓也。 縭,矮也。」孫炎曰 户 : 矮,繫也。 $\overline{ }$ 釋器》曰:『婦 **禕邪交絡** 此女子既 也

也。」 云: 文。 未冠笄者,總角衿纓,皆佩容臭。」郭以『縭』 爲『香纓』,云『義見《禮記》』,謂此也。 爲帨巾,其意異於郭也。 五字,疑有脱佚。 氏説,今《爾雅》郭注至「緌,繫也」止,無「此女子」以下四十 申戒之。 嫁之所 「施」,「帨」則先 云「親結其縭」,謂母送女,重結其所繫著以 昏禮》言『結帨』,此言『結縭』,則縭當是帨 結帨」證此「結 香纓也。 也,郭言非矣。」承珙案:此疏説是。 『衿,猶結也。 《内則》云:『婦事舅姑,衿纓綦屨。』注 然則衿謂 彼注云:"帨,佩 著,示 説者以禕爲帨巾,失之也。」以上皆郭 且未冠笄者佩容臭,又不是示繫 繋屬 母戒女施衿結帨、《士昏禮》 纓 以 縭」,則如孫炎之説,亦 佩訖,故結之而已。 於 也。 婦 人,義見《禮記 巾也。」不解「衿」之形 人有衿纓,示有繫屬 衿先不在身,故言 《内則》云:『男女 傳引 陳氏 按: 以 詩 縭

> 中饋」,注:「離」與「縭」古字通。 《禮》文以結縭爲結帨,誤矣。」《虞東學詩》主 是也。 「帨」,明矣。 《禮書》之説,非 文,皆以「縭」字代「帨」字。 母之戒」,張華《女史箴》曰「施衿結離,虔恭 縭」、《後漢書・馬融傳》云「施衿結縭,申父 此説。今考《列女傳》云「母譙房之中結其衿 雅》『衿謂之袸』,郭璞解袸爲『衣小帶也 然則衿者,纓之帶。 是 而後結其縭,總是一事。 禮 也。 書》云: 《士昏禮》:『母戒女施衿結帨。』《爾 帶結而垂日 纓帶 日 縭、《爾雅》所謂『縭,緌 衿, 縭者,衿之矮。 昏 而孫炎、孔穎達 此皆用《士 然則 禮 也 》所 謂 先施 「施 衿 泥 衿

獨韻起調。古樂府及唐宋人詩餘長調,亦有《生民》三章之例。次章以下,則因首章而以字隔二句與下『歸』、『悲』、『衣』、『枚』叶,如顧氏《詩本音》曰:「顧夢麟謂首章『歸』

皆隔 韻 獨 也。」承珙案:此詩本屬變調。 宿」,二章之「實」、「室」,四章之「飛」、「歸」, 室」,三章之「垤」、「室」、「窒」、「至」,四章之 飛」、「歸」,皆與「歸」字相應。』是未嘗 相 韻 協,亦未始不可也。 韻,則章首「歸」字即如李説各與下文隔 起者。 李氏 因 篤 曰:『二章之「實」、 一章之「蠋」、 無 韻

破斧

皇。』楊 征 義 下皆正也。」公羊僖四年《傳》:「古者周 征,四國是皇。』言東征 二伯,中分天下,出黜 陟 則西國怨,西征 ·巡狩》篇:「傳曰『周公人爲三公,出爲 之時 《序》云:「《破斧》,美周公也。」《白虎通 雄《法言》:「或問爲政有幾。 也。 《詩》云: 則 東國怨。」注云"「此 陟。』《詩》曰: 述職,周公黜 「周公東征,四 一周 陟 公東 或 公東 日 而 是 道 天

《詩》辭。 矣夫。 思斁。 禮義,國家之用也。」見周公東征,乃因 書• 逆,以破缺斧斨 孫毓從毛駮鄭,孔疏又從鄭駮孫。 破毀禮義 子・王制篇》,與《公羊》同,皆先儒 詩》出於荀卿,傳爲釋《詩》而作,故必切合 言之,非專以釋《詩》,乃引《詩》爲證耳。 南征,北國怨,曰:何爲後我也。」此 注言「黜陟之時」,與《白虎通義》合。 其斁矣夫。」《法言》蓋用《公羊》之義。 「東征」、「西征」如《孟子》言湯 曰 一舉則三方怨,曰奚爲而後己。」注引孫卿子 「周公東征,西國怨,曰:何爲不 班固傳》奏記東平王蒼曰:「古者周 齊桓公欲徑陳,陳不果納,執袁 昔在周公征于東方,四國是王,其 其於章首云:「斧斨,民之用也。 而 正其罪,大旨 比 其 破 段禮 亦 義,傳 與 言 事 [黜陟 下,亦第 然四 舊義。 固 《後 來也 出 相 濤塗 四國 大 何休 國 近 毛 概 荀 漢 然 正 叛 思

六〇

大。 者不變, ,則何以二章言缺錡,三章言缺銶,喻 鄭箋以 而 喻成王者屢變歟? 破 斧喻 破毁周 公,缺斨 箋不 喻 損 如 周 傷 傳 公 成

兵器. 除 甚矣,與下文『哀 則破斧缺斨,非爲戰 必 斧。」段云《七月》正義引此傳有「方銎曰斨」四字。 經言東征 毛鄭衹以爲興,本不必定屬軍中所用。 至於如此 珙案:嚴《緝》已有 古編》曰:「二者皆斧耳 道」、「休」之意皆不相 道樵蘇之事,斧斨所用爲多」,義亦近之。 曰弓矢干戈矛戟,無專言斧斨錡銶者。 也。 既 破 《集傳》謂爲征伐所用 不應 ,則是與之血戰 我 斧,又 别 有 我 此説 缺 取 也。 人斯』及『吪』、『嘉』、 興 類。」總之,斧斨 我斨」,傳"「隋 阙 (,則嚴) ,謂:「詩人言兵器 而 若以爲殺戮之多, 人用以 僅勝之,亦疲敝 氏云「行師有 , 殆不然。」承 取 桑,非 錡銶, 若謂 銎 《稽 然 曰

> 魯 政』《序》云『奄在 四四 是奄者遠於中國,亦不得爲諸夏之國。 姑。』孔傳云:『蒲姑,齊地,近中國 也。 奄,在淮夷旁。」據此,則奄與淮 不數淮夷,以淮夷 本即奄也。」王氏《尚書後案》 之國,故知不數之也。」李氏《毛詩集解》曰 四 『成王既伐淮夷,遂踐奄』,皆東征 「《書序》云:『成王既踐奄,將遷 夷是淮水之上東方之夷耳,此言四國謂 國 東南境奄與淮夷皆附屬 國,管、蔡、商、奄』者,霍叔 是管、❶蔡、商、奄。 正 四 義曰: 或 是皇」,傳: 淮夷之北』,注:《 書序》云『成 與奄爲一 四 不數准 ,故《説文 或 也。 王 管、 罪 曰:「毛傳 夷 既 輕不 固 鄭 夷 時事,故 其 蔡、 教 黜 者 注『成 多 相 化。」 君 殷 ·數,又 邑部 方》云 商、 連 諸夏 蓋 命」、 于 以 Ŧ 云 淮 則 蒲 知 淮 奄

0

[「]知」,阮校本《毛詩正義》在下面「不」字上。

者尚 《括地志》『兗州曲阜縣奄里,即奄國之地』, 俘殷獻民,遷于九畢。」然則當時東方之國畔 云"「凡所征 子,三叔及殷東徐奄,及熊盈 珙案:《逸周 之一,明矣。毛解與《尚書》合,當從之。」承 朕來自奄,予大降爾四國民命。」則奄爲 方明矣。」朱氏《通義》曰:「《多士》云: 國」之下復言「多方」,則「四國」之非泛指四 《書・多方》篇曰『告爾四國多方』,既于『四 義》曰:「《集傳》以『四 奄,奄似遠于淮 未可信。 굸 者,舉其重者耳。 「剦 多,周公所征不止管、蔡、商、奄,言「四 或 在 書 熊 書· 作雒解》:「周公立相天 īĒ. 魯。」在魯者,非必即是 盈族 義》云 夷,亦未 十有七國,俘維 成王 國」爲四方之國。 可信也。」何氏《古 先 伐 以略。」其下 淮 夷,遂踐 九邑。 四國 一二昔 處 然

傳:「皇,匡也。」正義曰:「《釋言》云:

異。 字異,非齊用正字,毛用借字也。 記》引董氏曰:「『皇,《齊詩》作『匡』。賈公 爲『正』。」段氏云,此謂「皇」爲「匡」之假借 「四國是遑」,與今詩異,與董氏 彦引以爲據。」考《周禮・大司馬》疏引《詩 爲訓,此類甚多,不必以「皇」爲「匡」借。《吕 「皇」又可訓「匡」。古人於字義同者,得 承珙案:《爾雅》「皇」「匡」並有「正」義 「皇、匡,正也。」傳以「皇」爲「匡」,鄭箋又 即古本《齊詩》作「匡」者,亦是與毛義 所見 疏 本 轉 故 相 口 亦 轉

當 謂 云:「《齒部》:『龃龉,齒不相 文》:「錡,组 亦器之能 鉏 鋤也。 釋『鉏 鉏 又缺 鋤』者與。」承珙案:段説是也。《考工 語」。 相 从金、御聲。 我 抵 錙 拒錯 錡」,傳:「鑿屬 **^** 也。从金,奇聲。」又"「 楙 風》「又缺我 摩者,故《廣 鋙,鋤 值 或从吾。」段注 也。」組 錡」,蓋即 韻》以『不 曰 錡。」 錙 ^ 所 説 相

龉。 獸名。 雅 經》亦同。 龉。」 亦取如齒不相 鉏 則器之有鋒棱錯互,謂之「鉏牙」。 記 屬」者,高 「射 錙 其外 錡爲鉏鋤,故曰「鑿屬」。 釋樂》注:「敔如伏虎,背上有二十七齟 也。 玉人》「大琮十 齒長三尺。狀如鑿。」郭璞注《海外南 誘注 徐鍇 鉏 此云獸 牙。」疏 注《説文》云:「鉏 **汽**淮 齒如鑿,當亦取其 南 值之意。 云:「言其外八角鋒。」是 有二寸,射四 • 本經訓》云:「鑿齒, 鋤,猶犬牙也。」《爾 傳以「錡」爲「鑿 許與毛合也 一寸」注 鉏牙,猶 鋒 棱 云 齟

云: 謂 注《釋言》「訛,化也」,引《詩》「四國是訛 吪」爲「化」。至《釋文》云「吪,又作訛 吡」訓「化」者,乃「動」引申之義, 假借, **至** 「叱,動 四 風 國是叱」,傳:「叱,化也。」段氏 蓋 以「吪」爲「化」之假借 兔爰》、《小雅 也。」《説文》「吪」字 無羊》,傳 卽 耳。 用 似非 此 此此 郭 承 義。 借 並 珙 此

則以「訛」爲「吪」之假借耳。

今字。 象形。 「捊,引取土也。」「捄」與「銶」皆从「求」得聲, 雅》「捄之陑陑」箋云: 言》:「臿,宋魏之間謂之鏵。」「拤」「鏵」蓋古 之誤。《説文》:「柒,兩刃 然「木屬」二字殊不成語,竊疑「木」爲「柒」字 爲之,今木工尚然矣,故字从木。 插也,掘地起土也。」銶蓋亦起土之物,故《大 爲者多矣,要不得云「木屬」。 鑿所以穿木也。 引《韓詩》曰:『銶,鑿屬。』許蓋 文》:「林,一曰鑿首。」段注云:「《 『銶』,許所據《詩》然也。」承珙案:器之以木 「鑿屬」,毛以「銶」爲「木屬」,此師承各異 又 今人猶謂之「鏵鍫」。《釋名》:「臿 宋魏曰 缺 我 銶」,傳: 米 鑿首謂鑿 也。 「捄, 捊也。」《説文》: 鈣, 宋或从亏。」《方 臿也。从木。 丫, 木 柄。 屬 韓以「銶」爲 鑿柄 日 用 《金部》 銊 韓 詩 必以木 説 釋 説 無

傳以「銶」爲 芣屬歟! 鍬。 版、二築。」賈疏云:「梩,或解爲 梩」,或即《管子》之「一銶」,皆鍬臿之類,故 成爲車。」《周禮・鄉師》注引《司馬法》云: 所以取土者謂之「銶」,因 斤、一鋸、一釭、一鑽、一鑿、一銶、一軻,然後 辇一斧、一斤、一鑿、一梩、一鋤, 周辇加二 鍬、臿亦不殊。」然則《司馬 《管子· 輕重乙》云:「一 而取 臿,或解爲 法》之「一 車必 土亦謂之 有

傳,非易傳也。「堅固」、「斂聚」皆「迫」「東」引申之義。箋申「望固」、「斂聚」皆「迫」「東」引申之義。箋申「道,迫也。」「揫,東也。」「迫」與「東」義略同,董氏引崔《集注》本亦作「揫」。《説文》:

伐柯

《九罭》、《破斧》、《東山》,然後終以《狼跋》。 《伐柯》、《九罭》與《鴟鴞》同年,《東山》之作 其次不誤,以後亦有倒 案:張説是也。 不以作之先後。 沖傳》,非六朝張融。 鴞》次之。今《鴟鴞》次於《七月》,得其序矣。 正義云:「計此七篇之作,《七月》在先,《鴟 今皆顛倒不次者,張融此曹魏博士,見《唐書・元行 在《破斧》之後,當於《鴟鴞》之下次《伐柯》、 《序》云:「《伐柯》,美周公也。」《豳 《尚書·大誥》次《金縢》後, 鄭所不説,未可明言。」承珙 以爲簡札誤編,或者次《詩》 亂。 鄭注《書序》作

以爲簡編失次矣。 成王之不迎周公而作《破斧》、《伐柯》、《九 公東征既 伐管蔡時 成王 其説 政」云: 歸,大夫 事,其編篇於此 非 也 此 美之而作《東 伐 正義又引王肅説,以 淮 夷 踐 ,未聞。」是鄭 奄, 是攝 山》,又追 政 爲 \equiv 意 刺 周 亦 年

媒,喻當 以 柄。 柯 之,當矣。 首句合。《序》言「刺朝廷之不知」乃作詩者, 安。」案:此及《破斧》傳皆以禮義爲國 言外之意耳。 用,則毛意二詩衹以美周公之禮教,與《序》 不得」,傳:「柯,斧柄 類 而不用斧,取妻而不用媒,豈可得哉? 求類,喻 媒,所以 伐柯 使 孫《評》見 如何,匪斧不克。 曉 用 王 箋泥於言刺,遂以伐柯用 迎 禮 與 公當使 正 也。 公意者又先往。 義。 也。 治國 賢 蘇氏《詩傳》曰: 禮義者,亦治國之 者 不能 取妻如何 先 往。 用禮 孫 取 匪 毓 妻 則不 斧爲 家之 「伐 用 駮 媒

> 得以取妻爲比乎? 之喻,若如《集傳》謂是東人欲見周公,則豈 此 成 也、臣道也、妻道也。」古人多以夫婦爲君 解 王 頗 欲 合經 治國、 傳之意。 棄周公而不召, 《易 · 文言 亦 不 可 得 地 也。 臣 道

禮,殊與伐柯取則詞意不相 與《九罭》同,遂以籩豆爲王 踐」,正以禮治國之事。 斧》云「哀我 遠。」」是則毛韓之説略同,蓋古義之僅存者 情,而治道備矣。 乎上交乎下,以其所願 此詩乃美周公能 反諸己而已。 詩外傳》云:「原天命,治心術,理 也。」案:此傳與《中庸》引《詩》義合。 伐柯伐柯,其則不遠」,傳: 人斯 《詩》曰:『伐柯伐柯,其則不 四者不求于外,不假于人, , 亦孔之將」也。 用禮義,以 乎下事乎 箋以 聯貫。 迎周公有饗燕之 人治人,猶《破 「我覯之子」文 以 好惡,適性 上,不遠 《集傳》更 籩 豆 其 又《韓 所 有 求 願

籩,安得云「籩豆有踐」邪? 况《昏禮》所載夫席婦席饋舅姑,皆有豆無因取妻之文,而以籩豆爲同牢之禮,陋矣。

《序》云:「《九罭》,美周公也。」何氏《古禮亦宜之。」孔穎達云:『國家尊崇有德,宜問。《詩》稱「袞衣」、「籩豆」是也。』《伐用厚禮。《詩》稱「袞衣」、「籩豆」是也。』《伐用。問公關王室安危,二詩斷當主周人幸公也。周公關王室安危,二詩斷當主周人幸公起。」承珙案:《伐柯》但美周公,徑中未歸立説。」承珙案:《伐柯》但美周公,徑中未歸立説。」承珙案:《伐柯》但美周公,徑中未是公之禮迎公也。

毛異也。

曰:「王肅云以興下土小國不宜久留聖人。緵罟,小魚之網也。鱒魴,大魚也。」正義「九罭之魚,鱒魴」,傳:「興也。九罭,

傳意或然。 疏非是。 不異於傳,但不敢大小爲喻耳。」承珙案:此 周公之來,當有其禮。]箋解網之與魚大小, 魴之魚,言取物各有器也。 故言「物各有器」,非小網大魚之謂,意實與 玩箋意是謂鱒魴大魚,當以大網, 箋云: 『設九罭之罟, 興者,喻王 乃 後 欲 得 迎 鱒

珙案:《爾雅》但云九罭,其「百囊」之名,郭者,謬也,當云『緵罟謂之罭』。前儒解爲囊,謂緵罟,百囊網也。然則網之有囊,當有多者,謬也,當云『緵罟謂之罭』。前儒解爲囊,為之,毛説爲是。《爾雅》云『緵罟謂之九罭』 歐陽《本義》云:「『九罭』之義,以文理歐陽、

❶ 「予小子其親迎」,阮校本《尚書正義》作「朕小子其新

目小 璞自 也。 耳。 小 魚具之小者,其取 鮞」,九罭但取 網言之,則爲大矣。 賦》「布九罭」注云:「罭,與緎 無「罭」字,古字當只作「域」。 陽從毛固是,以《爾雅》爲謬則 九罭,取蝦芘也。」然則《韓詩》亦以 緎」皆有界畫之義。 集注》作「緵罟」,定本即 緵罟」專指「九罭」之罟,不得以爲大網。 魚 網可 不謂 其實既是小魚之網,即 疏又言:「鱒魴非大魚。」不知此自 取 御覽》八百三十四。 時 知。 驗 網 身 鯤魳,則 孔疏云:「以其緵促網目 然 小。」此 緵 興當與 罟 張衡《賦》「布九罭,摷 網之界畫衹 即 以 引《 第泥於「百 毛 作 數 鱒魴處之,當爲 同 網目網身皆當 韓 「數罟」。 罟 也 《文選 非 詩 同。」蓋「域」 也。 章 \sim 九,其爲促 魚 句》 囊」之説 九罭 **爾** 西京 《説文》 麗 對 能 曰 : 雅 傳 歐 爲 大 鯤 小 得 小

「鴻飛遵渚」,傳:「鴻不宜循渚也。」箋

陸《疏》云: 鵠者,此詩是也。 則載飛鴻」、《易》『鴻 經傳『鴻』字有謂大雁者、《曲禮》『前 茂林之上,不當 傳云『鴻不宜循渚』、『陸非 鄭箋衹云『鴻,大鳥』,不言何鳥,學者多云 舉知天地之圓方,見《楚辭・ 鴻鵠即黄鵠也。 而今人遂失『鴻』本義。」承珙案:段説 非大雁也。 之大者。 渚。」段氏 云: 雁』,决上言大雁字當作『琟』,假『鴻』爲之, 小雅》傳云:『大曰 鴻鵠』。黄言其色。 鴻 夫鴻雁遵渚、遵陸,乃其常耳,何 大鳥 正謂一舉千里之大鳥 鴻鵠羽毛光澤純白,似鶴 $\overline{ }$ 也, 循 黄鵠 (説文》 單 不 小洲之渚、高平之陸 鴻,小曰 漸于磐』是也。 宜 鴻之言 难,言其大也 呼『鵠』,絫呼『黄鵠 舉知 與鳧鷖 日 惜誓》。 鴻所宜 Ш 鴻 雁。』此因下言 川之紆曲 者 之屬 最爲 ,常集高 鴻 止,則 有車 有 飛 是 大鳥。 鵠 而 謂 而 也 再 也 雁 黄 鴻 Ш 循

如 隱》引《尸子》云:「鴻鵠之殼,●羽翼未全,而 《説文》言黄鵠者,疑歲久而黄耳。 有四海之心。」則爲大鳥可知。 不日浴而白」、司馬相如《賦》「弋白鵠」皆合。 長 頸,肉 雁、是亦不以「鴻鵠」與「鴻雁」爲一也。 其云色白,又與《莊子·天運》篇「鵠 美 如 雁。」此 亦 以 「鴻鵠」 陸但云肉 連言 《史記索 與《説 美

無所居 禮也。 所歸 知此 歷 都之人欲周公留不去,故曉之云:公西歸 宿於外,猶以爲久,故以近辭言之。」又述箋 復其位,不得留也。」正義述傳云:「公未 年而曰『信』者,言聖人不宜失其所也。 「卒章言無以公西歸,是東人留之辭,故 (之時,故於汝信處處汝下國。 周公居東 是告曉 公歸無所,於女信處」,傳:「周公未得 ,則可就女誠處是東都也。 再宿曰信。」箋云:「信,誠也。 之辭。 既 是告曉東人,公既 今公當 時 有 歸 東 西 再 而

> 攝政後設爲追刺之辭,故云「鴻不宜 歸之道也」,皆直指未迎周公時事,並 案:箋蓋因詩 言於東,不必定與東人相爾汝也。 逗。「無所」猶《孟子》云「無處」。「於女」猶 未有所也,故猶於東信處耳。「公歸」二字略 稱公不宜居東也。 實傳云周公未得禮也,與末章傳云「無與 歸,不得遥信,故易傳, 有二「女」字,而 不宜居,則公應歸 以「信」爲「誠」。」承 爲此解耳。 遵渚」, 非 矣,而 既 其 公 歸 珙

東即 道。 當訓『復』爲『反』。 征,則周公攝位久矣,不得以不復位爲言也 爲避居則不復,當謂不得復位。 傳意 爲東征,此孔疏之誤。 「公歸不復,於汝信宿」,正義曰: 或然。」承珙案: 王肅云:未得所以反之 毛傳 其引 並 毛以 主 未 肅 嘗 訓 此章東 「箋以 以居

❶「殼」、《史記·陳涉世家》索隱作「驚」。

一例。否則,既曰「歸」,又曰「不反」,不可公本應歸而不得所以反之道,乃與上「無所」也」。但訓「反」,則「公歸」二字亦須讀斷,謂爲「反」,蓋用《小雅》「言歸斯復」傳云「復,反

迎之之道而徒以其服 與公歸之道也。」二語正相應。言袞衣固 與公歸之道,能無使我心悲乎? 見公之服,然周公,以道事君者也,使無 裳」傳云:「所以見周公也。」末章傳云:「無 心悲兮」,此詩首尾兩言袞衣,毛於「袞衣 「不復」正言無與公歸之道,故以「是以」二字 哀衣」之語又推進一 無以」之「以」爲「與」,又於「公歸」增「之道」 一字,其意已明。毛蓋謂「是以」二字緊承上 |章「公歸無 是以有袞衣兮,無以我公歸兮,無 所」、「公歸不復」來,「無所」、 一層。 ,是以有此衰衣 傳文雖簡質,然讀 蓋即 而 終無 首章 所以 使 爲 繡 我

> 語。然二、三章既云「於女」,則必非 人之口,即末章亦不必爲東人之言也 爲東人留公之辭 直接言雖有 其 服 , ~ 而 無 集傳》則謂 其 道 也 全詩皆東人 鄭 第以 出 末 東

狼跋

通矣。

得,正跋前疐後之狀。 國流言時事。 正與《序》一一 退則跲其尾。 珙案: 首章傳云: 「老狼有胡,進則躐其胡 能誅除四國,攝政成功,正是不失聖也。」承 『四國流言』爲進有難,『王不知』爲退有 不失其聖也。」正義曰:「傳言進退有 政,遠則四國流言,近則王不知,周大夫美其 一叔不咸 《序》云:「《狼跋》,美周公也。 沖 人未悟,周公欲進不 進退有難,然而 相應,自當專指周 蓋其時疑謗忽起,王室傾危 若如箋以留爲太師 不失其猛 公攝 能 , 欲退不 周公攝 政, 難 ご此 難 四 明

流言則是也。 載路。」此謂居東爲放逐固非,然以《狼跋》屬用權以安社稷。然周公之放逐,《狼跋》流言用權以安社稷。然周公之放逐,《狼跋》流言当,使,與《吳之祖。

引而 尾」,必三家詩之異也。 傳假『疐』爲『躓』。《足部》引《詩》『載躓 尾。』」段注曰:「《釋言》云:『疐,跲也。』《豳 段氏補。 字,如同 依字形而爲之説也。 也。」以《大學》「懥」亦作「懫」推之,則「疐」即 風》毛傳同。 疐,跆也。」《説文》:「疐,礙不行也。 躓』字,音義皆同。許不謂一字,殊其義者, 止之也。 叀者,如叀馬之鼻。从门,此字 狼 此與『牽』同意。 跋其胡,載 一《周禮》故書、《儀禮》古文,而 《足部》:『躓,跲也。』『跲,躓 疐其尾」,傳:「跋,躐。 如許説,則《爾雅 或同一《毛詩 《詩》曰:『載疐其 从叀, 或有 影、毛 其 異

『孫』,言周公既致太平,乃孫遁,辟此成功之《小雅》稱『曾孫』皆是成王,●以其是豳公之孫也。『碩,大』,《釋詁》文。『膚,美』、《小雅》稱『曾孫』皆是成王,●以其是豳公之服以行禮也。鄭箋讀『孫』如『公孫可齊』之。 「公孫碩膚」,傳:「公孫,成王也,豳公「公孫碩膚」,傳:「公孫,成王也,豳公

❶ 「小」,阮校本《毛詩正義》無。

大美。 其去湯與周公亦遠矣。周公,輔成王者,美成 王即所以美周公也。孫毓所評皆不當理。 質樸,本不嫌以天子爲公孫。 鄭《譜》云: 而稱湯孫,《魯頌·閟宫》稱僖公爲周公之孫, 爲公孫,正其宜也。 且《商頌•烈祖》祀中宗 夫周之追王衹及大王、王季,大王以上皆稱 美周公不美成王,何言成王之大美乎? 子爲公孫者,成王之去豳公又遠矣,又此 ·先公」、《豳風》推本於后稷、公劉,則稱成 主意於豳公之事,故别其詩以爲 「公」宜爲周公,箋義爲長。」」承珙案:古人 毓 云: 詩》、《 書》名例 未 變風焉。」 有 稱 王 篇 天

遠也」,蓋以「瑕」爲「遐」之借。《説文》無「瑕」字, (二子乘舟》皆言「不瑕有害」,傳並訓「瑕」爲 遠」,箋並易傳訓 不瑕,言不可疵瑕也。」承珙案:《泉水》、 德音不瑕」,傳:「瑕,過 過」。 此傳疑亦當作「瑕, 也。」箋云:

> 《大雅》「不遐有佐」同。 異。 警也」、「不盈,盈也」、《文王》「不顯,顯也」、 瑕」爲「聲稱遠」,亦必古訓如是,毛義不應獨 成王大美,聲稱遠也。」此以「公孫」爲成王, 雅•廣訓》云:「『公孫碩膚,德音不瑕』,道 「不時,時也」,毛傳最多此例。 「弗」同。此「不瑕」言「瑕」,「不」爲發聲,與 「碩膚」爲「大美」,毛傳皆與之合。「德音不 大徐云: 瑕」之本義,亦易傳,非 但《邶風》之「不瑕」言「不遠」,「不」與 「古通 作 「假」。」 箋云「不 他如《車攻》「不警 申毛也。 可 疵 瑕」者, 爾 用

毛詩後箋卷十五終

毛詩後箋卷十六

涇 胡承

小 雅 鹿鳴之什

鹿 鳴

君 賓。 使焉曰寡君。」此亦不純臣之道也。不直 飲食之,又實幣帛筐篚,以將其厚意,然後忠 張氏曰:『言賓者,朝廷無賓,猶當於燕飲立 臣嘉賓得盡其心矣。」《吕記》引:「范氏 『群臣,在位者也。 ,而曰寡君,賓客之辭也。」」承珙案: 經文 《禮》云:「仕而未受禄,君有饋焉曰獻, 《序》云:「《鹿鳴》,燕群臣嘉賓也。 嘉賓,聘而未受禄者也。』 曰 : 既 日

珙 此言得之矣。

謂「嘉賓」即

群臣之爲賓者也。

正義

曰:

「《序》云盡心,傳曰竭力,是己之臣子可知。」

但有「嘉賓」,故《序》以「群臣」言之,明詩所

《序》首云「燕群臣」,則全篇皆止言燕禮。 案:此特對文言之耳,古酬、侑義通。 是饗、食皆名「侑」也。 且箋於此亦因《序》言 傳》莊十八、僖二十五。 云:「王饗醴,命之侑。」 幣,故此箋以飲爲饗禮,食爲 以酬幣,亦如之。」明親 食,使大夫朝服致之以 有幣,侑幣也。」正 『公授宰夫束帛以 幣帛筐篚」,●故 箋云:「飲之而有幣,酬幣也。 義 通言饗食之大法。 侑。』又《聘禮》:『君不親 引"「《公食大夫禮》" 食 侑幣。」又曰:『致 有侑幣,親饗 食禮。」承 食之而 其實 《左 有 珙 栖

0 筐 篚」,原作「筐筐」,據阮校本《毛詩正 》改。

毛詩後箋卷十六

用 豆,酬 燕, 經文 惠、《湛露》有「厭 樂且湛」 燕禮》無用幣 以 栖 燕樂 幣也 證 解 幣宴貨 之, 嘉賓之心」,明 節 傳云: 折 以以 即此 則 而共飲食之。 之文 「湛,樂之久。」蓋燕 日 厭夜飲,不醉 示容合好。」則燕 亦可見是燕 考《周 嘉 賓 不兼言饗食。 式 燕 語》云:「先 于是 以 無歸」之語,故 非 敖 乎折 **灬亦未嘗** 響。 以示 至「 或 王之 俎 則 不 加 疑 慈 和 E

臣 矣。」承 本意也。 合樂之類,則就詩之用 使臣』、《皇華》之『遣使』一例也。 嘉 嘉 賓 賓 也。』此言作詩之本意,與《四牡》之『勞 陳 此 줆 · 珙案:《集傳》又云:「此詩本爲 氏《稽古編》曰: 燕饗 朱子見《儀禮》、《學記》之文而 作,其後乃推 通用之樂歌,乃言樂,非 而用之鄉人。」語 於樂而言, 「《序》云:『 若夫 非 燕群 作 升 燕 言 改訓 本 詩 歌 詩 之 員 群 臣

> 裴安祖講《鹿鳴 壺 兄弟之詩邪? 所云「八篇可歌」者,而《鹿 不 而 通 讀詩 獨 亦用之矣。 陳 鄉飲燕禮及始入學,即《大戴 氏 亦與作詩有異。 抨 彈 毋 總之,古人作詩 ×, 乃 而 太 兄弟 過 1 如《北 同食。 古 鳴》在焉,是「投 人 歌 與用樂不同 史》《裴駿傳》。 豈得又以 禮 鹿 鳴》 投 壺 爲

長。 草以 相 所云 「或以爲兩 於此耳。」據 禮也。」正義引鄭《駮異義》解 乎中,以興嘉樂賓客當 苹 君有酒食、欲與 呼 姚 以 爲飲食,呦 呦 成 氏 呦 《識名解》曰: 君禮」者 鹿得蓱 鹿 疏,此 鳴, 鹿 呦 (群臣 相呼,喻兩 駮必是許 , 呦呦 ,與毛異義,實不 然 食 鳴 野 嘉賓燕樂之,如 有 相 然鳴 之 野有苹 呼,以 懇 **苹**」, 稱 誠 此 而 臣相招 經師 相 詩之意,云 相 款 傳: ·, 必 招 呼 如 誠 舊 呼,以 懇誠 爲 之 相 毛 説 鹿 興 意 義 呼 群 如 得 也 之 成 臣 疏 盡 苹 發 mi

比。 共 在』、『王在』相對言之,豈如後世必以 食, 舊以 然古人無 興 君 鹿 有 呼 承 所 同 筐, 必 拘忌 類 如 君 也,若《魚藻》明以『魚 笙 呼臣子,嫌於鳥 簧 以 相 將 稱 詞 廖 旨 潤 美 爲 瞭

鳳

爲頌禱邪

?

案: 以水草之交爲麋,鹿亦食水草,今鹿豕 非鹿所食,故不從之。」《爾雅翼》云: 處松柏。』』《莊 鹿不食乎? 水旁食。又人家養豕,皆以萍食之,何嫌 之草、《召南》『于以采 曰:『何食何處?』曰:『食薦,夏處水澤,冬 漢 識名解》以 書 《説文》云: 爾雅》云『苹,蓱。 笺云: 景 苹, 帝 爲 下章『食蒿』自 紀 子 曲 「古者神人以 藾 通 齊 蕭 傳 或 物 也。」正 其大者爲蘋」,是水 説,究屬 蘋,南澗之濱」者也 地 論 饒 陸草耳。」 「麋鹿 廣 馬 遺 黄 義 强 薦 日 解。 : 草 食薦。」 一古人 (帝,帝 莽 姚 亦就 易 承 珙 氏 水 中 傳 於

> 泉。」 無 食九草 鹿 據 未 嘗 如 淳 不 其 食 注 中即 引作 水 草。 有水芹。 子》 黄 Ш 「麋 谷 帖 鹿 羅 云胡 食 氏 日 之説 居 薦 士 似 言 是 非 鹿 麋

《鹿鳴》時未有他樂也。」承 《魚麗》之三,笙《由庚》之三。 來曰: 射 爲 歌諸詩,必皆作之在先,制禮 器,惟瑟與笙而已。 瑟歌《鹿鳴》之三,然後笙《南陔》之三,間 升歌三終,笙入三終,間歌三終。 均,瑟與笙有相關者。 以『鼓瑟』、『鼓簧』對言之。 南》,始衆聲俱作。 周 熊氏 初 我有嘉賓,鼓瑟吹笙,吹笙鼓簧」,熊朋 「『鼓瑟吹笙,吹笙鼓 燕 之説 群臣之詩,其 轉 似 故《鹿鳴》惟言瑟 因 至合樂歌《周 制 鄉飲未合樂之前 後 禮 乃 、珙案: 簧」, 古者堂上樂受笙 而 用 在 後 之於 此時 後。 正 作《鹿 其初,工 《儀禮 如《 南》、《 《 鹿 與笙,歌 所 鄉 車 用 飲 鳴 鳴 》所 召 燕 樂 歌 以

昭。 誤矣。 耳。 釋先有之詩 琴瑟協比歌聲也,固與《儀禮》堂上之樂有瑟 琴瑟,如《益稷》篇之「搏拊琴瑟以詠」,謂 是堂下之樂不作,獨鼓琴瑟以盡賓主之歡 言樂,自以旅語乞言樂音當止,故曰「德音孔 無琴者不 公作《儀禮》遂因之爲定制歟? 人立于縣中」也。 此但可略依《燕禮》,不得泥後制之禮以 末章復言作樂,而又變「笙」言「琴」,或 鹿 同。 鳴 也。 》爲周 堂下有笙,則如《儀禮》之「笙 豈古禮本先歌後吹,故周 初 燕禮 ,蓋其時堂上 至次章獨 兼 不 以 有

用。」正: 賓」,此獨言『人』,明有異也。 周行 行,道也。」箋云:「示,當作寘。 寘,置 善我者,我則置之於周之列位。 ,周之列 人之好我,示 義 曰:「易傳者,以其上下皆曰 位 也。 好 我周行」,傳:「周,至。 ,猶善也。 又《大東》、《卷 言己維賢是 人有以 『嘉 也。 德

《鄉

飲酒》、《燕禮》云「嘉賓示我

以

善道」。

皆在箋《詩》之先,當是用三家詩説,正與

毛

異。 記・緇衣》引《詩》以爲「示我忠信之道」,注 行」,與此正同,無容改字。 聲義皆通,故可兩用。 言其法,上下相副,於義爲長,故易傳也。」承 三處不同 非嘉賓乎?「示」「視」古今字,篇中互見者 「人」,便文無義,而謂有異,豈以寘之列位 珙案:此疏 官,緣此皆賢,所以燕饗。此章本其賢,二章 據今嘉賓,本其賢德,由 其垂法道教宏深,非直燕 改爲[寘]也。 爲「示」,明其不同。 耳》並有『周行』之文,皆爲周之列位 且下云『視民不恌』,乃作『視』字,此 ,言各有當。 申箋,實 且 此篇聖君賢臣講道之樂,觀 古者『寘』『示』同讀,故 多 説見《周 《周 其先有善德,置之於 牽强。 日話言而 至「周行」,毛 頌》「示我 南 言「賓」言 鄭注 已,明 , 此 顯 不 禮 是 傳 德 者 則 得

用皆賢,故當饗食,取義迂曲,似非詩旨。孔昭」,則所示「周行」之實也。必謂本其所情通款,冀聞善言之意,與次章相應。「德音行」爲列位,不知「人之好我,示我周行」乃導合。至作箋時,乃泥於《卷耳》之訓,概以「周

字,而 視民 敢偷 己 亦云 説,亦謂 堯叟因 傳》曰: 之不愉於禮義。」黄氏元吉云:「杜預注《 賓之語先王德教甚 視,古『示』字也。 以 厚 甚 薄。 義未優矣。」承珙案: 視民不 「視民不恌,言其視民之不 間謂君 厚,蓋 民之意。」皆 『佻,偷也。 「視民」與「視民如傷」同義。 則『視』作以 子德聲 不 恌」,傳:「恌,愉 敢 薄 飲酒之禮、於旅也語。 與 孔 言明德君子必愛民。』林 明,可以示天下之民,使 待 杜 目視物之視,言嘉賓之 甚 斯 解 昭 略同。 民之意。 嚴《緝》引曹粹 明,視民如傷,不 也。」箋云: 薄也,如 然此 黄 雖 實 不 句 夫 中 左 止 嘉 薄 破

> 《左傳》昭十年。 則效。 民不偷薄」與鄭義合,勝杜解多矣。 壹用之,將誰 曰:「德音孔 其不饗魯祭 用人於亳社。 當言君子之德音 若如杜 乎,周公饗義,魯無義。 昭,視民不佻。」佻之謂 福 臧武仲在齊,聞之,曰:『周公 解,則於詩上下文義皆 季平子「伐莒取郠、獻俘、始 哉?』服注 可以 使民歸厚,故 見本詩正 當爲 甚 矣,而 |不順 《詩 人所 二示

子病不 子 仲 所法傚。 有明德,可則效, 所法傚。鄭注《鄉飲酒》、《燕禮》皆以爲 即「嘉賓」。 箋云:「是乃君子所法傚。」承珙案:「君子 是則是效。」孟 尼 曰 君子是則是傚」,傳:「言可法 能 「能 《左傳》:昭七年。 相禮,乃講學之,苟能禮者從之。 傳云「可 補 過者,君子也。 而箋《詩》乃謂嘉賓爲 僖子可 法傚」者,謂 則效已矣。」此 「公至自楚。 《詩》曰:「君 君子可爲民 [傚也。] 君子 孟僖 嘉賓

莖空中,或方員,高三四尺。 惟《廣雅》「菇葿、黄文、内虚,黄芩也」,或即 牛馬亦喜食之。」」承珙案:芩、《釋草》無文, 地鹹處,爲草貞實,貞,俗誤作「眞」,今依《校勘記》。 赤。」與陸《疏》所言不合。《説文》以「菳」爲 云:「黄芩二月生、赤黄、葉兩兩四四相 詩釋文》則引《説文》「芩,蒿也」,與今本異。 詩》「食野之芩」,明 黄签」,而「芩」則云「草也」,與毛同,并引 陸璣云: 『莖如釵股,葉如竹蔓,生澤中下 爲此詩之「芩」。 食野之芩」,傳:「芩,草也。」正義 然《御覽》引吴普《本草 與今之黄芩别草矣。 四月花紫 曰: 值 紅

『屬」字之誤耳。」者,恐是一本作『蒿屬』,《釋文》『也』字或且《説文》當以『芩』與『蒿』篆類廁。今不然段注云:「《詩》若訓『蒿」,則與第二章不别。

《漢書‧匈奴傳》云:『懿王時,戎狄交侵,中 選•琴賦》注引蔡邕《琴操》曰:『《鹿鳴》者 數千里,遠者過萬里,歷二期。 家,獫狁之故。」《鹽鐵論 國被其苦,詩人始作,疾而歌之曰:「靡室靡 隱,故彈弦諷諫。』《風俗通•窮通》云: 『《伐 周大臣之所作也。王道衰,大臣知賢者幽 曰:古者無過年之徭,無 論・班禄》云:『忽養賢而《鹿鳴》思。』《文 木》有鳥鳴之刺。』《蔡中郎集・正交論》云: 表》云:『仁義陵遲、。鹿鳴》刺焉。』《潛夫 『周德始衰,頌聲既寢,《伐木》有鳥鳴之刺。』 《經義雜記》曰:「《史記·十二諸侯 踰 蘇役》云:『文學 時 之役。 長子不還,父 今近者 年

於獸 之積痛が 《關 然獨 遲 能 與毛義有合者。 以仁求其群。』《淮南 决 曰: 志 諷,非謂《鹿鳴》出於衰周。 首 母 爲刺詩。」《困學紀聞》云: 也。」是以《鹿鳴 (鹿鳴操》者,周大臣之所作也。 非 憂 厚 傾,留心聲色,内顧妃后,設旨酒 ,馬蔡以 雎》刺 「《鹿鳴》,君所 見,必 刺 養賢者 ,君子大之,取其 愁,妻子詠 以 詩。 於骨髓。 是始 時 知 爲 一、盡禮 陸賈《新語 作 風 賢 誳 故 刺 》、《伐木》、《采薇》、《杕杜》皆 歎,憤懣之恨發動于心,慕 + 且即三家,亦不 此《杕杜》、《采薇》之所爲 也。」承珙案:《左傳》穆叔 彈 ,蓋齊、魯、韓三家之説 以 继 極 琴 歡 • 隱,小 嘉寡君也。」即此一語 (見食) 泰族 以 • ,形見於色。 道基篇》: 風 「《鹿 《大周 加 訓 , 詠 相 》:「《鹿鳴》 在位、周道 歌 鳴》在宵雅之 . 過 呼 以感之,庶 王道衰,君 正 也。 謂 「《鹿 嘉肴,不 樂》云: 大臣 陳 此 古以 鳴》 猶 皆 陵 昭 興 作 思

幾可 此意也。 者,皆同。 「《小雅》盡 無可疑者。 風,大臣援琴 復。」此 《六月序》云自「《鹿 廢,則四夷交侵,中國微矣」,亦 其 明 前 他《伐木》、《采薇 是 彈 周衰,無 ;古詩 以 風 復 耳 () 鹿 鳴》 》以 鳴》養 詞旨)廢」以 爲 明白 刺 賢之 下至 即 詩

《巍巍》,用 夔《鹿 樂四: 鳴 雅 洋》,用延年所改《文王》聲。 詩,第一曰《於赫》,與古《鹿鳴》同。 曲,更自作聲節,其名雖存,而聲實異。 和 檀》,四曰《文王》』者也。 歌 》、《鹿鳴》之聲重用, 中,左延年改夔《騶虞》、《伐檀》、《文王》三 曲,一曰《鹿鳴》,二曰《騶虞》,三曰《伐 詩四篇,即《晉書 《經義 鳴》,全不改易。 雜 延 記》曰: 年所改《騶虞》聲。 \sim • 而 (漢書 後 杜夔傳》所云『舊 除 魏武時尚存。 又改三篇之行 古《伐檀》。 第 • 藝文志》 四 第三日 日 復 第二 用 及晉 及太 樂家 惟 || 洋 \Box 禮 大 雅

後箋

漢 鳴 戴 漢魏 禮 聞,未. 樂章。 此 歌,歌《鹿鳴》、《貍首》、《鵲巢》、《采蘩》、《采 俱非 初, 而 引蔡邕《琴操》曰: 蘋》、《伐檀》、《白駒》、《騶虞》。」《太平御 云 志》曰漢大樂食舉十三曲,一曰《鹿鳴》,其餘 篇耳。 》、《伐 禮 樂食舉但有《鹿鳴》,遂謂衹用此一篇也 杜 詩四篇 食舉 古歌 夔所傳《文王》又在八篇之外,似不得因 晉 魏 漢時於《大戴》「八篇」之中,尚存其 知 投壺 》云: 以 氏 (鹿鳴)以宴嘉賓,無取 所 檀》、《騶虞》、《鵲巢》、《白 亦 蔡邕《琴賦》亦曰《鹿鳴》三章,是兩 來,惟《 ,而《鹿鳴》亦亡矣。 行禮 應。』勖乃除《鹿鳴》舊歌, 則漢 用 ,食舉,再 鹿 雖存四篇 鹿鳴》 「凡雅二十六篇,其八篇可 鳴 「琴有詩歌 **%** 最 取 至 疑 顯。」承 周 泰 於朝。 詩 亦特用《 始 又《宋書 Ŧi. 五. 鹿 珙案:《大 年, 駒》。」據 曲 鳴 更作行 考之舊 鹿 》以 荀 覽》 五. 鳴 鹿 樂 爲 勖

四牡

六二〇

《少儀》皆從鄭讀易字,非《禮記》本有 即「匪匪」,與「飛」 必似鳴矣」,故書「匪」作「飛」。 騑」者。 騑之容,故《少 止之貌」也 正義引《 承珙案:《 「驂, 騑 翼」字從「飛」作「翼」。 匪,讀如『四 四 馬。」正 總之,匪 少 牡 少儀》本作「匪 儀 騑 騑 牡 ₩ E (儀》曰 『騑 義云: 騑 匪、翼翼皆取 一同聲同義,故傳以 傳: 騑』。」桓三年《 車 「名騑者, 《考工記》「且其 馬 騑 騑 之容, 騑 匪 翼翼」。」 行 翼 「飛」義。 《詩》「騑騑 翼」, 以駟 騑 不 左傳 騑 止 爲「行不 此 鄭 馬 翼 之 作 ※注 籀 匪 翼。 所 注: 貌。 有 騑 色 引 文 騑

倭遲 在於岐故也。」或疑使臣 ,歷遠之貌。」正義 周 道 倭遲 傳: 一周 曰 越國 : 以 道 岐 所 時 歷 未 周 非 之 稱 王 道 一,此 仍 也。

毛詩後箋卷十六

道矣。 以 道』言之。」其義已了。 記》云:「使臣初發,蓋自岐周 以 國之道 既爲文王率諸侯使朝聘之詩,何爲僅言其本 武之法。 屬文王,而詩作於周公,故正《小雅》實兼 歌文王之道爲後世法。」則此勞使臣 爲通途、朱《傳》以爲大道。 當武王、周公之時,普天下莫非 且文王以百里,不得爲遠 况傳云: 承珙案: 往,故以『周 「周公作樂, ,故程氏 一之事 **^** 周 文 吕

遲」。 《文選》謝莊《宣貴妃誄》注引《毛詩》作「周道 義近。 訓「衺去」,似與「險遠」不同,其實義亦可 倭遲」。《白帖》三十五引同。 楚 薛 君章句》曰「威夷、險也」,與毛傳「歷遠」 倭遲、《文選》 》「遵 又《辵部》「逶」下云:「逶迤,衺去兒。」 《説文》:「倭,順皃。」引《詩》「周 曲 江 之逶移」、《文選 注 引《韓 「倭」訓 詩》作 「順」,「逶」 登樓 威 夷」。 道 賦 通 倭

> 引《詩》: 夷」者,「倭」、「威」、「郁」皆 蛇」、《鄘風》之「委蛇」,皆與「倭遲」相近。蓋 此名縣耳,非《詩》之「周道」定在於此 古人凡雙聲疊韻形容之語,字多 泉賦》「躡不周之委蛇」,此則并《召南》之「委 其字耳。 相近也。 路逶迤 《廣雅 |而修迥」,皆即《詩》「倭遲」之義 「周道郁夷。」此或三家詩 《漢 書・ •釋訓》「委蛇,逶衺也」,《甘 地理志》「右扶 一聲之轉,後人 不 風 有作「 郁 同 夷」下 義每 而 以 郁 變

《采芑》『嘽 嘽」,毛訓『盛貌』,遂合彼兩傳 勞則喘息。」《稽古編》曰: 息』。蓋以馬之勞,見使臣之勞也。 嘽 「驟貌」,皆取疲苦之義,故又云『馬勞則 行不止 嘽 嘽嘽駱馬」,傳:「嘽嘽,喘息之貌。 衆盛 貌」,『嘽 嘽」,毛云『衆也』,《常武》『嘽 之貌。」與 嘽」爲「喘息貌」,「駸 、勞使 「傳訓『騑騑』 臣 以 義 訓 不 此詩 相 朱子見 駸 喘 爲 馬

蓋 通 雅 駱馬」。其曰「行遲」,義亦與「疲勞」、「喘息」 部》:「疼,馬病也。」引《詩》「疼疼駱馬」。 傳》注又引作「驒驒駱馬」。 言,自不當於此獨誇其衆盛。 息』乃本訓矣。」承珙案:通篇詞旨皆勞苦之 字原從口旁。 始 此 揮,讀若『行遲驒驒』。」此亦即《詩》之「嘽嘽 也。 知古人釋經,用意精密也。 爲 據三家詩,字雖 釋訓》亦云:「嘽嘽,疲也。」《漢書・敘 勞使,彼皆出 《説文》:『嘽,喘息也。』則『喘 軍 異 而 義各有當, 義實與毛同。 《説文・手部》: 又案: 《説文・疒 訓 解 『嘽 亦 《廣 嘽 此 殊

言》文。《左傳》疏引李巡:「啟,小跪也。」義略同,故傳以「居」釋「處」。「啟,跪」,《釋居」,《采薇》又有「不遑啟處」,是「處」與「居」居也。」案:《采薇》、《出車》皆作「不遑啟居也。」案:《采薇》、《出車》皆作「不遑啟

處」。 雅 《説文》之「凥」、《詩》所謂「處」也。若居,則 曰蹲。 大不敬,三代所無。] 此 於席,而跪聳其體,坐下其脾,《詩》所謂 人有坐,有跪,有蹲,有箕踞。 「蹲,踞也。」段云:踞,當作「居」。 段懋堂曰:「古 今人之蹲。《説文》:「居,蹲也。」《足部》: 坐,如今之跪、《詩》所謂「啟」也。 「尻,處也。 實,啟即是跪。居,本當作「凥」。《説文》: 啟,起也。 釋名》: 釋訓》: 若蹲,則足底箸地,而下其脾、聳其 若箕踞,則脾箸席而 「跪,危也。 啟, 从尸得 「啓,踞也。」恐非其義 舉 几 體 兩鄰隱 而 也。」 解分别 止。」大約古人有危 伸其 地,體 此 跪與坐皆 析 甚 脚於前 有安坐,乃 危 言之。其 析。 阻也 1厀箸 一般 廣

陸云:「鵻其,今小鳩也,一名鴉鳩。 幽州人「夫不,鳥之慤謹者。」《爾雅》「鵻其,夫不。」「翩翩者鵻」,傳:「鵻,夫不也。」箋云:

名斑鳩 鳩亦爲鳩 者謂之鴓鳩。 秦漢之間謂之鵴鳩。其大者謂之鳻鳩,其小 灰 然。」又云:「斑鳩 謂之鶻鳩。 此本《方言》云「鴓鳩,謂之鸊鷎。 不言大小,當亦如陸所分。《廣雅》:「鶻鳩, 爲鶻鳩,是鳩之大者,即《小宛》之「鳴鳩」。 雕,是鳩之小者,即 或謂之鷎 説文》: 疏》、《廣雅》皆與之合。 鳻音班 色無 『天將 繡 「鶌鳩,鶻鵃也。」「鵻,祝鳩 雨 似鶏鳩 鵖。 項,陰則屏逐其匹,晴則 之小者 微 鳩 梁宋之間 鳩逐婦』是也。」此疏以 或謂之鷄鳩,或謂之鷄鳩,或 梁宋之間謂之鵻,揚州 ,今荆鳩也。」《方言》惟以 而 與與 項有 大。 此詩之「夫不」。 、䴙鷎、鶏鳩、鵴 陸《疏》異,其 謂之鵖」。 繡 鶏今本作「鵓」,誤。 毛傳以「鵻」爲「夫 文班 然。 白關 郭 呼之。 鶻鳩 餘則 鳩也。」 以斑 注 鴻鳩 也。」雖 而西 云: 人亦 鳩, 鳩 爲 語 陸 鶻

> 譌字, 毛義。 鳩」爲 名中「鵓鳩」乃「鶏」之俗字,「乳鳩」亦「鶏」之 陸《疏》之「鷎鵖」、《方言》之「鸊鷎」。 不」、《衛風》之「鳩」爲「鶻鳩」、《小宛》之「 「荆鳩」即「楚鳩」,皆不當分而分者也。 「鶻鵰」,則其分别,當以陸氏 嚴《緝》謂 鵻 有十四名,馮 嗣宗 所 然十 疏 譏 爲 鳴 四 合

歌 思歸 來說」,亦序使臣 歸,王事 於君也。」正義 使臣,述序其情。 是以「作歌」爲上之所作也。 此詩之歌以勞汝,知汝以養母之志而來念。」 使臣之辭矣。 也。」箋云「診,告也。」正義述毛云:「是用 ,其來說,不得不爲『告』也。 也。 是用作歌,將母來說」,傳: 靡盬,我心傷悲』,文連『我心』,是 故作此詩之歌,以養父母之志來 類此而推,則『是用作歌,將 曰:「易傳者,首章云『豈 一之意 女曰:我豈不思歸乎, ,明爲使臣作此 鄭箋云:「君勞 猶『君子作 「諗,念 詩 不 之 懷 告 作 母 述 誠

能。 文謂 通。 歌, 罟,●命有司藏之,曰「使吾無忘諗」。 傳》,皆有 或言告君獨 再言將母,亦其情也」,解經已爲了當。 母,《詩》中多有此 雖訓「諗」爲「告」,然即謂念此不忘,義 念』也。」承 母不免牽於私情,凡此皆贅説 維 當訓「告」。至箋云「人之思,恒思親者, 或又以「來諗」爲告於其母,父猶 且勞者歌其事,養母 以 告哀』, 依 珙案: 日將母者,父或能 據。 是 《國 倒裝文例,不必因 毛 作 訓 語》魯宣公因 歌 本《爾雅 所 來念猶云念來 以 來告, 自通,母 ッ,鄭 也。 里革 不 作 本《 後儒 韋 歌 得 知 則 亦 大 不 之 養 注 可 斷 左 爲

皇皇者華

然《鹿鳴》、《四牡》、《皇皇者華》三詩,所謂《稽古編》曰:「《詩》之次第雖間有倒置者,《序》云:「《皇皇者華》,君遣使臣也。」

之。」此 《儀禮》工歌先《四牡》,以爲聲有先後。 有勞 《集解》以爲先遣後勞、《皇華》當在《四牡 説皆可不必。 蓋先後本無定例,不必深求。《潁 使,二篇之作又不必一人。] 此則圓 上,先恤其情,後勸以義,燕示慈惠故 東學詩》云:「編爲樂章、作鹿 以先勞後遣者,人之勞役,苦於上所不 前,真謬説。」承珙案:《譜》下正 書,又見《六月》序,其先後 一、《四牡》所勞不必是《皇皇者華》所 『工歌《鹿鳴》之三』也, 而 曲 見知,則 説 也。 雖勞不怨。其事 又云:「使臣 見《儀禮》、《左傳》 不可易矣。 鳴》三詩 往 義云: 濱 反 重,故 詩傳》據 通 古 也。二 同 無 李氏 歌 非 閡 · 知。 「所 虞 先 其

「駪駪征夫」,傳:「駪駪,衆多之貌。 征

^{▶ 「}宣公」,原作「莊公」,據《續經解》本及《國語》改。

其談 猶恐知有不及,故必「周爰咨諏」,文義相 侁征夫」,云:「侁侁,行聲 其德音之所 事,必以衆見。 多,故有聲耳。 與毛字異而義同者。 夫』。」《國 部》又云: 首章「靡及」正 雖本《國語》「夙夜征行,猶懼不及」之意,然 韋注《國 夫,行人也。」《説文》: 詢 貫。《集傳》於「衆多」下增「疾行」二字,此 文連「毎 則 其 度 墨 語》:「莘莘,衆多 所聞見 速 語 「桑,盛貌。 子・ 懷」。 撫循者博矣。 得矣。」其下引《詩》曰:「我馬 》、《説苑》引《詩》皆作「莘莘 「每懷靡及」,則謂衆人雖 起下四章 毛以「駪駪」爲「衆多貌 者遠矣。 尚 懷者, 同 中》云:「助之視聽 王逸注《招魂》引作「侁 「駪,馬衆多 讀若《詩》曰 和 「諏」、「謀」、「度」、 助之言談者衆, 助之思慮者衆 也。 也。」 也。」此蓋三家 亦以 和 非一人之 幸 貌。」《 行者衆 ご者, 幸 和, 者 則 詩 維 則 承 征 焱

> 淺 求助之義。 딩 : 駱,六轡沃 答謀。」即 矣。 我馬維騏,六轡若絲。 此 若但 若。 可見「靡及」當爲 載 以爲道路征 馳 載 驅, 載 知 行之不及,其見 周 有 馳 爰 不 載 咨 驅 及,皇皇 度。」 周 爰 又

之。」」又云:「鄭之此説亦 者華》,君教使臣 與王肅異耳。 中和之道猶自 云:『使臣之行,必有上介。 及」,王肅以爲下傳所言覆説此也,故 爲『和』,而卒章傳云『雖有中和 曰:「本皆如 每人懷其私相稽留,則於事將無所及。」正 箋云:「《春秋外傳》 『和』當爲『私』。 每懷靡及」,傳:「每, 此。 案: 以 衆行夫既受君 無 此既 曰「每懷靡及」。 《魯語》 所及,是以 口『懷 以「毎」爲「雖」,「懷 述 穆叔云: 衆 和 雖。 毛 介 爲 當自謂 驅 也。 命 雖 懷, 每 馳 當 多 懷 臣 但 而 和 速 , 内 全皇皇 聞 述 其 咨 無 也。 行 也 之 毛 所 意 諏 懷

引其 曰 : 者,本無『每,雖』,後人以下傳有『雖有中和 爲之終始立説,明其不異毛也。 破之,言毛氏亦爲『私』也。 以毛傳云『懷,和』是用《外傳》爲義,故引而 不得爲『和』也。 觀此《晉語》之文及鄭詩之意,皆以『懷』爲 詩曰:「仲可懷也。」鄭詩之旨,吾從之矣。』 處,猶懼不及。 况其縱欲懷安,將何及乎? 『「駪駪征夫,每懷靡及」。 當爲『私』者、《晉語》姜氏勸重耳之辭 本無『每,雖』二字。 西方之書有之曰:「懷與安,實病大事。」鄭 ·和」當爲『私」,下復解傳『中和』爲『忠信· ·私懷』之義,明《魯語》所云亦當爲『懷私』, 和」爲『私」,亦不 懷私 文,因正其誤,云『和』當 爲每懷。』是《外傳》以爲懷私 鄭所以引《外傳》而破之者, -得與 若『每』爲『雖』,縱 毛 夙夜征行,不遑啟 同 如鄭此意,則 也。 爲「私」。 蓋鄭 此既 故鄭 所 使 鄭 改 曰 : 據 變 傳 傳 必

> 《常棣》曰『每有良朋』,又曰『雖有兄弟』,是 但作「每,雖」,彼箋又即用此傳也 「下篇有『每,雖』之訓」,是所見《常棣 是也。《常棣》箋各本皆作「每有,雖也」,惟 相臺本「每」下無「有」字,當係古本。 此疏云 『有』亦衍字,可據此傳訂正。」承珙案: 『每有』即 『雖有』也。 也」,不誤。《玉篇》、《廣雅》皆曰『每,雖也』。 楚篇》『每發而不當』《釋文》引《爾雅》『每,雖 作『每有,雖也』,衍一『有』字。《莊子・庚桑 因而加之。 之言,下篇『每有良朋』之下有『每,雖』之訓 「《釋訓》『每,雖也』,毛所本也。 定本亦有『每、雖』。」陳碩 彼箋云『每有,雖也」, 今本《爾雅 前日: 以箋亦 陳説

者,亦即鄭説耳。惟《晉語》姜氏引此詩戒重『私』。是則《魯語》原文本作『和』,其作『私』和爲每懷』,韋注引鄭後司農云『和』當作《稽古編》曰:「案:《魯語》穆子曰『懷

言「懷」以

戒重

耳,與《詩》『每懷』本不

于

孫

申毛

, 謂

「雖

有

中

即一每

雖

姜氏引此詩以證『懷,私』,不知姜語義取

每,雖」,後人所

加

曲爲鄭諱。

雖

和」,若作『雖

私」,文不可

通。

孔

疏

雙聲得義。《外傳》以『懷和』釋『懷』,毛傳即 夫無及,不可懷安」,故復取西方書及鄭詩之 周」義,皆曲説也。」陳碩甫曰:「「懷」 『和」 孫毓《詩評》亦 懷,和」之解。 又據《晉語 懷和」之 牽合 箋改 和 · 涉。 , 當 征 也。 上皆 疑 曰 懷私 《烝民》「征 緩 則 也。』王曰:『宫商 王 經,足知箋不如 説,則上句方言征夫樂事,而忽戒之以 捷,樂事也。」 與《序》曰『禮樂』意正合。言使臣 禮樂之原,乃能 如吾言。』使者曰:『王之鼓瑟,未嘗悲若 故下句無傳者 之德,猶自謂 義,得其旨矣。 ·衆征夫捷捷然至」,而於「每懷」句 和」。 何 遣使者之楚,方鼓瑟而遣之,誡之曰: 急,宫商 不書其 而 雖和 相稽留 移 一夫捷 (柱邪 而 靡及,必將周咨之。」承珙 徙 據 ,以與《皇皇者華》同 猶恐無及,正 殊 傳。 通中和 不 此 中 ? 王曰: 捷,每懷靡及」,傳云:「捷 固 於詞義 可 《説苑 謂 方調 則 知 禮 傳 之德。 7和 矣。」使者曰:『 是 意 不 『天有燥溼,弦 見 亦 以 順。 奉使 二謂 傳 其樂事之實 不 必 旦 以 樂 書。」使 冷篇 故 仍 雖 也。 必必 「懷」爲 中 以 自 有 箋云 每 用 案 中和 達 經 和 「必 有 此 捎 夫 調 譜 其

以『和』釋『懷』,是本之《外傳》也。

鄭

和』爲『私』,《烝民》箋同,蓋鄭

誤

耳。

毛

懷私

,恐非毛旨。

又末章傳云『雖有中

和

爲『私』義,要是斷章立

説,未必此詩本

訓

王

肅

即

用以

述毛,於義允當。

爲「私」,又强

解『中和』爲『忠信』,以

毛傳上下自

相

申成,得之矣。

鄭既

破

自

謂

無所及」,正首章『每,雖。

耳

順

身縱

欲,又引

西方

書及鄭

詩之言『

懷

諏之意,要與「懷私」渺不相涉也。 可豫定。 外傳》。其引《詩》大旨謂使者因時制宜,不 里,吉凶憂患不可豫知,猶柱之不可書 遭吉則賀之,凶則弔之。 曰 詩》曰: 莘莘征夫,每懷靡及。」」此本《韓詩 明 即 一之使 此 雖 人 有 也,任 中 和,自 今楚趙相去千有餘 之以 謂 事 無 不 及,更當咨 制 以 也 辭

信 謂 親 雖 德之説,毛義 事,則成六德,言慎其事。」《稽古編》曰:「六 六德。』據此文義,則所謂『六德』即上六語是 外傳》之『六德』,本文亦自明矣:云『懷 爲 (每懷,咨才爲諏,咨事爲謀,咨義爲度,咨 得 也。 無 詢 所及,成於六德也。」箋云:「中和 此於忠信之賢人,猶當云己將無所及於 末章傳云:「兼 ,忠信爲周 五者,咨也,諏也,謀也,度也,詢也 誠 勝,但孔疏之言猶 ,君况使臣以 此五者,雖有中和 大禮,重之以 未盡 ,謂忠 當自 也。 和

此五 事。 也。 《外傳》義正相符,不可易矣。 傳「雖有中和」者即上「每,雖。 總括《内》《外傳》而用之。王肅、孫毓皆以毛 善,由其雖和 發全詩之旨,謂使臣兼咨、諏、謀、度、詢之五 護,然不能掩其失也。」承珙案:傳於篇 爲六德之一,其誤 謂德乎? 和」爲一德,而康成破『和』爲『私」,『懷私』 德,是其誤也。『懷和爲每懷』在五善之外, 矣。 『雖有中和,自謂無及』傳以備六德之一,與 之『訪問於善爲咨』耳。 · 咨」、「諏」、「謀」、「度」、「詢」。 鄭箋以傳之「中和」爲「周」,而 不 者於忠信之賢人,猶當云己將無所 忠信 知 經 爲 又謂傳『中和」是釋『周」義,而 周 文首章言「靡及」,下 而 ,言答於 自謂 與韋等。 無及,故能成於六德,乃 忠信之人, 周咨 孔 且穆叔以『懷 惟 義,韋分爲兩 疏 懷,和」,是 「靡及」,所 雖 四 又謂 即《内傳 . 章 曲 乃 及於 末總 雖 爲 得 指 口 П

賢人。」則又以咨、諏、謀、度、詢五者爲己之 也。 實毛義未必然也 以 其解 必 其答張逸云:「已有 兼 此 愈曲 五. 者,非 愈晦 得此五者 孔疏謂其贊成毛義,其 五. 德, 而 又自謂 復問忠信之 「靡及」

常棣

周。 周,而作詩曰:「常棣之華,鄂 之詩曰『兄弟鬩於牆,外禦其侮』」,明此 之失道,故作《常棣》焉。」箋云:「周公弔二 叔之不咸,而使兄弟之恩疏,召公爲作此詩, 之人,莫如兄弟。」周之有懿德也 公所作以親兄弟。又引:「《左傳》富 而歌之以親之。」正義引《外傳》云:「周文公 「昔周公弔二叔之不咸,故封建親戚以 召穆公思周德之不類,故糾合宗族 《序》云:「《常棣》,燕兄弟也。 不),猶曰 韓韓。 閔管蔡 辰 「莫如 於成 凡今 藩 爲周 티 : 屏

爲 移》,燕兄弟也。 衆、賈逵皆指「二叔」爲管蔡,故以注此《序》, 管蔡,不得云傷其作亂,始封建之。 公亦云。』杜注:『周公作詩,召公歌之,故言 兄弟」,故封建之。 似不可易。《藝文類聚》引《韓詩》曰: 文所敘十六國有管蔡者,特推 殷之世,蓋用馬融説,與《鄭志》答張逸 之詩,其説甚當。杜注《左傳》以「二叔」爲 案:此疏融會《内》《外傳》,以《常棣》爲周 侮,捍禦侮者莫如親親,故以親屏周。 而言之耳,不當因此别生夏殷之説。 「周仲文説」同。《左傳》疏謂封建之中 咸」即失道也,實是一事,故鄭引之。] 承 「亦云」。』此《序》言『閔管蔡之失道』,《左傳》 言『弔二叔之不咸』,『二叔』即管蔡也,『不 此《韓詩》序文。 閔管蔡之失道 其懷柔天下也, 則 毛 韓 . 義 同,其來古矣。 本封建之全局 也。」董氏以 猶 箋以 不知 懼 ·方有 ()所云 **《夫** 召 有外 夏 珙 穆 鄭 下

弟。」杜 追詠 初説 或疑《 蓋閔之也。」然則謂文武燕兄弟於當時,周公 之變,因思文武能燕樂兄弟如此,故作是詩 麗》之總例。 道,爲後世法。」此爲正《小 毛於《四牡》傳云:「周公作樂以歌文王之 鳴》以下皆文武之事,而周公作樂以歌詠之。 成王時所作,不應入《天保》以上。不知《鹿 德。」此則尤爲周公作詩之明證。 其上文又云:「周之有懿德也,猶曰 公以管蔡之爲亂也,故制作之際更爲是詩, 周」而言,即指召穆公所作《常棣》之詩。 文武以《天保》以上治内」、《常棣》爲周公在 外傳》本無 其事於後,於理亦可信。 日 左傳 注云:「當周公時,故言周之有 「文武之際 》「召穆公亦云」乃承 異 范氏《補傳》曰:「周公遭管蔡 同 也。 固 後儒又以《魚麗》序云 有燕 雅 兄弟之詩矣,周 《吕記》引朱子 上文「以 鹿 可見《内》 鳴》至《魚 [莫如兄 親 懿 然 屏

並 以 雅》「常棣」正合。 關西、天水、隴西 《釋文》:「本或作『常棣,移』。 白 也」。詳見《召南》。 氏《詩考》並據《韓詩》序云「《夫移》,燕兄弟 非,誤矣。常棣一名夫移,故晁氏《詩説 案: 傳文正當以作「栘」者爲是,陸氏轉以 而微圓,子正赤, 白,今官園 『唐棣,栘。』『常棣,棣。』作『栘』者,非。」承珙 常棣 無言其名「薁李」者,則是也。 棣樹,雖誤,然其云「如李 「常棣之華」,傳:「興也。 可單 種之。 稱「棣 陸《疏》釋常棣以 多有之」。 如郁李而小,五月始熟, 陳長發云棣小 又有赤棣樹,葉如 則誤。 其云先儒 所言與郭注 而 小,如 案,《爾 常棣,棣也。」 至注《本草 如 許慎 櫻桃,是 釋常棣 刺 櫻 雅 謂 美王 桃 榆 自 爾 葉 爲 爲 IF.

以 朱櫻 櫻桃,其形狀與朱櫻同,即此詩之「常棣」。 則可見其本 李。」據此所言 諸家言常棣者,皆衹言其子。 枝莖作長條、華極繁密而多葉者,亦謂之郁 頌《本草圖經》云:「今汴洛人家園 引《詩義疏》云:「承華者萼,其實似 薁李麥時熟,食美,北人呼之相思也。] 又蘇 云「鄂不韡韡」也。 春初開 華,繁盛如雪,而此樹亦如之,所 非郁李矣。 即常棣,而云「亦謂之郁李」, 今京師西山 惟《齊民要術》 圃 中有白 植 櫻 一種 桃

之字與从邑咢聲迥别。《坊記》注『子於父母施。』又引《字林》:『鄂,直言也。』从『咢聲李善注:『鄂,直也。 从邑者乃地名,非此所『鄂』者,誤也。 馬融《長笛賦》『不占成節鄂』李善注:『鄂,直也。 从邑者乃地名,非此所。」又引《字林》:『鄂、直言也。」从『粤》云:『鄂不韡韡」,傳:「鄂、猶鄂鄂然,言外

之人指當時爲今而義不通於後,故言後世之如兄弟之最厚。」歐陽《本義》曰:「毛嫌作詩之言爲今也。」箋云:「聞《常棣》之言,始聞之言爲今也。」箋云:「聞《常棣》之言,始聞

述毛曰 明 勘記》改。 説非 來之意。鄭箋亦善申傳旨。 之心有不能不抱憾於終身者,而作詩以 不必厚於兄弟乎? 法,則勸戒之道存焉。 而不欲明言,故特著此 誦 (常棣》)之言爲今」,言外有追傷既往 「凡今之人,莫如兄弟」,豈前此後此之人皆 晰 雖 詩 也。 不解亦可,毛鄭皆衍説也。」承珙案: 以 「管蔡之事已缺,二字諸本作「以次」,從 相 而 此詩首章方以 戒 聞《常棣》之歌爲來今」,語意尤爲 者 所 誦 毛蓋以 詩 語見 故傳曲會詩意以 之 常棣 時 痛定 此詩閔管蔡之事 而正 即 起 思 爲 興, 義引王 痛 今 、作戒將 而即 爾 聖人 爲 「聞 《校 歐 肅 世 曰 此

聚於原隰之中,而其所求者惟自求其兄弟。下,而傳倒之者,正其善於解經。蓋謂人雖求矣,言求兄弟也。」案:經「求」字在「兄弟」「原隰裒矣,兄弟求矣」,傳:「裒、聚也。

之。」是也。 衍其説,以爲毛義,誤矣。 義》云:「上章所謂『莫如兄弟』,於此兩者 此 爲 平 常之時 鄭箋以「原隰」與「兄弟」,孔疏 與 上 死 喪 爲二 事 何 氏

且 傳》「日 渠也。 即雝渠,則其爲水鳥明甚。 同,「精列」實「脊令」之轉聲。 中之鳥,以箋説爲非。 性也,猶兄弟之於急難。」嚴《緝》謂脊令非水 而今在原,失其常處。 言兄弟之相救於急難。」箋云:「雝渠,水鳥 煩鶩庸渠,箴疵鵁盧,群浮乎其上。」庸渠 ·鳾鳥、精列、鸝鶇,雅也。」「雝渠」與 雅,石鳥,一名雝渠,一 鳴矣。」顔注云: 脊令在原,兄弟急難」,傳:「脊令,雝 夜孳 飛則鳴,行則摇 孳 敏 行 「點鴿,雍渠,小青雀 而 不敢怠,辟若 ,不能自舍耳。 則飛 曰 承珙案:《説文》: 《漢 精列。」《廣 則鳴求其類,天 書・ 上林 鸎 東 爾雅 急難 賦 雅 鴒 方 朔 飛 亦 飛

原」更推其飛鳴求類之故,二義實相成也。舍」亦衹狀其勤苦之意,鄭箋乃因經文「在則鳴,行則揺,言其勤苦也。」毛傳「不能自

是也 申也 賜」之「貺」,古字只作「况」,皆「兹益」義之引 古書中凡言「而况」者,爲更進之詞。 柔》《召閔》傳及《今文尚書》『母兄曰』、『則兄 瘁。』戴氏 段懋堂曰:「《出車》『况瘁』箋云:『兹益憔 「况」,或作「兄」,又作「皇」,不得定以何者爲 自] 正同。 言不能如兄弟相救,空滋之長嘆而已。 『兹,艸木多益也。』『滋,益也。』《詩》之辭意 國語》注云: 『况,益也。』 玉裁謂 况也永嘆」,傳:「况,兹。 此蓋本無其字,依聲託義,其字或作 作『兄』是,作『况』非。」承珙案: 云: 『兹,今通用滋。』《説文》: 永,長也。」 此與《桑 又「貺 韋昭

「烝也無戎」,顧氏《詩本音》曰:「考

字之誤,姑存一説。」段氏《音均表》以「戎」韻 韻之變,非可以例求者。 曰:「案,『戎』有『汝』義,遂有『汝』音,此音 傳》引《詩》之文,失之矣。」江氏《古韻標準 『汝』同音。吴氏改『務』爲『蒙』,而不顧《左 勞》『戎雖小子』即汝雖小子,可見古者 『戎 『汝』。《崧高》『戎有良翰』即汝有良翰、《民 汝也」。」此説本之元熊朋來,《五經説》曰: 勞》、《崧高》、《烝民》、《韓奕》,箋並云『戎猶 古『戎』字有『汝』音,故又訓爲『汝』。 則與『務』韻、《常武》首章與『父』『祖』韻。疑 『戎』字、《詩》凡四見、《旄邱》三章與『東』同 『烝也無戎』與《常武》『以修我戎』並當音 韻、《出車》五章與『蟲』、『螽』、『忡』韻,此 | 戎」讀爲「仍」,以與「朋」韻,而《常武》之「以 「此詩『外禦其務』當以《左傳》『侮』字爲據 務」爲合韻、孔氏《詩聲 陳氏疑「戎」爲「武」 類》則 以《常棣》之 《民

即此 雅》,《 爲是。 訓「汝」而讀爲「汝」。毛傳「戎,相也」本《爾 亦當作『武』。」承珙案:諸説當以熊氏、顧 是『武』字傳寫誤耳。 且 朋」句既見於三章,不應四章反與末句爲韻 無夏』與二章韻,不與三章韻。 章韻,不與三、四、五章韻。 州」同 並見,恒在前章。 考全《詩》通例,第三句與第四句 詩中四句成章,從未有三句起韻者,此必 車 戏」爲 一以與 「軵,反推車,令有所付 謂依坿也。 集韻》引《爾雅》作「拭,相 披,推 但「戎」字,古人當自有「汝」音,非 之而 段注云「付,與 無 不 也。」推 韻 顧」云云,恐非是。 今人卸空車者亦反推之,令依坿牆壁, 《皇華》之『載馳載驅』與二 江 也,本可不與而故欲與之,至於 氏 挽者,相助之意。 《常武》之『以修我戎』 有 語《 《宛邱》之『無 詩 从 也。 此詩『每有良 經 車付,讀若 韻 韻 也。 案:「付」與 者 讀 「,數章 **>** 《説 《廣 日 冬 以 氏

> 切,似非無據,但以 注: 至劉原父欲改「戎」爲「戍」,陳第欲改「戎」爲 反,《類篇》以「扔」、「搣」、「戎」三字並 云: 察言之。」《玉篇》:「搣, 軵其肘。」高注云: 茸。』《淮 「朋」協,考《爾雅釋文》引沈旋音「戎」 「戎」「務」之協矣。 付 武」,尤未免强經以就我矣。 軵」與「拔」聲義並 「軵,推 一爲聲。 「軵,讀『軵濟』之『軵」。」《覽冥訓》注又 南 也、讀『楫拊』之『拊』。」則 觀於「軵」之讀「茸」,可無 氾 論 孔氏讀「戎」如「仍」,以 訓 「軵,擠 同。 讀《常武》則不可通 × 如勇切 而《淮 相 也 戲 南 以 讀近『茸』,急 ,推車也。」是 刃 説 林訓 如 即 如 疑 大 耳。 蒸 升 與 於 以 祖

燕私,見《楚茨》、《湛露》。 飫,私也。不脱屨升堂謂之飫。]段懋堂 傳當作「飫 **儐爾** 籩 燕 豆 一,飲酒 私 也。 之飫」,傳: 脱 屨升堂 『脱屨升堂』惟 謂 之飫」。 儐, 日: 燕

能飲 升席曰 言》: 禮。此句「禮」當作「飫」。 之,从酉,區聲,乃與『豆』、『具』、『孺』叶。 詳,曰:『夫飲之禮,不脱屨 當作『宴私』。徐堅《初學記》引《韓詩》説最 堂』之『餝』。《酉部》『醧,私宴飲也」,『私宴』 用正字,毛用假借。《説文・食部》『饓,燕食 假借也。 是一事,毛公渾言之。毛謂『飫』,乃『醖』之 棣》『醧』作『飫』,爲音近假借字。 也」,引《詩》「飲酒之饌」。此引《詩》説假借 「餶」、『饒』、『餘』諸篆相屬,非毛傳『脱屨升 爲然。 ,宴私。』本《韓詩》爲説。 者飲,不能 『飫、私 宴。 左思賦曰『愔愔 飫、《韓詩》作『饇』,其説 能者飲,不能者已,曰 也。」蓋 飲 者已,謂之醧。』許云: 作《爾雅》時、《常棣》詩 跣 而上坐者謂之宴。 醧讌」,以古韻訂 而即席者,謂之 而《毛詩·常 《爾雅 曰 : 饇。」宴饇 『脱屨 • 釋 韓

也。

私

爲飫,是謂飫别於燕。 云:「九族會曰和。孺,屬也。 《國語》之『飫』,以『脱屨升堂』説《爾 之『脱屨升坐謂之宴』也。 宴醖是一事,言宴 飫燕雜陳,不特非經義,亦非毛旨也 牽於《國語》之文,而以「圖非常」、「議大疑 則尚毛。」可見傳意謂飫即是燕。 辨晳矣。毛於下文「兄弟既具,和樂且孺」傳 者已』在其中矣。以《詩》、《爾雅》之『飫』別 相承,必非上二句言飫,下二句言 『飫』也,故足之曰『脱屨升堂謂之飫」,即韓 已作「飫」矣。 『私』,此毛義也。」承珙案:段氏諸説可謂 而醧在其中,言『脱屨升堂』而『能者飲、不能 毛公知《詩》『飫』非《國語》之 孔疏因之,遂謂此詩 王與親 經文四 燕。 雅》之 戚燕 鄭箋 句 明

記》引董氏曰:「訓釋無 「帑,依字吐 樂爾妻帑」,傳:「帑,子也。」《釋文》: 蕩反,經典通爲『妻帑』字。」《吕 以『帑』訓『子」者

六三六

之乃都切耳。 案:古「妻奴」字皆借「帑」爲之,蓋古「帑」字 賈 文庫藏》曰:「帑,徂浪切。」始以别於「妻帑」 只讀若奴,聲同故借。《廣韻》引李虔《通俗 .奴』即『子」。 公定 於《司 蓋 厲 \Rightarrow 唐人猶作『奴』字。」承珙 引 ^ 詩 **>** 日 『樂 女妻 奴

伐木

「諸舅」,卒章「兄弟無遠」爲燕朋友,非是。」案:經首章但言「求其友聲」,則知「朋友」足案:經首章但言「求其友聲」,則知「朋友」足」。故舊,其實皆朋友也。故《六月》序但似言故舊,其實皆朋友也。故《六月》序但以二章、卒章上二句爲燕故舊,則民德歸厚矣。」以二章、卒章上二句爲燕故舊,則民德歸厚矣。」以二章、卒章上二句爲燕故舊,則民德歸厚矣。」以二章、卒章「兄弟無遠」爲燕朋友故舊也。自

《序》之「朋友故舊」,則并兼宗族兄弟言之。 舊自在 爲兄弟」者,固與《常棣》之「兄弟」不同耳。 但其所謂「兄弟」,乃《儀禮》所云「小功以下 親宗族兄弟,以賓射之禮親故舊朋友。 定本無「宗」字。 章傳云: 其中。 「國君友其賢臣 族之仁者。」亦衹言朋友,而 《周禮 •大宗伯》以 大 夫、 飲食之禮 士友其宗 若此

缺。 《韓詩序》云:「勞者歌其事。」又謝混《遊 者,亦因天子而推言之,猶《序》義也。 樂友朋,貴賤一致耳。 失德,乾餱以 池詩》注引《韓詩》云:「《伐木》廢,朋友之道 朋友故舊之詩矣。其又言國君大夫士之友 「陳饋八簋」云「天子八簋」,明以此爲天子 道通乎上下,非以此詩亦用於庶人也。 勞者歌其事,詩人伐木,自苦其事,故以 《序》又言自天子至庶人,乃泛論求友之 愆」,不過借庶人之事,以 《文選·閑居賦》注引 「民之 傳於 燕 西 燕

然以「伐木」爲賦,於義淺矣。 巖伐木,爲勤苦之事。] 其説蓋本於《韓詩 云: 爲文。」此 「言昔 則 日 未 似 在 以 位 伐 居農之時,與友 木 爲 庶人 之 事。 生於 鄭 箋 Ш

也。 言伐木,不及鳥鳴,猶《葛覃》次章不言黄鳥 者。」承珙案:首章因伐木而 其本義矣。當闕其所未詳,以 則不及鳥鳴之意,但『伐木許許』、『伐木于 如《葛覃》因以黄鳥爲興,是也。 阪』便述朋友之事,與首章意殊不相類,蓋失 曰:「是詩主以鳥鳴求友爲喻爾。 下章皆以 ,伐木聲 先儒: 《吕記》引什方張氏曰:「詩人多相因之 如伐木而 伐木丁丁,鳥鳴嚶嚶」,傳:「興也。 莫著爲何 也。 伐木言之。」《稽古編》曰 感鳥鳴,蓋因 嚶嚶,驚懼也。」歐陽《本義》 鳥。 宋羅 願 感鳥 此以興焉者也 以鶯當之,引 俟深於《詩》 二、三章但 鳴,正 至其下章 :「此鳥 義 1 謂

賦》: 謂: 《伐木》之『鳥』爲『鶯』,其來古矣。」承珙案: 事。 嚶』爲『黄鸝』用,自漢已然,不 鳴嚶嚶」,要是 作《六帖》始類鸎門中。 歟?」王楙《野客叢書》引:「《東臯 鶯』者久矣,蓋自《伐木》。 也。」葉大慶《考古質 曰: 『《詩》正文與注皆未常及黄鳥 求其友聲』並無『鶯』字。 李綽《尚書故實》曰:「今謂進士登第爲『遷 友詩》,又《鶯出谷詩》,别無證據,豈非 以泥自裹,至春 云『鶯,有友鳥』,殆指《詩》『求友』語。 禽經》「鶯鳴嚶嚶」爲 案、《禽經》僞書、不足據信。 『今人吟詠多用遷鶯出谷事,又曲 『雎鳩 鸝 後 黄,關 破土而出,此 人附 疑 證。 關 洪駒父稱《禽經》「鸎 》 曰 會。』張平 嚶嚶。」然則 頃歲省試《早鶯 詩人『嚶其鳴矣 又言鶯是蟄鳥, IE. 可謂自樂天始 出 緗 惟《玉篇》 谷遷喬之 子《東 素 白樂天 雜 雜 以 則以 録 記 京 誤 嚶 冬

遷鶯

皆

循

唐

人之誤。

友

人》

漢賦 遷鶯 明。 則唐人以『嚶嚶』爲鶯,又未必不本於此。 庚、鸝黄即所謂鶯也,張衡皆以『嚶嚶』言之。 又《東京賦》:『雎鳩鸝黄,關關嚶嚶。」蓋倉 雎鼓翼,倉 分屬二鳥。 梁元帝《言志賦》:『聞鶯而懷友。』陳楊 星流電激」,是真得《詩》意。』大慶按: 從祀麓山 「嚶嚶」雖非指鶯,然漢張衡《歸田賦》: (南史)梁劉孝標《絶交論》云「嚶鳴相 桑扈》毛傳。 即《玉 簷巢始入燕,軒樹已遷鶯。」自梁陳 言屬 事,而曰承襲唐人之誤,非也。」承 「鳥嚶嚶兮友之期,念高子兮僕懷思」, 一篇 》 廟 關嚶嚶」者,似是泛舉鳥聲,未必 庚哀鳴。 且如《羽獵賦》,又云「鴻雁嚶嚶」 詩》: 《稽古編》作「有友鳥」。 「鶯」字注云「鳥有文」,此本 「窗幽 交頸 惟 細網合,階 頡 漢 旗,關關嚶嚶。」 梁 鴻 思思 静 《詩》 召, 「友」 珙 落 已 王 謹 又 謂 用 花

> 嚶嚶」,又引《詩》「緜蠻黄鳥」,然本文究 「鶯」字。 啟》曰「啼鶯出 恐「文」字之誤。 「鶯」字。惟梁昭明太子《錦帶書・ 云「亂嚶聲于縣羽」,李善注雖引《詩》「鳥鳴 唐人殆沿此 谷,争傳求友之聲」,始明 文選》王元 而 誤耳。 長《曲 姑洗 水詩 二月 序 出 無

也。 附」,師古曰: 言於帝室猶 皮附於樹也。』《漢書· 年表》序云「諸侯子弟若肺腑」,索隱 樸也。]字又借作「肺」。《史記• 案: 柿,字當作「柿」。 肺,音柿。 以喻人之疏末之親,如木札出於木,樹 「伐木許許」,傳:「許許,栜貌。」 腑,音附。 肺 札附大材木也。」又《田 説 肺 《説文》:「柿,削 柿,木札也。 劉向傳》「臣幸得託 謂 斫 木之肺 惠景間 附,木皮 札 「蚡傳》 也 承 曰 : 木札 侯 肺 者 珙

⁰ 孝」, 原脱,據《考古質疑》補

許説 伐木聲。尋詩意,毛説爲長。」承珙又案: 傳「訏訏,大也」、「甫甫然大也」之類。《説 引《詩》皆作「滸滸」,《唐石 有 文》:「所,伐木聲也。」引《詩》「伐木所 多之貌,如《晉書》所謂「木柿 依附者,故《太玄》用之也。 古説《詩》家或有以《伐木》之「杮」喻親 餱」,注云:「削曰 顔 惠氏《古義》曰:「許、所,古通字。《禮説》曰 一滸。 ·所』皆從『斤』。 所]者[削 後漢書・朱穆傳》注、《顔氏家訓 蚡 説 以 蓋 爲非,然《太玄• 此蓋本無其字,依聲託義,猶《韓奕》 出三家。 腑 本相足。 爲相」 柿」,猶「斯」者「析薪」,故「斯」 「許許」 《説文》依《毛詩》而曰所所, 注 柿。」此正用《毛詩》義 正 略 親》「次八」 同。 固 柿貌 《史記 許許者,削 「伐之爲聲 ·蔽江 經》初刻亦 前 曰「柿 正 書證篇 而 削 義 下」也。 柿 所」。 柿衆 亦 舊 附 雖 而 作 當 有 之 疑 乾 詆

> 聲也。」 子》。 呼 呼『邪軤』,牽石拖舟者歌『嘘喚』,舉大木 柿。」是也。 舉大木者呼邪許」,然『邪許』者,舉木之聲, 作『邪軤』,見《文子》。 『輿謣』,皆勸力之歌 一作『輿謣』,見《吕氏春秋》。 惠半農云: 「朱《傳》引《淮 前 一作『嘘喚』,見《劉 呼後應,非伐 挽 南 車 子》 者

箋以 酒市 之,無酒當釀之,此 之禮,至孔子時乃有酤酒 明是卒爲之,故云『一宿酒』,蓋於時 云: 有』『無』爲辭 ·酤,買也」。」姜氏《廣義》曰: 宿之酒,不得謂之『無酒』。 「酤,買也。」正 「無酒 脯不食」,是古買酒 經傳無明名『一宿酒』爲『酤』者。 酤 我」,傳: 而 况乎其已湑也。」嚴《緝 義曰:「毛 命 有司 「 酤, 爲 之詞。 市 酤 脯。 「人君 以 《論語》云『 酒,故易之 宿 爲言 酒 有 總 也。」 酒 無 不 有之。 無酒 既 當 買 可 酤 爲 箋 酒 有

酒酤 我」謂 注曰: 孔 釀之酒已經涼茜, 酒矣。」蓋上傳云「以 酒也。」以「買酒」爲别一義,蓋以其非古耳。 足爲據? 榷 ∭ 베 不食」,二者非相反 末 埤蒼》曰「湑,滑 説文》:「醴,酒 弗 酤 子當周衰 句 「《詩》曰『無 食。」此雖亦訓「酤」爲「買」,然正爲莽時 在官,和旨便人,可以 而 仍 漢 始釀之酒 「醴,猶體 設 小徐注《説文》云:「一宿酒,謂造之 言 書 ,所謂「文六藝以 《説文》:「酤,一宿酒也。 飲 亂 食貨 此 ,酒酤在民,薄惡弗誠,是以 未 酒 也,成而汁滓相將,如今恬 湑 美也」,是「有酒湑我」 一宿孰 經澄 則清 (志》: 也。 酤 矣」, 藪曰湑」,「湑,茜之也」, 我」,而《論 濾 滑 夫《詩》據承平之世, 也。」《周禮 知 王莽 ,所以應倉卒 而 不 餙姦」者,其言豈 相御也。 美。 待 時 語 酤 此「無 羲 》曰『酤 也 • 酒 《論語》 和 — 曰 -之求 謂 酒 魯 承 正 買 酤 久 疑 酒 王 珙

> 當 夜 以毛説 而 熟 爲長 若 今 雞 鳴 酒 70 是 也 尋 文 考

若未見孔疏者,此皆不可解。」阮氏《校勘記 《詩》,專遵毛鄭,何此詩分章忽有異同,又不 説,而竟以己意斷之。 明言其故。 指『伐木許許』爲二章上二句,『伐木于陂』爲 句,孔疏已然,不始 『兄弟無遠』爲卒章。 卒章上二句,又指『諸父』、『諸舅』爲二章 總十二句爲一疏,作三次申述,又《序》下疏 傳、箋下疏語統釋一 句。 此詩若從毛,當六句 章,其説良然。 十二句。劉氏以三『伐木』爲章首,故分爲三 《吕記》、朱《傳》從劉 稽古編》曰:「此詩,毛分爲六章,章六 劉 欲改毛公章句,當援 然此不自劉氏始也。 於 章者,例置每章之末。 一疏,分爲六條。 朱、吕亦止云從劉,俱 是此詩三章,章十一 劉 氏 氏 説分爲三章, 也。 但 孔 案: 凡 疏 疏 爲

注、正義時,又誤改標起止耳。」 章、「案《序》下標起止云:《伐木》六章,章 一一章。 其誤始於《唐石經》也。 合併經、 章、兄弟無遠』是也,與標起止不合,當是正 一一章。 正義又云『燕故舊』即二章、卒章上二 一一章。 正義又云『燕故舊』即二章、卒章上二 一一章。 正義又云『燕故舊』即二章、卒章上二 一一章。 正義又云『燕故舊』即二章、卒章上二 一一章。 正義又云『燕故舊』即二章、卒章上二 一一章。 正義又云『燕故舊』即二章、卒章上二

天 保

自是祝頌之辭。 周,與《詩》篇名偶同耳。 其祝頌之辭。何氏《古義》即 汭」云云,遂疑此詩爲營洛後,周召報命而 書》「王云:定天保,依天室,自洛汭遷於 據《史記》「武王克商、憂天保之未定」、《 《序》云:「《天保》,下報上也。」鄒 ·周書》所云「天保」者,不過謂天之保 前三章皆稱「天保」者,如 《序》云「下報上」, 用其説。 案 : 逸周 忠胤 致 伊

> 誤,何氏《古義》列爲異文,誤矣。 《韓詩外傳》云:「『天禄定爾」,此不過轉寫字 之所以仁義禮智保定人之甚固也。」此雖與 之所以仁義禮智保定人之甚固也。」此雖與 之所以仁義禮智保定人之甚固也。」此雖與

説致 而先訓以『信』耳。單,亦與『亶』同,故以 相連,猶敦厚、博厚之相連耳。 即厚也,此於訓『大』義尤切。『單』『厚』二字 省从 學, 今 粵 隸 皆 作 業曰:『此即甼之隸體。驗麞字从亭,小篆 文》板本於中間横畫左旁加點,謬也。 按:此『从甲』非『尊卑』之『卑』,今所 文》:『單、大也。 或曰:單,厚也。」翁氏《詩附記》曰: 後人易啟複疊之疑,故列此於第二條 俾爾單厚」,傳:「俾,使。 从吅、甲。 覃,可證也。」愚按: 亭 ПП 毛恐專主此 亦聲。 單,信也。 行《 辛紹 闕。」 説 説

《釋詁》訓「信」訓「厚」二者皆作「亶」、《潛夫 「大」爲 厚」連文,即如正 皆厚也。則『單』訓『厚』義無疑。」承珙案: 於文義複疊耳 疏引某氏注亦稱《詩》「亶厚」,故説《詩》者疑 論 毛兩釋皆以「單」爲「亶」之假借。 云:《小雅》『俾 也」,一云『亶,厚也』,注云『見《詩》』。 作『單』。 僤,厚也」。 信厚」之義,故《桑柔》「逢天僤怒」傳亦云 亶」訓「多穀」,「單」訓「大」,引申之皆得有 慎微》篇引《詩》作「俾爾亶厚」、《爾雅》 訓 爾雅》『亶』字兩見,一云『亶,誠 至「單」既爲「厚」,而經以 般 爾單厚」、《周 庚》『誕告用亶』,馬融本『亶』 義謂以厚德厚天下,亦不嫌 頌》『單厥心』, 考《説文》 軍 疏

官記》曰:「除而又生,則何以但言『除』不言嚴《緝》諸家多從「除舊生新」之解。《毛詩寫「何福不除」,傳:「除,開也。」《呂記》、

略同。 義,故以爲「開」,如開 此皆因文立義,言各有當 蟀》「日月其 者,如閉藏蓄積,今開 「日月方除」傳云:「除,除陳生新也。」二傳 逐逐開與,猶所謂簽除者矣。 生乎? 此云「何福不除」,自不當用「除去」之 除者,開 除」傳云:「除,去也。」《小 而與之也。 通道 出之。」承珙案:《蟋 也 路謂之「除」耳。 孔穎達云: 福 事不一,故

此解。 穀」,朱子曰: 耳。 求新?」段注《説文》云:「《天保》『俾 義爲『盡』義,迂矣。 引頌『實始翦商』爲證,故合『戩』『翦』爲 『翦』同,而訓爲『盡』。《吕記》、嚴《緝》皆從 古編》曰:「《集傳》取聞人滋之説,謂『戩 然《説文》「戩」字注云:「滅也。」轉「滅」 俾爾戩穀」,傳:「戩,福。 案:聞人氏之説,祇因《説文》『戩』字 『戩、盡也。 况『福』義本可 穀,善也。」此注甚 穀,禄。」《 通, 何必 」與 稽

薦進之福,古人本有此故訓之法。

毛傳之用

爾雅》,多因《詩》文立義。

如《樛木》「福履

.晉」轉聲。 「祓」既爲祓除之福,則「戩」當爲

爾雅釋文》又引孫炎云:「戩,音箭。」此從

有此訓。《生民》疏引孫炎云:「祓除之福。」

戬」字本訓。

若《爾雅》之「戬,福」,當時自

志。許於『戩』不襲《爾雅》,斯善讀《爾雅

履,禄也」,『茀,小也』,則不相襲矣。

《樛木》之『福履』、《天保》之『戩穀』、《卷阿》 毛傳者也。」承珙案:《説文》「戩,滅也」,乃 釋兩字之義。毛公仍之,曰:『戩,福也。』而 之文,貴善讀之,所謂不以文害辭、不以辭害 『福』矣。『戩』『祓』本不訓『福』,與『穀』『禄』 ·福』。『履』本不訓『福」,與『福」連文則可訓 皆於兩字摘一字以 皆得訓 古人 × 謂 之也。 《方言》云:「福禄謂之祓戩。」此似又以「戩 尚有此方言,不得以《説文》「滅」字一訓盡 爲「禄」,可見「戩」字本兼「福禄」之義。 訓「盡」,故以「戩穀」爲「福禄」。 而下文「受 下文「罄無不宜」「罄」乃訓「盡」,不應「戩」亦 爲「祓」之借。獨於此「戩」訓爲「福」者,當由 言》「芾,小也」,以「茀」爲「芾」之借,而不以 之「履,福」。《卷阿》訓「茀」爲「小」,則用《釋 連文,則用《釋言》之「履,禄」,而 天百禄,降爾遐福」,正承此二字申言之耳 不用《釋詁 漢人

連文則亦可訓『福』矣。

之『祓禄』郭注引《卷阿》「茀」作「祓」。

合古義。

爾

雅》:『履、戩、祓、福

也。」此

《周禮·大宗伯》六享皆稱『先王』、《外傳》不 稱『先王』。如《書・武成》稱后稷爲『先王』, 窋稱『先王』,又數后稷至文爲十五王。 「公,先公,謂 周之追王雖止大王、王季,然后稷以下亦統 「于公先王」,傳:「公,事也。」箋云: 后稷至諸盩。」《稽古編》 曰 :

故省文以完句。」此於經文殊費周折,當以傳 王在公後。王尚言『先』,則公爲『先』可知 以天子之禮,自 非徧及先公。 珙案: 上文「禴祠烝嘗」, 時享止及親 如正義云:「經於『公』上不言『先』者,以先 四時之祭事其先王,何等直截。 若如鄭箋以 「公」爲「先公」,無論時祭不盡及先公,且必 言『先王』, 足兼 周初親廟雖有先公在焉,然祭 諸 可概稱 熟 以 上,傳義不 「先王」,故毛傳 必易。」承 廟 謂 本 以

案:古者,族姓之始皆由於有官爵者,如黄為百姓,與伏生所傳二十八篇中異指。」承珙官有世功,受氏姓也。』凡經傳言『百姓』皆此姓,百官有世功者。』又云:『百姓,百官也,皆此,百官有世功者。』又云:『百姓,百官也, 「群黎百姓」,傳:「百姓,百官族姓也。」

言此以别於上文日用飲食之民耳。 典》云:「百姓,群臣之父子兄弟。」此傳 物賜之姓,以監其官,是爲百姓。」故鄭注《堯 百。王公之子弟之質能言能聽徹其官者, 字爲謚,因以爲族,官有世功則有官族,邑亦 德,因生以賜姓,胙之土而命之氏。諸侯 縱其後亦有無官爵者,然庶民不得 「百姓」爲「百官族姓」者,亦以族姓 如之。」《楚語》子期對昭王曰:「民之徹 帝之子二十五人,得姓者十四 百世不改。 族即氏也。 《左傳》云:「天子建 而 른 有姓,故 出于官 姓者 官 以 而

義,解爲常盈而不虧。夫古無盈而不虧之別。嚴《緝》謂『恒』無『弦』義,止有『常久』之《釋文》反切,似本與訓『常』之『恒』音義各鄧反。沈古恒反。』《稽古編》曰:「『恒』字據日弦而就盈。」《釋文》:「恒,弦。」箋云:「月

文》「亦作」本也。 引《詩》者,説从『月』之意,非謂《毛詩》作 似『外』字。古文『恒』直是『二』中『月』耳。 訓也。」段注《説文》云:「此篆轉寫訛舛,既 之恒」,則『恒』字原以月取義,上弦未必非本 文》云『常也。 有恒久之義,故古文从月。」承珙案:正義 亦作「縆」,謂 『殅』也。 傳曰:恒,弦也。《詩》之『恒』,本 又云『古文「恒」从月作死』,因引《詩》『如月 切。《天保》『恒』訓『弦』,古恒切。 月,乃以稱 『恒」訓『偏』,古鄧切,其皆借乎? 云从『月』,則左當作『月』,不當作『夕』。按, 「縆」字、《集注》、定本作「恒」。是正義同《釋 .門部》之古文『閒』作『閲』,蓋古文『月』字略 然《説文》引《詩》作「恒」,則《毛詩》字 願 張 其 从心、从舟在二之間』,胡登 弦也。 君乎? 令白 月上弦 帖》一 按,恒,本作恆、《説 引《詩》亦作 加 就盈,於是 然《説文》 《生民》 云

盈,皆喻方盛之象,「恒久」非其義矣。也。」以此例之,則經謂如日之方出,月之將之假借耳。 又下傳云:「升,出也。言俱進本作「恒」。而傳訓爲「弦」,自以「恒」爲「縆」

采 薇

先。 《小雅》文王詩 《稽古編》曰:「正雅篇次皆周公所定,其先 誅,若在成王詩 詩雖作於成王時,既在治内之列,則 薇》以下治外,義各有當,非苟而已。 後之序自有取義,不以作詩時世爲斷。如 以遣之、《出車》以勞還、《杕杜》以 命,命將率遣戍役以守衛中國,故歌《采薇》 時,西有昆夷之患,北有玁狁之難,以天子之 又《詩譜》推其故,以爲周公閔管 《序》云:「《采薇》,遣戍 九篇、《天保》以 中,則明彰其罪,故 役也。 上治内、《采 勤 不得不 《常棣》 推 文王之 歸 而 也 被

樂歌。 《序》之『昆夷』即詩之『西戎』、《緜》詩之『混 《采薇》詩《序》云云,朱子力詆其説,不 之一證歟?」姜氏《廣義》曰:「《采薇》、《出 天子所,謂我來矣。」』然未明言殷爲天子,文 車》、《杕杜》序傳皆云文王 獫狁,謀武以昭威懷。 書》序。其言曰:『文王立,西距昆夷,北備 書》以犬夷、畎夷、昆夷爲一。《帝王 夷』、《孟子》之『昆夷』也。《史記》言文王伐 周公作,遂謂以後諸 有據者也。『獫狁』不見他典,獨見於《逸周 言文王時有混 犬戎、《書大傳》言西伯伐犬夷,顔師古注《漢 一子所見,良不妄也。 也。 於文 《荀子》云:『天子召,諸侯輦輿就馬, 詩》云:「我 王 親 夷。 兄弟之義 此伐西戎爲文王 出我 詩皆非文王 作《武稱》。』非伐獫狁 朱子因《常棣》一篇是 輿,于彼牧矣。 所作而周公定爲 王 肅 亦 事,左矣。 事 以 世紀》亦 歷 爲 然 自 · 知 歷 甫 並

乎 ? 《竹書》以『一月三捷』爲實事,而爲季 將爲吉甫 獫狁之文,後人遂疑文王無此事,因以此 文王伐昆夷、《大雅》、《孟子》皆言之,但無 皆匈奴别號,即前 王者也。 之間,其西爲昆夷 詩。郢書燕説,何所適從? 按,周世居 爲一詩,又人《周襄王紀》。 爲諸 宣王詩。然以經證之,《六月》篇宣王 亦以南仲、吉甫同爲宣王時人。 何氏 以『南宫中』爲『南中』。蔡邕《諫伐鮮卑議 爲刺懿王詩,《出車》爲美宣王詩,《人物表 王伐昆夷,而《史記》混《出車》、《六月》兩篇 爲大帥 侯 若以爲武王後詩,考武王伐殷,如西之 也。 其北爲玁狁,顏師古曰 非 ,作一詩美 《史記》《漢 南仲也。 ,即西戎也,後此 此追逐大王以 豈同 書 南仲,又一 《漢書》以《采薇 事 匈 奴 遷 而 薰鬻、玁 傳》皆言 詩 伐周 岐 南 美吉 時 者 歷 楷 之大 戎 弑 也 爲 伐 狄 之 文 狁 出出 據

案:《史記• 雅》詳言伐密伐崇,而不及伐玁狁也。」承珙 化,故止及昆夷,義各有當也。 言當日之事,故重玁狁。 王,立子帶爲天子,侵盜暴虐,中 頌德,安得以商王之功爲文功也哉? 文王奉天子之命遣將伐之,臣道無成,周公 在彼,兩事不煩再舉也。 駾矣」,則玁狁之服 『大王事獯鬻』,即玁狁也。《緜》之詩『混夷 服,至厲 在玁狁,而 『于夷』,而不言平西戎者,程子曰:用師專 知傳以南仲爲文王之屬,不可易矣。《孟子》 人歌之曰:『戎狄是 通 **髳微** 道于九夷 宣 北 西 而 匈奴傳》云"「戎狄 復熾 之纑 戎不兵自服。 八人變。 ,皆不得以此三詩屬之,可 彭,南之庸濮,皆至牧野 可知。 膚」,●「薄伐玁狁,至 然則《采薇》三詩是 康王以 《緜》之篇專言德 伐玁狁曰『于襄 著手在此 况玁狁叛商 後,蠻夷賓 國疾之,故 破,逐周 此《大 , 收效 襄 宫 少改

羌蜀

Ŧ

二期。長子不還,父母愁憂,妻子詠歎,憤懣之恨發動於 《采薇》爲懿王時詩,此或三家之説,然其云 《六月》、《出車》爲一。此皆沿元朔元年封 《六月》、《出車》爲一,并《魯頌》亦牽引及之。 仲山甫式遏寇虐」,亦引此四句。 原」,「出車彭彭,城彼朔方」,《鹽鐵論》「周宣 蓋亦以二詩爲傷今思古之作。 心,慕思之積痛於骨髓。 無過年之繇,無踰時之役。 雎》刺時作諷之類耳。《鹽鐵論・繇役篇》:「古者 命將征伐,詩人美其功曰「薄伐玁狁,至于大 雜采衆家,每多牴牾,本不足怪。《漢書》以 蓋其時,《詩》始萌芽,經師抱殘守闕,太史公 于大原』,『出輿彭彭,城彼朔方』。」是不獨混 詩人始作,疾而歌之」,或以傷今思古如《關 此《杕杜》、《采薇》之所爲作也。 今近者數千里,遠者過萬里,歷 其又云:宣王 則皆同《史記》 出 師 王 衛 混

膺」,原誤作「應」,據《史記· 匈奴列傳》及《毛詩· 閟

宗此 賓服。 戎。 《史》、《漢》又誤從 青等 合。 敗周 梁山 事 者,漢詔之常 之患,與《孟子》、《逸 之患,北有玁狁之難,遂攘戎狄 徒之戎,皆克之。及文王爲 羌傳》云:「武乙暴虐,犬戎寇邊,周古 蹟不概見他書者 命 於《史記》、《漢書》之互異者矣 蓋《毛詩》序、傳至 季 師 爲侯, 傳亦必本華 太丁之時,季歷復伐燕京之戎,戎人大 而避於岐 乃率西戎,征殷之叛國以事紂。」范蔚 歷 爲牧師。 後二年,周人克無余之戎,于是太 詔 書 下。 並 引 嶠、謝承等書所言周初 無 而實之耳。 此 即當 自是之後,更伐始呼、翳 及子季歷,遂伐 周 二詩。 宣王」、「襄 後 書》、《竹書紀 以 漢 此 時 西伯,西有 然 《後漢 爲 始 而成之,莫不 引《詩》爲 大著 據 王」明 西落 書 無 年》 明 公踰 戎狄 昆 西 其 皆 夷 鬼 美 復

「歲亦陽止」,傳:「陽,歷陽月也。」箋

月。 誤也。 爲坤。 以 然末章「雨雪霏霏」傳云: 息。 故首章云「歲亦莫止」。 月,故從《爾雅》『十月爲陽』。」承珙 爲然。」又云:「鄭以傳言涉 者,以十一月爲始,陰消陽息,復卦 未歷十月,雪不至甚矣。 經歷此有陽之月,而至坤爲十月,故 四月,純乾用事。 名此月爲 『陽』。」正 云: 來 「十月爲 歷 至九月而剥,仍一陽在。至十月 以類上『莫止』,則不得歷過十月,明 過 傳云歷陽月者,正謂 則從十一月至九月,凡十有一 有陽之月,凡十有 陽, 時 五月受之以 坤 義 用 述 雖 事, 如 毛 九 「霏霏 必 月, 歸 謂 嫌 歷陽 月 謂 期 於 亦 姤, 去年十一月 『歷 甚 無 須 則經中「 得 月不 案 用 經十月, 陽,故以 云『歷 爲 也。」若 陽消 而 事 月, 陽 歲 此皆 · 據 陽 月 晚 + 陽 盡 陰 已

❶ 「姤」,原誤作「垢」,據阮刻本《毛詩正義》改。

沿 異義 讀書者之難也 乃承毛義,而 之月乎? 作」、「柳依」,遣戍已在仲春,何嘗徧歷 孔 疏,謂毛鄭異義,鄭説爲長。 陳氏《稽古編》專宗毛者,而於此 然則陽月正指當年之十月。 申之曰「十月爲陽」,並 此可見善 非 鄭箋 亦誤 有 與 毛 陽

卿車 《左傳》晉賜鄭子蟜、王賜 此 也。」《書》疏引舍人注云:「輅, 非 何」,傳云:「爾,華盛貌。」《説文》引《詩》作 加 薾 詩之「路」以 非 即 ,則與「彼爾」之文不相稱矣。 」,亦云「華盛貌」。 稱「路」之證。 車 即華名,則「彼路」亦當爲車大之貌 彼路斯何」,正義 · 名 可 知。 爲 車之 **^** 爾 承珙案:上文「彼爾 雅 大 「彼爾」爲華盛之貌, 以「路」爲路車, 則 叔 釋詁 孫 可,若實以爲車 豹 車之大也。」 》:「路,大 大路,以 歷引 而 維 爲

小人所腓」,傳:「腓,辟也。」箋云:

《文選》注曹大家訓『萉』爲『避』,《漢書》注 説、《吕記》、嚴《緝》皆用之。 展亦訓『避』,義 避戎車乎? 耳,其實毛意未必 動之物,非 房未反。 君子所依而乘,小人所避而弗敢乘,何嘗非 此詩破字。夫以『辟』爲『避患』,王之述毛然 卉具腓」,毛訓『病』。 『牛羊腓字之』,毛皆訓『辟』。《四月》篇『百 戎車也,『小人所腓』亦當腓戎車,安得更有 乘,戍役之所芘倚。」正義曰:「傳文質略,王 『避患』義,故易之爲『庇』。」《稽古編》曰: 述之云『所以避 『腓』字三見《詩》。此詩『腓』字及《生民》篇 腓,當作『芘』。 班 隨動之物也。 固《 案:腓,亦作『萉』,音『肥』,又 正與毛合。 幺幺 患 此 如此。 也」。 通 言戎車者,將率之所 鄭於彼兩詩皆從毛,獨 賦》『安慆 鄭 [《]易 毛當謂 至程子『隨 以『君子所 不知「腓」乃躁 • 慆 咸》、《艮》兩 此戎· 而 不萉」, 依』依 車者 動」之 依 鄧

通作 此 者,庶士亦藉是車 字。 及等威之義。 字以爲「辟不 駁程《傳》「腓隨足動」之説,皆是。 辭》『隱思君兮厞惻』、《禮記》『取廟之西北厞 注:「萉,字本作「腓」。」及《集韻》,萉,通作「腓」。 經中已自相矛盾矣。」承珙案:陳氏 卦 旌」,薛綜 正當言戎車爲君子小人同其利賴,此 則於《咸》訓『躁 隱避」之意。 避」義本同。 解甚 注 用爨之」,皆訓爲『隱」。 **厞、《説文》、《爾雅》皆云『隱也』。** 「萉」,説 疏及《本 確。 注 《文選 亦引《爾雅》「厞,隱也」。「隱」 本顔 敢 義》皆取『躁動』之義。 何氏《古義》曰:「『腓』即『厞』 蓋 傳訓 乘」,則詳玩經文兩「所」字, 動」,於《艮》訓『 兵凶 以 注《漢書》顏師古《漢書 自隱蔽 東 「腓」爲「辟」者,「辟」爲 戰危,兩 京 賦 此曰『小人所腓 》「設三乏, 厞 也。」今案: 軍相當,士卒 隨 惟解 動」, 謂 程《傳 時 何氏 **《**楚 無暇 一辟 敘 腓 在 與 又 傳 司

> 解。 字。 《司馬法》: 此 相成也。至「腓」爲「脛腨」,董氏逌 解 諸人皆倚此 之受患最 句何獨取 善得毛旨。 然以 「芘蔭」與「隱蔽」義同,鄭雖破字,意實 文義 甚 喻 車以 惟 於 鄭箋 論之,上句「依」字未嘗取 車 戎 「脛腨」乎? 有 爲 車 隱蔽。 花 步 戰 卒 倚 則 炊家子 故王 一亦所 馳 突, 肅 以 固 止 遊避 申 則 守 · 傳 亦有此 患」之 誉 衣 喻 裝 衛

以繁束,骨飾 漆之。]又:『無緣者謂之弭。] 孫 『弓,有緣者謂之弓。』孫炎云: 訓,最爲明晰。 者。」承珙案:《説文》此語合《爾雅 爲之,以助御者解轡紒宜骨骨,宋本作 以 也。」《説文》云:「弭,弓無緣,可 解紒也。」箋云: 象弭 魚 兩 服」, 頭者也。」孫炎此 詩 傳: 「弭,弓反末彆者,以象 Œ 義 「 象 弭,弓 「《釋器 『緣謂繁束 反 炎曰:『不 以 注 》、毛傳爲 末 「滑」爲是。 較 解 也,所 勝李 轡 紛 而 骨

名之。 骨也。 弓。 用其 左 《詩》何 弭,弓反 類聚》六十。 雅》之「緣」爲骨 弓名可知矣。《左傳》疏引李巡云骨飾 之名,非以「弭」爲弓之名,亦非 謂之「弓」。 謂之「珧」,以玉者謂之「珪」,亦皆因 巡、郭璞。 御 無缘者謂之弭」云。「今之角弓也。」《藝文 「弓」,不以 覽》三百四十七。 雅 今西方有以 鞭弭』,弭者,弓之别 其下文云,以金者謂之「銑」,以 《儀禮・既夕禮》「有弭飾焉」,「弭」 爲而 》注之説 末 蓋繁兩頭 骨飾 以象骨爲之。」蓋 引郭璞《毛詩拾遺》云:「毛云 以「象弭」連文也? 骨飾 犀 飾。 兩頭者爲「弭」,即指弓兩 又引《拾遺》云:「《左 兩 皆 角 而漆者,得弓之大名 頭曰「弭」。 及鹿 由 然弭既不 不 善 角爲弓者。」此 名,謂 讀 俗説之誤 謂 《爾 郭注《爾 以 此 此号 以 骨 蓋 象牙 雅 其 飾 以 皆 飾 蜃 兩 傳》 也。 矣, 雅 則 以 自 爲 爾 非 者 頭 以 用 頭

之誤者也。《詩稗疏》謂弭者,角弓不纏之名,亦承郭氏「弭」與上文「弓」對,誤以爲亦弓名耳。王氏

鞘諸 魚歸 如故。 腹下純 名。」而 有珠 或江 世 之説合。又周益公言周麟之使北 及天將雨 惟《左傳》『歸夫人魚軒』服虔注云:『魚,獸 不概見,故傳 服,矢服也。」姚氏《識 所 飾 文 ,皮應潮。 豚 稱 又「魚服」傳:「魚服,魚皮也。」箋云: 類 陸 而 與《博物志》所載東 沙 多以其皮爲之,斑駁如沙石 青,雖乾燥爲弓鞬矢服 魚是 堅勁 也。 ,其毛皆起,水潮還及天晴,其毛 機以爲魚獸 亦但 羅端良以『魚』爲鮫魚 也 可飾 當即 訓爲『魚皮』,不言獸 不聞有 物,從古以 是此。 似 名解》曰 豬,其皮背上斑文, 海半 用 則 魚獸皮者。 疑 經年,海 然。 體 仍 塞,得魁牛 「魚獸 魚 ,最堅緻 按,今刀 是魚屬 ,謂其皮 狀如 水 也 4 故 潮

珙 案: 謂傳以「皮」訓「服」,非 箋故以「服」爲「矢服」申明之。矢房本當作 記》云:『織竹 之,不必定魚獸 陳 所受之器以皮曰箙。』謂柔服用之也。 ·魚」字,傳語簡奧,不言以「魚皮」爲「服」耳。 箙」字,从竹,經傳特借「服」爲之耳。 ·魚服』爲『魚皮』,則似以『皮』訓『服』矣。」 祥 道 傳云「魚 \overline{Z} 所 謂 日 魚服 也。 服,魚皮也」,「魚皮」專釋 遊, 者, 以 又、《釋名》云:『矢,其 也。 皮 魚皮之堅者皆可 日 箙。」今傳直 《初學 姚氏 承 訓 爲

非是。 也。」《釋文》云:「曰 言君子小人豈不日 ·日』,《釋文》音『越』是也。 校勘記》云"《唐石 非也。 玩箋意正當作「日」,若作「日」,不 不日戒」,箋云:「戒,警勅 箋意是『曰』字。」承 相警戒乎。 戒,音越, 經》初刻『曰』,後 後 誠 又人栗 珙案: 音即 日 軍 相 事 此 反。 警戒 宜 也。 改 必 校 作

> 戒」; 切經音義》六亦引《詩》「豈不日戒」。 言「相」矣。 日」是,作「曰」非 顔師古注:「豈 **^** 漢 書 也 • 匈 不 奴 日 傳》引《詩》「豈 日 相警戒乎。」《 知作 不 日

得稱爲 以 柳 旄、曰楊, 姚説是也。 『楊柳』爲『蒲柳』,甚當。 楊,又以 屬,柳不可言楊 柳、蒲柳諸名,而 楊」之柳,猶云「檉柳」也。 識名解》曰:「《釋木》柳類甚多,有 楊柳」者,乃後世 柳 樊圃 爲大名,不容專指 楊柳依依」,傳:「楊柳,蒲柳也。」姚 二、「菀 楊 楊爲 其種各異。 柳, 《爾雅》衹以柳爲大名, 彼 柳之揚起者,並誤。 非 柳 兼言楊 屬明矣。 楊僅列柳之一,則楊 辭章家之言耳。 斯」、「有菀 古人言楊 何種。 與 以其爲柳屬, 舊説或以 柳 其 通 者柳 也。」承 於「隰有楊」、 柳者,謂 稱「 此 占皆 傳於 日 河 柳 珙 傳 柳」爲 檉、 無 案 故 爲 爲 專 名 曰 釋 水 亦 柳 澤 氏

如 柳」釋之。 恐學者疑 蒲 東門之楊」、「北 此者。 柳專名,人所易曉耳。 詩 其 故 人之並 訓 Ш 有楊 舉二木也 依《爾雅》,不容稍溷 等亦 獨 此 無傳 故 楊 以 柳」連文, 「楊,蒲 以 楊 有 爲

出車

學》日 征 不及 别 時,豈止 依依』既 中述其往也,『黍稷方華』正當仲夏,與『楊 王勞還師者,皆以 當早春,與『雨雪 伐 用 西 玁 之耳。」 序》云:「《出 戎 狁 不 舊謂 而 Í. 出 同 承珙 作。 有「 月。 師乎? 此詩與《采薇》同 案:《采薇》三言 霏霏』又不 一月三捷」之文,似乎專 出 序其來也 爲宴勞之詩,因 車》,勞還 車 二篇非 則 「玁狁」、「西戎」 同 「雨雪載 率 時,當文王 時之作,玩 也。」《田 時之作。 [其詩而 ~ 玁 狁 塗 間 並 之 篇 爲 正 而 分 後 柳 詩

念出 言, 時 往矣」謂 凡始行及在 城方,不明何時,故四章 文「昔我往矣」之「往」。 有參差,其 同,不必 之計,其曰「薄伐西戎」者,乃因戍守之師 可勝耳。 捷」不過其偶有侵軼,自爲不可 故《采薇》亦 戍者,守也,古人之禦夷 ൬ 薄伐」,似與前篇 用之。故《采薇》序但言「遣戍」,其下即合 時之作。 車》、《杕 而 范 玁 氏 始 疑非 《出車》曰「往城于方」,亦第 《補 狁 實則一。 行之時,此 道皆 不知《采薇 杜》而總言之。 祇曰「我戍未定」,其 日 傳》云: 時之事。 「于襄」、「于夷」, 可 不同,故後 曰 經曰「往城于方」,即 「往」、《采 「昔我往矣」謂在 「黍 》序 蓋前三章但言出車 |狄但 溯其 至其往 止 稷 可見三詩 云 儒 方 所自 以 遺 勝以 薇》之「昔我 或 華,在 自 曰「一月三 來時月, 成役 疑二詩 而 守 西 待敵之 爲 本 · 爲上。 言之。 道道之 無 也, 戍 守 非 下 移 H 不

平戎 物。 徂征 此似於本詩敘次分明,而與《采薇》亦無 車」、「建旄」,則北 終三章「城方」之命。而首章、二章之「出 西戎諸侯之嚮往,末章乃結言春晚還歸之時 既畢,即已懷歸,復被簡書,西戎助虐,受命 之時,期以歲莫言歸,而今至首春凍釋猶 早,不必定在六月。至「今我來思,雨雪載 見。 在道者,則以城方之後別有戒命。 塗」,亦是謂歸而在道之時。 植有早晚,此云「方華」,方者,甫 云「王事多難」,乃爲移伐西戎起語,謂築城 簡書」之言。六章之末云「玁狁于夷」,又以 箋以 自北 是也 而反朔方,按之經文,殊爲不順。孔疏 五章之末云「薄伐西戎」者,以終 「昔往」爲出 而 箋以「方華」爲六月 西,歸計轉緩。 城、西伐皆在其中矣。 壘 而 伐 故五 惟《采薇》遣 玁狁,「今來」爲 時 也,似 則 故四 章即 黍 四 接言 章 又 稷 不 如 然 章 戍 其 種

亦與經不合。往」仍言自朔方往西戎,雖稍變箋疏之説,然依之,義甚迂曲。嚴《緝》亦見及此,而於「昔

天子所 禮也。《詩》曰:『我出我輿,于彼牧矣。 指文王,「我」者非我文王而 之《荀子·大略》云「天子召,諸侯輦輿就馬, 王。觀毛傳於首章云「出車就馬於牧地」,合 征伐,既承王命出師,因復自命 此詩首二章之「我」,當我文王。蓋 序云「文王以天子之命,命將帥 我」,箋云:「此『我』,我戍役也。」詳《采薇 也。下『我』,將率自謂也。」三章「天子命 首章「我出我車」,箋云:「上『我』,我殷王 中二章言『我』者,代爲南仲之辭。」承珙案: 『我』者不一。首二章言『我』者,文王之辭。 「我出我車」,何氏《古義》曰:「此詩言 ,謂我來矣。』」據此 ,則「出 何 其屬帥 遣戍役」,則 三章「王命 車就馬」當 文王 一得 以 勤 專

傳箋雖未明言,其意當同耳。 仲,文王之屬。」蓋「王命南 南仲,「我心則降」自是我西戎之諸侯。 之「昔我」,亦我南仲。 言其受命於方伯,猶受命於天子也。 曰』」也。其下「天子命我」,乃代南仲自我, 命命之,猶《尚書・多方》言「周公曰『王若 「王」爲文王,故特著之云:「王,殷王也 南仲」,毛以 下文又云「天子命我」,恐人 五章「既見君子」是斥 仲」,謂文王 至四章 此則 以 南 疑 王

苹謂 索隱云『《系本》「男」作「南」』。是也。 語本《周書· 南氏二臣勢均争權 屬」,未詳其譜 名,見《出車》、《常武》二詩。 (史記 盤 ·王命南仲」、《稽古編》曰:「『南仲』之 · 夏本紀》贊。《贊》云『禹後有男氏』, 庚子生而 史記 系也。 手把『南』字,號南赤龍,孫 解》。 而國分,南仲即其後。 羅泌《路史》言禹後 其以 此傳云『文王之 爲 禹 後, 泌子 則 見 泌 有

仲爲 伐犬夷」、《帝王世紀》「文王受命四年,昆 歟? 玩《詩》云『自天子所』,又『王命南仲』, 氏侵周」之事,但所紀年歲參差耳。 據此,則南仲乃王臣,非文王之屬矣。 又『天子命我』云云,則《紀年》語頗近之。 矣,皆與毛鄭相 西伯出征,如《春秋》所書『王人會伐』之事 初年事。二書語正 序》言文王立,西距昆 立,至帝 詠事也。又據《紀年》,文王以文丁十二年 他典,惟《汲冢紀年》有之,云『帝乙三年,王 出 而平二寇,在即 命南仲距昆夷,城朔方」。此正《出車》詩所 紀年》所云,即《尚書大傳》「文王受命四 何典,殆妄也。」又曰:「『南仲』之名不 紂將。 乙三年,在位五年矣。 據此,則仲乃殷後,非夏後,不 左,姑記以備考。」承珙 位之五年,不在受命之 相合。 夷、北備玁狁、則 意南 仲以王 而《逸 其云「王 四 亦 臣 周 一年 但 見 夷 年 爲 書 知

忽之流 昭二十六年。 焉。」考文王時本 秋》時尚有「南宮嚚」、昭二十三年。 徒南仲」,皆周之南宫氏,安知 忽《史記》「忽」作 孫毓云:「宣王之大將復字南 皇父之大祖,毛傳則文王、宣王時各有南仲, 爲文王之臣 **奭》有「南宫适」,《顧** 南宫」是也。 文王之臣 命南宫、伯達、史佚遷九鼎三巫。」與《論語》 博古圖》之「南宫中」與今《焦山 八士」名合,則文武之時本有南宫氏 南 王之臣 仲, 亦奉殷天子之命,不必因此 正 蓋 則宣王時復有南仲,亦如《雲漢》 也。 ,而《常武》在 同《 《逸周 南 括」。 宮氏 詩》文,因其爲王事 有 若鄭箋以《出車》之「南 振 書·克殷解 南宫氏、《國語》云「謀 命》有「南宫毛」,至《春 世臣 鹿 臺之財、巨 宣王 于 周 非 時,已爲大 一件,傳 鼎銘》之「司 》:「命南 故《 即 「南宫極」。 橋之粟, 仲突、仲 出 書 疑 爲 師 無 南 仲 臣 宫 師 君 於 聞 仲 即

中歟? 《易》伐鬼方,周宣王命南仲、吉甫攘玁 之。 武》之「南仲」又係征伐淮夷, 惟《後漢書 知宣王之時 詩。」此則似 虎」,此皆謂 荆蠻」,應劭《風俗通》云「《詩》美南仲闞如虓 古今人表》以南仲列于方叔、召虎諸人之間 類。 南 仍 宣,玁狁侵鎬 而文王時 南、氏。 南容」。 山》家父刺 叔美宣王 前載周「八士」在中上,或者南仲即 南宫氏或單 至蔡邕《諫伐鮮卑議》「《書》戒伐夏 無 季,字」,當亦南宫氏也。 隱九年「天王使南季來聘」,杜 • 伐玁: 以《出車》、《六月》誤合爲 宣王時 而《 南仲者,則 幽 及 龐 王而《春秋》有家父 春 方 參 稱「南」,亦猶南宫縚 狁者乃吉甫 了, 是 秋》有仍 /傳》馬 有 南仲爲將,與 以 以 南 融 成叔、武、霍叔 叔之子 仲 上 ''**,** 非 與玁狁 赫 書 赫,列 曰:「昔周 南 來求 來聘,《 《漢 毛傳同 仲,《 無 狁、威 之稱 在 車之 在 注 涉。 節 唐 其

者也。 之臣。 也, 時。 仲。 如箋意 此詩爲宣王世之詩。 有 故 『命大夫仲伐西戎』,後儒 所 知 與 他家又多言宣 據 毛 田 此 或即以《出車》之南仲,誤指 傳 間 無涉。」皆所謂 但以文王時 先 以 詩 秦 文 學》日 圖 王、宣 籍,至東 王 王 「《竹書紀年》宣王 有南 時之南仲,而罕及 考《史記 時 知其 謬以爲南仲, 各 仲, 漢之末已多不 有 而 南 》,彼乃 宣王 仲 不知其 ··, 當 爲 時 秦 宣 文王 無南 而 \equiv 時 · 存。 仲 謂 年 王 必

今甯 何地 號。《稽古編》曰 或 正 『宅朔方』, 義 也 夏衛 ,朱《傳》始以 。」又「城 云:「北 往城于 在 爾 漢 彼朔方」,傳:「朔方,北 方大名皆言『朔方』。 方」,傳: 雅》『朔、北 爲 "「傳與疏皆不指『朔方』爲 靈 朔 夏等州當之。 方 方, 郡 似矣。 方 朔方 也」。 近 然漢 宋靈 《 堯 皆其 玁 方 自 也。 狁 夏, 典》 借 之 廣

詔 記 國」,又云:「朔方,北方也。」其 以 九原之地 榆林、甯夏 於玁狁者,故傳以「方」爲「朔方 方」,知《詩》所云「朔方」大略指 班《志》於「朔方縣」下並未明言即《詩》之「朔 『城彼朔方』也。」是其説 東南逕朔方縣故城東北」,注云:「《詩》所 帝時,賈、鄭、孫、王諸儒 於一年中窮兵直到北陲,連平二寇乎? 造,邠岐近地皆淪於戎狄,南仲雖良將,豈 又靈夏爲陝之極邊,去長 方之爲靈夏,吾未敢信也。 (詩)語 書即引《詩》「城彼朔方」。 釋 • 衛青傳》元朔 詩》? 以 ,正玁狁 名 郡 帶。 耳 良 ·, 豈 之所出没。 有 自 元年,蘇 此 可 見矣。」承 援 以 豈不 不始於朱《傳》。 漢郡 安千餘 北 建築朔方城,其 漢置朔方郡 《水經》「河水 即 知 文王奉殷王之 以 戦 地 其 周 珙 里。 釋 或 近玁 要在 之北 事 周 案: 《 時雲中 而 商 詩 一今之 狁之 界 之末 在 不 哉 接 惟 謂 又 史 時 用 武 朔 能

欲 贵 孔 以 盡 熾 後證 無稽 ,侵鎬及方,亦即 率 前 ? 往 耳。 傳箋不言者,古人釋經謹慎 城 當 在 於 謂 此 此 朔方。 至 宣 王 漢詔 時 所 玁 不不 引 狁

氏。 以簡 命 成七年《左傳》曰『子重奔命』是也。」《集傳》 憂念,故奔 相戒命之救急,故云『戒命』。 簡書」 **有急,以簡** ·古者無紙,有事書之於簡,謂之『簡書』。 簡書,同惡相恤之謂也。」言同惡於彼,共相 後説 簡 書 門人潘 書相告者,閔元年《左傳》引此詩乃云: 得謂之鄰國 畏此簡書」,傳"「簡書,戒命也。 載 ,策命臨 載二説, 前 命相 書相 時舉疑之,答曰: 前 告,則 救,得彼告則 前説 遣 説 之 也。」承珙案: 據《左氏》,然此是天子 詞 同 奔命 毛氏。 也。 救之。」正 此本於 奔赴其命救之。 「後説爲長,當 知鄰 後説云:「或 簡書,仍 國有 長樂劉 義 鄰 曰 難 戒 當 以 或 :

> 策命 者也。 取 伐 簡。 單 國告急。蓋上文王命衹有城 後人多假「策」字爲之。 以單札爲之,國有急難,不暇聯簡 名策,小竹名簡」。 札 以《 方」乎? 冊。 奔 西戎」確是城畢移 札相告,故謂之「簡 也。」《翻 左 命救鄰,故但云「簡書」。 字多,書之於策,字少者,書於簡 則經文何以 傳 《説文》: 象其札,一長一短,中有二編之形。」 **>** 故知毛 爲 譯名義》十一。 據 「冊,符命也,諸侯進受於王 義爲長,無 ^ 但云「天子 蓋古者編竹爲策,不編爲 説 師 文 》: 書」。 此詩 雖亦 引《文選》注「大竹 庸 若策字,本 簡 由于王 朔 若謂是臨 别 簡 命我, 方一事,「 解。 牒 書」正 爲策,但 也 命, 城 彼 指 · 當 遣 而 朔 之 薄 鄰 作 以 簡

鳴 侯,聞南仲既 阜 喓喓草蟲,趯趯阜 躍 而 征玁狁、將伐西戎之命,則 從之,天性 也。 螽」,笺云: 喻 近西 戎 「草 之 跳

憂心 以 其 流 明,曠然發蒙。』又云:『今改元之後,年飢 上 被尤廣,雖内用克責,而不知所定。 元 珙案:《後漢書・東平憲王傳》:「肅宗建初 曰:「《杕杜》『女心傷止』,乃勞還役之辭。 閱,遑恤我後」兩見於《谷風》、《小弁》之詩 望之語乎? 之詩有之,遂亦以爲室家之語。 而 赫 此 ,此朕之不德,感應所致。 便宜三事,朕親自覽讀,反覆數周,心開 年,地震,蒼上便宜。 鄉 赫南仲,薄伐西戎」,其辭奮張,豈室家 夫婦也,其一父子也。」嚴氏《讀詩質疑》 「「喓喓草蟲」以下六句,説者以《草 忡 施於將率,則不莊 望之,如阜 然 忡 意 解。 既 『毋逝我梁,毋發我笱。 見 《詩》不云乎? 螽之聞草蟲 君子, 矣。 我心 帝報 當仍主舊説。」承 則降。」」」據此 又冬春旱甚,所 書曰:『丙寅所 鳴 「未見君子, 焉。」《吕 觀其斷 得王深 我躬不 句 記 蟲 人 目 思 曰

> 也。」此引《詩 曰:「未見君子,憂心忡忡。 舜禹而鯀殛、驩 降」,文句不同,誤矣。《鹽 是以「君子」爲賢臣 不知《草蟲》乃「亦既見止,亦既覯 説有所自來。 南仲,「草蟲」、「阜螽」喻 》亦以「君子」爲賢臣也。 兜誅,趙簡子得 章懷注以所引詩 可 既見君子,我 知 西 叔 鐵論 方諸 向 鄭箋謂「君子」斥 而 盛 爲《草蟲》, 論誹 侯之嚮望 心則降。」此之謂 青 止,我 肩 **篇** 詘。 「堯得 心 一,其 詩 則 而

《小司寇》曰『附于刑,用情訊之』,又曰『求民 情,一曰 同 此 『訊』爲『辭』,辭者 歸者,當獻之也。」陳 『訊,言也。』《正月》傳曰: 訊,言。 傳義也。 此篇『獲』字無傳,蓋義見於《皇矣》也 執 辭聽」。 訊獲 醜,衆也。 《皇矣》『執訊 醜」,傳:「訊,辭 辭 謂 聽者 執其可言問所獲之衆以 碩 所生得敵 甫 ,聽其辭 連 曰:「《釋言》云: 『訊,問也。」此釋 連」無傳,義與此 人而聽 也 以 弊 箋 其罪 其

之。 字即爲『馘』之假借字。 芑》箋並以『獲』爲『得』者,失之。」 左耳曰 皇 矣》 執訊 馘。』彼傳釋『馘』爲『獲」,則此詩 傳 獲醜,言訊馘者衆也。 日 馘 獲 也。 生者訊之,殺者馘 不服 者 此箋及《采 殺 而 獻 其

杖

情也。 應。 勞還兩詩皆實紀歸 戍明年之春莫也。 章『卉木萋止』即《出車》之『卉木萋萋』,謂 薇》之『歲亦陽止』,謂遣戍年之歲莫也。次 止」,則實欲歸矣。 征夫遑止」,僅言可 一寇、未獲遽歸、踰期至春莫,則卉木萋矣。 出師之初,告以歲莫即歸,至期而望之, 稽古編》曰: 此陽止之時,女心 前雖望之,明知其未歸, 「首章『日月陽止』即《采 三詩一遣二勞,語意 以 時之景色也,故首章云 歸 耳 所以傷也。 ,次章云『征夫歸 然連平 相 遣

《吕記》引邱氏以「萋萋」爲新葉者,是也。 情同 疏釋「卉木萋止」同意。 不知杕杜之生,先有 萋」在十月以 氏《補傳》以「有皖其實」近于十月,「其葉 爲言,亦當以 即杜葉蕃盛之貌以爲興耳。 據《釋文》「皖」字從「白」,作目邊者非。其實」,傳云: 其不至而甚憂也。 相應。 孔疾」,亦與《采薇》之「憂心孔疾,我行不來」 不得盡其天性。」然則次章之「其葉萋萋」,亦 非毛意。」承珙案:末章之「匪載 時未黄落,在歲莫之前。 後 「皖,實貌。杕杜猶得其時蕃滋,役夫勞苦, 正謂踰曰 則 而 知 彼戍役自憂其死亡而不反,此室家念 其 事異矣。 歸之時耳。 將 歸 後,實已落,惟有葉耳。 實在去年之秋,葉在次年之春 而 次章傳云『室家踰 望 又首章「有杕之杜、有皖 之益 孔 疏申之,以『萋止』爲 此於文義未順,恐 切 也 即謂因所見而 匪來,憂心 時則思」, 傷 此與孔 悲, 萋

葉 而 也 後 有實,不當於言實之後,始言其葉之

繼 嗣 我日」,箋云:「嗣,續也。 王 事

也。 而 珙案: 下文「日月陽 後,其日則我之日也,故曰『繼 無已也,自閨 息。」《田 不 堅 至於陽也。 蓋 固, 往役之始,其日爲王家之日,及期以 間詩學》曰:「繼,續 我 行 役 人之屈 十月爲陽月,而兼言「日」者, 續 嗣 止即 指 其 歸 日, 承 期 此 也。 言常勞 日 嗣我日』。」承 ,謂積日爲月 復 嗣者,續 日 苦 而 無 言 之 無 休

觀

也。」

《緝》曰: 菜也,而 言之,當是枸杞。 「《集傳》有『春莫杞可食』之語,説《詩 杞之可食者,惟枸杞 陟彼北山,言采其杞」,箋云:「杞非常 升北 箋疏皆不明言杞 山采之,託 吕氏、朱氏以爲春莫杞可 有事以望君子。」嚴 也。」姚氏《識名解 爲 何 物,以『采』

謂

陽月之日

也

借此以 隨時可采,不必拘於春初春莫,作時物之變 泥 者遂謂采杞又過於木萋之時。 實,冬采根。 杞當即在『卉木萋止』之日,特期 時 爲説。 致其想望耳。愚謂采杞託 蘇 彼雖 頌謂 爲藥籠之須,然 枸杞春夏采葉,秋 或辨之云,采 言,原 而 亦 未至,故 足見其 采 不 '當 莁

《緝》云:「婦以 義 也。 母思之,當早 此詩望其夫之歸, 以正,則曰『父 後人多謂此 「此實夫也。 『父母』,與此 ,此詩則上之人體其情,各盡 《日月》云『父兮母兮』,莊姜稱莊 「憂我父母」,傳箋皆無文。 婦 同 . 歸 謂之『父母』,己尊之,又親之 母 事舅姑爲職。《汝墳》勉其夫 人 也。」李氏《集解 也。 孔邇』,蓋 則曰『憂我父母』,蓋謂 稱夫之父母爲父母。 [《]汝 墳》則下之人明 謂 不必憂 》以爲 其 正 道 也。」 義 家也 曲 公爲 云 其 其 父

耳, 夫 説 承珙案: 此説亦通 止」、『我心傷悲』,而此獨云『憂我父母』也。」 當 在役之事,念其陟 與《北· 矣。 姚 山》詞旨正 氏 《識 名 解 山采 合。 ₩ El 杞而以父母 : 故上云『女 此 當 爲 遥 心 爲 想 傷 憂 征

敝也」,從巾單。 殊失陸意。」承珙案:段説是也。 者,則其引申之義也。 緩者,其車敝之狀歟? E 敝」之名,《詩》之「車敝」蓋本無其字,假「幝」 古本當是『巾敝貌』,故從巾。 車骚骚」,音同。』恐誤。」段注《説文》云:「按 也。』又《玉海》載《釋文》云:『《韓詩》作「檀 幝幝」,昌善切。 編》曰:「《説文》『幝,車敝貌』,引《詩》『檀車 同。 檀 《釋文》:『幝、《韓詩》作緣。』然則 車幝幝」,傳: 今本《釋文》乃『巾』譌『車』, 『緣,偏緩也』,尺善切。 《釋文》引《說文》「巾 「幝幝,敝貌。」《稽古 《廣雅》:『綫綫, 《詩》以爲車敝 「幝」爲「巾 緩 偏 音

謂 爲之。 嘽嘽」,則又假「嘽」爲之矣。 車敝若敗 四 《後漢 ·牡痯痯」,傳:「痯痯,罷貌。」何氏 巾 書 ,故從巾,殊屬附 劉 陶 傳》注 引《詩》作「檀 徐楚金《繋傳 車

《方言》:「儭,偻也。」「儭」即「仰」字,「偻」即 注 : 借。 也。」司馬相如《子虛賦》作「徼 也。」「浴」字於義 **悹,無所依也。」是《毛詩》「管」字乃「悹」之** 雅•板》云:「靡聖管管。」傳云:「管管,無 《古義》曰:《爾雅》「痯痯,病也。 「罷憊」,其義皆相因耳。《廣雅》:「管管,浴 「悹,憂也。」引申之爲「無所依」,又引申之爲 所依也。』《廣韻 「痯」字。 「伽」字之誤。《説文・人部》:「御,徼仰受詘 此「痯」字當亦「悹」之借。《説文》: 「谻,疲極 當通作『蹇』,跛也。」承珙案:《大 也。」司馬 不 十四緩》引《詩》傳作 可 通,竊 彪云: 疑爲「仰」,或 「谻,倦也。 谻」。 《説文》無 郭 「息

毛傳「痯痯,罷貌」有合矣。 譌爲「浴」。然則張揖訓「管管」爲「御」,正與或「腳」省爲「俗」,《集韻》:「腳,或作「俗」。」輾轉遂或「腳」省爲「俗」,《集韻》:「腳,或作「俗」。」,與「倦」字。《説文・心部》:「腳,勞也。」亦與

下、無條止,會言近止」,傳:「卜之筮之,會人占之。」箋云:「偕,俱。會,合也。之,會人占之。」箋云:「偕,俱。會,合也。或卜之,或筮之,俱占之,合言于繇爲近。」正或卜之,或筮之,俱占之,会言是會聚人占之義,即與義曰:「傳以『會言』《士喪禮》『筮宅旅占』同,後二冠禮》『筮日』、《士喪禮》『筮宅旅占』同,故爲『會』當爲『合』,後因之爲『合』。言于繇,即與言之字皆从人、《説文》:『凸,三合也。』禮,百言於兆卦之繇也。」孔顨軒曰:「按,『會局」之字皆从人、《説文》:『凸,三合也。』禮, 一之,若不爲占,則文皆空設。『偕』既爲『占』, 一之,若不爲占,則文皆空設。『偕」既爲『占』, 一之,若不爲占,則文皆空設。『偕」既爲『占」, 一之,若不爲占,則文皆空設。『偕」既爲『占」, 一之,若不爲占,則文皆空設。『偕」既爲『占」, 一之,若不爲占,則文皆空設。『偕」既爲『占」, 一之,若不爲上,則文皆空設。『偕」既爲『占」, 一之,若不爲上,則文皆空設。『偕」既爲『占」, 一之,若不爲上,則文皆空設。『偕」既爲『上」,但, 一之,言子。

未精。」

魚麗

其治化之盛。何容以文害辭,疑其開逸樂之 賢,逸於任人」耳,乃序者推本作詩之意,美 外,始於憂勤,終於逸樂,故美萬物盛多,可 已用此《序》。 不始於憂勤,而終於逸樂。」此在西京之初, 漸? 司馬相如《難蜀父老》云:「王事未有 勤、終逸樂者,不過如《書》傳所言「勞於求 之心」,以「終於逸樂」爲後序衍説,開後世人 也。其云「文武無逸樂之事,逸樂亦非文武 以告於神明矣。」嚴《緝》引「或説」云:「始於 主怠政之漸。案: 此則過泥。 憂勤,言其心。終於逸樂,言其效。」此説 也。文武以《天保》以上治内,《采薇》以下治 《序》曰:「《魚麗》,美萬物盛多,能備禮 嚴氏以爲後人衍説,過矣。 《序》云始 憂

魚

麗

于

罶

傳

麗

歷

詩 後 箋

六六四

故以 五. 錯 前 注: 笱,所以 然《淮南 未明言其法,後人以「先偏後伍」之言,故爲 人入者無不有所著。 承 詩》耳 傅 麗 陳 守隘,而 陳以效之耳,未 珙 綜 後 謂 與「 「歷」疊 爲訓。 「麗,附也。」「麗」「歷」皆有 左 自 横 右 布 有 附 捕 · 兵 桓五年《左傳》「爲魚麗之陳」,注家 中 之,●常使試之於 布 千人 魚,其門可入而 同 各 《詩總聞》曰:「鄭有『魚麗陳』, 韻 置 略訓》云: 謂 五. 佛敢 爲 如 陳 訓。 必 附 魚笱者,但不必用 每 過 取 箸 今漁人置 也。 也。」高 於《詩》之《魚麗》也 一陳具 爾 「羊腸道發笱門,一 雅》: 不得出。」則軍 地, 周 注云:「笱,竹 也 魚器 禮 Ŧī. 「附箸」之義 頗 陳,大率敵 歷,傅 · 大司 類 承 相 陳 珙 以 水 形 也。 案 寇 0 道 釋 中

傳 : 罶 曲 梁 也,寡 婦之笱也。」正 義

> 耳。 《釋訓》「凡曲者爲罶」,此似 屬之「寡婦之笱」,非 **笱謂之罶」,由** 以「罶」爲凡曲者之大名,故《釋器》「寡婦之 聲同字通,故「罶」字亦 凡以曲薄 笱。』然則曲, 梁 笱 「簍,竹籠 號之『寡婦笱』耳,非寡婦所作也。」承珙 孫炎曰:『罶 也 曰 也。 也 : 毛傳「罶 0 釋器》云『嫠婦之笱謂之罶」,是寡婦 《釋訓》注郭 釋 凡以薄取魚者名爲罶 訓 也」,亦是以曲爲之者。 爲之者,通 **>** ,曲梁。 一,曲 薄 云 其 也。 梁」, 亦以 凡 璞 用 曲 以 其功易,故謂之寡婦之 得 則 曲爲,故 或作 引《詩》 《釋訓》「凡 薄爲魚笱,其功易,故 者 「罶」名。 分别 爲 翼。 非專 罶 以 也。』《釋器 傳 亦得「罶」名 曲 曰: 是 指魚器 曲者爲罶 如《説 惟《釋 「婁」「留 爲梁者專 罶 一罶 案: 曲 文》 謂 訓 注 曲 梁

⁰ 「水」,原誤作「小」,據《詩總聞

是也。 梁。 雅》云「寡婦之笱謂之罶」耳。 曲 《衛風》傳云:「石絶水曰梁。」《説文》:「笱, 梁』以别於凡梁,『寡婦之笱』以别於凡笱。」 則謂之「寡婦之笱」。 空。」然則梁,以 云 《邶風》「毋逝我梁,毋發我笱」傳云:「梁,魚 承梁而取魚者。 所留也」、《廣雅》「曲梁謂之罪」,皆本毛傳。 竹捕魚笱也。」惟以薄爲梁,以笱承之者, 「梁,水 笱,所以 **笱與罶本非一物,以其相** 也。 偃也。 捕 説文》「罶,曲梁,寡婦之笱, 魚也。」先鄭注《周禮 絕水遏魚使入笱者。笱,以 但梁與笱不皆以曲爲之,故 偃水爲關空,以 段注《説文》云:「『曲 爲用 戲 笱承其 故《爾 魚

徐州 云: 義曰:「『鱨,揚』者,《釋魚》無文,惟陸 『鱨,一名黄頰魚,大而 人謂 鱨鯊」,傳:「鱨,揚也。 之揚。 黄 頰, 通 語 有 也。』『鯊,鮀」, 鯊,鮀也。」正 力,解 飛 疏》 者。

《疏》、郭注皆以爲吹沙小魚者,不誤。《後漢 《疏》「大而有力」之説不合。 鯊 《釋魚》文。 書》注亦引郭義恭《廣志》曰:「吹沙大如指 即今所謂參鰷者,所在有之,長不盈尺,與 沙中行。」《説文》「魦,出樂浪潘國」者,此别 有二横骨,兩鬚有胃,帬游作聲。]然此 尾俱似小鮎,無鱗,腹下黄,背上青黄,腮 也」、《廣韻》「觚,無糺,魚名」,李時珍云:「身 **魜,以爲即此詩之「鱨」。** 寡婦笱而得鱨鯊之大魚,是衆多也。」承 古編》引孟詵《食療本草》有黄顙 魚,魚之健者,似與陸《疏》「有力」説合。 案:《山海經》之「鱤」,郭注以 云:『魚狹而 種、非《詩》之「鯊鮀」也。 」大魚者,此特對寡 郭 小,常張口 璞曰:『今吹 婦之笱言之耳。 吹 考《廣雅》有「鯙,飢 沙,故曰 又正 沙也。」 爲 鯊 鮀, 黄 魚 義以爲「鱨 (頰魚 吹 ,一名鉠 八沙。」此 陸 則 魚 《稽 疏 珙 陸 陸 似 鱤

不過 鱨鯊大小猶未有定説,不必泥可也。」 員 著魚名以見魚之多,非謂止有 魴鱧中魚,鰋鯉大 爲大魚,鯊爲 緝 俯 一爲之説,則《潛》六魚又豈皆有説乎? 仰 如《潛》頌言『有鳣有鮪,鰷鱨鰋鯉」,多 K 浮沈諸 孔 小 氏 説。 魚,山 以 魚,又有黄青玄白赤及方 鱨 俱見《埤雅》。 溪溪皆一 陰陸氏又云鱨鯊小魚, 爲 大 此 然詩人言此, 魚 六魚也。 陸 璣 以 鱨

此 酒多也。 正 多」此二字爲句。 上三章也。 魚又多也。」《釋文》云:「『有酒旨』絶句,『且 「物」。 多矣」,下二章皆疊上章句末之字謂之爲 知『且多』、『且旨』、『且有』皆是魚也。』《稽 義曰:「言『且多」文承『有酒」之下,則似 君子有酒,旨且多」,箋云:「酒美而 若酒 而以爲 首章言『旨且多』,四章云『物其 ,則人之所 魚多者,以此篇下三章還 後章放此。 爲 ,非自然之物。 異此讀則 非。」 以 覆 此

《釋文》以『君子有酒旨』爲句以就箋訓,其實 嚴《緝》、范《傳》皆用其説者,以下三字承 其意以下章『物』字當爲 言,句法與文義皆無礙也。」《虞東學詩》曰: 成。 多」,明以下三字爲句矣。以『多』屬『魚』者 各末句結上三句耳:酒既旨多旨,魚又多旨 斷句,『多』、『旨』、『有』三字仍可説魚,三章 物僅與之稱,安在其盛多乎? 言,下三章文義未順。 古編 『旨』『多』皆屬『酒』,而 康成未嘗作此句讀也。 有,中俱用『且』字關兩意。 下三章遂承魚而 不知此篇言萬物盛多,酒成於人,雖多有限 『有』三字上言酒,而下言物者,見物與酒稱。 此詩義解,新舊不一,惟李迂仲之説 但『旨多』、『多旨』、『旨有』六字皆承 》 曰 : 「《集傳 》於「酒」字 朱子從之。 箋云『酒美而 陳櫟言『多』、『旨』、 魚也。 斷 句, 源謂『有 潁 句 日記 濱則以 此 法 較 酒 酒 渾

制》之前,其書最古。 《集解》以「物」不專指魚酒 鼈皆得其所。 多矣。」因歷陳古者畋漁山澤之制,故鳥獸 後微物衆多,取之有時,用之有道,則物莫不 且. 爲衆物。 物之衆多,可見《序》、傳皆以經文「物」字即 云:「萬物盛多。」傳於首句下云:「太平而 酒與魚也。」承珙案:《虞東》謂鄭箋本以「旨 君子爲酒醴以宴賓,而其物旨且多,不必言 酒」爲 多」爲句,陸氏誤讀此解,甚精。 説 美萬物盛多能 則接人下三章,又多費周折。 文 也。 鄭箋專屬之「魚」,似非《序》、 傳所引者 然 備禮之意,而 如 鄭 且此爲全篇大義,極言 説 似 則 ,所見亦確。 有成文,要在《 此 説亦破 詩 但言 其從李氏 李氏 碎。 魚 《序》 酒 傳 Ŧ. 魚 謂 如

魚》云: 魴 一鱧 鳢, , 鯇。」 舍人曰: 傳: 鱧 鮦 也 豊 。 正 , 名鯇。」郭 義 曰 璞 釋

字。」此由郭璞誤 草經》作 也。」「鱸,鮦也。」鱸與醴異物異字。 然並不以「鮦」爲「鱧」。 改作「鮦」,陸孔皆誤同定 非傳意。」承珙案: 也。作『熙』者,依《説文》『熙,鱧也』所改,皆 者,乃依郭注《爾雅》所改,謂鱧鯇各爲 注《爾雅》者舊無異説,作『鯇』爲是。 前 引孫炎『鱧鯇 云:「考此正義引舍人曰『鱧,名鯇』,下正 「醴」爲「鱯」,以「餜」爲「鱧」,與毛師 『鯇」,又與舍人不異。 定本「鱧鮦」,「鮦」與「燻」音同。」《校勘記 云: 「鱧鯇」。 [儒「鱧」爲「鯇」」,是傳正取《爾雅》爲解 鱧 「蠡」,陶 若作『鲖』,似與 鮦。』徧 一魚」、《釋文》『鮎』下云『毛及 以 檢 隱 據正義,是定本始依郭璞 浴諸本, 「鱧」爲「鮦」,後人遂皆以 居云: 或有本作『鱧熙』者 其云:「鯛 或 本耳。 「蠡,今皆作「醴 郭璞 作 Ē 鱧 《説文》以 同。 承 作『鮦 **鰠**,《本 不同 曰 若作 一魚 或 艫 義

鱋 爲 而 不 知 ~ 爾 雅》「 醴

鱧 鮦 則 下文有「大鰹」、「小鯢」之 自 目, 名「 鯇 而 與

彊郭以

從

孫

而

不明

斷

其

是

非,將

焉

適

從

名

鯷

ć

^

埤

雅

談既

引郭

注

又

溷

孫

炎注

爲

鱧」絕不相涉 也。 **鱋**,即今俗所謂 一烏 魚

頭有 七星者, 名鱺。 《廣雅》: 孋 鮦 也。」

《詩》之所詠 韓詩外傳》: 南假 子 必 Ė 「南假子過程本,本爲之烹鱺 非 「聞聞 鮦魚,傳必不訓「鱧」爲 君 子不 ・食鱺 魚。」 然 鮦 則

可 知矣。

鰋鯉」,傳: 鰋,鮎 也。」《釋文》: 鰋

呼鮎 音偃 以『鮎』釋『鰋』,「鱧」爲『鯇』,「鳣』爲『鯉 爲鮧。 郭云,今鰋額白 鮧音啼,又在 魚。 私 反。 鮎,乃兼反,江東 毛及前 唯 儒 皆

不協 郭注《爾雅》是六魚之名。 ,或恐古今名異,逐世移耳。』《稽古編 今目驗毛解 與 世

曰 : 「《爾雅》『鰋,鮎』,孫炎以 亦 訓 「鰻」, 而 「鰋」 即 『鯹』之重 爲 魚。 《説 文。

惟

郭璞分爲二、云『鰋、今鰋額

白魚。

鮎,别

乎? 此類 額」。 滑 以 鰋,南· 鰋魚, 驗 滑 翼》云:「鮧魚偃額,兩目 案 : 義。 魚」、「鮠魚」,陶 腹平著地,宜 也。 無 其身滑無鱗故名 與毛不合,何邪 郭云「鰋,今鰋額白 《本草綱 ,皆偃額 鱗, 《詩詁》及《韻會》皆勦襲陸 人日 曰鮎 偃者,仰 郭氏分其所不當分,而 謂 鮎。 魚,注云古曰 之鮎 而 目》列『鮧魚』之名,曰 得『鰋』名,亦非 隱居 也。 色白、蓋以 是 魚 鰋、鮎直爲一魚矣。」承 「鮎」。 此 以爲皆鮎之屬。 是 即 魚」、「鰋額」當作「 也。 鰋,今日 上 鮎魚 其仰額故名「鰋 鮎 陳,頭大尾 猶 郭氏『鰋 陸 之狀。 别 德 鮎,北 脱,且 黏 録 明 鯷 》有 謂 今目 乃 **爾** 小小,身 魚 額 言鮎 其

君子有酒,旨且 有」,箋云: 酒 美 而 此

目

雅

偃

珙

日

本

鱯

也。 者,謂時時之有。「多」横言之,「有」豎言之 備,謂水陸之羞。」承珙案:以「有」爲「備」, 貴其備,備貴其時。酒之備,謂諸酒。 義殊複,宜皆指政而言。 物。其下一句「嘉」、「偕」、「時」若再指物,文 上三章末一字而言,「多」、「旨」、「有」皆指 有,不當言「時」。 不知下三章每上一句皆承 仍與「多」同。竊謂多者,謂一時之多。有 皆美也。 魚又有。」《詩 「有猶備也,義進於『多』。後三章曰 『多』不足言。」戴氏《詩考正》用之,謂: 或謂末章「物其有矣,維其時矣」,若常 曰偕曰有,皆備也。多貴其美,美 經通 解》曰:「有者,無一不備 鄭箋似非經旨,詳 嘉曰旨, 物之

美又齊等。」「物其有矣,維其時矣」,箋云:又善。」「物其旨矣,維其偕矣」,箋云:「魚既「物其多矣,維其嘉矣」,箋云:「魚既多

「魚既 首章 也。 傳云:「時,善也。」此「時」與「嘉」同義之證 酒既旨,爾肴既嘉」,「爾酒既旨,爾殽既 亦與「偕」「嘉」同義。 以「偕」爲「時宜」,是末章「維其時矣」,「時」 『偕』,是『偕』與『嘉』同義。」承珙案:《荀子》 也。」《荀子》以『時宜』、『敬交』、『驩欣』爲 矣。」不時宜,不敬交,不驩欣,雖指,非 玉帛云乎哉?《詩》曰:「物其指矣,唯其偕 之轉耳。《荀子•大略篇》曰:『禮云禮云, 「飲酒孔嘉」、「飲酒孔偕」、「偕」亦「嘉」也、語 詩『維其嘉矣』、『維其偕矣』、《賓之初筵》曰 雅》曰:『皆,嘉也。』『皆』與『偕』古字通。此 且. 傳所云「取之有時,用之有道」也。故 有又得其時。」《經義 此詩「嘉」「偕」「時」皆謂政之善,●即 嘉,善也。 述 聞》云:「《 《頻弁》「爾 時」, 廣

「詩」,原誤作「時」,據《續清經解》本改

0

未及。 道,則 章」。 時」,最合經旨。《左傳》襄二十年: 時 《書》曰:『敬授民時。』《詩》曰:『物其有矣, 《説苑·辨物篇》曰:「天子南面,視四星之 維其 鯊、魴、鯉 如宋,「歸,復命。公享之。 維其時矣。」物之所以 之。」凡言「維其」者如此,此詩文法倒裝耳。 文「維其」二字確是推本萬物盛多之由 『太平而後 有章矣,是以 六月》序云: 也。」此解「有」爲「常有」,「時」爲「用之以 知民之緩急。 正義曰:「物其有矣者,謂 如是,所以如是。 萬物莫不多也」。」此 而「物」不專指魚,「時」謂取之有時, ,并有旨 ,微物衆多。 有慶矣。」「維其有之,是以 魚 [酒也。 急則不 麗》廢則 有而 《裳裳者華》:「維 取之有時,用之有 維其 不絕者,以其動之 賦藉,不舉力役。 可 法度缺矣。」 賦《魚麗》之卒 以 時 補《詩》疏所 矣 言魚有鱨、 者,注云 季武子 猶 且. 似 其 經

皆較《詩》疏爲勝。

笙 詩

《禮》注固云「周公制禮作樂,采 《白華》,孝子之絜白也。 云「歌」。 乃云《南陔》以下六篇有 矣。其後,陸孔諸家皆無異説。 爲樂歌,所以 子論《詩》『雅頌 詩》,故有此語。 注以《笙詩》亡於孔子之前。其時未習《毛 記之焉。」案:《儀禮 亡其詩辭,故置其篇義於本次後,别著此 宜黍稷也。有其義,而亡其辭。」正 此二句,毛氏著之也。 《序》云:「《南陔》,孝子相 「有其義,亡其 通情、相風 各得其所」,時俱在耳。」 至作箋時,遂改之云: 鄉飲酒》、《燕禮》, 聲 言有其詩篇之義,而 切 《華 無詩 也。 辭」非「亡失」之 黍》, ,故云「笙」不 其有 時世之詩以 至劉 戒 時 以 此篇 義 和 原父, 養 · 孔 曰 歲 也。 明 鄭 豐 語

姜氏《詩序

篇,皆謂之歌,而可云『六詩』有聲無辭乎?」 告樂正曰:正歌 之也,是《禮》文顯以爲有辭矣。」《讀詩質疑》 百』曰《詩》三百十一篇,兼此六詩,則六詩有 曰:「升歌、笙入、間歌、合樂各三終,於是工 陔》、《白華》、《華黍》』。 之辨尤悉。此外可采者,范氏《詩瀋》曰: 長發、徐位山諸人皆力主有辭之説,而 樂、曰奏」,而不言「詩」,明其有聲無辭。 作一篇之序。」朱子本之,據《儀禮》「曰笙、曰 云:「意古經篇題之下必有譜焉,如《投壺》 六章有題無詩,作《序》者但考兩字,便 魯鼓、薛鼓之節,而亡之耳。」當時《吕記》、嚴 「《儀禮》明云『笙入堂下,磬南北面立,樂《南 廣義》曰:「朱子注《論 也。 而近來郝仲輿、朱長孺、陳 備。 李《解》引鄭 凡樂四節,爲詩十八 樂之爲言比音而樂 漁 仲 語》『詩三 i i i 郝 率 且 意 此 氏 其然? 《南陔》,南隴也。《白華》見於變雅,爲刺 《九夏》,何不並留之? 辭可 子孫衆多、《葛屨》凉薄以 作《序》者已誦全文,不然,即鑿空杜撰,豈能 篇未嘗以命篇取義,六笙詩,序詩者何以知 有即其篇名已見詩旨者,如《螽斯》多子以 絜白』即爲『白華』之『白』也?《三百篇》亦 之『伯』非即『叔兮伯兮』之『伯』,安見『孝子 『漢廣』之『廣』。《旄邱》云『刺衛伯』,『衛伯 如《漢廣》云『德廣所及』,『德廣』之『廣』非即 至是?《序》最簡樸,間與《詩》中字面 『續』三義,何以見萬物得由其道? 可想見 王,何以知爲孝子之詩。『庚』有『更』、『償』、 公據《儀禮》姑留其目,則《禮》有《貍首》又有 謂亡於删《詩》之前,宜名亦不存矣。 知。 因 如謂 題 敷衍以補之也。 笙必 無詩

緝》仍從古説。

「亡」,乃本

無

則當

云。至

譜

如

如謂

刺

儉、《北風》疾厲

偶同

潘晉臺謂《詩》三百

竊

謂

不

出出

相 詩 以 而 笙、曰奏,豈不 主本無其辭之説。 統》皆以《象》與《武》爲下管之樂,是曰 之《序》曰奏《大武》。」夫《禮・文王世子》《祭 舞《象》,則先歌《維清》,是以其《序》曰奏 耳。」承珙案: 爲順文,爲《詩》序者難矣。 束皙之前補 名相戾,既以爲無理,《序》與篇名相 斯》序者衹見『螽斯』二字乎? 新 象》舞。 序》與篇名相合,疑其不見全文,將謂 刺刺 傳以爲鄭漁仲 有夏侯 申 「奏」者 虐 謂 則云管與笙 將舞《武》,則先歌《武》,是以《武》 ,劉氏既 碩 湛 間 鼠 昭 歌 劉原父《七經小傳》有曰:「將 自 刺 之聲 作。 明不人《文選》,遂致 相 知其 貪 以有辭者爲歌,無辭 乖 其於笙詩 有 戾乎? 此 有辭矣,何於笙詩獨 義 類,皆竹 類不 無 辭。 可 《 六經· 引商 且《序》與篇 更僕。 吹之。 而其 合,又以 奥 份 作《 言管 之説 管 無 論 者 此 《燕 如 六 ~ E 傳 以

禮 「魯鼓」、「薛鼓」亦 若一者,投壺當 黍」之由,必是詩有此字。 自來乎?」案: 若笙詩有聲 薛鼓」之節,則陳氏《稽古編》曰:「魯鼓、薛 年: 「弦,鼓瑟者也 「命弦者曰:奏《貍首》,間若一。」注云: 鼓有譜無辭 見不能自圓 知管籥有辭 禮》祈年吹《豳》於管籥之類,必得 之以播歌 有 射義》所云『《詩》曰「曾孫侯 一辭矣。 *****: 宋公享昭子,赋《新宫》。 「升歌《鹿 後漢明帝亦取焉,必見其辭,故 詠 無 ,則僅冠 其説矣。 而何以 孔疏已云其名曰「南陔」、「白華」、「華 辭,則『南陔』、『由庚』等名何 蓋 鳴 以 未 貍首》、《詩》篇名也,今逸。 》,下管《新宫》。」 必 爲 有 承珙又案:《投壺》云: 以國名,不能更立别名。 獨謂 隨 志 若《集傳》所引「魯鼓 有 所 取 詩 笙 弦之《貍首》以 節 而 詩 焉。」然則 氏 謂之「賦」, 無 無 」是也 辭 辭 有辭。 昭二十 ? 者。 下 亦 間 爲 文 周 口 得 既 則 五

詩

笙詩之必

可

歌

非

謂笙詩之必不

可

歌

也

凡詩,可

以

歌

亦可

以

笙。

所謂

笙

所

謂

『笙詩』,謂笙必有詩

非

謂

笙詩之必

問

最

善。

從來辨

笙詩,未有辨

笙其詩者。

邪

亦

别

有歌

詩

者

而

僅

以

笙

應之邪

詩

,則《鄉飲

酒禮》『笙人三終』,將以笙

笙

又

毛

西河

《答李恕谷書》曰:「據問

笙

詩

先

亦

必用:

曲

譜

出

其

初,未

有

有

聲

而

無

一解者。

即

如

辭

易存,習其

聲

者

其

辭易亡,理容有之。

而

後

有調

有調

而

後有譜。

證

無

辭

有義,不知有辭

節。

是徒

譜

者

尚

必

有

取

節

之詩,

而

謂

禮

經

之笙奏乃

無

詩

而

徒

器

乎?

至王

雪

Ш

以

有《上柱

二》、《鳳

雛

》、《平調》、《清調

》、《瑟

調

琴譜》「長清」、「短清」、「長側」、「短側」

平折》、《命喙》七曲,有聲無辭,黄東發

,後習之者但留工尺耳。 或以習其辭者其 而後有聲,有聲 俗樂工尺, 唐樂 又引 此 要 之 有 夫 詩 有 以 有 者 ? 之軍 歌矣。 調 也。 《鄉飲酒禮》之『笙入間 《象》,堂下俱不歌, 不 笙鐘笙磬,所以 以應歌。《尚書》有笙鏞、《周 回》、《思 器,有不歌 歌 笙 飲酒禮》之合樂是也,此有歌之笙也。 而器,如《大射禮》之管《新宫》,始奏禮之管 工歌于上,而堂上堂下之笙瑟皆應之,即《鄉 笙 歌 之器,皆在堂下,原 也。 也。 之憑虚作聲,無字音 中, 是以《春秋傳》有歌鐘,即 故往以不徒器 此 蓋笙 悲 並 然 如漢《横吹》,東、西晉《大角》,皆用 而 翁》 無 而 與 器,總必 歌 歌 育、管、籥四 等。 應笙。 Ι, Ī 必在 而但 折 則 而 有詩 無 歌』是也 豈 其 曲 夫笙又有應 上,即 徒 以 耳 無 有 中 器 器者。 管笙聲其 ·, 非 詞 笙 有 皆主 禮》 如《 笙 管 詞, 頌 此此 謂 管鐘 謂 〉有鐘 鐘 鄉 一聲詩 而 不 但 有 不歌之笙 如 頌 則 射 反 其 如 有 笙 、磬,所 詩, 禮 皆 上 字 笙 不 步 無 歌 一, 即 歌 瑟 詞 即 而 即 之 應 而

琴瑟 節。 者,謂 歌《關 即 惟 承 則瑟工亦不歌而 以器器詩,則又不然。 以張家之聲合李家響者。 瑟與笙管也。 上歌《關雎》,下笙《鵲巢》以應之, 石、絲、竹以歌之。 蘩》、《采蘋》皆然。 而 , 珙案: 應之。 皆遷堂 鄭 其 亦器 專 注 所云『魯鼓』、『薛鼓』者,是歌工亦居下, 雎 歌工必堂上,堂上之瑟 而 以笙吹,故其 儀 》,則堂上之瑟、堂下之笙管,皆群起 皆 毛説是也。 其歌《葛覃》、《卷耳》、《鵲巢》、《采 詩。 下,而 禮》 可 以 乃孔 上下有尊卑,八音無貴賤也。」 所云以 樂 應 但瑟《騶虞》之詩,以主 正命絃者曰: 其 仲達誤注《鄉飲 金石者,鐘磬。 舊注所謂合樂者,合金、 笙詩乃不歌而笙之詩 辭易亡。 歌 笙吹此 《射禮》至命射時 但世有 是以合樂之法, 必 詩 不 不 奏《騶虞》。 然,他詩 以 . 如 ,則世 過 酒》義,謂 絲竹者, 爲 堂 爲 樂 下 分别 無 歌 也。 一鼓 具 之 有 Ι.

> 疑義矣 在 而 獨 亡 此 六篇, 亦 屬 可 疑。 得 此, 乃 更 無

《崇邱》、《由儀》云:「此三篇者,《鄉 庚》。 端。 又有『升歌《鹿鳴》,下管《新宫》』。 臺》,笙《由 首,遂通耳,而下非孔子之舊。」又於《由 公爲《詁訓 亡之。其義則與衆篇之義合編,故存。 俱在耳。 黍》』是也。 『笙人,立於縣中,奏《南陔》、《白 云:「此三篇者 詩》篇名也, 燕禮》亦用 云又闕其亡者,以見在爲數,故 鄭箋於「《南陔》、《白 歌《南· 篇第當在於此,遭戰國及秦之世 儀》」,亦遭世亂而亡之。 傳》,乃分衆篇之義各置於 孔子論《詩》『雅頌各得 有嘉魚》,笙《崇邱 焉,曰『乃間歌《魚麗》,笙《 辭 義皆亡,無 鄉飲 酒 》、《燕 華》、《華黍 以 知 禮 歌《南 其篇第之 《新宫》亦 其所」,時 華》、《 用 《燕 推 飲 **学**下 其 至毛 酒 庚》、 改 Ш 由 篇 華

則不得不後。

人之列,則不得不先。

之次,非編《詩》之次。夫奏樂,《南陔》在笙 樂之次,升《南陔》於《鹿鳴》什末,抑《魚麗》 定《詩》之先後,則間歌之後,尚有合樂三終, 篇第元無改也。至朱子之據《儀禮》,則奏樂 之更什,祖《六月》序及康成之説,於《詩》之 於《華黍》詩下,更以《白華》爲什首。 夫子由 詩而以《南有嘉魚》爲什首者,毛公之舊也。 文武時詩,故遂移此《序》『魚麗』一句自《華 處。」朱子《詩序辨説》云:「《魚麗》以下篇次 而更以《南陔》爲什首。朱子又據《儀禮》奏 泰》之下而升於《南陔》之上。』《稽古編》曰: 尚仍《儀禮》次第,獨以鄭《譜》誤分《魚麗》爲 爲毛公所移,而《六月》序自《南陔》以下八篇 小雅次什之首,至宋儒而兩更。不數六亡 非孔子之舊,仍數六詩於什 各以類相從耳。 《魚麗》在間歌之列, 若必據此以 中, 《魚麗》殿《鹿鳴》之什,非毛公所移。 氏所移可知。 月》序「魚麗」一句在「南陔」之上,亦必非鄭 於此」,是謂《南陔》三篇在《魚麗》後。 矣。今考鄭箋云孔子時《南陔》等「篇第當在 之次以釐定之,則又與蘇《傳》、朱《傳》互異 庚》、《崇邱》尚依毛氏之舊,復據《儀禮》相 據蘇《傳》,以《南陔》爲次什首,而又謂 案:《小雅》篇什,宋儒尚不止兩更。《吕記 以《南有嘉魚》爲次什之首,良爲有見。」承珙 見之哉? 嚴坦叔《詩緝》一依毛傳之舊,仍 夫鄭未遂之《詩序》遠在千餘年前,朱子何自 置二南於《小雅》後乎? 朱子既憑《儀禮》之 所奏者《關雎》之三、《鵲巢》之三也,亦當迻 二篇,自《鹿鳴》至《華黍》皆言「缺」,自《由 文定《詩》篇之先後,又謂《六月》序『魚麗』句 本在《華黍》下,而鄭氏迻置於《南陔》之上。 且《六月》序列次《小雅》二十

蘇子由嫌其

而《六

足見

其《由

間

所置。 《六月》序「《由庚》本第在《華黍》下而與《崇 《詁訓傳》,分別衆篇之義,各置篇端。此三 庚》以 非孔子之舊。」正義謂「毛公不數亡詩,推改 亡,使相從」者爲當耳。 此則不誤。《由庚》三篇連聚一處,當由 邱》同處者,以其是成王之詩,故下從其 篇之《序》無詩可屬,故連聚置於此。」此 知三詩本當在此,非毛所連聚也。 華》、《華黍》三詩本相連,正義云:「毛公爲 於「南陔」上也。又《六月序》,《南陔》、《白 見《序》文原本如此,非由鄭氏移「魚麗」一句 王之詩。言「缺」者,爲剛,君父之義。不言 黍》以上爲文武之詩,《由庚》以下爲周公、成 ·缺」者,爲柔,臣子之義。 見在 然孔説尚不如陸氏《釋文》云「以 則 爲數,故 變其 文。 推 孔 改什首,遂通耳,而 疏 又箋云:「闕 雖近穿鑿,然亦可 以 此爲 别, 惟所云據 謂《 其亡 毛公 類」, 其 由 俱 不 華

> 《白華》領什之始,取彼虚名,當其實數,亦可 外,此 以不必矣。 既多,簡札煩重,不得不分。六詩既亡,自無 所定,收入什中。 雅》及頌皆然。《稽古編》謂毛公置六詩於什 庸分篇數而 什,末什爲十四篇,奇零之數歸於末什。 日》爲次什,以下每相差者六篇,凡《小雅》七 闕六《笙詩》不入什數,以《南有嘉魚》至《吉 什,以下凡《小雅》八什,什各十篇。 鳴》至《魚麗》爲一什,《南陔》至《湛露》爲 止《鹿鳴》一什是 什篇之首,遂通 本正義之説。 入什目。 盡《小雅》云耳。 殊不知分什者,止因篇 也。」據此,是孔子時、《 翁氏《附記》謂當從 必以《南陔》居什之終, 言以下非 毛傳 蘇 令大 鹿 吕 則 則

毛詩後箋卷十六終

Document generated by Anna's Archive around 2023-2024 as part of the DuXiu collection (https://annas-blog.org/duxiu-exclusive.html).

Images have been losslessly embedded. Information about the original file can be found in PDF attachments. Some stats (more in the PDF attachments):

```
"filename": "MTMxOTM5Njguemlw",
"filename_decoded": "13193968.zip",
"filesize": 187601852,
"md5": "7ca36f20aa0c3e6d4a5ac96b83d3fb9d",
"header md5": "17d4f937ed1aa16f3095e8806ef9df7c",
"sha1": "e9df2bb7f24b2f107283591511fdf194fa04b20f",
"sha256": "592e3e997244d46f0b8acf0ee3d9208dcdccdaba064cca5331e954facbeeb80b",
"crc32": 3296665705,
"zip_password": "",
"uncompressed_size": 209819045,
"pdg_dir_name": "\u300a\u5112\u85cf--\u7cbe\u534e\u7f16--\u4e09\u5341\u300b_13193968",
"pdg_main_pages_found": 704,
"pdg_main_pages_max": 704,
"total_pages": 727,
"total_pixels": 4725197568,
"pdf_generation_missing_pages": false
```